

Bëngbe Bëtsa
Cabëngaftaca
Entsoyebuambna



New Testament in Camsá

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 25 Nov 2022 from source files dated 29 Jan 2022
19104c0e-9046-5ff3-82fb-eb838c88dcf9

Contents

San Mateo	1
San Marcos	73
San Lucas	117
San Juan	190
Hechos	244
Romanos	312
1 Corintios	350
2 Corintios	386
Gálatas	410
Efesios	424
Filipenses	437
Colosenses	446
1 Tesalonicenses	455
2 Tesalonicenses	462
1 Timoteo	466
2 Timoteo	477
Tito	484
Filemón	489
Hebreos	491
Santiago	521
1 San Pedro	530
2 San Pedro	541
1 San Juan	548
2 San Juan	557
3 San Juan	559
San Judas	561
Apocalipsis	564

San Mateo

Jesusbe bêts taitanga

(Lc 3.23-38)

¹ Quemënga innamna Jesucristbe bêts taitanga: Jesucristna Rey David y Abrahám bentsana entśá inamna.

²⁻⁶ Abraham yojamna Isaacbe taitá;

Isaacna Jacobëbe taitá

y Jacob, Judá y chabe catśátangbe taitá.

Judá, Fares y Zarabe taitá; y chatbe mamá Tamar yojamna;

Fares Esrombe taitá

y mua Arambe taitá.

Aram Aminadabëbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chë Uríasbe shema inamná.

⁷⁻¹¹ Salomón Roboambe taitá;

Roboam Abíasbe taitá

y Abiasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catśátangbe taitá yojamna.

Chë Babilonioca entśanga chë israelitënga tmojánishëche y choca imo-janëtámëna ora, Josías chë básënga yojánabamna.

¹²⁻¹⁶ Ya Babilonioca ndutámenënga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadocbe taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobëbe taitá.

Jacob Josebe taitá yojamna y Josena Mariybe boyá.

María Jesuſbe mamá, Jesúſ chë Bëngbe Bëtsabe Uámana Uabuayaná, chë Cristo ca uabainá.

¹⁷ Chcasna, Abrahámbentšana Davidbentſcoñe bnëtsana canta bëts pamíllanga imojëftsemna. Davídbentšana y chë israelitënga Babilonioca imojanëtaménentscuana inÿe bnëtsana canta bëts pamíllanga; y inÿe bnëtsana canta bëts pamíllanga chë Israeloca entšanga imojanëtaménentsana, chë Cristo tojanonÿnántſcoñe.

Jesucristo tojanonÿná
(Lc 2.1-7)

¹⁸ Jesucristo jónÿnamna mëntšá tojanopasá: María tbojanšbuachená Josëftaca jobouamayama, pero cabá ndoñe cánÿiñe ibontsiyena ora, tojanopasá Mariyna ngomamaná yojoquéda chë Uámana Espíritbe obenánaca. ¹⁹ José, Mariybe boyá, canÿe nÿetsca soyënguñe tšabá jamama bošá inamna. Cha ndoñe yontseboše entšangbe delante cha mal jaquédana; chíyecna tojanjuabó nÿe iytëcana Mariybentšana jtsojuánañana. ²⁰ Y chca yojtsejuabnantſcuana, mo otjenayoquécá canÿe Bëngbe Bëtsabe ángel tbojáninÿe y chana Josëbioye tbojaniyana: “José, Davídbentšana entšá, ndoñe matenócochinÿenana Mariáftaca jobouamayama, er chë bochántsebmna šešona chë Uámana Espíritbe obenánaca cha bochántsebmna. ²¹ María canÿe šešona bochántsebmna y cha Jesúſ ca cochjuabaye. Chca echantsabaina er cha chabe entšanga chëngbe bacna soyënguentšana echanjátſebacaye ca” —chë ángel tbojaniyana.

²² Lempe chca tojanochñëngo, cachcá chaotsemnama ntšamo Bëngbe Bëtsá chabe juabna oyebuambnayëngbiajana tojanayancá. Chë oyebuambnayá mëntšá tojánayana:

²³ Chë cabá boyabása nduabuatómá ngomamaná echanjoquéda y canÿe šešona boyabásetema bochántsebmna, y cha mochanjuabaye Emanuel ca. (Emanuel endayana “Bëngbe Bëtsá bëngaftaca ca”.)

²⁴ José chë otjénayentšana tojanofšená ora, tojanma ntšamo chë Bëngbe Bëtsabe ángel tbojanmandacá y Mariáftaca tojanobouamá. ²⁵ Pero ndoñe cánÿiñe ibontsaniyena, sinó nÿe chë šešonatema tojanonÿná orscana. Chë šešonatema tojanonÿná orna, José chábioye Jesúſ ca tbojanabaye.

2

Reyes Magos Jesúſbioye tmojána

¹ Herodes judiëngbe rey yojamna ora, canÿe pueblo Judeoca, Belén ca uabáinentše Jesúſ tojanonÿná. Chentšana, báseftanga, estrellënga uatsjëndayënga, magos ca uabáinënga, canÿe bëts puebløye Jerusalén ca uabáinoye tmojánashajna. Chënga tmojánabo shinÿe bocanoye luarëngocana. ² Jerusalenocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojanÿná cha ca? Bëngbe luarëngoca shinÿe bocanoye chabe onÿnana estrella fsënjinÿe y as muentše cha jaboadórama tífjabo ca.”

³ Rey Herodes chca tojanuena ora, corente yojtsenócochinÿena, y nÿetsca chë Jerusalenentše oyenëngnaca. ⁴ Chentšana chë rey tojánachembo nÿetsca chë judiëngbe bachnangbe amëndayënga y chë

judiëngbe ley abuátambayënga jenoyeunayëngama. Mëntsá tojanatjá: — ¿Ndayentse chë Bëngbe Bëtsabe Uámana Uabuayaná, chë Cristo ca uabainá, jónýnama ibomna ca?

⁵ Chënga tmojanjuá: —Judeoca, Belén pueblentse ca. Bayté entsemna chë Bëngbe Bëtsabe juabna oyebuambnayá Miqueas mëntsá tojanábema: ⁶ Y tsëngaftanga, Judeoca Belenentse oyenënga, canýe mandayá tsëngaftangbentsana echanjabo. Cha nyetsca chë Judeoca mándayëngbiana más uamaná echántsemna, y atšbe entšanga Israeloca echántsanýena. Chýeca tsëngaftangbe pueblo ndoñe nýe batšá uámana pueblo quenátsmëna ca.

⁷ Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninýama. ⁸ Herodes chë soyënga yojtsetátšëmbo ora, Belenoye chë maguënga tojanichamó, y mëntsá tojanéyana: “Choye motsajna y tsabá chë šešona šmochjánguango. Chašmojínýena ora, šmochjabëuénaye, as átšnaca chayobená jama chë šešona jadórana ca.”

⁹ Rey Herodes chë soyënga tojánéyanentsana, chë maguënga tmojtsatanoñe. Chora cachiñe tmojaninýe chë chëngbe luarëngoca tmojáninýe estrella y yojtsanebnatsana chë šešona yojtsemnëntscoñe. Chentsá juatsbuacá chë estrella yojójayíye. ¹⁰ Chë maguënga chë estrella tmojáninýe orna, corente oyejuayënga imojtsemna. ¹¹ Chë yebnoye tmojánamashjna ora, chë šešona tmojáninýe chabe mamá Mariáftaca. Chorna, tmojanoshamentšé y chë šešonatema tmojanadorá. Chora chëngbe cajontémënga tmojanëtsécaca y tmojanatštá castellano, incienso y canýe botamana uanguëtse soye, mirra ca uabáiniye. ¹² Chentsana, mo canýe otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondeshëcuanama. As chënga chentsana inýe benachëjana cachëngbe luarëngoye tmojésanshëcuana.

Egiptó luaroye tmojtsanachá

¹³ Chë maguënga tmojtsatanoñe ora, otjénayoca José canýe Bëngbe Bëtsabe ángelbioye tbojáninýe y cha mëntsá tbojaníyana: “Motsbaná, chë šešonatema y chabe mamá mesébiatše y Egiptoye motsachá. Herodes chë šešonatema bochanjánguango jtsóbama, chíyeca choca cochtsoquedañe atše chachochjábuayenantscuana ca.”

¹⁴ As José tojantsbaná, chë šešonatema y chabe mamá tojesanëbiatše y ibeta Egiptó benache tojéftsanbocna. ¹⁵ Y choca imojtsanomñe Herodes tojanóbanëntscuana. Chca tojanopasá, cachcá chaotsemnana ntšamo Bëngbe Bëtsá chabe juabna oyebuambnayabiajana tojanayancá. Chë oyebuambnayá mëntsá tojánayana: “Egiptocana atšbe uaquiñá sënjanchembo ca.”

Herodes tojanmandá basetémënga jtsëbáyama

¹⁶ Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetemënga uta uata bomnënga y cabá uta uata ndbomnënga, Belén y chë juachañe publënguentsënga. Uta uatama cha tojanjuabó, er uta uata yojtsemna chë maguënga chë estrella tmojáninýama. ¹⁷ Ntšamo chë Bëngbe Bëtsabe juabna oyebuambnayá Jeremías tojanoyebuambacá, cachcá tojanochnëngo:

¹⁸ Ramá ca uabaina pueblentse canÿe oyebuambnayana tmojanuena, ngménaca ošachiyana y becá tsetšanánaca oyebuambnayana. Raquel yojamna chabe básengbiamá ošachiyiñe, pero ndoñe yontseboše chamuatebiajuama, chabe básenga ya obanenga causa ca —cha tojanábema.

¹⁹ José cabá Egiptoca yojtsomñe ora, Herodes tojanóbana. Chentsana, otjénayoca José canÿe Bëngbe Bëtsabe ángelbioye tbojáninÿe y cha mentsá tbojanianya: ²⁰ “Motsbaná, chë šešonatema y chabe mamá mesëbiatse y Israeloye cochtá. Chë šešonatema jóbama bošenga ya obanenga montsemna ca.”

²¹ As José tojantsbaná y chë šešonatema y chabe mamá Israel luaroye tojtésanëbiatse. ²² Arquelao Judeoca yojanmánda chabe taitá Heródesbe cuentiñe, y José chca tojántatsëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána. ²³ Choye tojánashjango ora, José tojána canÿe pueblo Nazaret ca uabáinoye chentse joyénanama. Chca tojanochñengo cachcá chaotsemnama ntšamo chë Bëngbe Bëtsabe juabna oyebuambnayenga tmojanayancá. Chënga tmojánayana: “Nazaretocá ca Jesús mochantsábobaina ca.”

3

Juan chë Ubayaná entsanga yojanabuayiná

(Mc 1.1-8; Lc 3.1-9, 15-17; Jn 1.19-28)

¹ Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. ² Mentsá cha yojanëtsësnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tsëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

³ Juan yojamna canÿa ndabiamá chë Bëngbe Bëtsabe juabna oyebuambnayá Isaiás mentsá tojánayana:

Entsanga ndoyena luaroca canÿa enduáyebuache:

“Bëngbe Utabná echanjabo ca;

mo nda canÿe benache tojtseprontacá canÿe uámana entsá jashjanguama,

tšëngaftángnaca cachcá, Bëngbe Utabná jabama ainaniñe tšabe juabnëngaca šmochtseprontana ca” —cha tojánayana.

⁴ Juanbe entsáyá inauapormana camellbe stjénasheca y bobache yojanasnana. Cha inasaye chapulinatëmënga y tjoca tjouangbe méloye.

⁵ Jerusalenoca entsanga, nyëtsca Judea luarentša entsanga y chë Jordán ca uabaina béjaye béconana oyenenga imojánbocana Juan joyeunayama.

⁶ Bëngbe Bëtsábioye chëngbe bacna soyëngama jaimpáda chentsana, Juan chë Jordán béjayiñe chënga yojanëbáyana.

⁷ Pero Juan tojáninÿe ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga

Bëngbe Bëtsá ndoñe corente ntseyeunanama; as chora tojanéyana: “¡Mëtscuaye entsanga! ¿Nda tcmënjáuyana chë echanjóshjango

uabouana castigüentsana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinÿna chë bacna

soyënga amana tšëngaftanga ndegombre ndegombre šmojtsajbanama. ⁹ Y ndoñe šmattsejuabnaye cach tšëngaftangiama jayanama: ‘Abrahámbentsana

entsanga fsëndmëna ca'. Er atše šcuayana, Bëngbe Bëtsá quem ndëtsbéngacnaca Abrahábentšana entsanga nanjábiamana. ¹⁰ Chë tatsnía ya entsaprontana chë betiyeshënga tbëtëjëngocana jtseshatëtsetsama. Ndaye betiye ndoñe tonteshajo, jtseshatëtšana y iñoye jtsatmetšana. Tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

¹¹ “Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiamana más obenana bomná comna, y atše merecido taitatobuajoñe ni mo chabe shecochëtjonëshe jtsámabañama. Chë chabe benache aiñe chamojtishachëngbiamana Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháuamashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnana, mo iñeshequécá. ¹² Canyë entsá chabe mëtštá cucuatšniñe jiyëbana, chabe trigo jtsóbobemana y chë ndoserverna shácuanënga jtsejashtsëtsana. Chabe trigo chë grano uaquëcñayey tsañe jtsabuájuana, y chë ndoserverna shácuanëngna iñoye jtsatmetšana. Cachcá, chë atšbe ústonoye echanjabana, chë tšabe entsanga echanjúbuaja, y chë bacna entsangna canyë iñeshiñe echantsacastigaye, y chë iñe ndocna te queochátsfsana ca” —cha tojanëyana.

Juan, Jesúsbiyey tbojanabayey

(Mc 1.9-11; Lc 3.21-22)

¹³ As Jesús, Galileocana tojána Jordán béjayoye, Juan yojtsemnoyey cha chabuábayama. ¹⁴ Pero Juan ndoñe yontsebošey Jesús juabáyama, y mëntsá tbojanianana: —Atšey šontsemna aca chašcuabayey, y çmás atšey aca cbochjuabayey ca?

¹⁵ Chora Jesús tbojanjuá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan yojouena Jesús juabáyama. ¹⁶ Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoyey yojontješiyey y tojáninyey chë celoca atëfjniñey y chë Uámana Espíritu mo canyey palomatemcá chábiyey yojtsastajuana. ¹⁷ Chora celocana Bëngbe Bëtsá mëntsá tojánayana: “Mua atšbey bonshana uaquiniá endmëna. Chabiamana corente sëntsoyeyjuá ca.”

4

Jesús tojanobená Satanás jayëñjanama

(Mc 1.12-13; Lc 4.1-13)

¹ Chentšana chë Uámana Espíritu entsanga ndoyena luaroyey Jesús tbojanánatsey, as Satanás chauábama cha jisháchichiyama.

² Chentšey canta bnëtsana te y canta bnëtsana ibeta ntjascá tbojanjëtana; chíyey chora tbojaneshëntsena. ³ As Satanás tbojanobobeconá y tbojanianana: —Aca ndegombre Bëngbe Bëtsabe Uaquiniá tcomnëse, momandá quem ndëtsbénga tandësey chaobiamana ca.

⁴ Pero Jesús tbojanjuá: —Bëngbe Bëtsabe uabemana palabrënguiñey mëntsá endayana: “Entsá nyey tandëseyca ndoñey vida ntsebomnana, sinó entsá endobena jtsiyenana lempe ntšamo Bëngbe Bëtsá tojayancá tbojtseyeunanësey ca.”

⁵ Chentšana Satanás, Jerusalén, chë uámana bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentse chë más ts-banánoca tbojanatsá. ⁶ Chentše Satanás mëntšá tbojaniana: —Aca ndegombre Bëngbe Bëtsabe Uaquiñá tcomñese, muentšana fshantsoye montsënja, er Bëngbe Bëtsabe uabemana palabrénguiñe endayana: Bëngbe Bëtsá chabe angelënga echanjichamuá, chacmotsinÿenama. Chënga buacuatšëngaca cmochanjishache, shecuatše ndëtsbeñe ndocá chacondomama ca —cha tbojaniana.

⁷ Chora Jesús tbojanjuá: —Cach Bëngbe Bëtsabe uabemana palabrénguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

⁸ Cabana, Satanás tbojanánatse canÿe bëts tjoye y betscó nÿetsca quem luarentša amëndayëngbenache y chentša nÿetsca uámana soyënga Jesúsbioye tbojaninÿinÿé. ⁹ As Satanás tbojaniana: —Aca chaco-joshëntsamentsé y chašcojadorase, lempe chë soyënga cbochjatštaye ca.

¹⁰ Y Jesús tbojanjuá: —¡Satanás, átšbentšana mojuaná! Bëngbe Bëtsabe uabemana palabrénguiñe mëntšá endayana: “Bëngbe Bëtsá cochtsadorana y nÿe cha cochtseserverna ca.”

¹¹ As Satanás cachá tbojanonÿá. Cachora Bëngbe Bëtsábiocana angelotëmënga tmojánabo Jesús jtseservénama.

Jesús tojanontsé Galileoca chabe trabajo jamana

(Mc 1.14-15; Lc 4.14-15)

¹² Juan chë Ubayaná cárceloye tmojanëtámiaa Jesús tojanuena ora, Galilea luaroye cha tojtaná. ¹³ Pero ndoñe tonjanoquedá Nazaret pueblentše, sinó Capernaumoca, uafjajónaye tsachañe; choye tojána joyéanama, chë uámana bëts taitata Zabulón y Neftalibe luariñe. ¹⁴ Chca tojanochnëngo, cachá chaotsemnana ntšamo chë Bëngbe Bëtsabe juabna oyeubambnayá Isaías tojanayancá. Isaías tojánayana:

¹⁵ Zabulón y Neftalibe luare, Jordán béjaye chenguánoica, uafjajónaye tsachañe;

Galilea luariñe, ndoñe judío entšanga oyenentše.

¹⁶ Chë mo ibetiñe cuaftsiyencá imojoyena entšanga, Bëngbe Bëtsabe soyënga nduabuatma causa, tmojinÿe canÿa entšangbe juabnënga binÿnayá.

Chë chëngbe juabnënga binÿnayá entsebuashinÿinÿana chë Bëngbe Bëtsábioye nduabuatmëngbiana, y chë causa chabiana imomna mo obanëngcá, ndoñe binÿniñe jtsiyenëse ca —cha tojanábema.

¹⁷ Cach orscana Jesús tojanontsé entšanga jábuayenama: “Bëngbe Bëtsabe amëndayana ya echanjóshjango. Ngménaca šmochtenójuaboye tšëngaftangbe bacna soyëngama y chca amana šmochtsajbaná ca.”

Jesús tojánachembo canta boyabásenga beonga ashebuánayënga cha chamuastama

(Mc 1.16-20; Lc 5.1-11)

¹⁸ Canÿe te, Jesús chë Galilea uafjajónaye tsachajana yojtsaye y ndeolpe uta boyabásata tojanÿe: canÿa yojamna Simón, chë Pedro cánaca uabainá, y chabe uabentsá Andrés. Chatna atarraiëshangá ibnetsashbuétsetšañe, er beonga ashebuánayata ibnamna. ¹⁹ Jesús tojanëyana: “Atšeftaca mabata; atše cbochanjábiana Bëngbe Bëtsabiana entšanga anguayata,

y morscana n̄ye beonga ashebuánayata ya ndoñe quešochátsmēna ca.”
 20 Cachora chatbe atarraiešhangá cachcá tbojésanaboshjuana y Jesús tmojanasto.

21 Y más chcoye, Jesús in̄ye uta catšátata tojánan̄ye: Santiago y Juan, chē Zebedeobe uaquiñata. Chata ibojtsomñe can̄ye barquēshañe, chatbe taitáftaca, chēngbe atarraiešhangá atapórmayife. Jesús tojánachembo, 22 y cachora chē barquēsha tbojésanaboshjona, chē taitá cachentse imojéseboshjona y Jesús tmojanasto.

Jesús ba entsanga yojanabuatambá y yojánashnaye

(Lc 6.17-19)

23 Jesús n̄yets Galilea luarējana yojánana, chentse judiēngbe enefjuana yebnēnguenache abuátambaye. Chē tšabe noticiēnga Bēngbe Bētsabe amēndayama entsanga yojanabuayiyá y n̄yetsca šocanēngama y tsetšanēngama yojánashnaye. 24 N̄yets Siria luarējana entsanga cha imojtsebáyana. As entsanga n̄yetsca šocana bomnēnga Jesúsbiye imojtsēnachaye: šoquēnga y tsetšanana bomnēnga, bacna bayējbe juabna uambayēnga, ataque osháchichanēnga y jama ndobenēnga. Jesús n̄yetscanga yojánashnaye.

25 Mallajta entsanga Galileocana, Decápolis luarocana, Jerusalenocana, Judeocana y chē Jordán bėjaye chenguanoicana Jesús imojústona.

5

Ndayá Jesús tjoca tojanabuatambá

1 Jesús chē mallajta entsanga tojánan̄ye ora, batsjoye tojántsjua y tojanótbema. Chabe ústonēnga tmojanobobeconá y 2 Jesús tojanontšé mēntšá jabuátambana:

Ndēmuanyēnga imomna chē ndegombre oyejuayana bomnēnga

(Lc 6.20-23)

3 “Puerte oyejuayēnga mochántsemna chē Bēngbe Bētsabe soyēnga tša imuajaboto ca juabnayēnga. Chca entsanga mochántsemna chē Bēngbe Bētsabe amēndayoca mochtsiyenēnga.

4 “Puerte oyejuayēnga mochántsemna chē mondbétsošachiyēnga; chēnga Bēngbe Bētsá entsējabuáchana ngménaca ndoñe chamondétsemnama.

5 “Puerte oyejuayēnga mochántsemna chē uámanēnga ndoñe mondbétsenobiamnayēnga, er chēnga mo chēngbe otocana soycá quem luare mochanjójyēngacñe.

6 “Puerte oyejuayēnga mochántsemna chē n̄yetsca soyēnguiñe tšabá jamama bošēnga. Chēngbe bošana entsemna mo chē oshēntsiyá y uajuendayabe bošancá. Chē n̄yetsca soyēnguiñe tšabá jamama bošēnga mochanjobenaye jēftsin̄yana lempe ntšamo tmojtsebošcá.

7 “Puerte oyejuayēnga mochántsemna chē ín̄yēngbiana ongmiayēnga, er Bēngbe Bētsá chēngbiana bochanjóngmia.

8 “Puerte oyejuayēnga mochántsemna chē n̄ye tšabe juabnēnga ainaniñe bomnēnga; chēnga Bēngbe Bētsá mochanjin̄ye.

9 “Puerte oyejuayēnga mochántsemna chē n̄yetscanga natjēmbana chamotsiyenama amēnga, er chēnga Bēngbe Bētsabe básēnga ca mochantsabaina.

10 “Puerte oyejuayënga mochántsemna chë ínÿenga tmojama chamot-sesufrínënga, ntšamo Bëngbe Bëtsá yobošcá bétsamama; chca entšanga mochántsemna chë Bëngbe Bëtsabe amëndayoca mochtsiyenënga.

11 “Puerte oyejuayënga tšëngaftanga šmochtsemna, entšanga chacmo-joyánguango y chacmojtsëcamena ora y nyetscna soyëngaca chacmo-jtsëbuayatsenaye ora, atšbe ústonënga bétsemnama. 12 Móyejuanga, puerte móyejuanga, tšëngaftanga celoca becá šmochanjóyëngacñe. Er ntšamo entšanga tšëngaftanga cmëcamena, cachcá chë Bëngbe Bëtsabe juabna oyebuambnayëngbioye, chë tšëngaftangbe natsana monjanienëngbioye entšanga monjanëcamena ca” —Jesús tojánayana.

Ošbuáchiyënga jtsemnana mo tamocá y binÿnayënga quem luarentša entšangbiam

(Mc 9.50; Lc 14.34-35)

13 “Tšëngaftanga, quem luarentša entšanga jtsëjabuáchanëse šmojtsiyena, Bëngbe Bëtsabe soyënga chamotsetatšëmbuama, as chëngbiam šmochántsemna mo chë mëntšena ndoñe chaondóndbemama tojatboto tamocá. Pero chë tamó fténana tojtsóbemëse, ndoñe ntšopodénana tempcá sanana cachiñe jtëtsmënana. Chca, ya tondayama ntšoservénana; chíyeca chë tamó tsáshenoye jtsëtšenana y entšanga jtšebotájayana.

14 “Tšëngaftanga, ntšamo tšabá yomncá šmojtsiyenëse, as quem luarentša entšangbiam šmochántsemna mo chë ibetiñe tojtšebínÿna soycá. Canÿe bëts pueblo batsjo juatsbuañe tomñese, ndoñe ntšopodénana iytëmencá jtsemnama. 15 Canÿe uajuinÿanësha tcojuajuínÿena ora, ndoñe cajonëshe tajsoye jtsabuájuama, sinó tšbanánoca juajájuama, chca, nyetsca entšanga chë yebnentše tmojtsemnëngbiam chaoticšebínÿnama. 16 Cachcá tšëngaftanga, entšangbe delante mo binÿnayëngcá šmochtsemna, as chënga tšëngaftanga tšabe soyënga šmuamama chamuinÿama, y chca, chënga chamuinÿanÿé chë Taitá, Bëngbe Bëtsá celoca endmëná, corente uamaná y obená bétsemnama ca” —Jesús tojánayana.

Chë Moisesbe leyama Jesús tojanabuatambá

17 “Ndoñe šmattsejuabnaye, ntšamo Moisesbe leyiñe iuayancá y chë Bëngbe Bëtsabe juabna oyebuambnayënga tmojanayancá jabëtsepochochocama atše tijabo ca. Atše ndoñe chiyátabo chë soyënga jabëtsepochochocama, sinó jabábuayenama ndayá chë soyënga ndegombre bétsayanama. 18 Ndegombre šcuayana: Celoca y quem luare chaojëftsemnëntscuana, ndocná queochatobenaye ni canÿe punto, ni canÿe letra chë leyënguentsana jtšeuánana, lempe ntšamo jochnënguama yomncá chaojtsemnëntscuana. 19 Chíyeca, nda nÿe mo canÿe mando chë leyënguiñe ndoñe tonjoyeuná cha, masque nÿe base soye chë mando tojtsemna, y chë ínÿenga cachcá tojtsabuátambá, cha Bëngbe Bëtsabe amëndayoca chë más nduamaná echántsemna. Pero ndëmuanÿenga tmojtsama ntšamo Bëngbe Bëtsá tojamëndacá y chë ínÿenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna. 20 Chë soyëngamna mëntšá šcuayana: Tšëngaftanga chë ley abuátambayënga y fariseúngbioye ndoñe šmontsayëñjanase, jtšamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

Ndayá chë ínÿengaftaca tbojetnama Jesús tojanabuatambá

21 “Tšëngaftanga šmojouena ntšamo Bëngbe Bëtsá tšëngaftangbe bëts taitanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entšangbiamá tšabá o ndoñe tšabá tmonjamama endbayanabe delante, ndáyeca chca ca.’” 22 Pero atše šcuayana, nda cachabe catšátaftaca tbojetna, chánaca bontsemna jobuambayana chë entšangbiamá tšabá o ndoñe tšabá tmonjamama endbayanabe delante, ndáyeca chca ca. Nda cachabe catšátbiöye puerte tbojtsáböyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catšatbiámá opjema ca tojayana, ntšamo cha bétsamama, cha bontsemna chë infiernoca íñeshöye jama.

23 “Chíyeca, nderado ndayá Bëngbe Bëtsabe bëts yebnöye tcojuamba Bëngbe Bëtsá jëtschuayama y chora tcojenojuabó acbe catšata ácaftaca etonaná yojtsemna ca, 24 as chë tcojiyëbo soye chë altarentša natsanoica cochjéseboshjona, cochtá y acbe catšátaftaca cochtenoyántsia. Chentšana cocayé altaröye cochjá y chë tcojuamba sóyeca Bëngbe Bëtsá cochjëtschuaye.

25 “Nderado nda tcmojademandá y cabildöye jotsánama cmojtsemna, cabá chöye ndáshjango ora, betscó cháftaca cochtenoyántsia. Chca ndóñese, chë demandayá mandádbiöye cmochanjúshjango, chë mandado josticiëngbe cucuatšíñe cmochanjáboshjona y chënga cárcelöye cmochanjutame. 26 Ndegombre cbëyana: Chentšana ndoñe quecochtëtsböcna lempe candesopagantscuana ca” —Jesús tojánayana.

Chë boyá o shémbiöye ínÿaftaca íngñayama Jesús tojanabuatambá

27 “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shémbiöye ínÿaftaca ndoñe catjaíngña.’” 28 Pero atše cbëyana: Nderado canÿe boyabása ndëmuanÿe shembásabiöye tbojinÿe y tojajuabó ‘malaye cha ca’, chë boyabása chca tojajuabose, ainanoca ya chë inÿe shembásaftaca cachabe shémbiöye tbojtseingñé.

29 “Chíyeca, nderado acbe catšbioica bomínÿeca bacna soye tcojinÿe y cachca soye tcojamëse, más tšabá nántsemna chë bomínÿe cochtsenobuchjatsëca y cochtsëtšena. Nÿets cuerpo jtsebomnana y lëmpeca infiernöye jama chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé. 30 Nderado acbe catšbioica cucuatšëca bacna soye tcojamëse, más tšabá nántsemna chë cucuatšë cochtsenástjango y cochtsëtšena. Nÿets cuerpo jtsebomnana y lëmpeca infiernöye chacmotsëtšenamna, acbiamá más tšabá nántsemna nÿe canÿe soye acbe cuerpentšana chacoperdé ca” —Jesús tojánayana.

Chë bouamnata enëtšanama Jesús tojanabuatambá

(Mt 19.9; Mc 10.11-12; Lc 16.18)

31 “Mëntšánaca leyíñe enduábemana: ‘Ndëmuanÿe boyá chabe shémaftaca tbojtsenëtšena, chë boyá bontsemna chabe shema canÿe tsbuanácha juiyiyana, ndayëchañe chaotsayana cha ya ndoñe chabe shema yontsemna ca.’” 32 Pero atše cbëyana: Nda chabe shémaftaca tbojtsenëtšena y chca tojopasá ndoñe chë shema ínÿaftaca tbontseingñé causa, as chë boyá jtšamana cha chabotseingñema, chë shema ínÿaftaca tojtóbouamase. Y nda chë útsena shémaftaca tojtóbouamá, chana canÿe uabuatmná jtsebomnana, y chca, chë tsëm boyánaca canÿe bacna soye jamana ca” —Jesús tojánayana.

Chë entšanga júrayama Jesús tojanabuatambá

³³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios chë soye chanjama ca; ojal chë soye ndoñe catjama ca.’ ³⁴ Pero atše cbëyana: Tondayama šmattsejúrayer; ni celocama, er Bëngbe Bëtsabe tbemaniñe endmëna. ³⁵ Ni quem luarama, er Bëngbe Bëtsabiana mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo. ³⁶ Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canye stjénashe ft-senguëshe o fjantsëshe jabemana. ³⁷ Tšëngaftanga aiñe ca jayanama šmojtsebošëse, nÿe aiñe ca šmochjayana, y ndoñe casna nÿe ndoñe. Ndayá chentsana más šmojatichamo soye, Satanásbiocana jtsóbocanana ca” —Jesús tojánayana.

Chë entsanga mondbátenachnënguama Jesús tojanabuatambá
(Lc 6.29-30)

³⁸ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatsëca, ácnaca derecho contsebomna canyebé cha jëtsbuchjatsëcama ca; y nderado nda canye juat-saše tcmojtsásiye, ácnaca derecho contsebomna cánÿëse cha jtašiyama ca.’ ³⁹ Pero atše cbëyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catsbioica tcmojajueb-jantsetase, cochjomiye chë ínÿoica cachcá chacmomama. ⁴⁰ Nderado nda tcmojademandá y tojtseboše acbe shabuanguanëjua jtsabocñama, cha molesenciá acbe quëfsaiyanaca chauetsácñama. ⁴¹ Nderado nda tcmojuasmá y tcmojamandá bnëtsana cuadroca juyambama, inÿe bnëtsana cuadroca cochjuyamba. ⁴² Nda ndaye soye tcmojotjañëse, cochjatštaye; y nda ndaye soye tcmojúátjase, cha ndoñe stëtsoye catjaquéda ca” —Jesús tojánayana.

Chë uayayëngbiana bonshánana jtsebomnana
(Lc 6.27-28, 32-36)

⁴³ “Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’ ⁴⁴ Pero atše cbëyana: Tšëngaftangbe uayayënga šmochtsababuánÿeshana, y chë cmëcamenëngbiana Bëngbe Bëtsá šmochtseimpadana. ⁴⁵ Chca tšëngaftanga, chë Taitá, Bëngbe Bëtsá, chë celoca endmënabe básenga šmochántsemna; Bëngbe Bëtsá endbëtsama tšabe y bacna entsángbeñe chabe shinÿe chaotsebinÿnayama, y endbëtsama chë nÿetsca soyënguiñe tšabá jamama bošënga y ndoñe chca entsángbeñe chauaftema. ⁴⁶ Tšëngaftanga nÿe chë tšëngaftanga tcmojtsababuánÿeshanënga šmojttsababuánÿeshanëse, ¿Bëngbe Bëtsábiocana ndayá šmochjuacaná? Romocama crocénana entsángbioye atjanayëngnaca chca monduamana. ⁴⁷ Y nÿe chë amiguëngbioye šmojttsacheuanase, ¿ndaye bëts soye šmojtsama? Chë ndoñe judiëngnaca chca mondbëtsama. ⁴⁸ Tšëngaftangbe Taitá, Bëngbe Bëtsá celoca endmëná, nÿetsca tšabe soyënga bomná y amá endmëna. Tšëngaftángnaca cachcá šmochtsemna ca” —Jesús tojánayana.

6

Jesús tojanabuatambá ntšamo tšabe soyënga inÿyëngbiana jamana

1 “Cuedado smochtsebmoma ndoñe ntsamama entsángbeñe tséngafangbe tsábe soyénga, nye chénga chca chamuinýama. Chca šmojamése, tséngafangbe Taitá, Bèngbe Bètsá, celoca endméná ndocna uacanana soye quecmochtétatšataye.

2 “Chcasna, nderado nda caridá tcojábemése, chca ndoñe šmatjama chë ntšamo šmojtsamama nyetscanga chamotsetatsëmbuama, mo canye trompetëfjua cuaftsajatëtancá, chë caridá šmojábemama chaotsótatsëmbuama; chca monduamana chë bacna entsanga chë ntšamo ndegombre tmojuabnacá ndinýinýnayénga, chë judiëngbe enefjuana yebnënguenache y tsáshenañe. Ndegombre chéyana, chë chca aménga ya chéngbe uacanana soye tmojóyëngañe, ntšamo chénga tmojamama entsanga tsábá chéngbiamama tmojtsoyebuambná ora. 3 Chcasna, nda caridá tcojábema ora, ndocná más chaondëtsetatsëmbo, mo chë uañicuayoica cucuatše ndoñe queondbatstatšëmbcá ndayá chë catšbioica cucuatše tojtsamama, 4 chca, acbe caridá iytëcana chaotsemnama. As, tséngafangbe Taitá, nda bominye endbëtsequëcjnaye chë iytëmená tcojtsama soye, acbe uacanana soye cmochántatštaye ca” —Jesús tojanayana.

Jesús tojanabuatambá ntšamo Bèngbe Bètsáftaca jencuéntana (Lc 11.2-4)

5 “Bèngbe Bètsáftaca šmojtsencuénta ora, ndoñe šmattsama chë bacna entsanga ntšamo ndegombre tmojuabnacá ndinýinýnayéngcá. Chénga corente jtsogusetánana chë judiëngbe enefjuana yebnënguenache tsanana y tsashená tsëntsaca Bèngbe Bètsáftaca jtsencuéntayana, chca, nye entsanga chë soye chamuinýama. Ndegombre šcuayana: chénga nye morscama ya montsábouacanana, chénga tsábá imojtsama ca entsanga tmojayana ora. 6 Pero aca Bèngbe Bètsáftaca jencuéntama orna, acbe tsoye cochtamáshéngo, bësása cochtatame y cháftaca cochjencuénta. Chánaca chë iytëmenentše ácaftaca echántsemna. Bèngbe Taitá lempe bominye endetsequëcñá, masque cánýenga šmojtsemna ora šmojtsama soyëngnaca. As Bèngbe Bètsá, chca cháftaca chacojtsencuénta ora, cachá acbe uacanana soye cmochántatštaye.

7 “Bèngbe Bètsáftaca šmojtsencuénta ora, ndoñe nye cachcá ndoservenena palabrénga ba soye šmattsichamo. Chca mondbétsama chë Bèngbe Bètsábioye nduabuátménga. Chénga jtsejuabnayana becá chca tmojt-sichámésna, Bèngbe Bètsá chénga más yochjóyaunaye ca. 8 Ndoñe chéngcá šmattsemna. Cabá nduyana ora, Bèngbe Bètsá ya jtsetatšëmbuana ntšamo tséngafangbe cmojtsëjabotcá. 9 Chamna tséngafangbe mëntšá cmontsétocana Bèngbe Bètsáftaca jencuéntana:

Bèngbe Taitá, celoca icotsomñe.

Acbe uabaina chë más uámana uabainana chauesomñe.

10 Acbe amëndayana chaóshjango.

Celoca yojtsemna ntšamo icobošcá;

quem luariñnaca cachcá chaotsemna.

11 Mënté šmiyatšatá cada te šnetsëjaboto tandëse.

12 Bacna soyénga bënga fsënjama: šmotsaperdónaye;

cachcá ntšamo chë bëngbiamama bacna soyénga aménga fsëndbetsaperdonaycá.

13 Bacna soyénga jamama šojocohéngo ora, šcochjubahuache chca nde-nobuíyama.

Njÿetsca bacna soyënguentšana šmatsebacaye.

¹⁴ “Chë tšëngaftangbiana bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye. ¹⁵ Pero chë tšëngaftangbiana bacna soyënga amënga ndoñe šmontsaperdónasna, Bëngbe Taitá cachcá, tšëngaftanga ndoñe quecmochátaperdonaye ca” —Jesús tojánayana.

Chë Bëngbe Bëtsáftaca jencuéntama tondaye ntjascá

¹⁶ “Y nderado tšëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngmrenënga ndoñe šmattsemna, ntšamo chë bacna entšanga chë ndegombre tmojuabnacá ndinÿinÿnayënga mond-betsamcá, as chca, chënga imojtsayúnama entšanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiana tmojtsoyebuambná ora. ¹⁷ Aca nderado tcojtsayúna ora, cochtsojuebjabebiye y aceitíyeca botamana cochtenochquëca, ¹⁸ as chca, entšanga ndoñe chamondëtsetatšëmbo aca tondaye ntjascá cojtsemnama. Nÿe acbe Taitá, lempe chë mo iytëmencá yomna soyëngama tatšëmbuá, chama echántsetatšëmbo. Y cha, chë iytëmencá tojama soye bominÿe endbetsequëcñayá, acbe uacanana soye cmochántatštaye ca” —Jesús tojánayana.

Chë celoca bomnana

(Lc 12.33-34)

¹⁹ “Bomnana quem luarentše ndoñe šmattsëjuabaye. Muentšna chë mejojón y inÿe pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. ²⁰ Más tšabá tšëngaftangbiana entsemna, mora quem luarentše tšabe soyënga šmojtsamamna, uacanana soyënga celoca chaotsójuabaye. Chentše ni chë mejojón, ni chë inÿe pochócaye soyënga acbe soyënga quemochatspochóca, ni atbëbanënga quemochátamashjna jatbëbama. ²¹ Er chë ndayentše acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

Chë cuerpama uajuinÿanësha

(Lc 11.34-36)

²²⁻²³ “Acbe bominÿe tšabá totsomñëse, mo canÿe uajuinÿanëshacá acbe cuerpama jtsemnana, chíyeca aca jtsobenana ntšamo tcojtsamcá chë bominÿyeca jtsonÿayana. Chë bominÿe ndoñe tšabá tontsemnëсна, chë bominÿe tondaye ntsoberenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontsebomnëсна, lempe ntšamo chacojtsamcá ndoñe tšabá queochátsmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

Chë Bëngbe Bëtsabiana bonshánana o chë nÿe quem luarentša soyënga jtsebošana

(Lc 16.13)

²⁴ “Ndocná ntsoberenana uta mandayata jtsaservénana: cánÿabioye bochantsáboyënja y chë inÿabioyna bochántsebobonshana, o cánÿabiana tšabá echántsetrabajaye y chë inÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebomnama yapa tcojtsebošëse ca” —Jesús tojánayana.

Bëngbe Bëtsá chabe básenga jtsanyëna

(Lc 12.22-31)

²⁵ “Chcasna atše šcuayana: Ndoñe šmattsenócochinýena ndayá šmochjase o smochjofsiye vida jtsebomnama, ni ndaye entšayá šmochjuíchëtjuama cach ndoñe. Ndegombre, vida chë sanama más enduámama y cuerpo chë entšayama más. ²⁶ Smochjanýe chë shloftšënga jtsongüefjnyana. Chënga tondaye ntjájena, ni jaja saná ntjátbanana, ni chë grano uaquëcjnye yebnënguiñe quemnatsquëcjná; pero Bëngbe Bëtsá, celoca endmëná, chënga saná jtsatšatnayana. ¡Y tšëngaftanga chë shloftšëtmëngbiama puerte más šmonduámama! ²⁷ Masque chca endmëna, canýa masque tša tojtsenócochinýena, ¿ntšamo nanjobenaye jamana chë ntsachetšá vida yochtsebomnentšana, canýe hora vida más jabotiyana?

²⁸ “Y ndayá smochjuíchëtjuama, ¿ndáyeca šmojtsenócochinýena? Smochjinýe chë jajañe lirio uantšefjushangá jtsajuajnana: ndoñe ntsetrabájayana, ni ntshabiamnayana. ²⁹ Pero atše cbéyana, ndegombre ni mo Rey Salomón nyetsca chabe bomnánaca nyetšá botamana mo chë lirio uantšefjushangacá quenjatspormana. ³⁰ Bëngbe Bëtsá tša botamana shácuana tojuama, y chë shácuana mënté jajoca jtsamnana, yëfsana iñoca. Chca chë shácuana cha tojamëse, ndegombre tšëngaftangbiámna Bëngbe Bëtsá echanjama entšayá chašmotsábomnama, jentšanga nýe batšá Bëngbe Bëtsábeñe ošbuáchiyënga! ³¹ Ndoñe šmattsenócochinýena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo ca?’ ³² Chë soyëngama, chë Bëngbe Bëtsábioye nduabuátmënga mondbétsenocochinýena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtsëjbotama endétatšëmbo. ³³ Chíyeca, tšëngaftangna natsana smochjshëtseboše Bëngbe Bëtsá tšëngaftangbe ainaniñe chaotsemándama y lempe ntšamo cha tojamandacá smochtsama. Chca šmojamëse, Bëngbe Bëtsá lempe ntšamo cmojtsëjbotcá cmochanjátataye. ³⁴ Ndoñe matenócochinýenana ndayá yëfse yochjochnënguama. Yëfse luare cochántsebomna chë soyënga jinýama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

7

Ndoñe ntsichámuana chë ínýenga tšabá o ndoñe tšabá tmonjamama

(Lc 6.37-38, 41-42)

¹ “Ndocá ínýengbiama šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. ² Chë ntšamo tšëngaftanga ínýengbiama šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiama chë ntšamo šmojamama echántichamo. Y ntšamo ínýengbioye chašmojábiamama, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiamama.

³⁻⁵ “Nderado canýa chabe bominiñe canýe niñëfja tojtsebomnëse, cha ndoñe ntšobenana chabe catšata jauyanama: ‘Acbe bominiñentšana canýe polvështema jtsebuchjatsëcama šmolesenciá ca’. Natsana cha bontsemna cachabe bominiñentšana chë niñëfja jtsenobuchjatsëcana tšabá jinýama jobenayama, chabe catšatbe bominiñentšana polvështema jtsebuchjatsëcama. Cachcá entsemna acbiama, ¡bacna entšá chë ntšamo

ndegombre tcojuabnacá ndinÿinÿayá!, chë tša bacna soye cojtsama ca acbe catsata tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsama cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jtsajbanana, y chentsana cocayé cochantsobena acbe catsata juajabuáchana ntšamo tšabá yomncá chaotsamama.

⁶ “Chë Bëngbe Bëtsabe soyëngama josértama ndëboše entsanga ndoñe šmattsabuayiyaye. Aíñese nántsemna mo chë Bëngbe Bëtsabe bëts yebnocá uátšëmbona mëntšena quešënga cuaftsëbuajocá; chorna chënga jobuértanana, jobotjajuana y jtsáshantsana. O mo chë uámana ndëtšëtëmënga cotšëngbioye cuaftsëtšancá, chënga nÿe jtsebotájayana ca” —Jesús tojánayana.

Šmochjotjañe, šmochjánguango y šmochjachembo

(Lc 11.9-13; 6.31)

⁷ “Šmochjotjañe y Bëngbe Bëtsá cmochanjátšataye; šmochjánguango y šmochanjínÿena; šmochjachembo y bëšása cmochanjébëtafjo. ⁸ Er ndánaca tojtsotjanañá, jóyëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

⁹ “¿Ndëmuanÿe boyabása tšëngaftanguentšá, canÿe tandëše chabe uaquiná tbojtsotjanañe ora, canÿe ndëtšbé chábioye buanjatštaye? ¹⁰ ¿O canÿe mëtscuaye buanjatštaye, beona tbojtsotjanañe ora? ¹¹ Y chca, tšëngaftanga, bacna soye amënga, tšëngaftangbe basetëmënga tšabe soyënga jatsatayama šmojtsamanëse, jmás tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátšataye!

¹² “Inÿëngaftaca šmochtsama ntšamo chë ínÿënga tšëngaftangaftaca chamotsamama šmojtsebošcá. Chca endmëna ntšamo Moisesbe leyinë y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” —Jesús tojánayana.

Chë base utëntšá bëšása

(Lc 13.24)

¹³ “Chë base utëntšá bëšásajana šmochjámashjna. Chë utëntšá bëšásajana y chë paselo jóyënama benache, infiernoye cmochanjuánatse y banga chëjana mondámashjuana. ¹⁴ Chë tšabe vida binÿnoye jamna base utëntšá bëšásajana endmëna y ndoñe paselo jóyënama benache, y chiñe báseftanga mondbínÿena.

Chë Bëngbe Bëtsabe ndoñe ndegombre juabna oyebuambnayënga

(Lc 6.43-44)

¹⁵ “Cuedado šmochtsabomna chë Bëngbe Bëtsabe ndoñe ndegombre juabna oyebuambnayëngbiama. Chëngna mo oveshëngcá tšëngaftangbioye mochanjabo, pero ndegombre chënga mondmëna mo tšátjaye tjañe quešëngcá. ¹⁶ Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmašëshe betiyentsana ndoñe uvas ntjuátabebiana, ni higuébé cardo betiyentsana. ¹⁷ Chca, nÿetsca tšabe betiyinë tšabe soye jashájonana; y chë ndoñe tšabeshiñna podësca soye. ¹⁸ Canÿe tšabe betiyinë quenátopodena podësca soyënga jashájonana, ni canÿe ndoñe tšabe betiyinë tšabe soyënga jashájonana. ¹⁹ Ndaye betiye podësca shajuanëshe jtseshatëtšana y inoÿe jtsatmetšana. ²⁰ As chca tšëngaftanga

chënga šmochantsëbuatma, ndayá chënga mochtsamama ca” —Jesús tojánayana.

Bëngbe Bëtsabe amëndayoye ndoñe nyëtscanga jamashjnana
(Lc 13.25-27)

²¹ “Ndoñe nyëtscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nyë ntšamo atšbe Taitá, celoca endmëná, tojtsebošcá amëngna aíñe. ²² Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótsëmbonëse, ácebeñe betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentsšana fsëndëtabocana, y ácbeyeca bëts soyënga fsëndama ca.’ ²³ Chora atše chanjójuaye: ‘Ndocna te checbaisëbuátmana. Atšbentsšana mojuánanga, bacna soye ama entšanga ca’ ” —Jesús tojánayana.

Chë uta ucuatjoniñe
(Mc 1.22; Lc 6.47-49)

²⁴ “Chcasna, nda atše šojoyeuná y chë ntšamo sëntsichamcá tojt-sama, endmëna mo canye tšabá juabnaye boyabasacá. Chë boyabásana ndëtsbeñe chabe yebna yojajebo. ²⁵ Uaftena yojušhjangó, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuášhajayana, chë yebna ndëtsbeñe inajéboyeca. ²⁶ Pero nda atšbe palabra tojouena y ntšamo sëntsichamcá ndoñe tontsama, endmëna mo canye ndëjuabnaye boyabasacá. Chë boyabásana chabe yebna cascajuíñe yojajebo. ²⁷ Uaftena yojušhjangó, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

²⁸ Jesús chë soyënga jóyebuambayama tojanpochocá ora, chë entšanga ojnánánënga imojtsemna ntšamo cha tojánabuatambama. ²⁹ Jesús tojanabuatambá nyëts obenánaca, mo canya mando bomnacá y ndoñe nyë mo chë ley abuatambayëngcá.

8

Jesús, canya bacna nguayanánaca šocábioye tbojanshná
(Mc 1.40-45; Lc 5.12-16)

¹ Jesús tjoicana tojtantsmá ora, ba entšanga tmojanasto. ² Chora canye boyabása bacna nguayanánaca šocá Jesúsbioye tojanobeconá, chabe delante yojoshamentšiye y tbojanayana: —Utabná, aca tcojtsebošëse, catjobenaye atšbe šocana jtsebojuánana ca.

³ As Jesús tojanacuenyanëjaná, chë boyabásabioye tbojánbojajo y tbojanayana: —Aíñe, séntseboše. Socana cbotsebojuaná ca.

Y cachora chabe šocana tbojtsanóbojuanañe. ⁴ Jesús chë shnanábioye tbojanayana: —Mouena, ndocnábeñe cattsecuëntaye; nyë chë Jerusalemoca báchnëbioye motsa, y cha cochjinýinýiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyëtscanga chamotatsëmbona mora aca ya ndoñe šocá contsemnama ca —Jesús tbojanayana.

Jesús canye Romano soldadëngbe amëndayabe bochichnayábioye tbojanshná
(Lc 7.1-10)

⁵ Jesús Capernaumoye tojánamashëngo ora, canÿe Romano soldadëngbe amëndayá Jesúsbioye tojanobeconá canÿe pavorama jaimpádama. ⁶ Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

⁷ Chora Jesús tbojanjuá: —Cha jáshnama chanjá ca.

⁸ As chë soldadëngbe amëndayá tbojaniyana: —Señor, atše merecido taitatobuajoñe atšbe yebnentše chacuamashënguama; nÿe mayana y atšbe bochichnayá tšabá echántsmëna. ⁹ Atšbioye mándayënga atše sëndábamna y átšnaca soldadëngbe amëndayá sëndmëna. Atše canÿe soldado stjauyana “motsa ca”, cha cachora jana; y inÿa stjauyana “mabo ca”, cha cachora jabana; y nderado atšbe bochichnayá ndayánaca chao-mama stjamánda, chánaca cachora chë soye jamana ca —cha tojánayana.

¹⁰ Jesús chca tojanuena ora, tojanenjnana y chë ústonënga tojanëyana: —Ndegombre chëyana, ni mo nÿets Israelentše ni canÿa quem boyabasacá Bëngbe Bëtsábeñe nÿetsá ošbuachiyá chiyátinÿena. ¹¹ Y šcuayana, shinÿe bocanoicana y shinÿe uenatjëmbambanoicana bëtscá entšanga mochanjabo, y Abraham, Isaac y Jacob, chë judiëngbe tempsca uámana bëtš taitángaftaca mochanjotbiama Bëngbe Bëtsabe amëndayoca, cánÿiñe juasama. ¹² Ba Israeloca entšanga, chë ndëmuanyëngbiama Bëngbe Bëtsabe amëndayana natsana yochtsanmëna, chocana mochantëbuacana chë ndëbinÿna luaroye, infernoye. Chentše puerte mochanjenóbošachna y chë tsetšanama juatsašënga mochantsenoftëšjojnaye ca —Jesús tojánayana.

¹³ Chora Jesús chë soldadëngbe amëndayábioye tbojaniyana: —Acbe yebnoye motsatá y chë ntšamo cojtsošbuachecá cachcá chaotsemna ca. Cachora chë bochichnayá tšabá yojtatsmëna.

Jesús, Pédrëbe uambén mamábioye tbojanshná

(Mc 1.29-31; Lc 4.38-39)

¹⁴ Chentšana Jesús, Pédrëbe yebnoye tojána. Chentše Pédrëbe uambén mamá šocá calentóraca yojtsejutsnajona. ¹⁵ Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontšë chënga jobuácuedana.

Jesús ba šoquënga tojanashná

(Mc 1.32-34; Lc 4.40-41)

¹⁶ Chë te jaibétatama ora, Jesús yojtsemnoye banga bacna bayëjëngbe juabna uambaye entšanga tmojanënatse. Chora, nÿe canÿe Jesús jóyebuambayëse chë bacna bayëjënga imojtsaisebocana y nÿetsca šoquënga tojanashná. ¹⁷ Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

Chë Jesús juastama bošënga

(Lc 9.57-62)

¹⁸ Jesús tojánanÿe mallajta entšanga chabe shëconana; as tojanmandá uafjónaye chenguana jama. ¹⁹ Chorna, canÿe ley abuatambayá Jesúsbioye tojanobeconá y tbojaniyana: —Buatëmbayá, atše sëntseboše aca juastama, ndëmoye chacojtsá choye ca.

²⁰ As Jesús tbojaniyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

²¹ Chora inÿa, cach uatsjendayënguentsá, Jesúsbiöye tbojaniyana: — Bëngbe Utabná, šmoleseñciá atšbe taitá chjšhesabotbontsañe ca.

²² Chora Jesús tbojanjuá: —Nÿe šmasto. Chë Bëngbe Bëtsabiana mo obanëngcá, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe ca.

Jesús chë binÿia y chë béjaye bonguana yojëtsbema
(Mc 4.35-41; Lc 8.22-25)

²³ Chentšana Jesús canÿe barquëshoye tojánamashëngo y chabe uatsjëndayënga imojtsetjëmbambnaye. ²⁴ Ndeolpe tša jabuache binÿia chë uafjajónaye béjayiñe yojóshjango; nÿetšá jabuachana yojtsemna, chë olëshënga barquëshana imojtsétsbotsana. Y Jesús chora inétsomañe. ²⁵ As chabe uatsjëndayënga tmojána Jesús jetsefšenama y tmojaniyana: — ¡Bëngbe Utabná, šmatsebacá. Montsenatjëmbambana ca!

²⁶ Chora Jesús tojanëyana: —¿Ndáyeca tša šmojtšauatja? ¿Tša batšatema šmojtšošbuaché, Bëngbe Bëtsá tšëngaftanga jujuabuáchama yobenama ca?

Chca tojanëyana y tojantsbaná. Chora tojanmandá chë binÿia y chë búyeshe bonguana chaotsatsmënema, y lempe natjëmbana yojtsatsmëna. ²⁷ Chabe uatsjëndayënga ojnanánënga imojtsemna y mëntšá imojtsichamo: “¿Nda quem boyabása yomna? Cha tonjayana y chë binÿia y chë búyeshe tmonjoyeuná ca.”

Chë Gadara luaroca entšata, bacna bayëjbe juabna uambayata
(Mc 5.1-20; Lc 8.26-39)

²⁸ Jesús uafjajónaye chenguana tojánashjango, canÿe luare Gadara ca uabáinentše. Chorna chë utabuantsánëngbentšana útata, bayëjbe juabna uambayata, tbojánbocna y Jesúsbiöye tbojanobobéconata. Puerte tšatjayata ibnamna, chíyeca entšanga ndoñe ntšobenana chëjana jtsachñëjuanana; ²⁹ y chora tbojanontšé chë bacna bayëjëngbeyeca mëntšá uayebuáchana: —¿Ndayá bëngaftaca cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrima, chama cabá ndoñe chë tempo yontsemna ora ca?

³⁰ Chentša béconana ba cotšënga imnajena y chënga imnétsosañe. ³¹ Y chë bayëjënga Jesús tmojanimpadá: —Muentšana jéšebocanama aca tcojamëse, cochjama bënga chë cotšëngbeñe fchayamashjnama ca.

³² Y Jesús tojanëyana: —Motsajna ca.

Chora chë bayëjënga chë boyabásatbentšana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjajónayoye imojtsoshbuetše y yojtsatajo.

³³ Chora chë cotšënga anÿenënga tmojtsanacheta, y chë puebloye tmojánashjajna ora, tmojanontšé lempe ntšamo yojochñëngcá jacuéntana y ntšamo chë bayëjbe juabna uambayátaftaca tojanopasámñaca. ³⁴ Chora nÿetsca entšanga chë pueblentšana tmojánbocana y Jesús yojtsemnoye tmojána. Chë entšanga Jesús tmojáninÿe ora, tmojanimpadá chë luarentšana chauesebochnama.

9

Jesús, canýe jama ndobenábioye tbojanshná
(Mc 2.1-12; Lc 5.17-26)

¹ Chca tojanopasá chentšana, Jesús canýe barquëshoye tojánamashëngo, uafjajónaye chenguana tojána y cachabe puebloye Capernaumoye tojtanashjango. ² Chora, canýe jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninýe chënga tša imojtsošbuáchema chë šocábioye jáshnama cha bétsobenama; as chë šocábioye tbojaniyana: “Sobreno, añemo matsca; acbe bacna soyënga tcbontseboperdoná ca.”

³ Chca causa, báseftanga ley abuátambayënga chentše imojtsemnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiama; mo chábioye cuafjoyenguangcá entsemna ca.” ⁴ Pero Jesús yojtsetátsëmbo ntšamo chënga imojtsejuabnaycá; chíyeca tojanéyana: “¿Ndáyeca nyëtšá bacna juabnënga ainaniñe šmojtsebmoma ca? ⁵ ¿Tšëngaftangbiana ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca’? ⁶ Atše cbochanjínýanýiye ntšamo chë Bëngbe Bëtsá Entšá tbojanbemá quem luarentše mando yobomnama, entšanga bacna soyëngama jáperdonama ca” —Jesús tojanéyana.

As chë jama ndobenábioye tbojaniyana: “Matëtsbaná, acbe tjuashe mesocñe y acbe yebnoye motsatoñe ca.”

⁷ Chorna chë jama ndobená tojtantsbaná y cachabe yebnoye yojtsatoñe. ⁸ Chca tmojáninýama chë entšanga auatjanánënga imojtsemna y Bëngbe Bëtsá imojtsatschuanaye, cha chca obenana entšanga tojánatšatama.

Jesús, Matéobioye tbojanchembo chabuastama
(Mc 2.13-17; Lc 5.27-32)

⁹ Jesús chentšana tojtsanoñe y canýe entšábioye tojáninýe, Mateo ca uabainá, chë Romocama impuesto entšángbioye atjanayentše inétotbemañe. Chora Jesús tbojaniyana: “Smasto ca.” As Mateo chentšana tojéftsantsbaná y tbojanasto.

¹⁰ Jesús cach Mateobe yebnentše yojtseye ora, banga Romocama impuesto entšángbioye atjanayënga y ínýenga bacna soye amënga tmojánashajna y mesëshentše Jesús y chabe uatsjéndayëngaftaca imojotbiana. ¹¹ Chë fariseunga chca tmojáninýe ora, Jesusbe uatsjéndayëngbioye tmojanatjá: —¿Ntšamo chca yojtsemna, tšëngaftangbe buatëmbayá chë impuesto atjanayënga y bacna soye amëngaftaca entsesá ca?

¹² Jesús chca tojanuena y chë fariseunga tojanéyana: —Chë salud bomnënga ashnayá ndoñe ntsëjabótana, pero chë šoquënga aiñe. ¹³ Smochjá y ntšamo ndegombre uyayancá šmochjuatsjinýe quem Bëngbe Bëtsabe uabemana palabrenguiñe:

Atše séntseboše tšëngaftanga lastemadënga chašmotsemna,

y ndoñe nýe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

Jesús tmojantjá chë Bëngbe Bëtsáftaca jencuéntama tondaye saytescama
(Mc 2.18-22; Lc 5.33-39)

¹⁴ Chentšana, Juan chë Ubayanabe ústonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjëndayënga ndoñe chca ca?

¹⁵ As Jesús tojanëjua: —Chë casamentoye ófjanënga chë boyabása bouamná chëngaftaca tojtsemnëntscuana, chëngbioye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ófjanënga tondaye más jasama quemochátsbomna. Ntsamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

¹⁶ “Ndocná canye uatanguá entšayá base tsëm entšëjuaca jtarmëndana. Er chë tsëm entšëjua jtsabëconana y chë uatanguá entšayá más jtsatanëcanana, y chca chë uátanëcniñe más bëtsiñe jtsabemana. ¹⁷ Y cach ndoñe chë tojtseshayana vínoye tanguá jasabenguiñe ntjataftsuámayana. Tcojuaftsuamasma, chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámama; y chca, chë jasabenga y chë vínoye jtsoservénana ca” —Jesús tojánayana.

Jesús canye shembásabioye tbojanshná y tojanma Jairëbe bembetema cháuatayenama
(Mc 5.21-43; Lc 8.40-56)

¹⁸ Jesús entšanga jojtsëtsësnantscuana, chë judiëngbe enefjuana yebnentsa canye mandayá tojánashjango y Jesusbe shecuatšentše yojshamentšiyë. Chë mandayá tbojaniana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

¹⁹ Chentšana Jesús y chabe uatsjëndayënga chë mandayá tmojanasto. ²⁰⁻²¹ Imojtsaye ora, canye shembása stëtsóicana Jesúsbioye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbioye yojobeconá ora, yojtsejuabnaye: “Masque nye mo chabe entšayá sibiájua chaijuábojajo, salud chantinýena ca.” Chentšana chë šocá Jesusbe entšayá tojanábojajo.

²² Tojanábojajo ora, Jesús tojanobuértana, chë shembásabioye tbojáninýe y tbojaniana: “Añemo matsca, shembása. Bëngbe Bëtsábeñe icošbuachéyeca, mora tšabá contsatmëna ca.” Y cach orscana cha tšabá jojtsatmëna.

²³ Chënga tmojtëtanontsé ayana y chora chë mandayábica chënga tmojánashajna. Chentše Jesús tojánanyë, ínýengna chë veloriamama imojtsanflautaye y ínýengna tša imojtsošachiye. ²⁴ Chora Jesús tojanéyana: “Muentšana mobocnënga. Chë shembásetema cabá ndoñe obaná quenátsmëna; nye endëtsomañe ca.”

Pero chë entšanga Jesúsbioye nye imojtsáfchaye. ²⁵ Pero Jesús pronto chënga chë yebnentsana tojanëbuacna. Chora Jesús tojánamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná. ²⁶ Y nýets chë luarëjana ndayá Jesús yojamama nýetsca entšanga imojátatsëmbona.

Jesús uta jtanata tojanashná

²⁷ Jesús chentsana tojéftsanbocna ora, uta jtanata tbojanasto y mentsá ibojtsaiuáyebuache: —¿Davídbentsana Entśá, bëndata šmotsalastemá ca!

²⁸ Jesús chë yebnoye tojánamashëngo ora, chë jtanata tbojanóbobeconata. As Jesús tojanatjá: —¿Tsëndata šojtsošbuaché atše chca jamama chjobenaye ca?

Y tmojanjuá: —Arseñor. Aíñe ca.

²⁹ Chora Jesús tojánabuchbojajo y tojanëyana: —Ntšamo tsëndatbe ošbuáchiyana yomncá, cachcá chaotsemna ca.

³⁰ Y cachora jinÿama ibojtsobena. Jesús bëtscá chata mentsá tojanamëndá: —Ndocná más quem soye chaondëtsetatšëmbo ca.

³¹ Pero chata chentsana tbojéftsanbocna y cachora tbojanontsé ndayá Jesús chátaftaca tojanmama nÿets chë luarëjana jacúntana.

Jesús, canÿe ndëbiábioye tbojanshná

³² Chë jtanata ibojtsebocanëntscuana, básefta entsanga canÿe ndëbiá, bacna bayëbe juabna uambayá, Jesúsbioye tmojanamba. ³³ Jesús chë bacna bayëja chábensana tbojtanábocna y cachora chë ndëbiá tojtanontsé oyebuambnayana. Entšanga ojanánënga imojtsichamo: “¿Ndocna te Israelentše chca bëts soye chemuáisinÿe ca!”

³⁴ Pero chë fariseunga imojtsichamo: “Cach bacna bayëjengbe amëndayá, Satanás, muábioye obenana tbojatštá chë bayëjenga entšángbentsana jtëbuacanama ca.”

Jesús entsangbiana tbojanongmé

³⁵ Jesús nÿetsca pueblënguëjana y luarënguëjana yojtsachnëjuana y chë judiëngbe enefjuana yebnënguenache entsanga yojtsabuátambaye. Yojanabuayiná chë tšabe noticiënga Bëngbe Bëtsabe amëndayama, y nÿetsca šocanëngama y tsetšanama yojánashnaye. ³⁶ Y chë entsanga tojánanÿe ora, puerte tbojanongmé. Er chënga imojtsemna mo abuajënÿa ndbomna oveshëngcá, puerte uamëntsnayënga ba soyëngama padecena causa, y chaujabuachama ndocná ntsebmncá. ³⁷ Chora chabe uatsjëndayënga tojanëyana: “Canÿe bëts jajañe bëtscá játbanama entsemna, pero peonga nÿe báseftanga. Cachcá quem luarentše, bëtscá entsanga Bëngbe Bëtsábioye nduabuátmënga montsemna, y chëngbioye chabiana abuayinayënga nÿe báseftanga. ³⁸ Peonga tmojtsashbenëse chë nduíñbioye jaimpádana ba peonga chauichamoma chë jaja saná játbanama. Cachcá, Bëngbe Bëtsábioye moimpadanga ba abuayinayënga chauichamoma, quem entsanga chábioye chamúbuajama ca” —Jesús tojanëyana.

10*Jesús chë bnëtsana uta uatsjëndayënga tojanabacacá*

(Mc 3.13-19; Lc 6.12-16)

¹ Chentsana Jesús tojánachembo chabe bnëtsana uta uatsjëndayënga, y obenana tojanatšatá bacna bayëjengbe juabna entšángbentsana jtabocnana y nÿetsca šocanëngama y tsetšanama jashnayama.

² Chë bnëtsana uta uatsjëndayënga mentsá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata; ³ Felipe y Bartolomé; Tomás y Mateo, chë Romocama impuesto entšángbioye atjanayá; Santiago, Alfeobe

uaquiñá y Tadeo; ⁴ Simón, chë celote ca uabobainá y Judas Iscariote, chë uayayëngbe cucuatšíñe Jesúsbioye boshjuaná.

Jesús, chabe bnëtsana uta uatsjëndayënga tojanichamó, Bëngbe Bëtsabe amëndayama jábuayenama

(Mc 6.7-13; Lc 9.1-6)

⁵ Jesús chë bnëtsana uta boyabásenga tojanichamó chë tšabe notiçënga entsanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna. ⁶ Nye Israeloca pueblëngoye šmochjá. Choca entsanga mo ótsena oveshëngcá montsemna, Bëngbe Bëtsábioye corente nduabuatma causa. ⁷ Šmochjá y entsanga šmochjábuayenaye Bëngbe Bëtsabe amëndayana echanjóshjanguama. ⁸ Chë šoquënga šmochjáshnaye, šmochjama chë obanënga chámuatayenama, bacna nguayanánaca šoquënga šmochjáshnaye y bacna bayëjëngbe juabna entsángbentšana šmochtábocna. Chë obenana šmonjóyëngacñe tondaye ntjëtšajuacá; cachcá, chë soyënga šmojtsamama tondaye entsanga šmattsayëngacaye.

⁹ “Ndoñe šmattsambaye crocénana uasnanëchiñe. ¹⁰ Ni shecnaja sanaca benachiñama, ni inye entsáyá jtse nomódama, ni shecochëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jóyëngacñama.

¹¹ “Nderado canye bëts pueblentše o base pueblentše chašmojáshhjaja ora, šmochjáanguango canye tšabe entsá, inyëngbioye ndaingñayá, y chabe yebnentše šmochtsoquedañe, inye puebloye játantscuana. ¹² Canye yebnoye chašmojáshhjaja ora, nyetsca chentša oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’ ¹³ Chë yebnentša entsanga ainaniñe tšabe ebionana jtsebmnama merecido tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndóñesna, nye cach tšëngaftangaftaca chaotsomñe. ¹⁴ Y nderado canye pueblentše o bëts pueblentše chë entsanga ndoñe tcmónjúbuaja y ndoñe tcmónjóyaunase, chentšana šmochjésebocana y chë shecuatšentša polvëshe šmochjésenstoto. Chca, chë entsanga mochántsetatšëmbo chënga tšëngaftangaftaca ndoñe tšabá tmonjamama. ¹⁵ Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjoyauná entsanga Bëngbe Bëtsá puerte jabuache echantsacastigaye, y chë bacna entsanga Sodoma y Gomorra luaroquëngna ndoñe nya nyëtšá jabuache queochatacastigaye ca” —Jesús tojánayana.

Ntsamo chë uatsjëndayënga mochjansúfría

¹⁶ “Šmochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga mo mëtscuayëngcá šmochtsemna y uamanënga mo palomatemëngcá. ¹⁷ Entšangbiamama cuedado šmochtsebmna, chëngbe pueblentša amëndayëngbe cucuatšíñe tšëngaftanga cmochanjábashejuana y chëngbe enefjuana yebnënguenache cmochanjátsetšenaye. ¹⁸ Atšbe ústonënga bëtsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiamama šmotatšëmbcá jóyëbuambayama. ¹⁹ Pero chë mandadëngbe cucuatšíñe chacmojábashejuana ora, ntšamo o ndayá šmochjayanama

ndoñe smattsenócochinýena. Chca orna, Bëngbe Bëtsá tšëngaftanga cmochanjabuayená ntšamo o ndayá jóyebuambayama. ²⁰ Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espíritu, tšëngaftangbiajana echantsóyebuambnaye.

²¹ “Y canýe entšá cachabe catšátbioye uayayëngbe cucuatšíñe bochanjáboshjona chamotsóbama; y canýe taitá cachabe uaquiñábioynaca. Y chë básenga chëngbe bëtšëtsangbe contra mochántsemna y uayayëngbe cucuatšíñe mochanjábashjejuana chamotsëbáyama. ²² Tšëngaftanga atšbe ústonënga bëtsemnama, nyetsca entšanga cmochantsëbuayënja; pero nda nyets tempo átsbeñe ošbuachiyá chaotsomñá, atsbocaná echántsemna. ²³ Canýe pueblentše chacmojtšëcamena ora, inýe puebløye šmochtsacheta. Ndegombre chëyana, Israelentša nyetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

²⁴ “Ni canýe uatsjendayá chabe buatëmbayabiamá más uamaná ntsemnana, ni chë oservená chabe nduiñbiamá más uamaná. ²⁵ Chë uatsjendayá ya cachabe buatëmbayacá jtsemnama tojashjáchése, ndayá más nanjátšboše. Cachá endmëna chë oservenáftaca, cachabe nduiñcá tojtsemnëse. Atše sëndmëna mo canýe yebnentša taitacá y tšëngaftangna mo cach yebnentša basengcá. Entšanga jtsichámuaana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tšëngaftanga cmochtsëbobotma ca?” —Jesús tojanéyana.

Nda ndegombre cuantsebiauatja

(Lc 12.2-7)

²⁶ “Chíyeca entšangbiamá ndoñe matauatjëngana. Chë yoiytëmena soyentšana tondaye ntjinýcá queochaisoquéda, y chë ndótatsëmbo soye, ntsoatatsëmhcá queochaisoquéda. ²⁷ Chë mora chontšëtsëtsná soyënga, chë entšangbiamá mo ibetiñe cuaftsemncá soyënga, tšëngaftanga šmochjama entšanga botamana chama chamotsetatsëmbuama. Y chë iytëcana chontšëtsëtsná soyënga nyetsca entšanga šmochtsabuayiyñaye, mo nda canýe yebnentša tsbanánocana noticiënga tojtsayebuachcá. ²⁸ Ndoñe matauatjëngana nýe chë tšëngaftangbe cuerpo japochócama imobenëngbiamá y ainana jtsepochócama ndoñe ntsobenana. Más šmochtsëbiauatja chë nda endobena tšëngaftangbe cuerpo y tšëngaftangbe ainana jtsepochócama, nyetsca tescama infiernoca.

²⁹ “Uta jaja shloftšetémata nýe canýe denario crocenánama mondbëtsena. Masque chca, ni cánýetema obanatema fshantsoye jotsatšana, tšëngaftangbe Taitá, Bëngbe Bëtsá ndoñe tontsebošëse. ³⁰ Y tšëngaftangbiamá, Bëngbe Bëtsá botamana jtsantješnana, y chca, cha lempe tšëngaftangbiamá jtsetatšëmbuana, bueta stjënashënga tšëngaftangbe bestšasiñe yomnámñaca. ³¹ Chíyeca ndoñe matauatjëngana, tšëngaftanga ba jaja shloftšetëmëngbiamá corente más šmonduámana ca” —Jesús tojánayana.

Ndabiamá Jesucristo yochjayana chabe entšá yomna ca

(Lc 12.8-9)

³² “Nda atšbe entšá yomna ca entšangbe delante tojayanabiamá, átšnaca, atšbe Taitá, chë celoca endmënabe delante chanjayana cha atšbe entšá yomna ca. ³³ Pero nda entšangbe delante atšbe entšá ndoñe yondmëna ca tojayanabiamá, átšnaca, atšbe Taitá, chë celoca endmënabe

delante chanjayana cha atšbe entšá ndoñe yondmëna ca” —Jesús tojanéyana.

Jesusbe causa, entšángbeñe más jtsentsjanayana

(Lc 12.51-53; 14.26-27)

³⁴ “Ndoñe šmattsejuabnaye atše quem luaroye tijabo nyetsca entšanga natjëmbana chamotsiyenama. Atše chama ndoñe chiyátabo; atše sënjabo causa, entšanga más mochántsejtsjanaye. ³⁵ Atše sënjabo chë uaquiñá cachabe taitabe contra chaotsemnana, chë bembe cachabe mamabe contra y chë bebinuá chabe uambén mamabé contra chaotsemnana. ³⁶ Y chca, ba entšangbe uayayënga cachëngbe pamíllanga mochántsemna.

³⁷ “Nda cachabe taitá o mamábioye atšbiana más tbojtsebobonshánëse, cha ndoñe ntsomerecénana atšbe entšá jtsemnana. Nda cachabe uaquiñá o bémbëbioye atšbiana más tbojtsebobonshánëse, cha cach ndoñe. ³⁸ Y nda nyetsca chabe quem luare soyënga ndoñe tonjëseboshjona atše juastama, y atšbiana jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entšá jtsemnana. ³⁹ Nda tojtsentšena quem luarentše bëtscá soyënga jtsebmomnana y atšbiana jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojesonýá atše juastama, masque chaóbana, chë nyetsca tescama yomna tšabe vida echántsebmomna ca” —Jesús tojánayana.

Chë uacanana soyënga

(Mc 9.41)

⁴⁰ “Nda tšëngaftanga chacmojúbuaja, átšnaca cha šochanjofja; y nda atše chašojofja, chë nda šojichmóbioynaca cha bochanjofja. ⁴¹ Nda canýe Bëngbe Bëtsabe juabna oyebuambnayábioye tbojoyeuná, cha chca bëtsemnana, chábioye Bëngbe Bëtsá canýe uacanana soye bochantatšetaye, mo cach Bëngbe Bëtsabe juabna oyebuambnayabe uacanana soycá. Y nda canýe nyetsca soyënguiñe tšabá amábioye tbojofja, cha chca uamanama, chábioye Bëngbe Bëtsá canýe uacanana soye bochantatšetaye, mo cach nyetsca soyënguiñe tšabá amabe uacanana soycá. ⁴² Y ndánaca, tšëngaftanguentsá canýe nduamanábioye masque nýe mo base búyeshtema tbojuabaatšetá, atšbe ustoná bëtsemnayeca, ndegombre Bëngbe Bëtsá canýe uacanana soye chábioye bochantatšetaye ca” —Jesús tojánayana.

11

Juan chë Ubayanabe ichmónënga

(Lc 7.18-35)

¹ Jesús tojanpochocá chabe bnëtsana uta uatsjëndayënga jábuayenama, y chentšana tojtsanoñe chë luariñe pueblënguenache oyena entšanga Bëngbe Bëtsabe palabra jabuátambama y jábuayenama.

² Chë tempo Juan chë Ubayaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, ³ mëntšá jatjayama: —¿Aca ndegombre cojtsemna chë jabama ibojanmëná, chë Uámama Uabuayaná, o šojtsamna ínýabiana jatobátmama ca?

⁴ Chca tmojantjá orna, Jesús tojanëjua: —Smochjá y Juan šmochjauyana ntšamo šmojouena y šmojinýcá. ⁵ Cha šmochjacuënta: Chë jtanënga tšabá entsatëbinýna, chë coshetënga tšabá montsatana, chë

bacna nguayanánaca šoquēnga shnánēnga montsatsmēna y chē tēsmēnga montsuenana, chē obanēnga tmontayena y chē ndbomnjēmēngbiōye chē tšabe noticiēnga montsabuayīnā ca. ⁶ ¡Puerte oyejuayá chaotsemna chē nda atše bacna soye ndoñe stsama ca jtsejuabnayēse, átšbeñe ošbuáchiyana ndoñe tontsajbaná cha ca! —Jesús tojanēyana.

⁷ Chēnga tmojtsatanoñe ora, Jesús tojanontsé Juanbiama chē entšanga jáuyanana, mēntšá: “Juan jinŷama šmojánbocana ora, ¿ndayá jinŷama chē entšanga ndoyena luaroye šmojánbocana? ¿Canŷe entšá ainaniñe tondaye añemo ndbomná, mo canŷe šēse bínŷiaca shatiyeynēscá? ⁸ Y ndóñese, ¿ndayá jinŷama choye šmojánbocana? ¿Canŷe boyabása uámana entšayaca bopormaná? Ndoñe. Tšēngaftanga šmondētatsēmbo chē boyabásenga uámana entšayaca bopormánēngna chē mándayēngbe yebnēnguiñe mondbétsiyenama. ⁹ Y asna, ¿ndayama choye šmojánbocana? ¿Canŷe Bēngbe Bētsabe juabna oyebuambnayá jinŷama? Ndegombre, aíñe; y cbéyana, ndegombre cha canŷe Bēngbe Bētsabe juabna oyebuambnayabiama más bētsá endmēna. ¹⁰ Cha, Juan, endmēna ndabiama Bēngbe Bētsá chabe uabemana palabreñguñe tojánayana mo chabe ichmonacá, mēntšá tojánayana ora:

Cristo, atšbe entšá natsana sēnjichmó acbiama chaóyeuambama, entšanga jábuayenama aca jabama ainaniñe tšabe juabnēngaca chamot-seprontánama ca.

¹¹ Ndegombre cbéyana: Nŷets tempo entšángbeñe, ndocná quenátsmēna Juan chē Ubayanabiama más bētsá; masque chca, Bēngbe Bētsabe amēndayoca chē más batšá uamaná, más bētsá echántsemna ntšamo mora Juan yomnama.

¹² “Juan chē Ubayaná tojánabo orscana mēntscóñama, bētsá entšanga tša mondboše Bēngbe Bētsabe amēndayoye jamashēnguama, y chē Bēngbe Bētsabe amēndayama contra imomnēngna, chēngbe nŷets añémoca montseboše chē mándayana jtsepochoćama. ¹³ Juan candabēntscuana, nŷetsca Bēngbe Bētsabe juabna oyebuambnayēnga y Moisesbe Ley nŷe Bēngbe Bētsabe amēndayama tmonjanobuambá. ¹⁴ Y tšēngaftanga chē soyēnga jóyēngacñama šmojtsebošēse, Juan entsemna chē Bēngbe Bētsabe juabna oyebuambnayá Eliascá, chē jabama ibojamná. ¹⁵ Chē jouenama tmojtsobenēnga, chamouena ca” —Jesús tojánayana.

¹⁶ Mēntšánaca Jesús tojánayana: “¿Ndayacá morsca entšanga imomna? Chēnga mondmēna mo chē plazēngoca mondbetsetbiámama basetemēngcá; chēnga chēngbe enutēngbiōye jtsayebuáchana ¹⁷ y mēntšá jtsichámuana: ‘Tšēngaftangbiama fsēnjaflautá y ndoñe chešmatslantsá; ngmēnaca fsēnjaversiá y ndoñe chešmatošachna ca.’ ¹⁸ Juan tonjánabo, y bētsá entšángbeñe ndoñe quenjatamana ni jasana, ni jofšiyana, y entšanga montsanichamo chana bacna bayējbe juabna uambayá yojamna ca. ¹⁹ Morna, chē Bēngbe Bētsá Entšá tbojanbemá tonjabo, y chana aíñe entsamana bētsá entšángbeñe jtsesayana y jtsofšēšnayana, y entšanga montsichamo chana yapa uasayá y vínoye tmoyá entsemna ca y Romocama impuesto entšángbiōye atjanayēnga y bacna soye amēngbe amigo ca. Pero Bēngbe Bētsá endbētsinŷanŷnaye cha nŷets osertánana bomná yomnama, chē ndayá cha tojama ora ndayá chentšana tojóbocna soyēngaca ca” —Jesús tojánayana.

Chë nduauenana entsanga
(Lc 10.13-15)

²⁰ Chentsana Jesús tojanontsé jucácanana chë entsanga, ndëmuanjenga imojoyena chë pueblënguifne ndayenache ba chabe bëts soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntsá yojtsichamo: ²¹ “¡Tša lastema, Corazín puebloca entsangbiámnaca! Chë chentše sënjama bëts soyënga, Tiro y Sidón bëts pueblënguientše matënjochnënguse, chentsa bacna entsanga ya tempo ngmënaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatsëmbuama uajojësha entsayangaca matmëntopormanga y chëngbe bestšašifne jatinyá matmënjenotbótoto. ²² Pero ndegombre cbëyana, ntšamo entsanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebmna, chë Tiro y Sidonoca bacna entsangbe castiguama. ²³ Y tšëngaftanga, Capernaumoca entsanga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoye cmochantsësetjango! Chë muentše sënjama bëts soyënga Sodomoca matënjochnënguse, choca entsanga ya tempo ngmënaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsomñe. ²⁴ Pero ndegombre cbëyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entsángbioye ndoñe nyetsá jabuache quemochatacastígaye ca” —Jesús tojánayana.

“Atšbioye mabënga y šmochjóchna”
(Lc 10.21-22)

²⁵ Chë tempo, Jesús tojánayana: “Atše cbatschuá, Taita, celoca y quem luarentša Utabná. Aca, chë nye batsá tatsëmbënga tcojanjanyé, chë tša tatsëmbënga y osertánëngbiana tcojaiytëme soyënga. ²⁶ Aíñe, chama cbontsadorana, Taita, chca chaotsemnama tcojáböšenayeca.

²⁷ “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nye chë Taitá aíñe. Y chë Taitábioye ndocná corente quebnatábuatma; nye chë Uaquiñá aíñe, y ndábioye chë Uaquiñá tojtseboše nda chë Taitá yomnama jinjanyiyama, chánaca chë Taitábioye bochantšábuatma.

²⁸ “Atšbioye mabënga nyetsca tšëngaftanga uamëntšnyënga y bëtsca trabajo uangménënga, y atše chanjama tšëngaftanga chašmochnama. ²⁹ Ntšamo canye entsá, uacná yuguëšifne juabatsëcana juanatsama, cachcá, tšëngaftanga atše šmochjalesencia jobnatsayama y jabuátambama. Atšbentsana šmochjuatsjinye: atše uantado mëná sëndmëna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ainaniñe más añemo šmochántsebmna. ³⁰ Mo canye uacnacá, ndoñe tishuta yuguëšeca o ndoñe uauta uasmanëshaca, paselo jama jobenayana, cachcá tšëngaftanga šmochántsemna atše cbojtsabnatsana y cbojtsabuátambase; y chca, tšëngaftanga más oyejuayënga šmochántsemna y más paselo nyetsca soyënga jamama echántsemna ca” —Jesús tojánayana.

12

*Jesube uatsjéndaýénga ochnayté trigo tmojanátabebe
(Mc 2.23-28; Lc 6.1-5)*

¹ Chë tempo, Jesús canýe ochnayté canýe jajajana yojtsachnějuana. Chabe uatsjéndaýéngna shěntseca imojtsemna, chíyeca tmojanontsé trigo juatabebiana y chë meshénga jasana. ² Chë fariseunga chca tmojáninýe ora, Jesús tmojanianyana: —Minýe, acbe uatsjéndaýénga canýe soye montsama y chë soye ochnayté jamama ndoñe quenátslesenciana ca.

³ As Jesús tojanéyana: —¿Ndoñe šmëndualía y šmondětatsěmbo ndayá David y chabe enutěnga tmojanmama, shěntseca imojtsemna ora? ⁴ Chca orna, David, Běngbe Bětsabe běts yebnoye yojámashěngo y chë Běngbe Bětsá chentše yojamnama inýinýnaye tanděšěnga yojase. Chë tanděše nýe ndánaca jasama ndoñe yonjalesenciana, ni Davidbiana, ni chabe enutěngbiana. Nýe bachnangbiana belesenciana chë tanděše jasama. Masque David chca tojanma, Běngbe Bětsá chora ndoñe tonjánayana David canýe bacna soye tojanma ca. ⁵ ¿O ndoñe šmëndualía y šmondětatsěmbo, Moisesbe leyíñe, chë bachnanga ochnayté Běngbe Bětsabe běts yebnentše jtsetrabájayana, pero ndoñe bacna soye ntsemnana chë bachnanga ochnayté ndoñe mondbóchnama? ⁶ Y atše šcuayana: Muentše canýa entsemna, cha chë Běngbe Bětsabe běts yebnentša bachnangbiana más uamaná endmėna y chabe amėndayoca soyěnga más entsámama chë bachnangbe mándayentša soyěngama. ⁷ Běngbe Bětsabe uabemana palabrěnguiñe měntšá endayana: Atše sěntseboše tšěngaftanga lastemaděnga chašmotsemna, y ndoñe nýe bayěnga chašmotsěbánaye Běngbe Bětsá jětschuayama ca. Ntšamo chiñe entsayancá ndegombre cmojtsěsertánese, tšěngaftanga ndoñe chěngbe contra šmattsichamo, chë ochnayté chca tmojtsaměngbiana. ⁸ Chë Běngbe Bětsá Entšá tbojanbemá, chë entšá ochnayté tojtsama sóynaca jtsemándayana ca —Jesús tojánayana.

*Chë buashana cucuatše bomna entšá
(Mc 3.1-6; Lc 6.6-11)*

⁹ Chentšana Jesús tojtsanoñe y chentša judiěngbe enefjuana yebnoye tojánamashěngo. ¹⁰ Chentše yojtsemna canýe boyabása buashana buacuatše bomná. Chë fariseunga imojtsenguaye ndayánaca, as chca chěnga jtsebomnama ndaye sóyeca Jesús mal jaquédama. Chcasna, chora chěnga Jesús tmojantjá: —¿Queojtsesenciana canýe ochnayté šocá jáshnama ca?

¹¹ Y Jesús tojanéjua: —¿Nda tšěngaftanguentšá, canýe oveshá tbojtsėbomna y nýa chë ochnayté canýe fshantsentše atěfjnoye chë oveshá tojtsótsatše, chora chë boyabása nanjá o ndoñe chë oveshá jatábocnama? ¹² ¡Entšá oveshabiana puerte más uamaná endmėna! Chcasna, entselesenciana chë ochnayté tšabe soye jamama ca —Jesús tojanéyana.

¹³ Chora Jesús chë buashana buacuatše bomnábioye tbojanianyana: “Macuenýanėjaná ca.” Y chë boyabásana tojanacuenýanėjaná y chora chětša tšabá yojtsatamna mo cach inýetsacá. ¹⁴ Pero chë fariseunga tmojėsanbocana ora, tmojanontsé juabnayana ntšamo jamėse Jesús jóbama.

Ndayá chë Běngbe Bětsabe juabna oyebuambnayá Jesusbiana tojánayana

¹⁵ Jesús chë soye tojántatsěmbona ora, chentšana tojtsanoñe y ba entšanga tmojanasto. Nýetsca šoquěnga tojanashná, ¹⁶ y tojanaměndá

chabiamá entsángbeñe ndoñe chamondétsóyebuambnana. ¹⁷ Chca tojanaméndá, cachcá chaotsemnana ntsamo chë Bëngbe Bëtsabe juabna oyebuambnayá Isaías tojanayancá. Cha mentsá tojánayana:

¹⁸ Muentše atšbe oservená entsemna. Atše cha sënjabocacá, atšbe bonshaná, y atše corente chabiamá sëntsoyejuá.

Atše chanjama atšbe Espíritu chabe ainaniñe chaotsemnana y entsanga echanjabuayená, Bëngbe Bëtsá nyetsca luarènguentshana entsangbiamá yochjayanama chënga tšabá o ndoñe tšabá tmonjamama.

¹⁹ Cha ndoñe queochátayajuatsana, ni queochátschembumbuana.

Chabe oyebuambnayana tsáshenañe ndocná queochatuena.

²⁰ Mo nda chë atcana šëse ndoñe más jatsndbemana,

chë ndobenënga cha ndoñe queochátapochocaye.

Mo nda chë quinýenëfjua nye uabojátsena uajuinýenëfjua ndoñe ntsafsanana,

chë Bëngbe Bëtsábeñe jtsošbuáchiyama imojtsebojátsangbe obatanana chábeñe, cha ndoñe queochátabuajuanaye.

Cha nyets añémoca echanjëfsetrabája,

entsanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

²¹ Y nyetsca luarènguentshana entsanga chábeñe mochantsobátmana ca — cha tojánayana.

Fariseunga tmojánayana Jesús Satanásbentsana obenana tojanóyëngacñe ca

(Mc 3.20-30; Lc 11.14-23; 12.10)

²² Chora, Jesús yojtsemnoye canye boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínýnama y chabuatauénanama. ²³ Y nyetsca entsanga ojanánënga imojtsichamo: “¿Mua yojtsemna chë Davidbentsana Uámana Entšá, chë Cristo ca?”

²⁴ Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjengbe amëndayá, quem boyabásabioye obenana tbojatštá chë bayëjenga chauatëbuacnama ca.”

²⁵ Y Jesús yojtsetátšëmbo ntsamo chënga imojtsejuabnayama; as tojanëyana: “Canye amëndayentše entsanga tmojtsenojatá y tmojtseñayase, cachënga jenpochócana. Cachcá, canye bëts pueblentsa entsanga o canye yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nyets tempo quemochátsmëna.

²⁶ Cachcá, Satanás cachabe bayëjenga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntsamo nantsobena chabe mándayana quem luarentše jëftsebomnana? ²⁷ Tšëngaftanga šmontsichamo atše Beelzebube obenánaca chë bayëjenga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebojna chë bacna bayëjenga jtëbuacnama? Chíyecna, chënga montsinýinýná ntsamo ndegombre yomnana y tšëngaftanga ndoñe ndegombre soye šmontsichámuama. ²⁸ Y atšna, chë Bëngbe Bëtsabe Espíritbeyeca chë bayëjenga entsángbentsana sëndëtëbuacana; y chë soye entsinýinýná Bëngbe Bëtsabe amëndayana tšëngaftangbioye tojóshjuamuana.

²⁹ “¿Ntsamo nda nanjobenaye canye corente añemo bomna entsabe yebnoye jamashënguana y chabe soyënga jtsebocana, ndoñe natsana

chábioye tconjshétsebatsëquëse? Nýe tcojshétsebatsëquësna aíñe cuanjobeyana cha jefcana. Atşe ya chca Satanásoftaca sënjama.

³⁰ “Nda ndoñe átseftaca tontsemná, atşe uayayá jtsemnana. Y nda átseftaca ndoñe tontsetrabája, chana atşe contra jtsetrabájayana.

³¹ “Chíyeca cbëyana, Bëngbe Bëtsá entsanga echanjáperdonaye nyetsca chëngbe bacna soyënga y chë Bëngbe Bëtsabíama puerte bacá oyeuambnayanana, mo chábioye cuafjoyenguangcá; pero ndoñe queochátaperdonaye chë Uámana Espíritbíama puerte bacá ichámënga. ³² Bëngbe Bëtsá bochanjaperdóna chë Cha Entsó tbojanbemabíama ndoñe tşabá ichamuábioye; pero chë Uámana Espíritbíama ndoñe tşabá ichamuábioyna, ni quem luarëntşe, ni ndocna te quebochatsperdóna ca” —Jesús tojánayana.

Tşabe betiye o ndoñe tşabe betiye tondmënama, jtsoatşëmbuana ntşamo tojashajoncá

(Lc 6.43-45)

³³ “Canýe betiye tşabá mobocuedanga y botamana echanjashájona; ndoñe tşabá matscuedánana y tşabe shajuana ndoñe queochátbomna. Chë betiye tşabe betiye o ndoñe tşabe betiye tondmënama, jtsoatşëmbuana ntşamo chëshe tojashajoncá. ³⁴ ¡Mëtscuaye entsanga! ¿Ntşamo şmattsobena tşabe soyëngama jtşoyebuambnayanana, cach tşëngaftanga bacna entsanga şmojtsemnëse? Er ndayá ainanoca becá tomnana entsá jtşoyebuambnayanana. ³⁵ Chë tşabe entsá, chë ainanoca tşabe juabnënga bomnentşana jtşoyebuambnayanana, y chë bacna entsana chë ainanoca bacna juabnënga tobomnentşana jtşoyebuambnayanana. ³⁶ Y ndegombre cbëyana, chë entsangbíama tşabá o ndoñe tşabá tmonjamama jayanama tempo chaojobuache ora, ndaye ndoservena palabra şmojóyebuambama, Bëngbe Bëtsabe delante şmochanjayana ndáyeca chca ca. ³⁷ Er ntşamo tcojtsóyebuambnana Bëngbe Bëtsá echanjayana tşabá o ndoñe tşabá tconjamama, y cmochanjauyana aíñe o ndoñe cmontsemna castiganá jtsemnana ca” —Jesús tojánayana.

Chë bacna entsanga Jesús tmojanimpadá canýe bëtsoye chaoma, chabe obenana jinýama

(Lc 11.29-32)

³⁸ Chentşana, básefta fariseunga y Moisesbe ley abuátambayënga Jesús tmojantjá: —Buatëmbayá, bënga fsëntseboşe aca canýe bëtsoye chaoma, acbe obenana chaşcuinýanyëma ca.

³⁹ As Jesús tojanéjua: —Quem puerte bacna entsanga y ndoşbuáchiyënga montseboşe atşe canýe bëtsoye chaima, atşe obenana jinýanyiyama; pero chca soye ndoñe quemochátinýe, sinó nýe chë ndayá yomna mo chë Bëngbe Bëtsabe juabna oyeuambnayaná Jonásoftaca tojanopasá soyca. ⁴⁰ Ntşamo Jonás unga te y unga ibeta chë bëtsoye beonbe uafsbioye yojëftsemncá, cachcá chë Bëngbe Bëtsá Entsó tbojanbemá unga te y unga ibeta fshantse jashenoye echanjëftsemna. ⁴¹ Morsca entsanga tşabá o ndoñe tşabá tmonjamama Bëngbe Bëtsá yochjayana te, Nínive bëtsoye pueblaca entsanga mochanjotsaye y morsca entsangbíama mochanjayana ndoñe tşabá tmonjama ca; er chënga, Jonás yojtsabuayiynaye ora, tmojanoyeuná y chë tşabe benache tmojtanishache, y chë mora muentşe entsemnana, Jonasbíama más uamaná endmëna. ⁴² Morsca entsanga tşabá o ndoñe tşabá tmonjamama Bëngbe Bëtsá yochjayana te, chë Sur luaroca reinánaca echanjotsaye y

morsca entsangbiamana echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanána palabrénga jouenama, y chë mora muentše entsemnana, Salomonbiamana más uamaná endmëna ca —Jesús tojánayana.

Ndayá inopása chë bacna entsángaftaca
(Lc 11.24-26)

⁴³ Jesús mëntsánaca tojánayana: “Canye bacna bayëja canye entsábentšana tojësebocna ora, chë bayëjna bojojo luarënguenache jtsanana ndayentše jóchnama onguayíne, y canye luare ndoñe tonjinyëna ora cha jenójuaboyana: ⁴⁴ ‘Atšbe oyenoye, chë ndayentsana sënjëftsebocnoye chanjeshëcona ca’. Y choye tojtashjango orna, jinÿenana lempe tšabá cha jtesamashënguama, mo chentše ndocná tontsiyencá, tsjajniñe y lempe botamaniñe cuaftsemncá. ⁴⁵ Chorna chë bayëjna jana y inÿe canÿsëfta bayëjenga chabiamana más opëjenga jobiatšana y nÿetscanga choye jamashjnana chë boyabásabeñe joyënanama. Y chca, chë boyabása tempscama más bacna entsá jtsemnana, chora chë natsanama más bayëjenga abamna causa. Morsca puerte bacna entsángaftaca cachcá echanjochnëngo ca” —Jesús tojánayana.

Chë Jesusbe ndegombre pamíllanguentsënga
(Mc 3.31-35; Lc 8.19-21)

⁴⁶ Jesús cabá entsanga yojsëtsëtsnaye ora, chabe mamá y catsátanga tmojánashjajna y imojtseboše Jesúseftaca jóyebuambayama. Nÿe shjoca imojtsemna; ⁴⁷ asna, canye boyabása Jesúsbioye tbojanbuayená: —Acbe mamá y acbe catsátanga shjoca montsemna y montseboše ácaftaca jóyebuambayama ca.

⁴⁸ Pero Jesús chë jauenayama tojánabioye tbojanianana: —¿Nda atšbe mamá yomna, y ndëmuanÿenga atšbe catsátanga ca?

⁴⁹ Y cachora chabe cucuatše tojanatsbaná, chabe uatsjëndayënga tojanënyañë y tojánayana: —Quemënga montsemna mo atšbe mamacá y mo atšbe catsatangcá. ⁵⁰ Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catsata, atšbe uabena y atšbe mamá, atšbe ndegombre pamíllanguentsá ca —Jesús tojánayana.

13

Chë jenabe cuento
(Mc 4.1-9; Lc 8.4-8)

¹ Cach te, Jesús yebnentšana tojëftsanbocna y uafjajónaye tsachoca tojanótbema. ² Mallajta entsanga choye tmojanobeconá; as Jesús, chë uafjajónayentše yojanamna canye barquëshoye tojánasëngo, tojanótbema; y chë entsangna tsachoca imojtsemna. ³ Chorna ba soyëngama cuentëngaca chënga tojanabuatambá.

Mëntsá tojanëyana: “Canye jená chë jénaye jaujquëshama yojëftsebocna. ⁴ Yojsëjquëshaye orna, básiëfta jénaye benache juachañe yojuatquëcjana, pero chë jaja shloftšënga imojástjajna y lempe imojtsósañe. ⁵ Inÿe meshëngna ndëtsbenguiñe yojuatquëcjana, ndoñe yapa fshantse binÿnentše. Chiñna betscó yojuábocna, fshantse ndoñe jashenocana yonjanmëna causa, ⁶ pero shinÿe yojábocna ora, puerte yojojënyána y yojsancta; y yojsábojo, bëtscá thëtëjenga tondaye causa. ⁷ Inÿe meshëngna uhmëshangañe yojuatquëcjana, y chë uhmëshangá

yojuájua orna, lempe yojsatscué. ⁸ Y inye meshëngna, uanguanëshiñe yojuatquécjana y puerte botamana chiñe yojuashajo: ínÿenache nÿe canÿe jénayentsana mo patse meshënga yojuashájona, ínÿeñna mo chñënguana bnëtsana meshe y ínÿeñna mo unga bnëtsana meshe.”

⁹ Jesús chca jacuéntama tojanpochocá ora, mëntsá tojánayana: “Chë jouenama tojtsobenënga, šmochjouena ca.”

Ndáyeca Jesús cuentëngaca yojánabuatambaye
(Mc 4.10-12; Lc 8.9-10)

¹⁰ Chora chë uatsjëndayënga tmojanobeconá y Jesús tmojantjá: — ¿Ndáyeca entšanga cuentëngaca cojtsabuatambá ca?

¹¹ As Jesús tojanëjua: —Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë ínÿengbioyna ndoñe. ¹² Nda tojtsebomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batšatema tobomna sóynaca mochántseboca. ¹³ Chíyeca atšë cuentëngaca chënga sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá chë soyënga chamouena, ndoñe tšabá quemochátuenana, ni queochátësertana. ¹⁴ Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaías tojanayancá:

Masque becá chamouena, ndoñe queochátësertana.

Masque puerte chamotsantješna, ndoñe quemochátinÿe

¹⁵ Quem entšanga ndoñe quemátsboše botamana jajuaboyana; chënga uamatsáchtönënga montsemna y chëngbe bomínÿnaca cachcá.

Chca ndóñesna, chënga muantsobena jinÿama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atšë chënga chayatsebacama ca —cha tojéftsanbema.

¹⁶ “Tšëngaftangna oyejuayënga šmochanjoyena, er šmond bomna bom-inÿe y matscuašënga Bëngbe Bëtsabe soyënga jinÿama y jouenama.

¹⁷ Ndegombre cbëyana, banga Bëngbe Bëtsabe juabna oyebuambnayënga y nÿetsca soyënguiñe tšabá amënga tmonjánbošena chë tšëngaftanga šmontsonÿá soyënga jinÿama, y ndoñe chemátaninÿe; tmonjánbošena chë tšëngaftanga šmotsuenana soyënga jouenama, y ndoñe chemátanuenta ca” —Jesús tojanëyana.

Jesús chë jenabe cuentama tojanabuayená
(Mc 4.13-20; Lc 8.11-15)

¹⁸ “Chcasna, oído šmochhajajo; chë jenabe cuento mëntsá endayana:

¹⁹ Chë Bëngbe Bëtsabe amëndayama tmojouena y ndoñe tontsësertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainanentsana jabétsabuajuanama, chënga chiñe ndoñe chamondëtsošbuáchema.

²⁰ Y chë ndëtsbenguiñe yojuatquécjana jénaye entsemna mo chë aiñe Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá; ²¹ pero ndoñe nÿets tempo chana jochájua, y chca, ndoñe bayté Bëngbe Bëtsáftaca ntjëftsemnëngana, ndoñe yapa tmonsasbuaché causa. Inÿenga

chëngbioye mochantsëbuayënja y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. ²² Chë uchmëshangañe yojuatquécjana jénaye entsemna mo chë Bëngbe Bëtsabe palabra tmojouena entsangcá, pero quem luarentša soyéngaca oyejuayënga jtsemnana yapa mochántsenojuabnaye y mallajta crocénana y ba soyënga jtsebmomnana mochántseboše. Chíyeca chënga Bëngbe Bëtsabe palabra jtsebnëtjombana y ntšamo cha tojayancá ndoñe ntsamana. ²³ Pero chë uanganëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entsangcá. Mo canýe betiye puerta tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Inýengna inýengbiana más bëtscá soyënga mochántsama, y chca, inýenga jtsemnana mo chë patse meshënga tojanshajo jenaycá, inýenga mo chë chnënguana bnëtsancá y inýengna mo chë unga bnëtsana meshënga tojanshajo jenaycá ca” —Jesús tojanabuayená.

Chë tríguañe bacna shacuanama cuento

²⁴ Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canýe boyabása chabe jajañe yojáje. ²⁵ Pero nýetscanga imojtsomañe orna, chabe uayayá yojáshjango y chë trigo jeniñe bacna shácuaana yojesejé y yojtsatoñe. ²⁶ Y chë trigo yojuájua y ya yojtseshajuana orna, chë bacna shácuanënaca yojuábocna. ²⁷ As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuaana chiñe tojuábocna ca?’ ²⁸ Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuaana jetsejashtsëtsama ca?’ ²⁹ Pero chë nduiño yojáuyana: ‘Ndoñe. Chë bacna shácuaana šmojtsejashtsëtsana ora, chë trígnaca šmattsejashtse ca. ³⁰ Más tšabana, cachcá mochjonýaye cánýiñe chaójuama, chë jaja saná játbanama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuaana chamotsejashtsëtse y chamotsentsacuacjuá jtsejuinýiyama, y chentšana chë shajuana chamuatbaná y atšbe grano uaquëcnaye yebniñe chamotsatsuaamá ca’ ” —Jesús tojánayana.

Chë mostaziye jenayama cuento

(Mc 4.30-32; Lc 13.18-19)

³¹ Jesús mëntšánaca tojanacuntá: “Bëngbe Bëtsabe amëndayana endmëna mo canýe mostaza betiye jenaycá, canýe boyabása chabe jajañe yojáje. ³² Ndegombre, nýetsca jenayëngama chë mostaza jénaye chë más básetema endmëna, pero tojójua orna, chë jajañentse chë más bëtš betiye jóbemana. Tša bëtš betiye jtsemnana, chíyeca ba buacuashangá jtsebmomnana y chë jaja shloftšënga jana y chiñe uajajonëtemëngá jauábopormana ca” —Jesús tojánayana.

Chë levadurama cuento

(Lc 13.20-21)

³³ Quem inýe cuéntnaca tojanéyana: “Bëngbe Bëtsabe amëndayana endmëna mo levadurcá; canýe shembása chana jenájuaabana unga medida arninýañe, nýetsana chauabochoama ca.”

Ndáyeca Jesús entsanga cuentëngaca yojanabuayiyiná
(Mc 4.33-34)

³⁴ Jesús n̄yetsca ch̄e soyēngama lempe cuentēngaca entšanga jtsētsētsnayana, y cuentēngaca ndoñesna ndoñe yonjanoyebuambná.
³⁵ Chca yojamna ndayá cachcá chaochnēnguama ntšamo ch̄e Bēngbe Bētsabe juabna oyebuambnayá tojanayancá, mēntšá:
 Jabuátambamna cuentēngaca chanjóyebuambaye;
 chanjayama ch̄e iytēmena soyēngama y ch̄e entšanga ndoñe mondētatsēambo soyēngámna;
 Bēngbe Bētsá quem luare tojanma orscana ch̄e soyēnga yomna ca —cha tojánayana.

Ch̄e tríguañe bacna shácuana cuentama Jesús tojanabuayená

³⁶ Chentšana Jesús ch̄e entšanga tojtanchamó y yebnoye tojtanamáshēngo. Chentšna chabe uatsjēndayēnga tmojanimpadá ndayá ch̄e bacna shacuanama cuento betsayancá chauabuayenama.
³⁷ As Jesús tojanēyana: “Ch̄e tšabe jénaye jená endmēna ch̄e Bēngbe Bētsá Entšá tbojanbemá, ³⁸ y ch̄e jajañna, quem luare. Ch̄e tšabe jénaye entsemna ch̄e Bēngbe Bētsabe amēndayoye mochjámashjna entšanga, y ch̄e bacna shácuana entsemna ch̄e bacna bayjēngbe amēndayabe entšanga, ³⁹ y ch̄e uayayá, ch̄e bacna shácuana yojáje chana, Satanás. Ch̄e jaja saná atbanayana entsemna ch̄e quem luare jopochócama chaojobuache ora, y ch̄e trabájayēngna ch̄e angelotémēnga.
⁴⁰ Ntšamo ch̄e bacna shácuana jtsejashtsētsana y iñoye jtsatmetsana jtsejuin̄iyama, cachcá echántsemna quem luare jopochócama te.
⁴¹ Chorna, ch̄e Bēngbe Bētsá Entšá tbojanbemá chabe angelotémēnga echanjichamuá ch̄e ín̄yēnga bacna soye chamomama amēnga y ch̄e bacna soyēnga amēnga chabe amēndayentšana chamotsajuanayama.
⁴² Y chora chēngbioye ch̄e uabouana iñeshoye mochantsēsetjango y chentše puerte mochanchenóbošachna y ch̄e tsetšanama juatsašēnga mochantsenoftēsjojnaye. ⁴³ Chora, ch̄e ntšamo Bēngbe Bētsá yomandacá amēngna corente mo shin̄ycá mochantsebuashin̄yinyana chēngbe Taitá, Bēngbe Bētsabe amēndayoca. Ch̄e jouenama tmojtsobenēnga, smochjouena ca” —chora Jesús tojánayana.

Ch̄e fshantsiñe uaiytēmena bomnanama cuento

⁴⁴ “Bēngbe Bētsabe amēndayana endmēna mo ch̄e fshantsiñe uaiytēmena bomnancá. Can̄ye boyabása ch̄e bomnana yojuin̄yēna y chentšana iytēcana cachentše yojesatbontsá. Corente oyejuayá yojtá, n̄yetsca chabe bomna soyēnga yojetsatobuiye y chentšana ch̄e fshantse yojtobuámiñe ca” —Jesús tojánayana.

Ch̄e corente uamana fiantse ndētšētēmama cuento

⁴⁵ “Mo can̄ye entšá uamana fiantse ndētšētēmēnga obuamnañacánaca endmēna ch̄e Bēngbe Bētsabe amēndayana. ⁴⁶ Chana, can̄ye corente uamana ndētšētēma yojin̄yēna ora, yojtá y lempe ch̄e inabomna soyēnga yojetsatobuiye y ch̄e ndētšētēma yojtobuámiñe ca” —Jesús tojánayana.

Ch̄e atarraiēshama cuento

⁴⁷ “Bēngbe Bētsabe amēndayana endmēna mo can̄ye atarraiēshacá, buyeshoye jutšenana y n̄yetsca beonga jashebuáyana. ⁴⁸ Ch̄e atarraiēsha jútjena tojtsamna orna, ch̄e beonga ashebuánayēnga jtsashēbjátsēcana, tsachoye juyambana y chentše juatbēmana ch̄e beonga jabocacayama; ch̄e tšábēnga sbarēquēnguñe juatsuámana y

chë ndoñe tšábengna jtsëtšanana. ⁴⁹ Cachcá echanjochnëngo quem luare jopochócama tempo chaojobuache ora. Chë angelotémënga mochanjábocana chë tšabe entšángbentsana bacna entšanga jaluárama, ⁵⁰ y chë bacna entšangna chë uabouana ífeshoye mochántsatquëcjaye, y chentše puerte mochanjenóbošachna y chë tsetšanama juatsašënga mochantsenoftšëjnojnaye ca” —Jesús tojanacuntá.

Anteo y tsëm uámana bomnana

⁵¹ Chora chabe uatsjëndayënga Jesús tojanatjá: —¿Lempe chama quec-mojtsésertana ca?

Y chënga tmojanjuá: —Arseñor, aíñe ca.

⁵² As Jesús tojanëyana: —Canÿe ley abuatambayá jtsetatšëmbuana ndayá Bëngbe Bëtsá tempo Moisesbiajana yojanoyebuambná soyëngama. Ntšamo Bëngbe Bëtsabe amëndayana bëtsemnana cha tojtsatsjendá orna, mo canÿe yebnentša nduiñcá cha jtsemnana. Chë nduiñna chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanëyana.

Jesús Nazaretoca

(Mc 6.1-6; Lc 4.16-30)

⁵³ Jesús chë soyënga jacuëntama tojanpochocá ora, chentšana tojt-sanoñe. ⁵⁴ Y cachabe luaroye tojtanashjango y chentša judiëngbe ene-fjuana yebnentše tojanontšé jabuátambama. Entšanga ojnanánënga imo-jtsichamo: —¿Chë lempe yojtsetatšëmbcá ndëmoca mua tojuatsjinÿe ca? ¿Ntšamo nantsobena chca bëtš soyënga jamama ca? ⁵⁵ ¿Mua ndoñe yondmëna chë calpinterbe uaquíñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, ⁵⁶ y chabe uabénanga ndoñe muentše bëngaftaca mondoyena? ¿Ndayentšana lempe chca mua yojtsebomna ca? —chënga imojtsichamo.

⁵⁷ Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanëyana: —Nÿetsquénache canÿe Bëngbe Bëtsabe juabna oyebuambnayá bëtšá jabemëngana, pero cachabe luar-entše, cachabe yebnentše ndoñe ca.

⁵⁸ Chíyeca chentše Jesús ndoñe tonjëftsanna ba bëtš soyënga Bëngbe Bëtsabe obenánaca, chë entšanga chábeñe ndoñe montsanošbuaché causa.

14

Ntšamo Juan chë Ubayaná tojanóbana

(Mc 6.14-29; Lc 9.7-9)

¹ Chë tempo, Rey Herodes, chë Galileoca mandayá tojanuena ntšamo nÿetsca entšanga Jesucristbiana imojtsichamcá. ² As cha chabe oservénënga tojanëyana: “Mua Juan chë Ubayaná ctsemna, obanënguentšana tojtayena, chíyeca chca obenana bëtš soyënga jamama yojtsebomna ca.”

³ Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamia. Herodes chca tojanma Herodíasbe causa, chabe catšata Felipbe shema. ⁴ Juan Heródesbioye mëntšá ibnauácacana: “Ndoñe quenátslesenciana aca acbe

catšatbe shémaftaca jobouamayama, acbe catšata cabá ainá yotsomñe ora ca.”

⁵ Y chama Herodes yojtseboše Juan jóbana, pero entsangbiana yojsauatja, er chënga imnajuabnaye Juan ndegombre Bëngbe Bëtsabe obenánaca yojanoyebuambná ca. ⁶ Pero Heródesbe cumpleño oboyejuaye ora, Herodíasbe bembe entsangbe delante tojanlantsá y Herodes puerte chama yojsóyejuaye. ⁷ Chíyeca Herodes, jajúrase, tbojanšbuachená ndayánaca jatšetayana, ntšamo tbojotjañcá. ⁸ Y Herodíasna lempe bémbëbioye ibojabuayená ntšamo Herodes jojuama. As chë bembe tbojaniana: “Canýe šceniñe Juan chë Ubayanabe bestšaše šmatšetá ca.”

⁹ Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama.

¹⁰ Y as tojanmandá chë Juan yojanëtámenoca chabe bestšaše chamuetséstjanguama. ¹¹ Chentšana, canýe šceniñe chë bestšaše tmojanamba y chë tobiaše tmojanëntšabuaché y chana, chabe mamábioye.

¹² Chentšana, Juanbe ústonënga tmojánashajna, chabe cuerpo tmojésanocñe y tmojána jauábtontsama. Y chora, Jesús yojtsemnoye chënga tmojána y chë soyëngama tmojancuentá.

Jesús shachna uaranga boyabásenga saná tojanacaredadó
(Mc 6.30-44; Lc 9.10-17; Jn 6.1-14)

¹³ Jesús chca tojanuena ora, canýe barquëshañe tojtsanoñe canýe bën luaroye, entsanga ndoyena luaroye. Pero entsanga chama imojátatšëmbona y chë pueblënguentsana tmojánbocana shecuátseca cha juastama. ¹⁴ Chentšana, chë barquëshoicana tojtanastjango ora, Jesús ba entsanga tojánanye, chë cha tmojánguanguënga. Chëngbiana tbojanongmé y chë entsanguentsana ba šoquënga tojanashná. ¹⁵ Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojaniana: — Ya jetiñe entsemna y quem luariñe ndocná quenatiyena. Entsanga cuantichamuá, pueplotëmëngoye chamotsoñama, saná chamobuámiñama ca.

¹⁶ As Jesús tojanējua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

¹⁷ Y chënga tmojanjuá: —Muentše tondaye queftsátsbomna; nýe shachna tandëse y uta beónata ca.

¹⁸ As Jesús tojanějyana: —Chë soyënga moye miyëbo ca.

¹⁹ Chentšana Jesús tojanmandá entsanga chamoshëntsjatbiamama. Chorna, chë shachna tandëse y chë uta beónata tojanca, celoye tojanontješé y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga tojanējátaye, y chëngna nýetsca entsanga tmojanacaredadó. ²⁰ Nýetsca entsanga tmojanse jtoshachaye nýetšá y cabá chë ojamnëtëmëngaca bnëtsana uta sbarëcua tmojanajutjé. ²¹ Chë tmojansënga imojamna mo shachna uaranga boyabásenga, shembásenga y básenga ntjacuntacá.

Jesús béjaye juatsbuacá yojsaye
(Mc 6.45-52; Jn 6.16-21)

²² Chentšana, Jesús chabe uatsjëndayënga tojanamëndá chë barquëshoye jtamashjna y chë uafjónaye chenguánoica chabe natsana jashjajnana. Chëntscuana Jesús entsanga yojtichamuá. ²³ Nýetscanga

tojtanichamó orna, Jesús canye tjoye tojántsjua canya jtsemnama, Bëngbe Bëtsáftaca jencuéntama. Yojaibétata ora, cha canya chentse yojtsemna, ²⁴ y chë barquëshana tsachocana bënoca yojtsamna. Y chë olëshënga chë barquëshana yojtsájtsetaye, chë bin'ya chëngbe contra yojtsemna causa. ²⁵ Ya bin'yanoyana, Jesús chëngbioye vojobeconá; bėjaye juatsbuacá yojtsaye. ²⁶ Chabe uatsjéndayënga chca cha tmojánin'ye orna, tša imojochauatjaná y puerte auatjanánënga tmojanoyó: —¡Canye añemëse entsemna ca!

²⁷ Pero chora Jesús tojanëyana: —¡Añemo šmochtsebomna, atše Jesús sëndmëna; ndoñe matauatjëngana ca!

²⁸ Chora Pedro, Jesúsbioye tbojaniana: —Bëngbe Utabná, ndegombre aca tcojtsemnëse, momandá atše bėjaye juatsbuacá ácbioye chayá ca.

²⁹ Y Jesús tbojaniana: —Mabo ca.

Chora Pedro chë barquëshoicana tojánastjango y tojanontsé bėjaye juatsbuacá Jesúsbioye jama. ³⁰ Pero chë bin'ya tša jabuache yojtsemnama tojánin'ye ora, Pedro puerte yojtsauatja y tbojanontsé jtsen-atjëmbana. Chiyeca cha jabuache tojanchembo: —¡Bëngbe Utabná, šmatsbocá ca!

³¹ Y cachora Jesús tbojtano buácuëtëntsiye y tbojaniana: —¡Tša batsatema ošbuachiyá! ¿Ndáyeca ndoñe bëtscá átsbeñe contsošbuaché ca?

³² Chentšana chë barquëshoye chata tbojtanamáshëngo y cachora chë bin'ya bonguana yojtsatsmëna. ³³ Y chora, chë barquëshoye imojtsemnënga Jesusbe shecuatšentše tmojanoshamentse y tmojaniana: —¡Aca ndegombre Bëngbe Bëtsabe Uaquiñá comna ca!

Genesaret ca uabáinoca, Jesús ba šoquënga tojanashná

(Mc 6.53-56)

³⁴ Chë uafjónaye tmojánenashbuachengo y canye luare Genesaret ca uabáinoye tmojánashajna. ³⁵ Chentša entšanga Jesús tmojantëmbá ora, chë luarentša nyetsca entšanga chama tmojántatšëmbona. As chë entšanga chëngbe šoquënga Jesúsbioye tmojanënatse. ³⁶ Y imojtseimpadana nye mo chabe entšayá sibiájuanaca juabojajuama chë šoquënga chaualesencia. Y nyetscanga chabe entšayá sibiájua tmojanábojajënga, shnánënga imojtsatoquédaye.

15

Ndáyeca canye entšá Bëngbe Bëtsabe delante ndoñe tšabia nántsemna

(Mc 7.1-23)

¹ Chora básefta fariseunga y judiëngbe ley abuátambayënga, Jerusalenocana tmojánabënga, Jesúsbioye tmojanobeconá y tmojaniana: ² —¿Ndáyeca acbe uatsjéndayënga ndoñe montsama chë ntšamo bëngbe bëtstaitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bënga chë judiënga fsënduamancá, Bëngbe Bëtsabe delante tšábënga jtsatsmënama ca?

³ As Jesús tojanëjua: —¿Y ndáyeca tšëngaftanga ndoñe šmontsama ntšamo Bëngbe Bëtsá tojanmandacá, nye cach tšëngaftangbe bëtšëtsanga innëtsama soyënga jtsamama ca? ⁴ Bëngbe Bëtsá mëntšá tojanmandá: “Acbe bëtšëtsata stëtsoye ndoñe catjáquedaye”, y “nda cachabe bëtšëtsatbiama podessa tojóyebuambase, chana jóbanama jtsemnana ca.”

⁵ Pero tšëngaftanga šmondbëtšichamo canye entšá canobena chabe taitá

o chabe mamá jauyanana: “Lempe ntšamo sëndbomncá Bëngbe Bëtsá jasérviana entsemna, chíyeca tondaye quetsátsbomna aca juajabuáchama ca”; ⁶ y šmondbétsichamo nýe ndánaca chca tojayanése, ya ndoñe ntsemnana chabe taitá o chabe mamá štétsoye ndoñe ntjaquédana, ni ntjuajabuáchana ca. Y chca, tšëngaftangbiana tondaye ntsámanana ntšamo Bëngbe Bëtsá tojanmandacá, y aíñe šmontsama ntšamo tšëngaftangbe bëtsétsanga imojanamancá. ⁷ ¡Bacna entsanga, ntšamo ndegombre šmojuabnacá ndinýinýnayënga! Nýe tšabá chë Bëngbe Bëtsabe juabna oyebuambnayá Isaías tšëngaftangbiana tojanoyebuambá, mëntšá tojánayana ora:

⁸ Bëngbe Bëtsá tonjayana: “Quem entsanga mondbétsichamo Bëngbe Bëtsá tša tšabia yomna ca; chca nýe uayásaca, pero chëngbe ainanentše atšbiana ndocna tšabe juabnëngaca.

⁹ Chënga nýe bonamente mondbétsichamo: Bëngbe Bëtsá tša tšabia yomna ca;

chënga nýe entsangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

¹⁰ Chentšana Jesús entsanga tojánachembo y tojanëyana: —Smochjouena y chacmësertá. ¹¹ Ndayá entsá tojttesacá, ndoñe quebochátsbema Bëngbe Bëtsabe delante ndoñe tšabia. Inýetšá comna: ndayá entsá tojtsejuabná y tojtsoyeuambnacá endobena cha jabemana Bëngbe Bëtsabe delante ndoñe tšabia ca.

¹² Chora chë uatsjëndayënga Jesúsbiye tmojanobeconá y tmojaniana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénana ca?

¹³ As Jesús tojanëjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nýe entsangbe buatëmbana soyëngaca. ¹⁴ Cachcá mónýaye; chënga montsemna mo jtanënga inýe jtanënga unachayëngcá. Y canýe jtaná inýe jtaná tbojtsánachase, nýets útata canýe tbuabentše bochanjetsótsatše ca —Jesús tojánayana.

¹⁵ Chora Pedro, Jesúsbiye tbojaniana: —Ntšamo chë cuento bëtsayanama šmabuayená ca.

¹⁶ As Jesús tojanëjua: —¿Tšëngaftángnaca cabá ndoñe cmontsësertana ca? ¹⁷ ¿Cabá ndoñe cmontsësertana lempe ntšamo šmojascá uafsbioye jomashënguana y chentšana cuerpentšana jtabocnana? ¹⁸ Pero ntšamo šmojtsoyeuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana. ¹⁹ Ainanocana jtsóbocanana bacna juabnënga: jenóbama, shema o boyábioye ínýaftaca jaíngñama, shembása o boyabásaftaca bacna soye jamama, jatbëbama, jobostérama y ínýabiama jtsayátsenayama. ²⁰ Chë soyënga cocayë jtsobenana entsábioye Bëngbe Bëtsabe delante ndoñe tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

Canýe shembása inýe luarocana ashjagoná Jesúsbeñe yojtsošbuaché (Mc 7.24-30)

²¹ Jesús chentšana, Tiro y Sidón luarëngoye tojtsonoñe. ²² Canýe shembása Caná luarocá chentše inoyena; cha Jesúsbiye yojobeconá y mëntšá yojtsáyebuache: —¡Utabná, Rey Davídbentšana Entšá,

šmotselastemá! ¡Atšbe bembe puerte entsesufrina, bacna bayějbe juabna entsebomna causa ca!

²³ Jesús ndocá tbojanjuá. As chabe uatsjédayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

²⁴ As Jesús tojánayana: —Bëngbe Bëtsá atše šonjichmó jtsanýenama nýe chë entsanga, chë mo ótsena oveshëngcá imomnënga Israeloquënga, y chë ndoñe judiëngna ndoñe ca.

²⁵ Pero chë shembása tojána, Jesusbe shecuatšentše tojanoshamentšé y tbojaniana: —¡Utabná! Diosmanda pavor šmotsebema. ¡Šmotsajabuache ca!

²⁶ Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tbojuajabuache y chëngbioye ndoñesna, nántsemna mo chë básengbe saná chënga cuaftsëbaquécá y quešënga ftsëbuajocá. Chca jamana ndoñe tšabá quenátsmëna ca.

²⁷ As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojtšesá ora. Chcasna, Diosmanda šmotsajabuache ca.

²⁸ Chora Jesús tbojaniana: —¡Shembása, Bëngbe Bëtsábeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá vojtsatsmëna.

Jesús ba šoquënga tojanashná

²⁹ Jesús chentšana tojéftsanbocna y chë Galilea uafjájónaye tsachoye tojána. Chentšana, canýe batsjoye tojántsjua y choca tojanótbema.

³⁰ Mallajta entsanga Jesús vojtsenentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsénachaye. Jesusbe shecuatšentše tmojanëshejango y cha nýetscanga tojanashná. ³¹ Y chca orna, chë entsanga tmojáninýe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna vojtsëbinýna; y chama chënga corente ojanánënga imojtsemna. Chora chënga tmojanontšé jëtschuayana chë Israelentša entsanga imojánadorana Bëngbe Bëtsá.

Jesús canta uaranga boyabásënga saná tojanacaredadó

(Mc 8.1-10)

³² Chentšana Jesús, chabe uatsjédayënga tojánachembo y tojanéyana: —Quem entsangbiamá šontsengmena, er ya unga te chënga átšeftaca muentše montsemna y jasama tondaye quemátsbomna. Atše ndoñe quetsátsboše ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

³³ As chabe uatsjédayënga tmojantjá: —¿Ntšamo muatjobenaye quem luarentše, ndocna entsá ndoyenentše, chëfta entsangbiamá saná jinýenama ca?

³⁴ Y Jesús tojanatjá: —¿Bueta tandëse šmojtsebomna ca?

Y chënga tmojanjuá: —Canýsëfta tandëse y bášefta beonatëmënga ca.

³⁵ Chora Jesús tojanamëndá nýetsca entsanga fshantsiñe chamotbiamama. ³⁶ As chë canýsëfta tandëse y chë beonatëmënga tojanca; Bëngbe Bëtsábioye chama tbojtanchuá, chë saná tojanjatá y chabe uatsjédayënga tojanëjatá. Chentšana nýetsca entsangbioye tmojanacaredadó. ³⁷ Nýetsca

entsanga tmojanse jtoshachaye n̄yetśá. Y chentšana cabá can̄ys̄efta b̄ets sbar̄ećua tmojanajutjé ch̄e tojanójam̄etem̄engaca. ³⁸ Ch̄e tmojans̄enga imojamna canta uaranga boyabásenga, shembásenga y básenga ntjacun-tacá. ³⁹ Chentšana Jesús, ch̄e entsanga tojtanichamó, barqūeshoye tojánamash̄engo y Magadán luaroye tojtsanoñe.

16

Ch̄e fariseunga y saduceunga tmojánbošena Jesús chaoma can̄ye b̄ets soye

(Mc 8.11-13; Lc 12.54-56)

¹ Fariseunga y saduceunga tmojána Jesús jin̄yama, y jisháchichiyama imojtseimpadana can̄ye b̄ets soye chaoma, as jtsetatśem̄buama Jesusbe obenana ndegombre B̄engbe B̄etsábíocana tainóbocanama.

² Pero Jesús tojan̄jua: “Tś̄engaftanga jetiñoje šmond̄b̄etsichamo: ‘Ȳefse tśabe te echántsemna, er celoca buánganiñe entsemna ca.’ ³ Y cach̄ese šmond̄b̄etsichamo: ‘M̄ent̄e echan̄juafté, er celoca buánganiñe y ibetiñe entsemna ca.’ Tś̄engaftanga celoye jontješiȳese, ntšamo ch̄e tempo yochtsemnama tśa tśabá jayanama šmojtsoben̄ese, ¿ndáyeca ndoñe šmontsobena jtsetatśem̄buana ndaye b̄ets soye B̄engbe B̄etsá quem tempo cmojtsin̄yan̄yama? ⁴ Quem puerte bacna entsanga y ndošbuáchiȳenga montseboše atše can̄ye b̄ets soye chaima, obenana jin̄yan̄yama; pero ndoñe chca quemochátin̄ye, sinó n̄ye ch̄e ndayá yomna mo ch̄e B̄engbe B̄etsabe juabna oyebuambnayá Jonásoftaca tojanopasá soyća ca” —Jesús tojánayana.

Chora Jesús tojésanabashejuana y chentšana tojtsanoñe.

Jesús tojanabuayená ch̄e fariseungbe buat̄embana soȳengama

(Mc 8.14-21)

⁵ Ch̄e uafjajónaye chenguanoicana ch̄enga tmojtanabo ora, ch̄e uat-sj̄ndaȳenga yojésebn̄etjomba tand̄ese jesocñana. ⁶ Chora Jesús tojan̄yana: —Šmochtsantješna; cuedado šmochtsebomna ch̄e fariseunga y saduceungbe levadurama ca.

⁷ Pero ch̄e uatsj̄ndaȳengna imojtsenats̄etsnaye: —Chca entsichamo, b̄enga tand̄ese ndoñe tmonjesocñama ca.

⁸ Jesús ch̄e soye yojtsetátśem̄bo; chíyeca m̄entśá tojan̄yana: —¿Ndáyeca tand̄esama šmojtseats̄etsná ca? ¡Tśa batśatema ošbuáchiyana šmobomna! ⁹ ¿Cabá ndoñe cmonts̄ésertana y ndoñe šmontsaboūin̄ȳna ch̄e shachna tand̄esentšana shachna uaranga entsanga s̄enjan̄ejuatśema y bn̄etsana uta sbar̄ećua šmonj̄ánajutjema? ¹⁰ ¿Y ndoñe šmontsaboūin̄ȳna ch̄e can̄ys̄efta tand̄esentšana canta uaranga entsanga s̄enjan̄ejuatśema y can̄ys̄efta sbar̄ećua šmonj̄ánajutjema? ¹¹ ¿Ndáyeca ndoñe cmonts̄ésertana atše tand̄esama ndoñe s̄ents̄óyebuambnama? Cuedado šmochtsebomna fariseunga y saduceungbe levadurama ca —Jesús tojan̄yana.

¹² As chora ch̄e uatsj̄ndaȳenga tojan̄esertá, Jesús ndoñe tonj̄ánayana ch̄e tand̄esentša levadurama cuedado jtsebomnana ca, sinó ndayá ch̄e fariseunga y saduceungbe buat̄embana soȳengama.

Pedro tojánayana, Jesús ch̄e Cristo b̄etsemnama

(Mc 8.27-30; Lc 9.18-21)

13 Jesús, Cesarea de Filipino luaroye tojánashjango ora, chabe uatsjédayënga tojanatjá: —¿Nda ca entšanga imojtsichamo chë Bëngbe Bëtsá Entšá tbojanbemá yojtsemna ca?

14 Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca ínÿe Bëngbe Bëtsabe juabna oyebuambnayá ca.

15 As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

16 Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiniá ca.

17 Y Jesús tbojanijana: —Simón, Jonasbe uaquiniá, oyejuayá cochanjoyena. Ndocna quem luarentša entšá chë soye checmatinÿinÿé, sinó atšbe Taitá, celoca endmëná. 18 Y mëntšánaca chëyana: Mora acna Pedro o chë ndëtsbecá contsemna, y chë ndëtsbeñe atšbe bëts yebna chanjajebo, y ni Satanás, chabe obenánaca entšá jóbanama, queochatobenaye jtsepochócama. 19 Atše cbochanjátšetaye obenana, mo llavëfjá, entšanga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuénta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuénta ora, canÿe soye aíñe chaotsemna ca chacojayanëse, Bëngbe Bëtsá echanjayana aíñe chca chaotsemna ca —Jesús tbojanijana.

20 Chentšana chabe uatsjédayënga tojanamëndá ndocnábeñe ntse-cuéntayana cha, Jesús, chë Bëngbe Bëtsabe Uámana Uabuayaná, chë Cristo bétsemnama.

*Jesús tojánayana cha ibojamna jóbanana y jtayenana ca
(Mc 8.31–9.1; Lc 9.22-27)*

21 Chorscana Jesús tojanontsé chabe uatsjédayënga jábuayenana cha ibojtsemna Jerusalenoye jama, y chocna chë bëtšëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanëyana cha mochjanóba, pero unga tianoye yochtanayena ca. 22 Chora Pedro, Jesúseftaca tojanoluaré y tojanontsé mëntšá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

23 As Jesús tojanobuértana y Pédrëbioye tbojanijana: —¡Satanás, átšbentšana mojuaná! ¡Aca contseboše atše canÿe bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entšángbentšana ca.

24 Chentšana Jesús chabe uatsjédayënga tojanëyana: —Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiamá jasúfriama chaotseprontana y cruciñe jobanámna. 25 Nda tojtsama quem luarentše bëtscá soyënga jtsebomnama y atšbiamá jasúfriama ndoñe tontseprontana, chë nÿetsca tescama yomna tšabe vida echanjopërdia. Pero nda quem luarentša soyënga cachcá tojëftsonÿá atše juastama, masque chaóbana, chë nÿetsca tescama yomna tšabe vida echántsebomna. 26 ¿Ndayama entšá buanjósërvia nÿetsca quem luarentša soyënga jtsebomnana, chë nÿetsca tescama yomna tšabe vida tojtsoperdese? Ndegombre, canÿe entšá chë nÿetsca tescama yomna tšabe vida tojtsoperdese, ndocna

soye quenátsmëna cha chaobená joyiyama, chë nyetsca tescama yomna tšabe vida jtsebmoma. ²⁷ Chë Bëngbe Bëtsá Entšá tbojanbemá, chabe Taitabe obenánaca y puerte buashinÿinÿaniñe echanjabo chabe angelotëmëngaftaca, y chora cada cánÿabioye bochántatsetaye cachá ntšamo cada ona tojtësemcá. ²⁸ Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjëftsinÿcá ca —Jesús tojánayana.

17

Jesús inÿetsá tojanobinÿná

(Mc 9.2-13; Lc 9.28-36)

¹ Chentšana chnënguana tianoye, Jesús tojtëftsanëbiatše Pedro, Santiago y chabe catšata Juan, y inÿoye tojanënatse nÿe chënga, canÿe bëts tjoye.

² Chentše, chëngbe delante inÿetsá cha tojanobinÿná. Chabe jubiá shinÿcá yojtsebuashinÿinÿana, y chabe uichëtjonëjuangana mo binÿniñcá uafjantsëjuangá yojtsamna. ³ Chca orna, chabe uatsjëndayënga tmojáninÿe Moisés y Elías tbojanobinÿná, Jesúseftaca encuéntaye.

⁴ Chora Pedro, Jesúsbioye tbojanianana: “Bëngbe Utabná, itša tšabá bëngbiana cuanmëna muentše jtsemnana ca! Tcojtsebošëse, unga tambotëmënga atše chjapórma: cánÿetema acbiana, inÿetema Moisesbiana y inÿetemna Elíasbiana ca.”

⁵ Pedro chca yojtsóyebuambnantscuana, canÿe buashinÿinÿana jantšetëshe nyetscanga yojáutsbotse. Y chë jantšetëšhoicana canÿe oyeubuambnayana tmojanuena mëntšá: “Mua atšbe bonshana Uaquiñá endmëna, atše chabiana sëntsoyejuá. Cha šmochtseyeunana ca.”

⁶ Y chë uatsjëndayënga chca tmojanuena ora, tmojanoshamentšé y jubiaca fshantsóntscoñe tmojanotsejbéna, puerte auatjanánënga. ⁷ Chora Jesús chabe uatsjëndayëngbioye tojanobeconá, tojánabojajo y tojanéyana: “Matëtsbananga; ndoñe matauatjëngana ca.”

⁸ Y tsbanánoye tmojanontješé ora, Jesús nÿe canÿa tmojáninÿe, ndocná inÿa más.

⁹ Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentsana candëtayenëntscuana, ndocnábeñe chë šmonjinÿe soyama šmattsecuéntaye ca.

¹⁰ As chë uatsjëndayënga Jesús tmojantjá: —¿Ndáyeca chë ley abuátambayënga mondbétsichamo, canmëna Elías jabana chë Bëngbe Bëtsabe Uámana Uabuayanabe natsana ca?

¹¹ Chora Jesús tojanéjua: —Ndegombre canÿa Eliascá natsana echanjabo y ntšamo jtsemnana yomncá, lempe echánjabatsma ca. ¹² Pero atše cbéyana, canÿa mo Eliascá ya tonjabo, entsanga ndoñe chematanotëmbá y cháftaca entsanga tmojanma lempe ntšamo tmojanbošencá. Y cachcá, chë Bëngbe Bëtsá Entšá tbojanbemá entsangbe cucuatšifne echanjasúfria ca —Jesús tojánayana.

¹³ Chora chë uatsjëndayënga tojanësertá, Juan chë Ubayanabiana Jesús chca yojtsëtsëtsnama.

Jesús, canÿe bacna bayëja tbojanbojuaná

(Mc 9.14-29; Lc 9.37-43)

¹⁴ Entšanga imojtsemnoye chënga tmojtanashjajna ora, canÿe boyabása tojanobeconá, Jesusbe natsanoica yojoshamentšiyey tbojanianana:

15—Utabná, atšbe uaquiñá motselastemá. Cha ataque bontsësháchichana y puerte entsesufrina, er cha inye ora inoye jtseshajayana y inye orna, buyeshoye jtsoshbuetšana. ¹⁶ Acbe uatsjéndayëngbiyoye cha sënjuánatse y ndoñe chematobená jtseboshnama ca —cha tbojanaryana.

17 As Jesús tojánaryana: —¡Nyetšá ndošbuáchiyënga y bacna entsànga ca! ¿Buetayté sojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? Moye chë básetema mánatse ca.

18 Chora Jesús, chë basetëmbeñe bacna bayëjbiyoye tbojanácacana y chábentšana cha tojésanbocna. Cach orscana chë básetema tšabá yojtsatsmëna.

19 Chentšana, chë uatsjéndayënga luaroca Jesúseftaca tmojanoyebuambá y tmojanaryana: —¿Ndáyeca bënga ndoñe fsënjobená chë bacna bayëja jtabocnama ca?

20 Y Jesús tojanëyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomñese, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena. ²¹ Pero chca bayëjënga jtëbuacnamna jobenaryana nye Bëngbe Bëtsáftaca jencuéntase y chama tondaye ntjascá jtsemñese ca —Jesús tojanëyana.

Jesús cachiñe tojánaryana cha ibojamna jóbanana y jtayenana ca
(Mc 9.30-32; Lc 9.43-45)

22 Jesús y chabe uatsjéndayënga cányiñe Galilea luaroye imojétsaye ora, cha tojanëyana: “Chë Bëngbe Bëtsá Entšá tbojanbemá entsàngbe cucuatšiče mochanjáboshjona, ²³ mochanjóba, pero unga tianoye echántayena ca.” Chë causa chë uatsjéndayënga puerte ngmënaca imojtsemna.

Chë Bëngbe Bëtsabe bëts yebnama impuesto jtsatsquëcjnyama

24 Jesús y chabe uatsjéndayënga Capernaumoye tmojánashajna ora, chë Bëngbe Bëtsabe bëts yebnama entsángbiyoye impuesto atjanayënga Pédrëbiyoye tmojána y tmojantjá: —¿Acbe buatëmbayá Bëngbe Bëtsabe bëts yebnama impuesto queonýbetsatsquëcjnyaye ca?

25 Y Pedro tojanëjua: —Aíñe, cha endbetsatsquëcjnyaye ca.

Chentšana, Pedro chë yebnoye tojánamashëngo ora, Jesús natsana mëntšá chábioye tbojanaryana: —Simón, ¿ntšamo catjájuyaboye? ¿Quem luar-entša reyënga ndëmuanyëngbiyoye impuesto imnétsayëngacaye y crocénana imnétsatjanaye: cach luarentše oyenëngbiyoye o chë inye luarocana ashjajnëngbiyoye ca?

26 As Pedro tbojanjuá: —Chë inye luarocana ashjajnëngbiyoye ca.

Y Jesús tbojanaryana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquëcjnyayana ca. ²⁷ Pero ndocná mal chabonduinñanamna uafjajónayoye motsa, anzueléjua cochjútšena y chë natsana chaojuásjana beona cochjuábocna. Cochjuayetëjóná y choye crocénana cochanjímýena y chánaca echanjoshjache atšbiana y acbiana jëtsájua. Cochjëftsejatsëca y cochjatsboshjona ca —Jesús tbojanaryana.

18

¿Nda chë más uamaná yomna?

(Mc 9.33-37; Lc 9.46-48)

¹ Chentšana chë uatsjédayénga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

² Chora Jesús canye basetémbioye tbojanchembo y chëngbe tséntsaca tbojanatsá. ³ Y tojánayana: —Ndegombre cbéyana, nda mo basetemcá ndoñe tontóbema y ndoñe chacá Bëngbe Bëtsabe soyénga tonjóyëngacñe, cha ndocna te queochatobenaye Bëngbe Bëtsabe améndayoye jamashënguama. ⁴ Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe améndayoca chë más uamaná echántsemna. ⁵ Y nda átšbeñe ošbuachiyá bétsemnayeca, tbojofja canya mo quem basetembioycá, chana atše jofjana ca —Jesús tojánayana.

Resjo yomna, nderado bacna soyénga cuanjama

(Mc 9.42-48; Lc 17.1-2)

⁶ “Nda canye básetema átšbeñe ošbuachiyábioye tbojaingñé bacna soye jamama, chabiama más tšabá nántsemna canye bëts nantsnëbé chamot-setamošéntšbua y chë mar béjaye shbuatsëntsoye chamotsashbuetše chabotsenatjëmbama. ⁷ ¡Tša lastema quem luarentša entšangbiama, chë inyënga bacna soye jamama chaócochënguama tmojtsamëngbiama! Nyets tempo chca amënga mochanjëftsemna. Pero, ¡payajema chë inya bacna soye chaomama tojtsamá ca!

⁸ “Chíyeca, acbe cucuátšeca o acbe shecuátšeca bacna soye tcojamëse, cochtsenástjango y bënoye cochtsétšena. Acbiama más tšabá nántsemna celoye jamashënguana chë nyetsca tescama yomna tšabe vida jtsebomnana, cucuatšë ndbomná o cosheto, y ndoñe nyets uta cucuátšeca o shecuátšeca chë nyets tempo echanjesomñe ñeshoye chacmotséstjango. ⁹ Nderado acbe bomínýeca bacna soye tcojinýe y cachca soye tcojama, chë bomínýe cochtsenobuchjatsëca y bënoye cochtsétšena. Acbiama más tšabá nántsemna, celoye jamashënguana nýe canye bomínýeca, y ndoñe nyets uta bomínýeca infiernoye chacmotséstjango, chë bëts ñeshoye ca” —Jesús tojánayana.

Chë ótsëna oveshábama cuento

(Lc 15.3-7)

¹⁰ Mëntsánaca Jesús tojánayana: “Ni mo cánýabioye quem tsëm ošbuáchiyënguentšana, chë mo basetemëngcá mondmënénga, mo nduamanacá šmattsonýaye. Ndegombre cbéyana, chëngbe angelotëmënga celoca, sempre atšbe Taitá celocáftaca mondtësemna ca. ¹¹ Er chë Bëngbe Bëtsá Entšá tbojanbemá tonjabo chë pochocánënga jtsemnama imojtsajnénga jabátsebacama.

¹² “¿Ntšamo tšëngaftanga šmatjájuaboje? Canye boyabása patse oveshënga tojtsabamna y ndeolpe canye chentša oveshá tojtsotše. ¿Chë boyabása ndoñe chë inye esconëfta bnëtsana y esconëfta oveshënga tjoca cachcá nanjesënýaye, jama chë ótsëna oveshá jetsenguanguama? ¹³ Y chë oveshá jetsinýenama tojobenase, ndegombre chë boyabása más oyejuayá jtsemnana chë ótsëna oveshábama, y ndoñe nýa chca chë inye esconëfta bnëtsana y esconëfta oveshëngbiama chë ndoñe

tmonjanotšëngbiama. ¹⁴ Cachcá, tšëngaftangbe Taitá, Bëngbe Bëtsá, chë celoca endmëná, ndoñe quenátsboše ni canya quem basenguentsana mo otšenaca chaotsemna, bacna soyënga jtsamëse oyena causa ca” —Jesús tojánayana.

*Ntsamo cuanjama inya japerdónama
(Lc 17.3)*

¹⁵ “Nderado acbe catšata, bacna soye tcmojaborlase, cochjá, cányata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojoyeunasna, acbe catšata cachiñe tšabá ácaftaca echántsasmëna. ¹⁶ Pero ndoñe tcmojóyeunasna, inye útata cochjáchembo chacmotjëmbambama, chca, chata chabouena ntsamo cochjauyanama y chamuayana ndegombre chca yomnama. ¹⁷ Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canya Bëngbe Bëtsábioye nduabatmacá, mo canye ndoñe judiycá ca o canye bacna entsá mo canya Romocama impuesto entsángbioye atjanayacá yomna ca.

¹⁸ “Ndegombre cbëyana: Tšëngaftanga Bëngbe Bëtsáftaca chašmojtscuénta ora, chašmojayana canye soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtscuénta ora, chašmojayana canye soye aiñe chaotsemna ca, Bëngbe Bëtsá echanjayana aiñe chca chaotsemna ca.

¹⁹ “Mëntšánaca cbëyana: Nderado útata tšëngaftanguentsana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátsataye. ²⁰ Ndayentše útata o únganga tmojénefjna, átšbeñe ošbuáchiyënga bëtsemnama, chentše atše chëngbe tsëntsaca chántsemna ca” —Jesús tojánayana.

²¹ As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canysëfta soye ca?

²² Y Jesús tbojanjuá: —Ndoñe nye canysëfta soyama quecbatatsëtsná, sinó canysëfta bnëtsana soye canysëfta ca.

Ndayá inopása chë japerdónama ndëbošëngaftaca

²³ Mëntšánaca Jesús tojanëyana: “Chochanjáuyana ntsamo Bëngbe Bëtsabe amëndayana yomnana. Endmëna ntsamo canye réyëftaca tojanopasacá. Cha yojábošena chabe oservénënga crocénana jtsëtjañana. ²⁴ Jtsëtjañama yojóntša orna, canye boyabása imojuánatse, chë réybioye mallajta crocénana ibnandebena. ²⁵ Chë oservená tondaye yonjábomna chë ndebénama jëtsjájuama; asna chë rey yojamánda cha chamotsiye nyets tempo nye inyabiama chaotsoservénama, chabe shema y chabe básengnaca, y lempe ntsamo yojanbomncánaca, y chca chë ndebénama jtopágama. ²⁶ Chora chë oservená chë reybe shecuatšentše yojoshamentšiyë y ibojtseimpáda: ‘Taita, Diosmanda šmotsëuantajema. Atše lempe cbochanjëtšëntšabuachiye ca.’ ²⁷ Chë reyna chë boyabásabiama ibojóngmia; as chë ndebénana ibojtseperdóna y ibojëtšboshjona.

²⁸ “Chë oservenana chentšana yojésebocna y benachiñe inye oservenáftaca ibojenbetše, cach mandadbiama trabajayá. Chë inye oservenana nye batšatema crocénana chábioye ibnandebena. Chora chë oservená chë enutábioye tamošajentsana ibojishache

y ibojóntša jtsétajuashbebiana y mēntšá ibojauyana: ‘¡Ndebénana šmatséntsabuaché ca!’²⁹ Chora cha chē oservenabe shecuatšentše yojoshamentšiyē y ibojtseimpáda: ‘Diosmanda šmotséuantajema. Atše lempe bochanjétséntsabuachiye ca.’³⁰ Pero chē oservená ndoñe yonjábošena, sinó yojama chē inye oservenábiōye cárceloye chamotsétámiamia, chē ndebénana candétsjájēntscuana.³¹ Chē inye oservénēnga chca imojinye ora, puerte yojóngmia y imojá lempe ntšamo yojopasacá chēngbe rey jacuéntama.³² As chē rey yojamánda chē boyabása jobetšana, y ibojauyana: ‘¡Puerte bacna oservená! Sconjaimpadáyeca, nyets ndebénana tcbontseperdoná.’³³ Acnaca cachcá cmondmēna chē cach aquécá muentša trabájayabiamia jóngmiana, ntšamo atše acbiamia šonjongmecá ca.’³⁴ Y tša chē rey ibojtsetna; as yojamánda jabuache chamotsetsetšená nyets ndebénana candétsjájjuantscuana ca” —Jesús tojanacuntá.

³⁵ Chora Jesús tojánayana: “Atšbe Taitá, celoca endmēná, cachcá tšēngaftangafaca echanjama, tšēngaftangbe catšata ndoñe ndegombre nyets ainánaca šmonjaperdonase ca.”

19

Ndayá Jesús tojanabuatambá chē bouamnēnga tmojtsenētšenama
(Mc 10.1-12; Lc 16.18)

¹ Chē soyēnga tojánayanentšana, Jesús Galilea luarentšana tojtsanoñe y Judeoye tojánashjango, Jordán chenguánoica.² Ba entšanga tmojanasto y chentše šoquēnga tojanashná.

³ Básefta fariseunga Jesúsbiōye tmojanobeconá y jisháchichiyama mēntšá tmojantjá: —¿Queojtselesenciana canye boyá nye ndayámnaca chabe shémbiōye cachcá jesonýayama ca?

⁴ As Jesús tojanéjua: —¿Tšēngaftanga ndoñe chē Bēngbe Bētsabe uabemana palabrēnguñe šmēndualía, Bēngbe Bētsá, chē entšanga tojanabiamá, quem luare jobojátšama ora “boyá y shema tojánabiamama”?⁵ Y Bēngbe Bētsá tojánayana: “Chíyeca boyabása chabe taitá y chabe mamá echanjéshabashejuana, chabe shémaftaca jenútanama, y chē útata mo canyáca bochántsemna ca.”⁶ Y chca, ya ndoñe útata quebochátšmēna, sinó mo nye canyáca. Chcasna, entšá ndoñe chaondēndbema ndayá Bēngbe Bētsá mo canyíñcá tojéftsema soye ca —Jesús tojánayana.

⁷ Chora chē fariseunga tmojanianana: —¿As, ndáyeca Moisés tojanmandá, chē shémbiōye canye uabemana tsbuanácha juiiyana jtsenētšenama y cachcá jesonýayana ca?

⁸ Y Jesús tojanéyana: —Tšēngaftanga Bēngbe Bētsabe mandēnga jójēngacñama ndoñe quešmátsboše causa, Moisés tmojanalesencía shémbiōye jesētšenana. Pero quem luare jobojátšama orna, ndoñe chca quenjatšmēna.⁹ Atše chéyana, nda chabe shémaftaca tbojtsenētšena y chca tojopasá ndoñe chē shema chabe boyábiōye ín्याftaca tbontseingñé causa, y chē boyá ín्याftaca tojtóbouamasna, cha chē natsana shémbiōye ín्याftaca jtseingñayana ca —Jesús tojánayana.

¹⁰ Chora chabe uatsjéndayēnga tmojanianana: —Chca chē boyá y shémaftaca tojtsemnēsna, ndoñe tšabá yontsemna jobouamayana ca.

11 Y Jesús tojanéyana: —Nýetscanga ndoñe quemátobena chë palabrënga jóyëngacñana, nýe chë Bëngbe Bëtsá tojama jóyëngacñama chamobënama, chëngna aíñe. 12 Ba soyënga comna ndaye causa chë boyabásënga ndoñe ntsobenana jobouamayana. Inyënga jónyñana jobouamayama ndobenënga, inyëngbioye cach entsanga jábiamana jobouamayama ndobenënga y inyëngna, nýets tempo nýe Bëngbe Bëtsabe amëndayama oservëna causa ca —tojanéyana.

Jesús, basetémëngbiana Bëngbe Bëtsábioye tbojanimpadá
(Mc 10.13-16; Lc 18.15-17)

13 Entšanga basetémënga Jesúsbioye tmojanënatse, cha chauabojuama y Bëngbe Bëtsábioye chëngbiana chaboimpadama. Pero chë uatsjëndayëngna tmojanontsé chë basetémënga unachayënga jtsécacana. 14 Chora Jesús tojanéyana: “Cachcá mónyaye chë basetémënga átsbioye chamuabo y ndoñe matëuyanana; er Bëngbe Bëtsabe amëndayana endmëna mo quem basetëmëngcá imomnëngbiana ca.” 15 As chë basetémënga tojánabojajo, Bëngbe Bëtsá jaimpádase; y chentšana cha tojtšanoñe.

Canye bomna bobontse Jesúsbioye tojána
(Mc 10.17-31; Lc 18.18-30)

16 Chentšana, canye boyabása tojána Jesús jinýama y mëntšá tbojantjá: —Buatëmbayá, ¿ndaye tšabe soye chjama chë nýetsca tescama yomna tšabe vida jtsebomnama ca?

17 Y Jesús tbojanjuá: —¿Ndáyeca chë tšabe soye ndayá bëtsemnama šcojtsetjaná ca? Tšabia nýe canya endmëna: Bëngbe Bëtsá. Aca chë nýetsca tescama yomna tšabe vida jtsebomnama tcojtsebošëse, mandënga cochtsohedecena ca.

18 Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema inýaftaca ndoñe cattseíngñaye, ndoñe catjatbëba, ndoñe catjuaboínýena. 19 Acbe bëtsëtsata stëtsoye ndoñe catjáquedaye y ndëmua entsánaca cochtsebobonshana ntšamo cach aca cuenobobonshancá ca” —Jesús tbojaniyana.

20 Chora chë bobontse tbojanjuá: —Atše lempe chca nýets tempo sëndocumplina. ¿Ndayá más šojtsebuáshbena ca?

21 As Jesús tbojaniyana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnëjëmënga cochtsatšataye; chca, bëts uacanana soye celoca cochántsebomna. Chentšana cochjabo y šcochjuasto ca.

22 Chë bobontse chca tojanuena ora, ngmënaca yojtšatoñe, cha corente bomná bemna causa.

23 Chora Jesús chabe uatsjëndayënga tojanéyana: —Ndegombre cbëyana, puerte totcá entsemna canye bomnabiana Bëngbe Bëtsabe amëndayoye jamashënguama ca. 24 Chë bomnabiana cachiñe šcuatayana: Más paselo entsemna canye camello chë coshufjëntša atëfnëjana chauachnëngo, y ndoñe canye bomná Bëngbe Bëtsabe amëndayoye jamashënguana ca.

25 Chabe uatsjëndayënga chca tmojanuena ora, puerte ojnánënga imojtsemna y imojtsíchamo: —As, ¿nda yochjobenaye atsbočaná jtsemnama ca?

²⁶ Jesús chënga tojanënyanýe y tojanëyana: —Entsanga ndoñe quemátobena jamama canya atsbocaná chaotsemnana, pero Bëngbe Bëtsá aíñe, er cha nyetsca soyënga jamama endobena ca.

²⁷ Chora Pedro tbojanianyana: —Aca contsonyá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjójyëngacñe ca?

²⁸ As Jesús tojanëyana: —Ndegombre cbëyana, nyetsca quem luarentsa soyëngama mo tsmecá jtsemnana tempo chaojobuache ora, chë Bëngbe Bëtsá Entsá tbojanbemá chabe buashinýinýana bëts tšenëshiñe reycá echanjót'bema jtsemándayama; y tsëngaftanga, chë atše smëstonëngna, chora bnëtsana uta uámana tbemaniñe smochanjot'biana mo reyëngcá, chë Israeloca bnëtsana uta bëts pamillentša entsangbiana jayanama tsabá o ndoñe tsabá tmonjamama. ²⁹ Y ndëmuanyënga, atše jaserviama tmojtëftseboshjona cachëngbe yebna, catsátanga o uabënanga, befta o bebma, básenga o fshantsënga, chë soyëngama patse soye más mochanjójyëngacñe y chë nyetsca tescama yomna tsabe vídnaca. ³⁰ Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

20

Chë trabájayëngbiana cuento

¹ Mëntsánaca Jesús tojánayana: “Bëngbe Bëtsabe amëndayana endmëna mo canye bëts jajañe nduiñcá. Chë nduiñna canye te cabá cachëse yojábocna peonga janguanguama, chabe uvas betiyënga jajañe chamotrabajama. ² Chë nduiño peonga yojánýena orna, imojenóyeunaye canye tescama canye denario crocénana jtëbuénayama. As chora yojichamuá chë uvas betiyënga jajoye jatrabájama. ³ Mo base mošenana ora, chë nduiño cachiñe yojábocna y plazoca atsanënga ínýenga yojanye, tondaye ntsamcá. ⁴ As yojáuyana: ‘Tsëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá. ⁵ Nyetsto ora y bëts mošenana ora, chë nduiño cachiñe yojábocna y cachiñe cachcá yojopása. ⁶ Mo la cinco ora, chë nduiño cachiñe yojábocna y chenache ínýenga yojánýena, tondaye ntsamcá. As yojátjaye: ‘¿Ndáyecaca tsëngaftanga nyets día ntjatrabajacá muentše smotsomñe ca?’ ⁷ Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tsëngaftángnaca atšbe uvas betiyënga jajoye motsajna jatrabájama y cbochtëbuénaye ca.’

⁸ “Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojášhjajnënguentsana cochjabojátša y chë natsana tmojášhjajnënga ústonoye ca.’ ⁹ Y chë mo la cinco ora imojášhjajnënga imojobeconá, y cada ona canye denario crocénana yojtáyentšbuachiye. ¹⁰ Chentšana, chë natsana jatrabájama imojášhjajnënga yojtsamna jobéconama y chënga imojétsejuabnaye más crocénana mochjanójyëngacñe ca. Pero chëngnaca cach canye denario crocénana yojtëbuénaye. ¹¹ Chca imojójyëngacñe orna, chënga imojóntša chë nduiñbiana bacá ichámuana, ¹² mëntšá: ‘Quemënga chë ústonoye tmonjášhjajnënga nye canye horatema tmonjatrabajá; ntšamo bënga sçontëbuénacá, cachcá chënga contëbuéná y bëngna nyets día jabuache fsënjatrabajá y corente jënyá fsënjauantá ca.’

13 “Pero chë nduiño canya chca yojtsichamuábioye ibojojuá: ‘Sobreno, acbiama ndocna ndoñe tšabe soye chiyatsma. ¿Ndoñe canye denario crocénana canye tescama tbonjenoyeuná ca? 14 Chcasna, acbe uacanana crocénana mesocñe y motsatoñe. Atše sëntseboše chë ústonoye jatrabájama tojashjanguá jtabuénayana, cachcá ntšamo aca tbojtabuenacá. 15 Chca entsemna, er atše sëndobena atšbe crocénánaca nye ndayánaca jamana. ¿O aca envidia cojtsebomna, atše tšabia tsménama ca?’ ” —cha yojayana.

16 Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnënga, nduámanënga mochántsemna ca.”

Jesús cachiñe tojánayana cha jóbanama y jtayenama
(Mc 10.32-34; Lc 18.31-34)

17 Chënga Jerusalenoye imojtsaye ora, Jesús barie tojánachembo chabe bnëtsana uta uatsjéndayënga y tojanëyana: 18 “Tšëngaftanga šmontsonyá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amëndayënga y ley abuátambayëngbe cucuatšíñe mochanjáboshjona, y chënga mochanjayana jóbanama cha ibojtsemna ca, 19 y chë ndoñe judiëngbe cucuatšíñe mochanjáboshjona chënga chamotsáboyejuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

Chë Santiago y Juanbe mamabe impadana soye
(Mc 10.35-45)

20 Chentšana, Zebedeobe uaquiñatbe mamá chabe uaquiñátaftaca Jesúsbioye tojanobeconá, chabe shecuaštentše yojoshamentšiyë canye pavorama jaimpádama. 21 As Jesús tbojantjá: —¿Ndayá cojtseboše ca?

Y chë shembása tbojanayana: —Aca reycá chacojtsemánda ora, cochjamánda atšbe uaquiñata chabótbema canya acbe catšbioica y chë inya acbe uañicuayoica, ácaftaca chabotsemándama ca.

22 Y Jesús tojanëjua: —Ntšamo šmontsotjanañama, tsëndata ndoñe quešnátstatsëmbo ca. Ntšamo atše chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjuá: —Aíñe, fchanjobenaye ca.

23 Chora Jesús tojanëjua: —Ndegombre, tsëndátnaca atšcá šochanjasúfria, pero atše ndoñe quetsátobena jamándana atšbe catšbioica o atšbe uañicuayoica chašótbemama. Chë útentše entsemna ndëmuanyëngbiana atšbe Taitá tojaprontacá ca.

24 Chë inye bnëtsana uatsjéndayënga chca tmojanuena ora, chë uta catšátaftaca tmojanotjayaná. 25 Chora Jesús chë uatsjéndayënga tojánachembo y tojanëyana: —Tšëngaftanga šmondëtatšëmbo, chë ndoñe judiëngbeñe chë reyënga lempe jtsemándayana nya mo nduiñënga cuaftsemncá; y chë bëtsëtsa entšangna chëngbe obenánaca jtsemándayana, ndayánaca jtsamëse, chë inye entšanga sempre chamotsayaunanama. 26 Pero tšëngaftangbeñna ndoñe chca chaondëtsemna. Inyëtšá; masna, nda tšëngaftanguentše chë más uamaná jtsemnana tojtsebošá bontsemna chë inyënga jtsaservénana. 27 Y ndánaca tšëngaftanguentšá chë más uamaná jtsemnana tojtsebošá bontsemna jtsemnana mo nye inyabiana nyets tempo oservenacá. 28 Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá inyënga jabáserviama. Y

mo nda ínÿenga játsebacama cuafjètsjajocá, cha echanjóbana, ba entšanga atsebácanènga chamotsemnama ca —Jesús tojánayana.

Jesús uta jtanata tojanashná

(Mc 10.46-52; Lc 18.35-43)

²⁹ Chènga, Jericó bèts pueblentšana tmojánbocana ora, ba entšanga Jesús imojtséstona. ³⁰ Uta jtanata benache juachañe ibnatbemana. Jesús chějana yojtsachñéjuanama chata tbojanuena ora, tbojanontsé uayebuáchana: —¡Utabná, Davidbentšana Entšá, šmotsalastemá ca!

³¹ Entšanga chë jtanátbioye tmojtsanécácana iytëca chabotsemnama, pero chatna más ibojtsáyebuache: —¡Utabná, Davidbentšana Entšá, šmotsalastemá ca!

³² As Jesús yojtsaye, chë jtanata tojánachembo y tojanatjá: —¿Ndayá sojtseboše atše tsëndatbiamá chjamama ca?

³³ Y chata tbojanjá: —Utabná, bëndata chabuatëbínÿnama ca.

³⁴ Jesús chatbiamá tbojanongmé y tojánabuchbojajo. Cachora chë jtanata tšabá yojtëbinÿna y Jesús tmojanasto.

21

Jesús Jerusalenoye tojánashjango

(Mc 11.1-11; Lc 19.28-40; Jn 12.12-19)

¹ Ya Jerusalenoca béconana imojtsemna y canÿe pueblo Betfagé ca uabáinoca tmojánashjango, canÿe tjashe Olivos ca uabáinentše. Chora Jesús uta chabe uatsjéndayata tojanichamó, ² y mëntšá tojanéyana: “Tsëndatbe natsana entsemna base pueblotémoye motsata. Cachora canÿe burrá utsbuaná šochanjínÿena y cháftaca canÿe burrotema echántsemna. Sochjuajafjoná y šochjuánatse. ³ Nderado nda ndayánaca chacmojáuyanëse, šochjauyana: ‘Bèngbe Utabná bontsájaboto y chentšana camuentše echanjabáisabashejuana ca.’ ”

⁴ Chca tojanopasá, cachcá chaotsemnama ntšamo chë Bèngbe Bëtsabe juabna oyebuambnayá tojanayancá. Cha mëntšá tojanábema:

⁵ Jerusalén bèts pueblentše oyenënga mëyana:

“Minÿenga, tšèngaftangbe Rey chentše tšèngaftangbioye entsabó, ndoñe mo canÿa cachá bëtsá enobiamnayacá; canÿe búrrbeñe enjaquená; canÿe burrotémiñe, canÿe uatrabájaye bayabe šešónbeñe ca.”

⁶ Chora chë uatsjéndayata tbojána y tbojanma ntšamo Jesús tojanamëndacá. ⁷ Chë uatsjéndayatna chë burrá y chë burrotema tmojanënatse, entsayëjuangá chátheñe tbojanátatse y chora Jesús chábeñe tojanenoyayé. ⁸ Bëtsá entšanga chèngbe entsayá chë benachějana imojtsëtšatsana, y ínÿengna betiyeshènguiñe buacuafjènga imojtsetcoye y chiñe imojtsequëcñá. ⁹ Y chë natsana imojtsajnënga y chë ústonoyënga mëntšá imojtsaiuáyebuache: “¡Rey Davidbentšana Entšá matschuanga ca! ¡Corente bendición bomná, chë Bèngbe Utabnabe obenánaca tojabá! ¡Bèngbe Bëtsá celocá matschuanga ca!”

¹⁰ Jesús Jerusalenoye tojánamashèngo ora, nÿetsca entšanga imojtsenbouenana y banga imojtsenotíciaye: —¿Nda mua yojtsemna ca?

¹¹ Y chë entšanga imojtsëjuana: —Chë Bèngbe Bëtsabe juabna oyebuambnayá Jesús, chë Galileoca pueblo Nazaretocá ca.

Jesús, Bëngbe Bëtsabe bëts yebnentsana enënga y obuámnayënga toj-tanëbuacna

(Mc 11.15-19; Lc 19.45-48; Jn 2.13-22)

¹² Chentsana Jesús, Bëngbe Bëtsabe bëts yebnoye tojánamashëngo y chë entsanga chentše imojtsena y imojtsobuámnãñënga chentsana toj-tanëbuacna. Chéntšnaca imojtsemna entsanga canye crocénana enënga, y chë crocénana nÿe Bëngbe Bëtsabe bëts yebnentsama inoservena. Chëngbe mesëshangá tojtsanenásatajchquëca y chë palomatema enëngbe tšenëšëgnaca. ¹³ Y tojanéyana: “Bëngbe Bëtsabe uabemana palabrénguifne cha mëntšá tojánayana: ‘Atšbe bëts yebna echantsabaina átšeftaca encuéntaye yebna ca’; pero tšëngaftangna, atbëbanëngbe oyeniñe chë yebna šmojtsebema ca” —Jesús tojanéyana.

¹⁴ Chentsana, Jesús yojtsemnoye Bëngbe Bëtsabe bëts yebnentsë, jtanënga y coshetënga tmojanobeconá, y cha tojanashná. ¹⁵ Chë bachnangbe más uámana amëndayënga y ley abuátambayënga, Jesús bëts soyënga yojtsamama tmojáninÿe ora, y chë basetëmënga Bëngbe Bëtsabe bëts yebnentsë imojtsayebuáchama tmojanuena ora, tša tmojanotjáyananga. Chë basetëmënga mëntšá imojtsáyebuache: “¡Chë Rey Davídbentsana Entšá matschuanga ca!” ¹⁶ As Jesús tmojaniana: —¿Ntšamo chë basetëmënga montsichamcá quectsuenana ca?

Y Jesús tojanéjua: —Aifne, sentsuenana. Pero, ¿tšëngaftanga Bëngbe Bëtsabe uabemana palabrénguifne chë soyama ndoñe šmëndualía? Chiñe mëntšá endayana:

Chë basetëmënga y ochóchaye šešonatëmëngbe cantëngaca aca tcojama entsanga chacmotsatschuanama ca.

¹⁷ Chora Jesús chënga tojésanabashejuana y Jerusalenentsana Betania puebloye tojtsanoñe; y chentše chë ibeta tbojánbobinÿna.

Jesús tojánayana canÿe higo betiye ndoñe más chaondëshájona ca
(Mc 11.12-14, 20-26)

¹⁸ Chë te cachëse, Jesús cach bëts puebloye yojtša ora, tbojánishëntsena. ¹⁹ Chora canÿe higo betiye benache juachaca yojinÿe; as choye yojobebconá, pero nÿe ena tsbuanáchënga chiñe yojinÿena. As Jesús chë higo betiyoye tojánayana: “¡Ndocna te más chaondëshájona ca!” Y betscó chë higo betiye tojtsanbuashá.

²⁰ Chë uatsjëndayënga chca tmojáninÿe ora, imojenjnaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

²¹ Y Jesús tojanéjua: —Ndegombre cbëyana, tšëngaftanga Bëngbe Bëtsábeñe ošbuáchiyana šmojtsebmna y chabiama ainaniñe ndoñe inÿetšá šmonjátsjuabnase, šmochantsobena jamama ndoñe nÿe ntšamo atše quem higo betiyeca sënjamcá, sinó quem tjoye, “muentšana mojuaná y uafjónayoye moshbuetše ca” šmojayanëse, chca jochnënguana. ²² Y Bëngbe Bëtsáftaca chašmojtscuënta ora, chábeñe jtošbuáchiyëse, lempe ntšamo chašmojtjañcá šmochanjóyëngacñe ca —Jesús tojánayana.

Jesusbe obenana
(Mc 11.27-33; Lc 20.1-8)

²³ Chca tojanopasá chentsana, Jesús Bëngbe Bëtsabe bëts yebnoye tojánamashëngo. Chentše yojtsabuátambantscuana, bachnangbe

amëndayënga y judiëngbeñe bëtsëjemëngcá amëndayënga tmojanobobecóná y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatštá ca?

²⁴ As Jesús mëntšá tojanëjua: —Atšnaca canÿe soye sëntsebomna tsëngaftanga jatjayama, y quešmojuase, átsnaca cbochjáuyana ndaye deréchoca atše chca stsama. ²⁵ ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca? —Jesús tojanëyana.

Chama chënga tmojanontsé mëntšá enatsëtsnayana: “ ‘Bëngbe Bëtsá ca’ chamojuase, cha šochanjáuyana: ‘As, ¿ndáyeca chë tmojanabuayená soyënguiñe ndoñe šmonjanošbuaché ca?’ ²⁶ Pero ndoñe quemuátobena jayanana ‘entšanga ca’; muentša entsangbiamá bënga montsauatja, er nÿetscanga mondëjuabná Juan ndegombre Bëngbe Bëtsabe juabna oye-buambnayá yomna ca.” ²⁷ Chcasna chënga Jesús tmojanjuá: —Bënga ndoñe queftsátstatšëmbo ca.

Y as Jesús tojanëyana: —Atše cach ndoñe quechocatéyana ndaye deréchoca chca stsama ca.

Chë uta uaquiñátbiamá cuento

²⁸ Chora Jesús entšanga tojanatjá: —¿Ntsámo tsëngaftanga quem soyama šmatjayana? Canÿe boyabása uta uaquiñata yojánabamna, y cánÿabioye ibojauyana: “Uaquiñá, mënté motsa atšbe uvas betiyënga jajoje jatrabájama ca.” ²⁹ Chë uaquiñá ibojuá: “¡Jama ndoñe quetsátšboše ca!” Pero botamana yojenójuaboye y pronto choye yojá. ³⁰ Chentšana chë taitá chë inÿe uaquiñábioye cachcá ibojauyana. As cha ibojuá: “Arseñor, aíñe chanjá ca.” Pero ndoñe yonjá. ³¹ ¿Chë útatentšana ndëmuanÿá tojanma ntsámo chë taitá yojabošcá ca? —Jesús tojanatjá.

Y chënga tmojanjuá: —Chë natsaná ca.

Chora Jesús tojanëyana: —Ndegombre cbëyana, chë Romocama entšángbioye impuesto atjanayënga y chë bacna vida bomna shembásengna, tsëngaftangbiamá más montseprontana Bëngbe Bëtsabe amëndayoye jamashënguama. ³² Juan chë Ubayaná tonjánabo tsëngaftanga jábuayenama ntsámo jtsiyenana cmamnana, ntsámo Bëngbe Bëtsá yobošcá, y tsëngaftanga chë tmojanabuayená soyënguiñe ndoñe chešmatanošbuaché; y chë cuenta, chë Romocama entšángbioye impuesto atjanayënga y bacna vida bomna shembásengna aíñe chábeñe montsanošbuaché. Y tsëngaftanga, masque ntsámo chënga Bëngbe Bëtsábeñe imojtsošbuáchema lempe šmojinÿese, chë juabnayana ndoñe šmonjatrocá, chábeñe jtsošbuáchiyama ca —cha tojanëyana.

Chë puerte bacna trabájayëngbiamá cuento

(Mc 12.1-12; Lc 20.9-19)

³³ Mëntšánaca Jesús tojánayana: “Inÿe cuento šmochjatuenta chašmuatsjínÿama: Canÿe jajañe nduiño uvas betiyënga yojáje y chë shëconana yojájëtja. Chë uvasëšangá juantšëtëtjamna canÿe base luare yojajutjo y canÿe tsbanana jebna soye yojapórma chentše jtsaishanÿama. Chentšana, inÿe trabájayënga chë jajañe yojárrendaye y chana inÿe luaroye yojtsoñe. ³⁴ Chë uvasëšangá juashacama tempo yojobuache orna, chë jajañe nduiño básefta oservënënga yojichamuá chë arrëndayënga jáuyanama ntsachetšá chë nduiño ibojtsoócánama. ³⁵ Pero chë arrëndayëngna chë oservënënga imojishëche: ínÿengbioyna imojtsajantšetaye, ínÿengbioye imojtsëbaye y chë ínÿengbioyna

ndëtsbéngaca imojtsatëchënganja. ³⁶ As chë jajañe nduiño chë natsanama más ba oservénënga yojichamuá. Pero chë arréndayëngna, ntšamo chë natsanëngaftaca imojamcá, cachcá chora imojama.

³⁷ “Cabana, chë jajañe nduiño cachabe uaqiñá ibojíchmua; as mëntsá yojtsejuabnaye: ‘Atšbe uaqiñá cocayé mochanjóyeunaye ca.’ ³⁸ Pero chë arréndayënga chë uaqiñá imojinýe orna, imojenyana: ‘Mua chë fshantse nduiñbe uaqiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiama echanjoquéda ca.’ ³⁹ As chë uaqiñá imojishache, chë uvas betiyënga jajañentsána imojtsábocna y imojtsóba.”

⁴⁰ Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntšamo šmojtsejuabná chë arrendayëngaftaca cha yochjama ca?

⁴¹ Y chënga tmojanjuá: —Chë puerte bacna arréndayënga ni mo batšatema ntjalastemaycá echantsëbaye. Chë jajañe ínýenga echanjárrendaye y chë uvasëšangá juashacama tempo chaojobuache ora, ntšamo chë nduiño chabojtsotocancá chënga mochantíyie ca.

⁴² Chora Jesús tojánayana: —¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntsá endayana:

Chë yebna jebuanënga tmojtsanaboté ndëtsbé,
mora chë más bëts uashacuanëšentse entsejájona.
Chë soye Bëngbe Utabná, Bëngbe Bëtsá chca tojama,
y bënga chama ojanánënga fsëntsemna ca.

⁴³ Ntšamo chë nduiño chë arréndayënga chë fshantse echantsabaca y ínýenga echantsatsataye y chënga chabiamá bëtscá shajuana mochanjatbanacá, cachcá, Bëngbe Bëtsabe amëndayana tšëngaftangbentsána mochantsejuána y ínýengbioye mochantatsatsataye. Chënga Bëngbe Bëtsabe soyëngama mochanjouena y chë soyëngama ínýengbioye mochanjabuayená, Bëngbe Bëtsabe amëndayoye jamashënguama.

⁴⁴ Ndánaca chë ndëtsbeñe chaojotsatsá, chëbé bochantatsacaye; y chë ndëtsbé ndábeñnaca chaojotsatše, polvëshe bochantsebema ca —Jesús tojánayana.

⁴⁵ Chë bachnangbe amëndayënga y fariseunga, Jesús chë jabuátambama cuentënga yojtsëtsësnama, tmojanenótatšëmbona chëngbiama chca yojtsóyebuambnama. ⁴⁶ Chora chënga tmojánbošena Jesús jishachana, pero entšangbiama imojtsauatja; chënga imojanjuabná Jesús Bëngbe Bëtsabe juabna oyebuambnayá yojamna ca.

22

Chë casamento fiestama cuento

(Lc 14.15-24)

¹ Chentšana Jesús tojanontšé cachiñe cuentëngaca chënga jabuátambana. Mëntsá tojánayana: ² “Cbochanjáuyana ntšamo Bëngbe Bëtsabe amëndayana yomnana. Endmëna mo ntšamo canýe réyefraca tojanopasacá. Chë rey yojamánda canýe bëts fiesta jamama, chabe uaqiñabe casamentama. ³ Chora chë rey chabe oservénënga yojichamuá chë ófanënga jobiatšama, pero chë ófanëngna ndoñe imonjouena jama. ⁴ As chë rey inýe oservénënga yojichamuá y mëntsá yojámëndaye: ‘Chë ófanënga šmochjáuyana, ya saná stseboprontana ca.

Sënjamandá, atšbe uacnënga y uamna bayënga minÿicánënga jobáyama y lempe entseprontana; y chamuabo chë casamento fiestama ca.’

⁵ “Pero chë ófjanënga ndoñe imonjouena. Canÿa, cachabe fshantse inabomnoye yojtsoñe; ínÿana chabe obuámnayíñe trabajuama yojtsoñe; ⁶ y ínÿengna, chë reybe oservénënga imojishëche, jabuache imojtsatsetšenaye y imojtsébaye. ⁷ Y chë rey chë soyama yojouena ora, corente ibojtsetna. As chabe soldadënga yojichamuá chë oservénënga obánayënga chamuetsébáyama y chëngbe bëts pueblo jetsángbotjuama. ⁸ Chora chabe oservénënga yojáuyana: ‘Lempe entseprontana chë casamento fiestama, pero chë ófjanënga ndoñe quenjatëmerecena moye jabama. ⁹ Motsajna tsashenangoye y ndëmuanÿéngnaca chašmojánÿenënga, chë casamento fiestama šmochjúbuaja ca.’ ¹⁰ As chë oservénënga tsashenangoye imojábocana y nÿetscanga imojánÿenënga imojáchembo, cánÿiñe tšabe y bacna entšanga, y chca, chë tsobc nanoica jútjena yojtsemna entšángaca.

¹¹ “Chë ófjanënga jánÿama chë rey yojámashëngo ora, chentše cánÿabioye ibojinÿe y chana ndoñe yontsemna ntšamo canÿe casamento fiestama endbetsemncá uichëtjoná. ¹² As chë rey ibojauyana: ‘Sobreño, ntšamo canÿe casamento fiestama endbetsemncá ndoñe quecatichëtjona. ¿Ntšamo chca moye tcojamáshëngo ca?’ Pero chë boyabásana nÿe iytëca yojtsemna. ¹³ As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinÿna luaroje, infernoye motsábocna. Chentše puerte echanjenóbošachna y chë tsetšanama juatsašënga echantsenofhtëšjojnaye ca’ —cha yojayana.”

¹⁴ Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga chocha jsemnama nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga chocha mochántsemna ca.”

Chë Romoca bëts mandadbiana impuesto jtsatsquëcñayama
(Mc 12.13-17; Lc 20.20-26)

¹⁵ Chentšana chë fariseunga tmojtsatanoñe y tmojanenoyeuná ntšamo Jesús tojayaniñe cha jisháchichiyana, as chca, mandadëngbeñe cha mal jaquédama. ¹⁶ Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndëtatšëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jatuenanana nÿe ntšamo entšanga tmojatichamcá, er acbiana tondaye quenatámana nda más uamaná o nduamaná tomnana. ¹⁷ Chcasna, ¿ntšamo catjájuaboje? ¿Tšabá tayojtsemna, César, chë Romoca bëts mandadbiana, bënga impuesto jtsatsquëcñayana o ndoñe ca?

¹⁸ Jesús yojtsetátšëmbo chëngbe bacna juabnëngama; chíyeca tojanéyana: —Bacna entšanga, ntšamo ndegombre šmojuabnacá ndinÿinÿnayënga. ¿Ndáyeca tšëngaftanga šmojtseboše chë sóyeca atše jisháchichiyama? ¹⁹ Chë šmatsquëcñá crocénana šminÿinÿé ca.

As canÿe crocénana tmojanoyé. ²⁰ Jesús tojanatjá: —¿Ndabe jubiá quem crocénániñe yojtsemna, y ntšamo muentše entsabemancá nda chca iuabaina ca?

²¹ Y chënga tmojanjuá: —Césarbe jubiá; cha chca enduabaina ca.

As Jesús tojanéyana: —Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

²² Chënga chca tmojanuena ora, ojanánënga imojtsemna. As chënga cachá Jesús tmojanonýa y tmojtsatanoñe.

Obanënga jtayenama Jesús tmojantjá
(Mc 12.18-27; Lc 20.27-40)

²³ Báseftanga judiëngbe amëndayënga, saduceos ca uabáinënga, imojan-juabná chë obanënga ndocna te ntayenana ca. Cach te, chë impues-tama Jesús tojanoyebuambá te, básefta saduceunga tmojána y mëntšá tmojantjá: ²⁴ —Buatëmbayá, Moisés tojánayana nderado canýe boyá tojóbana básenga ntjëftsabashejuancá, ana chabe uabentsá jtsemnana chë shémaftaca jtobouamayana, chca, chabe uabochená obanabiamana básenga jtsabamnama ca. ²⁵ Chcase, canýe bëngbentše canýsëfta catšátanga monjamna. Chë natsaná tonjanobouamá y tontsanóbana. Básenga ndoñe quenjátabamna, chíyeca chë shemna chë uabentsáftaca tontanobouamá. ²⁶ Y cháftaca cachá tonjanopasá, chë inýe uabentsáftaca cachá, y cachá chë ínýengaftaca y chë ústonoca uabentsáftacnaca. ²⁷ Y chentsana chë shembásanaca tontsanóbana. ²⁸ Y morna, chë obanënga chamojtayena ora, ¿ndabe chë canýsëfta catšatanguentsabe shema chë shembása yochtsemna, nýetscanga cháftaca tmojanobouamase ca? —chënga tmojantjá.

²⁹ As Jesús tojanéjua: —Ntšamo tsëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obe-nanama ndoñe quecmátësertana causa. ³⁰ Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. ³¹ Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabe-mana palabrënguiñe tojánayanama? Cha tonjánayana: ³² “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³³ Chë entsanga chca tmojanuena ora, ojanánënga imojtsemna ntšamo Jesús yojtsabuátambama.

Chë más bëts uámana mando
(Mc 12.28-34)

³⁴ Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefna, ³⁵ y canýa chënguentšá, ley abuatambayá, Jesúsbioye jisháchichiyama tbojantjá: ³⁶ —Buatëmbayá, ¿Moisesbe leyíñe ndayá chë más bëts uámana mando yomna ca?

³⁷ As Jesús tbojanjúá: —“Utabná Bëngbe Bëtsá cochtsebobonshana nýets acbe ainánaca, nýets espíritoca y nýets juábnaca.” ³⁸ Chë soye endmëna chë más bëts uámana mando y nýetsca mandëngama chë natsanoca entsemna. ³⁹ Y quem inýe soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.” ⁴⁰ Chë uta mandentsana endóbocana lempe ntšamo Moisesbe leyíñe endayancá y ntšamo chë Bëngbe Bëtsabe juabna oyebuambnayënga mondbetsabuatambacá ca — Jesús tbojaniyana.

¿Cristo, ndabe entsábentšana yomna?

(Mc 12.35-37; Lc 20.41-44)

⁴¹ Chë fariseunga cabá cachentše imojtsemnëntscuana, ⁴² Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiama, chë Cristo? ¿Ndábentšana cha iuabó ca?

Y chënga tmojanjuá: —Davídbentšana ca.

⁴³ As Jesús tojanéyana: —¿Ntšamo chca nántsemna, cach David, chë Uámana Espíritbe mándoca, Crístbioye Utabná ca tbojtsabobuátmëse? David mëntšá tojánayana:

⁴⁴ Bëngbe Bëtsá, atšbe Utabná Crístbioye tbojaniyana:

atšbe catšbioica mótbema,

atšbe obenánaca acbe uayayënga acbe cucuatšinë chamoquedama chamëntscuana ca.

⁴⁵ ¿Ntšámose Cristo, Davídbentšana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

⁴⁶ Chora ndocná tonjanobená ni mo canýe palabra jojuana. Y chë tescana ndocná yonjenñemua Jesús más jatstjanayama.

23

Jesús chë fariseunghiama y ley abuátambayëngbiama tojánayana, chënga ndoñe tšabá montsama ca

(Mc 12.38-40; Lc 11.37-54; 20.45-47)

¹ Chora Jesús, entsanga y chabe uatsjëndayënga mëntšá tojanéyana: ² “Chë fariseunga y chë ley abuátambayënga cmondbëtsabatambaye ntšamo Moisesbe leyënguiñe iuayancá. ³ Chcasna, tšëngaftanga cmontsamna chënga joyaunayana y ntšamo tcmojauyancá, cachcá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabatambacá. ⁴ Mo canýe entsá, couáybioye uauta uasmanësha juasmayana y cachá tondaye tontsasmancá, chënga entsanga jtsamëndayana bëtscá mandënga chamotsocumplínama, pero cachënga ni mo batsatema ntsamana chë mandënga jtsocumplínama. ⁵ Chënga lempe jtsamana nýe entsanga chamotsëñyama. Chënga chë ínýengbiama más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguiñe juabemana ntšamo Bëngbe Bëtsabe uabemana palabrënguiñe endayancá, y juentsaca y buacuatšinë chëjënga jenábatsëcana y sibijana nýa tëntša uasebtotonanëjuangá jtsichëtjonana. ⁶ Chënga jtsebošana chë fiestënguiñe nýa quëfseroca jtsetbiámanama, y chë judiëngbe enefjuana yebnënguenache chë más uámana luarënguiñe. ⁷ Chënga jtsebošana tsáshenañe entsanga nýa respétoca chamotsacheuanama, y ‘abuátambayënga ca’ chamotsachembuanámnaca chënga jtsebošana.

⁸ “Pero tšëngaftangna ndoñe šmattseboše entsanga ‘abuátambayënga ca’ chacmotsachembuanama, er nýetsca tšëngaftanga mo catšatangcá šmondmëna, Bëngbe Bëtsábeñe betsošbuachéyeca, y nýe canýa endmëna tšëngaftangbe Buatëmbayá. ⁹ Tšëngaftanga ‘taitá ca’ chë ley abuátambayënga šmondbëtsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nýe canýe Taitá šmondbomna, chë celoca endmëná. ¹⁰ Ndoñe šmattseboše entsanga ‘mándayënga ca’ chacmotsachembuanama; er nýe canýe Mandayá endmëna y cha Cristo

endmëna. ¹¹ Nda tšëngaftangbeñe chë más uamaná tojtsemná bontsemna chë ínÿenga jtsaservénana. ¹² Nda cachá bëtsá tojtсенobiamná, nduamaná mochántsebema; y nda cachá nduamaná tojtсенobiamnana, más bëtsá mochanjábema.

¹³ “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmontsama entšangbiana puerte totcá chaotsemna Bëngbe Bëtsabe amëndayoye jamashënguama, mo bëšáša cuaftsebiatamiancá. Pero ni cach tšëngaftanga choye quešmátamashjuana, ni ínÿenga choye jamashënguama bošëngbioyë chama quešmátalesenciana. ¹⁴ ¡Tša lastema tšëngaftangbiana, ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga chë viudángbioyë chë tmobomna soyënga jtsabacayana, y entšangbe delante tšabá chacmotsëñyama y chënga šmojtsaíngñayama ndoñe chamondëtsetatšëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá tšëngaftanga más jabuache ínÿengbiana cmochanjácastigaye.

¹⁵ “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga ba luarënguenache jtsajnana canÿa tšëngaftangbe ustoná onguayíñe, y šmojñyena ora, tšëngaftanga jamana cha chaotsemna tšëngaftangbiana uta soye más merecido buajoná infierno chaotsama.

¹⁶ “¡Tša lastema tšëngaftangbiana; tšëngaftanga šmondmëna mo jtanënga entšanga unachayëngcá! Tšëngaftanga šmondbëtsichamo: ‘Nda ínÿabioyë tbojašbuachená ndayánaca jamama y tojayana chë Bëngbe Bëtsabe bëts yebnama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabe bëts yebnentša castellanama cha tojajurasna, aíñe jtsemnana chë tbojašbuachená soye jamama ca.’

¹⁷ ¡Obëjémënga y nduabínÿnënga! ¿Ndayá más uámana soye yomna, chë castellano o Bëngbe Bëtsabe bëts yebna? Chë castellano Bëngbe Bëtsabiana josérviana jtsemnana, nÿe Bëngbe Bëtsabe bëts yebnocá chë castellano tojtsemnayeca. ¹⁸ Tšëngaftanga mëntšánaca šmondbëtsichamo: ‘Nda ínÿabioyë tbojašbuachená ndayánaca jamama y tojayana chë altarama chca jamama ca, cha ndoñe ntsemnana chë tbojašbuachená soye jamama ca. Pero chë Bëngbe Bëtsabiana altaroca tojtsejájona soyëngama tojajurasna, aíñe jtsemnana chë tbojašbuachená soye jamama ca.’

¹⁹ ¡Nduabínÿnënga! ¿Ndayá más uámana soye yomna, chë Bëngbe Bëtsabiana tmojacjá soyënga o chë altar? Chë tmojacjá soyënga Bëngbe Bëtsabiana josérviana jtsemnana, nÿe chë altaroca chë soyënga tmojacjáyeca. ²⁰ Nda chë altarama tojajurá, ndoñe nÿe chë altarama ntsejúraryana. Lempe chë altar juatsboca tojtsemnámnaca cha jtsejúraryana.

²¹ Nda Bëngbe Bëtsabe bëts yebnama tojajurá, ndoñe nÿe Bëngbe Bëtsabe bëts yebnama ntsejúraryana. Bëngbe Bëtsabiana cha jtsejúraryana, cha chë chentše oyená. ²² Y nda celocama tojajurá, chentše reycá Bëngbe Bëtsabe tbemaniñama cha jtsejúraryana y cachora Bëngbe Bëtsabiámnaca, chentše yotbemanabiana.

²³ “¡Tša lastema tšëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga Bëngbe Bëtsabiana jtsequëcñayana chë jajañentša sananga bnëtsanentšana canÿe soye; chë binche matatémënga menta,

anis y chë cominentša sanágnaca. Pero tsëngaftanga nÿe batsá jtsamana chë leyentša más uámana soyënga, mo chë nÿetsca entšanga cachca derechënga chamotsebonnama, ínÿenga jtsalastemánana y chë tsabe soyënguine jtsiyenana, chca, entšanga tsëngaftangbeñe chamotsošbuáchema. Chë soyënga cocayé cmontsamna jtsamama, chë inÿe tsabe soyënga amana ntjajbanacá. ²⁴ ¡Jtanënga entšanga unachayënga! Tsëngaftanga chë base soyënga jamama puerte jtsenócochinÿenana, pero jtsebnëtjombana uámana soyënga jamama, Bëngbe Bëtsá tojanmandá soyënga. Y chca, tsëngaftanga šmontsemna mo canÿe entšá ndayá tojtsabuchetjca bayëfja jtsejuánama, ndoñe ntjasama, jasama ndoñe yondëlesenciana ca chë leyine iuayana causa. Pero šmondmëna mo entšangcá ndëmuanÿenga camellbe mëntšena jasana, y chë leyine endayana chcana jasama ndoñe yondëlesenciana ca.

²⁵ “¡Tša lastema tsëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga šmondmëna mo entšangcá ndëmuanÿenga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tsëngaftanga tša jtsentsénana entšangbiana mo tsabengcá jtsinÿnama, pero tsëngaftangbe ainanentše jútjena entsemna nÿe jtsatbëbanama y nÿe bëtscá soyënga jésebonnama juabnëngaca. ²⁶ ¡Nduabinÿna fariseo! Cochjshetsajbaná ainaniñe bacna soyënga bomnana. Chamna nÿe tsabe juabnënga chentše cochtsebonna, y lempe ntšamo chacojtsamcá y entšanga chamojtsonÿacá tsabá echántsemna.

²⁷ “¡Tša lastema tsëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga šmondmëna mo obanëngbe cuevëshënga botamana uafjantsenëshëngcá; shjoicajana puerte botamanëshënga, pero tsoyna jútjena obanëngbe betashëngaca y janjuana soyëngaca. ²⁸ Tsëngaftanga chca šmondmëna: entšangbe delante tsëngaftanga jtsinÿnana mo nÿetsca soyënguine tsabá amëngcá, pero ndoñe chca quešmátsmëna. Tsëngaftangbe ainanentšna chë bacna entšanga ntšamo ndegombre tmojuabnacá ndinÿinÿnayëngcá y chë bacna soye amëngcá šmontsejuabná.

²⁹ “¡Tša lastema tsëngaftangbiana, bacna entšanga ntšamo ndegombre šmojuabnacá ndinÿinÿnayënga fariseunga y ley abuátambayënga! Tsëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entšanga chamotsemnama, chëngbe cuevëshënga jtsatspórmayëse. Tsëngaftanga cachcá jtsamana chë nÿetsca soyënguine tsabá amëngaftaca, chë chëngbiana jtenójuaboyama pormániñe jtsatsbótamnyëse; ³⁰ y chentšana šmondbëtsichamo: ‘Bënga chë bëngbe bëtsëjmëngbe tempo maftsjanienëse, chëngbioye ndoñe matmëñanëjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana. ³¹ Pero ntšamo šmojtsamcá jtsamëse, tsëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioye tmojanëbayëngbe entšanguentšana šmomnana. Y mora cach tsëngaftangbe bëts taitangcá tsëngaftanga šmontsama. ³² ¡Mopochocanga jamama chë bacna soyënga, chë tsëngaftangbe bëts taitanga tmojanbojatšé jamama soyënga!

33 “¡Mětšcuayënga, mětšcuaye entsanga! ¿Ndayá šmochjama chë infiernoca uabouana castigüentsana jótsbocama? 34 Chíyeca atše tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatsëmbënga y abuátambayënga. Pero tšëngaftangna, ínÿengbioye šmochantsëbaye y šmochanjácrucificaye; ínÿengbioyna chë enefjuana yebnënguenache šmochanjátsetšenaye y nÿetsca bëts pueblënguenache chënga šmochandúcamená. 35 Chíyeca, tšëngaftangbiamá nÿets castigo echántsemna chë nÿetsca soyënguiñe tšabá amënga tmojëftsóbanama; Abel, chë jóbanama chabotsemnana tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentše tmojanóba, altar y chë entsanga Bëngbe Bëtsábioye imojánadorana luariñe. 36 Ndegombre cbëyana, lempe chë soyëngama castigo morsca entsangbiamá echántsemna ca” —Jesús tojánayana.

*Jesús tojanošachna Jerusalenoca entsangbiamá
(Lc 13.34-35)*

37 Mëntšánaca Jesús tojánayana: “¡Jerusalenentša entsanga, Jerusalenentša entsanga! Tšëngaftanga chë Bëngbe Bëtsabe juabna oyebuambnayënga jtsëbáyana y chë Bëngbe Bëtsabe ichmónënga ndëtsbéngaca jtsatëchënganjana jtsëbáyama. Bueta soye atše sënjábosena tšëngaftanga átšbioye júbuajana, mo canÿe tuamba chabe bolletotémënga chabe juatëngmiáša tajsoye cuaftajayecá, pero tšëngaftanga ndoñe chešmátsbošena. 38 Y šmochjinÿe, atše mora cachcá cbochanjesënÿaye, y chca, atšna enánanga cbochanjésabashejuana, mo canÿe yebna cachcá tcojesonÿá y énañe tcojeseboshjoncá. 39 Y atše cbëyana, ndegombre tšëngaftanga morscana atše ndoñe más quešmochátinÿe; y atše šmochántinÿe mëntšá chašmojtsichamo ora: ‘¡Corente bendición bomná, Bëngbe Utabnabe obenánaca tojabá ca!’ ”

24

*Jesús tojánayana chë Bëngbe Bëtsabe bëts yebna lempe mochjánpochocama
(Mc 13.1-2; Lc 21.5-6)*

1 Jesús Bëngbe Bëtsabe bëts yebnentšana tojëftsanbocna y ya yojt-saye. Chorna chë uatsjëndayënga chábioye tmojanobeconá y tmojanontšë nÿetsca chentša bëts yebnënga cha jinÿinÿiyana. 2 Chora Jesús tojanéyana: “Tšëngaftanga lempe šmontsonÿá. Ndegombre šcuayana, quem Bëngbe Bëtsabe bëts yebnentše ndoñe queochaisoquëda ni mo canÿe ndëtsbé inÿe ndëtsbé juatsboye. Lempe mochantsepochóca ca.”

*Ntšamo yochtsemna quem luare jopochócamá tempo chaojtsobeco ora
(Mc 13.3-23; Lc 21.7-24; 17.22-24)*

3 Chentšana chënga Olivos tjashoye tmojána. Jesús choca yojtsetbemana; as, chë uatsjëndayënga tmojanobobeconá nÿe chëngbiamá jatjayama, mëntšá: —Smëyana. ¿Mocna ora chë soyënga Bëngbe Bëtsabe bëts yebnoca yochjochnëngo ca? ¿Ndayá yochjochnëngo bënga jinÿanÿiyama aca jésabama ora ya yojtsemnana y quem luare jopochócamá tempo yojtsobecuama ca?

4 As Jesús tojanjúá: —Cuedado šmochtsebomna ndocná chacmondáingñema. 5 Banga mochanjabo y mochantsabíchamo chënga atše imomna ca. Mochántichamo: “Atše chë Cristo sëndmëna ca” y

chca, ba entsángbioye mochanjáingñaye. ⁶ Tšëngaftanga šmochanjouena canye luarentša entsanga inye luaroca entsángaftaca imojtsentsjanaya y nderado mochjentsjámna. Ndoñe matauatjèngana, er chca jochnènguama endmèna; pero masque chcase, quem luare jopochócama cabá ndoñe queochátsmèna. ⁷ Canye luarentša entsanga inye luaroca entsángaftaca mochántsejtsjanaye, y canye amëndayábentša entsanga inye amëndayábioca entsángaftácnaca; y ba luarènguiñe shèntsana echanjóshjango y chentša fshantsènga echanjuangmèmana. ⁸ Masque chca jasúfriase, más chcoye cabá más mochanjatssúfria.

⁹ “Chora, entsanga inyèngbe cucuatšiñe cmochanjábashejuana chacmatsetšenama y cmochantsèbaye; y atšbe ústonènga bétsemnayeca nyetsca luarènguentša entsanga cmochantsèbuayènja. ¹⁰ Chè tempo, banga mora átšbeñe ošbuáchiyènga, ošbuáchiyana mochantsajbaná y mochantsenáboyènja y jóbana inyèngbe cucuatšiñe mochántsenboshjuana. ¹¹ Banga Bèngbe Bètsabe ndoñe ndegombre juabna oyebuambnayènga mochanjábocana y ba entsanga mochanjáingñaye. ¹² Nyetsá bacna juabnènga entsangbe ainaniñe echanjésemna, y chë causa banga ndoñe quemochátenbobonshana. ¹³ Pero nda nyets tempo átšbeñe ošbuachiyá totsomñe, atsbocaná echántsemna. ¹⁴ Y quem tšabe noticiènga Bèngbe Bètsabe amëndayama nyets quem luariñe entsángbioye mochántsabuyaynaye, chca, chë ndegombre soyènga Bèngbe Bètsabiama chènga chamotsetatšèmbuama. Chentšana cocayé quem luare jopochócama tempo echántsemna.

¹⁵ “Chè Bèngbe Bètsabe juabna oyebuambnayá Daniel chë puerte uabouana soye tojéftsanabema chë pochócaye soyama. Tšëngaftanga chë puerte uabouana soye chë uámana ca uabaina luarentše chašmojinye ora (nda tojtsalía, chabosertá), šmochántsetatšèmbó chë puerte ngmènanana tempo tojóshjanguama; ¹⁶ entsanga Judeoca chamojtsemnènga, batsjabengoye chamotsacheta. ¹⁷ Y nda cachabe yebnentša tsbanánoca chaojtsemna, chaotsachá chocana ntjastjangcá ndayá tsoicana jéftsábocnama. ¹⁸ Y nda jajoca chaojtsemna, yebnoye ndoñe chaondéta ni mo chabe quèfsaíya jesácñama. ¹⁹ ¡Tša lastema chë tempo ngomámanènga chamojtsemnèngbiama o ochóchaye šesonga chamojtsabamnèngbiama! ²⁰ Bèngbe Bètsá šmochtseimpadana chë tšëngaftanga jachetama, uaftena tempo ora o canye ochnaytè ndoñe chaondétsemnama. ²¹ Chca, chora puerte ngmènanana echántsemna. Tša jabuache ngmenancá, quem luare jabojátšama orscana y mèntscoñama y más chcoye, cachcá ngmènanana ndoñe ntjamnana. ²² Chë puerte ngmènanana tempo yapa bèn ndoñe chaondétsemnama Bèngbe Bètsá ndoñe tonjalesenciase, ndocná quen-tatsbocá; pero chabe ubuáyanènga cha corente endábabuanyèshanayeca, echanjama yapa bèn tempo ndoñe chaondétsemnama.

²³ “Chora nderado nda cmochanjáuyana: ‘Minyènga, muentše chë Cristo entsemna’, o ‘Choca cha entsemna ca’, chë soyèngama ndoñe šmattsayaunana. ²⁴ Chora mochanjábocana ndoñe ndegombre uámana ubuáyanènga, chènga Cristo imomna ca jtsichámèse, y Bèngbe Bètsabe ndoñe ndegombre juabna oyebuambnayèngnaca; y chènga mochanjama bèts soyènga chèngbe obenana jinyaníyama, entsanga jáingñama, y tmojobenase, chë Bèngbe Bètsabe bocacánèngnaca. ²⁵ Atše ya chama tchbonjabuayená chë tempo cabá ndóshjango ora. ²⁶ Chiyeca, nderado chènga chacmojáuyana: ‘Minyènga, chentše chë Cristo entsemna,

entsanga ndoyenoca ca', choye ndoñe šmatjá; o chacmojáuyana: 'Cha canye tsoca entsemna ca', chama ndoñe šmattsayaunana. ²⁷ Er ntšamo chë tojatcuinye ora, shinye bocanoicana y shinye uenatjembambanentscoñe jabuashinjinñenancá y ba luarënguenache entsanga jobenayana jinñama, cachcá, Bëngbe Bëtsá Entśá tbojanbemá quem luaroye chaojésabo te, entsanga nyets luarentše mochanjobenaye cha jinñama. ²⁸ Canye obanabe cuerpo tojtsemnama chë gallinacënga tmojátatšëmbona y cachora chë béconana jojtana. Cachcá, chë castigo echántsemna nña chama chë tempo chaojtsemna ora ca" —Jesús tojánayana.

Bëngbe Bëtsá Entśá tbojanbemá quem luaroye echanjésabo

(Mc 13.24-37; Lc 21.25-33; 17.26-30, 34-36)

²⁹ Mëntśánaca Jesús tojánayana: "Chë puerte ngménana tempo chaojchnëngüentsana, shinye ndoñe queochátsbuashinjinñana, juashcona ndoñe queochátsbinñayae, celocana estrellënga echanjatquécjana y quem luarentša tsbanánoca espíritënga obenana bomnënga echanjángmëmëmana. ³⁰ Chora canye soye celoca echanjónñna entsanga jinñanyiyama Bëngbe Bëtsá Entśá tbojanbemá ya iuaisaboma, y nyets luarenache entsanga mochanjenóbošachna, y Bëngbe Bëtsá Entśá tbojanbemábioye mochanjinñe celoca jantšetëshiñe echántsaboye, puerte obenánaca y corente buashinjinñaniñe. ³¹ Y canye trompetëfjua jabuache chaojuëna ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nyets luarëngocana, celoca cányoica juachoicana y chë ínyoica juachóntscoñe.

³² "Ntšamo higo betíyeca endbëtsopasanama šmochjuatsjinñe: Tojtsais-abuacuana y tojtsaisëjotsana ora, chë tšabe tempo ya tojtsaisobecuama jtsotatšëmbuana. ³³ Cachcá, lempe chë ndayama tšëngaftanga tcbonjauyancá chašmojinñe ora, šmochántsetatšëmbo Bëngbe Bëtsá Entśá tbojanbemá ya jésabama yojtsemnama. ³⁴ Ndegombre cbéyana, lempe chca echanjochnëngo, morsca entsanga cabá ndóbana ora. ³⁵ Celoca y quem luare echanjopochóca, pero atšbe palabra ndocna te queochaisopochóca.

³⁶ "Pero ndayté y ntseco ora Bëngbe Bëtsá Entśá tbojanbemá yochjésabama, ndocná quenátstatšëmbo, ni chë celoca angelotëmënga, ni Bëngbe Bëtsabe Uaquiñá. Nye chë Taitá chama yotátšëmbo.

³⁷ "Ntšamo Noé yojëtsiyena ora tojanopasacá, cachcá echanjopása chë Bëngbe Bëtsá Entśá tbojanbemá chaojésabo ora. ³⁸ Noebe tempo, chë uabouana uaftena cabá nduáshjango ora, entsanga imnasaye, imnofšësnaye y imnóbouamnaye; natjëmbana imojtsiyëñe, y chca imojtsomñe Noé chë barquëshoye tojánamashënguëntscuana. ³⁹ Chënga tondaye imonjántatšëmbo, nye chë uabouana uaftena tojánashjango y nyetscanga tojtsanëyamba ora cocayé. Cachcá echántsemna Bëngbe Bëtsá Entśá tbojanbemá chaojésabo ora; ya chaojchnëngo ora, entsanga chama mochanjátatšëmbona. ⁴⁰ Chora uta boyabásata jajoca bochántsemna; canña mochanjesbetše y chë inñana ndoñe. ⁴¹ Uta shembásata bochántsejanñoye; canña mochanjesbetše y chë inñana ndoñe.

⁴² "Chíyeca cuedado šmochtsebomna y yejuana šmochtsantješna, er ndoñe quešmátstatšëmbo ndayté tšëngaftangbe Utabná yochjésabama. ⁴³ Pero quem soye tšabá chacmësertá: Chë yebnentša nduiño, ntseco ora ibeta atbëbaná yochjabama tojtsetatšëmbëse, cha

nantsefšna y ndocnábioye buanjaleséncia jushañe chaotsendbemama tsoye jtsamashēnguama y jtsatbēbama. ⁴⁴ Chíyeca, tsēngaftángnaca šmochtseprontana, er Bēngbe Bētsá Entśá tbojanbemá echanjésabo, entšanga chama tondaye chamontsejuabná ora ca” —Jesús tojánayana.

Chē tšabe oservená y chē ndoñe tšabe oservená
(Lc 12.41-48)

⁴⁵ “¿Nda yomna chē oservená ntšamo chē nduiño tojtsebošcá amá y nýets juábnaca amá? Cha jtsemnana nda chē nduiño bochjéftsebošhona chē yebnentšēnga chaotsanýenama y jasama tojtsemna ora chaújuatšema. ⁴⁶ Chē nduiño tojtashjango ora, chē oservenábioye tbojínýena ntšamo ibomncá jtsamése, chē oservená puerte oyejuayá echántsemna. ⁴⁷ Ndegombre cbéyana, chē nduiño chábioye bochanjaimpáda lempe chabe soyēnga chabotsinýeñama. ⁴⁸ Pero chē oservená bacna entśá tomnēsna, jajuaboyana chē nduiño ndoñe betscó yochantabo ca, ⁴⁹ y as, cha jóntšana chē inýe oservénēnga jtsajantšetayana, becá jtsesana y jtsetmuana inýe tēmiēngaftaca. ⁵⁰ Y chabe nduiño jtashjanguama ndoñe tontsejuabná te y ndoñe tontsetátšēmo ora, cha echántashjango. ⁵¹ Chora chē nduiño jabuache bochantsecastíga, y ntšamo chē bacna entšanga ndayá ndegombre tmojuabnacá ndinýinýnayēnga jasúfriama entsamncá, cha echanjasúfria. Chora cha puerte echanjenóbošachna y chē tsetšanama juatsašēnga echantsenoftēšjojnaye ca” —Jesús tojánayana.

25

Chē bnētsana tobiašēngbiama cuento

¹ Mēntśánaca Jesús tojánayana: “Chē te chaojóshjango ora, Bēngbe Bētsabe amēndayana echántsemna mo ntšamo canýe casamento fiestentše tojanopasacá. Mēntśá yojopása: Bnētsana tobiašēnga chēngbe querosine uajuinýanēshangá imojéftsájaca y imojábocana chē casamentero boyabása jajēbenguama. ² Chē bnētsana tobiašēnguentšana, shachnēnga sempre enójuabnayēnga innamna, y chē inýe shachnēngna, ndenójuabnayēnga. ³ Chē ndenójuabnayēngna chēngbe uajuinýanēshangá imojéftsájaca, pero querosine ndoñe imonjuabuyamba chē uajuinýanēshangañe cachiñe jtaftsuámama. ⁴ Pero chē sempre enójuabnayēngna chēngbe uajuinýanēshangá imojéftsájaca y querosinēnaca botellēšēnguiñe imojuabuyamba. ⁵ Chē casamentero boyabásana ndoñe betscó yonjabo, chíyeca nýetsca tobiašēnga ocnayana yojubuache y imojtsomaná. ⁶ Mo tséntseto orna, chēnga imojouena mēntśá uayebuáchana: ‘¡Chē casamentero boyabása ya endabó! ¡Jajēbenguama mobocana!’ ⁷ Asna, nýetsca tobiašēnga imojotsbaná y imojóntša chē uajuinýanēshangá juabopróntana. ⁸ Chorna, chē shachna ndenójuabnaye tobiašēnga chē inýe shachnēnga sempre enójuabnayēngbioye imojáuyana: ‘Diosmanda tsēngaftangbe querosinentšana baseytema šmēbuatšatá, bēngbe uajuinýanēshangá tojontsé jtsafsanana ca.’ ⁹ Pero chē sempre enójuabnayēngna imojayana: ‘Ndoñe. Tcbojubuatšatase, tsēngaftangbiama y bēngbiámncaca querosine echántasashbe. Más tšabá entsemna, chē querosine mondbétsenoye chašma y tsēngaftangbiama chašmauábuamiñe ca.’ ¹⁰ “Chorna, chē shachna ndenójuabnaye tobiašēnga imojá chē querosine jauabuámiyama; pero chēntscuana chē casamentero boyabása

yojáshjango y chë sempre enójuabnayënga cháftaca chë casamento fiestoye imojámashjna, y chentša bësásá imojtatame. ¹¹ Chentšana chë inÿe tobiášënga imojáshhajna y mëntšá imojtsichamo: ‘¡Taita, Taita, šmebëtafjo ca!’ ¹² Pero chë casamento boyabása yojóju: ‘Ndegombre cbëyana, tšëngaftanga ndoñe quecbatëbuatma ca.’

¹³ “Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstatšëmbo ndayté, ni mocna ora chca yochjopásama ca” —Jesús tojánayana.

Chë crocenánama cuento
(Lc 19.11-27)

¹⁴ “Bëngbe Bëtsabe amëndayana endmëna mo ntšamo canÿe boyabásaftaca tojanopasacá. Cha ibojtsemna inÿe luaroye jtsoñama; as chabe oservénënga yojáchembo y yojaimpádaye chabe crocénana chamotsinÿenama. ¹⁵ Cánÿabioye ibojántšabuachiye shachna uaranga crocénana, inÿabioyna uta uaranga y inÿabioyna canÿe uaranga. Chca yojamna ntšamo cada ona ibojobiashjachcá. Y as chë boyabása yojtsoñe. ¹⁶ Cachora chë shachna uaranga yojoyëngacñá yojá trato jabemama, y chca, inÿe shachna uaranga crocénana yojábotiye. ¹⁷ Chë uta uaranga yojoyëngacñá cachcá yojama y inÿe uta uaranga yojábotiye. ¹⁸ Pero chë canÿe uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

¹⁹ “Chentšana baytese chë oservénëngbe amëndayá yojtashjango y yojóntša chë crocenánama chënga jatjayana. ²⁰ Natsana yojáshjango chë shachna uaranga yojoyëngacñá y chabe mandayábioye inÿe shachna uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inÿe shachna uaranga sënjaboté ca.’ ²¹ As chë mandayá ibojauyana: ‘Tša tšabá, tšabe oservená y ntšamo tšbošcá amá. Aca quem base soyiñe lempe ntšamo tbojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átseftaca cochjóyejuaye ca.’ ²² Chentšana chë uta uaranga yojoyëngacñá yojáshjango y chë mandayábioye ibojauyana: ‘Taita, aca uta uaranga šconjanoyé y muentše entsemna inÿe uta uaranga sënjaboté ca.’ ²³ As chë mandayá ibojauyana: ‘Tša tšabá, tšabe oservená y ntšamo tšbošcá amá. Aca quem base soyiñe lempe ntšamo tbojamandacá tcojámayeca, atše cbochanjaimpáda más bëtscá chašcotsinÿeñama. Mamáshëngo y átseftaca cochjóyejuaye ca.’

²⁴ “Pero chë canÿe uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canÿe tšátjaye entšá comnama; acna chë ndoñe tconjajé chentše saná jocñana y chë ndoñe tconjujuqëshe luarentše jobuátbanana. ²⁵ Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’ ²⁶ As chë mandayá ibojóju: ‘¡Bacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujuqëshe luarentše jobuátbanana atše tsuamanama icojátatšëmbëse, ²⁷ aca cmonjamna atšbe crocénana bancoca jetsobuájuana y atše matijtabo ora, atšbe crocénana matijtóyëngacñe y chë chentšana tojoboté crocenanënaca ca.’ ²⁸ Y as yojamënda: ‘Chë uaranga motseboca y chë bnëtsana uaranga entsebomnábioye chana motsatšetá ca. ²⁹ Er nda tojtsebomnábioye, más jatšetayana, y chca cha corente

bětská jtsebomnana; pero tondaye tondbomnábioyna, chě batšatema tobomna sóynaca jtsebocana ca.’

³⁰ “Y chora cha vojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chě tsetšanama juat-sašěnga echantsenoftěšjojnaye ca.’ —Jesús tojaněyana.

Ntšamo chě quem luare jopochócama ora, nyětsca entsangbiama moch-jayana

³¹ Měntšánaca Jesús tojánayana: “Chě Běngbe Bětsá Entšá tbojanbemá chabe obenánaca, buashinŷinŷyaniñe y nyětsca chabe angelotéměngaftaca chaojésabo ora, chě reybiama puerte buashinŷinŷyana tbemaniñe echanjót'bema. ³² Chora nyěts luarěngoca entsanga chabe natsanoica mochanjénefna, y cha, entsanguentšana ínŷyenga echanjábacacaye, mo chě oveshěnga abujěnjyana oveshěnga chivěngbentšana endbetsabacacnayca. ³³ Chě abujěnjyana, oveshěnga chabe catšbioica echanjáchembo y chivěngna chabe uañicuayoica. Běngbe Bětsá Entšá tbojanbemá cachcá echanjama: chě ubuáyaněnga chabe catšbioica echanjúbuaja y chě bacna entsangna chabe uañicuayoica echanjásaye.

³⁴ “Chorna chě Rey, Běngbe Utabná, chabe catšbioica chamojtsemna entsanga echanjáuyana: ‘Tšěngaftanga, Atšbe Taitá tšábeñe cmětabna, maběnga ca; atšbe aměndaye luare mo tšěngaftangbiama otocana soycá mosháchifěnga; tšěngaftangbiama enděprontana, Běngbe Bětsá quem luare tonjanma orscana. ³⁵ Er atše šonjanishěntsana y tšěngaftanga saná šmonjancaredadó; šonjanajuendá y tšěngaftanga šmonjanafšé; inŷe luarocana ashjargonacá sěnjánana y posada šmonjanántšame. ³⁶ Enašá sěnjánana y entsáyá šmonjanětšetá jtichětjuama; šocá sěnjanjájona y šmonjanatsětsaye; cárceloca sěnjanětámena y jaběuatsětsayama šmonjánabo ca.’

³⁷ “As chě Běngbe Bětsá chabe bominŷiñe tšábenga tojábiaměnga mochanjatjaye: ‘Běngbe Utabná, ¿ntseco shěntseca tcběnjáninŷe y tcběnjanajuatšé? ¿Ntseco uajuendayá tcběnjáninŷe y tcběnjanafšé? ³⁸ ¿O ntseco inŷe luarocana ashjargonacá tcběnjáninŷe y posada tcběnjanántšame, o enašá y entsáyá jtichětjuama tcběnjanětšetá? ³⁹ ¿O ntseco šocá o cárceloca utamená tcběnjáninŷe y jauatsětsayama tifjána ca?’

⁴⁰ “As chě Utabná echanjójua: ‘Ndegombre cběyana, lempe ntšamo chě atšbe catšátanguentšana chě más batšá uámaněngaftaca šmojamcá, cach átšeftaca šmonjanma ca.’

⁴¹ “Chentšana chě Utabná chabe uañicuayoica chamojtsemna entsanga echanjáuyana: ‘Atšbentšana mojuánanga atšbe Bětsabe uabotěněnga. Infiernoye motsajna, chě ndocna te queochátšfsana íñeshoye; choca enděprontana Satanás y chabe ustoněngbiama. ⁴² Er atše shěntseca sěnjánana y tšěngaftanga saná ndoñe chešmatancaredadó; šonjanajuendá y ndoñe chešmatanafšé; ⁴³ inŷe luarocana ashjargonacá sěnjánana y ndoñe posada chešmatanántšame. Enašá sěnjánana y ndoñe entsáyá chešmatanětšetá; šocá sěnjanjájona y cárceloca sěnjanětámena y ndoñe chešmatanatsětsá ca.’

⁴⁴ “As chěnga mochanjatjaye: ‘Běngbe Utabná, ¿ntseco tcběnjáninŷe shěntseca o uajuendayá, o inŷe luarocana ashjargonacá, o enašá, o šocá o cárceloca utamená y ndoñe tcběnjanajabuache ca?’

45 “Y chë Utabná echanjójua: ‘Ndegombre cbéyana, tšëngaftanga ntšamo chë atšbe catsátanguentsana chë más batsá uámanëngaftaca, ndoñe šmonjanmcá, átšeftaca cach ndoñe chešmátanma ca.’

46 “Chëngna infernoye nýetsca tescama mochantsésetjango, y chë Bëngbe Bëtsá chabe bominyiñe tšábenga tojábiámëngna chë nýetsca tescama yomna tšabe vida mochántsebomna ca” —Jesús tojánayana.

26

*Entšanga tmojanjuabó ntšamo jamëse Jesús jishachama
(Mc 14.1-2; Lc 22.1-2; Jn 11.45-53)*

1 Lempe chca tojánayanentsana, Jesús chabe uatsjëndayënga tojanëyana: 2 “Tšëngaftanga šmondëtatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá Inýengbe cucuatšifne mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egiptocana tojánatsebacama.

3 Chëntscuana, chë bachnangbe amëndayënga y chë judiëngbeñe bëtsëjemëngcá mándayënga tmojánenefna, Caifás, chë bachnangbe más uámana amëndayabe bëts yebnentše. 4 Tmojanenojuabó y tmojanenoye-uná jtseíngñase Jesús jishachama, y jtsóbama. 5 Pero imojsichamo: “Quem fiestëntscuana ndoñe, entšanga yapa muanjöntša enbouenanana ca.”

*Canýe shembása botamana uanguëtše bėjaye Jesusbe bestšašifne tbojanbuešcja
(Mc 14.3-9; Jn 12.1-8)*

6 Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše. 7 Chëntscuana canýe shembása Jesúsbiyoe tojanabeconá. Chë shembásana tojanamba canýe alabastro jarrëtema, jútjena canýe puerte uámana botamana uanguëtše bėjayeca. Jesús mesëshentše yojtsemnëntscuana, chë shembása chabe bestšašifne chë botamana uanguëtše bėjaye tbojanbuešcja.

8 Chë uatsjëndayënga chca tmojáninýe orna, tmojanotjayaná y tmojanontsé ichámuana: —¿Ndáyeca nýe bonamente chë soye chca yojtsemna ca? 9 Chamna, matmënjobenanga chë bėjaye becá crocenánama juiyana y chánaca ndbomnjëmënga matmënjújabuache ca.

10 Jesús chë soye tojanuena; as tojanëyana: —¿Ndáyeca ndoñe cachcá quem shembása šmochanjonýaye ca? Ntšamo tonjamcá tšabá entsemna. 11 Er chë ndbomnjëmëngna nýets tempo tšëngaftangbeñe mochanjëftsemna, pero atše tšëngaftangaftaca ndoñe nýets tempo quichásemna. 12 Ntšamo chë shembása tojamcá, chë botamana uanguëtše bėjaye atšbe cuerpiñe jabuéšcjëse, cha šontseprónta atše juatbontsa tescama. 13 Ndegombre cbéyana, quem luariñe ndayéntšnaca Bëngbe Bëtsabe soyëngama chamojtsabuayiyiná chentše, ntšamo quem shembása tojamámncaca becá mochanjëftsoyebuambaye, chca, entšanga chabiamna chamotsenójuabnama ca —Jesús tojanëyana.

*Judas tojána bachnangbe amëndayëngbiyoe, Jesús chamuishachama
(Mc 14.10-11; Lc 22.3-6)*

14 Canya chë bnëtsana uta uatsjendayënguentsá, Judas Iscariote ca uabainá, tojána bachnangbe amëndayëngaftaca jencuéntama. 15 Y tojanatjá: “¿Ntsachetsá šmatjtabuénaye y Jesús tšëngaftangbe cucuatšíñe cbochjayentsbashejuana ca?”

As chënga, unga bnëtsana ralbenga tmojtanabuená. 16 Y cach orscana Judas yojtsenguaye ntšámore y ntseco ora, Jesús chëngbe cucuatšíñe jayentsbáshejuana.

Jesús chabe uatsjëndayëngaftaca Bashco saná tojanse
(Mc 14.12-25; Lc 22.7-23; Jn 13.21-30; 1 Co 11.23-26)

17 Chë Bashco fiesta bojatšenté, chë levadúraca ndëpormana tandëse jasama fiestëntscuana, chë uatsjëndayënga Jesúsbioye tmojanobeconá y tmojtantjá: —¿Ndémoca aca cojtseboše bënga fchauptontama Bashco saná chacosama ca?

18 Y Jesús tojanëyana: —Chë bëts puebloye motsajna canye bacobe yebnoye y cha šmochjauyana: “Buatëmbayá tonjayana: ‘Atšbe ora ya echanjobuache, y atše acbe yebnoye sëntsá, Bashco fiesta jamama atšbe uatsjëndayëngaftaca ca.’ ”

19 As chë uatsjëndayënga tmojanma ntšamo Jesús tojanamëndacá y chë Bashco fiesta saná tmojanprontá.

20 Y tojanibétata orna, Jesús chë bnëtsana uta uatsjëndayëngaftaca mesëshentše yojtsemna. 21 Y imojtsesantscuana, Jesús tojanëyana: —Ndegombre chëyana, canya tšëngaftanguentsá uayayëngbe cucuatšíñe šochanjáboshjona ca.

22 Chora chë uatsjëndayënga puerte ngménaca imojtsemna y tmojanontsé canyánya Jesús jatjayama: —Bëngbe Utabná, ¿nderado atše cha chtsemna ca?

23 As Jesús tojanëjua: —Canya nda chabe tandëse entsefchecuacná cach atše sëntsefchecuacná šcnenentše, cha uayayëngbe cucuatšíñe šochanjáboshjona. 24 Ndegombre, Bëngbe Bëtsá Entsá tbojanbemáftaca echanjopása ntšamo Bëngbe Bëtsabe uabemana palabrenguiñe chabiamia iuayancá; pero, itša lastema chë bochjáboshjonabiamia! Más tšabá chabiamia manjamna ndoñe ntjónynana ca.

25 As Judas, chë boshjuaná, Jesúsbioye tbojtantjá: —Buatëmbayá, ¿nderado atše chtsemna ca?

Y Jesús tbojanjúá: —Ndegombre tcjayana ca.

26 Imojtsesantscuana, Jesús tandëse tojanca, Bëngbe Bëtsábioye chama tbojtanchuá, tojanjatá y chë uatsjëndayënga tojanatšatá. Y mëntsá tojánayana: “Mocñënga, mosënga. Atšbe cuerpo entsemna ca.”

27 Chentsana, canye coptema vínoyeca tojanaca, Bëngbe Bëtsábioye tbojtanchuá y chë uatsjëndayënga tojanëšasé. Y mëntsá tojánayana: “Nýetscanga quem coptémentšana mofšënga. 28 Quem vínoye atšbe buiñe entsemna. Atšbe buiñe echanjuábuashana entšanga chamotsetatšëmbuama ntšamo Bëngbe Bëtsá entšanga tojanašebuachenacá aíñe yochjochnënguama. Chë buiñe bëtská entšangbiamia echanjuábuashana, chëngbe bacna soyëngama perdonánënga chamotsemnana. 29 Y ndegombre chëyana, morskana atše ya ndoñe más chë uvasentsšana obocniye quichaisofsiye. Chë tsëm vínoye tšëngaftanguentsá chanjofsiye, atšbe Taitabe amëndayoca chamojtsemna ora ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama

(Mc 14.26-31; Lc 22.31-34; Jn 13.36-38)

³⁰ Bëngbe Bëtsá jëtschuayama tmojancantá chentsana, Olivos tjashoye tmojëftsanbocana. ³¹ Choca Jesús tojanéyana: —Tšëngaftanga nyëtscanga quem ibeta átsbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabrenguñe, cha mëntsá tojánayana: “Chë oveshëngbe abuajëñya chanjóba y chë oveshënga mochantsáshana ca.” Chca tšëngaftangaftaca echanjopása, uayayënga chašmojishache ora. ³² Pero obanënguentsana chaitayenentsana, tšëngaftangbe natsana Galileoye chanjá ca —cha tojanéyana.

³³ Chora Pedro tbojanjuá: —Masque nyëtscanga ácbeñe ošbuáchiyana chamotsobuetše y chamotsacheta, ntšamo ácaftaca yochjopása causa, atše ndocna te ca.

³⁴ As Jesús tbojaniyana: —Ndegombre cbëyana, cam ibeta, ngallo cabá ndécánta ora, aca unga soye cochanjayana ndoñe šconduabuatma ca.

³⁵ Pero Pedro tbojaniyana: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y nyëtsca uatsjëndayëngnaca cachá imojtsichamo.

Getsemaní luarentše Jesús Bëngbe Bëtsáftaca tbojanencuentá

(Mc 14.32-42; Lc 22.39-46)

³⁶ Chentsana, Jesús chabe uatsjëndayëngaftaca canye luare Getsemaní ca uabáinoye tojána. Choca tojanéyana: “Muentše motbiama, chëntsucana atše choye chanjá Bëngbe Bëtsáftaca jencuéntama ca.”

³⁷ Y Pedro y chë Zebedeobe uta uaquñata tojëftsanëbiatše. Choca yojóntša puerte ngménaca y corente cochtsetšenaná jtsemnama. ³⁸ Jesús tojanéyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefšna ca.”

³⁹ Chora Jesús más natsanoye tojána, tojanoshamentšé y fshantsóntscoca yojotsejbéna, y mëntsá Bëngbe Bëtsáftaca tbojanencuentá: “Atšbe Taitá, jopódianëse moma atše japadésama ndoñe chašondëtsemnama. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

⁴⁰ Chentsana, Jesús chabe unga uatsjëndayëngbioye tojtanabo y chëngna immétsomañe. Chca tojánanyena ora, Pédrëbiyoe tbojaniyana: “¿Ni mo canye horatema tšëngaftanga šmonjobená átšeftaca jtsefšnana ca?

⁴¹ Smochtsefšna y Bëngbe Bëtsáftaca šmochtsencuéntaye, chca, bacna soye jamama ndoñe chačmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanéyana.

⁴² Uta soyama tojtesaná y mëntsá Bëngbe Bëtsáftaca tbojanencuentá: “Atšbe Taitá, atše japadésama ndoñe chašondëtsemnama jamama ndoñe jopódianëсна, nye ntšamo aca cojtsebošcá chaotsemna ca.”

⁴³ Y tojtanabo ora, chë uatsjëndayënga cachiñe immétsomañe; yapa ocnaye causa nye imojtsefshétana. ⁴⁴ As Jesús cachá cachiñe yojëftsënyaye, y ungama cachiñe tojtesaná Bëngbe Bëtsáftaca jencuéntama, y cach palabrenga tojánayana.

⁴⁵ Chora chë uatsjëndayëngbioye tojtanabo y tojanéyana: “¿Cabá šmotsomañe y šmotsochnañe ca? Ya ora tocjobuache, Bëngbe Bëtsá

Entsá tbojanbemá bacna soye amëngbe cucuatshiñe mochanjáboshjona.
 46 Motsbananga, cuajna. Minjyënga, chë boshjuaná ya entsebeconá ca.”

Uayayënga Jesús tmojánishache

(Mc 14.43-50; Lc 22.47-53; Jn 18.2-11)

47 Jesús cabá yojtsóyebuambnantscuana, Judas, canye chë bnëtsana uta uatsjendayënguentsá, tojánashjango, y cháftaca imojtsemna ba entsanga espadéjangaca y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga. 48 Judas, chë boshjuaná, tojanjuabó ntšamo jamana entsanga jinñanyiyama ndëmua Jesús bëtsemnana. Chíyeca yojáuyana: “Nda chajjauámocho, cha echántsemna. Smochjishache ca.” 49 Cachora Judas Jesúsbioye tojanobeconá y tbojanчуá: —Buajtana, Buatëmbayá ca.

Y tbojtanámocho.

50 Jesús tbojanianyana: —Enutá, moma chë ndayá jabomama tcojabo ca.

Chorna, chë entsanga tmojanobeconá, Jesús tmojánishache y tmojanánatse.

51 Chca orna, canye enutá Jesúseftaca yojtsemná, chabe espadéja tojanenosëngbotëntšena, y chë bachnangbe más uámana amëndayabe oservenábioye canye matscuaše tbojtsanëštjango.

52 As Jesús tbojanianyana: “Espadéja matosëngbuajonjyá. Nda espadéjaca tbojóba chana, cach espadéjaca echanjóbana. 53 ¿Aca ndoñe condétatšëmbo, atše atšbe Taitábioye stjaimpádase, cha cachora atšbiana nanjichamuá bnëtsana utama más ejércitënga angelotémëngaca? 54 Pero chcasna, ¿ndayá Bëngbe Bëtsabe uabemana palabrénguiñe endayancá ntšamo nanjochnëngo? Chiñe endayana ntšamo entsopasancá jochnënguama canmëna ca.”

55 Cachora Jesús entsanga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše canye bacá uamana entsá cuaftsemncá ca? Atše cada te Bëngbe Bëtsabe bëts yebnoca tšëngaftangaftaca sënjántbemana abuátambaye, y choca ndoñe chešmánatishache. 56 Pero lempe quem soyënga chca entsopasana, cachcá chaotsemnama ntšamo Bëngbe Bëtsabe uabemana palabrénguiñe chë Bëngbe Bëtsabe juabna oyebuambnayënga tmojanayancá ca” —Jesús tojánayana.

Cachora nyetsca uatsjëndayënga tmojtsanëuatjaná y tmojtsanacheta, y Jesús chë uayayëngaftaca cachcá tmojesanonjyá.

Jesús tmojanánatse chë judiëngbe más uámana amëndayëngbioye

(Mc 14.53-65; Lc 22.54-55, 63-71; Jn 18.12-14, 19-24)

57 Chë Jesús tmojánishachënga, tmojanánatse, Caifás chë bachnangbe más uámana amëndayabe yebnoye. Chentše chë ley abuátambayënga y chë judiëngbeñe bëtsëjemëngcá amëndayënga tmojánenëfjna. 58 Pedro bënocana Jesús tbojanasto, chë bachnangbe más uámana amëndayabe chashjóntscoñe; choye tojánamashëngo y chë Bëngbe Bëtsabe bëts yebnoca josticiëngaftaca yojótbema, chca, jtsetatšëmbuama ntšamo yochjopásama.

59 Chë bachnangbe amëndayënga, chë bëtsëjemëngcá amëndayënga y ínñyënga judiëngbe amëndayënga imojtsenguaye ndánaca masque uayátsenaye soye Jesusbe contra cháuyanama, as chënga jobenayama cha chaóbana ca jayanama, 60 pero ndoñe tmonjáninñyëna, masque banga

tmojánashajna Jesusbe contra uayátsenaye soyënga jayanama. Cabana, útata tbojánashjango,⁶¹ y chata tbojánayana: “Quem boyabása tonjayana canobena Bëngbe Bëtsabe bëts yebna jtšenásatajhcana y nÿe unga tese jtëtsjebuana ca.”

⁶² As chë bachnangbe más uámana amëndayá tojantsá y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶³ Pero Jesús nÿe iytëca yojtsemna. Chíyeca chë bachnangbe más uámana amëndayá tbojanianana: —Bëngbe Bëtsá Ainabe mándoca cho-mandá chašcuyana aca ndegombre chë Cristo, chë Bëngbe Bëtsabe Uaquiñá comna o ndoñe ca.

⁶⁴ Chora Jesús tbojanjuá: —Aca ndegombre yomncá tcjayana. Y quem sóynaca cbéyana: Tšëngaftanga šmochanjinye, atše, Bëngbe Bëtsá Entšá tbojanbemá, chë nÿets obenana bomnabe catšbioica jtsetbemanana y celoca jantšetëshiñe jtsaboyana ca.

⁶⁵ Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiana entsemna mo cha cuafjoyenguangá, chë chabe Uaquiñá yomna ca cha tonjayana ora! ¿Ndayama más entšanga šochjátëjaboto Jesusbe contra chamuayanama? ⁶⁶ ¿Ntšamo šmatjayana ca? —cha tojanantjá.

As chë entšanga tmojanjuá: —Ndegombre cha bëts bacna soye entse-bomna; jóbanama bontsemna ca.

⁶⁷ Chora tmojanontšé Jesús juebëbuashëtjnayana, jabuache jantšetayana y ínÿengna imojtsejuébjantšetaye,⁶⁸ y imojtsatsëtsnaye: “Cristo, aca ndegombre Bëngbe Bëtsabe juabna oyebuambnayá tcomnëse, ¡momalisiá nda tcmënjajantšetá ca!”

Pedro tojánayana Jesúsbioye ndoñe bonjanabuátma ca
(Mc 14.66-72; Lc 22.55-62; Jn 18.16-18, 25-27)

⁶⁹ Chëntsuaana Pédrëna shjoca yojtsemna, chashjoca yojtsetbemanana. Chora, canÿe shembása chentša oservená tbojanobobeconá y tbojanianana: —Acnaca, Jesús chë Galileocáftaca conjánana ca.

⁷⁰ Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnatësertana ca.

⁷¹ Chora Pedro bëšoye yojábocna. Chentšna, inÿe shembása oservená chábioye tbojáninÿe y chë inÿe entšanga tojanéyana: —Cha, Jesús chë Nazaretocáftaca enjánana ca.

⁷² Pedro cachiñe tojánayana ndoñe bonjanabuátma ca, y mëntšá yojtsejúraye: —¡Chë boyabása ndoñe quetsatabuatma ca!

⁷³ Chentšana, chë chentše imojtsemnënga Pédrëbioye tmojanobeconá y tbojanianana: —Ndegombre, ácnaca chë uatsjendayënguentšá condmëna. Chë contsoyebuambnacá contsoyátëmbana ca.

⁷⁴ Chora Pedro tojanontšé ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúraye y yojtsichamo: —¡Chë boyabása ndoñe quetsatabuatma ca!

Y cachora canÿe ngallo yojacánta.⁷⁵ Y Pedro yojenójuaboye ntšamo Jesús tbojanianana. Cha mëntšá tbojanianana: “Cabá ngallo ndëcánta

ora, aca unga soye cochanjayana ndoñe şconduabuatma ca.” Y chentşana tojėsanbocna y corente ngmėnaca yojtsenóboşachna.

27

Jesús, Pilátbioye tmojanánatse
(Mc 15.1; Lc 23.1; Jn 18.28-32)

¹ Tojanbinýna ora, nýetsca chė bachnangbe amėndayėnga y judiėngbeñe bėtsėjemėngcá amėndayėnga tmojánenefjna jenóyeunayama ntşamo jamėse Jesús chaóbanama. ² As, Jesús tmojanėcuėbatsėca y tmojanánatse, y chca, Pilato, chė Judeoca Romano mandadbe cucuatşiñe tmojánboshjona.

Ntşamo Judas tojanóbana

³ Judas, chė boshjuaná, Jesús jóbanama ibojtsemnna tojanuena ora, puerte yojtsenócochinýena ntşamo tojánchjanguama, y chė unga bnėtsana ralbenga chė bachnangbe amėndayėnga y bėtsėjemėngbioye tojtanamba, ⁴ y mėntşá tojanėyana: —Puerte bacna soye tijama. Atşe canýe bacna soye ndbomná tşėngaftangbe cucuatşiñe tijáboshjona chaóbanama ca.

Pero chėnga tmojanjuá: —¿Chė soye ndayá bėngbiana? Cach aca cochátotatsėmbñe ca.

⁵ As Judas chė ralbenga Bėngbe Bėtsabe bėts yebnentşe yojesėtsana, y yojá y yojėtsentşaye.

⁶ Chė bachnangbe amėndayėngna chė ralbenga tmojtanatbaná y tmojánayana: —Quem crocenánama buiñe echanjuábuashana; ntşamo leyiñe endayanácá, bėnga ndoñe quemuátobena chė Bėngbe Bėtsabiana soyėnga quėcjnayėtėmiñe chana jasegórana ca.

⁷ Chcasna, chėnga tmojanenoyeuná, chė crocenánacna chė Alfarerbe Luare ca uabaina fshantse jabuámiyana, y chca, canýe luare jtsebomnna ndayentşe chė inýe luarėngocana entşanga áshjajnėnga jutabuantsama. ⁸ Chíyeca, chė fshantse mėntşcoñama Buiñe Luare ca iuabaina. ⁹ Chca, tojanochnėngo ntşamo Jeremías, chė Bėngbe Bėtsabe juabna oyebuambnayá, tempscá tojanayancá, ndayá yochjanchnėnguama. Chana mėntşá tojánayana: “Y chė unga bnėtsana ralbenga tmonjanca, ntsachetşá chė Israeloca entşanga cha tmojanamananacá, ¹⁰ y chánaca chė Alfarerbe Luare tmonjanbuamė, ntşamo Bėngbe Bėtsá şonjanmandacá ca.”

Jesús Pilatbe delante
(Mc 15.2-5; Lc 23.2-5; Jn 18.33-38)

¹¹ Chentşana Jesús, chė mandado Pilátbioye tmojanánatse y cha mėntşá tbojantjá: —¿Aca chė judiėngbe rey cojtsemna ca?

Y Jesús tbojanjuá: —Aiñe, aca ndegombre yomncá tcjayana ca.

¹² Chė bachnangbe amėndayėnga y chė bėtsėjemėnga Jesús mal imojtse-quédantscuana, cha ndocá ntjojuana. ¹³ Chíyeca Pilato tbojantjá: —¿Ndoñe consuentana lempe ntşamo acbe contra montsichamcá ca?

¹⁴ Pero Jesús ni canýe palabra ndoñe ntjojuana. Chė causa, chė mandado ndoñe yontsetátşėmbo ntşamo jajuaboyana.

Jesús chaóbana ca tmojánayana
(Mc 15.6-20; Lc 23.13-25; Jn 18.38-19.16)

¹⁵ Bashco fiesta ora, chė mandado yojanamana canýe utamená jėtsboshjonana, nda entşanga tmojuabuayaná. ¹⁶ Chė tempo canýe

uachuana utamená inamna, Jesús Barrabás ca uabainá. ¹⁷ Nýetsca entsanga chentše imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

¹⁸ Er chë mandado yojtsetátšëmbo, entsangna envidia causa Jesús chabe cucuatšinë tmojánboshjonama.

¹⁹ Pilato chë tribunal ca uabáinentše yojtsetbemanëntscuana, chabe shema canya tbojanichmó mëntšá cha jauyanama: “Chë nýetsca soyënguiñe tšabá ama entsábioye ndocá matsborlánana; chabe causa ibeta otjénayoca puerte sënjasufri ca.”

²⁰ Pero chë bachnangbe amëndayënga y chë bëtsëjëmënga entsanga tmojanayëñaná, Barrabás jëtsboshjonama y Jesús chaóbana ca chamuayanama. ²¹ Chora chë mandado cachiñe tojanatjá: —¿Chë útatenšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

²² Pilato tojanatjá: —¿As, ndayá Jesús, chë Cristo ca uabobuatmáftaca atše chjama ca?

Y nýetscanga tmojanjuá: —¡Motsecrucificá ca!

²³ Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

²⁴ Ndocá jamama yontsobenama y entsanga más jabuache enbouenanama tmojanontšema Pilato tojáninýe ora, cha tojanmandá býyeshe juabuýëboñana y nýetscangbe delante yojtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

²⁵ Chora nýetsca entsanga tmojanjuá: —¡Quemuá yochjóbanama, bënga y bëngbe básengbiama castigo chaotsemna ca!

²⁶ As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entsangbe cucuatšinë tbojánboshjona chamocrucificama.

²⁷ Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nýetsca soldadënga chabe shëconana tmojanójoto. ²⁸ Chorna, entsáyá tmojtsanabotsca y shbuenda uafjatsenga entsáyá mo reycá tmojanichëtjo. ²⁹ Canýe coronësha tmojanapormá uchmašëfjangaca y tmojanabestšajó, y catsbioica cucuatšinë canýe niñëfja. Chorna, chabe shecuatšentše imojtsofshëntsamentšenaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

³⁰ Chëngnaca imojtsanbuashëtjnaye y cach niñëfjaca bestšašentše imojtsëtsjanjnaye. ³¹ Y chca imnaftsáboyejuanentšana, chë shbuenda uafjatsenga entsáyá tmojtsanabotsca y cachabe entsáyá tmojtanichëtjo, y chora, jacrucificama tmojanánatse.

Jesús tmojanrucificá

(Mc 15.21-32; Lc 23.26-43; Jn 19.17-27)

³² Chë entsanga chentšana tmojánbocana ora, tmojánenbetše canýe bacóftaca, Simón ca uabainá, Cirene pueblócá. As, cha tmojanmandá Jesusbe cruz chauetscutsama.

³³ Canýe luare Gólgota ca uabáinoca tmojánashjajna ora (hebreo biyañe chca endayana “Obanabe Bestšashe Luare ca”), ³⁴ Jesúsbioye vínoye

hiéloyeca enájuaabniye tmojanabuiyé chaofšema; pero yojaftántia y ndoñe vonjábošena chiye jofšiyama.

³⁵ Ya tmojanrucificá orna, chë soldadënga Jesusbe entšayamna, tsbanánoye tmojanétsena, chca, jtsetatšëmbuama ndabiama yochjánáquedama. ³⁶ Y chora chënga chentše tmojanotbiama Jesús jtsebojanýama. ³⁷ Y chabe bestšaše juatsboicna canýe uabemana soye tmojananjo. Chiñe yojétsayana ndáyeca cha tmojanrucificama, mëntšá: MUA JESÚS ENDMËNA, CHË JUDIËNGBE REY ca.

³⁸ Utata bacna soye ochjajnayátnaca chënga chentše tmojanrucificá, canýa Jesusbe catsbioica y chë ínýana chabe uañicuayoica. ³⁹ Y chëjana imojtsachnëjuana entšangna, Jesús imojtsóyenguaye, imojtsobestšfshanenaye ⁴⁰ y imojtsatsaye: “¡Aca chë icobena Bëngbe Bëtsabe bëts yebna jtsenásatajchcana y nýe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomñese, chë cruzocana matastjango ca!”

⁴¹ Chë bachnangbe amëndayënga, ley abuatambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo: ⁴² “Cha ínýenga tojëftsatsebácá, pero cachá jéntsbecama ndoñe quenátobena. Cha Israeloca entšangbe Rey tojtsemñese, chë cruzocana chauatastjango, y chca, bënga chábeñe fchtsošbuáchiye. ⁴³ Cha tojayana Bëngbe Bëtsábeñe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobobonshánësel, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

⁴⁴ Y chë bacna soye ochjajnayata, Jesúsëftaca ibojtsecrucificanátnaca cachcá ibojtsóyenguaye.

Jesús tojanóbana

(Mc 15.33-41; Lc 23.44-49; Jn 19.28-30)

⁴⁵ Nýetsto orscana las treséntscoñe, nýets quem luare yojtseibétata. ⁴⁶ Chca orna, Jesús chabe biyañe tojanáyebuachena: “Elí, Elí, ¿lema sabac-tani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

⁴⁷ Chca tmojanuena ora, báseftanga chentše imojtsemna entšanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

⁴⁸ As chora, chentša canýa tojëftsánótjajo canýe esponjëshe janguanguama, untja vínoyeca chëshe tojanfchecuacuá, canýe niñëfjiñe tojananguësëtjo y Jesúsbioye tojanbeconá chaofšema. ⁴⁹ Pero ínýengna tmojánayana: “Cachcá mochjonýaye, er Elías tayochjabo jabátsbocama ca.”

⁵⁰ Pero Jesús cachiñe jabuache tojanoyó y tojanóbana. ⁵¹ Y cachora, Bëngbe Bëngbe Bëtsabe bëts yebnocá yojújonýana entšëjua tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaújonýana. Fshantse yojuangmëmmana, ndëtsbenga yojtsashtëtšana, ⁵² y chë cuevëshënga obanëngaca yojtsëtëfjo y banga Bëngbe Bëtsabe entšanga tmojtanayena. ⁵³ Y chënga, Jesús tojtanayenentšana, chë cuevëshënguentsana tmojánbocana, y Jerusalén, chë uámana bëts pueblo ca uabánioye tmojánamashjna y ba entšángbioye tmojánëbëbuacana.

⁵⁴ Chë soldadëngbe amëndayá y chë ínýenga, Jesús jtsebojanýama cháftaca tmojanoquedanga, chë fshantse yojuangmëmmanama

tmojáninÿe ora, y nÿetsca chë yojtsëchnëjuana soyëngama, puerte auatjanánënga imojtsemna y tmojánayana: “iNdegombre quem boyabása Bëngbe Bëtsabe Uaquíñá yomna ca!”

⁵⁵ Ba shembásëngnaca chentše imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana. ⁵⁶ Chë shembásëngbeñe imojtsemna María Magdalena; María, Santiago y Josebe mamá; y Zebedeobe uaquíñatbe mamá.

Jesús tmojanatbontsá

(Mc 15.42-47; Lc 23.50-56; Jn 19.38-42)

⁵⁷ Ya yojtseibétatana ora, canÿe bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. ⁵⁸ José tojána Pilato jinÿama, Jesusbe cuerpo jotjañama. As Pilato tojanmandá chë cuerpo chamontšabuáchemá. ⁵⁹ José chë cuerpo tojanca y canÿe nduatsenga lino entsëjuaca tbojanandmaná. ⁶⁰ Y canÿe chabe tsëm cuevëshiñe tbojanjajó. Tempo cha inamánda chë cuevëshna ndëtsbenguiñe chamopormama. Canÿe bëts ndëtsbé tojansjoná y chë cuevëshoye amashjuanentše tojánachto; y chentšana José yojtsatoñe. ⁶¹ Pero María Magdalena y chë inÿe Mariyna chentše tbojtsanoquedañe y chë cuevëshe ndirichiñe tbojanótbema.

Soldadënga tmojána Jesús yojtsatbontsánentše jtsebojanÿama

⁶² Yëfsana, chë ochnayté, chë bachnangbe amëndayënga y chë farise-unga cánÿiñe tmojána Pilato jinÿama. ⁶³ Tmojanianana: —Taita, bënga fsëntsejuabná ntšamo chë bostero cabá ainá ora tonjánayanama, chë unga tianoye cha jtayenama ca. ⁶⁴ Chíyeca, momandá chë cuevëshe soldadënga chamotsashanÿá unga tentscuana. Chca, chabe uatsjëndayënga ndoñe ibeta chamondabo chabe cuerpo jabétsatbëbama, y chentšana chënga entsanga chamúyana, Jesús tojtayena ca. Y chca, chabiamá quem ústonoye bostero soye, chë cachabiamá tojánayana soyëngama puerte más bacá nántsemna ca —chënga tmojanianana.

⁶⁵ As Pilato tojanéyana: —Tsëngaftanga cach tsëngaftangbiamá soldadënga šmondábamna. Motsajna y chë cuevëshe cuedádoca šmochtsashanÿá, ntšamo šmondëtatšëmbcá ca.

⁶⁶ Chora chënga tmojána chë cuevëshe jtsashanÿama; chë ndëtsbena, tsengájašeca imojuinÿnaná, ntsotatšëmbcá ndocná choye chaondámashënguama, y soldadënga chentše tmojëftsanashejuana.

28

Jesús tojtayanena

(Mc 16.1-8; Lc 24.1-12; Jn 20.1-10)

¹ Ochneyté chentšana, chë inÿe semana bojatsenté yojtsebínÿana ora, María Magdalena y chë inÿe María tbojána cuevëshoye jarrepárama. ² Ndeolpe fshantse tojanangmëmëmana, er Bëngbe Bëtsabe canÿe ángel celocana tojánstma, chë cuevëshoye tojanobeconá, chë atamiana ndëtsbé tojtsanjuaná y chiñe tojanótbema. ³ Chë ángelna mo canÿe tcuinÿëjca yojtsebuashinÿinÿana, y chabe uichëtjonëjuangá uafjantsëjuangá mo jantsetëshcá yojtsamna. ⁴ Chë soldadënga chca tmojáninÿe ora, de auatja yojtsangmëmënyae y mo obanëngcá imojtsemna.

⁵ Chora chë ángel chë shembásatbïoye tojanéyana: “Ndoñe batauatjana. Atše sëntsetatšëmbo tšëngaftanga Jesús, chë tmonjancrucificá cha šmojtsenguama. ⁶ Cha muentše ndoñe quenátsmëna; cha tontayena, ntšamo cachá tonjanayancá. Mabata y šochjinýe cha endétsesegoranentše. ⁷ Betsco motsata y chë uatsjéndayënga šochjáuyana: ‘Jesús tontayena y tšëngaftangbe natsana Galileoye echanjá; choca šmochanjinye ca.’ ” Y chora cha tojánayana: “Chca šondmëna tšëngaftanga jauyanana ca.”

⁸ Cachora chë shembásata chë cuevëshentšana tbojésanbocna, auatjanánata pero puerte oyejuayata, y tbojéftsanotjajo chë soye chë uatsjéndayëngbeñe jobuambayama. ⁹ Y ndeolpe Jesús chata tojánëbëbuacna y tojanacheuá. Chatna, chábïoye tbojanobéconata, tbojtánadorata y chabe shecuatše shëconana imojtobojcjuá. ¹⁰ Y Jesús tojanéyana: “Ndoñe batauatjana. Motsata atšbe uatsjéndayënga, atšbe catšátanga jáuyanama Galileoye chamotsá y choca atše šmochjinýe ca.”

Ntšamo chë soldadënga tmojánayana ndayá tojanochñënguama

¹¹ Chë shembásata ibojtsayëntscuana, básefta soldadënga chë bëts puebloye tmojána y ntšamo tojanopasacá lempe chë bachnangbe amëndayëngbeñe tmojanobuambá. ¹² As chë bachnangbe amëndayënga, chë judiëngbeñe bëtsëjemëngcá mandayëngaftaca tmojánenefna jenóyeunayama. Chëngna chë soldadëngbïoye bëtscá crocénana tmojtánatsatá, ¹³ y mëntsá tmojanabuayená: “Tšëngaftanga šmochjayana, íbeta šmotsomáñëntscuana, Jesusbe uatsjéndayënga tmojabo y chabe cuerpo tmojabétsatbëba ca. ¹⁴ Y chë mandado chë soyama chaojátatšëmbonëse, bënga lempe cháftaca fchjenóyeunaye, chca, tšëngaftangaftaca ndocá chaondopasama ca” —chënga tmojanéyana.

¹⁵ As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y mëntscoñama judiënga cachcá mondbétsichamo.

Jesús chë uatsjéndayënga tojanichamó, Bëngbe Bëtsabe soyëngama nyetsquénache jábuayenama

(Mc 16.14-18; Lc 24.36-49; Jn 20.19-23)

¹⁶ Chentšana, chë bnëtsana canýe uatsjéndayënga Galileoye tmojána, chë ndëmua tjoye Jesús chënga tojanabuayená choye. ¹⁷ Y Jesús tmojáninýe ora, tmojtánadorá. Pero báseftangna imojétsejuabnaye nderado cha ndoñe Jesús yontsemna ca. ¹⁸ Jesús chëngbïoye tojanobconá y tojanéyana: “Bëngbe Bëtsá nyets mando atše šonjatšetá celoca y quem luarentše. ¹⁹ Chcasna, motsajna, nyets luarënguenache oyenënga atšbe uatsjéndayënga šmochjábïama. Entšanga šmochjubaye atšbe Taitá, atše chabe Uaquíñá y chë Uámána Espiritbe uabaina jayanëse, átšbeñe šmošbuachéyeca, ²⁰ y šmochjabuatambá lempe ntšamo atše tchojamëndacá chënga chamóyeunama. Y ndegombre atše nyets tempo tšëngaftangaftaca chanjéftsemna, quem luare jopochócantscuana ca” — Jesús tojanéyana.

San Marcos

*Juan chë Ubayaná entsanga yojanabuayiyiná
(Mt 3.1-12; Lc 3.1-9, 15-17; Jn 1.19-28)*

¹ Mëntšá tojanobojsé chë tsabe noticiënga Bëngbe Bëtsabe Uaquiñá Jesucristbiama.

² Ntšamo bayté entsemna, chë Bëngbe Bëtsabe juabna oyebuamb-nayá Isaías chabe librëšaňe yojëftsayanca, ntšamo Bëngbe Bëtsá chabe Uaquiñábioye ibojauyanama cha tojanábema ora:

Minýe, atšbe abuayiyiná acbe natsana sentsichamná, chë aca jabama lempe echanjapróna cha.

³ Entšanga ndoyena luaroca cha enduáyebuache mëntšá:

“Bëngbe Utabná echanjabo ca;

mo nda canýe benache tojtseprontacá canýe uámana entšá jashjan-guama,

cachcá tšëngaftanga, cha jabama ainaniňe tsabe juabnëngaca šmochtseprontana ca” —cha tojanábema.

⁴ Chcase, Bëngbe Bëtsá Juan tbojanichmó, y cha tojánbocna entšanga ndoyena luaroca, Bëngbe Bëtsabe soyëngama abuayiyenaye y entšanga ubáyana. Cha entšanga yojanëtsësnaye: “Tšëngaftangbe bacna soyëngama ngménaca šmochtenójuaboye, chca amana šochtsajbaná, y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” ⁵ Nýets Judea luarocana chábioye entšanga imojánbocana, y Jerusalenentsana nýetsca entšángnaca, y Bëngbe Bëtsábioye chëngbe bacna soyëngama jaimpáda chentsana, Juan Jordán ca uabaina béjajiňe chënga yojanëbáyana.

⁶ Juanbe entšayá inauapormana camellbe stjënasheca y bobache yojanasnana; chapulinatëmënga y tjaňe méloye inasaye. ⁷ Y mëntšá entšanga yojanëtsësnaye: “Atšbe ústonoye inýa echanjabo, atšbiama más obenana bomná; chíyeca atše merecido taitatobuajoňe, ni mo jotsejbiyana chabe shecohëtjonëshentsa corriëja jajafjonama.

⁸ Atšna búyeshca cbondëubáyana, pero chë echanjabábeyecna, Bëngbe Bëtsá bochanjíchua chë Uámana Espiritu tšëngaftangbe ainaniňe cháuamashënguama ca.”

*Juan, Jesúsbioye tbojanabaye
(Mt 3.13-17; Lc 3.21-22)*

⁹ Chë tempo, Galilea luarocana Nazaret pueblentsana Jesús yojëftsebocna, y Juan yojtsemnoye tojána; y Jordán béjajiňe Jesúsbioye cha tbojanabaye. ¹⁰ Bejajoicana yojtashëbëbocna orna, tojáninýe celoca atëfjiňe, y chë Uámana Espiritu chábioye mo palomatemcá yojtsastajuana. ¹¹ Y celocana Bëngbe Bëtsá mëntšá tbojanियana: “Acna atšbe bonshana Uaquiñá condmëna; acbiama corente sëntsoyejuá ca.”

*Jesús tojanobená Satanás jayëñjanama
(Mt 4.1-11; Lc 4.1-13)*

¹² Chentsana chë Uámana Espiritu Jesúsbioye entšanga ndoyena luaroye tbojanánatse. ¹³ Canta bnëtsana te chë entšanga ndoyena luaroca tbojanjëtana, y Satanasna yojanabó jisháchichiyama. Chë luarentše tsátjaye

bayënga imnajena; chentšana, Bëngbe Bëtsabe angelënga cha imojtseser-vena.

Jesús tojanontsé Galileoca chabe trabajo jamana

(Mt 4.12-17; Lc 4.14-15)

¹⁴ Juan cãceloye tmojanëtãmentšana, Jesús Galileoye tojesaná; y chiñe cha yojanabuayiynã chë tšabe noticiënga Bëngbe Bëtsabiamã. ¹⁵ Jesús entšanga yojanëtsëtsnaye: “Ora toçjobuache, Bëngbe Bëtsabe amëndayana echanjóshjango. Tšëngaftangbe bacna soyëngama ngmënaca šmochtenójuaboye, y chca amana šmochtsajbanã y Bëngbe Bëtsabe benache šmochtishache; y ainaniñe chë tšabe noticiënga Bëngbe Bëtsabiamã šmochjóyëngacñe ca.”

Jesús tojánachembo canta boyabásenga beonga ashebuánayënga cha chamuastama

(Mt 4.18-22; Lc 5.1-11)

¹⁶ Galilea uafjajónaye tsachajana Jesús yojtsaye ora, cha tojánanÿe Simón y chabe uabentsã Andrés; chatna atarraiešhangã ibnetsashbuëtsetšañe, er beonga ashebuánayata chata ibnamna. ¹⁷ Chora Jesús tojanëyana: “Atšeftaca mabata. Atše cbochanjãbiamã Bëngbe Bëtsabiamã entšanga anguyata; y morscana, ñye beonga ashebuánayata ndoñe quešochãtsmëna ca.”

¹⁸ Y cachora chatbe atarraiešhangã cachcã tbojésanaboshjuana y Jesús tmojanasto.

¹⁹ Más hcoye yojátaye orna, Jesús tojánanÿe Santiago y chabe uabentsã Juan, Zebedeobe uaquiñata; chatna barquëshañe ibnetsotbemañe, chatbe atarraiešhangã atapórmayañe. ²⁰ Chora Jesús chë útata tojánachembo; as chatna, chatbe taitã Zebedeo chë barquëshañe tmojésanboshjona chabe peóngaftaca y Jesúseftaca tbojtsanoñe.

Jesús, bacna bayëjbe juabna cãnyãbioye tbojanbojuanã

(Lc 4.31-37)

²¹ Chentšana, Jesús y chabe uatsjëndayënga Capernaum ca uabaina puebloca tmojánashjajna. Chë ochnayté, Jesús chë judiëngbe enefjuana yebnentše tojánamashëngo y yojóntša entšanga jabuátambama. ²² Entšanga imojtsenjnanaye ntšamo Jesús yojtsabuatambacã, er chama mo canÿe mando bomnacã yojtsóyebuambnaye, ndoñe ñye ntšamo Moisesbe ley abuatãmbayënga imojanabuatambacã. ²³ Chë pueblentše judiëngbe enefjuana yebnentše yojtsemna canÿe entšã bacna bayëja uambayã, y chábeyeca chë boyabása yojóntša mëntšã uayebuáchana: ²⁴ —¿Ndayama bëngbioye tëçjabo, Jesús Nazaretocã? ¿Tcojabo bënga jabëtsapochocama? Atše sëndëtãtsëmbo nda aca comnama, aca chë Bëngbe Bëtsabe Uamanã ca.

²⁵ Chora Jesús chë bayëjbioye tbojtsanácacana, y tbojaniana: —¡Iytëca móbema y chábentšana maisebocna ca!

²⁶ Chora chë bacna bayëjna tojanma chë boyabása ataque chaboshachama, jabuache tojanoyó y chábentšana tojésanbocna. ²⁷ Chama, ñyetsca entšanga ojanánënga imojtsemna, y mëntšã imojtsentjanaye: “¿Ndayã chca yojtsemna? ¿Canÿe tsëm buatëmbana soye? ¡Quem boyabása mando bomnacã y obenacã entsabuatambã, y chca, chë bayëjnga cha jtsamëndayana y chëngnaca joyeunayana ca!”

²⁸ Y betscyo ñyets Galilea luarentša pueblënguenache Jesusbiamã yojtsótãtsëmbo.

Jesús, Simón Pédrëbe uambén mamábïoye tbojanshná

(Mt 8.14-15; Lc 4.38-39)

²⁹ Chentsána, chë enefjuana yebnentsana tmojánbocana y Santiago y Juánoftaca Jesús tojána, Simón y Andresbe yebnoye. ³⁰ Simonbe uambén mamá šocá inajájona, jabuache calentóracá, y Jesúsbioye chë šocabiama tmojanियana. ³¹ As chora, Jesús tojanobeconá, chë šocábïoye tbojanábuacueshache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontsé chënga jobuácuedana.

Jesús ba šoquënga tojanashná

(Mt 8.16-17; Lc 4.40-41)

³² Chë te jetiñe, shinÿe ya yojuenatjëmbe ora, chë luarentša nÿetsca šoquënga y bacna bayëjënga uambayënga Jesúsbioye tmojanënatse; ³³ y nÿetsca entšanga bëšoye imojobeconá. ³⁴ Jesús banga tojanashná, nÿetsca šocana bomnënga, y ba bacna bayëjënga entšanguentsana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátšëmbo cha chë Cristo bétsemnana.

Chë judiëngbe enefjuana yebnënguenache Bëngbe Bëtsabe soyëngama Jesús yojanabuayiyná

(Lc 4.42-44)

³⁵ Yëfsana cabá cachëse, cabá ibetcá, Jesús tojëftsantsbaná, chë pueblentsana tojëftsanbocna y entšanga ndoyena luaroye tojtsanoñe, choca Bëngbe Bëtsáftaca jencuéntama. ³⁶ Pero Simón y chabe enutëngna tmojána jetsenguanguama; ³⁷ y tmojtsaninÿena ora tmojanियana: — Nÿetscanga cmontsenguá ca.

³⁸ Y Jesús tojanëyana: —Inÿoye cuajna, cam béconana pueblëngoye, chíñnaca Bëngbe Bëtsabe soyëngama entšanga chayábuayenama; er chama atše sënjabo ca.

³⁹ Y chentsána, Jesús yojánana Bëngbe Bëtsabiama entšanga abuayiyenaye chë judiëngbe enefjuana yebnënguenache, nÿets Galileiñe, y entšángbentsana bacna bayëjënga yojtëbuacana.

Jesús, canÿa bacna nguayanánaca šocábïoye tbojanshná

(Mt 8.1-4; Lc 5.12-16)

⁴⁰ Chentsána, canÿe boyabása bacna nguayanánaca šocá Jesúsbioye tojanobeconá; y joshaméntšase mëntšá tbojanimpadá: —Aca tcojtsebošëse, aca catjobenaye atšbe šocana jtsebojuánama ca.

⁴¹ Jesús chabiama tbojanongmé; cucuátšeca tbojánbojajo y tbojanियana: —Aíñe séntseboše. ¡šocana cbotsebojuaná ca!

⁴² Y cachora chë šocana tbojtsanóbojuanañe y tšabá yojtsatsmëna. ⁴³ Chora Jesús chábïoye tbojtanichmó, pero puerta mëntšá tbojanmandá: ⁴⁴ —Mouena; ndocnábeñe quem soye cattsecuéntaye; nÿe Jerusalenoca báchnëbioye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábïoye chama jëtschuayama, chca, nÿetsca entšanga chamotatšëmbona mora ya tšabá cojtsatsmënama ca.

⁴⁵ Pero chë boyabásana, chentsána tojëftsanbocna y cachora yojóntša nÿetsquënache entšanga yapa acúntayana Jesús tbojanshnama. Chë causa, Jesús ndoñe yontsobena entšangbe delante pueblënguenache jtsanana, ndayá nÿe chë pueblënga béconana y nÿetsca chë entšanga ndoyena

luarënguñe yojánana; pero nyets luarëngocana chábioye entšanga imojánashjajuana.

2

Jesús, canye jama ndobenábioye tbojanshná

(Mt 9.1-8; Lc 5.17-26)

¹ Chentšana, Jesús Capernaumoye tojtánashjango; y entšanga imojátatšëmbona, Jesús yebnentše yojtsatsmënema. ² Mallajta entšanga chentše tmojanójoto; chë causa chë yebnentše ya tondaye más luare entšangbiana yontsemna, ni mo chë amashjuantše, y Jesús Bëngbe Bëtsabe soyëngama yojtsabuayinyaye. ³ Chora tojanopasá, canta boyabásenga tmojanashjango, canye entšá jama ndobená imojtsaismana. ⁴ Pero ndoñe tmonjanobená Jesús yojtsemnoye cha juambana, tša entšanga causa. Chcasna, chë canta boyabásenga yebna tsbanánoca, Jesusbe tatsëtsoca batšá tmojánatëfjo y chëjana chë jama ndobená tjuashiñe tmojanéstjango. ⁵ Jesús tojáninye chënga tša imojtsošbuaché chë šocá jáshnama cha yojanobenama; as chë jama ndobenábioye tbojaniana: “Sobreno, mouena; acbe bacna soyënga tcbontseboperdoná ca.”

⁶ Chentše báseftanga judiëngbe ley abuátambayënga imnatbemana; chënga chora mëntšá imojtsejuabnaye: ⁷ “¿Ntšámoyeca quem boyabása chca yojtsichamo? Jesús ndoñe tšabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entšá quenátobena inýabioye bacna soyëngama japerdónana; nye Bëngbe Bëtsana aiñe ca.”

⁸ Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanëyana: “¿Ndáyeca chca tšëngaftanga ainaniñe šmojtsejuabná? ⁹ ¿Tšëngaftangbiana ndayá más paselo nántsemna tšëngaftangbe delante chë jama ndobenábioye atše jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca’? ¹⁰ Y chca, mora atše cbochanjínýanýiye Bëngbe Bëtsá Entšá tbojanbemá quem luariñe obenana yobomnama, entšanga bacna soyëngama jáperdonama ca” —Jesús tojánayana.

Y chë jama ndobenábioye tbojaniana: ¹¹ “Atše cbëyana, matëtsbaná, acbe tjuashe mesocñe y acbe yebnoye motsatoñe ca.”

¹² Cachora chë jama ndobená tojtantsbaná, chabe tjuashe yojesocñe, y entšangbiajana chentšana yojésebocna. Chama nyetsca entšanga imojenjaná y Bëngbe Bëtsábioye imojtsatschuanaye, y mëntšá imojtsichamo: “Nýa ndocna te tša bëts soye chemuáisinye ca.”

Jesús, Levíbioye tbojanchembo chabuastama

(Mt 9.9-13; Lc 5.27-32)

¹³ Chentšana, Jesús cachiñe chë uafjajónaye tsachoye tojesaná; ba entšanga chábioye imojobeconá, y Jesús yojtsabuátambaye. ¹⁴ Chentšana yojtsataye orna, Jesús tbojáninye Levíbioye, Alfeobe uaquiñá, yojtsantobemañe, entšanga impuesto atjanayacá inétsotrabajañe. Chora Jesús tbojaniana: “Smasto ca.”

Y Leví tojantsbaná y tbojanasto.

¹⁵ Tojanopasá, Jesús Levibe yebnentše yojtseye, y banga Romocama entšanga impuesto atjanayënga y inye bacna entšanga, mesëshentše cánýiñe imojtsetbiámana, Jesús y chabe uatsjëndayëngaftaca; er ba

entšanga cha imojústona. ¹⁶ Chë fariseunga y chë ley abuátambayënga, chë entšángaftaca Jesús vojtsesama tmojáninÿe ora, chabe uatsjéndayëngbioye tmojanatjá: —¿Ndáyeca tšëngaftangbe buatëmbayá, entšanga impuesto atjanayëngaftaca y bacna soye amëngaftaca vojtsesá ca?

¹⁷ Jesús chca tojanuena; as mëntsá tojanëjua: —Chë salud tmot-sobomñënga, ashnyá ndoñe ntsëjabótana, pero chë šoquëngna aíñe. Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, ndayá chë bacna soye amënga imomna ca juabnayënga átšbioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama (Mt 9.14-17; Lc 5.33-39)

¹⁸ Canÿe, Juan chë Ubayanabe ústonënga y chë fariseungbe usetonënga, Bëngbe Bëtsáftaca jencuéntama tondaye ntjascá imojtsemna ora, básefta entšanga Jesúsbioye tmojanobeconá y mëntsá tmojanianyana: —Juanbe ústonënga y chë fariseungbe usetonënga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjéndayënga ndoñe chca ca?

¹⁹ As Jesús tojanëjua: —Chë casamento fiestentše, chë ófjanënga saná ndoñe ntsabuáshebenana. ¿Ntšamo chca ndoñe nántsemna? Chë to-jobouamá entšá chëngaftaca tojtsemnëntscuana, chë ófjanënga bëtsá jasana y cháftaca oyejuayënga jtsemnana. ²⁰ Pero ora echanjobuache y chë boyabása chëngbentšana mochantsánatseñe; chora cocayé chë ófjanënga echántsamna tondaye ntjascá jtsemnana. Ntšamo chë to-jobouamá boyabása y chë ofjanëngaftaca endmëncá, cachcá endmëna atše y atšbe uatsjéndayëngaftacnaca.

²¹ “Ndocná, canÿe tanguá entšayá, base tsëm entšëjuaca jtarmëndana; chca tcojamëse, chë tsëm entšëjua jtsabéconana y chë tanguá entšayá más jtsatanëcanana, y chca, chë uátanëcniñe más bëtsiñe jtsabemana. ²² Y cach ndoñe, chë tojtseshayana vínoye tanguá jasabenguiñe ntjataft-suámayana; er chë jasabenga jtseshébëfjuana y chë vínoye jtsabuáshana, y chë vínoye y chë jasabenga tondayama ntjatoservénana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

Jesube uatsjéndayënga canÿe ochnayté trigo tmojanátabebe (Mt 12.1-8; Lc 6.1-5)

²³ Canÿe ochnayté, Jesús canÿe jajajana vojtsaye; y chabe uatsjéndayënga chëjana imojtsachnëjuana ora, tmojanontsé trigo juatabebiana. ²⁴ Chë fariseunga chca imojinÿe ora, Jesúsbioye tmojanianyana: —Minÿe. ¿Ntšamo acbe uatsjéndayënga montsamcá, ndoñe quenátslesenciana ochnayté jtsamama ca?

²⁵ Pero cha tojanëjua: —¿Ndoñe šmëndualía y šmondëtatšëmbo ntšamo Rey David y chabe enutënga tmojanmama shëntseca imojtsemna ora y jasama vojtsëjaboto ora? ²⁶ Chca ora, Abiatar chë judiëngbe bach-nangbe más uámana amëndayá inamna ora, David Bëngbe Bëtsabe yeb-noye yojámashëngo, y chë luarentše Bëngbe Bëtsá yojamnama inÿinÿnaye tandëšënga yojase; y chë cháftaca imojánajna entšángnaca yojátšataye. Y chë tandëšna nÿe bachnangbiamna belesenciana jasama. Masque David chca tojanma, Bëngbe Bëtsá ndoñe tonjánayana David canÿe bacna soye tojanma ca.

²⁷ Y Jesús más tojánayana: —Bëngbe Bëtsá ochnayté entsabiama tojama y entsá ndoñe tbonjánbema nye chë ochnayté ndoñe chaondëtrabajama. ²⁸ Chíyeca, Bëngbe Bëtsá Entsó tbojanbemá, ndayá entsá ochnayté tojt-sama sóynaca jtsemándayana ca.

3

Chë buashana cucuatše bomna entsá
(Mt 12.9-14; Lc 6.6-11)

¹ Chentsana, Jesús cachiñe chë judiëngbe enefjuana yebnoye tojésanamashëngo; y chentše canye boyabása yojtsemna, buashana cucuatše bomná. ² Chë fariseunga chiñe imojtserondana jinýama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. ³ Chora Jesús chë buashana cucuatše bomnábioye tbojaniyana: —Chentše, entsangbe delante motsa ca.

⁴ Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochócama ca?

Pero chënga ndocá tmonjanjuá, nye iytëca imojobiamama. ⁵ Chora Jesús rábiaca y ngménaca chë fariseunga tojanënyanýé, chënga ainaniñe josértama ndoñe montseboše causa; y chë buashana cucuatše bomnábioye tbojaniyana: —Macuenýanëjaná ca.

As chë boyabása tojanacuenýanëjaná, y chora tšabá chëtša yojtsatamna cach inýetsacá. ⁶ Pero chë fariseungna, chentsana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontšë juabnayana ntšamo jamëse Jesús jóbama.

Mallajta entsanga Jesúsbioye tmojanobeconá

⁷ Chentsana, Jesús chabe uatsjëndayëngaftaca tojanoluaré mar bójaye tsachoye, y Galileocana bëtsá entsanga tmojanasto. ⁸ Inýe entsángnaca chábioye tmojanobeconá Judeocana, Jerusalenocana, Idumea ca uabaina luarocana, Jordán bójaye chenguanoicana, Tiro y Sidón pueblëngocana. Chënga tmojanobeconá, Jesús tša bëts soyënga yojtsamama tmojanuena ora. ⁹ Jesús chabe uatsjëndayënga tojanéyana: “Motsajna y canye barquësha atšbiamama šmochjuapróna, tša entsanga ndoñe chašmondëtsatsëntšnama ca.” ¹⁰ Er cha banga tojanashná, y chë causa, nyëtscanga šocana bomnënga chábioye tmojanajuatsëntšená cha jabojajuama.

¹¹ Y chë bacna bayëjënga uambayëngna, Jesús tmojinýe ora, betscó chabe shecuatšëntše imojtsofshëntsamëntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

¹² Pero Jesús puerte tojanamëndá, nda cha bëtsemnama entsangbe delante ndoñe chamondëtsichámuama.

Jesús chë bnëtsana uta uatsjëndayënga tojanabacacá

(Mt 10.1-4; Lc 6.12-16)

¹³ Chentsana, Jesús canye batsjoye tojántsjua, y ndëmuanýenga tšabá tbojanínýnanënga tojánachembo. Y chëngna chábioye tmojanobeconá. ¹⁴ Chora, chënguentšana bnëtsana útata tojanëbuáyana, chamotsetjëmbambnana, y Bëngbe Bëtsabe soyëngama entsanga chámabuayenama; ¹⁵ y chënga obenana tojanatsatá entsángbentsana bacna bayëjënga jtëbuacanama. ¹⁶ Mënga mondmëna chë bnëtsana

uta bocacánënga: Simón, chë ndábioye Pedro ca Jesús tbojanabaye; ¹⁷ Santiago y chabe uabentsá Juan, Zebedeobe uaqüñata, chata tojanëbaye “boanerges ca”, y chca endayana “uajuesayabe uaqüñata ca”; ¹⁸ Andrés, Felipe, Bartolomé, Mateo, Tomás, Santiago, Alfeobe uaqüñá; Tadeo, Simón chë celote ca uabobainá; ¹⁹ y Judas Iscariote, chë chentsana ndoñe baytesna, Jesús uayayëngbe cucuatšifne bochjanboshjoná.

Ley abuátambayënga tmojánayana, Jesús Satanásbentsana obenana tojanóyëngacñe ca

(Mt 12.22-32; Lc 11.14-23; 12.10)

²⁰ Chentsana, Jesús yebnoye tojtanamáshëngo, y tša entsanga chentše tojanójoto; chë causa, ni cha ni chabe uatsjëndayënga, ni mo jasama luare ndoñe imontsebmna. ²¹ Jesusbe pamíllanga ntšamo cha yojtsepásama tmojántatšëmbona ora, tmojána cha jetsbetšama, er entsanga imojtsencuéntaye cha opá tojtsanóbema ca.

²² Y chë ley abuátambayënga Jerusalenocana tmojánashjajnëngna Jesusbiana mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjënga amëndayá, Jesúsbioye obenana tbojatšetá entšángbentsana bacna bayëjënga chauatëbuacnama ca.”

²³ Chënga chca imojtsichámuama, Jesús chënga tojánachembo, y cuentëngaca tojanontšé jáuyanana, jinñanyiyama chënga canye ndoñe ndegombre soyifne imojtsemnana, mëntšá: “¿Ntšamo Satanás nantsobena cachá jtenábocnama ca? ²⁴ Canye amëndayábentše entsanga tmojtsenojatá y tmojtsenáyase, chë amëndayana ndoñe ntjatotonana. ²⁵ Cachcá, canye yebnentše pamíllanga tmojtsenojatá y tmojtsenáyase, chë pamíllanga ndoñe tšabá nyets tempo quemochátsmëna. ²⁶ Y cachcá, Satanás y chábënga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

²⁷ “Ndocná quenátobena canye corente añemo bomna entsabe yebnoye jamashënguana y chabe soyënga jtsebocana, ndoñe natsana tconjshétsebatsëquëse. Nye tcojshétsebatsëquëse cocayé cuanjobenaye cha jefcana.

²⁸ “Ndegombre cbéyana, Bëngbe Bëtsá entšangbe nyetsca bacna soyënga echanjáperdonaye, y ntšamo Bëngbe Bëtsabiana y ínñëngbiana ndoñe tšabá tmontsichamo soyëngnaca; ²⁹ pero chë Uámana Espiritbiana ndoñe tšabá ichámëngna ndocna te queochátaperdonaye, er nyetsca tescama castigánënga jtsemnana chënga jtsamnana ca” —Jesús tojánayana.

³⁰ Jesús chca tojanëyana, er chënga imojtsichamo cha bacna bayëja ibojtsambá ca.

Chë Jesusbe ndegombre pamíllanguentšënga

(Mt 12.46-50; Lc 8.19-21)

³¹ Chëntscuana, Jesusbe mamá y catšátanga choye tmojánashjajna, pero nye shjoca imojtsemna; y canya tmojanichmó cha jachembuama.

³² Chë ba entsanga chentše chabe shëconana imojtsetbíamanëngna, chora tmojaniana: —Acbe mamá, acbe catšátanga y uabëngana shjoca montsemna; aca cmontseguá ca.

³³ Chora cha tojanëjua: —¿Nda atšbe mamá yomna, y ndëmuanyënga atšbe catšátanga ca?

³⁴ Chentšana, chë chabe shëconanana tbiamanëngbioye jarrepárase, tojánayana: —Quemënga mondmëna atšbe mamá y atšbe catšátanga. ³⁵ Er ndánaca, ntšamo Bëngbe Bëtsá yobošcá tojtsamá, jtsemnana atšbe catšata, atšbe uabena y atšbe mamá, atšbe ndegombre pamillanguentšá ca.

4

Chë jenabe cuento

(Mt 13.1-9; Lc 8.4-8)

¹ Chentšana, uafjónaye tsachoca Jesús tojtëtanontšë Bëngbe Bëtsabe soyëngama jabuátambama. Mallajta entšanga tmojanobeconá causa, chë uafjónayentšë yojanamna canÿe barquëshoye Jesús tojánasëngo y tojanótbema; y chë entšanga tsachoca imojtsemna. ² Chora cuentëngaca ba soyëngama tojanabuatambá.

Mëntšá tojanëyana: ³ “Smochjouena; canÿe jená chë jénaye jaujquëshama yojëftsebcna. ⁴ Yojsëjquëshaye orna, básefta jénaye benache juachañe yojuatquécjana; pero jaja shloftšënga imojástjajna y lempe imojtsósañe. ⁵ Inÿe meshëngna ndëtsbenguiñe yojuatquécjana, ndoñe yapa fshantse binÿnentšë. Chiñna betscó yojuábocna, ndoñe yapa jashenocana fshantse yojanmëna causa; ⁶ pero yojuábocna orna, puerte yojojënÿána y yojtsancta; y yojtsábojo yapa tbëtëjënga tondaye causa. ⁷ Inÿe meshëngna uchmëshangañe yojuatquécjana; chë uchmashá yojuájua ora, lempe yojtsatscué, y chca, chë jénayentšana tondaye yonjuashájona. ⁸ Pero inÿe meshëngna, uanguaniñe yojuatquécjana, y bëtscá tšabe shajuanënga chiñe yojóbocna: inÿenache, canÿe meshentšana unga bnëtsana meshënga yojóbocna; inÿenachna, chnënguana bnëtsana meshënga; y inÿenachna patse meshënga ca” —cha tojánayana.

⁹ Y chentšana, Jesús más tojánayana: “Chë jouenama tmojtsobenënga, smochjouena ca.”

Ndáyeca Jesús cuentëngaca yojánabuatambaye

(Mt 13.10-17; Lc 8.9-10)

¹⁰ Chentšana, Jesús canÿa yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bëtsayanama. ¹¹ As Jesús tojanëjua: “Bëngbe Bëtsá tšëngaftanga cmontsinÿanÿná nÿetsca chë mo iytëmcá yomna soyënga chabe amëndayama, pero chë inÿëngbioye ndoñe; chë soyëngama chënga lempe cuentëngaca sentsëtsëtsná. ¹² Chca, masque becá chamotsafšna, ndoñe chamondobená chë Bëngbe Bëtsabe soyënga jinÿama; y masque becá chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

Jesús chë jenabe cuentama tojanabuayená

(Mt 13.18-23; Lc 8.11-15)

¹³ Chentšana, Jesús tojanëyana: “¿Quem cuentama ndoñe tmonjósertase, ntšamo chcace nÿetsca cuentëngama cmochjóserta ca? ¹⁴ Chë jená endmëna chë tšabe noticiëngama abuayiynayá. ¹⁵ Básefta entšanga mondmëna mo chë benache juachañe yojuatquécjana jenaycá. Chëngna Bëngbe Bëtsabiana soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabrá jabétsabuajuanama, chënga chiñe ndoñe chamondëtsošbuáchema.

16 Inye entsanga mondmëna mo chë ndëtsbenguiñe yojuatquécjana jenaycá; chëngna Bëngbe Bëtsabe palabra jouenana y oyejuayënga jtemnana; 17 pero ndoñe nyets tempo chana jocochájuana; y chca, ndoñe bayté Bëngbe Bëtsáftaca ntjëftsemñëngana, ndoñe yapa tmontsašbuaché causa. Inyënga mochantsébuayëña, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. 18 Inyënga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena, 19 pero quem luarentša soyëngaca oyejuayënga jtemnana yapa mochántseboše, y nýe bomnana jëftsebomnana yapa mochanjésenojuabnaye. Chë soyama y inye ba soyëngama yapa enócochinýena causa, Bëngbe Bëtsabe soyëngama echantsebnëtjomba, y ndoñe quemochátama ntšamo Bëngbe Bëtsá tojayancá. 20 Pero ínýenga mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; nyets ainánaca mochántseprontana chiñe jtsošbuáchiyama. Mo canýe betiye becá tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inyënga ínýengbiama más bëtscá soyënga mochanjama; y chca, ínýenga mochántsemna mo chë unga bnëtsana meshe tojanshajo jenaycá, ínýenga mo chë chñënguana bnëtsancá, y ínýengna mo chë patse meshënga tojanboté jenaycá ca” —Jesús tojánayana.

Chë uajuinýanëshama cuento

(Lc 8.16-18)

21 Mëntsánaca Jesús tojánayana: “Ndocná juiyëbana canýe uajuinýanëshaca jonëshaca o jutsnëshaca tajsoye juajájuama. Ndoñe; uajuinýanëshaca juiyëbana tsbanánoca juajájuama, lempe chaotsebínýnana. 22 Ndocna yoiytëmena soye ntjinýencá queochaisoquéda, y chë ndótatšëmbo soye ntsotatšëmbcá queochaisoquéda. 23 Chë jouenama tmojtsobenënga, šmochjouena ca.”

24 Y mëntsánaca Jesús tojanéyana: “Tšabá šmochjájuaboye ntšamo šmojtsuenanama. Nýe batšatema šmojouenëse, nýe batšatema cmochanjósertaye; pero aiñe tšabá šmojouenëse, chama corente cmochanjósertaye; y Bëngbe Bëtsá echanjama tšëngaftanga más soyëngama chacmósertama. 25 Er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama josértama ndoñe tontsebošá, chë nýe batšá ibosertana soyëngama bochántsebnatjëmba ca” —cha tojánayana.

Chë ojuajna jenayama cuento

26 Jesús mëntsánaca tojanéyana: “Bëngbe Bëtsabe amëndayana endmëna mo ntšamo canýe boyabása jénaye tojuatbontsá ora echandbopasacá: 27 masque cha cada ibeta jtsojájuana y bnëté jotsbanama, ibeta o bnëté, chë jénayentsana juabocnana y juájjuana, ntšamo chca yojtsájuajnama chë boyabása ntjatstatšëmbcá. 28 Chë fshantse cachabe ponto jamana ndayánaca chiñe chaójuama; natsana tsbuanachëtëma jóbocnana, chentšana chë espiga, y chentšana chë meshënga jashájonana. 29 Y chë meshënga ya tojtsebóchichna orna, játbanama jabocnana, chë saná josháchiñama ora ya tojobuácheyeca ca” —Jesús tojánayana.

Chë mostaziye jenayama cuento

(Mt 13.31-32; Lc 13.18-19)

³⁰ Jesús mēntśánaca tojanéyana: “¿Ndayacá Bēngbe Bētsabe amēndayana yomna, o ndaye sóyeca nanjopódia chama jábuayenama? ³¹ Endmēna mo canye mostaza jénaye jajoca tcojajecá. Ndegombre, n̄yetsca quem luarentśa jenayēngama, mostaza jénaye chē más bāsetema endmēna; ³² pero tcojajé orna, jójuana, y jajañe chē más bēts betiye jóbemana, ba bēts buacuashēngaca; chíyeca chē jaja shloftśēnga jana y chiñe uaja-jonētemēngá jauábopormana ca.”

Ndáyeca Jesús cuentēngaca entśanga yojanabuayiyná

(Mt 13.34-35)

³³ Chca Jesús Bēngbe Bētsabe soyēngama entśanga yojanabuatambá, ba cuentēnguentśana, mo chē tmonjouena cuentcá, ntsachetśá chē entśanga josértama tmojobenacá. ³⁴ Tondaye yonjanabuatambá ndoñe cuentēngaca ntsemēncá; pero chabe uatsjéndayēngna lempe yojanabuayiyná, cányenga tmojtsemna ora.

Jesús chē bin̄yia y chē bėjaye bonguana yojētsbema

(Mt 8.23-27; Lc 8.22-25)

³⁵ Cach te, yojtseibétatana ora, Jesús chabe uatsjéndayēnga tojanéyana: “Uafjajónaye chenguana cuajna ca.”

³⁶ Chorna, chē entśanga jesabáshejuanēse, chē uatsjéndayēnga Jesús tmojtśanánatseñe, cach yojánenjaquena barquēshañe; y in̄ye entśángnaca in̄ye barquēshangañe tmojanasto. ³⁷ Chentśana, chē uafjajónaye bėjayiñe tśa jabuache bin̄yia yojóshjango; olēshēnga chē barquēsha imojtsētsbotsana, y chē causa chē barquēsha yojóntśa búyeshca jt-sobuajútjiana. ³⁸ Y chēntscuana, barquēsha stētsoica, tsēntśenēshañe Jesús yojtsomañe. Chora chē uatsjéndayēnga tmojtśanfśená y tmojaniyana: — ¡Buatēmbayá! ¿Tondayana cmontsentśamna bēnga chašotsēnatjēmbama ca?

³⁹ As Jesús tojantsbaná, chē bin̄yia tbojanácacana, y chē bēts uafjajónayoye tojánayana: — ¡Natjēmbana cochtsemna! ¡Bonguana ca!

Y cachora chē bin̄yia yojētstēcja, y lempe bonguana yojtsatsmēna. ⁴⁰ Chora chabe uatsjéndayēnga tojanéyana: — ¿Ndáyeca tśa šmojtśauatja? ¿Bēngbe Bētsá tśēngaftanga jujabuáchama yobenama cabá ndoñe šmontsošbuaché ca?

⁴¹ Chama, chēnga puerte auatjanánēnga imojtsemna y mēntśá imojtse-natsētsnaye: “¿Nda quem boyabása yomna? Cha tonjayana y chē bin̄yia y chē bėjaye tmonjoyeuná ca.”

5

Chē Gerasa luaroca bacna bayēja uambayá

(Mt 8.28-34; Lc 8.26-39)

¹ Chentśana, uafjajónaye chenguánoica tmojánashjajna, Geraseno ca uabaina entśangbe luaroye. ² Jesús barquēshoicana tojánastjango, y cachora, chē obanēngbe cuevēshēnguentśana canye entśá, bacna bayējbe juabna uambayá, tojánbocna y tbojanjébengo. ³ Chē boyabásana, obanēngbe cuevēshēnguenache inoyena, y ndocná yonjobena cha jt-sebátsēcana, ni mo cadenējuangaca; ⁴ er ba soye cadenējuangaca y in̄ye soyēngaca cha n̄yetsá tmojanbatsēca, pero cha n̄yetsca soye yojtsátabebe y yojtsenájaca, y ndocná yonjobenaye cha bonguana chaotsemnama. ⁵ N̄yets tempo, bnēté y íbeta, obanēngbe cuevēshēnguenache y tjañenache yojánana yoye, y ndētśbēngaca enotsetśenaye. ⁶ Jesúsbioye

bēnocana tbojáninÿe ora, chábioye tojanótjajo y chabe natsanoica yoshēntsamentshiye; ⁷ y mēntśá yojtsáyebuache: —¿Ndayá átšeftaca cojtseboše, Jesús, celoca Bēngbe Bētsabe Uaquiñá? ¡Bēngbe Bētsabe delante boimpadá, ndoñe šcatjatsetšená ca!

⁸ Chca tbojaniana, er Jesús chábioye tbojaniana: —¡Bacna bayējbe juabna, chábentšana maisebocna ca!

⁹ Chentšana Jesús tbojantjá: —¿Ntšamo cabaina ca?

Y chē bacna bayējēngbe juábnaca cha tbojanjuá: —Atšana Legión ca sēnduabaina, bētsčanga fsēndmēna causa ca.

¹⁰ Y tša Jesús ibojtserruana chē luarentšana ndoñe chaondētēbuacanama. ¹¹ Chentša béconana ba cotsēnga imnajena, batsjoca imnētsošañe; ¹² as chē bacna bayējēnga Jesúsbioye tmojanimpadá: —Chē cotsēngbioye šmichamó, chēngbeñe fchayamashjna ca.

¹³ Y Jesús aiñe tojanalesenciá; as chē bacna bayējēnga chē entśábentšana tmojésanbocana y chē cotsēngbeñe tmojánamashjna. Cachora chē mo uta uaranga cotsēnga batsjocana peñēšējana uafjajónayoye imojtsoshbuetše y yojtsatajo.

¹⁴ Chora, chē cotsēnga anÿenēnga tmojtsanacheta auatjanánēnga, y tmojána chama jacuéntama chē puebloca y chabuenache; y entšanga tmojánabo ntšamo tojanopasacá jinÿama. ¹⁵ Jesús yojtsemnoye chē entšanga tmojánashajna ora, tmojáninÿe chē tempo bacna bayējēnga uambayá, inētsotbemañe, entśayá uichētjoná y chabe nÿets juábnaca. Y chē entšanga chama imojtsēuatjaná. ¹⁶ Chē tmojáninÿēnga imojtse-cuéntaye, ntšamo chē bayējbe juabna uambayáftaca tojanopasama, y chē cotsēngaftaca ntšamo tojanopasámnaca. ¹⁷ Chora chē entšanga tmojanontśé Jesús impadánana chē luarentšana chaotsatoñama.

¹⁸ Jesús chē barquēshoye tojtanasēngo ora, chē tempo bacna bayējbe juabna uambayá tbojanimpadá chabolesenciá cháftaca jama ca. ¹⁹ Pero ndoñe tbonjanlesenciá, sinó mēntśá tbojaniana: “Acbe yebnoye mot-satoñe, acbe pamíllangbioye, y cochjácuntaye ndayá Bēngbe Utabná ácaftaca tojamama, y ntšamo cha ábioye tmojalastemama ca.”

²⁰ Chentšana, chē entśá yojtsatoñe y tojanontśé Decápolis uabaina publēnguenache jacúntana lempe ntšamo Jesús cháftaca tojanmcá; y nÿetsčanga imojtsenjanaye.

Jesús canÿe shembásabioye tbojanshná y Jairēbe bembetēmbioye tboj-tanayená

(Mt 9.18-26; Lc 8.40-56)

²¹ Chentšana, Jesús cachiñe chē uafjajónaye chenguana tojesaná barquēshañe. Chocna ba entšanga tmojanobuashconá, y Jesús chē uafjajónaye tsachañe yojtsemna. ²² Chorna, tojánashjango chē judiēngbe enefjuana yebnentša canÿe mandayá, Jairo ca uabainá. Jesúsbioye tbojáninÿe ora, chábentše tojanoshēntsamentśé, ²³ y tša ibojtseimpadana, mēntśá: —Atšbe bembetema ya echantsóbana; Diosmanda mabo, acbe cucuatšēnga chábeñe cochjajájua, salud chauatinÿenama y cháuatayenama ca.

²⁴ As Jesús cháftaca tojána; pero bētsčá entšanga imojtsēstona, chábioye imojtsenatsēntšenaye. ²⁵ Chē entšanguentše yojtsaye canÿe shembása šocá; cha ya bnētsana uta uata oboftjajuanánaca inapadecena. ²⁶ Cha puerte tojansufri, ba ashnayēngbe cucuatšīne, y lempe ntsachetśá in-abomncá tojanpochocá jenóshnama; pero ndoñe ibontsatstēcacjana, nÿe

más peor ibojtsobiamnaye. ²⁷ Chë shembása vojouena ntšamo Jesús ba šoquënga tojánashnama, y as stëtšoicana entšangbe tsëntsajana vojobeconá, y Jesúsbe entšayá vojauábojajo. ²⁸ Cha chca tojanma, er yojtsejuabnaye: “Masque nÿe mo chabe entšayá sibiájua chaijuábojajo, y salud chantsatsbomna ca.” ²⁹ Y cachora chë oboftjajuana ibojtsobojuána; y chabe cuerpiñe ibojebiónana ya tšabá yojsatsmënama. ³⁰ Chora Jesús yojaséntia chábensana obenana yojóbocnama, mo ndábioye tbojashná orcá; as cha tojanobuértana entšángbeñe y tojanatjá: —¿Nda atšbe entšayá tojuabojajo ca?

³¹ Chabe uatsjëndayënga tmojanjúá: —Aca contsonyá chë entšanga cmontsatsëntšená, y cabá cochjátsnoticiaye nda entšayá tojuabojajo ca.

³² Pero Jesús cátoye yojtserreparana jinÿama nda tbojánbojajuama. ³³ As chë shembása, chë ntšamo cháftaca yojopásama jtsetatšëmbëse, tojanobeconá ngmëmnyá y auatjananá, chabe natsanoica tojanoshëntsamentšé, y lempe ntšamo ndegombre cháftaca tojanopasacá Jesúsbioye tbojanianyana. ³⁴ Chora Jesús tbojanianyana: —Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

³⁵ Jesús cabá yojsóyebuambnantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojanianyana: —Acbe bembe tontsóbana; ¿ndayama más Buatëmbayá chama cochjátebëyaboma ca?

³⁶ Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojanianyana: —Ndoñe matauatjana. Nÿe Bëngbe Bëtsábeñe cochtsošbuáchiye cha tšabá chaotsatsmënama ca.

³⁷ Y Jesús ndoñe tonjanalesenciá Jairëbe yebnoye banga chamuastama; nÿe Pedro, Santiago y Juan, Santiagbe uabentsana, aïñe. ³⁸ Chentšana, chë mandayabe yebnoye tmojánashjajna ora, Jesús tojánanÿe entšanga tša imojtsenbouenana, entšanga imojtsošachiye y puerte ngménaca imojtseyoye. ³⁹ As chë yebnoye tojánamashëngo y chë entšanga tojanéyana: “¿Ndayama tša šmojtsenbouenana y tša šmojtšendëntjana? Chë shembásetema ndoñe chenatóbana, nÿe endëtsomañe ca.”

⁴⁰ Pero entšanga nÿe imojtsáfchaye. As Jesús nÿetsca entšanga shjoye tojtanëbuacna, y tojéftsanëbiatše chë basetembe bëtsëtsata y chabe enutënga; y chë shembásetema yojtsemnoye tojánamashëngo. ⁴¹ Chora Jesús tbojanábuacueshache y cachëngbe biyañe tbojanianyana: “Talita, cum ca.” (Chca endayana “Shembásetema, matëtsbaná ca”.)

⁴² Cachora, chë bnëtsana uta uata bomna shembásetema tojtantsbaná y yojsobena jama. Y chë entšanga chama imojtsenjanaye. ⁴³ Pero Jesús corente tojanamëndá ndocnábeñe chama ntsecuëntayana ca, y tojanamëndá chë bássetema saná chamuiyé chaosama.

6

Jesús Nazaret puebloca (Mt 13.53-58; Lc 4.16-30)

¹ Chentšana Jesús tojéftsanbocna y cachabe luaroye tojtanashjango, y chabe uatsjëndayënga cháftaca tmojána. ² Ochnayté tojanobuache ora, Jesús tojanontsé chë judiëngbe enefjuana yebnentše entšanga jabuatambana.

Chë ba entsanga cha jóyebuambayama tmojanuenënga, imojenjnaná y tmojánayana: “¿Ndémoca quem boyabása lempe chca tojuatsjinýe? ¿Ndaye osertánana mua tmojatsetá, y ntšámoyeca cha yojtsobena chca bëts soyënga jtsamana ca? ³ ¿Mua ndoñe chë calpintero yondmëna, Mariybe uaquiñá, y chabe catsátanga ndoñe mondmëna Santiago, José, Judas y Simón; y chabe uabënanagnaca muentše ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana. ⁴ As Jesús tojanéyana: “Nýetsca luarënguenache canýe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentše, ni cachabe pamillangbenache, ni cachabe yebnentše ca.”

⁵ Chë entsanga chentše chábeñe ndoñe montsanošbuaché causa, Jesús ndoñe tonjanobená ni canýe bëts soye Bëngbe Bëtsabe obenánaca chentše jëftsemana; nýe básefta šoquëngbeñe cucuatšënga tojanajó y tojanashná. ⁶ Jesús ojnananá yojtsemna cachábentša entsanga chábeñe ndoñe montsanošbuaché causa.

Jesús, chabe uatsjédayënga tojanichamó Bëngbe Bëtsabe amëndayama jábuayenama

(Mt 10.5-15; Lc 9.1-6)

Chentšana, chë chaboye base pueblënguenache Jesús yojánana, Bëngbe Bëtsabe soyëngama abuátambaye. ⁷ Y chë bnëtsana uta uatsjédayënga Jesús tojánachembo, y utáta ínýoye tojanichamó, entsángbentšana bacna bayëjënga jtëbuacnama obenana jatšatayëse; ⁸ y mëntšá yojáuyana: “Benachiñama tondaye šmattsambaye, nýe canýe jatjonëfja; ndoñe šmattsambaye saná, ni shecnaja, ni crocénana uasnanëchiñe. ⁹ Nduámanëshe šmochjesóshecohëtjo, y nýe canýájua šmochjesíchëtjo ca.”

¹⁰ Mëntšánaca tojanéyana: “Posada chacmojúyentšame yebnentše šmochtsoquedañe inýe puebloye játantscuana. ¹¹ Canýe luaroye chašmojáshjajna y ndocná posada chacmonjuyentšame, y joyeunayama ndoñe chamontsebošëse, chentšana šmochjësebocana, y shecuatšentša polvëshe šmochjësenstoto, chca, chëngbioye jinýanýiyama chënga ndoñe tšabá tšëngaftangaftaca tmonjamama ca.”

¹² Chentšana, chë uatsjédayënga tmojëftsanbocana y entsanga imojánabuayiynaye, chë tšabe benache chámuatishachama, bacna soyënga amana jtsajbanase. ¹³ Entšángbentšana ba bacna bayëjënga tmojtanébuacna, y ba šoquënga aceitíyeca tmojananëttoj y tmojanashná.

Ntšamo Juan chë Ubayaná tojanóbana

(Mt 14.1-12; Lc 9.7-9)

¹⁴ Rey Herodes Jesusbiamá yojátatšëmbona, er nýetsquénache nýetsca entsanga chabiamá imojtsóyebuambnaye. Entšanga Jesusbiamá imojtsichamo: “Juan chë Ubayaná obanënguentsana tojtayena, chíyeca cha chca obenana yojtsebonna ca.”

¹⁵ Inýengna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y inýengna: “Muana canýa Bëngbe Bëtsabe juabna oyebuambnayá, mo chë tempsquëngcá ca.”

¹⁶ Heródesna ntšamo entsanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentsana tojtayena ca.”

¹⁷ Juan cabá ainá ora, Herodes tojanmandá cha chamishache, cadenéjuangaca chamobátsēca y chca cárceloye jutámíama. Herodes chca tojanma Herodíasbe causa, chabe uabentsá Felípbe shema. Herodes chë shémaftaca tojanobouamá, Felipe cabá ainá ora. ¹⁸ Y chama, Heródesbioye Juan ibojánbuayiyenaye: “Ndoñe quenátslesenciana acbe uabentsabe shema acbe shema chaotsemnana ca.”

¹⁹ Chë causa, Herodías Juánbioye puerte ibojuáya, y yojánboše jtsóbama; pero ndoñe yontsobena, ²⁰ er Herodes yojántatsēmo, Juan canye nyetsca soyēnguiñe tšabá amá, nye Bēngbe Bētsábioye sempre oservená inamnama. Chama cha yojánauatja y ndoñe yonjanalesēncia cha chamóbama. Y Juan Bēngbe Bētsabe soyēngama Heródesbioye tbojtsebuayiyená ora, ntšamo jajuaboyana ndoñe yontsetátšēmo, pero masque chca, oyejuayá Juánbioye ibnayeunana. ²¹ Pero Herodías tojáninyēna mocna ora Juan chamóbama. Heródesbe cumpleañ oboyejuaye ora, bētsca saná tmojanprontá, y Herodes yojúbuaja chabe amēndayēnga, soldadēngbe amēndayēnga y Galileoca uámana entšanga. ²² Chora, chë oboyejuaye luaroye Herodíasbe bembe tojánamashēngo, tojanlantsá, y Herodes y nyetsca ófanēnga chama tša imojtsóyejuaye. As chë rey, chë tobiášbioye tbojaniyana: —Ndayánaca šmotjañe y atše cbochjátšetaye ca.

²³ Y jajúrase, mēntšá tbojanšbuachená: —Ntšamo chašcojotjañcá cbochjátšetaye, masque atšbe amēndayentša bomnantšana tsēntsañnaca ca.

²⁴ Chentšana, chë tobiáše yojéftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojuá: —Juan chë Ubayanabe bestšaše ca.

²⁵ Cachora chë tobiáše betscó chë rey yojtsemnoye tojtanamáshēngo, y tbojaniyana: —Atše sēntseboše, cam ora Juan chë Ubayanabe bestšaše canye šcnenēsiñe chašcuatšetá ca.

²⁶ Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojaniyancá jebēbuetámenana. ²⁷ Cachora chë rey canye soldado ibojíchmua, Juanbe bestšaše chauiyēbama. ²⁸ As chë soldado cárceloye tojána, Juánbioye bestšaše tbojtsanéstjango, y canye šcnenēsiñe tojanamba. Chë tobiášbioye tbojanēntšabuaché, y chana, chabe mamábioye.

²⁹ Juanbe ústonēnga chama imojátatsēmbona ora, choye tmojánashhajna, chabe cuerpo tmojésanocñe y jauátbontsama tmojána.

*Jesús shachna uaranga boyabásenga saná tojanacaredadó
(Mt 14.13-21; Lc 9.10-17; Jn 6.1-14)*

³⁰ Chë Jesús tojánichamonga chábioye tmojtashhajna ora, lempe ntšamo tmojanmama y tmojanabuatambama cha tmojancuentá. ³¹ Chora Jesús tojanéyana: “Cuajna ínñoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabēbana; ni mo jasama ndoñe luare imontsebozna.

³² As cánñenga barquēshañe tmojtsanoñe, entšanga ndēbínñoye. ³³ Pero chēnga imojtsoñama entšanga tmojánanyē, y ndēmuanñyēnga imojamnama imojtsetátšēmo; chcasna, chë entšanga shecuátšēca betscó tmojána, nyetsca pueblēnguentšana, y chēngbe natsana choye tmojánashhajna. ³⁴ Chentšana, chë barquēshoicana tojánastjango ora, Jesús ba entšanga tojánanyē; chēngbiama tbojanongmé, er imojtsemna

mo abuañenya ndbomna oveshëngcá; y tojanontsé ba soyëngama jabuátambana.

³⁵ Ya jetiñe yojtsemna orna, chabe uatsjëndayënga tmojanobobconá y tmojaniana: —Ya jetiñe entsemna, y quem luariñe ndocná quenatiyena. ³⁶ Entsanga cuantichamuá, pueblotëmëngoye y inye luarëngoye chamotsoñama, ndayánaca jasama chamobuámiñama ca.

³⁷ Y Jesús tojanëyana: —Tšëngaftanga saná chëngbioye šmochjacaredádaye ca.

Chora chënga tmojaniana: —Crocénana queftsátsbomna, uta patse denario nÿetsá, chëfta entsangbiama saná jabuámiyama ca.

³⁸ As Jesús tojanëyana: —¿Bueta tandëse šmojtsebomna? Marrepárange ca.

Ya imojtsetátšëmbo ora, tmojaniana: —Shachna tandëse y uta beónata fsëntsebomna ca.

³⁹ Chora Jesús entsanga tojanamëndá ínÿoca ínÿoca chamoshëntsjatbiamama. ⁴⁰ As chënga tmojanotbiama patse patsënga y shachna bnëtsátsanënga. ⁴¹ Chora Jesús chë shachna tandëse y chë uta beónata tojanca, y celoye jontješiyëse, Bëngbe Bëtsábioye chama tbojtanchuá. Chentsana chë tandëšënga tojanjatá y chabe uatsjëndayënga tojanayentšbuaché chë entsanga jatšatayama. Y chë uta beónatnaca nÿetscanga tojanëjátaye. ⁴² Nÿetscanga tmojanse jtoshachaye nÿetsá. ⁴³ Y chentsana, chë tandëse y chë beonentsana ojamnëtëmënga tmojanatbaná, y bnëtsana uta sbarëcua tmojanajutjé. ⁴⁴ Chë saná tmojansënga imojamna shachna uaranga boyabásenga, shembásenga y básenga ntjacuntacá.

*Jesús béjaye juatsbuacá yojtsaye
(Mt 14.22-27; Jn 6.16-21)*

⁴⁵ Chentsana, Jesús chabe uatsjëndayënga tojanamëndá chë barquëshoye jtašnjama, chë uafjajónaye chenguana jangana y chabe natsana Betsaida ca uabaina puebloca jashjajnana. Chënga imojtsebocanëntscuana, Jesús chë entsanga yojtichamuá. ⁴⁶ Nÿetscanga tojtandiošoftá ora, tjoye cha tojtsanoñe Bëngbe Bëtsáftaca jencuëntama.

⁴⁷ Yojtseibétatana ora, chë barquëshu uafjajónaye tsëntsaca yojtsamna, y Jesús, canya fshantoca. ⁴⁸ Jesús tojáninÿe chëngbiama totcá yojtsemna, chë barquëshaca natsanoye jtsayana, er binÿia chëngbe contra yojtsemna. Ya binÿana ora, chëngbioye yojobeconá, béjaye juatsbuacá yojtsaye, y ya chëngbiajana nÿe ndericho jachnënguama yojtsemna. ⁴⁹ Y chënga, chë béjaye juatsbuacá cha yojtsayama tmojáninÿe ora, tmojanjubó cha canÿe añemëse yojtsemna ca, y tmojanontsé yoyana; ⁵⁰ er nÿetscanga chca tmojáninÿe y cochauatjanánënga imojtsemna. Pero Jesús cachora tojanëyana: “¡Añemo šmochtsebomna; atse Jesús sëndmëna; ndoñe matauatjëngana ca!”

⁵¹ Chorna, chënga imojtsemna barquëshoye cha tojánasëngo, y chë jabuache binÿia tojanëjbana, y nÿetscanga puerte auatjanánënga y ojanánënga imojtsemna. ⁵² Chënga tmojáninÿe chëfta entsanga tandëse jujátayana, pero chëngbe ainanoca cabá ndoñe imontsobena josértana, Jesús lempe jamama obená bëtsemnama.

*Genesaret ca uabáinoca Jesús ba šoquënga tojanashná
(Mt 14.34-36)*

⁵³ Chê uafjajónaye tmojánenashbuachengo ora, Genesaret ca uabaina luaroye tmojánashjajna, y chê uafjajónaye tsachoca chê barquêsha tmojanêtsbua. ⁵⁴ Chê barquêshoicana tmojánastjajna y cachora entsanga Jesús tmojantêmbá. ⁵⁵ Chíyeca, chê luariñe yebnênguénache betesco chênga tmojána, y tmojanontsé chê shoquênga tjuashênguifñe juyambana, chê ndémoye tmojanuena Jesús yojtsemna luaroye. ⁵⁶ Y ndayentse cha tojámashêngüentse, pueblênguifñe, bêts pueblênguifñe y base pueblotémênguifñnaca, chê shoquênga benachoye imojtsêbuacana, y Jesús corente imojtseimpadana chê shoquênga chaualesenciá, nÿe mo chabe entšayá sibuájua juabojajuana. Y nÿetscanga tmojuábojajênga tšabá imojtsatsmêna.

7

Ndáyeca canÿe entsá Bêngbe Bêtsabe delante ndoñe tšabia nántsemna (Mt 15.1-20)

¹ Chentšana, fariseunga Jesúsbioye tmojanobeconá y báseftanga ley abuátambayêgnaca, Jerusalenocana áshjajnênga. ² Chênga tmojáninÿe básefta Jesusbe uatsjêndayênga, cabá ndase ora, ndoñe montsacuentšabiá ntšamo chê judiênga imojanamancá. ³ Er chê fariseunga y nÿetsca judiênga imojanamana jtsacuéntšabiana ba soye, ndayá jasama ora, ntšamo chêngbe bêts taitanga imojanamancá. Chênga imojanjuabná, chca jtsamêse Bêngbe Bêtsabe delante tšábenga jtsatsmênama ca. ⁴ Chê sananga enocana tmojtashjango ora, ba soye ndoñe tmontsácuentšabese, tondaye ntjasana; y ba soyêgnaca imojánama, pero nÿe chêngbe bêts taitanga chca jamana imojanamánayeca, mo chê béjayeca juabáyana tazêšênga, matbajênga, calderêshênga y jutsnêshangá. ⁵ Chê causa, chê fariseunga y chê ley abuátambayênga Jesús tmojantjá: —¿Ndáyeca acbe uatsjêndayênga ndoñe montsama ntšamo bêngbe bêts taitanga monjanamancá, y montsesá ntsacuéntšabiase, ndoñe ntšamo bênga judiênga fsênduamancá, Bêngbe Bêtsabe delante tšabá jtsatsmênama ca?

⁶ Chora Jesús tojanéyana: —Nÿe tšabá chê Bêngbe Bêtsabe juabna oyebuambnyá Isaías tšêngaftangbiana tojánayana, bacna entsanga chê ntšamo ndegombre šmojuabnacá ndinÿinÿnayênga ca, mênšá enduabemanentse:

Quem entsanga mondbétsichamo Bêngbe Bêtsá tša tšabia yomna ca; chca nÿe uayásaca,
pero chêngbe ainanentse ndocna tšabe juabnêngaca.

⁷ Pero chênga nÿe bonamente mondbétsichamo Bêngbe Bêtsá tša tšabia yomna ca;

chênga nÿe entsangbe mandênga jtsabuátambayana, y Bêngbe Bêtsabe mandênga ndoñe ca —cha tojánayana.

⁸ Chora Jesús tojanéyana: —Ntšamo Bêngbe Bêtsá tojanmandacá stêtsoye tšêngaftanga šmojtsequedá, nÿe ntšamo entsanga monduamancá jtsamama ca.

⁹ Y mênšánaca tojanéyana: “Tšêngaftanga ntšamo Bêngbe Bêtsá tojanmandacá stêtsoye jtsequédana, nÿe ntšamo tšêngaftangbe anteunga imojanamancá jtsamama. Tšêngaftanga jtsejuabnayana tšabá šmojtsama ca chca šmojtsama ora. ¹⁰ Moisés tonjánayana: ‘Acbe bêtsétsata ndoñe stêtsoye catjáquedaye’, y ‘nda chabe bêtsétsatbiana ndoñe tšabá tonjoyebuambá chana, jóbanama jtsemnana ca.’ ¹¹ Pero tšêngaftanga šmondbétsichamo, canÿe entsá yobena chabe taitá o chabe mamá

jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiana uátšëmbona soyënga ca”).¹² Tšëngaftanga šmondbétsichamo, nda chca tojayanëse, ya ndoñe obligacionaca ntsemnana chabe taitá o mamabiana ndayánaca jamana ca.¹³ Chca, tšëngaftanga šmontsama entšanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entšángbeñe tempšana y mëntscoñama yochnějuancá. Y ba soyënga tšëngaftanga cachá šmontsama ca” —Jesús tojánayana.

¹⁴ Chora Jesús, cachiñe entšanga tojtanachembo y tojanéyana: “Nÿetscanga šmochjouena y chacmësertá.¹⁵ Ndayá entšá tojtšesacá, ndoñe ntjábemana ndoñe tšabia Bëngbe Bëtsabe delante. Inÿetsá comna: ntšamo entšá tojtsejuabná y tojtsoyebuambnacá endobena jabemana ndoñe tšabia Bëngbe Bëtsabe delante.¹⁶ Chë jouenama tmojtsoebenënga, šmochjouena ca” —cha tojánayana.

¹⁷ Jesús entšanga tojëftsananabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama.¹⁸ As cha tojanéyana: “¿Tšëngaftángnaca cabá ndoñe cmontsësertana ca? ¿Cabá ndoñe cmontsësertana, lempe ntšamo entšá tojascá ndoñe ntsoberenana chábioye jabemana ndoñe tšabia Bëngbe Bëtsabe delante; ¹⁹ er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nÿetsca sananga tšabá jasama yomna ca y chë saná ndoñe ntjamana canÿe entšá bacna soye chaotsamama ca.²⁰ Y mëntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabemana ndoñe tšabia Bëngbe Bëtsabe delante.²¹ Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama,²² bacna juabnënga boyá o shëmbioye ínÿaftaca jáingñama, jtsatbomnayama, nÿetsca bacna soyënga jamama, ínÿenga jáingñama, nÿe cachá jenomándama ntsoberencá jtsiyenama, ínÿabioye jtsántšabošama, ínÿabiana jtsayátsenayama, jtsenábotamnayama y nÿe opënga jtsobiamnayama.²³ Nÿetsca quem bacna soyënga entšabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

Canÿe shembása inÿe luarocana ashjanganá Jesúsbeñe yojtsošbuaché (Mt 15.21-28)

²⁴ Jesús chentšana, Tiro ca uabaina luaroye tojtsanoñe, y canÿe yebnentše tojánamashëngo. Cha yojtseboše ndocná chama chaondëtsetatšëmbuama; pero ndoñe yonjobenaye iytëmenana jatsmëñana.²⁵ Y betesco, canÿe shembása, canÿe bembe bacna bayëjbe juabna uambayá ibnabomná, Jesusbiana oyebuambnayana yojouena ora, chábioye tojánabo y chabe shecuatšentše tojanoshëntsamentšë.²⁶ Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuátábocnama.²⁷ Pero Jesús tbojanayana: —Atše šondmëna natsana judío entšangbiana chë soyënga jamana; chentšana cocayé chanjobenaye chca inÿe entšangbiana jamana. Atše achiana, canÿe

ndoñe judiá, soyënga stjamëse, nántsemna mo chë básengbe saná quešënga cuaftsëbuajocá ca.

²⁸ Y cha tbojanjuá: —Arseñor, chca jtsemnana. Pero chë quešëgnaca mondbase chë básenga tmojtsesá ora tmojatquëcjanatemënga. Chcasna, Diosmanda átsnaca šmotsajabuache ca.

²⁹ As Jesús tbojaniana: —Tšabá tcjayana; chcasna, acbe yebnoye motsatoñe. Chë bacna bayëja acbe bembetëmbentšana tonjësebocna ca.

³⁰ Chentšana, chë shembása chabe yebnoye tojtaná, y tbojáninÿena chë bembetema jutsnëshentše yojtsojájõe, y chë bacna bayëja ya ndoñe chábeñe yontsemna.

Jesús, canÿe boyabása tësmá y ndëbiábioye tbojanshná

³¹ Tiro pueblentšana Jesús tojëftsanbocna, y Sidón y Decápolis luar-entša pueblënguëjana jachnënguse, Galilea uafjájónayoye tojánashjango.

³² Cha chentše yojtsemna ora, chábioye tmojanánatse canÿe entšá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama. ³³ Chorna Jesús entšángbentšana luaroye tbojanánatse, cánÿata. Chora chë šocabe matscuašoye ntšabuafjënga yojajué, cucuatšinë yojabuashëtjo, y chë šocabe bichtaja yojábojajo. ³⁴ Chentšana, Jesús celoye tojanontješé, jabuache yojáshachna, y hebreo palabriñe tbojaniana: “¡Efa ca!” (Chca endayana “¡Chacmotsauenana ca!”)

³⁵ Cachora, chë boyabásabe matscuaše tšabá yojtsatsmëna y tšabá yojtsuenana; chë bichtaja tšabá yojtóbema y tšabá yojtsóyebuambnaye.

³⁶ Y Jesús chë entsanga tojanamëndá chama ndocnábeñe ntsecuëntayana. Pero masque tša chama yojtsamëndaye, entsanga más chabiamama imojtsencuëntaye. ³⁷ Chama chë entsanga puerte imojtsenjanayey, y mëntšá imojtsichamo: “¡Lempe tšabá entsama! Chë tësmënga chamouenama, y chë ndëbianga chamóyebuambama entsama ca.”

8

Jesús canta uaranga entsanga saná tojanacaredadó

(Mt 15.32-39)

¹ Chë tempo, ba entsanga Jesúsbioye cachiñe tmojanobeconá, y jasama tondaye imontsebmna. As Jesús chabe uatsjëndayënga tojánachembo y tojanëyana: ² —Quem entsangbiamama šontsengmena, er ya unga te átšeftaca montsemna y mora jasama tondaye quemátsbmna.

³ Cachëngbe yebnoye tondaye ntjascá stichamuase, shëntsama benachëjana nantsabuatëcja; y báseftanga bën luarocana tmojabo ca.

⁴ As chabe uatsjëndayënga tmojaniana: —¿Ntšamo nda nanjobenaye quem luarentše, ndocna entšá ndoyenentše, chëfta entsangbiamama saná jinÿenama ca?

⁵ Chora cha tojanatjá: —¿Bueta tandëše šmojtsebmna ca?

Y chënga tmojanjuá: —Canÿsëftaše ca.

⁶ Chentšana, Jesús tojanamëndá entsanga chamoshëntsjatbiamama. Chorna, chë canÿsëfta tandëše tojanca y Bëngbe Bëtsábioye chama tbojtanchuá. Chentšana tojanjatá, chabe uatsjëndayënga tojanëjatá, y chëngna chë entsángbioye. ⁷ Básefta beonatëmëngnaca imnabomna; as Jesús, Bëngbe Bëtsábioye chama tbojtanchuá y chabe uatsjëndayënga tojanamëndá entsanga jujátayama. ⁸ Nÿetscanga tmojanse jtoshachaye nÿetšá. Chentšana cabá canÿsëfta bëts sbarëcua tmojanajutjé chë

ojamnētéməngaca. ⁹ Chë tmojansənga imojamna mo canta uaranga n̄yetsá. Chentšana Jesús chë entsanga tojtanadiošoftá. ¹⁰ Chora Jesús barquəshañe tojánenojajiye chabe uatsjəndayəngaftaca, y tmojtsanoñe Dalmanuta ca uabaina luaroye.

Chë fariseunga tmojánbošena, Jesús chaoma can̄ye b̄ets soye, chabe ndegombre obenana jin̄yama

(Mt 16.1-4; Lc 12.54-56)

¹¹ Chentšana, fariseunga tmojánabo y tmojanontsé Jesúseftaca enatsətsnayana. Y jisháchichiyama, imojtseimpadana can̄ye b̄ets soye chaoma, as jtsetatšəmbuama Jesusbe obenana Bəngbe B̄etsábíocana ndegombre tainóbocanama. ¹² Y Jesús ngménaca, jabuache yojáshachnəse, mēntšá tojánayana: “¿Ndáyeca tšəngaftanga, chë mora oyenənga, šmojtseboše can̄ye b̄ets soye chaimama tšəngaftanga atšbe obenana jin̄yan̄iyama ca? Ndegombre cb̄eyana, quem entsanga ndocna chca soye quemochátin̄ye ca.”

¹³ Chorna chë entsanga cachcá tojesan̄ənyá, chë barquəshoye yojtamáshəngo, y uafjajónaye chenguana yojtsoñe.

Jesús tojanabuayená fariseungbe buatəmbana soyəngama

(Mt 16.5-12)

¹⁴ Chë uatsjəndayənga yojésebn̄əjtomba ndaye soye jasama jesocñama, y chë barquəshoye n̄ye can̄ye tanděse imojtsebomna. ¹⁵ Jesús tojanəyana: —Smochtsantjəšna; cuedado šmochtsebomna fariseunga y Heródesbe levadurama ca.

¹⁶ Chora chë uatsjəndayənga tmojanontsé enatsətsnayana: —Chca entsichamo, bənga tanděse ndoñe tmonjesocñama ca.

¹⁷ Jesús yojtsetátšəmbo, chabe uatsjəndayənga imojtsejuabnaye chana tanděsama yojtsətsətsnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyənga jtsaməse imojoyenama. Chcasna, mēntšá tojanəyana: —¿Ndáyeca tanděsama šmojtsoyebuambná? ¿Cabá ndoñe cmontsəsertana, ni šmontsetátšəmbo? ¿Ainanoca ndoñe šmontseboše chacməsertama?

¹⁸ Bomin̄ye šmondobomna, pero ndoñe quešmátobena jin̄yana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. ¹⁹ Chë shachna uaranga entsanga shachna tanděsentšana sənjanəjatá chentšana, ¿bueta sbarəcua chë ojamnētéməngaca šmənjanajut̄jé ca? —cha tojanatjá.

Y chənga tmojanjuá: —Bn̄etsana utácua ca.

²⁰ —Y chë can̄ysəfta tanděsentšana canta uaranga entsanga sənjanəjatá chentšana, ¿bueta b̄ets sbarəcua chë ojamnētéməngaca šmənjanajut̄jé ca?

Y chənga tmojanjuá: —Can̄ysəftácua ca.

²¹ As Jesús tojanəyana: —¿Y cabá ndoñe cmontsəsertana ca?

Jesús can̄ye jtanábíoye tbojanshná, Betsaida puebloca

²² Chentšana tmojánashajna Betsaida puebloca; y chora, entsanga can̄ye boyabása jtaná Jesúsbíoye tmojanánatse, y tmojanimpadá cha jabojajuana chabotseshnama. ²³ As, chë jtanábíoye tbojanábuacueshache, y chë pueblo chaboye tbojanánatse. Chorna, yebuáyeca ibojabuchan̄ətjo, y chábeñe cucuatšənga yojajájua, y tbojantjá nderado ndayá jin̄yama tayojtsanobena ca. ²⁴ As chë jtaná yojontjəšiye y tojánayana: —Boyabásenga sentsən̄ya; mo betiyəngcá montsemna, pero montsobonjná ca.

²⁵ Chora Jesús, chë jtanabe fšněbeñe cachiñe cucuatšënga yojajájua. Y chë boyabása yojtsobena lempe tšabá jinŷama; ya shnaná yojtoquéda. Y yojtsobena nŷetsca soyënga botamana jinŷana. ²⁶ Chentšana, Jesús cachabe yebnoye tbojtanichmó y mēntšá tbojaniyana: —Chë puebloye ndoñe catjēftsamashëngo ca.

Pedro tojánayana, Jesús chë Cristo bétsemnama
(Mt 16.13-20; Lc 9.18-21)

²⁷ Chentšana, Jesús tojánbocna chabe uatsjéndayëngaftaca Cesarea de Filipino luaroca pueblëngoye, y benachiñe chabe uatsjéndayënga tojanatjá: —¿Nda atše bétsemnama ca entšanga imojtsichamo ca?

²⁸ Y chënga tmojaniyana: —Inŷenga montsichamo Juan chë Ubayaná ca, ínŷengna Elías ca, y ínŷengna, canŷe Bëngbe Bëtsabe juabna oyebuambnaya ca.

²⁹ As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna chë Cristo condmēna, chë Bëngbe Bëtsabe Uámana Uabuayaná ca.

³⁰ Chentšana Jesús corente chënga tojanamëndá, chë nda cha yojamnama ndocnábeñe ntsecuëntayana.

Jesús tojánayana cha ibojamna jóbanana y jtsayenana ca
(Mt 16.21-28; Lc 9.22-27)

³¹ Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entšá tbojanbemá, ibojamna puerte jasúfriana ca; chë judiëngbeñe bëtšëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca. ³² Nŷetscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. ³³ Pero Jesús yojbuértana, chabe uatsjéndayënga tojanëñyanŷé, y Pédrëbioye mēntšá tbojtsanbochembo: “¡Satanás, átsbentšana mojuaná! Pedro, acbe juabnënga Bëngbe Bëtsábocana ndoñe quenatóbocana, sinó nŷe entšángbentšana ca.”

³⁴ Chentšana, Jesús chabe uatsjéndayënga y chë inŷe entšanga tojánachembo chamouenama, y tojanëyana: “Nda atšbe uatsjendayá jtsemnama tojtseboše, cháuyana nŷe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonŷá atše juastama, y atšbiama jasúfriama chaotseprontana y cruciñe jobanámna. ³⁵ Nda tojtsama quem luarentše bëtscá soyënga jtsebomnama y atšbiama jasúfriama ndoñe tontseprontana, chë nŷetsca tescama yomna tšabe vida echanjopérda. Pero nda quem luarentša soyënga cachcá tojēftsonŷá atše juastama, y chë tšabe noticiënga atšbiama abuátambaye causa, masque chaóbana, chë nŷetsca tescama yomna tšabe vida echántsebomna. ³⁶ ¿Ndayama entšá buanjosérvia nŷetsca quem luarentša soyënga jtsebomnana, chë nŷetsca tescama yomna tšabe vida tojtsoperdese? ³⁷ Er canŷe entšá chë nŷetsca tescama yomna tšabe vida tojtsoperdese, ndocna soye quenátsmēna cha chaobená joyiyama, chë nŷetsca tescama yomna tšabe vida jtsebomnama. ³⁸ Chcasna, nda mora atšbiama y atšbe buayenana soyëngama tojtsëuatja entšángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe

Bëtsá Entsó tbojanbemánaca chabiama echantsëuatja, chabe Taitabe bëts obenánaca y chabe angelëngaftaca chaojésabo ora ca” —cha tojanëyana.

9

¹ Mëntšánaca Jesús tojanëyana: “Ndegombre cbëyana, báseftanga muentše montsemnënga ndoñe quemochatóbana, Bëngbe Bëtsá entsángbeñe chabe obenánaca jabomándama jabana ntjéftsinyá ca.”

Jesús inyetsá tojanobinyá

(Mt 17.1-13; Lc 9.28-36)

² Chentšana chñënguana tianoye, Jesús tojéftsanëbiatše Pedro, Santiago y Juan, y ínÿoye tojanënatse nÿe chënga, canÿe bëts tjoye. Y chëngbe delante Jesús inyetsá tojanobinyá; ³ chabe uichëtjonëjuangá tša yojtsabuashinyäyana; corente uafjantsëjuangá yojtsamna; nÿa chca juafjantsama ndocná quem luarentše quentatobenaye. ⁴ Chca orna, chë uatsjëndayënga tmojáninye, Moisés y Elías tbojanobinyá Jesúseftaca encuëntaye.

⁵ Chora Pedro, Jesúsbiyoe tbojaninyana: “¡Buatëmbayá, tša tšabá bëngbiana cuanmëna muentše jtsemnana ca! Mora fchanjapórma unga tambotëmënga: cánÿetema acbiama, ínÿetema Moisesbiana y ínÿetema Elíasbiana ca.”

⁶ Chca tojánayana, chë uatsjëndayënga yapa auatjanánënga imojtsemna causa, y Pedro ndoñe yontsetátsëmbo ntšamo jayanana. ⁷ Chora canÿe jantšetëshe yojóbema, y chëngbiyoe yojáutsbotse; y chë jantšetëshoicana canÿe oyebuambnayana tojanóbocna, mëntšá: “Mua atšbe bonshana Uaquiña endmëna; cha šmochtseyeunana ca.”

⁸ Y ndeolpe, chëngbe shëconana tmojanrrepará ora, ya ndocná más tmojáninye; nÿe Jesús canÿa chëngaftaca yojtsemna.

⁹ Chë tjocana imojtsatstsmaye ora, Jesús chë uatsjëndayënga tojanamëndá: —Bëngbe Bëtsá Entsó tbojanbemá obanënguentshana candëtayenëntscuana, chë mënté tjoca šmonjinÿe soyama ndocnábeñe šmattsecuëntaye ca.

¹⁰ Chë uatsjëndayënga aïñe chca tmojanuena; pero chënga imojtsentjanaye ndayá cha yojtsentsáyana, cha yochtanayena ca cha tojánayana ora. ¹¹ Y Jesúsbiyoe imojtsetjanaye: —¿Ndáyeca chë ley abuátambayënga mondbétsichamo, canmëna Bëngbe Bëtsabe Uámana Uabuayanabe natsana Elías jabana ca?

¹² As cha tojanëjua: —Ndegombre, canÿa Eliascá natsana echanjabo, y ntšamo jtsemnama yomncá lempe echánjabatsma. Pero ntšamo Bëngbe Bëtsabe uabemana palabrenguiñe endayancana, Bëngbe Bëtsá Entsó tbojanbemá puerte caochjasúfria, y ínÿenga puerte camochtsáboyënja ca. ¹³ Ndegombre cbëyana, canÿa Eliascá ya tonjabo, y cháftaca entsánga tmojanma lempe ntšamo tmojabošencá, ntšamo chaochnënguama Bëngbe Bëtsabe uabemana palabrenguiñe endayancá.

Jesús, canÿe basa bayëjbe juabna uambayábiyoe tbojanshná

(Mt 17.14-21; Lc 9.37-43)

¹⁴ Chentšana, chënga tmojtaná chë inÿe uatsjëndayëngbiyoe. Chora, Jesús tojáninye ba entsánga chë uatsjëndayëngbe shëconana imojtsemnama, y básefta ley abuátambayënga chëngaftaca imojtsenatsëtsnaye. ¹⁵ Nÿetsca entsánga cha tmojáninye ora, imojenjananá y tmojanótjajo cha

jachuyama. ¹⁶ Chora Jesús chënga tojanatjá: —¿Ndayama chëngaftaca smenatsëtsná ca?

¹⁷ Y canya entsanguentsá tbojanjú: —Buatëmbayá, muentse ácbioye sënjuánatse atšbe uaquiñá; bacna bayëjbe juabna entsambá, y chë causa, jóyebuambayama ndoñe quenátobena. ¹⁸ Nye ndayentsnaca cha tojtsementse, chë bayëja chábioye jishachana y jtsenajuáchesënjana; chentse uayoicana shashiye jtsabocanana, jtsenoftësfjojnayana y obanacá jtsatsjajonana. Acbe uatsjëndayënga sënjaimpadá chë bacna bayëja chamuatábocnama, pero ndoñe chematobená ca —cha tbojaniyana.

¹⁹ As Jesús tojánayana: —¡Nýetsá ndošbuáchiyënga ca! ¿Buetayté šojtsemna tsëngaftangaftaca jëftsemnana? ¿Buetayté uantado tsëngaftangaftaca chjëftsemna? ¡Moye chë básetema mánatse ca!

²⁰ Chora chë básetema chábioye tmojanánatse; y chë bayëja Jesúsbioye tbojáninye ora, tojanma chë basa ataque chaboshachama, y chë basa fshantsoye yojashajaye, yojtsojanduounaye y uayoicana shashiye yojtsábocana. ²¹ As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjú: —Básetema orscana chca; ²² ba soye, chë bayëja chábioye iñoje jtsatmetšana y buyeshoye jtashbuetšana, jtsóbama. Chíyeca, nderado ndayá chabiamama jamama tcojtsobenëse, bënga šmotsalastemá y šmotsëjabuache ca.

²³ Chora Jesús tbojaniyana: —¿Ndáyeca “ndayá jamama tcojtsobenëse ca” šcjayana? Nda Bëngbe Bëtsábeñe tojtsošbuáchebiamama lempe endopodena ca.

²⁴ Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, ¡más jtošbuáchiyama šmajabuache ca!

²⁵ Y bëtsá entsanga imojtsójotoma Jesús tojáninye ora, chë bacna bayëja tbojtsanbochembo mëntsá: —¡Bacna bayëja, chë básetema tësmá y ndëbiá biamnayá; chábentsana maisebocna y ndocna te más chábeñe catjésamashëngo ca!

²⁶ Y chë bayëja chábentsana yojésebocna, yojtseyoye y chë básabioye jabuache ibojeseshatyyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca. ²⁷ Pero Jesús tbojanábuacuëshache y tbojtanatsbaná; y chë básana yojtëtsaye.

²⁸ Chentšana, Jesús canye yebnoye tojánamashëngo, y chabe uatsjëndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

²⁹ Y Jesús tojanëjua: —Chca bayëjënga jtëbuacanamna jobenayana nye Bëngbe Bëtsáftaca jencuëntase, chabuájabuachama jaimpádase ca.

Jesús cachiñe tojánayana cha ibojamna jóbanana y jtayenana ca

(Mt 17.22-23; Lc 9.43-45)

³⁰ Chentšana tmojëftsanbocna ora, Galilea luarëjana imojtsajna; y Jesús yojtseboše chama ndocná chaondëtsetatsëmbuama, ³¹ er cha chabe uatsjëndayënga yojtsabuátambaye. Mëntsá cachabiamama yojanëtsëtsnaye: “Bëngbe Bëtsá Entsá tbojanbemá entsangbe cucuatšñe mochanjáboshjona; mochanjóba, pero chentšana unga tianoye echántayena ca.”

³² Pero chënga ndoñe yontsósertana ntšamo Jesús yojtsanëtsëtsnacá, y chama jatstjanayamna chënga imojtsauatja.

¿Nda chë más uamaná yomna?

(Mt 18.1-5; Lc 9.46-48)

³³ Chora Capernaum puebloye chënga tmojánashajana; y cach yeb-
nentše imojtsemna ora, Jesús chë uatsjédayënga tojanatjá: “¿Ndayama be-
nachiñe šmabáyenatsëtsnaye ca?” ³⁴ Chëngna nÿe iytëca tmojanobiana, er
benachëjana chënga imnayénatsëtsnaye, chënguentšá nda chë más uamaná
bëtsemnama. ³⁵ As Jesús tojanótbema, chabe bnëtsana uta uatsjédayënga
tojánachembo y tojanëyana: “Ndánaca nÿetscangbiana chë más uamaná
jtsemnama tojtsebošëse, cha chë más nduamaná chaóbema y nÿetscanga
chaotsaserverna ca.” ³⁶ Chora Jesús canÿe básetema tbojánishache, chëngbe
tsëntsaca tbojanatsá, tbojantbá y chënga tojanëyana: ³⁷ “Ndánaca, átšbeñe
ošbuachiyá bëtsemnayeca, tbojofja canÿa mo quem basetemcá, chana atše
jofjana; y nda atše šojofja, chora cha nÿe atše ndoñe ntjofjana, sinó chë
šojichmó chábioynaca jofjana ca.”

Nda ndoñe bëngbe contra tontsemná, bëngaftaca jtsemnana

(Mt 10.42; Lc 9.49-50)

³⁸ Juan, Jesúsbioye tbojaniana: —Buatëmbayá, bënga fsënjinye canÿe
boyabása, y cha aca jótšëmbonëse, bacna bayëjbe juabna entšángbentšana
endëtëbuacana; pero cha bëngaftaca ndoñe quenátsmëna causa, chama
fsëñjesauyaná ca.

³⁹ As Jesús tbojanjuá: —Ndoñe šmatjuauyaná; er ndocná quenátobena
canÿe bëtš soye jamana Bëngbe Bëtšabe obenánaca, atše jótšëmbonëse,
y chentšana atšbe contra jatóyebuambnayana. ⁴⁰ Ndegombre, nda
ndoñe bëngbe contra tontsemná, bëngaftaca jtsemnana. ⁴¹ Y ndánaca,
masque nÿe búyeshtema tšëngaftanga tcmojubuatšatá, tšëngaftanga
átšbënga bëtsemnayeca, chábioye Bëngbe Bëtšá canÿe uacanana soye
bochántatšetaye, cha chë tšabe soye tojamama ca.

Resjo yomna, nderado bacna soyënga cuanjama

(Mt 18.6-9; Lc 17.1-2)

⁴² Chentšana Jesús tojánayana: “Canÿa átšbeñe ošbuachiyábioye mo
quem basetemcá, nda tbojaingñë atše ustonama chaotsajbanama,
más tšabá chabiana nántsemna canÿe bëtš nantsnëbë chamotseta-
mošëntšbua y mar bëjayoye asentoye chamotsashbuetše chabotsen-
atjëmbama. ⁴³ Nderado acbe cucuátšëca bacna soye tcojama, más tšabá
nántsemna chë cucuatše chacotsenacuéstjango. Acbiana más tšabá
endmëna celoye jamashënguana nÿetsca tescama vida jtsebomnama, nÿe
canÿe cucuatše bomná, y ndoñe nÿets útátšëca infiernoye chacmotocá
jama, chë ndocna te yochanjáfsana iñeshoye; ⁴⁴ choca útšenënga puerta
nÿetsca tescama mochanjasúfria. Chëngbioye mochtsasaye mamanga
ndocna te quemochatóbana, y chë iñeshe ndocna te queochátšfsana.

⁴⁵ “Nderado acbe shecuátšëca bacna soye tcojama, acbiana más
tšabá nántsemna chë shecuatše chacotsenashëcuástjango. Acbiana más
tšabá endmëna cosheto celoye jamashënguana nÿetsca tescama vida jtse-
bomnama, y ndoñe nÿets útátšëca infiernoye chacmotsëtšëna; ⁴⁶ choca
útšenënga puerta nÿetsca tescama mochanjasúfria. Chëngbioye mocht-
sasaye mamanga ndocna te quemochatóbana, y chë iñeshe ndocna te
queochátšfsana.

⁴⁷ “Nderado acbe bomínÿëca bacna soye tcojinÿe y cachca soye tcojama,
más tšabá nántsemna chë bominye chacotsenobuchjátšëca. Acbiana

más tšabá endmëna Bëngbe Bëtsabe amëndayoye jamashënguana nÿe canÿe bominÿe bomná, y ndoñe nÿets útabeca infiernoye chacmotsëtšena; ⁴⁸ choca útsenënga puerte nÿetsca tescama mochanjasúfria. Chëngbiroye mochtsaysa mamanga ndocna te quemochatóbana, y chë ñeshe ndocna te queochátsfsana.

⁴⁹ “Tamó tšabe soye endmëna. Ntšamo chë tamó canÿe tšabe soye endmëncá, Bëngbe Bëtsá echanjama nÿetsca tšëngaftangbiana tšábenga chašmotsemnama, chë átšbeñe betsošbuáchema šmojtsepadecena ora šmojauantase. ⁵⁰ Tamó tšabe soye endmëna. Pero chë tamó fténana tojtsóbemëse, ndoñe quešmátobena jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiana šmochtsemna, chëngbeñe jtsiyenëse ntšamo Bëngbe Bëtsá yobošcá, y nÿetscángaftaca natjëmbana šmochtsiyena ca” —cha tojánayana.

10

*Ndayá Jesús tojanabuatambá bouamnënga tmojtšenëtšenama
(Mt 19.1-12; Lc 16.18)*

¹ Chentšana, Jesús chë luarentšana tojëftsanbocna y tojána Judea luaroye y Jordán chenguana. Entšanga cachiñe chábioye tmojánabo, y cha chënga yojtsabuátambaye, chë ntšamo jamana yojanamancá. ² Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canÿe boyá chabe shëmbioye cachcá jesonÿayama ca?

³ Chora cha tojanëjua: —¿Ntšamo Moisés chë soyëngama tcmëñjanamëndaye ca?

⁴ Y chënga tmojánayana: —Moisés tojanalesenciá chë boyá chabe shëmbioye chabuiyé canÿe tsbuanácha, ndayëchañe chaotsayana cha ya ndoñe chabe shema yontsemna ca, y chora cachcá chabe shema chabuesonÿá ca.

⁵ Chora Jesús tojanëyana: —Tšëngaftanga Bëngbe Bëtsabe mandënga ainaniñe jójëngacñama ndoñe quešmátsoše causa, Moisés chca tšëngaftanga tcmojëftsanamëndá. ⁶ Pero quem luare jobojátšama orna, “Bëngbe Bëtsá canÿe boyabása y canÿe shembása tonjánabiana. ⁷ Chíyeca, chë boyabása chabe taitá y chabe mamá echanjésabashejuana, chabe shëmaftaca jenútanama, ⁸ y chë útatna mo canÿacá bochántsemna.” Y chca, ya ndoñe útata quebochátsmëna, sinó nÿe mo canÿacá. ⁹ Chcasna, entšá ndoñe chaondëndbema ndayá Bëngbe Bëtsá mo canÿiñcá tojëftsema soye ca —cha tojánayana.

¹⁰ Ya cach yebnocna imojtsatsmëna ora, chabe uatsjëndayënga cach soyama imojtëtstjaye. ¹¹ Y Jesús tojanëyana: “Nda chabe shëmbioye cachcá tbojesonÿá y ñnyáftaca tojtóbouamase, cha chë natsana shëmbioye ñnyë shembásaftaca jtseíngñayana; chana canÿe uabuatmá jtsebomnana. ¹² Y chë shema chabe boyábioye cachcá tbojesonÿá, y ñnyáftaca tojtóbouamase, chánaca chë natsana boyábioye ñnyáftaca jtseíngñayana; canÿe uabuatmá jtsebomnana ca” —Jesús tojánayana.

*Jesús, basetëmëngbiana Bëngbe Bëtsábioye tbojanimpadá
(Mt 19.13-15; Lc 18.15-17)*

13 Entšanga, basetémenga Jesúsbiowe tmojanēnatse, chauabájajuama y Bēngbe Bētsábioye chēngbiama chaboimpadama; pero chabe uatsjéndayēngna tmojanontsé chē basetémenga unachayēnga jtsēcácanana. 14 Jesús chca tojaninýe ora, tbojánetna y chē uatsjéndayēnga tojanéyana: “Cachcá mónýaye chē basetémenga átšbiowe chamuabo y ndoñe matéuyanana; er Bēngbe Bētsabe amēndayana endmēna chē mo quem basetemēngcá imomnēngbiama. 15 Ndegombre cbéyana, nda Bēngbe Bētsabe soyēnga ndoñe tonjóyēngacñe mo canýe basetemcá jtošbuáchiyēse, cha ndoñe queochatobenaye Bēngbe Bētsabe amēndayoye jamashēnguama ca.”

16 Y chē basetémenga tojanchebá, y chēngbeñe cucuatšēnga jajájuase, Bēngbe Bētsábioye tbojanimpadá tšabe bendicionēnga chēngbeñe chaotsemnama.

Canýe bomna entsá Jesúsbiowe tojána

(Mt 19.16-30; Lc 18.18-30)

17 Jesús jama tojtētanontsé ora, canýe boyabása chábioye tojanótjajo, chabe shecuatšentše tojanoshēntsamentsé, y mēntšá tbojantjá: —Tšabe Buatēmbayá, ¿ndayá šojtsemna jamana chē nýetsca tescama yomna tšabe vida jtsebonnama ca?

18 Y Jesús tbojanjuá: —¿Ndáyeca “tšabia ca” šcjayuana? Tšabia nýe canýa endmēna: Bēngbe Bētsá. 19 Aca icotátšēmba Bēngbe Bētsá tojanmandacá: “Ndoñe catjóba, acbe shema ínýaftaca ndoñe cattseíngñaye, ndoñe catjatbēba, ndoñe catjuaboínýena, ínýēngbiowe ndoñe catjáingñaye ndayánaca jabacama, y acbe bētsétsata ndoñe stētšoye catjáquedaye ca.”

20 Chora chē boyabása tbojanjuá: —Buatēmbayá, atše lempe chē mandēnga básetema orscana sēndocumplina ca.

21 Jesús bonshanánaca tbojanonýinýe y mēntšá tbojanianyana: —Canýe soye cmontsebuáshbena jamana: Motsa, lempe ntšamo icobomncá cochjetsatobuiye, y chē crocénana, ndbomnējémēnga cochtsatšataye; chca, celoca canýe bēts bomnana cochántsebonna. Chentšana, cochjabo y šcochjuasto ca.

22 Pero chē bobóntsbioye inýetšá ibojsínýnana Jesús chca tbojanianama; y puerte ngménaca yojtá, cha puerte bomná inamna causa.

23 Chora Jesús cátoye tojanrrepará y chabe uatsjéndayēnga tojanéyana: —¿Puerte totcá entsemna bomnēngbiama Bēngbe Bētsabe amēndayoye jamashēnguama ca!

24 Chca imojouena ora, chē uatsjéndayēnga ojanánēnga imojtsemna, pero Jesús cachiñe tojanoyebuambá y mēntšá tojanéyana: —Atšbe básēnga; ¡puerte totcá entsemna Bēngbe Bētsabe amēndayoye jamashēnguama! 25 Ndegombre, más paselo endmēna chē coshufjentša atēfjnējana canýe camello chauachnēngo, y ndoñe canýe bomná Bēngbe Bētsabe amēndayoye jamashēnguana ca.

26 Pero chē uatsjéndayēnga nýe más imojtsenjanayey y imojtsentjanaye: —¿As, nda yochjobenaye atsbocaná jtsemnana ca?

27 Chora Jesús tojanēñyanýe y tojanéyana: —Entšanga ndoñe quemátobena jamana canýa atsbocaná chaotsemnama, pero Bēngbe Bētsá añe; er Bēngbe Bētsá lempe jamama endobena ca.

28 Chora Pedro tbojanianyana: —Aca contsonýá, bēnga lempe chē fsēndbomna soyēnga fsēnjéshojona y ácaftaca fsēntsajna ca.

²⁹ As Jesús tojánayana: —Ndegombre cbéyana, ndánaca átšbioye jasérvíama y chë tšabe noticiénga jábuayenama, tojéseboshjona chabe yebna, catšátanga o uabénanga, bebmá o befta, o básenga, o fshantsénga, ³⁰ cha mora quem luarentše echanjójyëngacñe chama patse soye más yebnénga, catšátanga, uabénanga, bebmanga, básenga y fshantsénga, masque puerte chaosufrima ínýenga mochántsama; y chë inýe luarocna, chë nyetsca tescama yomna tšabe vida echanjónýena. ³¹ Pero banga, mora uámanénga imomnénga, nduámanénga mochántsemna; y banga, mora nduámanénga imomnénga, uámanénga mochántsemna ca —Jesús tojánayana.

Jesús cachiñe tojánayana cha jóbana y jtayenama
(Mt 20.17-19; Lc 18.31-34)

³² Chentšana Jerusalenoye imojtsaye, y Jesús yojtsebnsana. Chë uatsjédayénga puerte ojnanánénga imojtsemna, Jesús ndauatjá choye yojtsayama; y inýe beca entšanga ústonoye imojtsajnénga, imojtsayáuatja. Jesús cachiñe chabe bnétsana uta uatsjédayénga barie tojánachembo y tojanontsé jáuyanana ntšamo cháftaca jopásama yojtsemnana. ³³ Měntšá tojanéyana: “Tšëngaftanga šmontsonýá, Jerusalenoye bēnga mora montsajnama. Chocna, chë Bēngbe Bětsá Entšá tbojanbemá, chë bachnangbe améndayénga y ley abuátambayēngbe cucuatšíñe mochanjáboshjona, y chēnga mochanjayana cha chaóbana ca; y ndoñe judiēngbe cucuatšíñe mochanjáboshjona. ³⁴ Chēnga mochantsáboyejuana, mochántsebuashětoto, mochántsetjanja y mochanjóbá, pero chentšana unga tianoye cha echántayena ca.”

Santiago y Juan, Jesús tmojanimpadá canýe pavor cháuabiamama
(Mt 20.20-28)

³⁵ Chora, Santiago y Juan, Zebedeobe uaquiñata, Jesúsbioye tbojanobeconá y tmojanianana: —Buatēmbayá, bēndata fsěntseboše pavor chašcuabiamama ntšamo chacbojaimpadacá ca.

³⁶ Y Jesús tojanatjá: —¿Ndayá šojtseboše atše tsēndatbiamá chjamama ca?

³⁷ Y chata tbojanianana: —Aca reycá chacojtsemánda ora, cochaleséncia bēndata fchayobená jótbemana, canýa acbe catšbioica y inýa acbe uañicuayoica ca.

³⁸ As Jesús tojanéjua: —Ntšamo šmontsotjanañama tsēndata ndoñe quešnátstatšēmo. ¿Ntšamo atše chaitsesufrincá, tsēndátnaca cachcá jasúfriama tašatjobenaye? ¿Y entšanga puerte bacá chacmojtsebuatsená ora, tašochjauánta, ntšamo atše chjauantacá ca?

³⁹ Y chata tbojanianana: —Añe fchanjobenaye ca.

Y Jesús tojanéyana: —Ndegombre tsēndátnaca atšcá šochanjasúfria, y atšbe causa cmochántsamna bētsccá soyéngama jasúfria. ⁴⁰ Pero atše ndoñe quetsátobena jamándana nda atšbe catšbioica y atšbe uañicuayoica chaótbemama. Chë útentše entsemna ndēmuanýēngbiama atšbe Taitá tojaprontacá ca.

⁴¹ Chë inýe bnétsana uatsjédayénga chca tmojanuena ora, tmojanontsé Santiago y Juánoftaca jotjáyanana. ⁴² Pero Jesús nyetsca uatsjédayénga tojánachembo y tojanéyana: “Tšëngaftanga šmondétatšēmo, quem luarentša améndayénga lempe jtsemándayana, nýa mo nduiñénga cuaftsemncá; y chë bētsétsa entšanga chēngbe obenánaca jtsemándayana, ntšámnaca jtsamēse, chë inýe entšanga sempre chamotsayaunanama.

43 Pero tsëngaftangbeñe ndoñe chca chaondëtsemna. Inyetsá; masna, nda tsëngaftangbeñe chë más uamaná jtsemnana tojtseboše, cha bontsemna chë ínÿenga jtsaservénana; 44 y ndánaca tsëngaftanguentsá chë más uamaná jtsemnana tojtsebošá, bontsemna jtsemnana nyetscangbiamá, mo nÿe ínÿabiamá nyets tempo oservenacá. 45 Cachcá, Bëngbe Bëtsá Entsá tbojanbemá ndoñe chenátabo cha chamotseservénama, ndayá ínÿenga jabáserviama. Y mo nda, ínÿenga játsebacama cuafjopagacá, cha echanjóbana ba entsanga atsebácanënga chamotsemnana ca” —cha tojánayana.

Jesús canÿe jtanábioye tbojanshná
(Mt 20.29-34; Lc 18.35-43)

46 Chentsana, Jesús y chabe uatsjédayënga Jericó uabaina puebloye tmojánashjajna. Y Jesús chabe uatsjédayëngafaca y bëtscá entsángaftaca Jericó pueblentsana yojtseibocana ora, Timeobe uaquiñá, Bartimeo ca uabainá, canÿe jtaná lemošna otjanañá, benache juachañe yojtsetbemana. 47 Y Jesús Nazaretocá chëjana yojtsachnëjuanama cha yojátatšëmbona ora, tojanontsé mëntsá uayebuáchana: —¡Jesús, Davídbentsana Entsá, šmotselastemá ca!

48 Chorna, banga chë jtaná imojtsácacana iytëca chaóbemama. Pero cha más yojtšáyebuache: —¡Davídbentsana Entsá, šmotselastemá ca!

49 Chora Jesús tojantsá y chë ínÿenga tojanëyana: —Chë jtaná mochembo ca.

As chë jtaná tmojanchembo, y mëntsá tmojanianyana: —¡Añemo cochtse-bomna; motsbaná! Jesús cmontsechembuana ca.

50 Y chë jtaná, quefsaiya jtsenátsejquëse, yojontsënja y betscó Jesúsbioye yojobeconá. 51 Chora, Jesús chë jtanábioye tbojantjá: —¿Ndayá cojtseboše atše acbiamá chjamama ca?

Y chë jtaná tbojanjuá: —¡Buatëmbayá, šmolesenciá atše chašuatábínÿnama ca!

52 As Jesús tbojanianyana: —Motsatoñe. Tšabá jtsatsmënama Bëngbe Bëtsábeñe icošbuachëyeca, tšabá contsatsmëna ca.

Y cachora cha tšabá ibojtabinÿna, y Jesúsbioye benachëjana ibo-jtséstona.

11

Jesús Jerusalenoye tojánashjango
(Mt 21.1-11; Lc 19.28-40; Jn 12.12-19)

1 Ya Jerusalenoye imojtsebeconá ora, Betfagé y Betania pueblënga béconana, Olivos ca uabaina tjashe juachañe, Jesús uta chabe uatsjédayata tojanichamó, 2 y mëntsá tojanëyana: “Tsëndatbe natsana entsemna base pueblotémoye motsata. Chašojáshjango y cachora šochanjínÿena canÿe burrotema utsbuaná; chábeñe cabá ndocná tonjenuoyé. Sochjuafjoná y sochjuánatse. 3 Nderado nda, ¿ndáyeca šmojtsanachá ca? chacmojátjase, sochjojuá: ‘Bëngbe Utabná bontsájaboto y chora bochantabáiseboshjona ca.’ ”

4 As chata tbojána, y tbojáninÿena chë burrotema tsáshenañe, canÿe bësásañe utsbuaná, y imojuafjoná.

5 Y básefta entsanga chiñe imojtsemnënga, chátbioye tmojanëyana: “¿Ndayá šojtsama? ¿Ndáyeca chë burrotema šojtsajafjná ca?”

⁶ As chata tbojanjuá ntšamo Jesús tojanéyancá; y chë entsanga tmojanalesenciá chë burrotema chamuánatsama. ⁷ Chentsšana, chë burrotema Jesúsbiye tmojanánatse; chë burrotémbeñe chatbe entsáyá tbojanájtse, y Jesús chábeñe tojanenojayé. ⁸ Bëtschá entsanga chëngbe entsáyá chë benachëjana imojtsanëtétsatsana, y ínÿengna chë jajoca imojuatëtsetse buacuashangá chiñe imojuacjaye. ⁹ Y chë natsana imojtsajnënga y chë ústonoyënga mëntšá imojtsaiuáyebuache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! ¹⁰ ¡Tša tšabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

¹¹ Jesús Jerusalenoye tojánashjango, y Bëngbe Bëtsabe bëts yebnoye tojánamashëngo. Chabe shëconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania puebloye.

Jesús tojánayana canÿe betiye ndoñe más chaondëshájona ca
(Mt 21.18-19)

¹² Yëfsana, Betaniocana Jerusalenoye chënga imojtésajna ora, Jesús tbojánishëntsena. ¹³ Bënocana canÿe higo betiye yojinÿe; as tojána jontješiyama tainashajo o ndoñe. Pero nÿe tsbuanáchënga chiñe yojinÿena, chora ndoñe shajo tempo bëtsemna causa. ¹⁴ As Jesús chë higo betiyoje tojánayana: “¡Ndocna te más chaondëshájona entsanga chamosama ca!”

Y chabe uatsjëndayënga imojouena ntšamo cha tojanayancá.

Jesús, Bëngbe Bëtsabe bëts yebnentšana enënga y obuámmayënga tojtanëbuacna

(Mt 21.12-17; Lc 19.45-48; Jn 2.13-22)

¹⁵ Jerusalenoye tmojánashjajnentšana, Jesús Bëngbe Bëtsabe bëts yebnoye tojánamashëngo, y tojanontsé chentsšana jtëbuacnana chë chentše imojtsena y imojtsobuámmnañënga. Chéntšnaca imojtsemna entsanga canÿe crocénana enënga, y chë crocénana nÿe Bëngbe Bëtsabe bëts yebnentšama inoservena. Chë entsanga crocénana atrocayëngbe mesëshangá tojtsanenásatajchquëca, y chë palomatémënga enëngbe tšenëšëngnaca; ¹⁶ y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama. ¹⁷ Y tojanontsé entsanga mëntšá jabuátambana: “Ndegombre, Bëngbe Bëtsabe uabemana palabrenguiñe cha mëntšá tojánayana: ‘Atšbe bëts yebna echantsabaina nÿetsca luarëntša entsangbiama átšeftaca encuéntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanéyana.

¹⁸ Chë bachnangbe más uámana amëndayënga y chë ley abuátambayënga tmojántatšëmbona ntšamo yojochnënguama; as tmojanontsé enójuabnyana ntšamo jobenayana cha jobana, cha imojtsebiauatja causa, er nÿetsca entsanga imojtsenjanayen ntšamo cha yojanabuátambana. ¹⁹ Pero yojtseibétatana ora, Jesús chabe uatsjëndayëngaftaca chë bëts pueblentshana yojesóbocñe.

Chë higo betiye tojtsanbuashá

(Mt 21.20-22)

²⁰ Yëfsana cachëse, cachëjana imojtésachnëjuana ora, tmojáninÿe chë higo betiye parejo tbëtëjëngaca yojtsebuashá. ²¹ Chora Pedro yojenójuaboye ntšamo yojopásama; as Jesúsbiye tbojanayana: —¡Buatëmbayá, minÿe;

chë tconjayana ndocna te más tšabe betiye chaotsemnana betiye tojtsebuashá ca!

²² Y Jesús tbojanianana: —Bëngbe Bëtsábeñe šmochtsošbuáchiye. ²³ Ndegombre cbéyana, nderado nda quem tjoye tojayana, “¡chentsana mojuaná y bëts uafjajónayoye motsëshbuetše ca!” y chca tojayana ainaniñe inÿetsá juabna ntjatsbomncá, y ainaniñe puerte tojtsošbuaché ntšamo tojayancá aiñe yochjochñënguama, ndegombre chca echanjochñëngo. ²⁴ Chíyeca cbochanjáuyana, lempe ntšamo Bëngbe Bëtsáftaca chašmojtsencuénta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebmna. ²⁵ Y Bëngbe Bëtsáftaca chašmojtsencuénta ora, šmochjenójuaboye nderado nda ndaye bacna soye tšëngaftangbiana tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama. ²⁶ Pero inÿa ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

Jesusbe obenana

(Mt 21.23-27; Lc 20.1-8)

²⁷ Chca tojanopasá chentsana, Jerusalenoye chënga tmojesaná. Jesús Bëngbe Bëtsabe bëts yebñëjana vojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga, ²⁸ y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšëtá ca?

²⁹ As Jesús tojanëyana: —Atšnaca sëntsebmna canÿe soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. ³⁰ ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga? Smëyana ca.

³¹ Chora chënga tmojanontšé mëntšá enatsëtsnayana: “‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tcmojanabuayená soyënguiñe ndoñe šmonjanošbuaché ca?’” ³² Pero ndoñe quemuátobena jayanana ‘entšanga ca’.” Chca tmojánayana, er chënga entšangbiana imojánauatja, er nÿetscanga imojanjuabná, Juan ndegombre Bëngbe Bëtsabe juabna oyebuambnayá yojamnana. ³³ Chcasna, chënga tmojanjuá: —Bënga ndoñe queftsátstatšëmbo ca.

Y Jesús tojanëyana: —As atše cach ndoñe quechochatëyana ndaye deréchoca atše chca stsama ca.

12

Chë puerte bacna trabájayëngbiana cuento

(Mt 21.33-46; Lc 20.9-19)

¹ Chora Jesús tojanontšé cuentëngaca jabuátambana. Mëntšá tojanëyana: “Canÿe entšá bëtscá uvas betiyënga yojáje, y chë shëconana yojajëtja. Chë uvasëšangá juantsëtetjiamna canÿe base luare yojajutjo; y canÿe tsbanana jebna soye yojapórma chiñe jtsashanÿama. Chentsana, inÿe trabájayënga chë jajañe yojúyentsame, y chana inÿe luaroye yojtsoñe. ² Chë uvasëšangá juashacama tempo yojobuache orna, chë jajañe nduiño canÿe oservená ibojícmua chë arrëndayënga jáuyanama ntsachetšá chë nduiño ibojtsotocánama. ³ Pero chënga, cha imojishache,

imajtsejantsetaye, y tondaye ntajatacá imojtichmuá. ⁴ Chentšana, chë nduiño inye oservená ibojíchmua; pero chana, bestšase imojtselisia y podesa imojtsóyenguango. ⁵ Chentšana inya ibojatichmuá, y chana chë arréndayënga imojtsóba. Y bángnaca yojichamuá; pero chëngna, ínÿengna imojtsajantsetaye y ínÿengna imojtsëbaye.

⁶ “Chë nduiño cabá canya ibojtsábojamna jíchmuama: cachabe bonshana uaquiñá. Cabana, cha ibojíchmua y mëntšá yojtsejuabnaye: ‘Atšbe uaquiñá cocayé mochanjóyeunaye ca.’ ⁷ Pero chë arréndayënga cha imojinÿe ora, imojeniñana: ‘Mua chë fshantse nduiñbe uaquiñá entsemna. Lempe chabe soyënga mua echanjóyëngacñe. Cuajna, motsóbanga, y lempe chabe otocana soyënga bëngbiana echanjoquéda ca.’ ⁸ Chcasna, cha imojishache, imojtsóba y chë uvas betiyënga jajañentšana más chcoye imojetsëtšana ca” —Jesús tojancuentá.

⁹ Jesús chca jacuéntama tojanpochocá ora, tojánayana: “Y asna, ¿ndayá chë fshantse nduiño yochjama ca? Cha co echanjá y chë trabájayënga echanjetsëbaye, y inye trabájayënga chë uvas betiyënga jajañe echanjárrendaye.

¹⁰ “¿Tšëngaftanga ndocna te Bëngbe Bëtsabe uabemana palabra šmëndualía? Chiñe mëntšá endayana: Chë yebna jebuanënga tmojtsanaboté ndëtsbé, mora chë más bëts uashacuanëšentše entsejájona.

¹¹ Chë soye Bëngbe Utabná, Bëngbe Bëtsá chca tojama, y bënga chama ojnanánënga fsëntsemna ca.”

¹² Chora, chë bachnangbe amëndayënga y chë bëtsëjemëngcá mándayënga tmojánbošena Jesús jishachana, er chënga tmojanenótatšëmbona cha chca tojancuentá jinÿanÿiyama chënga mo chë puerte bacna trabájayëngcá imojanmënama. Pero entšangbiana imojtsauatja, chíyeca cachcá tmojanonÿá y chentšana imojtsóñënga.

*Chë Romoca bëts mandadbiana impuesto jtsatsquëcjnyama
(Mt 22.15-22; Lc 20.20-26)*

¹³ Chentšana chënga, básefta fariseunga y Heródesbe ústonënga Jesúsbioye tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadëngbeñe cha mal jaquédana. ¹⁴ Chënga tmojána y Jesús tmojaniana: —Buatëmbayá, bënga fsëndétatšëmbo aca ndegombre soyënga cnetsabuátambama, y ndoñe jatuenanana nÿe ntšamo entšanga tmojatichamcá, er acbiana tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiana bënga impuesto jtsatsquëcjnyana? ¿Fchtsatsquëcjnyaye o ndoñe ca? —chënga tmojantjá.

¹⁵ Jesús yojtsetátšëmbo, chënga bacna entšanga ntšamo ndegombre tmojuabnacá ndinÿinÿayënga imojamnama; chíyeca tojanëyana: —¿Ndáyeca tšëngaftanga šmojtseboše chë sóyeca atše jisháchichiyama? Canÿe denario crocénana šmiyëboñe, atše chayobená jinÿama ca.

¹⁶ As canÿe crocénana tmojanoyé y Jesús tojanëyana: —¿Ndabe jubiá quem crocénaniñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

17 Chora Jesús tojanéyana: —Chcasna, César šmochtoyiye cha ibotocana soye; y Bëngbe Bëtsana cha ibotocana soye ca.
Y nÿetscanga chama imojenjaná.

Obanënga jtayenama Jesús tmojantjá
(Mt 22.23-33; Lc 20.27-40)

18 Chentšana, báseftanga saduceo ca uabaina entsanga tmojána Jesús jinýama. Chënga imojanjuabná obanënga ndocna te ntayenana ca. Chíyeca, Jesús mëntšá tmojaniana: 19 —Buatëmbayá, Moisés tojëftsanabema, nderado canýe boyá tojóbana y básenga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chabe uabochená obanabiana básenga jtsabamama ca. 20 Y chcase, canýe, canýsëfta catšátanga monjamna. Chë natsaná tonjanobouamá y tontsanóbana básenga ntjëftsabáshejuancá. 21 Chentšana, chë ústona uabentsá chë shémaftaca tonjanobouamá, pero chana tontsanóbana, básenga ntjëftsabáshejuancá; chë inýe uabentsáftaca cachcá tonjanopasá. 22 Chca, nÿetsca canýsëfta catšátangaftaca cha tonjanobouamá, pero ndocná básenga ntjëftsabáshejuanana. Y chentšana chë shembásanaca tontsanóbana. 23 Y morna, chë obanënga chamojtayena ora, ¿ndabe chë canýsëfta catšatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

24 As Jesús tojanéyana: —Ntšamo Bëngbe Bëtsabe uabemana palabrënguñe endayancá ndoñe tcmónjosertá, ni Bëngbe Bëtsabe obenanama. Chíyeca ntšamo ndoñe yondmëncá šmontsichamo. 25 Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëncá. 26 Y chë obanënga jtayenama, ¿Moisesbe librëšañe ndoñe šmëndualía ntšamo Bëngbe Bëtsá tbojanianama, chë betiyetema yojtsángbototjuana ora? Bëngbe Bëtsá mëntšá tbojaniana: “Atše sëndmëna Abraham, Isaac y Jacobëbe Bëtsá ca.” 27 Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canýe ndoñe ndegombre soyiñe šmontsemna ca—tojanéyana.

Chë más bëts uámana mando
(Mt 22.34-40)

28 Chentše yojtsemna canýe ley abuatambayá. Cha yojouena ntšamo Jesús y chënga imojtsenatsëtsnayana, y yojtsetátšëmbo Jesús tšabá tojanéjuama. As, tojanobeconá y Jesúsbioye tbojantjá: —¿Ndayá chë más bëts uámana mando yomna ca?

29 Y Jesús tbojanjuá: —Chë más uámana mando mëntšá endmëna: “Israeloquënga šmochjouena, Utabná, Bëngbe Bëtsá endmëna, y nýe canýe Bëngbe Utabná endmëna, ndocná más. 30 Utabná Bëngbe Bëtsá cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.” 31 Y chentšana quem inýe mándnaca: “Ndëmua entsánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca—Jesús tojánayana.

32 Chora, chë ley abuatambayá Jesúsbioye tbojaniana: —Buatëmbayá, puerte tšabá tcjayana. Ndegombre yomncá contsichamo, nýe canýe

Utabná endmëna y ndocná más. ³³ Y cha jtsebobonshánana nÿets ainánaca, juábnaca y añémoca, y ndëmua entsánaca jtsebobonshánana cachá cuenobobonshancá, puerte cuámana. Cach nÿetsá ndoñe que-natámána bayënga jtsëbánayana, ni chë uátšëmbona soyënga Bëngbe Bëtsá jëtschuayama ca.

³⁴ Cha nÿets juábnaca tbojanjuama Jesús tojáninÿe ora, tbojaniyana: — Batšatema cmontsebuáshbena jtseprontánama, Bëngbe Bëtsá chacolesen-ciamá acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

¿Cristo ndabe entsábentšana yomna?

(Mt 22.41-46; Lc 20.41-44)

³⁵ Jesús Bëngbe Bëtsabe bëts yebnentše yojtsabuátambaye ora, tojánayana: “¿Ndáyeca chë ley abuátambayënga mondbëtsichamo chë Uámána Uabuayaná Davídbentšana iuabó ca?” ³⁶ Cach David, chë Uámána Espíritbe mándoca mëntšá tojánayana:

Bëngbe Bëtsá, atsbe Utabná Crístbioye tbonjaniyana:

atsbe catšbioica mótbema,

atsbe obenánaca, acbe uayayënga acbe cucuatšinë chamoquedama ch-jamëntscuana ca.

³⁷ ¿Ntšámose Cristo Davídbentšana Entšá nántsemna, cach David ‘Utabná ca’ chábioye tbojtsabobuátmëse ca?’ —cha tojanëyana.

Y chë bëtská entsanga, oyejuayënga imojtsuenana.

Jesús chë ley abuátambayëngbiamá tojánayana, chënga ndoñe tšabá montsama ca

(Mt 23.1-36; Lc 11.37-54; 20.45-47)

³⁸ Mëntšanaca Jesús chënga yojtsabuátambaye: “Cuedado šmochtsebmna y ndoñe šmattsama chë ley abuatambayëngcá. Chënga jtsogusetánana bënëna entsayangaca jtsajnana y jtsebošana tsáshenañe entsanga nÿa respétoca chamotsacheuanama. ³⁹ Chë judiëngbe eneffuana yebnënguenache, chë más uámána luarënguifne jtsetbiámanana, y chë fiestënguenache nÿa quëšseroca. ⁴⁰ Pero chënga, viudángbioye chë tmobomna soyënga jtsabacayana, y entsangbe delante tšabá chamotsënyama, y chëngbioye imojtsáingñama ndoñe chaondëtsótatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá inÿengbiamá más chënga echanjácastigaye ca” —Jesús tojánayana.

Jesús yojtsënyaye chë crocénana quëcnyayënga

(Lc 21.1-4)

⁴¹ Jesús jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quëcnyayëtema ndirichiñe; y chë crocénana quëcnyayënga yojtsënyaye. Bëtská bomnëngna becá crocénana imojtsequëcnyaye. ⁴² Chora, canÿe viudá ndbomnëjémnaca yojobconá y nÿe uta crocénana chëtémiñe yojaftsesegóra. ⁴³ Chora Jesús chabe uatsjëndayënga tojánachembo chamobéconama, y mëntšá tojanëyana: “Ndegombre cbëyana, quem viudá ndbomnëjema, Bëngbe Bëtsabiamá nÿetscangbiamá más tonjëftseseGORÁ. ⁴⁴ Chë bomnëngna chë yojtsóyentšjamentšana tmonjëftseseGORÁ, y cabá bomnana imotsóbomñe; y chë viudana tonjëftseseGORÁ lempe ntsachetšá yobomncá; masque

tša ndbomñejema, chë vida jtsebomnama lempe ntsachetšá yobomncá tonjëftsesegorá ca.”

13

Jesús tojánayana chë Bëngbe Bëtsabe bëts yebna lempe mochjápochocama (Mt 24.1-2; Lc 21.5-6)

¹ Jesús Bëngbe Bëtsabe bëts yebnentsana tojëftsanbocna ora, canÿe chabe uatsjendayá tbojanayana: —Buatëmbayá, minÿe, itša bëts ndëtsbenga, y tša botamana bëts yebnënga ca!

² Chora Jesús tbojanayana: —Tšabá cochjinÿe tša botamana bëts yebnënga. Pero muentše ndoñe queochaisoquéda ni mo canÿe ndëtsbé inÿebé juatsboye. Lempe mochantsepochóca ca.

Ntšamo yochtsemna quem luare jopochócama te chaojtsobeco ora (Mt 24.3-28; Lc 21.7-24; 17.22-24)

³ Chentšana, Olivos tjashoye chënga tmojána. Bëngbe Bëtsabe bëts yebnentsa ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá, ⁴ ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

⁵ Chora Jesús tojanëjua: “Cuedado šmochtsebomna ndocná chacmondáingñema. ⁶ Banga mochanjabo y mochantsabíchamo chënga Jesús imomna ca. Mochántsihomo: ‘Atše chë Cristo sëndmëna ca’, y chca, ba entšanga mochanjáingñaye.

⁷ “Entšanga tmojtsentsjanama y nderado mochjentsjámna tsëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátmëna. ⁸ Canÿe luarentša entšanga inÿe luaroca entšángaftaca mochántsihomo, y canÿe amëndayábentša entšanga inÿe amëndayábioca entšangaftácnaca; ba luarënguenache fshantse echanjuangmëmëna y bëts shëntsana echanjóshjango. Masque chca jasúfriase, más chcoye cabá más mochanjatssúfria.

⁹ “Pero tsëngaftangna cach tsëngaftangbiana šmochtsantješna; entšanga cmochanjíshëche y amëndayëngbe cucuatšinë cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bëtsemna causa, mandadëngbioye y reyëngbioye cmochanjuntatse, choca, chëngbe delante ntšamo atšbiana šmotatšëmbcá chašmuayanama. ¹⁰ Er entseyta, quem luare cabá ndopochóca ora, Bëngbe Bëtsabe tsabe noticiënga nyetsca luarënguentša entšángbioye chaóshjanguama. ¹¹ Y inÿengbe cucuatšinë jabáshejuana chacmojtsënachá ora, ndoñe šmattsenócochinÿena ntšamo chora šmochjayanama. Chora šmochjayana ntšamo Bëngbe Bëtsá yochjamcá tsëngaftanga chašmuayanama, er tsëngaftanga cánÿenga ndoñe chora quešmochátoyebuambnaye, ndayá chë Uámana Espíritu tsëngaftangbiajana echantsóyebuambnaye.

¹² “Canÿe catšata cachabe catšata inÿengbe cucuatšinë bochanjáboshjona chamotsóbama, y bëtsëtsanga cachëngbe básenga mochanjábashhejuana chamotsëbáyama; y chë básengna chëngbe bëtsëtsangbe contra mochántsemna y chamotsëbáyama

mochanjábashejuana. ¹³ Atsbe ústonënga bétsemna causa, nyetsca luarënguentsa entsanga cmochantsëbuayënja; pero nda nyets tempo átsbeñe ošbuachiyá totsomñe, atsbocaná echántsemna.

¹⁴ “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócoma tojéftsanabema. Chë puerte uabouana soye, chca jtsemnama ínyoica tšëngaftanga chašmojinýe ora (nda tojtsalía, chabosertá), šmochántsetatšëmbo chë puerte ngmënana tempo tojóshjanguama; chorna, chë Judeoca chamojtsemna entsanga, batsjabengoye chamotsacheta; ¹⁵ chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; ¹⁶ y nda jajoca chaojtsemna, yebnoye ndoñe chaondëta ni mo chabe quëfsaiya jesácñama. ¹⁷ ;Tša lastema chë tempo ngomámanënga o ochóchaye šešonga chamojtsabamna shembásengbiamá! ¹⁸ Bëngbe Bëtsá šmochtseimpadana chë ngmënana tempo ndoñe chaondóshjango uaftena tempo ora, ¹⁹ er chora puerte ngmenancá echántsemna. Tša jabuache ngmenancá, quem luare jobojátsama orscana y mëntscoñama y más chcoye, cachcá ngmënana ndoñe ntjamnana. ²⁰ Chë puerte ngmënana tempo, yapa bën ndoñe chaondëtsemnama Bëngbe Bëtsá ndoñe tonjalesenciase, ndocná quentatsbocá; pero cha, chabe ubuáyanënga, chabe bocacánënga corente endábabuanýeshanayeca, echanjama yapa bën tempo ndoñe chaondëtsemnama.

²¹ “Chora nderado nda chacmojáuyana: ‘Minýe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. ²² Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëgnaca; y chënga mochanjama bëts soyënga chëngbe obenana jinýanýiyama, entsanga jáingñama, y tmojobenase, chë Bëngbe Bëtsabe bocacánëgnaca. ²³ ¡Cuedado šmochtsebomna! Cabá chca ndochñëngo ora, lempe tchonjabuayená ca” —Jesús tojanéyana.

*Bëngbe Bëtsá Entsá tbojanbemá quem luaroye echanjésabo
(Mt 24.29-44; Lc 21.25-36)*

²⁴ Mëntšánaca Jesús tojanéyana: “Pero chë tempo, entsanga puerte chamojasufri chentšana, shinýe ndoñe queochátsbuashinýinýana, juashcona ndoñe queochátsbinýnaye, ²⁵ celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmana. ²⁶ Y chora, entsanga mochanjinýe, Bëngbe Bëtsá Entsá tbojanbemá jantsetëshiñe echántsaboye, corente obenánaca y corente buashinýinýaniñe. ²⁷ Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nyets luarëngocana, quem fshantsoca cányoica juachoicana, celoca ínyoica juachóntscoñe.

²⁸ “Chë higo betiyama šmochjuatsjinýe: Tsëm buacuafjënga tojtsebomna ora y tojtsaisëjotsana, jtsotatšëmbuana chë tšabe tempo ya tojtsaisobecuama. ²⁹ Cachcá, chë soyënga ndayama tšëngaftanga tchonjauyancá chašmojinýe ora, šmochántsetatšëmbo Bëngbe Bëtsá Entsá tbojanbemá ya jesábama yojtsemnama. ³⁰ Ndegombre cbëyana, lempe chca echanjochnëngo, morsa entsanga cabá ndóbana ora. ³¹ Celoca y quem luare echanjopochóca, pero átsbe palabra ndocna te queochaisopochóca.

32 “Pero Bëngbe Bëtsá Entśá tbojanbemá ndayté y ntseco ora yochjésabama, ndocná quenátstatsëmbo, ni chë celoca angelënga, ni Bëngbe Bëtsabe Uaquiñá. Nye chë Taitá chama yotátsëmbo.

33 “Chíyeca, cuedado šmochtsebmna y yejuana šmochtsantješna, er ndoñe quešmátstatsëmbo mocna ora yochtsemna Bëngbe Bëtsá Entśá tbojanbemá jésabama tempo. 34 Echántsemna mo canye entśacá; chana inye luaroye ya jëftsebocnama ora, chabe oservénënga jëftsamëndana chabe yebna chamotsinjenama. Cada ona canye trabajo jëftsebóniyana, y chë shanýá jëftsemándana botamana chaotsantješnama. 35 Chcasna, cuedado šmochtsebmna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatsëmbuana, mo nderado jétatana, tsëntseto ora, bínyanoye o cachëse, tsëngaftanga cachcá, Bëngbe Bëtsá Entśá tbojanbemá ntseco jésabama ndoñe quešmátstatsëmbo; 36 ndoñe cuedado šmontsebmne, nderado cha nye ndeolpe nántashjango, tsëngaftanga ndëprontánënga šmojtsemna ora, mo ftsomañe cuenta. 37 Chíyeca, ntšamo tsëngaftanga cbochanjauyancá, nyetscanga chanjáuyana: ¡Puerte cuedado šmochtsebmna ca!” —Jesús tojánayana.

14

*Entšanga imojtsejuabnaye ntšamo jamëse Jesús jishachama
(Mt 26.1-5; Lc 22.1-2; Jn 11.45-53)*

1 Bashco fiestama uta te yojetsájamna, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama fiesta, chë levadúraca ndëpormana tandëse sayora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama. 2 Báseftanga imojtsichamo: “Quem fiestëntscuana ndoñe, er nderado entšanga yapa muanjóntša enbouenanana ca.”

Canye shembása botamana uangüëtse béjaye Jesusbe bestšašične tbojanbuešcja

(Mt 26.6-13; Jn 12.1-8)

3 Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canye shembása tojánashjango. Chë shembása yojúshjango canye alabastro jarrëtema jútjena canye becá uámana y botamana uangüëtse béjayeca, ena nardana uangüëtšiyee; chana chë jarrëtema yojátsba y chë béjaye Jesusbe bestšašične tbojanbuešcja. 4 Chca tmojáninye ora, báseftanga chentše imojtsemnënga tmojanotjayaná y mëntśá imojtsenatsëtsnaye: —¿Ndáyeca nye bonamente chë soye yojtsemna ca? 5 Chamna, matmënjobenanga chë béjaye unga patse denario crocenánama juiyana, y chánaca ndbomñëjmënga matmënjújabuache ca.

Y chë shembásabiama podesca imojtsichamo.

6 Chora Jesús tojanëyana: —¿Ndáyeca quem shembása ndoñe cachcá šmochanjonýaye ca? ¡Ndocá matatsana! Atšbiama tšabe soye tonjama. 7 Er ndbomñëjmënga nyets tempo tsëngaftangbeñe mochanjëftsemna, ndayténaca šmojábošena ora, šmatjobenaye tšabe soye chëngbiamana jamana; er atše tsëngaftangafata ndoñe nyets tempo quichásemna. 8 Quem shembása lempe ntšamo tojobenacá atšbiama tonjama. Chca tonjama ora, atšbe cuerpo tonjaprontá atše

juatbontsa tescama, cabá ndoñe obaná séntsemna ora. ⁹ Ndegombre cbéyana, quem luaroca ndayéntsnaca Bèngbe Bètsabe tšabe noticiènga chamojtsabuayiyá chentše, ntšamo quem shembása tojamámnaca becá mochanjèftsóyebuambaye, chca, entšanga chabiamá chamotsenójuabnama ca —cha tojanéyana.

Judas tojána bachnangbe amëndayëngbioye, Jesús chamuishachama
(Mt 26.14-16; Lc 22.3-6)

¹⁰ Chentšana, Judas Iscariote, canye chë bnétsana uta uatsjendayënguentšá, tojána chë bachnangbe amëndayëngaftaca jencuéntama, Jesús chëngbe cucuatšíne jaboshjonama. ¹¹ Chca tmojanuena ora, chënga imojóyejuaye y tmojanšbuachená crocénana jtabuényana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšíne jaboshjonana.

Jesús chabe uatsjéndayëngaftaca Bashco saná tojanse
(Mt 26.17-29; Lc 22.7-23; Jn 13.21-30; 1 Co 11.23-26)

¹² Chë Bashco fiesta bojatšenté, chë levadúraca ndëpormana tandëse sayté, chë uatsjéndayënga Jesús tmojantjá: —¿Ndëmoca cojtseboše bënga fchaiprontama, Bashco saná chacosama ca?

Chca te chë judiënga imojanamana, Bèngbe Bètsá jëtschuayamna canye oveshá jóbana chora jasama, chë Egiptocana chëngbe bëts taitanga Bèngbe Bètsá tojánatsebacama jtenójuaboyama.

¹³ As Jesús uta chabe uatsjéndayata tojanichamó y mëntšá tojanéyana: —Chë bëts puebloye motsata. Chašojáshjango ora, canye bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndëmuanýe yebnentše yochjámashënguama; ¹⁴ y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjéndayëngaftaca jasama ca?” ¹⁵ As cha cmochanjínýanýiye canye bëts tsañe, tsbanana pisoca, lempe prontániñe; chentše šochjapróna bënga mochjasama ca.

¹⁶ As chë uatsjéndayata tbojána y tbojáninýena lempe ntšamo Jesús tojanéyancá; y chentše chë Bashco saná tbojanprontata.

¹⁷ Tojanibétata ora, Jesús chë yebnoca tojánashjango, chabe bnétsana uta uatsjéndayëngaftaca. ¹⁸ Y mesëshentše imojtsesaye ora, Jesús tojanéyana: —Ndegombre cbéyana, canya tšëngaftanguentšá, átšeftaca entsesá cha, uayayëngbe cucuatšíne šochanjáboshjona ca.

¹⁹ Chorna chë uatsjéndayënga ngménaca imojtsemna, y tmojanontšé canýánýa cha jatjayana: —¿Atše chtsemna ca?

²⁰ Y Jesús tojanéjua: —Canya chë bnétsana utatentšá entsemna. Chabe tandëse cach atše sëntsefchecuacná šcnenentše cha entsefchecuacná. ²¹ Ndegombre, Bèngbe Bètsá Entšá tbojanbemáftaca echanjopása ntšamo chabiamá Bèngbe Bètsabe uabemana palabrenguifne endayancá. Pero, jtsa lastema chë bochjáboshjonabiamá! Chabiamá más tšabá manjamna ndoñe ntjónýnana ca —Jesús tojánayana.

²² Imojtsesantscuana, tandëse tojanca, Bèngbe Bètsábioye chama tbojtanchuá, tojanjataye y chabe uatsjéndayënga tojanéjatá, y mëntšá tojánayana: “Mocñënga, mosënga, atšbe cuerpo entsemna ca.”

²³ Chentšana, canye coptema vínoyeca tojanaca, Bèngbe Bètsábioye tbojtanchuá, chabe uatsjéndayënga tojanëšfašé, y nyetscanga tmojanofšé.

24 Měntšá tojánayana: “Quem vínoye atšbe buiñe entsemna. Atšbe buiñe echanjuábuashana entšanga chamotsetatšěmbuama ntšamo Běngbe Bětsá entšanga tojašebuachenacá ndegombre yochjochněnguama. Chě buiñe bětsá entšangbe tšabiamá echanjuábuashana. 25 Y ndegombre cběyana, morscana ya ndoñe más chě uvasěsentšana obocniye quichaisofšiye. Chě tsěm vínoye tšěngaftangaftaca chanjofšiye, Běngbe Bětsabe aměndayoca chamojtsemna ora ca” —tojánayana.

Jesús tojánayana, chábioye ndoñe bonjanabuátma ca Pedro yochjánayanama

(Mt 26.30-35; Lc 22.31-34; Jn 13.36-38)

26 Běngbe Bětsábioye jětschuayama tmojancantá chentšana, Olivos tjashoye tmojěftsanbocana. 27 Jesús tojaněyana: —Njětsca tšěngaftanga quem ibeta átšbeñe ošbuáchiyana šmochantsobuetše y šmochántsacheta, er Běngbe Bětsabe uabemana palabrěnguiñe, cha měntšá tojánayana: “Chě oveshěnga abuajěnyá chanjóba y chě oveshěnga mochantsáshana ca.” Chca tšěngaftangaftaca echanjopása, uayayěnga chašmojšhache ora. 28 Pero obaněnguentshana chaitayenentšana, tšěngaftangbe natsana Galileoye chanjá ca —cha tojaněyana.

29 Chora Pedro tbojaniyana: —Masque njětscanga ábeñe ošbuáchiyana chamotsobuetše y chamotsacheta, atše nýa ndocna te ca.

30 Chora Jesús tbojaniyana: —Ndegombre cběyana, cam ibeta, ngallo cabá uta soye nděcánta ora, aca unga soye cochanjayana ndoñe šconduabuatma ca.

31 Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe cbonduabuatma ca.

Y njětscanga cachcá imojtsichamo.

Getsemaní luarentše Jesús, Běngbe Bětsáftaca tbojanencuentá

(Mt 26.36-46; Lc 22.39-46)

32 Chentšana, canýe luare Getsemaní ca uabáinoye tmojána. Chocna Jesús tojaněyana: “Muentše motbiamá, chěntscuana atše choye chanjá, Běngbe Bětsáftaca jencuéntama ca.”

33 Y tojěftsaněbiatše Pedro, Santiago y Juan. Choca cha yojóntša puerte ngménaca jtsemnama y corente cochtsetšenaná. 34 Chěngbioye tojaněyana: “Atšbe ainana puerte ngménaca entsemna, mo jobanamcá. Muentše moquedanga y šmochtsefšna ca.”

35 Chentšana, Jesús más natsanoye tojána, tojanoshěntsamentšé y fshantsóntscoca tojanotsejbéna y Běngbe Bětsábioye tbojanimpadá, jopódianěse, chě tša japadésa ora ndoñe chaondóshjanguama. 36 Měntšá yojtsichamo: “Atšbe Taitá, aca lempe jamama condobena; tojopodese, cochjama atše japadésama ndoñe chašondětsemnama. Pero ntšamo atše stsebošcá ndoñe chaondětsemna, sinó ntšamo aca cojtsebošcá ca.”

37 Chentšana, chabe unga uatsjédayěngbioye tojtanabo, y chěngna imnětsomañe. Chca tojánanyena ora, Pédrěbioye tbojaniyana: “Simón, ¿cotsomañe? ¿Ni mo nýe canýe hora jtsefšnama ndoñe tconjobená? 38 Smochtsefšna y Běngbe Bětsáftaca šmochtsencuéntaye, bacna soye jamama ndoñe chacmondócochěnguama. Tšěngaftanga ndegombre šmontseboše espíritoca Běngbe Bětsá joyeunayana, pero cuerpiñe ndoñe añemo quešmátsbomna ca.”

39 Jesús cachiñe tojesaná y Bëngbe Bëtsáftaca tbojanencuentá, cach palabrénga jayanëse. 40 Yojtabo orna, chë uatsjéundayënga cachiñe imnëtsomañe; chënga imojtsefshétana ocnaye causa, y ndoñe imontsobena ntšamo jojuana.

41 Chentšana, tojtésaná y tojtanabo ora tojanëyana: “¿Cabá šmotsomañe y šmotsचना? Nye nyëtšá; hora tocjobuache, Bëngbe Bëtsá Entšá tbojanbemá bacna soye amëngbe cucuatšíñe mochanjáboshjona. 42 Motsbananga, cuajna. Minjënga, atše boshjuaná ya entsebeconá ca.”

Uayayënga Jesús tmojánishache

(Mt 26.47-56; Lc 22.47-53; Jn 18.2-11)

43 Jesús cabá yojtsoyebuambnantscuana, Judas, canye chë bnëtsana uta uatsjendayënguentsá, tojánashjango y cháftaca ba entšanga espadëjangaca y ngarotbéngaca prontánënga. Chënga imojamna chë bachnangbe amëndayënga, ley abuátambayënga y judiëngbeñe bëtsëjemëngcá mándayëngbe ichmónënga. 44 Judas, chë boshjuaná, tojanjuabó ntšamo jamana entšanga jinýanýiyama ndëmua Jesús bëtsemnana. Chíyeca, yojáuyana: “Nda chajiauámocho, cha echántsemna; šmochjishache y cuedádoca šmochjuánatse ca.” 45 Chcasna, Judas Jesúsbioye tojanobeconá y tbojaniyana: “¡Buatëmbayá ca!”

Y tbojanámocho. 46 Chora chë entšanga tmojánishache y tmojanánatse.

47 Pero canya chentše Jesúseftaca yojtsemná, chabe espadëja yojenöngbotëntšena, y chë bachnangbe más uámana amëndayabe oservená canye matscuáše tbojtsanëštjango.

48 Y Jesús chë entšanga tojanatjá: “¿Ndáyeca šmojabo espadëjangaca y ngarotbéngaca atše jishachama, mo atše canye bacá uamana entšá cuaftsemncá ca? 49 Atše cada te tšëngaftangbeñe sëndëtsemna Bëngbe Bëtsabe bëts yebnoca abuátambaye, y ndocna te choca chešmánishache. Pero tšëngaftanga chca átšëftaca šmotsama, cachcá ntšamo Bëngbe Bëtsabe uabemana palabrénguiñe endayancá chaotsemnama ca” —tojánayana.

50 Chorna, nyëtsca uatsjéundayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonýá. 51 Canye bobontse Jesúsbioye ibojtséstoná, nye canye uafjantse entšëjua uichëtjoná. Cha chë entšanga tmojánishache, 52 pero chëngbe cucuatšíñe chë entšëjua jesáboshjonëse, chë bobontsna enašá yojtsachá.

Jesús tmojanánatse chë judiëngbe uámana amëndayëngbioye

(Mt 26.57-68; Lc 22.54-55, 63-71; Jn 18.12-14, 19-24)

53 Chentšana, Jesús tmojanánatse chë bachnangbe más uámana amëndayábioye; y chocna, nyëtsca chë bachnangbe amëndayënga, bëtsëjemëngcá amëndayënga y ley abuátambayënga tmojánenefjna.

54 Pedro bënocana Jesús tbojanasto, chë bachnangbe más uámana amëndayabe yebnentša chashjónscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsetbemana; iñe juachaca yojtsešbonena.

55 Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninýana. 56 Er masque banga Jesusbe contra uayátsenaye soyënga imojtsichamo, nyëtscanga ndoñe cachca soye montsanichamo.

57 Báseftanga imojotsaye y mēntšá Jesusbe contra, ndoñe ndegombre betsemncá tmojánayana: 58 “Bēnga cha fsēnjoyeuná mēntšá: ‘Atse quem Bēngbe Bētsabe bēts yebna, entsangbe pormana yebna, chantsepochóca; y unga tese inýe Bēngbe Bētsabe bēts yebna, entsángbeyeca ndēpormana yebna chanjēsjebo ca.’”

59 Pero masque chca imojtsichamo, nyetscanga ndoñe cachca soye montsanichamo.

60 Chorna, chē bachnangbe más uámana amēndayá yojotsbaná, nyetscangbe tsēntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chē acbe contra montsichamo soye ca?

61 Pero cha nýe iytēca yojtsemna y ndocá ibontsējuana. Chē bachnangbe más uámana amēndayá cachiñe tbojtētantjá, mēntšá: —¿Aca chē Cristo icomna, Bēngbe Bētsá chē nda fsēndadoranabe Uaquiñá ca?

62 Y Jesús tbojanjuá: —Arseñor, atse cha sēndmēna; y tsēngaftanga šmochanjinye, atse, Bēngbe Bētsá Entšá tbojanbemá, chē nyets obenana bomnabe catšbioica chantsetbemana, y celoca jantšetēshiñe chántsaboye ca.

63 Chora, chē bachnangbe más uámana amēndayá chabe uichētjonējuangá yojtsenántšajatanēca, puerte ibojtsetna causa, y tojánayana: —¿Ndayama más entsanga šochjátējaboto Jesusbe contra chamuayanama ca? 64 Tsēngaftanga šmonjouena ntšamo chē entsá entsichamcá, y chca Bēngbe Bētsabiana entsemna mo cha cuafjoyenguangcá, chē chabe Uaquiñá yomna ca cha tonjayana ora. ¿Ntšamo tsēngaftanga šmatjayana ca? —cha tojanéyana.

Y nyetscanga tmojánayana, cha ndegombre bacna soye yojtsebomna y jóbanama ibojtsemna ca.

65 Chorna báseftanga tmojanontsé Jesús buashētjnayana; jubiá imojútsbotse, imojtsejantšetaye y imojtsetjanaye: “¡Momalisiá nda tcmēnjantšetá ca!” Y chē Bēngbe Bētsabe bēts yebnocá josticiēngna imojtsajuebjantšetaye.

*Pedro tojánayana Jesúsbioye ndoñe bonjanabuátma ca
(Mt 26.69-75; Lc 22.56-62; Jn 18.15-18, 25-29)*

66 Pédrēna, tsmanoca yojtsemna chashjoca. Chora, canýe shembása, chē bachnangbe más uámana amēndayabe oservená yojáshjango; 67 y Pédrēbioye tbojáninye ora, cha iñe juachaca yojtsanšbonena, yejuana ibojonýinýiye y tbojanayana: —Acnaca, Jesús Nazaretocáftaca conjánana ca.

68 Pero Pedro tojánayana chábioye ndoñe bonjanabuátma ca; y mēntšá tojánayana: —Ndayama cojtsichámuama ndoñe quetsátstatsēmo, ni quešnatēsertana ca.

Y shjoye, amashjuanóntscoñe yojábocna; y chora canýe ngallo yojacánta. 69 Chē oservená cachiñe Pédrēbioye tbojáninye y tojanontsé chē ínýenga jauyanana: —Muánaca Jesusbe uatsjendayēnguentsá entsemna ca.

70 Pero chana cachiñe tojánayana Jesúsbioye ndoñe bonjanabuátma ca. Chentšana, chē chentše imojtsemnēnga Pedro tmojátaniyana: —Ndegombre aca chēnguentsá contsemna; ácnaca Galileocá contsemna ca.

71 Pero Pedro tojanontsé ichámuana: —¡Bēngbe Bētsá chašotsecastigá ndoñe ndegombre soye stsichámese ca! —y yojóntša júrayana— ¡Atse chē entsá ndoñe quetsatabuatma, ndabiana tsēngaftanga šmontsatsētsná ca!

72 Y cachora chë ngallo uta soyama yojacánta, y Pedro yojenójuaboye ntšamo Jesús tbojanianama: “Ngallo cabá uta soye ndécánta ora, aca unga soye cochanjayana ndoñe šconduabuatma ca.” Y tojanontšé enobošachiyana.

15

Jesús Pilátbioye tmojanánatse

(Mt 27.1-2, 11-14; Lc 23.1-5; Jn 18.28-38)

1 Tojanbinÿna ora, chë bachnangbe amëndayënga, chë judiëngbeñe bëtšjemëngcá amëndayënga y ley abuátambayënga cánÿentšé tmojánenefjna, nÿetsca chë luarentša más uámama mandayëngaftaca, jenóyeunayama ntšamo jamése Jesús jóbama. Jesús tmojanëcuébatséca y tmojanánatse, y Pilato, chë Judeoca mandadbe cucuatšifne tmojánboshjona.

2 Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aifne, aca ndegombre yomncá tcjayana ca.

3 Chë bachnangbe amëndayënga bëtscá soyënga Jesusbe contra imo-
jtsichamo; 4 chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minÿe; bëtscá soyënga acbe contra montsichamo ca.

5 Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mt 27.15-31; Lc 23.13-25; Jn 18.38–19.16)

6 Cada Bashco fiesta ora, Pilato yojanamana canÿe utamená jëtšboshjonana, ndánaca entšanga tmojuabuayaná. 7 Chë tempo yojamna canÿa Barrabás ca uabainá; cárceloye inautámama chabe enutëngaftaca. Chëngna entšanga tmojtsanëbaye, mandadëngbe entšangftaca imojentsjaná ora. 8 Chora, entšanga tmojánashjajna y tmojanontšé Pilátbioye jauyanana, ntšamo Bashco fiesta ora jamama yojanamancá chaomama. 9 Y Pilato tojanëjua: —¿Tšëngaftanga šmojtseboše tšëngaftangbe rey atše chjëtšboshjona ca?

10 Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšifne tmojánboshjonama.

11 Pero chë bachnangbe amëndayëngna entšanga tmojanañemó chamuenbouénanama, Pilato jauyanama chëngbiama Barrabás chabuatsboshjona ca. 12 Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

13 Y chënga tmojanáyebuachena: —¡Motsecrucificá ca!

14 Y Pilato entšanga tojanëyana: —¿Ndáyeca? ¿Ntšamo cha tojobuach-
janguá ca?

Pero chëngna más añémoca tmojtëtanayebuachena: —¡Motsecrucificá ca!

15 As Pilato, entšangftaca tšabá joquédama yojtsebóseyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentšana soldadëngbe cucuatšifne tbojánboshjona, chamocrucificama.

16 Chentšana, chë soldadënga Jesús tmojanánatse chë mandadbe bëtš yebnentša chashjoye, y nÿetsca soldadënga tmojánachembo chamobëconama. 17 Shbuenda uafjatsenga uinÿna entšayá mo reycá tmojanichëtjo; canÿe coronësha tmojanapormá uchmašëfjangaca y

tmojanabestšajó. ¹⁸ Y chentšana tmojanontšé jachuayana: “¡Bayté judiëngbe Rey cochtsemna ca!”

¹⁹ Canÿe niñëfjaca Jesús bestšašiče imojtsëtsjanjnaye, imojtsebuashëtjnaye, y chabe delante imojtsofshëntsamëntšenaye. ²⁰ Y chca imnaftsáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y pueblo chaboye tmojanánatse jacrucificama.

Jesús tmojanrucificá

(Mt 27.32-44; Lc 23.26-43; Jn 19.17-27)

²¹ Chora, canÿe entšá chëjana yojsatashajuana, Simón ca uabainá, Cirene pueblócá, Alejandro y Rufbe taitá; jajocana yojsatachnëjuana; y chë soldadëngna imojuatária Jesusbe cruz jëtsocutsayama.

²² Jesús tmojanánatse Gólgota ca uabaina luaroye (hebreo biyañe endayana “Obanabe Bestšashe Luare ca”); ²³ y tmojanabuiyé vínoye mírraca enájuañiye, pero Jesús ndoñe yonjuáyëngacñe. ²⁴ Y chentšana tmojanrucificá; y chabe entšayangamna, tsbanánoye tmojanëtšena jinÿama ndayá cada ona yochjëtsanácñama.

²⁵ Cachëse, base mošenana ora Jesús tmojanrucificá. ²⁶ Y chabe bestšaše juatsboicna canÿe uabemana soye tmojananjo. Chiñe yojëtsayana ndáyeca cha tmojanrucificama, mëntšá: MUA CHË JUDIËNGBE REY ENDMËNA ca.

²⁷ Y cháftaca útata bacna soye ochjajnayátnaca tmojanacrucificá, canÿa chabe catšbioica, y ínÿana chabe uañicuayoica. ²⁸ Chca cháftaca tmojanma, chaochnënguama ntšamo Bëngbe Bëtsabe uabemana palabrënguicñe chabiama iuayancá, mëntšá: “Y chábioye tmonjáninÿe mo chë puerte bacna soye amënguentsá canÿa cuaftsemncá ca.”

²⁹ Y chëjana imojtsachnëjuana entšanga, Jesús imojtsóyenguaye, imojtsobestšfshanenaye y imojtsatsaye: “¡Aca chë Bëngbe Bëtsabe bëts yebna cochtsänenasatajchca y ñye unga tese cochtanjebo, ³⁰ cach aca mentsbocá y cruzocana matastjango ca!”

³¹ Cachcá chë bachnangbe amëndayënga y chë ley abuátambayënga imojtsáboyejuana, y chënga imojtsenatsëtsnaye: “Cha ínÿenga tojëtsatsebacá, pero cachá jëntsbecama ndoñe quenátobena. ³² ¡Chë Cristo, chë Israeloca Rey! ¡Cruzocana chauatastjango, bënga jinÿama y chábeñe chaftsošbuachema ca!”

Y cháftaca ibojtsecrucificanátnaca ibojtsóyenguaye.

Jesús tojanóbana

(Mt 27.45-56; Lc 23.44-49; Jn 19.28-30)

³³ Nÿetsto orscana y las tresëntscoñe, nÿets quem luare yojtseibétata. ³⁴ Chca orna, Jesús chabe biyañe tojanáyebuachena: “Eloi, Eloi, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonÿá ca?”)

³⁵ Chca tmojanuena ora, báseftanga chentše imojtsemnënga imojtsichamo: “Mouenënga, chë Bëngbe Bëtsabe juabna oyebuambnayá Elías bontsechembuana ca.”

³⁶ As chora, canÿa tojanótjajo, untja vínoyeca canÿe esponjëshe tojanfchecuacú, canÿe niñëfjiñe tojananguësëtjo y Jesúsbioye tojanbeconá chaofšema; y tojánayana: “Cachcá mochjonÿaye, er Elías tayochjabo jabátëstjanguama ca.”

³⁷ Pero Jesusna, jabuache tojanoyó y tojanóbana. ³⁸ Y chë Bëngbe Bëtsabe bëts yebnoca yojújonýana entšējua tsëntsaca yojtsenájataye, tsbanánocana fshantsoye. Chējua bënëjua inauamna y chë tsatsëntsaca inaújonýana. ³⁹ Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninýe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

⁴⁰ Básefta shembásengnaca chentše imojtsemna, bënocana imojtser-reparana; chënguentše imojtsemna María Magdalena; María, Santiago chë más basa y Josebe mamá; y Salomé. ⁴¹ Chë shembásengna Jesús tmojanasto y tmojanájabuache cha Galileoca yojamna ora; y inýe ba shembásengnaca chentše imojtsemna, chë cháftaca Jerusalenoye tmojánanga.

Jesús tmojanatbontsá

(Mt 27.57-61; Lc 23.50-56; Jn 19.38-42)

⁴² Chë yëfsana ochnayté yojtsémnayeca, cach te yojánamna saná japróntana chë yëfsana jasama. Ya yojtseibétatana ora, ⁴³ Pilato yojtsemnoye tojána canýe boyabása, José ca uabainá, Arimatea pueblócá; cha inamna canýe chë luarentša uámana mandayënguentšá. Cha Bëngbe Bëtsábeñe yojtsošbuáchiye y yojanobátmana chabe amëndayana chaóshjanguama. Nduatjca Pilátbioye Jesusbe cuerpo tbojanotjañe. ⁴⁴ Pilato yojenjnaná Jesús tša betscó yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojésemnana. ⁴⁵ Chë soldadëngbe amëndayana Pilátbioye ibojauyana Jesús ya obaná yojtsemna ca; y as chora, Josébioye tbojanlesenciá Jesusbe cuerpo chabotsámbañama. ⁴⁶ Chora, José canýe uafjantse lino entšējua tojanabuamé, Jesusbe cuerpo cruzocana tbojanéstjango, chë lino entšējuaca tbojanandmaná, y canýe cuevëshiñe ndëtsbeñe pormánëshiñe tbojanjajó; chentšana canýe ndëtsbé tojansjoná, y chë cuevëshoye amashjuanentše tojánachto. ⁴⁷ María Magdalena y María, chë José y Santiagbe mamá, tbojáninýe ndayentše Jesusbe cuerpo tbojanjájoma.

16

Jesús tojtanayena

(Mt 28.1-10; Lc 24.1-12; Jn 20.1-10)

¹ Ochnayté tojanopasá ora, María Magdalena, María Santiagbe mamá, y Salomé, botamana uanguëtse bėjaye tmojanabuamé, chíyeca jama Jesusbe cuerpo janëtjuama; ² y tmenguse, chë semana bojatšéntena, cabá cachëse, shinýe yojábocna ora, chë cuevëshoye tmojána. ³ Imojtsaye ora imojtsayénatsëtsnaye: “¿Chë cuevëshoye amashjuanentša ndëtsbé nda bochtsabuajuána ca?”

⁴ Pero imojontješiyé ora, tmojáninýe chë cuevëshoye amashjuanentša bëts ndëtsbé, chentšana juanániñe. ⁵ As chënga choye tmojánamashjna y choye tmojáninýe canýe bobontse bën uafjantse entšējua uichëtjoná, chë cuevëshentša catšbioica inétsotbemañe; y chë shembásenga imojouatjaná. ⁶ Pero chë bobontse tojanéyana: “Ndoñe matauatjëngana; tšëngaftanga šmondënguá Jesús Nazaretocá, chë tmonjancrucificá cha. Cha ya ton-tayena; muentše ndoñe quenátsmëna. Minýënga cha enjëftsejajonentše. ⁷ Motsajna, y Pedro y chë inýe uatsjëndayënga šmochjáuyana: ‘Jesús

tšëngaftangbe natsana Galileoye echanjá. Choca cha šmochanjinye, ntšamo cachá tmojanëyancá.’ ”

⁸ As chë shembásenga betscó chë cuevëshentšana tmojésanbocana, er puerte auatjanánënga imojtsemna y ngmëmnyayënga imojtsemna; y chë causa, chë soyama ndocná tmonjanianyana.

Jesús, María Magdalénbioye tbojánëbëbocna
(Jn 20.11-18)

⁹ Jesús tojtanayenentšana, chë semana bojatsënté, Jesús natsana María Magdalénbioye tbojánëbëbocna. Tempo Jesús chábensana canýsëfta bacna bayëjënga tojtanébuacana. ¹⁰ Cha Jesúsbioye ainá tbojáninýentšana, tojána Jesúseftaca imojánajnénga chama jaúnayama; chëngna ngménaca y šachénaca imojtsemna. ¹¹ Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninye ca tmojanuena ora.

Uta ustonata Jesúsbioye tbojáninye
(Lc 24.13-35)

¹² Chentšana, uta ustonátbioye, básefta yebnénga yojamna luaroye ibojétsaye ora, Jesús tojánëbëbuacna, mo inýa cuaftsemncá. ¹³ Chora chata tbojésanshëcona chë inýenga chama jacúntama; pero chëngna cach ndoñe ndegombre ca tmojanjuabó.

Jesús chë uatsjëndayënga tojanichamó, Bëngbe Bëtsabe soyëngama nýetsquénache jábuayenama
(Mt 28.16-20; Lc 24.36-49; Jn 20.19-23)

¹⁴ Cabana, Jesús chë bnëtsana canýe uatsjëndayënga tojánëbëbuacna, chënga imojtsesaye ora; y tojanécácana chë cha ainá yojtsemnama ndoñe ndegombre yontsemna ca tmojánjuaboma y nýets ainánaca chábeñe ndoñe montsanošbuachema, er cha ainá tmojáninýënga chama tmojanacuntá ora, chca ndoñe ndegombre yontsemna ca chë uatsjëndayënga tmojánayana.

¹⁵ Chentšana Jesús tojanéyana: “Nýets luarëngoye motsajna, y nýetsca entšanga chë tšabe noticiëngama šmochtsabuayiynaye. ¹⁶ Nda chiñe chaojtsošbuaché y tšëngaftanga chašmojuabaye, cha atsbocaná echántsemna; pero nda ndoñe tontsošbuaché, cha nýets tempo castiganá echántsemna. ¹⁷ Chë átsbeñe ošbuáchiyënga ndegombre soyënga imojtsabuayiynama, entšanga mëntšá mochántsetatšëmbo: atše jótšëmbonëse, átsbeñe betsošbuachéyeca, entšángbentsana bacna bayëjëngbe juabna mochántábocna; tempo chënga ndmabiyañe mochantsóyebuambnaye. ¹⁸ Masque nderado cucuatšinë mëtšcuayënga tmojishache o veneno tmojofšënga, ndocá quemochatspása; y šoquëngbeñe cucuatšënga chamojácjá ora, chënga shnánënga mochántatsmëna ca” —Jesús tojanéyana.

Jesús Bëngbe Bëtsábioye tojtaná
(Lc 24.50-53)

¹⁹ Bëngbe Utabná Jesús jóyebuambayama tojanpochocá chentšana, celaye cha tmojtanatsbaná, y uámana luarentše, Bëngbe Bëtsabe catšbioica yojtóbema jtsemándayama. ²⁰ Y chë uatsjëndayënga tmojánbocana y Bëngbe Bëtsabe soyëngama nýetsquénache entšanga tmojanabuayená. Cach Bëngbe Utabná chënga yojanëjabuáchana,

y yojánama entšanga chamotsetatšëmbuama chë buayenana soye ndegombre Bëngbe Bëtsabe soyënga bëtsemnama, chë uatsjëndayënga bëts soyënga jamama obenana chamotsebomnama cha jtsamëse.

San Lucas

Jabojátšama

¹ Ba entšanga Jesusbe historia tmojuábema, ntšamo bēngbeñe ndegombre tojopasacá. ² Chē historia juabemamna, chēnga tmojanuena ntšamo Jesusbe uatsjēdayēnga y inye entšanga chabiamma innencuentayacá. Chē entšangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiēnga entšángbioye tmojanabuayená. ³ As, átšnaca sēnjontsé cuedádoca juanoticiána lempe ntšamo Jesusbiamma imojtsichamcá, tojanobojaťsentšana mēntscoñe. Mora šontsinýana tšabá yojtsemna acbiamma juabemana ntšamo ndegombre yomncá, uámana taitá Teófilo, chē tijuannoticiá soyēngama, ntšamo ndegombre bēngbeñe tojopasacá. ⁴ Ba soyēnga Jesusbiamma tcmojabuátēmbanga, y atše sēntseboše aca chacotsetátšēmo, ntšamo tcojouencá ndegombre yomnana.

Canye ángel tojanabuayená Juan chē Ubayaná jónýnama

⁵ Herodes Judea luaroca rey inamna ora, yojamna canye judiēngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentšana entšá inamna (Aarón, chē más uámana bachnangbe natsana amēndayá). ⁶ Chatna tšabá amata ibnamna Bēngbe Bētsabe bominyiñe, y ntšamo Bēngbe Bētsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. ⁷ Básenga tondaye ibonjánabamna, Isabel šešona jtsebomnana ndobena causa, y chatna ya bētsanánata ibojtsemna.

⁸⁻⁹ Chē bachnanga Bēngbe Bētsabe bēts yebnentše tmojtsoservena ora, sempre imojanamana jabocacayana, nda tšabá tbojtsonyená, Bēngbe Bētsábioye atschuanaye luaroye cháuama incienso jajuinýiyama. Canye, Zacaríasbe entšanga Bēngbe Bētsabe bēts yebnocá, Bēngbe Bētsábentše imojtsoservena orna, Zacaríasbioye tšabá ibojonýena; y chca, cha ibojotóca jana incienso jajuinýiyana. ¹⁰ Zacarías, incienso yojtsejuinýnantscuana, ba entšanga shjoca imojtsemna, Bēngbe Bētsáftaca encuéntaye. ¹¹ Nye ndeolpe, Bēngbe Utabnabe canye ángel tojanonýná chē incienso jajuinýiyama altarentša catsbioica. ¹² Zacarías chábioye tbojáninye ora, tojanenýnaná y corente uatjana tbojanábuache.

¹³ Chora chē ángel tbojanianyana: —Zacarías, ndoñe matauatjana. Bēngbe Bētsá tonjouena ntšamo tconjaimpadacá. Acebe shema Isabel canye šešona bochántsebomna, boyabásetema, y chana Juan ca cochjuabayé. ¹⁴ Chama aca corente oyejuayá cochántsemna, y bētscá entšanga mochanjóyejuaye aceba uaqiñá tojonýnama. ¹⁵ Er cha, Bēngbe Bētsabiamma canye uámana entšá echántsemna. Ndocna te queochaisofsiye vínoye, ni jabuáchiye. Chē Uámana Espiritu chabe ainaniñe echantsemándaye, cha cabá ndonýna orscana. ¹⁶ Banga Israeloca entšanga, ntšamo cha chaojayanama mochanjontsé joyeunayana Bēngbe Bētsá, chēngbe Utabná. ¹⁷ Cha echanjášhango chē Bēngbe Bētsabe Uámana Uabuayanabe natsana, y echántsebomna obenana y canye espíritu ntšamo chē Bēngbe Bētsabe juabna oyebuambnayá Elías inabomncá.

Chabe natsana echanjášhango, bëtsëtsanga chëngbe básengaftaca ndoñe chamondëtsentsjanama, y chë nduauenanënga cachiñe chamotsatsjuabnama ntšamo chë Bëngbe Bëtsabe bominñiñe tšabá amënga mondbetsejuabnaya. Y chca, entsanga cha echantsapróntaye Bëngbe Utabná jabama orscama ca —chë ángel tbojaniyana.

¹⁸ As Zacarías chë ángelbioye tbojantjá: —¿Ntšamo atše stjobenaye jtsetatšëmbuana chë šcontsatsá soye ndegombre bëtsemnama? Er atše ya bëtsëjema sëntsemna y atšbe shémnaca cachá ca.

¹⁹ Chora chë ángel tbojanjuá: —Zacarías, atše ángel Gabriel sëndmëna; atše Bëngbe Bëtsábioca sëndoserverna. Cha šonjichmó chë tšabe noticiënga aca jauyanama y juenayama. ²⁰ Morna, chë cbontsatsá soyiñe ndoñe quecatošbuaché causa, ndëbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

²¹ Chë ángel Zacaríaseftaca yojtsóyebuambnantscuana, entsanga shjoca Zacaríasbiamá imojtsobátmana, y mëntšá imojtsejuabnaye: “¿Ndayeca tša bën Bëngbe Bëtsabe bëts yebnentše ibojtsobiamná ca?” ²² Zacarías tojtan-bocna ora, ndoñe yontsobena chë entsángaftaca jóyebuambayana. Chënga tmojántatšëmbona, chë Bëngbe Bëtsábioye atschuanayentše Zacarías mo ot-jenayoquécá Bëngbe Bëtsábiocana canye soye tojáninñama, er chëngbioye jatšëmbombonana yojáuyana, ndëbiá yojoquéda causa.

²³ Chabe tempo, chë Bëngbe Bëtsabe bëts yebnentše jtsetrabájayama tojanpochocá ora, Zacarías cachabe yebnoye tojtaná. ²⁴ Chentšana baseftaytese, chabe shema Isabel ngomamaná yojoquéda, y chë causa, chë shema shachna ishinñe cach tsoca yebnentše totanoquéda. ²⁵ Cha mëntšá yojtsichamo: “Bëngbe Utabná mora atšbiamá tojtenojuabó, entsángbentše atšbe ngmënana jtsebojuánama, básenga tondaye bëntsabamna causa ca.”

Canye ángel tojanabuayená Jesús jónñnama

²⁶ Isabel chnënguana ishinñe ngomamaná yojtsemna ora, Bëngbe Bëtsá, ángel Gabriel tbojanichmó Galilea luaroye, Nazaret ca uabaina puebloye, ²⁷ canye shembása María ca uabainá jauatsëtsayama. Mariyña cabá boyabása nduabuatomá inamna, pero Joséftaca jobouamayama tbojanšbuachená. Y Josena, rey Davídbentšana entsá inamna. ²⁸ Chë ángel Maríybioye tojána y mëntšá tbojanчуá: —¡Mouena. Bëngbe Bëtsá tšabe bendición acbiamá tonjama! ¡Bëngbe Utabná ácaftaca entsemna ca!

²⁹ Chca tojanuena ora, María yojenjnaná chë soyama, y yojtsejuabnaye ndáyeca chë ángel chca tbojanчуama.

³⁰ Chora chë ángel tbojaniyana: —María, ndoñe matauatjana, Bëngbe Bëtsá entsama tšabe bendicionënga chacotsebomnama. ³¹ Aca ngomamaná cochanjoquéda y canye šëšona boyabásetema cochántsebomna, y chana Jesús ca cochjuabaye. ³² Cha puerta echantsámama, y entsangna Bëngbe Bëtsabe Uaquiñá ca chábioye mochantsábobuatma. Y Bëngbe Bëtsá chë Utabná, chábioye canye rey bochanjábema, ntšamo David yojamncá, ³³ y Jacobëbentšana entsanga nñetsca tescama echantsamëndaye, y chabe mándayana ndocna te queochaisopochóca ca —chë ángel tbojaniyana.

³⁴ Chentšana María chë ángelbioye tbojantjá: —¿Ntšamo chca yochjopása, cabá ndoñe boyá sëntsebomñese ca?

³⁵ Y chë ángel tbojanjuá: —Chë Uámana Espíritu echanjabo nÿets ácebeñe, y Bëngbe Bëtsabe obenánaca ngomamaná cochanjoquéda. Chabe obenana mo jantšetêshcá cmochanjabuútsbotse; chíyeca chë echanjónÿna šešona Uamaná echántsemna, y chábioye Bëngbe Bëtsabe Uaquiñá ca mochantsábobuatma. ³⁶ Mouena, Isabel, acbe primá, canÿe šešona bochántsebomna, masque ya bëtsananá cha entsemna; chë “šešona nd-bomná ca” monjanabobuatmá, mora ya chnënguana ishinÿe ngomamaná entsemna, ³⁷ er Bëngbe Bëtsá lempe jamama endobena ca —cha tojánayana.

³⁸ Chora María chë ángelbioye tbojanियana: —Bëngbe Bëtsabe oservená atše séntsemna. Bëngbe Bëtsá átšeftaca chaoma ntšamo šcojauyancá ca.

Y chentsana chë ángel tojtsatanoñe.

María tojána Isabel jabuáchama

³⁹ Chentsana, María tojanoprontá y tojanochëmo canÿe puebloye, Judeoca tjañenache luariñe. ⁴⁰ Chocna cha, Zacaríasbe yebnentše tojánamashëngo y Isabélbioye tbojanchuá. ⁴¹ Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chë Uámana Espíritu Isabélbeñe tojánamashëngo chabe ainaniñe jtsemándayama. ⁴² Chcasna, Isabel jabuache tojánayana: —¡Bëngbe Bëtsá acbiama más tšabe bendicionënga entsama nÿetsca shembásengbiama, y chë cochántsebomna šešonbiámnaca cachcá! ⁴³ Atše merecido taitsatobuajoñe, atšbe Utabnabe mamá chašubobuáchama; ⁴⁴ er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó. ⁴⁵ ¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

⁴⁶ Chora María tojánayana:

“Nÿets ainánaca Bëngbe Utabná chantsadorana,

⁴⁷ y Bëngbe Bëtsá, atšbe Atsbocayabiama corente chanjóyejuaye.

⁴⁸ Bëngbe Bëtsá atšbiama tojtenojuabó, atše chabe oservénëjema.

Er morscana muentša entšanga nÿetscanga puerte oyejuayá ca šmochantsábobuatma.

⁴⁹ Bëngbe Bëtsá, chë nÿets obenana bomná, chabe obenánaca bëts soyënga atšbiama tonjama.

¡Bëngbe Bëtsá puerte Uamaná ca entsabaina!

⁵⁰ ¡Morsca entšanga y más chcoyënga, chábioye yeunanëngbiama, cha sempre bochántsengmena!

⁵¹ Cha, chabe obenánaca bëts soyënga tojama,

y chë nÿe cachënga bëtsëtsanga enobiamnayëngbe juabna tojtsepochozá;

⁵² reyëngbioye chëngbe mándayentšana tojtsatsatše;

pero chë nÿe cachënga bëtsëtsanga ndenobiamnayëngbioye, uámanënga tojábiamma.

⁵³ Chë shëntseca imomnëngbioye, chamosama bëtscá cha tojatsatá, pero chë bomnëngbioyna tondaye tonjatsatá.

⁵⁴ Cha tojanëjabuache chabe entšanga Israeloca, chabe oservénënga, y ndoñe tbonjánebnatjëmbo jtsalastemánana,

⁵⁵ nÿetsca tescama chë Abraham y chábentšana entšángbioye,

ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

56 Mariyna unga ishinÿe Isabélaftaca tojanoquedá, y chentšana cachabe yebnoye tojtaná.

Juan chë Ubayaná tojanonÿná

57 Isabel jtsesócanama tojanóntsabuache ora, canÿe šešona boyabásetema tojanonÿná. 58 Isabelbe juachañe oyenënga y chabe pamíllanga tmojántatsëmbona ntšamo Bëngbe Bëtsá chábioye ibojalastemama, y chama corente Isabélaftaca tmojanoyejuanga. 59 Chë šešona posuftayté yojtsebomna ora, tmojánashjango y chëtémbioye chë más delicadentše base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá; 60 pero chabe mamá tojanëyana: —Ndoñe. Quem šešona echantsabaina Juan ca.

61 As chënga Isabélbioye tmojaniyana: —Acbe pamíllangbeñe ndocná chca quenatabaina ca.

62 Chora chënga jatsëmbombonana Zacaríasbioye tmojantjá, ntšamo chë šešona chaotsabainama cha yojtseboše ca. 63 Zacaríasna jatsëmbombonana canÿe tablëbé tojanëyá y chiñe tojanábema: “Cha entsabaina Juan ca”. Y chë causa, nÿetscanga ojanánënga imojtsemna. 64 Y cachora Zacarías jóyebuambayama yojtobenaye, y yojontsé Bëngbe Bëtsábioye jëtschuayana. 65 Chë juachañe oyenënga nÿetscanga tmojanëuatjaná, y Judeoca nÿetsca chë tjañenache luariñe entšanga chë soyëngama imojtsencuëntaye. 66 Nÿetscanga chë soyëngama tmojántatsëmbona ora, chëngnaca corente chama imojtsejuabnaye y mëntšá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

Zacarías, Bëngbe Bëtsábioye jëtschuayama

67 Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

68 “¡Chë Utabná, chë Israeloca entšangbe Bëtsá matschuanga, er cha tonjabo chabe entšanga jabújabuachama y jabátsebacama!

69 Cha bochanjíchmuca canÿe atsebacayá puerta obenana bomná, y cha echántsemna Bëngbe Bëtsabe oservená Davidbentsana entšá;

70 ntšamo Bëngbe Bëtsá bayté entsemna, chë chabe juabna oyebuambnayëngbiajana,

chë chábenga imomnëngbiajana bënga šojanašebuachenacá, mëntšá:

71 Cha canÿa bochanichmuá bëngbe uayayënga y nÿetsca uaboyënjëngbiana bënga jabátsebacama;

72 bëngbe bëtsëtsangbioye jálastemama, y jenójuaboyama y jamama chabe uámana trato,

73 ntšamo Bëngbe Bëtsá, bëts taitá Abrahámbioye tbojanšbuachenacá.

74 Cha tbojanšbuachená bëngbe uayayëngbiana bënga jabátsebacama, chca, bënga ndauatjcá Bëngbe Bëtsá jasérviam,

75 y chabe entšangcá, nÿetsca soyënguiñe tšabá amënga, Bëngbe Bëtsabe delante nÿetsca te bëngbe vidënguiñe jëftsiyenama.

76-77 Y aca, atšbe básetemna, Bëngbe Bëtsabe juabna oyebuambnayá ca cmochantsábobuatma,

entšángbioye Bëngbe Bëtsabe soyëngama cochtsabuayiynama,

Bëngbe Utabná cabá ndáshjango ora, bacna soyënga amana chamua-jbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

78-79 Bëngbe Bëtsá bënga puerte şualastemánayeca, canya bëngbe juabnënga binýnaya bochanjíchmuu, bënga chë bacna soyënga causa mo ibetiñcá y obanëngbe luarentscá vida bomnëngbioye jabátsebacama, y jabuátambama ntşamo natjëmbana jtsiyenana ca” —cha tojánayana.

⁸⁰ Chë básetema yojontşé jobóchana y chabe espíritnacá puerte. Bayté, entşanga ndoyena luarënguenache cha yojëftsiyena, Bëngbe Bëtsá Israeloca entşangbioye cha tojáninýanýentscuana. Chentşana, chamuábuatmanamna tojanontşé Israeloca entşangbeñe jóyebuambayana.

2

Jesucristo tojanonýná (Mt 1.18-25)

¹ Chë tempo yojamna canye Romoca bëts mandado, Augusto ca uabainá; y cha, chë natsanama tojanmandá nýetsca entşanga chamuenábemama. ² Chë soye tojanochnëngo Cirenio ca uabainá Siroca mandado yojamna ora. ³ Chamna, nýetscanga tojanotocá jtangana jenábemëngama, cada ona ndëmoca chëngbe bëts taitanga imojëftsiyena puebloye.

⁴ As, Josénaca Galilea luarentşana Nazaretocana yojëftsebozna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José, Davídbentşana entşá inámnayecna, choye jenábemama tojtaná. ⁵ Mariáftaca tojána jenábemama, y muana tbojanşbuachená Joséftaca jobouamayama. María ngomamaná yojtsemna, ⁶ y Belenoca ibojtsemnëntscuana, chë ora tbojanóntşabuache jtseşócanama. ⁷ Y chentşe María ibojtsebozna chabe natsana şeşona, canye boyabásetema. Posadoca tondaye luare yontsemna causna, chata nýe uacnëngbe átana tambuentşe tbojanoquedá. Y Jesús tojanonýná orna, María tbojtanëntscajuá y canye bachetémiñe tbojanajó.

Chë angelotëmënga y chë oveshënga abujënyënga

⁸ Belén béconana, chë ibeta, oveshënga abujënyënga shëntsjoça cachëngbe oveshëngaftaca imojtsemna. ⁹ Nýe ndeolpe, Bëngbe Bëtsábiocana canye ángel tojánëbëbuacna, y Bëngbe Bëtsábentşana corente yojtsebuashinýinýana chëngbe shëconániñe. Chama chënga puerte imojochauatjaná.

¹⁰ Chora chë ángel tojanëyana: “Ndoñe matauatjëngana. Sënjabo tşabe soyënga tonjopasama jábuayenama, nýetscanga chamóyejuama. ¹¹ Mora chë David tonjanonýná pueblentşe canye şeşona tonjonýná. Cha tşëngaftangbe atsebacayá echántsemna y tşëngaftangbe entşangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. ¹² Ndegombre chca entsemnama mëntşá şmochanjátatşëmbona: canye şeşona ntsacjuaná y uacnëngbe bachetémiñe jajona şmochanjínýena ca” —cha tojanëyana.

¹³ Cachora, celocana mallajta angelënga chë natsana ángelbentşe tmojánbocana y Bëngbe Bëtsábioye mëntşá imojtsatschuanaye:

¹⁴ “¡Bëngbe Bëtsá, celoca entsemná matschuanga!

Bëngbe Bëtsábioye yeunanëngbiam, Bëngbe Bëtsá corente entsoyejuá; quem luariñe chëngbeñe puerte tšabá chaotsemna ca.”

¹⁵ Chentsana chë angelënga celoye tmojésanshëcuana. Y chora chë oveshënga abuañëñyanga tmojanontsé jeniyanana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye sojanýanyé ca.”

¹⁶ As betsko tmojána y tmojánanyena María, José y chë šešonatema bachetémiñe jajoná. ¹⁷ Chë šešona tmojáninye ora, chënga tmojanacuntá Jesusbe bëtsétsata y chë ínýengbioye, ntšamo chë šešonbiam chë ángel tojanëyancá. ¹⁸ Nyetscanga chë tmojanuenënga tmojanenjnana ndayá chë oveshënga abuañëñyanga imojtsacúntama. ¹⁹ Pero Mariyna nýe cachabe ainanoca quem soyëngama más bën inétsenojuabnañe.

²⁰ Chentsana, chë oveshënga abuañëñyanga tmojtaná Bëngbe Bëtsá atschuanaye, ndayá tmojáninyama y tmojanuenama. Nyetsá tojanopasá lempe ntšamo chë ángel tojanëyancá.

Bëngbe Bëtsabe bëts yebnoye Jesús tmojanamba

²¹ Posufta te tojánashjache ora, chë basetémbioye chë más delicadentše base bobachtema tmojantëtše, Bëngbe Bëtsabe entsá bëtsemnama chaotsinýnama, ntšamo judiënga imojanamancá; y Jesús ca tmojanabaye, ntšamo chë ángel tbojaniancá, María cabá ndoñe ngomamaná yontsemna ora.

²² Y chë tempo tojanóshjango, ndaye ora José y María yojtsamna jamana ntšamo Moisesbe leyíñe iuayancá, ndayá jamama yojanmëncá, canýe shembása Bëngbe Bëtsabe delante tšabia jtsatsmënama, canýe šešona tbojtsebomnentšana. Asna, Jerusalenoye tbojánata y chë básetema tmojanamba, Bëngbe Bëtsabe bëts yebnoca jinýinýiyama, ²³ ntšamo chë Bëngbe Utabná Moisésbioye tbojaniyé leyënguiñe iuayancá, mëntsá: “Canýe yebnentše chë natsana šešona boyabása tojtsemnëсна, Bëngbe Bëtsábioye cha jinýinýiyana chábioye chabotseservënama ca.” Chcasna, chë básetema Bëngbe Bëtsabe bëts yebnoye tmojanamba. ²⁴ Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyíñe yomandancá. Chiñe mëntsá endayana: “Chë natsana šešona chaojonýná ora, boyabássetema tojtsemnëse, janshana šmochjuamba uta fchetnatémata o uta šešona palomatémata, Bëngbe Bëtsá jëtschuayama ca.”

²⁵ Jerusalenoca inamna canýe bacó, Simeón ca uabainá; cha inamna nýetsca soyënguiñe tšabá amá, y yojaniyena ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canýa Israeloca entsanga cháuatsebacama. Y chë Uámana Espiritu chabe ainaniñe yojtsemna; ²⁶ chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjëftsinyá. ²⁷ Chë Uámana Espiritu tbojanmandáyeca, Simeón Bëngbe Bëtsabe bëts yebnoye tojána; y Jesusbe bëtsétsata chë básetema tmojanamba ora, ntšamo Moisesbe leyíñe iuayancá chabiamama jamama ora, ²⁸ Simeón tbojanocutsá y Bëngbe Bëtsábioye tbojtanchuá. Cha mëntsá tojánayana:

²⁹ “Bëngbe Utabná, mora šmolesenciá, atše acbe oservená natjëmbana jóbanana,

er ya tconjama ntšamo šconjanšbuachenacá;

³⁰ atše chë entsangbe Atsebacayá sënjinýe.

31 Aca cha tcojichmó n̄yets luarenache entsangbiana.

32 Cha chē ndoñe judiēngbe juabnēnga bin̄ynayá echántsemna; y chábeyeca, n̄yets quem luarentse mochanjátatšēmbona, chē acbe entsangbiana, Israeloquēngbiana ca” —cha tojánayana.

33 José y María ibojenjanata ntšamo Simeón Simeón Jesusbiana yojtsichámuama. 34-35 Chentsana, Simeón Bēngbe Bētsábioye tbojanimpadá tšabe bendicionēnga chata chabotsebomnama chaomama; y María, chē Jesusbe mamábioye tbojanayana: “Quem soyēnga corente cmochanjacochtsetšenaná, mo ainana espadējaca cuafljenēchnēngcá. Cha Israeloca banga echanjápochocaye y banga echanjātsebacaye; y chca, ntšamo banga ainaniñe imojuabnacá echantsótatšēmbo. Israeloca banga quem bāsetema mochantsábotena y chabe palabrēngnaca ca” —cha tbojanayana.

36 Chéntšnaca yojtsemna can̄ye shembása Bēngbe Bētsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentšá; ya bētsananá cha inamna. N̄ye can̄ysēfta uata cha yojēftsebouamna; 37 y chabe boyá tojanóbanentsana, cha posufta bnētsana y canta uata viudá inamna. Ndocna te Bēngbe Bētsabe bēts yebnentsana yonjábocana, y chentše tojanoquedá bnēté y ibeta, Bēngbe Bētsáftaca encuéntaye y cha atschuanaye; y chama, ba soye yojanamana tondaye ntjascá jtsemnana. 38 Simeón, María y Josébioye yojtsētsētsnaye ora, Ana chēngbioye yojobeconá, y chē Atsebacayá tojanon̄ynama Bēngbe Bētsábioye tbojtanchuá chentsana, Jerusalenoca entsangbioye, chē can̄ye atsebacayá Israeloca entsangbiana imojanobatmanēngbioye tojanéyana, chana Jesús yojétsemna ca.

Jesús Nazaret puebloca

39 José y María lempe ntšamo chē Utabnabe leyēnguñe iuayancá tbojanma ora, Galilea luaroye tbojtanata, cachēngbe puebloye, Nazaretoye. 40 Y chē bāsetema yojtsobóchaye, y más añemo yojtsejacana y más osertánana yojtsebomna. Y Bēngbe Bētsá yojánama cha bētscá tšabe bendicionēnga chaotsebomnama.

Jesús Bēngbe Bētsabe bēts yebnoca

41 Chabe bētsētsata ibojanamana cada uata Jerusalenoye jana Bashco fiestama, chē Bēngbe Bētsá chē judiēngbe bēts taitángbioye Egiptocana tojánatsebacama jtenójuaboyama fiesta. 42 Jesús bnētsana uta uata tojánashjache ora, Jerusalenoye tmojána, ntšamo imojanamancá. 43 Chē fiesta tojanopochocá chentsana, chabe bētsētsata yebnoye ibojtsataye, y chata ntsetatšēmbcá, Jesusna Jerusalenoca yojtsoquedañe. 44 Chata ibojétsejuabnaye Jesús chē in̄ye entsángaftaca yojtsataboye ca; chcasna, can̄ye te n̄yetsá benachējana tbojánata ora, tbojanontsé chabe pamíllangbeñe y ubuatmēngbeñe jtsenguanguana, 45 pero ndoñe ibonjobenaye jtsin̄yenana. As, chata chora Jerusalenoye tbojésanshēcona choca cha jetsenguanguama.

46 Unga tianoye chata tbojanobená Bēngbe Bētsabe bēts yebnentše cha jetsin̄yenana. Chana chē Moisesbe ley abuatambayēngbe tsēntsaca inētsotbemañe, chēngbioye inayaunana, inatjanaye. 47 N̄yetsca ouenanēnga imojtsenjanaye Jesús tša osertaná inamna, y tša tšabá jojuama cha yojtsobenama. 48 Chabe bētsētsata chca tbojánin̄ye ora, chátnaca ibojenjaná. Chora, chabe mamá tbojanayana: —Uaquiñá,

¿ndáyeca chca bëndátaftaca tcojama? Taitá y atše corente enócochinÿenata cbondënguá ca.

⁴⁹ As Jesús tojanéyana: —¿Ndáyeca atše šmonguá? ¿Ndoñe šondétatsëmbo atše šomna atšbe Taitabe yebnentše jtsemnana ca?

⁵⁰ Pero chë bêtsétsata ndoñe tonjanësertá ntšamo cha tojanëyancá.

⁵¹ Chentsana Jesús chë bêtsétsataftaca Nazaretoye tojtaná y chata yojtsayaunana. Y chabe mamana nÿe cachabe ainanoca chë soyëngama más bën inétsenouabnañe. ⁵² Jesús yojtsobóchaye y más juabna yojtsebomna; y Bëngbe Bëtsá y nÿetsca entsanga corente oyejuayënga chabiana imojtsemna.

3

Juan chë Ubayaná entsanga yojanabuayiyiná

(Mt 3.1-12; Mc 1.1-8; Jn 1.19-28)

¹ Bnëtsana shachna uatama Tiberio César Romoca bêts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. ² Anás y Caifás chë bachnangbe más uámana amëndayata ibojamna. Cach tempo, canÿe luare entsanga ndoyentše Bëngbe Bëtsá tbojanatsétsá Juánbioye; Juan, Zacaríasbe uaquiñá. ³ As Juan nÿetsca luarënguëjana Jordán bėjaye béconana tojánachnëngo, entsanga mëntšá utsëtsnaye: “Tšëngaftangbe bacna soyëngama ngmëncana šmochtenójuaboye, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” ⁴ Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaías chabe librëšañe yojétsabemcá. Cha mëntšá tojanábema:

Entsanga ndoyena luaroca canÿa enduáyebuache:

“Bëngbe Utabná echanjabo ca; mo nda canÿe benache tojtseprontacá canÿe uámana entšá jashjanguama, cachcá, tšëngaftángnaca, Bëngbe Utabná jabama ainanentše tšabe juabnëngaca šmochtseprontana.

⁵ Nÿetsca jachañe echantojútjia, y tjañe y batsjabenga mochantenájachibiaye.

Chë scundma benachënga ndirichëjënga echántatsmëna, y chë bacá mana benachënga mochantenájachibiaye.

Mo chë chca tmojtsamëngcá, canÿe benache japróntana canÿe rey cháuashjanguama,

tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

⁶ Y nÿetsca entsanga mochanjinÿe chë Atsebacayá Bëngbe Bëtsábentsana jabana ca” —cha tojanábema.

⁷ Chë entsanga Juan chaubáyama imojánbocana ora, Juan yojanëtsësnaye: “¡Mëtscuaye entsanga! ¿Nda tcmënjáuyana chë echanjóshjango uabouana castigüentsana šmochjotsbocá ca? ⁸ Bëngbe Bëtsábeñe ndegombre ošbuáchiyënga šmochtsemna, as chca chaotsinÿna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiana jayanama: ‘Bëngna Abrahámbentsana entsanga, Bëngbe Bëtsabe entsanga fsëndmëna ca’. Er atše chanjayana, Bëngbe Bëtsá quem ndëtsbéngacnaca Abrahámbentsana

entsanga nanjábiamá. ⁹ Tatšná ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye ca” —cha yojanëtsëtsnaye.

¹⁰ —¿Y as, ndayá jamama šojtsamna ca? —chora chë entsanga tmojantjá.

¹¹ Y Juan tojanëjua: —Chë uta quëfsaíya uabomná bontsemna canjüyá jutštayana chë tondaye tonduabomná. Saná bomná bontsemna juatayana chë tondaye saná tondbomnábioye ca.

¹² Romocama entsángbioye impuesto atjanayëngnaca jenábayama tmojánabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

¹³ Y Juan tojanëyana: —Nye ntšamo chë leyiñe yomandancá entsángbioye crocénana šmochtsayëngacaye ca.

¹⁴ Básefta soldadëngnaca chábioye tmojantjá: —¿Ndayá jamama šojtsamna ca?

Y Juan tojanëyana: —Ndocnábioye tondaye šmatjáboca, ni jauátjanase, ni nye ndayámnaca bonamente jobuáchëse; y nye ntsachetšá šmacaná crocénánaca oyejuayënga šmochtsomñe ca.

¹⁵ Entšanga chë Bëngbe Bëtsabe Uámana Uabuayanabiamá imojt-sobátmana, y chëngna Juanbiamá imojëtsejuabnaye nderado cha chë Bëngbe Bëtsabe Uámana Uabuayaná nanjamna ca; ¹⁶ pero Juan tojanëyana: “Ndegombre, atše béjayeca cbondubáyana. Pero chë echanjabá atšbiamá corente más obenana endbomna, y atše mercedo tait-satobuajoñe ni mo jotsejbiyana chabe shecochëtjonëshentša corriëja jajfonama. Chë Bëngbe Bëtsabe benache chamojtishachëngbiamá, Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháumashënguama. Pero chë ndoñe chamontishachëngbiamna, Bëngbe Bëtsá echanjama chë echanjabábeyeca, chënga corente castigánënga chamotsemnana, mo iñeshequécá. ¹⁷ Canye entsá chabe mëtšá cucuatsiñe jiyëbana, chabe trigo jtsóbobemama, y chë ndoservena shácuanënga jtsejashtsëtsana. Chabe trigo chë grano uaquëcñaye tsañe jtsabuájuana, y chë ndoservena shácuanëngna iñeshoye jtsatmetšana. Cachcá, chë átšbentšana echanjabá, chë tšabe entsanga echanjúbuaja, y chë bacna entsangna iñeshiñe echantsacastígaye, y chë iñe ndocna te queochátsfsana ca” —cha tojanëyana.

¹⁸ Chca y inye palabrëngaca Juan chë tšabe noticiëngama yojanabuayiyá. ¹⁹ Tempo, Juan Heródesbioye tbojanácacana, cha tojanobouamama cachabe catšata Felipe shémaftaca, Felipe cabá oyena ora; chana Herodías ca uabainá. Chama Juan tbojanácacana y nyetsca bacna soyënga Herodes tojanmámnaca. ²⁰ Pero Herodes Juánbioye joyeunaye luariñna, cabá inye más bëts bacna soye tojatanma: Juánbioye cárceloye tbojtsanëtame.

Juan, Jesúsbioye tbojanabaye

(Mt 3.13-17; Mc 1.9-11)

²¹ Pero Herodes Juánbioye cabá ndutame ora, Juan ba entsanga tojanëbaye, y Jesúsna tojánabo jenábayama. Ibojtsabayanëntscuana, Jesús Bëngbe Bëtsáftaca ibojtsencuëntaye; y chora celoca yojotëfjo, ²² y chë Uámana Espiritu mo canye palomatemcá Jesúsbioye yojtsastjajuana; y

celocana Bëngbe Bëtsá tbojanियana: “Acna atšbe bonshana Uaquiñá condmëna. Acbiamama corente sëntsoyejuá ca.”

Jesusbe bëts taitanga

(Mt 1.1-17)

²³⁻³⁸ Jesús unga bnëtsana uata yojtsebomna, entšángbeñe Bëngbe Bëtsabe soyëngama jóyebuambayama yojontsé ora. Entšanga imojanjuabná Jesús Josebe uaquiñá yojamna ca.

José yojamna Elibe uaquiñá.

Elí Matatbe uaquiñá

y Matatna Levibe uaquiñá.

Leví yojamna Melquibe uaquiñá,

Melqui Janabe uaquiñá

y Jana Josebe uaquiñá.

José yojamna Matatíasbe uaquiñá,

Matatíasna Amosbe uaquiñá.

Amós Nahumbe uaquiñá,

Nahúm Eslibe uaquiñá

y Eslí yojamna Nagaibe uaquiñá.

Nagai yojamna Maatbe uaquiñá,

Maatna Matatíasbe uaquiñá.

Matatías Semeibe uaquiñá,

Semei Josecbe uaquiñá

y Josec yojamna Judabe uaquiñá.

Judá yojamna Joananbe uaquiñá

y Joanán Resabe uaquiñá.

Resa Zorobabelbe uaquiñá,

Zorobabel Salatielbe uaquiñá,

y Salatielna Neribe uaquiñá yojamna.

Neri yojamna Melquibe uaquiñá,

Melqui Adibe uaquiñá.

Adi Cosambe uaquiñá,

Cosam Elmadambe uaquiñá,

y Elmadamna yojamna Erbe uaquiñá.

Er yojamna Jesusbe uaquiñá

y Jesús Eliezerbe uaquiñá.

Eliezer Jorimbe uaquiñá

y Jorimna Matatbe uaquiñá.

Matat yojamna Levibe uaquiñá,

Leví Simeonbe uaquiñá

y Simeón Judabe uaquiñá.

Judá Josebe uaquiñá,

José Jonambe uaquiñá,

y Jonamna yojamna Eliaquimbe uaquiñá.

Eliaquim yojamna Meleabe uaquiñá,

Melea Menabe uaquiñá.

Mena Matatbe uaquiñá,

y Matata yojamna Natanbe uaquiñá.

Natán yojamna Davidbe uaquiñá,

David Isaíbe uaquiñá

y Isaína Obedbe uaquiñá.

Obed Boozbe uaquiñá,
 Booz Salabe uaquiñá
 y Sala yojamna Naasonbe uaquiñá.
 Naasón yojamna Aminadabêbe uaquiñá,
 Aminadab Adminbe uaquiñá
 y Admin Arnibe uaquiñá.
 Arni Esrombe uaquiñá,
 Esrom Fáresbe uaquiñá
 y Fáresna yojamna Judabe uaquiñá.
 Judá yojamna Jacobêbe uaquiñá,
 Jacob Isaacbe uaquiñá
 y Isaacna Abrahambe uaquiñá.
 Abraham Tarebe uaquiñá
 y Taré yojamna Nacorbe uaquiñá.
 Nacor yojamna Serugbe uaquiñá,
 Serug Ragaube uaquiñá
 y Ragauna Pelegbe uaquiñá.
 Peleg Heberbe uaquiñá,
 y Heber yojamna Salabe uaquiñá.
 Sala yojamna Cainanbe uaquiñá,
 Cainán Arfaxadbe uaquiñá
 y Arfaxadna Sembe uaquiñá.
 Sem Noebe uaquiñá
 y Noé yojamna Lameche uaquiñá.
 Lamec yojamna Matusalenbe uaquiñá,
 Matusalén Enoche uaquiñá
 y Enocna Jaredbe uaquiñá.
 Jared Mahalaleelbe uaquiñá,
 y Mahalaleelna yojamna Cainanbe uaquiñá.
 Cainán yojamna Enosbe uaquiñá,
 Enós Setbe uaquiñá,
 Set Adanbe uaquiñá
 y Adán Bëngbe Bëtsabe uaquiñá.

4

Jesús tojanobená Satanás jayëñjanama

(Mt 4.1-11; Mc 1.12-13)

¹ Juan, Jesúsbioye tbojanabáyentsana, chë Uámana Espíritu Jesuse ainaniñe yojtsemádaye. Jesús Jordán bejajoicana tojtaná y chë Uámana Espíritna entšanga ndoyena luaroye tbojanánatse. ² Chentše canta bnëtsana te tbojanjëtana, y Satanasma yojanabó Jesús jisháchichiyama. Chë canta bnëtsana tentscuana Jesús tondaye tonjanse, y cabana ibo-jeshëntsena.

³ Chora Satanás tojésanabo y tbojanianana: —Aca ndegombre Bëngbe Bëtsabe Uaquiñá tcomñese, momandá quem ndëtsbenga tandëse chao-biamana ca.

⁴ As Jesús tbojanjuá: —Bëngbe Bëtsabe uabemana palabrenguiñe mëntšá endayana: “Entšá nÿe tandëšeca ndoñe vida ntsebomnana ca.”

⁵ Chentsana, Satanás canÿe bëts tjoye tbojanánatse y betscó nÿetsca quem luarentša amëndayëngbenache tbojaninÿinÿé. ⁶ Chora

Satanás tbojaniyana: —Atše nÿets obenana cchochjåtsetaye y lempe quem amëndayëngbenache yobinÿna soyëngnaca. Atše lempe chca sënjoyëngacÿe y sëntsobena jatsetayama nda stsebošábioye. ⁷ Aca chacojoshëntsamentšé y chašcojadorase, lempe nÿetšá acbiama echántsemna ca.

⁸ Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Acbe Bëtsá, chë Utabná cochtsadorana y nÿe cha cochtseserverna ca.”

⁹ Chentšana, Satanás Jerusalenoye tbojanánatse y Bëngbe Bëtsabe bëts yebnentše chë más tsbanánoca tbojanatsá, y tbojaniyana: —Aca ndegombre Bëngbe Bëtsabe Uaquiñá tcomnëse, muentšana fshantsoye montšënja, ¹⁰ er Bëngbe Bëtsabe uabemana palabrenguiñe endayana:

Bëngbe Bëtsá chabe angelënga echanjichamuá, chacmotsinÿenama.

¹¹ Chënga buacuatsëngaca cmochanjishache, shecuatše ndocá ndëtšbeñe chacondomama ca —cha tbojaniyana.

¹² Chora Jesús tbojanjuá: —Bëngbe Bëtsabe uabemana palabrenguiñe mëntšá endayana: “Ndoñe matsbošana acbe Bëtsá chë Utabná bacna soyëngama jacocheñguama ca.”

¹³ Cabana, Satanás tojanajbaná bošana Jesúsbioye bacna soyëngama jacocheñguama, y bënama Jesús bentšana tojtsanojuánañe.

Jesús tojanontšé Galileoca chabe trabajo jamana

(Mt 4.12-17; Mc 1.14-15)

¹⁴ Chentšana, Jesús Galileoye tojesaná chë Uámana Espíritbe obenánaca, y nÿetsca entšanga chë luariñe chabiama imojtsencuëntaye. ¹⁵ Jesús yojtsabuátambaye chë judiëngbe enefjuana yebnënguenache, y nÿetscanga cha imojtsatschuanaye.

Jesús Nazaret puebloca

(Mt 13.53-58; Mc 6.1-6)

¹⁶ Chentšana Jesús Nazaretoye tojtashjango, chë pueblentše cha tojanoboché, y ochnayté, ntšamo cha yojanamancá, chë judiëngbe enefjuana yebnentše tojánamashëngo. Y chocna tojantsbaná Bëngbe Bëtsabe palabra jualíama. ¹⁷ Chë Bëngbe Bëtsabe juabna oyebuambnayá Isaíasbe librëša tmojaniyé chauaiama. Chë librëša yojutëfjona orna, tojáninÿena mëntšá uábemanentše:

¹⁸ “Chë Utabnabe Espíritu átšeftaca entsemna, er atše uabuayaná stsemna chë Bëngbe Bëtsabe tšabe noticiënga chë ndbomnëngbeñe jóyebuambayama.

Cha šonjichmó jábuayenama, chë utámenënga chentšana ya chamuáisebocanama;

jamama chë jtanënga chamobenama tšabá jubínÿnama;

jamama chë ínÿengbe causa imosufrinënga, tempcá cachcá tšabá chamot-satsmënama;

¹⁹ y entšanga jáuyanama ndëmua ora chë Utabná chabe entšanga yochjat-sebacaye ca.”

²⁰ Jesús jualíama tojanpochocá y chora chë uajabuachanábioye chëša tbojtaniyé y tojtanoíbema. Nÿetsca entšanga chë enefjuana yebnentše imojtsemnënga Jesúsbioye imojtsobuáuatja. ²¹ Chora Jesús tojanontšé mëntšá jayanana: —Camënté tšëngatangebeñe tonjopasá ntšamo quem librëšañe uabemancá ca.

²² Njëtscanga Jesusbiamá tšabá imojtsencuéntaye y ojnanánènga imojtsemna tša botamana cha yojtsoyebuambnama. Y chènga imojtsentjanaye: —¿Quem boyabása ndoñe Josebe uaquiña yondmèna ca?

²³ Jesús yojtsetátšëmbo ntšamo cha tojánanyiñe chènga ndoñe tmonjanóšbuachema. As tojanéyana: —Ndegombre tšèngaftanga ntšamo entšanga mondèntšayancá atše šmochanjauyana: “Ashnayá, cach aca menoshná ca”. Y tšèngaftanga šmojtsejuabná atše jauyanama: “Bènga fsènjouena chë bèts soyènga Bèngbe Bètsabe obenánaca Capernaumoca tcojamama. Ntšamo contsichamcá ndegombre tojtsemnèse, cach acbe publèntšnaca cachcá moma ca”.

²⁴ Y cachora Jesús más tojanoyebuambá, mèntšá: “Ndegombre cbéyana, ni canye Bèngbe Bètsabe juabna oyebuambnayábioye cachabe pueblentše tšabá quematonýá. ²⁵ Ndegombre cbéyana, Elías, chë Bèngbe Bètsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tsèntsañe njëtšá ndoñe tonjanafté y bèts shèntsana chë luariñe yojtsebinýna. ²⁶ Pero Bèngbe Bètsá, Elíasbioye ndoñe tbonjanichmó ni mo canye Israelentša viudábioye, y aínè tbojanichmó ínýoye, Sarepta ca uabáinoye, Sidón béconana, canye chentša viudábioye. ²⁷ Eliseo, chë Bèngbe Bètsabe juabna oyebuambnayá, Israeloca inamna ora, chentše banga imojamna bacna nguayanánaca šoquènga, y ni mo canya chentša šocábioye tbonjanshná, pero aínè canye šocábioye, Naamán ca uabainá, cach bacna nguayanánaca, Sirocá ca” — cha tojánayana.

²⁸ Chë judièngbe enefjuana yebnentše imojtsemna entšanga chca tmojanuena ora, puerte tojánètèna. ²⁹ As, chora chènga tmojantsbaná, chë pueblentšana Jesús imojtábocna y más tsjuanoye canye peñèšèjana imojjánatse. Chènga imojanajebna cach peñèšiñe, y chë entšanga imojtseboše Jesús chocana jtsajuatsèntšana. ³⁰ Pero Jesusna chèngbe tsèntsajana tojánachnèngo y ínýoye tojtšanoñe.

Jesús, bayèjbe juabna cánýabioye tbojanbojuaná
(Mc 1.21-28)

³¹ Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judièngbe enefjuana yebnentše entšanga jabuátambana. ³² Entšanga imojtsenjnanaye ntšamo Jesús yojtšabuátambama, er chamna mo canye mando bomnacá yojtsoyebuambnaye.

³³ Chë enefjuana yebnentše, canye boyabása bacna bayèja uambayá yojtsemna, y chabe causa chë boyabása tojanontsé mèntšá uayebuáchana: ³⁴ —¡Cachcá šmonýá! ¿Ndayama bèngbioye təcjabo, Jesús Nazaretocá? ¿Tcojabo bènga jabétsapochocama? Atše sèndètátšëmbo nda aca comnama, aca chë Bèngbe Bètsabe Uamaná ca.

³⁵ Chora Jesús chë bacna bayèjbioye tbojtsanácacana y tbojaniyana: — ¡lytèca móbema y chábentšana maisebocna ca!

As chora chë bayèja entšanguentše chë boyabásabioye tbojanshajayé, y ndocá ntjèftsemcá chábentšana yojésebocna. ³⁶ Chë soyama njëtscá entšanga imojénjnanaye y mèntšá imojtsenatsètsnaye: “¡Tša chca palabrènga! ¡Quem entšá mandayacá y obenacá chë bayèjènga entsamènda, y chènga montsaisebocna ca!”

³⁷ Y Galileoca njëtscá publènguifne Jesusbiamá yojtšótátšëmbo.

Jesús, Simón Pédrëbe uambén mamábioye tbojanshná

(Mt 8.14-15; Mc 1.29-31)

³⁸ Chentsana, Jesús chë judiëngbe enefjuana yebnentsana tojëftsanbocna y Simonbe yebnentsë tojánamashëngo. Simonbe uambén mamá šocá inajájona jabuache calentóraca, y chë chentse imojtsemna entšanga chabiama Jesúsbioye tmojanimpadá. ³⁹ Chora Jesús chë šocábioye yojotsejbéna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontsé chënga jobuácuedana.

Jesús ba šoquënga tojanashná

(Mt 8.16-17; Mc 1.32-34)

⁴⁰ Shinÿe yojuenatjëmba ora, banga inÿe y inÿe šocana bomnënga Jesúsbioye tmojanënatse, y cha nÿetsca šoquëngbeñe cucuatšënga tojanajó y tojanashná. ⁴¹ Chora, ba šoquëngbentsana bacna bayëjënga imojtsaisebocana y mëntšá imojtsanchembumbuana: “¡Aca chë Bëngbe Bëtsabe Uaquiñá condmëna ca!” Pero Jesusna yojtsécácana y ndoñe tonjanalesenciá chamóyebuambama, er chë bayëjënga imnatátšëmbo cha chë Cristo bëtsemnama.

Chë judiëngbe enefjuana yebnënguenache, Bëngbe Bëtsabe soyëngama Jesús entšanga yojanabuayiyná

(Mc 1.35-39)

⁴² Yëfsana tojanbinÿna ora, Jesús chë pueblentsana tojëftsanbocna, y canÿe luaroye, entšanga ndoyenoye tojtsanoñe. Pero entšanga tmojána cha jetsenguanguama, y cha yojtsemnoye tmojánashhajna. Chënga imojëtseboše Jesús cach pueblentsë chaotsoquedáñama, ⁴³ pero Jesús tojanëyana: “Atše šontsemna chë tšabe noticiënga Bëngbe Bëtsabe amëndayama inÿe pueblënguenáchnaca jábuayenana. Chama Bëngbe Bëtsá šonjichmó ca.”

⁴⁴ Y chentsana, Jesús yojánana Bëngbe Bëtsabiama entšángbioye abuayiy-naye, chë judiëngbe enefjuana yebnënguenache Judeoca.

5

Canÿe te mallajta beonga ashebuánaye te

(Mt 4.18-22; Mc 1.16-20)

¹ Canÿe te, Jesús, Genesaret ca uabaina uafjónaye tsachañe yojtsemna ora, ba entšanga tmojánashhajna, y chënga tša imojtsenajuatsëntsnaye Bëngbe Bëtsabe palabra jouenama. ² Jesús, chë uafjónaye tsachañe bécoñe tojáninÿe uta ena barquësha; chë beonga ashebuánayëngna barquëshanguentsana tmojëftsanbocna atarraiëshangá jetsáboshabiama. ³ Jesús canÿe barquëshañe tojánamashëngo; chësha Simónbeshina inauamna. Chora Simónbioye mëntšá tbojanayana: “Quem tsacháñentsana chcoye mëyamba ca.”

⁴ Tojanótbema ora, Jesús chë barquëshoicana tojanontsé entšanga jabuátambama. Jabuátambama tojanpochocá orna, Simónbioye tbojanayana: —Shbuatsëntsoye barquësha mëyamba y tšëngaftangbe atarraiëshangá šmochjushbuetše, beonga jashebuáyama ca.

⁵ Pero Simón tbojanjuá: —Buatëmbayá, nÿets ibeta fsëndanguá y ton-daye chibiátashebuaye. Pero aca chca tcjayánayecna, cachiñe atarraiësha chantëtëshbuetše ca.

⁶ Tmojanëshbuetše orna, bëtscá beonga tmojánishêche y chêngbe atarraiëshangá tojanontsé jtsatanécanana. ⁷ As, chë inÿe barquëshañe imojtsemna enutêngbioye tmojánefjatsëmbo, jabújabuachama chamuábama. Chora chënga tmojánabo, y nÿets uta barquëshha beóngaca tmojanajutjé. Tša chëftanga causa, tojanontsé chë uta barquëshha jtsenatjêmbambana. ⁸ Simón Pedro chca tojáninÿe ora, Jesús bentsé tojanoshëntsamentsé y tbojaniana: —¡Bêngbe Utabná, atše bacna soye amá sëndmëna, chíyeca átšbentsana mojuaná ca!

⁹ Chë tša beonga jashebuáyama Jesús tojanmama, Simón y chë cháftaca imojtsemnënga imojouatjaná. ¹⁰ Santiago y Juan, chë Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniana: —Ndoñe matauatjana. Morscana, entšanga Bêngbe Bëtsabiama cochántsanguaye, y nÿe beonga ashebuanayá ndoñe quecochátsmëna ca.

¹¹ As chora chë barquëshangá tsachoye tmojtanëyamba y lempe jéseboshjonëse, Jesús tmojanasto.

Jesús, canÿa bacna nguayanánaca šocábioye tbojanshná
(Mt 8.1-4; Mc 1.40-45)

¹² Jesús canÿe pueblentše yojtsemna ora, chentše tojánashjango canÿe entšá bacna nguayanánaca šocá. Chë šocá Jesúsbioye tbojáninÿe ora, tojanoshëntsamentsé y jubiaca fshantsóntscoñe yojotsejbéna y tbojanimpadá: —Bêngbe Utabná, aca tcojtsebošëse, aca catjobenaye atšbe šocana jtsebojuánana ca.

¹³ As Jesús cucuátšeca tbojánbojajo y tbojaniana: —Aíñe, sëntseboše. ¡šocana cbotsebojuaná ca!

Y cachora chë šocana tbojtsanóbojuanañe. ¹⁴ Chora Jesús tbojanmandá: —Ndocnábeñe chë soye cattsecuëntaye; nÿe Jerusalenoca báchnëbioye motsa, y cha cochjinÿinÿiye aca mora ya tšabá cojtsatsmënama; y chora cochjuátšëmbona ntšamo Moisés chabe leyiñe tojanmandacá, Bêngbe Bëtsábioye chama jëtschuayama, chca, nÿetsca entšanga chamotatsëmbona mora ya tšabá cojtsatsmënama ca.

¹⁵ Pero ndayá Jesús yojtsamama más entšanga imojátatsëmbona, y ba entšanga imojtsójoye chábioye joyeunayama y chêngbe šocanëngama chauashnama. ¹⁶ Pero Jesús yojanamana jtsoñana entšanga ndoyena luarëngoye y choca Bêngbe Bëtsáftaca ibnëncuentaye.

Jesús, canÿe jama ndobenábioye tbojanshná
(Mt 9.1-8; Mc 2.1-12)

¹⁷ Canÿe te, Jesús yojtsabuatambá ora, chentše básefta fariseunga y ley abuatambayënga imojtsetbiámana, Galileoca nÿetsca pueblënguëntšana áshjajnënga, Judeoquënga y Jerusaleñoquënga. Y chora Jesús šoquënga yojtsashnaye, Bêngbe Bëtsabe obenánaca. ¹⁸ Chora tojanopasá, básefta boyabásenga canÿe šocá, jama ndobená, tjuashiñe choye imojuamba. Chënga imojétseboše tsoye cha juambana, Jesús yojtsemnoye, ¹⁹ pero jamashjnama ndoñe tmonjanobená, tša entšanga causa. Chcasna, gradasëšënguëjana chë yebnentša tsbanánoye tmojánášëngo y batšá tejëshe tmojtsanjuaná. Chorna, chë atëfjnëjana chë šocá tjuashiñe tmojanëštjango, entšangbe tsëntsaca, Jesusbe natsanoica. ²⁰ Jesús tojáninÿe cha chë šocá jáshnama bëtsobenama chënga puerte imojtsošbuáchem.

As, chë jama ndobenábioye tbojaniana: “Bacó, acbe bacna soyënga tcbontseperdoná ca.”

²¹ Chora chë ley abuatambayënga y chë fariseunga mëntśá tmojanontsé juabniana: “Quem boyabása ndoñe tśabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entśá quenátobena bacna soyëngama inya japerdónana; nye Bëngbe Bëtsá aíñe ca.”

²² Pero Jesús yojtsetátśembo ntśamo chënga imojtsejuabnayama; as tojanëyana: “¿Ndáyeca tśëngaftangbe ainaniñe chca šmojtsejuabná? ²³ ¿Tśëngaftangbiana ndayá más paselo nántsemna tśëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca’? ²⁴ Y chca, morna atśe cbochanjínyanñiye, chë Bëngbe Bëtsá Entśá tbojanbemá quem luariñe obenana yobomnama, entśanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojaniana: “Atśe cbëyana, matëtsbaná, tjuashe mesocñe y acbe yebnoye motsatoñe ca.”

²⁵ Cachora chë jama ndobená tojtantsbaná entśanga delante, chë cha inajájona tjuashe yojesoñe y Bëngbe Bëtsábioye atschuanaye chentšana yojtsatoñe. ²⁶ Chama nyetsca entśanga imojénjnanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinñe ca.”

Jesús, Levíbioye tbojanchembo chabuastama

(Mt 9.9-13; Mc 2.13-17)

²⁷ Chca yojochnëngüentšana, Jesús chentšana tojéftsanbocna y canye entśábioye tbojáninñe, Leví ca uabainá, chë entśángbioye impuesto Romocama atjanayentśe inétsotbemañe. Chora Jesús tbojaniana: “Smasto ca.”

²⁸ Y Leví lempe tojésanboshjona, tojantsbaná y Jesús tbojanasto.

²⁹ Chentšana, Levina bëts fiesta chabe yebnentśe Jesusbiana yojama. Y chë fiestentśe imojtsemna banga impuesto atjanayënga; y inye entśángnaca mesëshentśe imojtsetbiámana. ³⁰ Chora, chë fariseunga y chë ley abuatambayënga tmojanontsé chë Jesusbe uatsjëndayëngbiana podescá oyebuambnayana; y chëngbioye mëntśá tmojanëyana: —¿Ndáyeca tśëngaftanga impuesto atjanayëngaftaca y bacna soye amëngaftaca šmojtśesá y šmojtsofšëšná ca?

³¹ Y Jesús tojanëjua: —Salud bomnënga ashnayá ndoñe ntsëjabótana, pero šoquëngna aíñe. ³² Y atśe ndoñe chiyátabo chë Bëngbe Bëtsabe bominiñe tśabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

Jesús tmojantjá chë Bëngbe Bëtsáftaca jencuéntama tondaye saytescama

(Mt 9.14-17; Mc 2.18-22)

³³ Chora chënga Jesúsbioye tmojaniana: —Juan chë Ubayanabe uatsjëndayënga y chë fariseungebe usetonënga monduamana ba soye Bëngbe Bëtsáftaca jtsencuéntayana, y chama ba soye tondaye ntjascá jtsemnana; pero acbe uatsjëndayënga nye nyets tempo jesosañana y jesofšëšnañana ca.

³⁴⁻³⁵ Chora Jesús tojanëjua: —Chë boyabása bouamná chë ofjanëngaftaca tojtsemnëntscuana, chëngbioye saná ndoñe ntsabuáshebenana. ¿Ntśamo chca ndoñe nántsemna? Chë tojobouamá cha chëngaftaca tojtsemnëntscuana, chë ofjanënga bëtscá jasana y cháftaca oyejuayënga jtsemnana. Pero ora echanjóshjango y chë

boyabása chéngbentshana mochantsánatseñe; chora cocayé chë ófjanënga echántsamna tondaye ntjascá jtsemnana. Ntsamo chë tojobouamá cha y chë ofjanéngaftaca endmëncá, cachá endmëna atse, atšbe uatsjendayëngaftacnaca ca —cha tojanëjua.

³⁶ Jesús mëntsánaca tojanacuntá jabuátambama: “Ndocná queonýbatatëtse basájua tsëm entsayañe, tanguá entsayá jtarmëndama. Chca tcojamëse, chë tsëm entsayá jtsandbemana, y chë tcojuatëtse entsëjua chë tanguájuañe ndoñe tšabá ntsinýnana. ³⁷ Y cach ndoñe, chë tojtseshayana vínoye tanguá jasabenguiñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshana; y chca, chë vínoye y chë jasabenga tondayama ntjatoservénana. ³⁸ Chíyeca co, chë tojtseshayana vínoyna tsëm jasabenguiñe juaftsuámama. ³⁹ Ndocná, chë bóchena vínoye tojatëmo y chentsana játsbošana chë tojtseshayana vínoye jatofsiyana; cha jayanana: ‘Chë bóchena vínoye tša tšabeye ca.’”

6

Jesusbe uatsjëndayënga ochnayté trigo tmojanátabebe
(Mt 12.1-8; Mc 2.23-28)

¹ Canye ochnayté, Jesús canye jajajana yojtsaye; chabe uatsjëndayënga trigo imojtsaiuatabnaye, imojtsaiúshenëcaye, y imojtsaiuasaye. ² Chë causa, básefta fariseunga tmojanatjaye: —¿Ndayeca šmojtsama chë ochnayté jamama ndoñe quenátslesenciana soye ca?

³ Y Jesús tojanëjua: —¿Ndoñe šmëndualía y šmondëtatšëmbo, ntsamo rey David y chabe enutënga tmojanmama shëntseca imojtsemna ora y jasama yojtsëjaboto ora? ⁴ Chca orna, David Bëngbe Bëtsabe bëts yebentše yojámashëngo y chë Bëngbe Bëtsá chentše yojamnama inýinýnaye tandëšënga yojase, y chë cháftaca imojánajna entsángnaca yojátataye. Y chë tandëšna nýe bachnanga belesenciana jasama. Masque David chca yojama, Bëngbe Bëtsá chora ndoñe tonjánayana David canye bacna soye tojanma ca —Jesús tojanëjua.

⁵ Y Jesús más tojanëyana: “Chë Bëngbe Bëtsá Entšá tbojanbemá, chë entsá ochnayté tojtsama sóynaca jtsemándayana ca.”

Chë buashana cucuatše bomna entsá
(Mt 12.9-14; Mc 3.1-6)

⁶ Inýe ochnayté, chë judiëngbe enefjuana yebnoye Jesús tojánamashëngo y tojanontsé jabuátambana. Y chentše yojtsemna canye entsá, catšbioica cucuatše buashanëtse bomná; ⁷ y chë ley abuátambayënga y fariseunga chiñe imojtserrondana jinýama nderado Jesús chë ochnayté chábioye tabuanjashna, as chca chënga jtsebomnama ndaye sóyeca Jesús mal jaquédana. ⁸ Pero Jesús chëngbe juabna yojtsetátšëmbo; asna chë buashana cucuatše bomna boyabásabioye tbojanianyana: “¡Motsbaná y chentše tsëntsaca motsa ca!” Y chë entsá yojotsbaná y entsangbe tsëntsaca yojotsaye. ⁹ Chora Jesús chë inýengbioye tojanëyana: “¿Ndayá yojtselesenciana ochnayté jamana, canye tšabe soye o canye ndoñe tšabe soye? ¿Jatsbocana o jtsepochócana ca?”

¹⁰ Y nýetscanga chabe chabuajana imojtsemnënga tojanënyanyé, y chë buashana cucuatše bomnábioye tbojanianyana: “Macuenýanëjaná ca.” Y chë boyabása tojanacuenýanëjaná, y tšabá chëtša yojtsatamna. ¹¹ Pero

chë inýengna puerte tmojanotjayaná, y tmojanontsé enatsëtsnayana ndayá muanjobenaye Jesusbe contra jamana ca.

Jesús chë bnëtsana uta uatsjéndayënga tojanabacacá

(Mt 10.1-4; Mc 3.13-19)

¹² Chë tempo, Jesús tjoye tojána Bëngbe Bëtsáftaca jencuéntama; y nýets ibeta cháftaca tbojanencuentá. ¹³ Tojanbinýna ora, chabe ústonënga tojánachembo, y chënguentsana tojanëbuáyana bnëtsana uta uatsjéndayënga, chë ndëmuanýenga “chabe ichmónënga cánaca” tojanëbobaye. ¹⁴ Chënga imojamna: Simón, chë Pedro cánaca Jesús tbojanabobayá; Andrés, Simonbe catsata; Santiago, y Juan, Felipe y Bartolomé, ¹⁵ Mateo y Tomás, Santiago, Alfeobe uaquiná; Simón, chë celote ca uabobainá; ¹⁶ Judas, Santiagbe uaquiná; y Judas Iscariote, chë más chcoye, Jesús uayayëngbe cucuatshiñe bochjanboshjoná.

Jesús ba entsanga yojanabuatambá y yojánashnaye

(Mt 4.23-25)

¹⁷ Chentšana, Jesús chëngaftaca chë tjocana tojtantsmá y canýe jachañe tojanoquedá ba chabe ustonëngaftaca y ba inýe entsángaftaca. Ba entsanga choye tmojánabo Judeocana, Jerusalenocana y Tiro y Sidón, chë mar béjaye béconana pueblënguentsana, Jesúsbioye oído jabuájuama y chëngbe šocanëngama chauashnama. ¹⁸ Y chábeyeca chë bacna bayëjbe juabna uambayënga tšabá imojtsatsmëna. ¹⁹ Nýetsca entsanga tša imojtseboše y ndayánaca imojtsama Jesús jabojuama, er chábentšana bëts obenana yojtsóbocana y nýetscanga yojtsashnaye.

Chë ndegombre oyejuayana bomnënga y ndëmuanýëngbiama tša lastema yochtsemna

(Mt 5.1-12)

²⁰ Jesús chabe uatsjéndayëngbioye tojanontjesé y tojanëyana: “Puerte oyejuayënga tšëngaftanga, chë quem luarentša soyënga ndbomnënga, er Bëngbe Bëtsabe amëndayentša soyënga tšëngaftangbiama entsemna ca.

²¹ “Puerte oyejuayënga tšëngaftanga chë mora oshëntsiyënga, er becá šmochantóshachaye ca.

“Puerte oyejuayënga tšëngaftanga chë mora šmošachenga, er chentšana šmochántatenbiajuaye ca.

²² “Puerte oyejuayënga šmochtsemna, entsanga chacmojtšëbuayënja ora, chacmojtšatébuacana ora, chacmojtšëyanguá ora, y tšëngaftanga ndoñe tšabá šmontsama ca chënga chamojtsichamo ora, tšëngaftanga atšbe ústonënga bëtsemnama. ²³ Chë te puerte šmochjóyejuaye, er celoca canýe bëts uacanána šmochántsebonna. Chëngbe bëts taitanga, cachcá chë Bëngbe Bëtsabe juabna oyebuambnayëngaftaca tmonjanma ca.

²⁴ “Pero ¡tša lastema tšëngaftanga bomnëngbiama, er mora oyejuayënga jtsemnama ya bëtscá šmojóyëngacñe ca!

²⁵ “¡Tša lastema tšëngaftanga chë mora shachanëngbiama, er shëntšana šmochántsebonna ca!

“¡Tša lastema tšëngaftanga chë mora oyejuayëngbiama, er ngmënama šmochanjenóbošachna ca!

²⁶ “¡Tša lastema tšëngaftangbiama nýetsca entsanga tšabá chamojtsoyebuambná ora; er cachcá chëngbe bëts taitanga monjánama chë Bëngbe Bëtsabe ndoñe ndegombre juabna oyebuambnayëngaftaca ca!” —Jesús tojanëyana.

*Chë uayayëngbiama bonshánana jtsebomnana**(Mt 5.38-48; 7.12)*

27 “Pero tsëngaftanga, átsbioye ouenanënga cbëyana: Tsëngaftangbe uayayënga smochtsababuánÿeshana; chë tcmojtsëbuayënjëngbiama tsabe soyënga smochtsama; 28 chë tsëngaftangbiama bacna soyënga bošëngbiama, Bëngbe Bëtsá smochtseimpadana tsabe bendicionënga chamóyëngacñama; chë tcmojóyanguanguëngbiama, Bëngbe Bëtsá smochtseimpadana. 29 Nderado ndánaca cánÿoica tcmojajuebiantsetase, cochjomiye chë ínÿoica cachcá chacmomama; nderado ndánaca quëfsaiya tcmojuábocana, cachcá cochjonÿaye acbe shabuanguanéjuanaca chauetsácñama. 30 Ndánaca chacmojtjañábioyna, jatsetayana; y nda ndayánaca chacmojefcábioyna, ndoñe catjontsínÿena chacmatoyema. 31 Inÿengaftaca smochtsama, ntšamo chë ínÿenga tsëngaftangaftaca chamotsamama šmojtsebošcá.

32 “Tsëngaftanga, nÿe chë tcmojtsababuánÿeshanënga šmojttsababuánÿeshanëse, ¿ndaye tsabe soye chca šmattsama?; er chë bacna entšágnaca chca mondbëtsama. 33 O nderado, nÿe chë tsëngaftangbiama tsabe soyënga tmojtsamëngbiama tsabe soyënga šmojtsamëse, ¿ndaye tsabe soye chca šmattsama?; er bacna entšágnaca chca mondbëtsama. 34 O nÿe chë cmochtëchenanguama šmojtsejuabnánngbioye šmojúyentsamëse, ¿ndaye tsabe soye chca šmattsama?; er chë bacna entšágnaca mondbetsenántšamiana, chëngbentšana cachcá jtóyëngacñama jtsobátmanëse. 35 Pero tsëngaftangna cmontsamna chë uayayënga jtsababuánÿeshanana; y tsabe soyënga chëngbiama jtsamana y júyentsamiana, chëngbentšana ndayánaca jtóyëngacñama ntjatobatmancá. Chca, tsëngaftanga uacanánana cuenta canÿe bëts soye šmochanjóyëngacñe, y celoca endmëna Bëngbe Bëtsabe básënga šmochántsemna; Bëngbe Bëtsá chë ndochuanayëngaftaca y bacna entšangaftácnaca tsabia comna. 36 Inÿëngbiama lastemadënga smochtsemna, ntšamo tsëngaftangbe Taitá yomncá ca” —Jesús tojánayana.

*Ndoñe ntsichámuana chë ínÿenga tsabá o ndoñe tsabá tmonjamama**(Mt 7.1-5)*

37 “Ndocá ínÿëngbiama šmattsichamo chë ndoñe tsabá tmontsamama, y Bëngbe Bëtsá ndoñe queochátichamo tsëngaftanga ndoñe tsabá šmonjama ca. Inÿëngbiama ndoñe šmattsichamo ndoñe tsabá tmonjama ca, y Bëngbe Bëtsá ndoñe queochátichamo tsëngaftanga ndoñe tsabá šmonjama ca. Inÿenga šmochjáperdonaye y Bëngbe Bëtsá cmochanjáperdonaye. 38 Inÿëngbioye šmochjatsataye y Bëngbe Bëtsá cmochántatsataye. Mo nda canÿe biaco medidiñe bëtscá tojajutjé, uashëshe y cmojtiyecá, Bëngbe Bëtsá cachcá cmochántatsataye. Ntšamo tsëngaftanga ínÿëngbioye chašmojábiama, uabouana o ndoñe jabuache soyënga, Bëngbe Bëtsá cachcá tsëngaftangbioye cmochanjábiam ca” —Jesús tojánayana.

39 Jesús quem cuéntnaca tojánayana jabuátambama: “¿Canÿe jtaná nantsobena inÿe jtaná jtsanachayama? ¿Chca ndoñe nÿets útata ndaye tbuabentše buanjótsatše? 40 Chë uatsjendayá ndoñe ntsemnana chë buatëmbayabiama más bëtsá. Pero chabe uatsjëndayana chaojapochocá ora, cach buatëmbayacá jtsemnana.

41-42 “Canÿa chabe bominÿiñe canÿe niñëfja tojtsebomnëse, cha ndoñe ntsobenana chabe catšátbioye jauyanana: ‘Acbe bominÿentsana canÿe polvëshstema jtsebuchjatsëcama šmolesenciá ca’. Natsana cha bontsemna

cachabe bominyentsana chë niñëfja jtsenobuchjâtsëcana, tšabá jinýama jobenayama, chabe catsatbe bominyentsana chë polvotema jtsebuchjâtsëcana. ¡Cachcá entsemna acbiana, bacna entšá chë ntšamo ndegombre tcojuabnacá ndinyinýayá! Chë tša bacna soye cojtsama ca acbe catsátbioye tcojauyana ora, cach aca tša bëts bacna soyënga cojtsamama ntjenouaboycá; y chca, aca jamana canýe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jshétsajbanana, y chentsana cocayé cochantsobena acbe catsáta juajabuáchana ntšamo tšabá yomncá chaotsamama ca” —Jesús tojánayana.

Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá

(Mt 7.17-20; 12.34-35)

⁴³ “Ndoñe queonybatsmëna, chë canýe tšabe betiyiñe podessa soye jashájonana; ni canýe ndoñe tšabe betiyiñe tšabe soye jashájonana. ⁴⁴ Betiyënga jtsabuatumana ntšamo cada betiye tojtseshajcá. Uchmašëshentsana quenátopodena higuëbé jocñana; ni uvašëša, shëshëntša betiyentsana. ⁴⁵ Chë tšabe entsana, chabe ainanoca tšabe juabnënga bomnentsana jtsóyebuambnayana; y chë bacna entsana, chabe ainanoca ndoñe tšabe juabnënga bomnentsana jtsóyebuambnayana. Er ndayá becá ainanoca tomnama entšá jtsóyebuambnayana ca” —Jesús tojánayana.

Chë uta ucuatjoniñe

(Mt 7.24-27)

⁴⁶ “¿Ndáyeca tšëngaftanga atše šmnëtsatsaye, ‘Utabná, Utabná ca’, y ntšamo atše stsichamcá ndoñe ntsamana? ⁴⁷ Chochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: ⁴⁸ Cha endmëna mo canýe entšacá, nda canýe yebna jajebuamna becá fshantse jashenoye yojajutjo y ndëtsbenguñe yojúcuatjoye. Bëjayënga yojtsóftjajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtsbenguñe jabuache yojaúcuatjona. ⁴⁹ Pero nda atšbe palabra tojouena y ntšamo stsichamcá ndoñe tontsama, endmëna mo canýe entšacá, nda canýe yebna yojajebo nýe fshantsiñe, tondayiñe ntjucuatjoycá. Bëjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

7

Jesús canýe Romano soldadëngbe amëndayabe bochichnayábioye tbojan-shná

(Mt 8.5-13)

¹ Entšángbioye chca jáuyanana tojanpochocá ora, Jesús Capernaum puebløye tojána. ² Chentše yojoyena canýe romano soldadëngbe amëndayá. Cha ibnabomna canýe bochichnayá puerta bonshaná, y chora cha šocá yojtsemna, ya jtsóbanama. ³ Jesús ba šoquëngbioye yojáshnama encuéntayana chë amëndayá yojouena ora, báseftanga bëtsëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnáñama. ⁴ Chënga Jesúsbioye tmojánashjango y tša imojtseimpadana, mëntšá: “Quem soldadëngbe amëndayá mercedo entsebuájona chacotsájabuachama; ⁵ er cha bëngbe luarentša entšángbioye

corente endábabuanÿeshana, y cachá chë bëngbe enefjuana posada sonjayentsjebo ca.”

⁶ Jesús chëngaftaca tojána. Pero chë mandayabe yebnoye imojtsebeconá ora, chë soldadëngbe amëndayá básefta amiguënga yojichamuá, Jesúsbioye mëntsá chamuauyanama: “Atsbe Utabná, ndoñe yapa matenócochinÿenana átsbioye jabama. Atse mercedo taitatobuajoñe aca atsbe yebnoye chacuamashënguama; ⁷ chíyeca ni mo añemo chiyatentsetá jama aca jajëbenguama. Morna nÿe cochjayana y atsbe bochichnayá tšabá echántsatsmëna. ⁸ Er atse sëndábamna átsbioye mándayënga y átsnaca soldadëngbe amëndayá sëndmëna. Atse canÿe soldádbioye stjauyana ‘motsa ca’, cha cachora jana; y ínÿabioye stjauyana ‘mabo ca’, cha cachora jabana; y nderado atsbe bochichnayábioye ndayánaca chaomama stjamánda, chánaca cachora chë soye jamana ca” —cha yojáuyana.

⁹ Jesús chca tojanuena ora, chë mándayabiama yojenjnaná, y jobuértanëse chë ba entšanga cha ustonëngbioye tojanëyana: “Ndegombre chëyana, ni mo nÿets Israelentse, ni canÿa quem boyabasacá tša ošbuachiyá chiyátinÿena ca.”

¹⁰ Y chë ichmónënga yebnoye tmojtaná orna, tmojáninÿena chë bochichnayá ya tšabá yojtsatsmëna.

Jesús tojanma canÿe viudabe uaquiñá cháuatayenama

¹¹ Chca tojanopasá chentšana, Jesús yojétsaye Naín ca uabaina puebloye, y cháftaca chabe uatsjëndayënga y ba entšanga imojtsaye.

¹² Chë pueblo amashjuanoye yojtsebeconá orna, entšanga chë pueblentšana canÿe obaná imojtsábocana jauátbontsama; chë obaná canÿe viudabe uaquiñá inamna y nÿe cha uaquiñá. Bëtsca entšanga chë obanabe mamá imojtsetjëmbamnaye. ¹³ Bëngbe Utabná chë viudábioye tbojáninÿe ora, chabiama tbojanongmé y tbojaniyana: “Ndoñe matošachena ca.”

¹⁴ Y jobéconase, chë ataúse tojánbojajo, y chë obaná atambayënga tmojantsá. Y Jesús chë obanábioye tbojaniyana: “Bobontse, atse chëyana: ¡Matëtsbaná ca!”

¹⁵ Chora chë obaná tojtantsbaná y tojanontsé oyebuambnayana; y chabe mamábioye Jesús chë bobontse tbojtánatse. ¹⁶ Nÿetsca entšanga tša uatjana yojubuache chca tmojáninÿe ora, y Bëngbe Bëtsá imojtsatschuanaye, mëntsá jayanëse: “Bëngbentse canÿe Bëngbe Bëtsabe juabna oyebuambnayá cuatënjonÿná ca.” Y mëntsánaca: “Bëngbe Bëtsá tojabo chabe entšanga jabújabuachama ca.”

¹⁷ Y nÿets Judea luarëjana y chë chábuañe luarenache entšanga imojátatšëmbona ndayá Jesús tojanmama.

*Juan chë Ubayanabe ichmónënga
(Mt 11.2-19)*

¹⁸ Juan, lempe ntšamo Jesús yojtsamama yojátatšëmbona; er chabe ústonënga chama tmojancuentá. As Juan, chënguentsana útata tojánachembo, ¹⁹ y Jesúsbioye yojichamuá jatjayama cha tayojamna chë Cristo, chë jabama ibojanmëna, chë Uámana Uabuayaná, o ínÿabiama jatobátmama tayojet samna ca. ²⁰ As chë Juanbe ichmónënga Jesúsbioye tmojanobeconá y tmojaniyana: —Juan chë Ubayaná

šonjichamo jatjayama, aca ndegombre cojtsemna chë Cristo, chë jabama ibojanmëná, o šojtsamna ínŷabiama jatobátmana ca.

²¹ Chë ichmónata tbojánashjango ora, Jesús banga yojtsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojtsatëbinŷna. ²² Chora Jesús mëntsá tojanëjua: —Motsata y Juánbioye šochjauyana ntšamo šojinŷe y šouencá: Chë jtanënga tšabá entsatëbinŷna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnéjémëngbioye chë tšabe noticiënga montsabuayiyná. ²³ ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanëyana.

²⁴ Chë Juanbe ichmónata chentšana tbojésanbocnentsana, Jesús tojanontšë Juanbiamana entšanga jáuyanana, mëntsá: “Juan jinŷama šmojánbocna ora, ¿ndayá jinŷama šmojánbocana entšanga ndoyena luaroye? ¿Canŷe entšá ainaniñe tondaye añemo ndbomná, mo canŷe šëše bínŷiaca shatiyeynëscá? ²⁵ Y ndoñese, ¿ndayá jinŷama choye šmojánbocana? ¿Canŷe boyabása uámana entšayaca bopormaná? Ndoñe. Tšëngaftanga šmondétatšëmbo chë uámana entšayaca bopormánënga y chë bëtsá bomnánaca nŷe tondayama ntsecochinŷencá vida bomnëngna, reyëngbe yebnënguiñe mondbëtsiyenama. ²⁶ Asna, ¿ndayá jinŷama choye šmojánbocana? ¿Canŷa Bëngbe Bëtsabe juabna oyebuambnayá? Ndegombre; y cbëyana, canŷa Bëngbe Bëtsabe juabna oyebuambnayabiama más bëtsá. ²⁷ Cha, Juan, endmëna ndabiama Bëngbe Bëtsá chabe uabemana palabrenguiñe tojánayana mo chabe ichmonacá, mëntsá tojánayana ora:

Cristo, atšbe entšá natsana sënjichmó acbiama chaóyeuambama, entšanga jábuayenama aca jabama ainaniñe tšabe juabnëngaca chamot-seprontánama ca.

²⁸ Ndegombre cbëyana: Nŷets tempo entšángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, cha más bëtsá echántsemna ntšamo mora Juan yomnama ca” —Jesús tojánayana.

²⁹ “Nŷetsca entšanga chca Juánbioye tmojanóyeunanga y chë Romocama entšángbioye impuesto atjanayëngnaca, nŷets ainánaca tmojánayana Bëngbe Bëtsá nŷetsca soyënguiñe tšabá amá yomna ca; er tmojánenabaye ntšamo jubáyama Juan yojanamancá. ³⁰ Pero chë fariseunga y ley abuátambayënga, ntšamo jubáyama Juan yojanamancá jóyëngacñama ndoñe tmonjánbošena ora, tmojtsanaboté ndayá Bëngbe Bëtsá chëngbiamana jamama yojanjuabnacá.”

³¹ Jesús mëntsánaca tojánayana: “Cbochanjáuyana ndayacá morsca entšanga imomna, y ndayëngcá chënga imomna. ³² Chënga mondmëna mo chë plazëngoca mondbetsetbiámana basetemëngcá; chëngna mëntsá jabuache jtsenatsayana: ‘Tšëngaftangbiamana fsënjaflautá y ndoñe chešmatslantsá; ngmënaca fsënjaversiá y ndoñe chešmatenóbošachna ca.’ ³³ Juan chë Ubayaná tonjánabo y ndoñe quenjatamana bëtsá entšángbeñe jtsemnana, ni tandëse jasana, ni vínoye jofšiyana; y tšëngaftanga šmtonsichamo chana bacna bayëjbe juabna uambayá inamna ca. ³⁴ Morna, chë Bëngbe Bëtsá Entšá tbojanbemá tonjabo y

chana aîñe entsamana bêtská entsángbeñe jtsesayana y jtsofšěsnayana, y tšěngaftanga chabiana šmontsichamo: ‘Chana yapa uasayá y vínoye tmojá entsemna y Romocama entsángbioye impuesto atjanayěnga y bacna soyěnga aměngbe amigo ca’. ³⁵ Pero Běngbe Bětsá endbětsinýinýnaye cha nyets osertánana bomná yomnama, chě ndayá cha tojama ora ndayá chentšana inobocna soyěngaca ca” —cha tojánayana.

Jesús, chě fariseo Simonbe yebnentše

³⁶ Canýe fariseo Jesúsbioye tbojanofja saná jauasama, y Jesús chabe yebnoye tojána y mesěshentše yojótbema. ³⁷ Chě pueblentše yojamna canýe shembása, bacna vida bomná. Jesús chě fariseobe yebnentše yojtsesama chě shembása yojátatšěmbona; as cha chě yebnoye tojánashjango y tojanamba canýe alabastro botellěše, jútjena canýe botamana uanguětše bėjayeca. ³⁸ Jesusbe shecuatšentše yojoshěntsamentšiyē, šachénaca; shěchbuýyeca chabe shecuatšěnga yojtsefchecuacná y cachabe stjěnashaca ibojtsatsshěcbojuaye. Chabe shecuatšěnga yojtonguětsěntšiyē y chě botamana uanguětše bėjaye ibojtashěcbueścacja. ³⁹ Chě fariseo Jesúsbioye ofjaná chca tojáninýe ora, měntšá Jesusbiana yojtsejuabnaye: “Cha ndegombre canýe Běngbe Bětsabe juabna oyebuambnayá tojtsemněse, nantsetátšěmbo nda y mocna shembása yomna chě bontsebana shembása: canýe bacna vida bomna shembása ca.” ⁴⁰ As Jesús chě farisěobioye tbojaniana: —Simón, cuentado palabra šmotsoyeuná ca.

Y chě fariseo tbojanjá: —Arseñor, Buatěmbayá ca.

⁴¹ Y Jesús tojánayana: —Canýe entšá crocénana uyentšamianá, uta ndebénata yojánabamna. Canýa shachna patse denario crocénana ibojandebena, y chě ínýana, shachna bnětsana. ⁴² Pero chě útata tondaye ibontsebmna ndayentšana cha jětsěntšabuáchiyama; as chě uyentšamianá nyets útata chě ndebénana yojtsaperdónaye.

Chora chě farisěobioye tbojaniana: —Mora šmėyana, ¿chě útatentšana nda más chě uyentšamianábioye buantsebobonshana ca?

⁴³ Y Simón tbojanjá: —Atše šontsinýana chě más bêtská ndebená ca.

Y Jesús tbojaniana: —Ndegombre, ntšamo endmėncá tcjayana ca.

⁴⁴ Jesús, chě shembásabioye jontješiyěse, Simónbioye tbojaniana: —Minýe quem shembása. Atše acbe yebnoye sěnjámashěngo y aca búyeshe ndoñe chešcatabuatsětá atšbe shecuatšěngama. Y quem shembásana, cachabe shěchbuýyeca šontseshecjabebé y chabe stjěnashaca šontseshecbójó. ⁴⁵ Ndoñe chešcatámocho, pero cha tonjámashěngo orscana ndoñe ntájabanana atšbe shecuatšěnga onguětsěntšnaye.

⁴⁶ “Aca bestšašifne aceitiye ndoñe chešcatsbueścja, y chana aîñe botamana uanguětše bėjaye šonjashěcbueścja. ⁴⁷ Chcasna atše chėyana, cha šonjinýanýé atšbiana corente bonshánana yojtsebmna, er atše chabe bêtská bacna soyěnga sěntseboperdoná; pero nda nýe básefta bacna soyěngama stjaperdóna chana, nýe batsatemá bonshánana jtsebmnnana ca.”

⁴⁸ Y chora Jesús chě shembásabioye tbojaniana: “Acbe bacna soyěngama perdonaná contsemna ca.”

⁴⁹ Chora chě ofjaněnga chentše imnatbiámaněngna tmojanontšě enatsětsnayana: “¿Nda quem entšá yojtsemna, chě bacna soyěngámnaca entsángbioye jtšaperdónayana ca?”

⁵⁰ Y Jesús más chě shembásabioye tbojaniana: “Aca átšbeñe icošbuachėyeca, atsbocaná cochántsemna; natjěmbana motsatoñe ca.”

8

Chë Jesúsbioye imojanájabuachana shembásenga

¹ Chca tojanopasá chentšana, Jesús bêts y base pueblënguëjana yojánana, tšabe noticiënga Bëngbe Bêtsabe amëndayama entšanga abuátambaye y abuayiynaye. Chë bnëtsana uta uatsjëndayëngna cháftaca imojtsajna. ² Básefta shembásengnaca imojtsetjëmbambnaye; chëngbentsana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentsana Jesús canÿséfta bacna bayëjënga tojtanëbuacna; ³ Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanëjabuáchana.

Chë jenabe cuento

(Mt 13.1-9; Mc 4.1-9)

⁴ Ba pueblënguentšana mallajta entšanga tmojánbocana Jesús jinÿama. Ba entšanga jouenama tmojanobeconá ora, Jesús mëntsá tojanacuntá: ⁵ “Canÿe, canÿe jená jénaye jauiquëshama yojëftsebozna. Yojtsëjquëshaye orna, básefta jénaye benache juachañe yojuatquëcjana; chiñna entšanga imojtsebotájaye, y jaja shloftšënga imojástjajna y imojtsósañe. ⁶ Inÿe meshëngna ndëtsbenguiñe yojuatquëcjana. Yojuábocna orna, betscó yojtsábojo, chë fshantsiñe ndoñe yapa búyeshe yonjamna causa. ⁷ Inÿe meshëngna uchemëshangañe yojuatquëcjana y chë uchemëshangá lempe yojtsatscué, chë jénayeca cánÿiñe yojuábocna ora. ⁸ Inÿe meshëngna, uanguaniñe yojuatquëcjana. Yojuájua orna, bëtscá yojuashájona; canÿe jénayentsana nÿa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tojtsobenhënga, šmochjouena ca.”

Ndáyeca Jesús cuentëngaca yojánabuatambaye

(Mt 13.10-17; Mc 4.10-12)

⁹ As chora chabe uatsjëndayënga tmojantjá: —¿Ntšamo chë cuento yojtsayana ca?

¹⁰ Y Jesús tojanëyana: —Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë inÿëngbioyna ndoñe; chë soyëngama chënga lempe cuentëngaca sentsëtsëtsná. Chca, masque corente chamotsafšna, ndoñe chamondobená Bëngbe Bêtsabe soyënga jinÿama; y masque beca quem soyënga chamouena, ndoñe queochátësertana ca.

Jesús chë jenabe cuentama tojanabuayená

(Mt 13.18-23; Mc 4.13-20)

¹¹ “Chë cuento mëntsá endayana: Chë jénaye Bëngbe Bêtsabe palabra entsemna. ¹² Chë benache juachañe yojuatquëcjana básefta jénaye endayana chë básefta entšanga Bëngbe Bëtsabiana soyënga tmojouenënga; pero chora Satanás betscó jabana chënga Bëngbe Bêtsabe palabra jabétsabuajuanama, chca, chënga ndoñe chamondëtsošbuáchema y bacna soyënguentšana ndatsebácanënga chamotsemnama. ¹³ Inÿe entšanga mondmëna mo chë ndëtsbenguiñe yojuatquëcjana jenaycá. Chë entšangna Bëngbe Bêtsabe palabra jouenana y oyejuayënga jtsemnana. Pero ndoñe nÿets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché

causa. Inyenga mochantsébuayënja y Bëngbe Bëtsábeñe betsošbuáchiyama mochanjasúfrianga; chë causa, Bëngbe Bëtsabe palabra cachcá chënga mochanjesonýaye. ¹⁴ Inyë entsanga mondmëna mo chë uchmëshangañe yojuatquëcjana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnana yapa jesenójuabnayana, y mallajta crocénana y ba soyënga jtsebmnama yapa jésebošana; chama y ba soyëngama yapa enócochinýena causa, Bëngbe Bëtsabe soyëngama echantsebnétjomba y ndoñe quemochátama ntšamo Bëngbe Bëtsá tojayancá. ¹⁵ Inyë entsangna mondmëna mo chë uanguaniñe yojuatquëcjana jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canýe betiye puerte tšabá tojtse-shajuancá, chënga bëtscá tšabe soyënga Bëngbe Bëtsabiana mochántsama. Chca mochántsama, Bëngbe Bëtsábeñe jtsošbuáchiyëse y nyetsca soyënguiñe puerte uantadënga jtsemnëse ca” —Jesús tojanabuayená.

Chë uajuinýanëshama cuento

(Mc 4.21-25)

¹⁶ “Ndocná canýe uajuinýanëshama juajuinýenana, chentšana ndaye sóyeca chësha jtsëstama o jutsnëshama tajsoye jtsajájuama; juajuinýenana ndayá tsbanánoca juajájuama, chë luarentše amashjuanëngbiama chaotsebinýnama. ¹⁷ Er ndocna yoiytëmena soye, ntjinýcá queochaisoquëda, y chë entsangbiama ndótatsëmbo soye, ntsotatsëmbcá queochaisoquëda.

¹⁸ “Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chabosertama; pero nda chë soyëngama ndoñe tontsebošá, chë nýe batšá ibosertana soyëngama bochantsebnatjëmba ca” —Jesús tojánayana.

Chë Jesusbe ndegombre pamíllanguentšënga

(Mt 12.46-50; Mc 3.31-35)

¹⁹ Chora, chabe mamá y chabe catsátanga chë Jesús yojtsemnentše tmojánashjajna, pero ndoñe imontsobena chábioye jobéconana, yapa entsanga causa. ²⁰ As canýa Jesúsbioye mëntšá tbojaniana: —Ache mamá y ache catsátanga shjoca montsemna y montseboše aca jinýama ca.

²¹ As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catsátanga, atšbe ndegombre pamíllanguentšënga ca.

Jesús chë binýia y chë béjaye bonguana yojëtsbema

(Mt 8.23-27; Mc 4.35-41)

²² Canýe te, Jesús chabe uatsjëndayëngaftaca canýe barquëshoye tojánamashëngo y chënga tojanëyana: “Uafjajónaye chenguana cuajna ca.”

As tmojána; ²³ y imojtsenachnéjuanëntscuana Jesús yojtsomaná. Ndeolpe, chë béjayiñe corente jabuache binýia yojóshjango y yojontsé béjaye chë barquëshoye jtsobuajútjiana. Y chca, chëngbiama puerte resjo yojtsemna. ²⁴ Chora chë uatsjëndayënga tmojána Jesús jetsefšenama y mëntšá tmojaniana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binýia y chë bëts olëshëngoye tojanmandá: “Bonguana šochtsemna ca.” Y chë binýiyana tojanëjbana y lempe bonguana yojtsatsmëna.

²⁵ Chentšana Jesús chabe uatsjëndayënga tojanëyana: —¿Bëngbe Bëtsá tšëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojnánánënga mëntšá imojtsenatsëtsnaye: — ¿Nda quem boyabása yomna? ¡Cha tojamandá ora, masque chë binÿia y chë béjajnaca joyeunayana ca!

Chë Gerasa luaroca bacna bayëja uambayá
(Mc 8.28-34; Mc 5.1-20)

²⁶ Chentšana Gerasa ca uabaina luaroye tmojánashjajna, Galilea ndirichiñe. ²⁷ Jesús fshantsoye tojánastjango ora, chë puebllocana canÿe entšá chábioye tojánabo. Cha ya bayté bayëjbe juabna yojtsebomna, ndocna entšayá yonjanichëtjona; y yebniñe ndoñe yonjanियena, sinó obanëngbe cuevëshënguenache. ²⁸ Chë entšá, Jesúsbioye tbojáninÿe ora, chabe natsanoica yojoshëntsamentšiyë y mëntšá yojtsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsetšená ca!

²⁹ Chca tbojanियana, er Jesús tojanmandá chë bacna bayëjbe juabna chábentšana chaueseobocnama. Ba soye chë bayëja yojánama chë entšá ndoñe tšabá chaotsemnama. Chë entšanga imojuamana cucuatšentšana y shecuatšentšana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca entšanga ndoyena luarëngoye yojánachana. ³⁰ Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjënga tmojánamashjna. ³¹ Y chë bayëjënga Jesús tmojanimpadá, chë corente uabouana thoye ndoñe chaondíchamuama. ³² Chentša béconana ba cotšënga imnajena, tjoca imnétsosañe; as chë bayëjënga Jesús tmojanimpadá chë cotšëngbeñe jamashjna chaulaesciama, y Jesús añe chca tojanalesenciá. ³³ As chë bayëjënga chë entšábentšana tmojésanbocana y chë cotšëngbeñe tmojánamashjna; y chentšana, chë cotšënga batsjocana peñëšëjana uafajónayoye imojtsoshbuetše y yojtsatajo.

³⁴ Chë cotšënga anÿenënga chca yojopásama tmojáninÿe ora, chentšana tmojtsanacheta y tmojána chë soye jacuéntama chë puebllocana y chiñe luarenache. ³⁵ Entšanga tmojánbocana ndayá tojanopasacá jinÿama, y Jesús yojtsemnoye tmojánashjajna ora, tmojáninÿe chë entšá chë ndábentšana bayëjënga tmojtanbocna, Jesusbe shecuatšentše yojtsótbemañe, entšayá uichëtjoná y chabe nÿets juábnaca. Y chë entšanga chama corente imojouatjaná. ³⁶ Ntšamo yojopasacá tmojáninÿëngna entšángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmënanana. ³⁷ Chentšana, nÿetscanga chë Gerasa luarentše oyenënga Jesúsbioye imojtseimpadana chë luarentšana ínÿoye chaotsoñama, er chënga corente imojtsauatja. As Jesús chë barquëshoye tojtanamashëngo y chentšana tojtsanoñe. ³⁸ Chë entšá chë ndábentšana bacna bayëjënga tmojtanbocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntšá tbojanियana: ³⁹ “Acbe yebnoye motsatoñe y cochjácuttaye lempe ntšamo Bëngbe Bëtsá acbiama tojamcá ca.”

Chentšana chë boyabása yojtsatoñe, y nÿets pueblëjana tojanacuntá ntšamo Jesús chabiamana tojanmá

Jesús canye shembásabioye tbojanshná y tojanma Jairébe bembetema cháuatayenama

(Mt 9.18-26; Mc 5.21-43)

⁴⁰ Jesús chë uafjónaye chenguánoica tojtanshjangora, nyetsca entsanga oyejuayenga tmojtanojfa, er nyetscanga chabiamama imojanobátmana. ⁴¹ Chora tojánashjangora canye entsá, Jairo ca uabainá. Cha inamna chë pueblentse chë judiëngbe enefjuana yebnentsa mandayá. Jesusbe shecuatšentse yojoshëntsamentšiyey ibojtseimpadana chabe yebnoye cháuama; ⁴² er chë nye canye bembe cha ibnabomná, bnëtsana uta uata bomná, chora ya jóbana yojtsemna.

Y Jesús yojtsayëntscuana, chë entsanga chábioye imojtsojuatsëntšenaye. ⁴³ Chë entsanguentse yojtsaye canye shembása, oboftjajuanánaca šocá; cha ya bnëtsana uta uata chca inapadecena. Lempe ntšamo yojanbomncá ashnayëngbioye atóbocayife yojtsepochóca, y ndocná yonjobenaye cha jáshnana. ⁴⁴ Chë shembásana stëtšoicana Jesúsbioye yojobeconá y chabe entsáyá sibuájua tojanábojajo. Y cachora chë oboftjajuanana ibojtsobojuána. ⁴⁵ Chora Jesús tojanatjá: —¿Nda šjabojajo ca?

Nyetscanga imojtsichamo ndoñe ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenaye ca.

⁴⁶ Pero Jesús cachiñe tojánayana: —Pronto nda šojábojajo, er atše sënjasenté obenana átšbentšana jóbocnana, mo nda stjashna orcá ca.

⁴⁷ Chë shembása tojáninye Jesús yojtsetátšëmbo cha tbojánbojajuama. As chora, ngmëmnyayá tojána y Jesusbe shecuatšentse yojoshëntsamentšiyey; y nyetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama. ⁴⁸ Chora Jesús tbojanayana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.

⁴⁹ Jesús cabá yojtsóyebuambnantscuana, chë judiëngbe enefjuana yebnentsa mandayábioyeca canya tojánashjangora, y chë mandayábioye tbojanayana: —Acbe bembe ya tontsóbana; ndoñe más chë Buatëmbayábioye matëbëyabomana ca.

⁵⁰ Pero Jesús chë soye tojanuena; as chë mandayábioye tbojanayana: —Ndoñe matauatjana. Nye Bëngbe Bëtsábeñe cochtsošbuáchiye y acbe bembe tšabá echántsatsmëna ca.

⁵¹ Chë yebnoye tmojánashjajna ora, Jesús ndoñe tonjanalesenciá banga choye jamashjna, nye Pedro, Juan y Santiago y chë shembásetembe bëtsëtsatna aife. ⁵² Nyetscanga imojtsenóbošachiye y ngmënaca imojtsóyebuambnaye, pero Jesús tojanëyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

⁵³ Chë entsanga Jesúsbioye nye imojtsáfchaye, er chënga imojtsetátšëmbo chë shembásetema obaná yojëtsemnana. ⁵⁴ Chora Jesús chábioye tbojanábuacueshache y jabuache tbojanayana: “¡Shembásetema, matëtsbaná ca!”

⁵⁵ Y cha tojtanyena y cachora tojtantsbaná; y Jesús tojanamëndá chë shembásetema saná chamuajuatšé, chaosama. ⁵⁶ Chë shembásetembe bëtsëtsata puerta ojnánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

9

Jesús, chabe uatsjéndayënga tojanichamó, Bëngbe Bëtsabe amëndayama jábuayenama

(Mt 10.5-15; Mc 6.7-13)

¹ Chentšana, Jesús chabe bnëtsana uta uatsjéndayënga tojánachembo, y mando y obenana tojanatšatá bacna bayëjënga entšángbentsana jtëbuacanama y šocanëngama jashnayama. ² Tojanichamó Bëngbe Bëtsabe amëndayama jábuayenama y entšángbioye jashnayama. ³ Y mëntšá tojanëyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inye entšëjua jenotrócama cach ndoñe. ⁴ Canye yebnentše posada chacmojúyentsame ora, chentše šmochjoquéda inye puebioye játantscuana. ⁵ Nderado ndayentše posada ndoñe chacmonjuyentsame, chentšana šmochjésebocana y shecuatšentša polvëshe šmochjésentoto, chca, chëngbioye jinñanyiyama chënga ndoñe tšabá tšëngaftangaftaca tmonjamama ca” —Jesús tojanabuayená.

⁶ Asna chë uatsjéndayënga tmojëftsanbocana y tmojána, nýetsca chë base pueblotémënguenache chë tšabe noticiënga abuayinayey y entšanga šocanëngama áshnaye.

Herodes y Jesús

(Mt 14.1-12; Mc 6.14-29)

⁷ Jesusbiamá y ntšamo yojtsanopasánama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentsana tojtanayena ca, ⁸ inyënga imojtsanichamo chë Bëngbe Bëtsabe juabna oyebuambnayá Elías cachiñe tojánbocna ca, y inyëngna canya chë tempo imojanmëna Bëngbe Bëtsabe juabna oyebuambnayënguentsá obanënguentsana tojtanayena ca. ⁹ Pero Heródesna tojánayana: “Cach atše sënjanmandá Juanbe bestšaše chamotsëstjanguama. ¿As, nda cha nántsemna, chë ndabiama chca soyënga jtsóyebuambnayana sentsuenana ca?”

Chíyeca Herodes yojtsenguaye ntšamo jamëse Jesús jinýama.

Jesús shachna uaranga boyabásenga saná tojanacaredadó

(Mt 14.13-21; Mc 6.30-44; Jn 6.1-14)

¹⁰ Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nýe chënga jëftsëbiatšese inýoye tojtsanoñe, Betsaida ca uabaina puebioye. ¹¹ Pero chë entšanga chë soye tmojántatšëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe amëndayama yojtsëtsësnaye, y chë šoquënga imojtsemnëngbioye tojanashná.

¹² Ya jetiñe yojtsobiamná orna, chë bnëtsana uta uatsjéndayënga Jesúsbioye tmojanobeconá y mëntšá tmojanayana: —Chë entšanga cuantichamuá, jóchnama y saná jonguangoñama chamotsama chë béconana pueblotémënguenache y luarënguenache; er quem luariñe ndocná quenatiyena ca.

¹³ Jesús chora tojanëyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nýe shachna tandëse y uta beónata fsëntsebmna; nýetscangbiama saná jabuámiyama nderado nda tojasna, aíñe cuanjacaredádaye ca.

14 Er mo shachna uaranga boyabásenga immamna. Pero Jesusna chabe uatsjédayënga tojanéyana: —Mamëndá nýetscanga chamotbiamama shachna bnétsásanënga ca.

15 As chënga chca tmojanma y nýetsca entšanga tmojanotbiamama. 16 Chora, Jesús chë shachna tandëse y chë uta beónata tojanca, y celoye tojanontješé, Bëngbe Bëtsábioye chama tbojtanchuá, tojanjatá y chabe uatsjédayënga tojanantregá entšángbioye chamuatšatama. 17 Nýetsca entšanga tmojanse jtoshachaye nýetšá, y cabá bnétsana uta sbarëco tmojanajutjé chë ojamnëtemëngaca.

Pedro tojánayana, Jesús chë Cristo bétsemnana
(Mt 16.13-19; Mc 8.27-29)

18 Canýe te, Jesús canýa Bëngbe Bëtsáftaca ibojsencuëntaye ora, chabe uatsjédayënga cháftaca imojtsemna. Chora tojanatjá: —¿Nda atše bétsemnana entšanga imojtsichamo ca?

19 Y chënga tmojanjuá: —Báseftanga montsichamo Juan ca, ínýengna Elías ca, y ínýengna canýe Bëngbe Bëtsabe juabna oyebuambnayá tempscá mora tojtayena ca.

20 As Jesús tojanatjá: —Y tšëngaftangna, ¿nda atše bétsemnana ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

Jesús tojánayana cha ibojamna jóbanana y jtayenana
(Mt 16.20-28; Mc 8.30-9.1)

21 Pero Jesús corente chënga tojanamëndá ndocnábeñe chama ntsecuëntayana. 22 Y mëntšá cachabiamama tojánayana: —Chë Bëngbe Bëtsá Entšá tbojanbemá bontsemna puerte jasúfriana, chë judiëngbeñe bëtsëjemëngcá amëndayëngbiamama, chë judiëngbe bachnangbe más uámana amëndayëngbiamama y ley abuátambayëngbiamama uabotenä jtsemnana. Entšanga mochanjóba, pero unga tianoye cha echántayena ca.

23 Chentsana nýetsca entšanga tojanéyana: “Nda atšbe uatsjendayá jtsemnana tojtseboše, cháuyana nýe Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chausonýá atše juastama, y cada te chaotseprontana átšbeyeca jasúfriama, y cruciñe jobanámnaca. 24 Nda tojtsama quem luarentše bëtscá soyënga jtsebomnana y atšbiamama jasúfriama ndoñe tontseprontana, chë nýetsca tescama yomna tšabe vida echanjobuetše. Pero nda quem luarentša soyënga cachcá tojëftsonýá atše juastama, masque chaóbana, chë nýetsca tescama yomna tšabe vida echántsebomna. 25 Er ¿ndayama entšá buanjoservia nýetsca quem luarentša soyënga jtsebomnana, cha pochocaná jtsemnana tojtsá y chë nýetsca tescama yomna tšabe vida tojtsoperdese? 26 Er ndëmuanýe entšá, atšbiamama o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiamama echantsëuatja, cha chabe bëts buashinýinýaniñe chaojésabo ora, chabe Taitabe bëts obenánaca y chabe angelotëmëngaftaca adoraná. 27 Ndegombre cbéyana, báseftanga muentše montsemnënga quemochatóbana, Bëngbe Bëtsá chabe obenánaca entšángbeñe jabomándama jabana ntjëftsinýcá ca” —cha tojánayana.

Jesús inýetšá tojanobinýná
(Mt 17.1-8; Mc 9.2-8)

28 Měntšá tojanopasá: Chca palabrënga tojanoyebuambá chentšana posuftaytese, Jesús tojëftsanëbiatše Pedro, Santiago y Juan, y canye tjoye tojántsjua, Bëngbe Bëtsáftaca jencuéntama. 29 Bëngbe Bëtsáftaca ibojtsencuéntanscuana, chabe jubíá ínýtšá yojtsinýna, y chabe uichëtjonëjuangá tša uafjantsëjuangá yojtsamna y tša yojtsabuashinýinýana. 30 Chora uta boyabásata tbojanonýná, Jesúseftaca ibojtsencuéntayese. Chata ibojamna Moisés y Elías; 31 corente buashinýinýaniñe ibojtsemna, y chënga imojtsencuéntayese ntšamo Jesús Jerusalenoca jasúfriana y jóbanana. 32 Masque Pedro y chabe enutata tša ocnyënga imojtsemna, nýe imojtsefšna y tmojáninýe Jesube juachañe tša yojtsebuashinýinýana y chë uta boyabásata cháftaca ibojtsemna. 33 Chë uta boyabásata Jesús bentšana ibojoluára ora, Pedro, Jesús bioye tbojanianana: “Buatëmbayá, jtša tšabá bëngbiama cuanmëna muentše jtsemnana ca! Mora fchanjapórma unga tambotëmënga: cánýetema acbiama, ínýetema Moisesbiana y ínýetemna Elíasbiana ca.”

Pero Pedro ndoñe yontsetátšëmbo ntšamo yojtsichámuama. 34 Y chca yojtsóyebuambnanscuana, canýe jantšetëshe yojóbema, y chëngbioye yojáutsbotse, y chënga chë tsoye imojtsemnana tmojáninýe ora, chë uatsjëndayënga chama imojtsauatja. 35 Chora chë jantšetëshoicana canýe oyebuambnayanana tojanóbocna, mëntšá: “Mua atšbe Uaquiñá endmëna, atšbe uabuayaná; cha šmochtseyeunana ca.”

36 Chë oyebuambnayanana tmojanuenentsana, tmojáninýe Jesús canýa yojtsemna. Chë uatsjëndayënga iytëca imojtsemna, y chë tempo ndocnábioye chama imonjuyenaye.

*Jesús, canýe basa bacna bayëjbe juabna uambayábioye tbojanshná
(Mt 17.14-21; Mc 9.14-29)*

37 Yëšana, chë tjocana tmojtantsmá ora, ba entšanga tmojánbocana Jesús jajëbenguama. 38 Chora, chë entšanguentsana canýe boyabása tojanontšë mëntšá uayebuáchana: —Buatëmbayá, Diosmanda atšbe uaquiñá minýe. Nýe cha atšbe uaquiñá endmëna; 39 y mora, bayëjbe juabna chábioye bontsësháchichana, y nýe ndeolpe jóntsana yoyana, ataque joshachana y uayoicana shashiye jtsabocanana. Y chábensana chë bayëja ndoñe betscó ntjëseboconana, y cuerpiñe corente maltrataná jeseboshjonana. 40 Ache uatsjëndayënga sënjaimpadá chë bayëja chábensana chamuatábocnama, pero ndoñe chematobená ca.

41 As Jesús tojánayanana: —¡Nýetšá ndošbuáchiyënga y bacna entšanga! ¿Buetaytë šojtsemna tšëngaftangafata jëftsemnana y jtsëuantánana ca?

Chora chë boyabásabioye tbojanianana: —Moye chë uaquiñá mánatse ca.

42 Chë basa yojtsebecóna ora, chë bacna bayëja chábioye tbojanshajayé y inýe ataque tbojanëshache. Pero Jesús chë bayëjbioye tbojanácacana, chë basetëmbioye tbojanshná y chabe taitábioye tbojtanëntregá. 43 Y nýetscanga puerte ojanánënga imojtsemna, Bëngbe Bëtsá tša obenana bomná inamnama.

*Jesús cachiñe tojánayanana cha ibojamna jóbanana y jtayenana ca
(Mt 17.22-23; Mc 9.30-32)*

Nýetsca entšanga, ndayá Jesús yojtsamama ojanánënga imojtsemnëntscuana, chabe uatsjëndayënga cha tojanéyanana: 44 “Quem soye tšabá šmojhjouena y ndoñe chacmondëbnëtjomba: Chë Bëngbe Bëtsá Entšá tbojanbemá entšangbe cucuatšifne mochanjáboshjona ca.”

⁴⁵ Pero chënga ndoñe yontsósertana ntšamo Jesús yojtsëtsëtsnacá, er Bëngbe Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

¿Nda chë más uamaná yomna?

(Mt 18.1-5; Mc 9.33-37)

⁴⁶ Chë tempo, chë uatsjédayënga tmojanontsé enatsëtsnayana, nda chë más uamaná bëtsemnana. ⁴⁷ Jesús yojtsetátšëmbo ntšamo chënga imojtsejuabnayama; asna, canye bášetema tbojánishache, chabe juachaca tbojántbema, ⁴⁸ y chëngbioye tojanéyana: “Nda átšbeñe ošbuachiyá bëtsemnana, quem basetëmbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tšëngaftanguentše chë más nduamaná, cha chë más uamaná entsemnana ca.”

Nda bëngbe contra ndoñe tontsemná, bëngaftaca jtsemnana

(Mc 9.38-40)

⁴⁹ Juan, Jesúsbioye tbojanianyana: —Buatëmbayá, bënga fsënjinye canye boyabása y cha aca jótšëmbonëse, entšángbentsana bacna bayëjbe juabna endëtëbuacana; pero cha bëngaftaca ndoñe quenátsmëna causa, chama fsënjesyauaná ca.

⁵⁰ As Jesús tbojanjuá: —Ndoñe šmatjuauyaná; er nda bëngbe contra ndoñe tontsemná, bëngaftaca jtsemnana ca.

Santiago y Juánbioye Jesús tojanëcácana

⁵¹ Jesús celoye jtama yojtsobeco ora, nyets añémoca cha yojtsejuabnaye Jerusalenoye jama. ⁵² Natsana báseftanga tojanichamó, y chënga tmojána canye base pueblotëmoye Samaria luaroca, posada chabiamana janguangoñama; ⁵³ pero chë luarentša entšanga ndoñe tmonjánbošena posada juantšamiana, er tmojántatšëmbona cha Jerusalenoye yojétsayama, chë chëngbe uayayëngbe uamana puebloye. ⁵⁴ Chabe uatsjédayata, Santiago y Juan, chë soye tbojáninye ora, Jesús tmojanianyana: “Bëngbe Utabná, ¿quetseboše bëndata fchaimandá celocana íñeshe chaótsatše y quem entšanga chaotsapochócaye ca?”

⁵⁵ Pero Jesús yojobuértana y chátbioye tojtsanëcácana, chca juabna bomna causa. ⁵⁶ Chentšana chënga inyë pueblotëmoye tmojtsanoñe.

Chë Jesús juastama bošënga

(Mt 8.19-22)

⁵⁷ Benachëjana imojtsajna ora, canye boyabása Jesúsbioye tbojanianyana: —Atšbe Utabná, atše séntseboše aca juastana ndëmoye chacojtsá choye ca.

⁵⁸ Y Jesús tbojanjuá: —Chë zorrënga cuevëshënga mondbomna ndayentše jtsiyenama y chë shloftsetëmëngna uajajonëshangá; pero chë Bëngbe Bëtsá Entšá tbojanbemá ndoñe quenátšbomna ndayentše jóchnama ca.

⁵⁹ Jesús inyë entšábioye tbojanianyana: —Smasto ca.

Pero cha tbojanjuá: —Atšbe Utabná, šmolesenciá atšbe taitá chjshesabotbontsañe ca.

⁶⁰ As Jesús tbojanianyana: —Chë Bëngbe Bëtsabiamana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe. Acna, motsa y Bëngbe Bëtsabe amëndayama entšanga cochjabuayená ca.

⁶¹ Inŷana Jesúsbioye tbojaniyana: —Atšbe Utabná, atše sěntseboše aca juastama, pero šmolesenciá natsana atšbe pamíllangbiamia jaisidiósoftama ca.

⁶² As Jesús tbojaniyana: —Nda cachabe soyěngama tbojtsengmena, Běngbe Bětsabe aměndayocama ndoñe ntoservénana; er cha jtsemnana mo canŷe arayacá, chě tojtsetrabája ora, stětšoye tojtsaisantješncá ca.

10

Jesús canŷsěfta bnětsana y uta entšanga tojanichamó Běngbe Bětsabe soyěngama jábuayenama

¹ Chě soyěnga chentšana, Běngbe Utabná Jesús inŷe canŷsěfta bnětsana y útatnaca tojanabacacá, y utáta chabe natsana tojanichamó, chě cha ibojtsemna jama pueblěngoye y luarěngoye.

² Měntšá chěnga tojaněyana: “Canŷe bětš jajañe bětscá játbanamia entsemna, pero peonga báseftanga; chíyeca, chentša nduíñbioye jaimpádana ba peonga chauichamó chě jaja saná játbanamia. Cachcá, quem luarentše bětscá entšanga montsemna Běngbe Bětsábioye nduabuátměnga, y chěngbioye chabiamia abuayiynayěnga nŷe báseftanga. Chíyeca, Běngbe Bětsá moimpadanga ba abuayiynayěnga chauichamó quem entšanga chábioye júbuajama. ³ Motsajna; šmochjinŷe, atše tšěngaftanga chontsichamná mo oveshěnga cuenta, tjañe quešěngbeñe. ⁴ Ndoñe šmattsambaye shecnaja, ni crocénana šmattsaiuábuenana, ni shecochětjoněshe; y nda chacmojacheuá ora, ndoñe yapa bēn chentše šmatjáiseniobiamnaye.

⁵ “Ndaye yebnentše chašmojámashjna ora, natsana šmochjayana: ‘Lempe tšabá quem yebnentše chaotsomñe ca’. ⁶ Y chě yebnentše chca juabna bomna entšanga tmomñěsna, chě tšabiana ndegombre chentše echántsemna; pero ndoñese, chca tšabiana chentše ndoñe queochátsmēna. ⁷ Canŷe yebnentše šmochjoquéda, y šmochjase y šmochjofšiyē ntšamo chentše chacmojacaredadaycá; er chě trabajayá merecido jtsebuájonana chca juácana. Canŷe pueblentše nŷe inŷe y inŷe yebnėnguenache ndoñe matajnana.

⁸ “Ndaye pueblentše chašmojámashjna y tšabá chacmojúbuajentše, šmochjase ntšamo chentše chacmojacaredadaycá; ⁹ chentša šoquěnga šmochjáshnaye y šmochjáuyana: ‘Běngbe Bětsabe aměndayana tšěngaftangbeñe entsemna ca’. ¹⁰ Pero canŷe pueblentše chašmojášhango y ndoñe chacmonjúbuaja, chentša tsashenangoye šmochjábocana y mēntšá šmochjayana: ¹¹ ‘¡Chě tšěngaftangbe pueblentša polvėshe, chě bėngbe shecuatsěnguiñe tojuanjěshe, camuentše fšcuesenstětóna, chca, tšěngaftanga chašmotsetátšěmbuama ndoñe tšabá šmonjamama! Pero masque chca, šmotsetátšěmbo chě Běngbe Bětsabe aměndayana tšěngaftangbeñe entsemna ca.’ ¹² Ndegombre cběyana, quem luare jopochócama te, chě luarentša entšángbioye Běngbe Bětsá puerte jabuache echantsacastígaye, y Sodoma puebloca bacna entšángbioye ndoñe nŷa nŷetšá jabuache ca” —Jesús tojánayana.

*Chě nduauenana entšanga
(Mt 11.20-24)*

¹³ “¡Tša lastema Corazín puebloca entšangbiamia! ¡Tša lastema Betsaida puebloca entšangbiamia! Er chě muentše Běngbe Bětsabe

obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entsanga ya tempo chëngbe bacna soyëngama ngmënaca matmëntenójuabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entsayangaca matmëntopormanga y jatinyashiñe matmëntjotbiam. ¹⁴ Pero ntšamo entsanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebmna, chë Tiro y Sidonoca bacna entsangbe castiguama. ¹⁵ Y tšëngaftanga, Capernaum pueblentša entsanga, ¿celóntscoca atsebánanënga šmochtsemna ca šmojtsejuabnanga? ¡Chë uabouana infernoye cmochantsësetjango!

¹⁶ “Nda tšëngaftanga tcmojoyauná, chana atše joyeunayana; y nda tšëngaftanga tcmojtsëbaté, chana atše jtsabotena; y nda atše šojtsaboté, chana chë nda šojichmó chábioye jtsabotena.”

Chë canÿsëfta bnëtsana y uta entsanga tmojtanashjajna

¹⁷ Chë canÿsëfta bnëtsana y úatna Jesús yojtsemnoye tmojtanashjajna, puerte oyejuayënga; y chábioye mëntšá tmojanijana: —¡Bëngbe Utabná, aca jótšëmbonëse, chë bacna bayëjëngnaca šonjoyauná ca!

¹⁸ Y Jesús tojanëyana: —Ndegombre. Y tšëngaftanga Satanásbioye chca šmontseyëñaná ora, entsemna mo Satanás celocana canÿe tcuinÿcá jtsotsatšana stjinÿcá. ¹⁹ Atšna obenana tcbonjatšatá mëtšcuayënga y alacranëngbeñe chašmotsajnama, y bëngbe uayayá Satanasbe nÿets obenana jáyëñanama, tšëngaftanga ndocá ntjapasacá. ²⁰ Pero móyejuanga, ndoñe chë bacna bayëjënga chacmóyaunama obenana šmojtsebmnama, sinó tšëngaftangbe uabaina celoca ya yojtsábemanama, er tšëngaftanga chë nÿetsca tescama yomna tšabe vida šmochántsebmna ca —cha tojanëyana.

Jesús puerte tojanoyejuá

(Mt 11.25-27; 13.16-17)

²¹ Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nÿe batsá tatsëmbënga tconjanÿanÿé, chë tša tatsëmbënga y osertánëngbiam tcojaiytëme soyënga. Añe, chama cbontsadorana, Taita, aca chca chaotsemnama tcojábošenayeca.

²² “Atšbe Taitá lempe chca šonjatsetá. Chë Uaquiñábioye ndocná corente quebnatábuatma; nÿe chë Taitá añe. Y chë Taitábioye ndocná corente quebnatábuatma; nÿe chë Uaquiñá añe, y ndëmuanÿëngbioye chë Uaquiñá tojtseboše nda chë Taitá yomnama jinÿanÿiyama, chëngnaca chë Taitábioye mochantsábuatma ca.”

²³ Chentšana, Jesús chabe uatsjëndayëngbioye tojanobuértana y nÿe chëngbioye tojanëyana: “¡Puerte oyejuayënga chë ntšamo tšëngaftanga šmontsonÿacá jinÿama tmojtsoebenënga! ²⁴ Er atše cbëyana, banga Bëngbe Bëtsabe juabna oyebuambnayënga y reyënga tmojánbošena chë tšëngaftanga šmontsonÿá soyënga jinÿana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

Chë Samarioca tšabe entšabiam cuento

²⁵ Canÿe judiëngbe ley abuatambayá yojontsé Jesúseftaca jóyebuambayama, y jisháchichiyamna mëntšá tbojantjá: —Buatëmbayá,

¿ndayá šojtsemna jamana chë nÿetsca tescama yomna tšabe vida jtsebomnama ca?

²⁶ Y Jesús tbojanjuá: —¿Ntšamo leyiñe iuábemana? ¿Ndayá chiñe condbétsaliaye ca?

²⁷ Chë ley abuatambayá tbojanjuá: —“Chë Utabná Bëngbe Bëtsá cochtsebobonshana nÿets ainánaca, nÿets espíritoca, nÿets añémoca y nÿets juábnaca”; y “ndëmua entšánaca cochtsebobonshana, ntšamo cach aca cuenobobonshancá ca.”

²⁸ Chora Jesús tbojaniana: —Tšabá šconjojuá. Chca cochtsama y chë nÿetsca tescama yomna tšabe vida cochántsebomna ca.

²⁹ Pero chë ley abuatambayá tšabá jenoquédamna Jesúsbiye tbojantjá: —Y ¿ndase chë ndëmua entšánaca yomna ca?

³⁰ As Jesús tbojanjuá: —Canÿe, Jerusalenocana Jericó benache canÿe entšá yojtsetsmá, y básefta salteadorënga imojébëbocna. Lempe imojtsefca, chë entšayánaca; imojtsejantšetaye y chentšana imojtsatónënga, y chë entšá batšá obaná imojéseboshjona. ³¹ Ndeolpe, chë benachëjana canÿe judiëngbe bachna yojtsachnëjuana. Chë entšábioye ibojinÿe ora, nÿe chabuacá yojtsëchnëguañe. ³² Cachcá, canÿe Levita, chë canÿe Bëngbe Bëtsabe bëts yebnocá trabajayá chëjana yojtsachnëjuana; y chë entšábioye ibojinÿe orna, nÿe chabuacá yojtsëchnëguañe.

³³ “Chorna, cach benachëjana canÿe samaritano ináboye. Chë entšábioye ibojinÿe orna, ibojóngmia. ³⁴ Chábioye vojobeconá, aceitiye y vínoyeca ibojáshna, y lisianënguiñe entšëjuaca ibojuantsacjuá. Chabe couayñe ibojëftsenjayiye, canÿe yebnoye posada uyentšamianoye ibojuánatse, y chentše chábioye ibojëftsinÿena. ³⁵ Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nÿetšá, y chë posada nduíñbiye ibojesabuenaye, y mëntšá ibojauyana: ‘Quem boyabása cochtsinÿena, y nderado más crocénana muabiana chacojenábojafjonasna, mëjana chaitisachnëjuana ora, cbochjabáisabuenaye ca.’ ³⁶ Y chcasna, ¿chë unganguentšana nda cmojtsinÿana chë entšabiama yojtsejuabnaye cha cachacá entšá inamnama ca?”

³⁷ Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojaniana: —Asna, motsa y cachcá cochjama ca.

Jesús, María y Martbe yebnentše

³⁸ Chentšana, Jesús benachëjana yojtsaye y canÿe base pueblotëmoye tojëftsanamashëngo; y canÿe shembása Marta ca uabainá, chabe yebnentše tbojanofja. ³⁹ Martna canÿe quenata ibnabomna, María ca uabainá. Cha Jesusbe shecuatšentše yojótbema chabe palabra jouenama; ⁴⁰ y chëntscuana Marta ba soyënga yojtsama. Cha Jesúsbiye tojanobeconá y tbojaniana: —Utabná, ¿tondayana cmontsentšamna, atšbe quenata nÿe canÿa chašonÿá lempe jamama ca? Mëyana chašuájabuache ca.

⁴¹ Chora Jesús tbojanjuá: —Marta, Marta, bëtscá soyëngama consenócochinÿena y consenomantšná; ⁴² pero nÿe canÿe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaotsajbanama ca.

11

Ntšamo Bëngbe Bëtsáftaca cuanjencuénta
(Mt 6.9-15; 7.7-11)

¹ Canÿe, Jesús Bëngbe Bëtsáftaca ibojtsencuéntaye canÿe luarentše. Tojanpochocá orna, canÿa chabe uatsjendayënguentsá tbojaninyana: — Bëngbe Utabná, Bëngbe Bëtsáftaca jencuéntama šmabuatambá, ntšamo Juan chabe uatsjëndayëngaftaca tojanmca ca.

² Y Jesús tojanëyana: —Bëngbe Bëtsáftaca chašmojtsencuénta ora, šmochjayana:

Bëngbe Taitá, acbe uabaina chë más uámana uabainana chauesomñe.

Acbe amëndayana chaóshjango.

³ Mënté šmiyatšatá, cada te šnetsëjaboto tandëše.

⁴ Bacna soyënga fsënjama: šmotsaperdónaye;

er bëngnaca nyëtscanga chë bëngbiama bacna soyënga amëngbioye fsëndbetsaperdónaye.

Bacna soyënga jamama šojocohëngo ora, šcochjubabuache chca nde-nobuíyama.

⁵ Jesús mëntsánaca tojanëyana: “Nderado aca acbe bacóbioye tsëntseto ora tcojá y tcojauyana: ‘Bacó, Diosmanda unga tandëše šmotsemná,

⁶ er canÿe atšbe amigo yebnoca tonjáshjango y tondaye quetsátsbomna cha jonánjama ca.’ ⁷ Ndegombre, cha tsocana tcmojojuá: ‘Ndoñe šmatébeyabomana. Bëšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tandëše jámnana ca.’ ⁸ Ndegombre, chë bacó ndoñe tonjotsbaná chë tandëše jámnama,

cháftaca šuenatsëtsnámase, cha pronto jotsbanana chca uébëyabomana ndoñe tconjajbaná causa, y lempe ntšamo cmojtsajabotcá cha cmochanjoyiye. ⁹ Chcasna, atšbe cbëyana: Smochjotjañe y Bëngbe Bëtsá cmochanjátšataye; šmochjánguango y šmochanjínÿena; šmochjachembo y cmochanjébëtafo. ¹⁰ Er ndánaca ndayá tojtsotjanañá, jóyëngacñana; y tojtsenguá cha, jónÿenana; y nda tojtsechembuanábioye jebiatëfjuana ca.

¹¹ “¿Nda tšëngaftanguentsana nantsobena, taitá tojtsemnëse, cachabe uaquiñábioye canÿe mëtscuaye jatštayana, beona tbojtsotjanañe ora; ¹² o canÿe alacránashe joyiyana, shëmnëbé tbojtsotjanañe ora? ¹³ Y chca, tšëngaftanga, bacna soyënga amënga, tšëngaftangbe basetemëngbioye tšabe soyënga jatšatayama šmojtsamanëse, jmás chë celoca Taitá, chë Uámana Espiritu echanjátšataye, chca tmojtsotjanañëngbioye ca!” — Jesús tojánayana.

Fariseunga tmojánayana Jesús Satanásbentsana obenana tojanóyëngacñe

ca
(Mt 12.22-30; Mc 3.20-27)

¹⁴ Jesús canÿe entsábentsana canÿe bacna bayëja tbojtanábocna. Chë bayëja ndëbiá chë entsábioye tbojánbema, y chábensana tojésanbocna ora, chë ndëbiá tojtanontsé oyebuambnayana. Y chë entsanga chama imojenjaná; ¹⁵ pero báseftanga imojtsichamo: “Beelzebú, cach Satanás, chë bacna bayëjengbe amëndayá, quem boyabásabioye obenana tbojatšeta chë bayëjenga chauatëbuacnama ca.”

¹⁶ Y inÿenga, Jesús jisháchichiyamna tmojanimpadá canÿe bëts soye chaoma, jinÿanÿiyama cha celoca obenana inabomna o ndoñe. ¹⁷ Pero Jesús yojtsetátsëmbo ntšamo chëngbe juabna bëtsemnana. As tojanëyana: “Canÿe amëndayábentše entsanga tmojtsenojatá y tmojtsenáyase,

cachënga jtsenpochócana; y canÿe yebnentşe oyenënga tmojtsenojatá y tmojtsenáyase, chë pamállanga tşabá nÿets tempo ndoñe quemochátsmëna. ¹⁸ Cachcá, Satanás tojtsenojatá y cachabe contra tojtsemnëse, ¿ntşamo nantsobena chabe mándayana quem luarentşe jëftsebmñana? Chca sentsichamo, er tşëngaftanga şmotsichamo Beelzebube obenánaca chë bayëjënga stsatëbuacana ca; ¹⁹ pero chca ndegombre tojtsemnëse, ¿ndábeyeca tşëngaftangbe usetonënga obenana imojtsebmna chë bacna bayëjënga jtëbuacnama? Chíyecna, cachënga montsinÿinÿná ntşamo ndegombre yomnana, y tşëngaftanga ndoñe ndegombre soye şmotsichámuama. ²⁰ Y atşna, Bëngbe Bëtsabe obenánaca entsángbentsana chë bayëjënga sëndëtëbuacana; y chë soye entsinÿinÿná, Bëngbe Bëtsabe amëndayana tşëngaftangbiye tojóshjanguama.

²¹ “Canÿe corente añemo bomna entsá, bëtscá ármangaca chabe yebna tojtsinÿenëse, chë tsoca tomna soyënga ndoñe ntjotşana. ²² Pero inÿa chabiamá más añemo bomná tojabo y tbojabetseyëñaná, chë cha yojanaşbuaché armangá jtsabocana y chë tobomna sóynaca; y ntşamo chë inÿa tojtseboşcá chë soyëngaca jamana.

²³ “Nda ndoñe átşeftaca tontsemná, atşbe uayayá jtsemnana. Y nda átşeftaca ndoñe tontsetrabája, chana atşbe contra jtsetrabájayana ca” — Jesús tojánayana.

Ndayá inopása chë bacna entsángaftaca

(Mt 12.43-45)

²⁴ “Canÿe bacna bayëja canÿe entsábentsana tojësebcna ora, bojojo luarënguenache chë bayëja jtsanana, ndayentşe jóchnama onguayinë. Ndoñe tonjínÿena ora, jenójuaboyana: ‘Atşbe oyenoye, chë ndayentsana sënjëftsebcnoye chanjeshëcona ca.’ ²⁵ Y choye tojtashjango ora, jinÿenana lempe tşabá cha jtesamashënguama, mo tsjajniñe y prontániñe cuaftsemncá. ²⁶ Chora chë bayëja jana y inÿe canÿsëfta bayëjënga, chabiamá más opëjënga jobiatşana, nÿetscanga choye jamashjnama, chë boyabásabeñe joyënanama. Y chca, chë boyabása tempscama más bacna entsá jtoquédana, chora chë natsanama más bayëjënga abamna causa ca” — Jesús tojánayana.

Chë ndegombre oyejuayana

²⁷ Jesús chë soyënga yojtsichamëntscuana, entsanguentşe canÿe shembása yojuayebuáchena: —¡Puerte oyejuayá chë quem luaroye tcmojúshjango y tcmojëftseboché shembása ca!

²⁸ As Jesús tbojanianana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

Chë bacna entsanga Jesús tmojanimpadá canÿe bëtş soye chaoma, chabe obenana jinÿama

(Mt 12.38-42; Mc 8.12)

²⁹ Entşanga más imojtsógotoye Jesús yojtsemnentşe, y Jesús tojanontşé jáuyanana: “Morsca entsanga puerte bacna entsanga; chënga montsotjanañe atşe canÿe bëtş soye chaima atşbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soycá. ³⁰ Er chca, ntşamo Jonás Nínive puebloca entsanga canÿe bëtş soye tojaninÿanÿë Bëngbe Bëtsá obená yomnama chamotsetatşëmbuama, chë Bëngbe Bëtsá Entşá tbojanbemánaca entsinÿanÿná morsca entsángbiye, Bëngbe Bëtsabe

amëndayana tojóshjanguama. ³¹ Bëngbe Bëtsá ntšamo morsca entšanga tmojanmama yochjayana te, chë Sur luaroca reiná echanjotsaye y morsca entšangbiana echanjayana ndoñe tšabá tmonjama ca; er chana chë quem luare uajbana luarëngocana tojánabo Salomonbe osertaná naca palabrënga jouenama, y chë mora muentše entsemnana, Salomonbiana más uamaná endmëna. ³² Chë entšanga tšabá o ndoñe tšabá tmonjamama jayanama te, chë Nínive bëts pueblocá entšángnaca mochanjotsaye y mochanjayana morsca entšanga ndoñe tšabá tmonjama ca; er chënga, Jonás yojsabuayiynaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiana más uamaná endmëna ca” —Jesús tojánayana.

Chë cuerpama uajuinÿanësha

(Mt 5.15; 6.22-23)

³³ “Ndocná canÿe uajuinÿanësha juajuinÿenana, canÿe iytëmena luaroje juajájuama, ni canÿe cajonëshe tajsoye, sinó canÿe tsbanana luaroca juajájuama, chca, chë luaroje amashjuanëngbiana chaotsebínÿnama. ³⁴ Ace bomínÿe tšabá totsomñëse, ace cuerpama mo canÿe uajuinÿanëshacá jtsemnana; chíyeca aca jtsobenana, ntšamo tcojtsamcá chë bomínÿeca jtsonÿayana. Chë bomínÿe ndoñe tšabá tontsemnëсна, chë bomínÿe tondaye ntso benana jamana, ntšamo tcojtsamcá chacobená jinÿama. Cachcá, ace ainaniñe tšabe juabnënga tcojtsebomnëse, lempe ntšamo chacojtsamcá tšabá echántsemna. Y ace ainaniñe ndocna tšabe juabnënga tcontsebomnëсна, lempe ntšamo chacojtsamcá ndoñe tšabá queochátsmëna. ³⁵ Cuedado šmochtsebomna, tšëngaftangbe ainaniñe nÿe tšabe juabnënga chaotsemnana, chca, lempe ntšamo chašmojtsamcá tšabá chaotsemnana, y bacna juabnënga ndoñe chaondëtsemnana. ³⁶ Chcasna, lempe ntšamo šmojtsamcá tšabá tojtsemnëse y ndocna bacna sóyesna, tšëngaftanga bëtscá tšabe soyënga šmochántsama; y chca, tšëngaftanga šmochántsemna mo canÿe uajuinÿanësha puerte tšabá tojtsebínÿnacá ca” —Jesús tojánayana.

Jesús chë fariseungbiana y ley abuátambayëngbiana tojánayana, chënga ndoñe tšabá montsama ca

(Mt 23.1-36; Mc 12.38-40; Lc 20.45-47)

³⁷ Jesús chca jayanama tojanpochocá ora, chábioye canÿe fariseo tbojanofja chabe yebnoye jauasama. As Jesús tojánamashëngo y mesëshentše tojanótbema. ³⁸ Chë fariseo tojanëuatjaná, Jesús ntsacuentšabiaca jasama yojontsé causa, ndoñe ntšamo chë judiënga imojanamancá, Bëngbe Bëtsabe delante tšábënga jtsatsmënama. ³⁹ Pero Bëngbe Uabná tbojanianana: “Tšëngaftanga fariseunga šmondmëna mo entšangcá ndëmuanÿënga chë tazëšënga y šcnenënga shjoicajana jtsóbojabinana, pero tsoyna nÿe cachcá jonÿayana. Tšëngaftanga becá jtsamana entšangbiana mo tšabengcá jtsinÿnama; pero tšëngaftangbe ainanentše jútjena entsemna nÿe jtsatbëbanama y bacna soyënga jtsamama juabnëngaca. ⁴⁰ ¡Juabna ndbomnënga! Tšëngaftanga ndoñe šmondétatšëmbo, chë tšëngaftangbentšana entšanga ndayá jinÿama imobencá tojamá, chë tšëngaftangbe tsoye yomna soyëngnaca tojamama; y chíyeca, chabiana cachcá enduámana ndayá tšëngaftangbe ainanoye yomna soyënga, y chë entšangbe delante šmojama soyënga. ⁴¹ Tšëngaftanga cmontsamna, chë soyënguñe ndayá

ainaniñe yomnentšana ínÿengbioye jatsatayana, y chca, lempe ntšamo chašmojtsamcá Běngbe Bětsabe delante tšabá echántsemna ca.

42 “¡Tša lastema tšěngaftangbiama fariseunga! Tšěngaftanga Běngbe Bětsabiama jtsequěcnayana chě jajañentša sananga bnětsanentšana canÿe soye nÿetsá, y chě binche matatéměnguentšana menta, ruda y nÿetsca binche matatéměnguentšaněnaca; pero nÿe batsá jtsamana chě nÿetscanga cachca derechěnga chamotsebomnama y cha jtsebomshánama. Quem soyěnga cocayé cmontsamna jtsamana, chě inÿe tšabe soyěnga ntjajbanacá ca.

43 “¡Tša lastema tšěngaftangbiama fariseunga! Tšěngaftanga tša jtsebošana chě judiěngbe enefjuana yebněnguenache chě más uámama luarěnga jtsebomnama, y benachiñe nÿa puerte respétoca entšanga chacmotsacheuanayama ca.

44 “¡Tša lastema tšěngaftangbiama! Smondměna mo obaněnga uatbontsaniñcá, ndoñe ntsinÿnana, y entšanga ntsetatsěmbcá chiñe jtsebotájayana. Chca šmondměna, er tšěngaftangbe ainana entsemna jútjena bacna juabněngaca, pero entšangbiama ndoñe chca quešmátinÿna ca.”

45 Jesús chca tojánayana ora, canÿe ley abuatambayá tbojanayana: —Buatěmbayá, chca palabrenga contsoyebuambná ora, běngbiámnaca ndoñe tšabá quecátichamo ca.

46 Pero Jesús tojánayana: —¡Tša lastema tšěngaftangbiámnaca, chě ley abuátambayěnga! Mo canÿe entšá, couáybioye canÿe uauta uasmaněsha tbojuasmá, y chěsha ndoñe yapa chaondětsautama tondaye tontsamcá, tšěngaftanga entšángbioye jtsaměndayana bětscá manděnga chamotsocumplínama, pero cach tšěngaftanga ni mo batsatěmnaca jtsamana chě manděnga jtsocumplínama ca.

47 “¡Tša lastema tšěngaftangbiama! Tšěngaftanga jtsamana chě Běngbe Bětsabe juabna oyebuambnayěnga tempsquěnga bětsětsa entšanga chamotsemnama, chěngbe cuevěshěnga jtsatspórmayěse; pero chě mo chěngcá, canÿe buayenana sóyeca tmojaběngbioye ndoñe ntsayaunanana. Y chě tempsquěnga chca oyebuambnayěngbioye tšěngaftangbe běts taitanga tmojtsaněbaye. 48 Chca jtsaměse, tšěngaftanga šmontsinÿanÿná, ntšamo chě běts taitanga tmojanmcá tšabá yomna ca tšěngaftanga šmojtsejuabnama, er chěnga chě oyebuambnayěngbioye tmojtsaněbaye y tšěngaftangna chěngbe cuevěshěnga jtsatspórmayana.

49 “Chíyeca, Běngbe Bětsá chabe běts osertanánaca tojánayana: ‘Atše chěngbioye chanjichamuá atšbe juabna oyebuambnayěnga y atšbiama abuayinayěnga, y báseftangbioye mochantsěbaye y ínÿengbioyna mochantsěcamiye ca.’ 50 Y chca, nÿets castigo morsca entšángbeñe echántsemna, nÿetsca Běngbe Bětsabe juabna oyebuambnayěnga tmojóbanama, Běngbe Bětsá quem luare tojanma orscana; 51 Abělbioye tbojanóba orscana, Zacarías tmojanóbantscoñe. Zacaríasna Běngbe Bětsabe běts yebnentše tmojanóba, altar y chě entšanga Běngbe Bětsábioye imojánadorana luariñe. Chcasna, Běngbe Bětsá echanjama chě oyebuambnayěnga tmojanóbanama, morsca entšángbeñe nÿets castigo chaotsemnama ca.

52 “¡Tša lastema tšěngaftangbiama, chě ley abuátambayěnga! Tšěngaftanga jtsamana, Běngbe Bětsabe soyěngama jtsetatsěmbuama entšangbiama yapa totcá chaotsemnama. Cach tšěngaftanga ndoñe quešmátobena

chë soyëngama tšabá jtsetatšëmbuana, y chama jtsetatšëmbuama tmojtsebošëngbioyna ndoñe quešmatalesénciaye ca” —Jesús tojánayana.

⁵³ Jesús chë soyënga tojánayanama, chë ley abuátambayënga y fariseunga puerte tojánëtëna, y cha chentšana yojtšaisebocana ora, tmojanontšé chábioye becá tjanayana, y imojtsama ba soyëngama chaóyebuambama, ⁵⁴ chca, jisháchichiyama jtsebošëse, cachá ntšamo tojayana sóyeca chënga jtsebomnana ndáyeca chábioye mal jaquédana.

12

Jesús, chë bacna entšanga ntšamo ndegombre tmojuabnacá ndinÿinÿnayëngbiana tojanabuatambá

¹ Chëntscuana, ba uaranga entšanga chentšë tmojanóoto; tša entšanga causa, nÿetscanga imojtsenatsëntšenaye. Chora Jesús tojanontšé jóyebuambayama, y natsana chabe uatsjëndayëngbioye tojanëyana: “Chë fariseungebe buatëmbana soyëngama cuedado šmochtsebomna, chënga mondmëna bacna entšanga, ntšamo ndegombre tmojuabnacá ndinÿinÿnayënga. Ntšamo chë levadura jamana nÿetsana chauábochema, cachcá chëngbe buatëmbana soyëngaca, chë fariseunga montsobena jamana bëtscá entšanga ntšamo ndoñe tšabá tontsemncá chamotsamama. ² Er ndocna yoiytëmena soye, ntjinÿcá queochaisoquéda; y chë ndótatšëmbo soye, ntsotatšëmbcá queochaisoquéda. ³ Chíyeca, chë mora nÿe tšëngaftangbiana šmojtšichamo soyënga, chë entšangbiana mo ibetiñcá cuaftsemna soyënga, entšanga chama botamana mochanjátatšëmbona. Y chë iytëcana šmojtšichamo soyënga, nÿetsca entšángbioye mochántsabuyiynaye, mo nda canÿe yebnentša tsbanánocana noticiënga tojtsayebuachcá ca” —cha tojanëyana.

*Nda ndegombre cuantsebiauatja
(Mt 10.26-31)*

⁴ “Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiana, pero chentšana más jamana ndoñe ntsoberana. ⁵ Cbochanjabuayená ndábioye cmojtšamna jtsebiauatjana: šmochtsebiauatja chë nda vida jtsabuajuánama y chentšana infiernoye jtsichámuama obenana endbomnábioye; chábioye cocayé šmochtsebiauatja ca.

⁶ “¿Shachna jaja shloftšetëmënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbiana sempre jesenójuabnayana. ⁷ Y tšëngaftangbiana Bëngbe Bëtsá lempe endétatšëmbo, y bueta stjënëjënga tšëngaftangbe bestšasiñe yomnámna. As ndoñe matauatjëngana; tšëngaftanga ba jaja shloftšëngbiana corente más šmonduámna ca” —Jesús tojánayana.

*Ndabiana Jesucristo yochjayana chabe entšá yomna ca
(Mt 10.32-33; 12.32; 10.19-20)*

⁸ “Atšë cbëyana, nda atšbe entšá yomna ca entšangbe delante tojanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca; ⁹ pero nda entšangbe delante, atšbe entšá ndoñe yondmëna ca tojanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

¹⁰ “Bëngbe Bëtsá bochanjaperdóna, nda chë Bëngbe Bëtsá Entśá tbojanbemabiana ndoñe tśabá tontsichamuábioye, pero chë Uámana Espíritbiana ndoñe tśabá tontsichamuábioyna ndoñe.

¹¹ “Tšëngaftanga chë judiëngbe enefjuana yebnëngoye, ntšamo entśanga bëtsamama ichámëngbioye y mandadëngbioye chacmojunatse ora, ndoñe šmattsenócochinýena ntšamo o ndáyeca šmochjenëuyanama, o ndayá šmochjayanama; ¹² er chë Uámana Espíritu cmochanjabuayená ntšamo jayanama tojtsemncá, jóyebuambayama chacmojtšamna ora ca” —Jesús tojánayana.

Entśabiana resjo yomna, nýe yapa bomnana jesejuabayana

¹³ Chentśana, canýa entśanguentśá Jesúsbioye tbojaniana: — Buatëmbayá, atšbe catšata momandá chë átšbioye otocana soyënga chašuatoyé ca.

¹⁴ Y Jesús tbojaniana: —Bacó, ¿nda atše šojábema tsëndatbe ujatanayá ca?

¹⁵ Y entśángbioye tojanéyana: —Smochjinýe y cuedado šmochtsebomna chë nýe yapa soyënga jtsebomnama bošama; er masque bëtsćá soyënga chašmotsóbomñe, chca ndoñe quešmochátstatšëmbo aiñe tśabe vida taišmochjónýenama ca.

¹⁶ Y chora mëntśá tojanacuntá: “Inamna canýe bomna entśá, y chabe fshantsënguiñe tša jaja saná yojtsopodena. ¹⁷ Chë bomná chora mëntśá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsobocjayama ca.’ ¹⁸ Y mëntśá yojeniana: ‘Chë grano uaquëcñaye yebnënga chantsendbiana, y inýe más bëts yebnënga chanjëtšjebo, y chiñe nýetsca atšbe jaja saná chantsóbocjaye y nýetsca atšbe soyëgnaca. ¹⁹ Y chora atše chjeniana: Bacó, bëtsćá soyënga contsebojana, ba uatama cmochanjuášhache. Morna, cochjóchna, cochjase, cochjatëmo, cochjóboyejuaye ca.’ ²⁰ Pero Bëngbe Bëtsá chábioye ibojauyana: ‘Obëjema, cach quem ibeta cochanjóbana; y asna, chë contsebojana soye, ¿ndabiana yochtsemna ca?’ ”

²¹ Y Jesús chora tojánayana: “Chca endbopása chë nýe chabiana bomnana tojtsejuabá y bëtsćá Bëngbe Bëtsabe soyënga ndoñe tonjëftsashjáftaca ca.”

Bëngbe Bëtsá chabe básenga jtsanýenana

(Mt 6.25-34)

²² Chentśana, Jesús chabe uatsjëndayënga tojanéyana: “Quem soye cbéyana: Ndoñe šmattsenócochinýena ndayá šmochjase o šmochjofšiyeye vida jtsebomnama, ni ndaye entśayá šmochjuichëtjuama cach ndoñe.

²³ Ndegombre, vida chë sanama más enduámana y cuerpo chë entśayama más. ²⁴ Chë ftsenga shloftšënga šmochjanýe: tondaye ntjájena, ni jaja saná ntjátbanana, ni grano uaquëcñaye yebnënga ntsebomnana; pero Bëngbe Bëtsá chënga saná jtsatšatnayana. ¡Y tšëngaftanga chë ftsenga shloftšëngbiana puerte más šmonduámana!

²⁵ Masque chca endmëna, masque canýa tša tojesenócochinýena, ¿ntšamo nanjobenaye jamana, chë ntsachetśá vida yochtsebomnentśana canýe hora vida más jabotiyana? ²⁶ Chcasna, nýe chë base soye jamama ndoñe šmontsobenëse, ¿ndayama chë inýe soyëngama šmochjatenócochinýena?

²⁷ “Smochjuinýe chë lirio uantšëfjushangá jtsajuajnana: ndoñe ntsetrabájayana, ni ntšeshabiamnayana. Pero atše cbéyana,

ndegombre ni mo rey Salomón, nyetsca chabe bomnánaca, chë lirio uantsefjushangacá nyetsá botamana quenjatspormana. ²⁸ Bëngbe Bëtsá tša botamana shácuaa tojuama, y chë shácuaa mënté jajoca jtsamnana y yéfsana iñoca. Cha chë shácuanaca chca tojamése, ndegombre tsëngaftangbiámnaca Bëngbe Bëtsá echanjama entsáyá chašmotsábomnana, jentsanga Bëngbe Bëtsábeñe nye batsá ošbuáchiyënga! ²⁹ Chíyeca, ndoñe šmattsenócochinýena ndayá jasama o jofsiyama onguayiñe; ³⁰ er chë soyëngama quem luarentša entsanga mondbétsenocochinýena, pero tsëngaftanga ndoñe. Tsëngaftangna canýe Taitá šmondpomna, y cha endëtatšëmbo ndayá cmëjabótama. ³¹ Más tsabana, tsëngaftanga šmochtseboše Bëngbe Bëtsá tsëngaftangbe ainaniñe chaotsemándama, y chë cmojtsëjaboto soyënga nye šmochanjójyëngacñe ca” —Jesús tojánayana.

Chë celoca bomnana
(Mt 6.19-21)

³² “Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tsábá tbonjuñýnana chabe amëndayana tsëngaftanga jatsatayama. ³³ Lempe ntšamo šmobomncá šmochtsatobuiye y chë ujabotëngbioye šmochtsatsataye. Mo ndotanguánaye shecnajiñe crocëna cuafjacacá, celoca tsabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; ³⁴ er chë ndayentše tsëngaftangbe bomnana tojtsementša soyëngama, ainánaca tsëngaftanga šmochántsejuabnaye ca” —Jesús tojánayana.

Bëngbe Utabná yochjésabama jtseprontánana

³⁵ “Mo chë oservëngënga, chë entsáyá uichëtjonënga y uajuinýananëshangaca chëngbe nduiño yochtashjanguama cuafstobatmancá, tsëngaftanga šmochtseprontana Bëngbe Utabná yochjésabama. ³⁶ Chca, tsëngaftanga šmochántsemna mo chë oservëngënga, tsabe entsáyaca bopormánënga y uajuinýananëshangaca chëngbe amëndayá casamentocana yochtashjanguama cuafstobatmancá; y chca, chë nduiño tojabochembo ora, cachora chë oservëngënga jtebiatëfjuama. ³⁷ Puerte oyejuayënga chë oservëngënga, chë nduiño tojtashjango ora tmojtsefšnënga. Ndegombre cbëyana, chora chë mandayá sëndorëche echantásnaye, mesëshentše chë oservëngënga echanjátbiana, y saná echanjuuatšiyë. ³⁸ Puerte oyejuayënga chënga, chë tmojtsefšnënga cha tojtashjango ora, masque tsëntseto ora o bínýanoye. ³⁹ Quem soye tsábá chacmësertá: chë yebnentša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama. ⁴⁰ Tsëngaftangnaca šmochtseprontana, er chë Bëngbe Bëtsá Entšá tbojanbemá echanjésabo, entsanga chama tondaye tmontsejuabná ora ca” —Jesús tojánayana.

Chë tsabe oservená y chë bacna oservená
(Mt 24.45-51)

⁴¹ Pedro, Jesúsbioye tbojanianana: —Utabná, ¿chë tconjayana cuento nye bëngbiana o nyëtsangbiana yochtsemna ca?

⁴² Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nyets juábnaca amá? Cha jtsemnana nda

chë nduiño bochjëftsebošhona chë yebnentšënga chaotsanÿenama, y jasama tojtsemna ora chaújuatšëma. ⁴³ Puerte oyejuayá chë oservená, chë nduiño tojtashjango ora, cha tbojínÿena jtsamëse ntšamo tbojtsemná. ⁴⁴ Ndegombre cbëyana, chë nduiño chábioye bochanjaimpáda nÿetsca chabe soyënga chabotsinÿëñama. ⁴⁵ Pero chë oservená, chabe nduiño betscó ndoñe yochantabo ca tojtsejuabná, y tojontsé chë inÿe oservénënga, boyabásenga y shembásenga jtsajantšetayana, becá jtsesana, jofšiyana y jtsótmenana, ⁴⁶ cha ndoñe tontsejuabná te y tontsetátšëmbo ora, chabe nduiño echántashjango y puerte jabuache bochantsecastíga, y echanjama cha jasúfriama chabotsemnama, mo chë Bëngbe Bëtsábeñe ndošbuáchiyënga mochanjasufriacá.

⁴⁷ “Chë oservená, nda tojtsetátšëmbo ndayá chë nduiño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. ⁴⁸ Y chë oservená, ntsetatšëmbcá ntšámna tojabuachjuangú, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëtš trabajo tmojabonÿébioyna jauyanana, más bëtš trabajo chaoma ca.”

Jesusbe causa, entšángbeñe más jtsentsjanayana

(Mt 10.34-36)

⁴⁹ “Atšë sënjabo quem luariñe jabojuinÿiyama, y itša sëntseboše malaye ya ctsangbototjuana! ⁵⁰ Atšë šontsemna puerte jasúfriana, y ipuerte ngménaca sëntsobátmana chca chaotsemnama! ⁵¹ ¿Tšëngaftanga šmojtsejuabná atšë tijabo quem luarentšë entšanga natjëmbana chamotsiyenama? Ndegombre ndoñe chca queochátšmëna; atšë sënjabo causa, entšanga más mochántsejtsjanaye. ⁵² Er mëntescana, canÿe yebnentšë, shachnënga ndoñe quemochátënëyeunana, únganga útatbe contra y útata úngangbe contra mochántsemna. ⁵³ Taitá uaquiñabe contra echántsemna, y uaquiñá taitabe contra; bebmá, bebëbe contra, y bembe bebmabe contra; uambén mamá, bebinuabe contra, y bebinuá uambén mamabe contra ca” —cha tojánayana.

Ndaye tempo yochtsemnama ntšamo inétsotatšëmbo

(Mt 16.1-4; Mc 8.11-13)

⁵⁴ Mëntšánaca Jesús entšanga tojanëyana: “Tšëngaftanga, chë jantšetëšhënga shinÿe uenatjëmbambanoicana tojóbocnama šmojinÿe ora šmondbëtsichamo ‘echanjuatšë ca’, y ndegombre chca jopásana. ⁵⁵ Y tsmánoicana tojtsebinÿia orna, tšëngaftanga šmondbëtsichamo ‘echanjojënÿana ca’, y ndegombre chca jopásana. ⁵⁶ ¡Bacna entšanga, chë ntšamo ndegombre šmojuabnacá ndinÿinÿayënga! Ntšamo quem luarentšë yochtsemnama, ndayá celoca šmojinÿama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëtš soye quem tempo Bëngbe Bëtsá cmojtsinÿanÿyana ca?” —Jesús tojánayana.

Chë uayayáftaca natjëmbana jtenbemana

(Mt 5.25-26)

⁵⁷ “¿Ndáyeca cach tšëngaftanga ndoñe šmondbáyana ndayá tšabá bëtsemnana? ⁵⁸ Nderado nda tcmojtsedemandá y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbioye cmochanjúshjango, chë

mandadna josticiëngbe cucuatšine cmochanjáboshjona, y chënga cárceloje cmochanjutame. ⁵⁹ Ndegombre cbëyana, chentšana ndoñe quecochtëtsbocna, nyëts ndebënana candesopagantscuana ca” —Jesús tojanayana.

13

Bëngbe Bëtsabe benache jtishachana

¹ Cach ora, báseftanga tmojana Jesús jinýama, y tmojancuentá ndayá chë mandado Pilato tojanmama; chana básefta Galileoca boyabásenga tojt-sanëbaya, y chëngbe buiñe yojenajuabó chë Bëngbe Bëtsábioje jëtschuayama tmojanóba bayëngbe buñeca.

² Y Jesús chënga tojanëyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inýe boyabásengbiana chënga más bacna soye amënga imojamna causa ca? ³ Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. ⁴ O, ¿tšëngaftanga šmnëtsejuabnaye, chë Jerusalemntša bnëtsana posufta entšanga tmojanóbanënga, chë Jerusalemoca binche uafjónaye Siloé béconana tsbanana jebna soye tojtsanáshajaye ora, chënga imojamna chë inýenga Jerusalemntše oyenëngbiana más bacna soyënga amënga ca? ⁵ Ndegombre cbëyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanëyana.

Chë ndëshajona higo betiyama cuento

⁶ Jesús mëntšá tojanacuentá jabuátambama: “Canýe entšá jajoca canýe higo betiye inabomna, y yojá nderado nantseshájonama, pero tondaye yonjínýena. ⁷ Chcasna, chë jajañe bojanýábioje cha ibojauyana: ‘Mouena, ya unga uata tsabó quem higo betiyoye jaborrepárama, nderado nantseshájonama, pero ndocna te tondaye chiyátinýena; chíyeca, motsetëtse. ¿Ndayama quem jajañe yochjátsjena ca?’ ⁸ Pero chë jajañe inýená ibojauyana: ‘Bacó, inýe uata cachcá monýá, fshantse chanjáboplojua y uanguanëshe chanjabortboto. ⁹ Nderado chca jamëse, nanjashájona; y ndoñesna, chora cocayé cuantsetëtse ca.’ ”

Jesús canýe ochnayté, canýe tsëstjona shembásabioje tbojanshná

¹⁰ Canýe, canýe ochnayté Jesús yojontšë entšanga jabuátambana, chë judiëngbe enefjuana yebnentše, ¹¹ y chentše yojtsemna canýe shembása; cha ya bnëtsana posufta uata yojtsešoca. Canýe bacna bayëja chábeñe tojánamashëngo y chca tsestjoná tbojtsanbema, y tondayama yontsobena jtondirichana. ¹² Jesús chábioje tbojáninýe ora, tbojanchembo y mëntšá tbojaniana: “Batá, mora ya ndoñe šocá quecátsmëna ca.”

¹³ Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontšë Bëngbe Bëtsábioje jëtschuayama. ¹⁴ Pero chë enefjuana yebnentša mándayana tbojánëtna, Jesús chë shembása ochnayté tbojanshnama, y entšanga tojanëyana: — Chnënguana te comna jatrabájama; chora šmochjabo jenóshnama; ochnaytesa ndoñe ca.

¹⁵ Y Bëngbe Utabná tbojanjá: —¡Bacna entšanga, ntšamo ndegombre šmojuabnacá ndinýinýayënga! ¿Tšëngaftanguentšá ndocná chë ochnayté

chabe uacná o chabe burrotema buanjuajafjoná, juanatsama béjaye chaofšema? ¹⁶ Chcasna, quem shembása, canya Abrahábentšana entsá, y Satanase causa bnétsana posufta uata šocá yojtsemna, ¿ndoñe tšabá yondmëna canye ochnayté chë bayëja jtsebojuánana ca?

¹⁷ Jesús chca tojánayana ora, chabe uayayënga imojtsëuatja, y nyetsca entsanga imojtsóyejuaye Jesús tša bëts soyënga yojtsamama.

Chë mostaztiye jenayama cuento

(Mt 13.31-32; Mc 4.30-32)

¹⁸ Jesús mëntsánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca? ¹⁹ Endmëna mo canye mostaza jénaye, canye entsá jajañe tojajecá; chiyna jójuana y canye bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguiñe uajajonëtemëngá jauábopormana ca.”

Chë levadurama cuento

(Mt 13.33)

²⁰ Mëntsánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca? ²¹ Endmëna mo levadurcá; canye shembása chana jenájuabana unga medida arninýañe, nyetsana chauabochama ca.”

Chë base utëntsá bësása

(Mt 7.13-14, 21-23)

²² Jerusalenoye benache, Jesús entsanga yojtsabuátambaye bëts pueblënguiñe y base pueblotëmënguiñe. ²³ Canya chábioye tbojantjá: —Bëngbe Utabná, ¿nyë báseftanga imomna chë atsebácanënga mochtsemnënga ca?

Y Jesús tbojanjuá: ²⁴ —Puerte šmochtsentsëna chë base utëntsá bësásajana jamashjnama; er ndegombre cbéyana, banga mochántseboše chëjana jamashjnama, pero ndoñe quemochatobenaye. ²⁵ Chë yebnentša nduiño chaojotsbaná y chë bësása chaojttátamentsana, tšëngaftanga chë shjoca chašmojtsemnënga, šmochántsechembuana, mëntsá jtsichámëse: “Utabná, šmëbëtafjo ca.” Pero cha cmochanjáuyana, “Atše ndoñe quetsátstatšëmbo ndëmoquënga tšëngaftanga šmomnama ca.” ²⁶ Chora tšëngaftanga šmochanjontsé ichámuana: “Acaftaca cánýiñe fsënjase y fsënjofsé, y aca bëngbe tsáshenañe tconjabuatambá ca.” ²⁷ Pero cha cmochanjójuaye: “Ya tconjáuyana, ndëmoquënga šmomnama ndoñe tstátšëmbo ca. ¡Atšbentšana mojuánanga, bacna soyënga amënga ca!

²⁸ “Chora chentše puerte šmochanjenóbošachna y tsetšanama juatsašënga šmochantsenofhtëšjojnaye, Abraham, Isaac, Jacob y nyetscanga Bëngbe Bëtsabe juabna oyebuamnyënga Bëngbe Bëtsabe amëndayoca imojtsemnana chašmojinýe ora, y tšëngaftanga chentšana cmochtëbuacanama. ²⁹ Y shinýe bocanoicana y uenatjëmbambanoicana, tsmanoicana y tsjuanoicana entsanga mochanjabo y juasama mochanjotbiana Bëngbe Bëtsabe amëndayentše. ³⁰ Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

Jesús tbojanongmé Jerusalenentsa entsangbiana

(Mt 23.37-39)

³¹ Jesús chë soyënga tojanëyana ora, básefta fariseunga tmojánashjajna y tmojaniyana: —Muentšana motsatoñe; Herodes entseboşe aca jtsóbama ca.

³² Y Jesús tojanëjua: —Motsajna y şmochjauyana chë corente studio bomná, mo tjañe mesetca: “Minÿe, mënté y yëfse entsángbentsana bacna bayëjënga sëndëtëbuacana y şoquënga sëndáshnaye, y baseftaytesna chanjapochóca ca.” ³³ Pero atşe şontsemna mënté y yëfse jtsayana, y baseftaytesna Jerusalemoye jana, er ndoñe tşabá ntsemnana canÿa Bëngbe Bëtsabe juabna oyebuambnayá Jerusalemëntşa chábuañe chaóbana ca.

³⁴ “Jerusalemëntşa entsanga, Jerusalemëntşa entsanga, tşëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbiyoye ndëtsbéngaca jtsatëchënganjana jtsëbáyama! ¡Bueta soye atşe sënjábóşena tşëngaftanga átşbiyoye júbuajama, mo canÿe tuamba chabe bolletotëmënga juatëngmiáša tajsoye cuaftajayecá, pero tşëngaftanga ndoñe cheşmátsboşena! ³⁵ Y şmochjinÿe, mora atşe cachcá cbochanjesënÿaye, y chca, atşna enánanga cbochanjésabashejuana, mo canÿe yebna cachcá tcojesonÿá y éañe tcojeseboshjoncá. Y ndegombre, tşëngaftanga morscana ndoñe más atşe queşmochátinÿe; y atşe şmochántinÿe, chë: ‘¡Corente bendición bomná, Bëngbe Utabnabe obenánaca tojabá ca!’ chaşmojtsichamo ora ca” —Jesús tojánayana.

14

Jesús, canÿe uafshachanánaca şocábioye tbojanshná

¹ Canÿe ochnayté, Jesús tojána jasama fariseungbe canÿe amëndayabe yebnoye; y chë fariseunga yejuana imojtserreparana, er ndayá Jesús nanjama. ² Chéntşnaca, chabe delante yojtsemna canÿe entsá uafshachanánaca şocá. ³ As Jesús chë ley abuatambayënga y fariseunga tojanatjá: “¿Quenlesenciana canÿe ochnayté canÿe şocá jaşhnama o ndoñe ca?”

⁴ Chëngna ndocá tmonjanjuá. As Jesús chë şocábioye tbojánishache, tbojanshná y tbojaniyana chaotsatoñe ca. ⁵ Y chë fariseunga tojanëyana: “¿Nda tşëngaftanguentşá, nderado chabe uaquiñá o uacná canÿe tboye tojtsótsatşe, cachora ndoñe nanjá jetsejátsëcama, masque ochnayté totsomñëşe ca?”

⁶ Y chëngna ndocá tmonjanobená cha jojuana.

Chë casamentoye ófjanënga

⁷ Jesús tojáninÿe ntşamo chë ófjanënga quëfseroye imojtsachnëjuana jotbiamama; as mëntşá chëngna tojanabuayená: ⁸ “Canÿe casamentama nda chacmojojfa ora, quëfseroca ndoñe catjót'bema, er nderado inÿe ofjaná acbiamá más uamaná ústonoye nandaboye; ⁹ y nderado chë tsëndatbe ofjajaná nanjabo y cmatjauyana: ‘Mua chentşe chaótbema, maluaré ca’, y chora cmatjotóca ouatjentşe chafjoca jana jatótbemana. ¹⁰ Chamna, nda chacmojojfa ora, chafjoca cochjót'bema, chca, chë ofjajaná chaojabo ora chacmëyana: ‘Taita, quëfseroye motsëchnëngoñe ca’. Y chca, aca chë chentşe tmojtsetbiámanëngbiama uamaná cochántsemna. ¹¹ Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aïñe bëtsá mochanjábema ca.”

¹² Y chë tbojanofja entsábioynaca Jesús mëntşá tbojaniyana: “Fiesta chacojama o sananga chacojtsebomna ora, ndoñe cattşëbuájajana acbe amiguënga, catsátanga, ni pamállanga, ni acbe juachañe

oyenēnga bomnēnga; er chēngnaca, fiesta chamojtsebmorna, aca cmochantētofja, y chca ya acbe uacanana soye cochántsebmorna. ¹³ Chamna, canye fiesta chacojama ora, cochjúbuaja ndbomnjémēnga, jama ndobenēnga, coshetēnga y jtanēnga, ¹⁴ y aca corente oyejuayá cochántsemna; er chēnga ndoñe quemochatobenaye cachá aca jtētofjana, pero acna acbe uacanana soye cochántsebmorna, chē Bēngbe Bētsabe bominjīñe tsábēnga imomnēnga chamojtayena ora ca” —cha tbojaniana.

Chē bēts sanama cuento
(Mt 22.1-10)

¹⁵ Chca tojanuena ora, canya chē mesēshentse tbemaná tojánayana: —¡Puerte oyejuayá echántsemna Bēngbe Bētsabe amēndayoca juasama chaojtsebná ca!

¹⁶ Chora Jesús tbojaniana: —Canye bacó canye bēts saná yojaprónata y ba entšanga yojúbuaja. ¹⁷ Juasama ya yojobuache ora, canye oservená ibojíchmua chē ófjanēnga jáuyanama chamotsajna, ya lempe yojtseprontana ca. ¹⁸ Pero chorna nyētscanga imojontsé jtsoyátšēmbuana. Canya yojayana: “Cabá mora canye fshantse sēnjobuámiñe, y šontsemna jana jarrepárama. Chcasna, aslēpaye šmotsepacenciá ca.” ¹⁹ Inya yojayana: “Bnētsana toronga sēnjobuámiñe, y šontsemna jana jányama, jaárama taimochjosérvia. Chcasna, aslēpaye šmotsepacenciá ca.” ²⁰ Y inya yojayana: “Cabá mora sēntsobouamá, y chē causa, ndoñe quichatobenaye jama ca.” ²¹ Chora chē oservená yojesshécona y lempe chabe nduíñbiye ibojauenaye. Chē nduíño tša ibojtsetna, y chē oservenábiye ibojauyana: “Cam ora motsa tsashenangoye y benachēngoye, y moye cochjunatse ndbomnjémēnga, jama ndobenēnga, jtanēnga y coshetēnga ca.” ²² Chentša bēnēntscose, chē oservená chē nduíñbiye ibojauyana: “Bacó, ya sēnjama ntšamo šconjamandacá, y cabá ín्यēngbiama luare entsemna ca.” ²³ As chē nduíño ibojauyana: “Motsa benachēngoye y betiyetemēngaca jetjaniñēngoye, y entšanga cochjautáriaye moye chamuábama, atšbe yebna chaojtjama; ²⁴ er ndegombre cbēyana, chē natsana sēnjobuajēnguentšá ndocná atšbe saná queochatsse ca.”

Ntšamo yomna Cristbe ustoná jtsemnama
(Mt 10.37-38)

²⁵ Mallajta entšanga Jesús imojtséstona; as cha tojanobuértana y tojanéyana: ²⁶ “Nderado nda átšbiye tojabo, y ntšamo chabe taitá, chabe mamá, chabe shema, chabe básēnga, chabe catšátanga y uabēnanga tu-ababuányēshanama, y ntšamo cachá tuenobobonshánama, atše ndoñe más corente šontsebobonshánēse, cha ndoñe ntšobenana atšbe uatsjendayá jtsemnana. ²⁷ Y nda, atšbiama ndoñe tontseprontana jasúfriama y cruciñe jobanámnaca, y nyētsca chabe quem luare soyēnga ndoñe tonjéshoshjona atše juastama, cha ndoñe ntšobenana atšbe uatsjendayá jtsemnama.

²⁸ “Nderado nda tšēngaftanguentšá tojtsejuabná canye tsbanana jebna soye japórmama, ¿cha natsana ndoñe nanjót'bema jinýama ntsachetšá crocénana chentše yochjuába, y japochócama nyētšá crocénana tayojtsebmornama? ²⁹ Chca ndóñese, nderado chē uajatsana ucuatjoniñe tojapormá y lempe jajebuama ndoñe tonjobenase, nyētscanga chca tmojinýēnga, muantsáfchaye y mēntšá muantsichamo: ³⁰ ‘Quemējema jajebuama tonjontsé, y japochócama ndoñe chenatobená ca.’

31 “O ¿ndaye rey inye réyefatacá jéntsama tbojotocase, natsana ndoñe nanjót'bema jajuaboyama, nderado nanjobenaye bnétsana uaranga soldadéngaftaca chë ín'yabioye jayénjanana, chë inya uta bnétsana uaranga soldadéngaftaca tojtsabose? 32 Y ndóñesna, chë inye rey cabá bēnoca tojtsamna ora, bāsefta entšanga echanjichamuá, cha jauyanama más tšabá yomna ndoñe jatentsjanayana ca.

33 “Chcasna, ndánaca tšéngaftanguentšá, lempe ntšamo tobomncá ndoñe cachcá tonjesonjá, cha ndoñe ntšobenana atšbe uatsjendayá jtsemnana ca” —Jesús tojánayana.

Chë tamó fténana tojtsebozna ora
(Mt 5.13; Mc 9.50)

34 “Tamó tšabe soye endmēna; pero chë tamó fténana tojtsóbemēse, tšéngaftanga ndoñe quešmátobena jamana tempcá sanana cachiñe chaotsatsmēnana, ni saná jatamuama. Chë ftēna tamó tondayama ntšoservénana, cachcá, chë atšbe uatsjéndayēnga jtsemnana tmojtsebošēnga, pero lempe jéšeboshjonama ndoñe tmontseboše, cach ndoñe chama ntšoservénana. 35 Chë ftēna tamó ndoñe ntšoservénana ni fshantsama, ni uanguanēshama. Nye jtsētšenana. Chë jouenama tmojtsobenēnga, šmochjouena ca” —Jesús tojánayana.

15

Chë ótsēna oveshabiana cuento
(Mt 18.10-14)

1 Njētsca chë Romocama impuesto entšángbioye atjanayēnga y inye bacna soyēnga amēnga, Jesúsbioye imojánajna chabe palabra jouenama; 2 y chë fariseunga y ley abuátambayēnga chama Jesusbiana podēsa imojtsoyebuambná, mēntšá: —Mua bacna soyēnga amēngaftaca entsenuta y chēngaftaca entsesá ca.

3 As Jesús mēntšá tojanacuntá, chēnga jabuátambama: 4 — ¿Nda tšéngaftanguentšá, canye patse oveshēnga tojtsabamna, y canya tbojtsobuētšēse, chë inye esconēfta bnétsana y esconēfta oveshēnga shēntsjañe ndoñe cachcá nanjesēnyaye, y nanjá chë otšená jetsenguanguama candētsónyēñēntscuana? 5 Y tbojtsinýena ora, oyejuayá chë oveshá jesotantšájuaana; 6 y yebnoye tojtashjango orna, chabe amiguēnga y juachañe oyenēnga jáchembuana y mēntšá jáuyanana: “Atšeftaca móyejuanga, er chë sēntsanobuetše oveshá sēntsinýena ca.” 7 Atše cbēyana, cachcá, celócnaca más oyejuayana jtsebinýnana, canye bacna soyēnga amá tšabe benache tojtishachabiana, y ndoñe nya yapa, esconēfta bnétsana y esconēfta tšabe soyēnga amēngbiana, chë ndoñe yondujaboto bacna soyēnga amana jtsajbanana ca.

Chë crocénana tojtsónýena shembásabiana cuento

8 “O mēntšá, ¿ndēmua shembása, bnétsana uamana crocénana tojtsebozna y cánýana tojtsobuētšēse, chora ndoñe canye uajuinýanēsha nanjuajuinýená, y cuedádoca chë yebna nantsetsjajo y botamana chë crocénana nantsenguango candētsónyēñēntscuana? 9 Y tojtsinýena ora, chabe amiguēnga y juachañe oyena shembásenga jáchembuana, y mēntšá jáuyanana: ‘Atšeftaca móyejuanga, er chë sēntsanobuetše crocénana

sěntsinyena ca.’ 10 Atše cbéyana, cachcá, chě Běngbe Bětsabe angelotémengbeñe oyejuayana jtsebínynana, nýe canýe bacna soyěnga amá chě tšabe benache tojtishachabiamá ca” —Jesús tojánayana.

Chě uaquiñá bacna benachiñe ayá

11 Jesús mēntśánaca tojanacuntá: “Canýe entśá uta uaquiñata yojánabamna; 12 y canýe, chě ngomēnche uaquiñá chabe taitábioye ibojauyana: ‘Taita, atšbe otocana soyěnga šmatatšetá ca.’ As chě befta lempe chě uta uaquiñata yojtējátaye.

13 “Chentśana baseftaytesna, chě más bobontse uaquiñá lempe ntśamo ibojobuachcá yojtsatobuiye y chě crocenánaca bēn luaroye yojtsoñe, y choca, cha nýe ntśamo ibojocochěngcá, mocá yojenobuiye, y chca, lempe yojtsepochóca. 14 Lempe crocénana yojtsoshañe orna, bēts shěntsana chě luarentše yojóshjango, y chě causa cha ibojotóca shěntseca jtsejétanana. 15 As, cha yojá trabajo jonguangoñama y yojínýena chě luarentša canýe entśábentše; chana, chabe jajoye ibojíchmuá cotśěnga jtsanyenama. 16 Chě bobontsna yojtseboše chě cotśbe saná jtsešana, pero ndocná tondaye ibonjanájuatśnaye.

17 “Cabana, botamana yojinýe ntśamo yojtsepasacá, y mēntśá yojenójuaboye: ‘¡Bueta trabájayěnga atšbe taitabe yebnentše bētscá saná mondětsóbomñe, y atše muentše shěntsama chanjóbana ca! 18 Chantá atšbe taitabe yebnoye y mēntśá cha chanjauyana: Taita, šmotseperdoná. Atše tijama ndayá Běngbe Bětsá ndoñe yondboścá, y ntśamo aca ndoñe condboścá. 19 Mora ya mercedo taitsatobuajoñe acbe uaquiñá jtsabáinama; nýe canýe acbe trabajayacá Diosmanda šmatofja ca.’ 20 Chca jěftsenójuaboyěse, yojontśě cachabe yebnoye jtana.

“Cabá bēnoca yojtsemna ora, chabe taitá chábioye ibojinýe, y chabe uaquiñabiamá ibojóngmia, y jajébenguama betscó yojá; ibojajebengo, ibojtotsejcuá y tša yojtsoyejuayama chě uaquiñábioye ibojtámochó. 21 Chora chě uaquiñá ibojauyana: ‘Taita, šmotseperdoná. Atše tijama ndayá Běngbe Bětsá ndoñe yondboścá, y ntśamo aca ndoñe condboścá; mora ya mercedo taitsatobuajoñe acbe uaquiñá jtsabáinama ca.’ 22 Pero chě Taitana chabe oservéněnga yojámēndaye: ‘Betsco chě más tšabe entśayá mauaca y matspormanga, montšabuechětjo y matsshēcōchětjo. 23 Mora chě más minýica uacná šmochjuánatse y šmochjášhbuá. ¡Mochjase y mochjóboyejuaye ca! 24 Quem atšbe uaquiñá mo obanacá endánmēna y mora běnga montsetátśēmbo cha ainá yotsomñama. Quem atšbe uaquiñá mo otšenacá endánmēna y mora tmontsinýena ca.’ Y chentśana imojontśě joboyejuayama.

25 “Chě yebnoca fiesta yojtsemnēntscuana, chě mayor uaquiñana jajoca inétsomñe. Yebnoye yojtsataye y ya béconana yojtsemna orna, cha yojouena imojtsabuastoye y imojtselántsaye. 26 As chora cha canýe oservénábioye ibojachembo y mēntśá ibojatjaye: ‘¿Ndayá běngbe yebnentše yojtsoapasana ca?’

27 “As chě oservená ibojojúá: ‘Acbe uabentsá tontashjango y chama acbe taitá šonjarié chě más minýica uacná jáshbuama, cha tšabá tojtashjanguama ca.’ 28 Pero chě uabóchena catśatna corente ibojtsetna y ndoñe yontseboše tsoye jtamashěnguana. As cach befta yojábocna chě catśátbioye jaimpádama chauatamashěnguama. 29 Chora cha chě

taitábioye ibojauyana: ‘Taita, aca condétatsëmbo bueta uata cbetsajabuáchanama, nÿets tempo cbetseyeunanama, pero ndocna te ni mo canÿe chivotema chešcaisatšá atšbe amiguëngaftaca joboyeuayama. ³⁰ Y masna, acbe uaquiñá chë bacna vida bomna shembásengaftaca acbe crocénana pochocayá tojtashjango ora, chë más minÿica uacná chabiamatcojášhua ca’ —chë uaquiñá ibojauyana.

³¹ “Chora chë befta ibojojuá: ‘Atšbe uaquiñá, aca sempre átšeftaca condétsemna y lempe ntšamo atšbe tsbomncá acbiámnaca endmëna. ³² Pero mora tšabá entsemna joboyeuayama y joyeuayëngama; er acbe uabentsá mo obanacá endánmëna, y mora bënga montsetátšëmbo cha iná yotsomñama; mo otšenacá endánmëna, y mora tmontsinÿena ca.’ ”

16

Chë nduiñbe ndoñe tsabe uajabuachaná biamá cuento

¹ Jesús mëntšánaca chabe uatsjëndayënga tojanacuntá: “Inamna canÿe bomna entsá, y cha ibnabomna canÿe uajabuachaná chabe soyënga chaotsinÿenama; y chë nduiño imojuenaye chë uajabuachaná chabe soyëngaca ndoñe tšabá yontsamama. ² Asna, chë nduiño ibojachembo y mëntšá ibojauyana: ‘¿Ntšamo acbiamá šmontsatsëtsnacá ndegombre yojtsemna ca? Mora cuenta šmatatšá ntšamo atšbe soyëngaca tcojamama, er morscana ya ndoñe atšbe soyënga inÿená quecochátsmëna ca.’ ³ Chë uajabuachaná yojontsé jenójuaboyana, y mëntšá yojeniyana: ‘¿Y mora ntšamo chtsemana, chë nduiño atšbe trabajuentšana šojtabocna ora? Ndoñe añemo quetsátšbomna fshantse jatrabájama, y lemošna jótjañamna sëntsëuatja. ⁴ Ya sëntsetatšëmbo ndayá chjama, chca, atšbe trabajuentšana chašojtábocna ora, atšbe jtsabamnama ndëmuanÿenga chëngbe yebnentše chašmofjama ca.’

⁵ “Chentsana, canÿánÿa chë chabe nduiñbioye ndebënënga yojáchembo. Cánÿabioye ibojatjaye: ‘¿Ntsachetšá atšbe nduiño icondebena ca?’ ⁶ Y cha ibojojuá: ‘Canÿe patse barrilëšangá aceitiye ca.’ As cha ibojauyana: ‘Muentše acbe recibécha entsamna; mora mótbema y inÿácha nÿe shachna bnëtsana barrilëšangama matapormá ca.’ ⁷ Chentsana inÿabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canÿe patse medida trigo ca.’ As cha ibojauyana: ‘Muentše acbe recibécha entsamna; chiñe nÿe posufta bnëtsanama mábema ca.’ ⁸ Chentsana, chë nduiño tšabá yojayana chë ndoñe tšabá ama mayordombiamá, cha stúdioca yojamama. Chë nÿe quem luarama enójuabnaye entšanga, cachëngbe soyëngaca puerte studio bomnënga mondmëna; y chë entšangbe juabnënga binÿnáyábenga ndoñe nÿa yapa ca.

⁹ “Atšbe cbabuayená, quem luarentše, chë bacna soyënga amëngbe luarentša bomnánaca amiguënga šmochjábiamá, inÿenga jtsëjabuáchanëse. Chca, chë bomnana tojtso pochocá ora chašmotsabamna ndëmuanÿenga chë nÿetsca tescama oyenoye chacmúbuajama ca.

¹⁰ “Nda básefta soyënguiñe lempe tšabá tojama, bëtská soyënguiñnaca lempe tšabá echanjama; y nda básefta soyënguiñe ndoñe tšabá tonjama, bëtská soyënguiñnaca cach ndoñe tšabá queochatsma. ¹¹ Chcasna, quem luarentše, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanÿiye? ¹² Y chë ndoñe tšëngaftangbe sóyeca ndoñe tšabá

šmonjamëse, ¿nda cmochjantšabuáchiye ndayá tšëngaftangbiama yomncá ca?

¹³ “Ndocná ntsobenana uta mandayata jtsaservénana; er cánÿabioye bochantsáboyënja y chë ínÿabioyna bochántsebobonshana, o cánÿabiamna tšabá echántsetrabajaye, y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebonnama tcojtsebošëse ca” —Jesús tojánayana.

¹⁴ Chë fariseunga, becá crocénana jtsebonnama bošënga immamna, lempe chca chënga tmojanuena, y Jesúsbioye imojtsáboyejuana. ¹⁵ As Jesús tojanëyana: “Tšëngaftanga entsangbe delante mo tšábenga cuaftsemncá jtsenobiamnayana, pero Bëngbe Bëtsá endétatsëmbo ndayá tšëngaftangbe ainaniñe yomnama; er ndayá entsanga más tojtsebošcá, Bëngbe Bëtsá jtsáboyënjana ca.

Moisesbe ley y Bëngbe Bëtsabe amëndayana

¹⁶ “Moisesbe ley y chë Bëngbe Bëtsabe juabna oyebuambnayënga tšëngaftanga cmonjanabuayiyná, Juan chë Ubayaná quem luaroye tonjánabëntscuana. Cha tonjánabo orscana montsabuaiyyná chë tšabe noticiënga Bëngbe Bëtsabe amëndayocama, y nÿetscanga tša montseboše choye jamashënguama ca.

¹⁷ “Más paselo endmëna, celoca y quem luare chaopochocá, y ndoñe chë ntšamo leyiñe iuayancá, chë ndayá jopásama yomnama, ni mo canÿe punto ndoñe chca chaondëtsemnama ca” —Jesús tojánayana.

Ndayá Jesús tojanabuatambá chë bouamnënga tmojtsenëtšenama (Mt 19.1-12; Mc 10.1-12)

¹⁸ “Nda chabe shémbioye cachcá tbojesonÿá y ínÿaftaca tojtóbouamase, cha chë natsana shémbioye ínÿaftaca jtseíngñayana; y nda chë útšena shembásaftaca tojobouamá chana, canÿe uabuatmá jtsebonnana, y chca, chana canÿe bacna soye jtsamana ca” —Jesús tojánayana.

Chë bomná y chë ndbomnjëjema Lázaro

¹⁹ “Canÿe bomna entsá inamna; cha yojanamana uámana y botamana shbuenda uafjatsenga y lino entsayangá jtichëtjuana, y cada te bëts fištënga yojánama. ²⁰ Canÿe ndbomnjëjëmna inamna, Lázaro ca uabainá, bacna nguayanánaca šocá; y cha yojanamana chë bomnabe bësásëntse fshantsiñe jótbemana. ²¹ Quem ndbomnjëjema yojtseboše chë bomná yojtsesayentšana yojatquëcjana sanángaca jtoshachayana; y chë quešënga inmaboye chabe nguaye cuerpo jajáfjuama. ²² Canÿe te Lázaro yojtsóbana, y Bëngbe Bëtsabe angelënga Abrahámbioye cha imojtamba, chë nÿetscanga oyejuayënga mondmëna luaroye. Chë bomnánaca yojóbana y imojuátbontsa.

²³ “Chë bomná infiernoca puerte ngmëniñe yojtsesufrina ora, tsbanánoye yojontješiye y bënoca Abraham ibojinÿe, y Lázaro cháftaca yojtsemna. ²⁴ As chë bomná yojuyebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem íñeshoca tša sëntsesufrina ca.’ ²⁵ Pero Abraham ibojauyana: ‘Uaquiñá, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache ngmënanana contsebonna. ²⁶ Y inÿe soye, canÿe bëts tũañe entsemna tšëngaftangbiocana mëntscoñe; chca,

chë tšëngaftangbioye muentšana jenachnënguama tmojtsebošënga ndoñe chamondëtsobena, ni chocana bëngbioye cach ndoñe ca.’

²⁷ “Y chë bomná ibojauyana: ‘Masque chca, Taita Abraham, Dios-manda Lázaro michmó atšbe taitabe yebnoye; ²⁸ choca sëndábamna shachna catšátanga; as chaúyana ntšamo moca atše stsepasana y ntšamo jamëse chënga ndoñe chaondëtsamna quem ngménënga luaroye jabama ca.’ ²⁹ Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsanábema soyënga; ¡chëngbioye chamoyauná ca!’ ³⁰ Chë bomná ibojojuá: ‘Ndoñe, Taita Abraham; nderado obanënguentsana canya chëngbioye tojase, aïñe chë tšabe benache muantishache ca.’ ³¹ Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbioye ndoñe tmonjóyaunase, Bëngbe Bëtsabeñe ndoñe quemochatošbuáchiye, masque canye obaná chauatayenëse, chëngbioye jábuayenama ca’ ” —Jesús tojançantá.

17

Resjo yomna, nderado bacna soyënga cuanjama
(Mt 18.6-7, 21-22; Mc 9.42)

¹ Jesús chabe uatsjëndayënga tojanëyana: “Sempre echanjëftsemna juabnënga bacna soyënga jamama; pero, ¡tša lastema chë entšabiamana ndabe causa ínÿënga bacna soyënga tmojama! ² Más tšabá chabiamana nántsemna canye nantsnëbé chamotsetamošëntšbua y mar béjayoye chamotsashbuetše, y ndoñe chë canya Bëngbe Bëtsabeñe ošbuachiyá bacna soye chaomama juanatsana. ³ Cuedado šmochtsebomna.

“Ache catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna. ⁴ Masque nÿe canye te, canÿsëfta soye ntšámnaca tcmojaborlá, y canÿsëfta soye ‘chca ndoñe más quebochatsbórla ca’ tcmojauyanëse, aca cmontsemna cha jtseperdónana ca” —Jesús tojánayana.

Bëngbe Bëtsabeñe jtsošbuáchiyëse, corente obenana jtsebomnana

⁵ Chë uatsjëndayënga Bëngbe Utabnábioye tmojanianana: —Ošbuáchiyana šmababaté ca.

⁶ Y chë Utabná tojanëjua: —Tšëngaftanga ošbuáchiyana, batšatema masque nÿe mo mostaza jenaycá šmojtsebomnëse, quem sicomoro betiyoje šmatjauyana: “quemuentšana mojashtse y mar béjayoca mojë ca”, y quem betiye chca nanjama ca.

Chë oservená ndayá ibomna jamana

⁷ “Nderado canya tšëngaftanguentsá canye bochichnayá tbojtsebomna, cha jajocana tojtashjango jajañe arayocana o uacnënga anÿenocana, ¡chábioye bochjauyana: ‘Matabo y mabose ca?’ ⁸ Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jasérviamana atše candëse y candofšentscuana; y chentsana aca cochjase y cochjofšiyë ca.’ ⁹ Y chë bochichnayábioye ndoñe quebochtëtschuaye ndayá tbojuatarieca cha tojamama. ¹⁰ Tšëngaftángnaca cachcá, lempe ntšamo Bëngbe Bëtsá tcmojutarieca chašmojama ora, cmontsamna jayanana: ‘Nduámana oservénënga fsëndmëna; er nÿe ntšamo jamama šuamncá tifjama ca’ ” —Jesús tojánayana.

Jesús, bnëtsanënga bacna nguayanánaca šoquënga tojanashná

¹¹ Jerusalenoye benache, Jesús tojánachnëngo Samaria y Galilea luarëjana. ¹² Y canÿe pueblotémoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentsana bënoca chënga tmojanocuedá, ¹³ y mënťśá imojťśáye buache: —¡Jesús, Buatëmbayá, šmotsalastemá ca!

¹⁴ Jesús chënga tojánanÿe ora, tojanëyana: —Jerusalenoca bachnángbioye motsajna, y chënga šmochjínÿanÿiye tšëngaftanga mora ndëšoquënga šmojtsemnama ca.

Y tojanopasá, chë bnëtsanënga cabá imojëtsayëntscuana, ya shnánënga imojtoquédaye. ¹⁵ Canÿa chënguentsá, shnaná yojtsemnama tojáninÿe ora, yojesshécona Bëngbe Bëťśábioye jabuache atschuanaye; ¹⁶ y Jesusbe delante yojshëntsamentšiyë, jubiaca fshantsóntsoñe yojotsejbéna, y chábioye ibojťśatschuanaye; y chë boyabásana Samarioca entśá inamna.

¹⁷ Chora Jesús tbojaniyana: —Bnëtsanënga mondmëna chë shnánënga tmontoqobadanga. ¿Ndayentšë chë inÿe esconëftanga imojtsemna? ¹⁸ ¿Nÿe quem boyabása, inÿe luarocana ashjanganá, tojesshécona Bëngbe Bëťśá jëťschuayama? ¿Ndáyeca chë ínÿenga ndoñe ca?

¹⁹ Y chë entśábioye tbojaniyana: —Matëťśbaná y motsatoñe; Bëngbe Bëťśabeñe aca icošbuachéyeca shnaná contsatsmëna ca.

Nťśamo Bëngbe Bëťśabe amëndayana yochjóshjango

(Mt 24.23-28, 36-41)

²⁰ Canÿe, chë fariseunga Jesús tmojantjá, mocna ora chë Bëngbe Bëťśabe amëndayana yochjanóshjanguama; y cha tojanëjua: “Bëngbe Bëťśabe amëndayana chaojóshjango ora, tšëngaftanga ndoñe quešmochatobenaye chca jinÿana. ²¹ Chora ndoñe quemochátichamo ‘Muentšë entsemna’ o ‘Choca entsemna ca’; er Bëngbe Bëťśabe amëndayana ya tšëngaftangbeñe entsemna ca” —cha tojánayana.

²² Jesús chabe uatsjëndayënga tojanëyana: “Canÿe tempo echanjóshjango, y chora tšëngaftanga šmochántseboše canÿe te jtse-bomnana, nťśamo chë Bëngbe Bëťśá Entśá tbojanbemá tšëngaftangbeñe enjëťsemna orcá; pero chora ndoñe chca queochatóshjango. ²³ Chora báseftanga mochántšichamo: ‘Muentšë entsemna’ o ‘Choca entsemna ca’; pero choye ndoñe šmatjá, ni šmatjúseto. ²⁴ Er chë tojatcuinÿe ora, nťśamo celoca catoica juachoica tojabuashinÿinÿenacá, chca echántsemna chë Bëngbe Bëťśá Entśá tbojanbemá quem luaroye chaojésabo te. ²⁵ Pero natsana cha bontsemna puerte jasúfrana, y morsca entšangbiana uabotená jtsemnana.

²⁶ “Nťśamo Noé yojaniyena ora tojanopasacá, cachcá echanjopása chë Bëngbe Bëťśá Entśá tbojanbemá quem luaroye chaojésabo ora. ²⁷ Chë tempo, entšanga imnasaye, imnofšëšnaye, imnóbouamnaye; natjëmbana imojťsiyeñe, y chca, natjëmbana imojťsomñe, Noé chë barquëshoye tojánamashënguëntscuana; pero chora uabouana uaftena tojánashjango y chë entšanga tojťśanapochocá. ²⁸ Cachcá nťśamo Lot yojaniyena ora tojanopasacá: entšanga imnasaye, imnofšëšnaye, imnóbouamnaye, imojťsena, sananga imnajena y imnajebuana; ²⁹ pero Lot Sodoma bëťś pueblentšana tojëťťsanbocna ora, Bëngbe Bëťśá tojanma celocana ínëshe y azufre chauaftema, y chentša entšanga tojťśanapochocá. ³⁰ Cachcá echántsemna chë Bëngbe Bëťśá Entśá tbojanbemá chaojtonÿná ora.

³¹ “Chë tena, nda cachabe yebnentša tšbanánoca chaojťsemna, y chabe soyënga cach tsoca tojťsebošnëse, chocana ndoñe chaondëťastjango

chë soyënga jesabobocnama; y nda jajoca chaojtsemna, yebnoye ndoñe chaondëta. ³² Menójuabonga ntšamo Lotbe shémaftaca tojanopasama. ³³ Nda tojtsentsëna quem luarentše bëtscá jtsebomnama y atšbiana jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojonýá atše juastama, masque chaóbana, chë nyetsca tescama yomna tšabe vida echántsebomna.

³⁴ “Atše cbëyana, chë ibeta, chë Bëngbe Bëtsá Entšá tbojanbemá chaojtönýá ora, útata canýe jutsnëshañe bochántsemna; canýa mochanjesbetše y chë ínýana ndoñe. ³⁵ Uta shembásata cánýiñe bochántsejanýcoye; canýa mochanjesbetše y chë ínýana ndoñe. ³⁶ Uta boyabásata jajoca bochántsetrabajaye; canýa mochanjesbetše y chë ínýana ndoñe ca” —cha tojanëyana.

³⁷ Chora chë uatsjédayënga Jesús tmojantjá: —Utabná, ¿ndëmoca chca yochjopása ca?

Y cha tojanjuá: —Chë obanabe cuerpo tojtsemnentše chë gallinacënga jójotana ca.

18

Chë viudá y chë mandadbiama cuento

¹ Jesús mëntšá tojanacuntá, entšanga jabuátambama, Bëngbe Bëtsáftaca nyets tempo jtsencuéntayana yomnama, ainaniñe añemo jtsebomnama ndocna te ntjajbanacá. ² Mëntšá tojánayana: “Canýe pueblentše canýe mandado inamna; chana ni Bëngbe Bëtsábioye ndoñe bonjánebiauatja, ni entšanga yonjánayaunana. ³ Chë pueblentše canýe viudánaca inamna; chana canýe demanda yojánbomna. As chë mandádbioye yojobeconá y mëntšá ibojauyana: ‘Diosmanda atšbe uayayá motsecastigá ndayá šojaborlama ca.’ ⁴ Bayté chë mandado ndoñe yonjábosëna chë viudábioye joyeunayama; pero chentšana cha yojenójuaboye: ‘Masque Bëngbe Bëtsá ndoñe quetsátebiauatja, ni entšanga ndoñe quetsátayaunana, ⁵ pero quem viudá cada ora endabó causa, añe chanjóyeunaye, chabe uayayá chanjastigá; ndoñesna cada te nandaboye y cabana ya šochanjanamëntša ca.’”

⁶ Chentšana Bëngbe Utabná tojánayana: “Smonjouena ntšamo chë ndoñe tšabá ama mandado yojayancá. ⁷ Y chca, ¿Bëngbe Bëtsá chabe bocacánënga ndoñe yochanjátsebacaye? Chënga mora ínýengbe causa montsesufrina y cada te Bëngbe Bëtsá mondbétseimpadana chaújabuachama. ¿Más chamuatobatmá ca yochjáuyana? ⁸ Atše cbëyana, Bëngbe Bëtsá betscó tšëngaftanga cmochanjátsebacaye, tšëngaftanga chë ínýengbe causa mora šmojtsesufrinënga. Pero chë Bëngbe Bëtsá Entšá tbojanbemá chaojésabo ora, ¿cabá Bëngbe Bëtsábeñe ošbuáchiyënga quem luarentše entšanga yochjánýena ca?” —Jesús tojánayana.

Chë fariseo y chë Romocama impuesto atjanayabiama cuento

⁹ Báseftanga imojtsanjuabná chënga tšabe entšanga imnamna ca, pero chë ínýengbioye imojtsëbuayënja; chíyeca Jesús mëntšá tojanacuntá jabuátambama: ¹⁰ “Uta boyabásata Bëngbe Bëtsabe bëtš yebnoye tbojána Bëngbe Bëtsáftaca jencuéntama: canýa yojamna fariseo, y chë ínýana, canýe Romocama entšángbioye impuesto atjanayá. ¹¹ Chocna chë fariseo, tsanana Bëngbe Bëtsábioye mëntšá ibojtsecuëntaye: ‘Bëngbe Bëtsá, cbontsatschuaná atše chë ínýengcá ndoñe quetsatsmënama: atbëbanënga,

puerte bacna soye amënga y shëmbioye ínÿaftaca íngñayënga; y ni quem Romocama impuesto atjanayacá ndoñe quetsatsmënama. ¹² Atše sënduamana, ácaftaca jencuéntamna, canÿe semaniñe uta soye tondaye ntjascá jtsemnana; y lempe stjonÿenentsana, bnëtsanentsana canÿe soye acbiama sëndëquëcñá ca.’ ¹³ Pero chë Romocama impuesto atjanayana, bënoca yojtsemna, ni celoye ntjontjesiycá, yojtsenócochjantsetaye y mëntsá yojtsichamo: ‘¡Atšbe Bëtsá, šmotselastemá, atšajema bacna soye amá tsmëna causa ca!’”

¹⁴ Chentsana Jesús tojánayana: “Atše cbëyana, quem Romocama impuesto atjanayá chabe yebnoye tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aíñe bëtsá mochanjábema.”

Jesús, basetémëngbiana Bëngbe Bëtsábioye tbojanimpadá
(Mt 19.13-15; Mc 10.13-16)

¹⁵ Entšanga imojanamana Jesúsbioye basetémënga junatsana chauabájajuama, y Bëngbe Bëtsábioye chëngbiana chaboimpadama; pero chë uatsjëndayënga chca tmojáninÿe ora, tmojanontsé chë basetémënga unachayënga jtsëcácanana. ¹⁶ Pero Jesusna chë basetémënga tojánachembo, y mëntsá tojánayana: “Cachcá mónÿaye chë basetémënga átšbioye chamuabo, y ndoñe matëuyanana; er Bëngbe Bëtsabe amëndayana endmëna chë mo quem basetëmëngcá imomnëngbiana. ¹⁷ Ndegombre cbëyana, nda Bëngbe Bëtsabe soyënga ndoñe tonjóyëngacñe mo canÿe basetëmá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

Canÿe bomna entšá Jesúsbioye tojána
(Mt 19.16-30; Mc 10.17-31)

¹⁸ Canÿe mandayá Jesúsbioye tbojantjá: —Tšabe Buatëmbayá, ¿ndayá šojtsemna jamana chë nÿetsca tescama yomna tšabe vida jtsebomnama ca?

¹⁹ Y Jesús tbojanjá: —¿Ndáyeca šcjayana “tšabia ca”? Tšabia nÿe canÿa endmëna: Bëngbe Bëtsá. ²⁰ Aca condétatšëmbo ntšamo Bëngbe Bëtsá tojanmandacá: “Ache shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, ndoñe catjuaboínÿena y ache bëtsëtsata ndoñe stëtsoye catjáquedaye ca.”

²¹ Chora chë boyabása tbojanjá: —Atše lempe chca básetema orscana sëndocumplina ca.

²² Jesús chca tojanuena ora, tbojanayana: —Cabá canÿe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnëjmënga cochtsatšataye; chca, celoca canÿe bëts bomnana cochántsebomna. Chentsana, cochjabo y šcochjuasto ca.

²³ Chë entšá chca tojanuena ora, puerte ngmënaca yojtsemna, er cha corente bomná inamna. ²⁴ Chca ngmená tbojáninÿe ora, Jesús tojánayana: —¡Yapa totcá bomnëngbiana entsemna Bëngbe Bëtsabe amëndayoye jamashënguama! ²⁵ Ndegombre, más paselo endmëna canÿe camello chë coshufjentsá atëfjnëjana chauachnëngo, y ndoñe canÿe bomná Bëngbe Bëtsabe amëndayoye jamashënguama ca.

²⁶ Chora, chë chca imojouenënga tmojánayana: —¿As nda yochjobenaye atsbocaná jtsemnana ca?

27 Y Jesús tojanějua: —Ndayá entšanga ndoñe mondobena jamana, Bëngbe Bëtsá aiñe endobena jamana ca.

28 Chora Pedro, Jesúsbiøye tbojanianyana: —Bëngbe Utabná, aca con-tonýá, bënga lempe chë fsëndbomna soyënga fsënjëseboshjona, y ácaftaca fsëntsajna ca.

29 Jesús chora tojanëyana: —Ndegombre cbëyana, ndánaca Bëngbe Bëtsábiøye jasérviana, chabe amëndayama jtsabuayiynayëse, cachcá tojëftseboshjona chabe yebna, shema, catšátanga, bëtsëtsanga o básenga, 30 cha mora quem luarentše chë soyëngama más echanjóyëngacñe, y chë inye luarocna, chë nyëtsca tescama yomna tšabe vida ca.

Jesús cachiñe tojánayana cha jóbanama y jtayenama

(Mt 20.17-19; Mc 10.32-34)

31 Jesús chabe bnëtsana uta uatsjëndayënga barie tojánachembo, y mëntsá tojanëyana: “Smontsetátšëmbo mora Jerusalenoye bënga montsajnama, y choca lempe echanjochnëngo ntšamo chë Bëngbe Bëtsabe juabna oyebuambnayënga, chë Bëngbe Bëtsá Entšá tbojanbemabiana tmojanabemcá; 32 er choca cha chë ndoñe judiëngbe cucuatšifne mochanjáboshjona, y mochantásáboyejuana, mochanjóyenguango, mochantsebuashëttoj; 33 y chamojátjanjëntšana, mochanjóba, pero unga tianoye cha echántayena ca.”

34 Chë uatsjëndayënga tondaye tonjanësertá, ni montsetátšëmbo ndayá bëtsemnana ntšamo Jesús yojtšëtsëtsnacá, er chëngbiana yojamna josértama ndopodena soyënga.

Jesús, Jericó puebloca canye jtanábioye tbojanshná

(Mt 20.29-34; Mc 10.46-52)

35 Tojanopasá, Jesús Jericó puebloye yojtsebëconaye ora, canye jtaná benache juachañe inatbemana, lemošna otjanañe. 36 Entšanga chëjana imojtsachnëjuanama tojanuena ora, yojanotícia ndayá yojtšopasana ca, 37 y chë entšanga tmojanianyana, —Jesús Nazaretocá entsebeconá ca.

38 As cha yojontšë uayebuáchana: —¡Jesús, Davídbentšana Entšá, šmotselastemá ca!

39 Chë natsana imojtsajnënga chë jtaná imojtsácacana, iytëca chaóbemama; pero cha más yojtšáyebuache: —¡Davídbentšana Entšá, šmotselastemá ca!

40 As Jesús tojantsá y tojanmandá cha chamobetsama. Cha ya bécoñe yojtsemna ora, Jesús tbojantjá: 41 —¿Ndayá cojtseboše atše acbiana chjamama ca?

Y chë jtaná tbojanjuá: —Atšbe Utabná, atše sëntseboše chašuatábínynama ca.

42 Chora Jesús tbojanianyana: —Matinye, Bëngbe Bëtsábeñe betsošbuachéyeca shnaná contsatšmëna ca.

43 Y cachora cha tšabá ibojtabinyna, y Jesúsbiøye ibojtsëstona, Bëngbe Bëtsá atschuanaye. Y nyëtsca entšanga, chca tmojáninye ora, Bëngbe Bëtsá imojtsatschuanaye.

19

Jesús y Zaqueo

1 Jesús Jericó puebloca tojánashjango ora, chë pueblëjana cha yojt-sachnëjuana. 2-3 Chora, canye bomna entšá, chë Romocama entšanga

impuesto atjanayëngbe amëndayá, Zaqueo ca uabainá, yojtseboše Jesús jinýama. Pero ndoñe yontsobena jinýama, bëtská entsanga causa y cha becuá inamna causa. ⁴ Chcasna, cha betscó natsanoye tojafsanótjajo y canýe sicomoro betiyeshoye tojánasëngo, chca, Jesús chëjana tojtsachnëjuana ora, jinýama jobenayama. ⁵ Jesús chë betiyeshoye tojánashjango ora, tshanánoye tojanontjesë y Zaquéobioye tbojáninýe. As Jesús tbojanianyana: “Betsco chocana matastjango, Zaqueo, er mënté chanjá acbe yebnoye jatema ca.”

⁶ Chora Zaqueo betscó tojtanastjango y chentšana puerte oyejuayá Jesúsbioye tbojanofja. ⁷ Entšanga chca tmojáninýe ora, tmojanontšë Jesusbe contra mëntšá ichámuana: “Jesús tonjá canýe bacna soyënga amabe yebnentšë jatema ca.”

⁸ Chora Zaqueo tojantsá, Bëngbe Utabná Jesúsbentšë, y mëntšá tbojanianyana: —Mouena, atšbe Utabná, atšbe bomna soyënguentsana tsëntsane ndbomnëjëmënga chanjátšataye y nda más crocénana tijëftseyëngacá, chë ntsachetšá tijëftsefcama canta soye más chantoyiye ca.

⁹ As Jesús tbojanianyana: —Mënté, aca acbe bacna soyënguentsana atsbočaná contsemna, er Zaqueo, ácnaca Abrahábentšana entšá condmëna. ¹⁰ Er chë Bëngbe Bëtsá Entšá tbojanbemá tojabo chë pochocánënga jtsemnama imojtsajnënga jabétsanguanguama y jabátsebacama ca.

Chë crocénanama cuento
(Mt 25.14-30)

¹¹ Entšanga chë soyënga imojtsuenana, y Jesús inýe soye tojanacuntá jabuátambama, er cha ya Jerusalén béconana yojtsemna, y entsanga imojtsejuabnaye chë Bëngbe Bëtsabe amëndayana ya yochjanóshjango ca.

¹² Jesús tojanëyana: “Canýe luarentša uámana entšá inýe bën luaroye yojá, cachabe luarentša rey chamobemama y chentšana cachábioye jtama. ¹³ Cabá nda ora, chabe bnëtsana oservénënga yojáchembo y bëtská crocénana cada cánýabioye yojëftsayentšbuachiye, y mëntšá yojëftsëyana: ‘Quem crocénanaca trato šmochjábema atšë candëtabëntscuana ca.’ ¹⁴ Pero cachabe luarentša entšanga cha imojuáya, as chëngna básefta entšanga imojichamuá chë inýe bën luaroca mëntšá chamuayanama: ‘bënga ndoñe queftsátšboše cha bëngbe rey chaotsemnama ca’.

¹⁵ “Pero pronto chë luarentša rey cha imojábema. Y chë luaroye yojtá orna yojamánda chë crocénana yojëftsayentšbuáchenga chamobéconama, jtsetatšëmbuama ntsachetšá cada ona chë crocénanaca yojongánama. ¹⁶ Chë natsaná yojáshjango y yojayana: ‘Taita, acbe crocénana bnëtsana soye más tonjoboté ca.’ ¹⁷ Y chë rey ibojuuá: ‘Tša tšabá, tšabe oservená. Aca quem base soyiñe ntšamo tchojamandacá tšabá tcojámayeca, bnëtsana pueblentša mandado chacotsemnama cbojayé ca.’ ¹⁸ Chentšana inýa yojáshjango y yojayana: ‘Taita, acbe crocénana shachna soye más tonjoboté ca.’ ¹⁹ Y chë rey ibojauyana: ‘Acnaca shachna pueblentša mandado cochántsemna ca.’

²⁰ “Chorna inýa yojobeconá y mëntšá yojayana: ‘Taita, muentšë acbe crocénana entsatsmëna; canýe pañuelëjuañe bonguana sëntsejajo. ²¹ Atšë acbiana uatjana šonjuábuahe, er aca canýe tšátjaye entšá condmëna; aca chë ndoñe conbuajonentšana jocñana y chë ndoñe tconjajé luarentšana jaja saná jobuátbanana ca.’ ²² As chë rey ibojauyana: ‘Bacna oservená, cach acbe palabrengaca chanjínýanýiye aca ndoñe tšabá tconjamama.

Atše chë ndoñe sëndbuajonentsana jocñana y chë ndoñe sënjajé luar-entšana jobuátbanana tsuamanama icojátatšëmbëse, ²³ ¿ndáyeca ndoñe tconjá chë crocénana bancoca jetsobuájua, y atše camoye matijtabo ora, maščtoyé chë crocénana y chë chentsana tojoboté crocénánaca ca?’ ²⁴ Y chë chentše imojtsemna entsanga vojáyua: ‘Chë crocénana motseboca y chë bnětsana soye más tojabotébioye chana motsatšetá ca.’ ²⁵ As chënga imojojuá: ‘¡Pero cha ya bnětsana soye más entse-bomna ca!’ ²⁶ Y chë rey vojójua: ‘Atše cbéyana, nda tojtsebomnábioye, más mochanjátšetaye; pero nda tondaye tondbomnábioye, chë tojtse-juabná batšatema yobomna sóynaca mochántseboca ca. ²⁷ Y chë atše uayayënga, chë chëngbe rey atše chaitsemnama ndoñe monjánbošëngna, moye ménatse y atšbe delante šmochtsébaye ca.’ ” —cha chora vojayana.

Jesús Jerusalenoye tojánashjango

(Mt 21.1-11; Mc 11.1-11; Jn 12.12-19)

²⁸⁻²⁹ Chca tojěftsanayana chentsana, Jerusalenoye vojětsaye ora, Jesús tojánashjango canye tjashoye, Olivos ca uabáiniñe, Betania y Betfagé pueblënga béconana. Chora, uta chabe uatsjédayata tojanichamó, ³⁰ mēntšá jáuyanëse: “Tsëndatbe natsana entsemna base pueblotémoye motsata. Chašojáshjango ora, canye burrotema utsbuaná šochanjínýena. Chábeñe cabá ndocná tonjenojayé. Sochjuafajóna y sochjuánatse. ³¹ Y nderado nda ndáyeca šojtsajafjná ca chacmojátjasna, sochjuayana: ‘Bëngbe Utabná bontsájaboto ca.’ ”

³² Chë uatsjédayata tbojána y lempe ntšamo Jesús tojanëyancá tbojáninýena. ³³ Y chë burrotema imojtsajafjná orna, chë burrotema nduiñënga tmojanëyana: —¿Ndáyeca chë burrotema šojtsajafjná ca?

³⁴ Chora chata tbojánayana: —Bëngbe Utabná bontsajabótoyeca ca.

³⁵ Chentsana Jesúsbioye chë burrotema tmojanánatse, y chë burrotémbeñe chatbe entsáyá tbojanátatse, y chábeñe Jesús tmojanenjayé. ³⁶ Y cha vojtsachnějuana ora, entsanga chëngbe entsáyá benachëjana imojtsětétsatsana.

³⁷ Olivos tjashe tsmanoye vojtsbeconá ora, chë bětscá entsanga, Jesúsbeñe ošbuáchiyënga, tmojanontsé uayebuáchana y Bëngbe Bětscá oye-juayënga jětschuayana, Bëngbe Bětscabe obenánaca bětš soyënga Jesús tojanmama. ³⁸ Chënga mēntšá imojtsichamo: “¡Corente bendición bomná chaotsemna, chë Bëngbe Utabnabe obenánaca tojabo Rey ca! ¡Celoca tšabá entsemna! ¡Bëngbe Bětscá matschuanga ca!”

³⁹ Chë entsanguentše básefta fariseunga imojtsemnënga, Jesús tmojanayana: —Buatëmbayá, acbe ústonënga mēcácana chca ndoñe chamondětsáyebuachama ca.

⁴⁰ Pero Jesús mēntšá tojanějua: —Ndegombre cbéyana, mënga iytëca tmojobiamëse, chë ndětšbenga muanjuayebuáchena ca.

⁴¹ Jesús Jerusalén béconana tojánashjango, y chë bětš pueblo tojáninýe ora, chentša entsangbiama tojánenobošachna. ⁴² Y mēntšá tojánayana: “¡Malaye šmēntsetátšëmbo, nýe mo mēnténaca, ndayá vojtseita tšëngaftangbeñe lempe tšabá chaotsomñama! Pero mora chë soye tšëngaftangbe bominiýama entsětëmëna. ⁴³ Er Jerusalenoca bacna tenga echanjóshjango; chora uayayënga chentša šheconánëjana canye tapiëse mochantsepórma, mochantsejětja y nýetsca juachoicana mochanjontšé tšëngaftanga jtsatsejana, ⁴⁴ y lempe mochantsepochóca. Muentša

oyenënga mochantsëbaya, y ni mo canye ndëtsbé inyebé juatsboca quemochaiseboshjona, chë Bëngbe Bëtsá tšëngaftanga játsebacama tojabo ora, ndoñe chešmatoyeuná causa ca” —Jesús tojánayana.

Jesús, Bëngbe Bëtsabe bëts yebnentsana enënga y obuámnayënga toj-tanëbuacna

(Mt 21.12-17; Mc 11.15-19; Jn 2.13-22)

⁴⁵ Chentšana, Bëngbe Bëtsabe bëts yebnoye Jesús tojánamashëngo y tojanontsé chë chentše imojtsenënga chentšana jtëbuacnana, ⁴⁶ y tojanëyana: “Bëngbe Bëtsá chabe uabemana palabrenguiñe tojayana: ‘Atšbe bëts yebna echántsemna átseftaca encuéntaye yebna ca’, pero tšëngaftangna, atbëbanëngbe oyeniñe chë yebna šmojtsebema ca.”

⁴⁷ Y cada te, Bëngbe Bëtsabe bëts yebnentsë Jesús entšanga yojsabuátambaye; y bachnangbe amëndayënga, ley abuátambayënga y chë puebltša mandayëngnaca imojtsenguaye ntšamo jamëse cha jóbana. ⁴⁸ Pero ndoñe tmonjáninyëna ntšamo, er nyetsca entšanga corente imojtseyeunana ntšamo cha yojtsoyebuambnacá.

20

Jesusbe obenana

(Mt 21.23-27; Mc 11.27-33)

¹ Canye te, Bëngbe Bëtsabe bëts yebnentsë Jesús yojsabuátambaye, y chë tsabe noticiëngama yojsabuayiyiná ora, tmojánashjajna bachnangbe amëndayënga, ley abuátambayënga, judiëngbeñe bëtsëjemëngcá mandayëngaftaca cányiñe; ² y Jesús tmojaninyana: —Smëyana; ¿ndaye deréchoca chë contsama soyënga aca cojtsama ca? o ¿chca jtsamama nda obenana tcmënjatšetá ca?

³ Chora Jesús tojanëjua: —Atšnaca canye soye sëntsebomna tšëngaftanga jatjayama. Smochjojuanga. ⁴ ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca?

⁵ Chora chënga tmojanontsé enatsëtsnayana: “ ‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chábeñe ndoñe šmonjanošbuaché ca?’ ⁶ Y ndoñe quemuátobena jayanana ‘entšanga ca’; entšanga ndëtsbéngaca buattsëbaya, er nyetscanga becá mondëjuabná Juan ndegombre Bëngbe Bëtsabe juabna oyebuambnayá yojamnama.” ⁷ Chcasna, chënga tmojanjuá ndoñe monjántatšëmbo nda Juan tbojanichmó entšanga jubáyama ca.

⁸ Y Jesús tojanëyana: —Asna atše cach ndoñe quechochatëyana ndaye deréchoca chca stsama ca.

Chë puerte bacna trabájayëngbiama cuento

(Mt 21.33-44; Mc 12.1-11)

⁹ Chentšana Jesús tojanontsé entšanga jáuyanana, y quem cuéntoca tojanabuatambá: “Canye entsá uvas betiyënga yojáje y chë fshantse inye trabájayënga yojúyentsame, y baytescama bën luaroye yojtsoñe. ¹⁰ Chë uvasëšangá juashacama tempo yojobuache orna, chë jajañe nduiño canye oservená ibojíchmua chë trabájayënga jáuyanama ntsachetšá cha ibojtsotocánama. Pero chëngna cha imojtsejantšetaye, y tondaye ntoyiyá imojtichmuá. ¹¹ Chentšana inya ibojíchmua; pero chë trabájayënga cha imojtsejantšetaye, imojtsóyenguango, y tondaye ntoyiyá imojtichmuá.

12 Chë nduiño inya ibojatichmuá; pero chánaca chënga imojtsejantsetaye, imojtselisia, y chentshana imojtábocna.

13 “Chora chë nduiño yojeniyana: ‘¿Y mora ntšamo chjama ca? Cach atšbe bonshana uaquiña chanjíchmuá; nderádose cha aife mochanjóyeunaye ca.’ 14 Pero chë trabájayënga, chë uaquiña imojinýe orna imojeniyana: ‘Mua chë fshantse nduiñbe uaquiña entsemna. Lempe chabe soyënga mua echanjóyëngacñe; motsóbanga y nyetsca chabe otocana soyënga bëngbiana echanjóquéda ca.’ 15 Chcasna, chë uvas jajañentshana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chë jajañe nduiño chë trabájayëngaftaca yochjama ca? 16 Cha co echanjá y chë trabájayënga echanjetsébaye, y chë uvas betiyënga jajañe inýe trabájayënga echanjárrendaye ca.

Chë entsanga chca tmojanuena ora, tmojánayana: —¡Bëngaftaca ndocna te chca chaondopasá ca!

17 Pero Jesús tojanënyané y tojánayana: —As ¿ndayama Bëngbe Bëtsabe uabemana palabrenguiñe iuayana?:

Chë yebna jebuanënga tmojtsanaboté ndëtsbé,

mora chë más bëts uashacuanësentše entsejájona ca.

18 Ndánaca chë ndëtsbeñe chaojotsatšá, chëbé bochántsatcacaye; y chë ndëtsbé ndábeñnaca chaojotsatše, polvëshe bochántsebema ca —Jesús tojánayana.

19 Chë bachnangbe amëndayënga y ley abuátambayënga tmojanenótatšëmbona Jesús chca tojanacuntá jinýanyiyama, chënga mo chë puerte bacna trabájayëngcá imojamnama; asna tmojánbošena cachora jishachana, pero entsangbiana imojtsauatja.

Chë Romoca bëts mandadbiana impuesto jtsatsquëcjnyama

(Mt 22.15-22; Mc 12.13-17)

20 Chentshana chënga báseftanga tmojanichamó, mo ndegombre tšabe entsanga cuaftsemncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. 21 As chënga tmojantjá: —Buatëmbayá, bënga fsëntsetatšëmbo ntšamo aca cojtsoyebuambná y cojtsabuatambacá ndegombre tšabá yomnama, ntšamo ndegombre Bëngbe Bëtsá yobošcá, y acbiana tondaye quenatámana nda más uamaná o nduamaná tomnana. Aca contsabuatambá ndegombre tšabe vida jtsebomnama, ntšamo Bëngbe Bëtsá yomandacá. 22 Chcasna, šméyana, ¿tšabá tayojtsemna bënga, César, chë Romoca bëts mandadbiana, impuesto jtsatsquëcjnyana o ndoñe ca?

23 Jesús yojtsetatšëmbo, ntšamo cha tojayaniñe jisháchichiyama chënga imojtsebošama; as tojanëyana: 24 —Chë šmatsquëcjná crocénana šminýinýenga ca; ¿ndabe jubiá chë crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

25 Y Jesús tojanëyana: —César šmochtoyiye cha ibotocana soye; y Bëngbe Bëtsana cha ibotocana soye ca.

26 Y chca, chë ichmónënga ndoñe imonjobenaye jisháchichiyana, ndayá cha entsangbe delante tojayaniñe. Masna, ntšamo tojanëjuama, ojanánënga iytéca imojjobiana.

*Obanënga jtayenama Jesús tmojantjá**(Mt 22.23-33; Mc 12.18-27)*

²⁷ Chentšana, báseftanga saduceo ca uabaina entsanga tmojána Jesús jinýama. Chënga imojanjuabná obanënga ndocna te ntayenana ca. Jesús mëntšá tmojantjá: ²⁸ —Buatëmbayá, Moisés bëngbe leyënguife tojëftsanabema, nderado canýe boyá tojtsóbana y básenga ndoñe tonjëftsabáshejuanësna, canmëna chë uabentsá chë shëmaftaca jtoubouamayana, chca, chë chabe uabochená obanabiama básenga jtsabamnama ca. ²⁹ Chcase, canýe bëngbentše canýsëfta catsátanga monjamna. Chë natsaná tonjanobouamá y tontsanóbana, básenga ntjëftsabashejuancá; ³⁰ chentšana chë inýa chë shëmaftaca tonjanobouamá, y cachcá tonjanopasá. ³¹ Chë inýe uabentsá chora cháftaca tonjanobouamá, pero tontsanóbana básenga ntjëftsabashejuancá; y cachcá, chë inýe uabentsëgnaca cháftaca tmonjanobouamá, pero nyetscanga tmonjanóbana básenga ntjëftsabashejuancá. ³² Cabana, chë shembásanaca tontsanóbana. ³³ Y chcasna, chë obanënga chamojtayena ora, ¿ndabe chë canýsëfta catsatanguentsábe shema chë shembása yochtsemna, nyetscanga cháftaca tmojanobouamase ca? —chënga tmojantjá.

³⁴ Chora Jesús tojanëjua: —Quem luarentše boyabásenga y shembásenga mondbétsoubouamnaye; ³⁵ pero chë echanjóshjango luaroye jama y obanënguentsána jtayenama mercedo jtsebuájónama chamojobenangna, masque boyabásenga o shembásenga, ya ndoñe quemochatóbouamnaye, ³⁶ ni queochátopodena chënga chamóbanama, y chca, chënga mochántsemna mo angelëngcá, y Bëngbe Bëtsabe básenga mochántsemna, obanënguentsána mochtayénayeca. ³⁷ Y Moisésnaca, chë yojtsángbototjuana betiyetémama tojanábementše, bënga šontsinýanýná chë obanënga imnátayenama; chentše Bëngbe Bëtsá tojánayana cha yomna Abraham, Isaac y Jacobëbe Bëtsá ca. ³⁸ Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³⁹ Chora básefta ley abuatambayënga Jesús tmojaniyana: —Buatëmbayá, tšabá tcjayana ca.

⁴⁰ Y ya ndoñe más montsenñémua inýe soyëngama jatstjanayana.

*¿Cristo ndabe entsábentšana yomna?**(Mt 22.41-46; Mc 12.35-37)*

⁴¹ Jesús tojanatjá: “¿Ndáyeca tšëngaftanga šmnétsichamo chë Uámána Uabuayaná, chë Cristo, Rey Davídbentšana iuabó ca? ⁴² Er cach David, chabe librëšañe Salmos ca uabainëšañe, tojánayana:

Bëngbe Bëtsá, atšbe Utabná Crístbioye tbojaniyana:

‘Atšbe catsbioica mótbema,

⁴³ atšbe obenánaca, acbe uyayënga acbe cucuatšifne chamoquedama chjamëntscuana ca.’

⁴⁴ ¿Ntšámose, Cristo, Davídbentšana nántsemna, cach David ‘Utabná ca’ chábioye tbojtsabobuátmëse ca?” —cha tojanatjá.

Jesús chë ley abuatambayëngbiama tojánayana chënga ndoñe tšabá montsama ca

(Mt 23.1-36; Mc 12.38-40; Lc 11.37-54)

45 Njetsca entsanga imojtsuenana, y Jesús chabe uatsjéndayënga tojanéyana: 46 “Cuedado smochtsebomna, y ndoñe smattsama chë ley abuatambayëngcá; chënga jtsogusetánana bënëna entsayangaca jtsajnana, y jtsebošana tsáshenañe entsanga becá respétoca chamotsacheuanayama. Chënga chë judiëngbe enefjuana yebnënguenache chë más uámána luarënguñe jtsetbiámanana, y fiestënguñe nÿa quëfseroca. 47 Pero chë viudángbioye chë tmobomna soyënga jtsabacayana; y entsangbe delante tsabá chacmotsënyama y chënga imojtsaíngñama ndoñe chaondëtsótatsëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá ínÿengbiama más chënga echanjácastigaye ca” — Jesús tojánayana.

21

Jesús yojtsënyaye chë crocénana quëcjnyayënga

(Mc 12.41-44)

1 Bëngbe Bëtsabe bëts yebnentse, Jesús yojtsënyaye chë bomnënga crocénana jtsequëcjnyayana chë crocénana quëcjnyatëmiñe; 2 y canÿe viudá ndbomnjëmnaca tbojáninye, uta crocénana chëtëmiñe yojaftsesegóra. 3 Chora Jesús tojánayana: “Ndegombre cbéyana, quem viudá ndbomnjëjema, Bëngbe Bëtsabiama njëtscangbiama más becá tonjëftsesegorá; 4 er njëtscanga tmonjëftsesegorá chë yojtsóyentsjamentšana, pero chana, masque tša ndbomnjëjema, cha vida jtsebomnama lempe ntsachetšá yobomncá tonjëftsesegorá ca.”

Jesús tojánayana Bëngbe Bëtsabe bëts yebna lempe mochjápochocama

(Mt 24.1-2; Mc 13.1-2)

5 Báseftanga imojtsichamo chë Bëngbe Bëtsabe bëts yebnama, tša yojtsebotamanana puerte uámána ndëtsbéngaca y chë entsanga imojanama juambana Bëngbe Bëtsábioye uátšëmbona soyëngaca ca. As Jesús tojánayana: 6 —Canÿe tempo echanjóshjango, y lempe ntšamo mora muentše smontsonÿacá tondaye queochatoquéda, ni mo canÿe ndëtsbé inÿebé juatsboye. Lempe mochantsepochóca ca.

Ntšamo yochtsemna quem luare jopochóca te chaojtsobeco ora

(Mt 24.3-28; Mc 13.3-23)

7 Chora chënga tmojantjá: —Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entsanga chamotsetatšëmbuama ca?

8 Y Jesús tojánayana: —Cuedado smochtsebomna ndocná chacmondáingñema. Er banga mochanjabo y mochantsabíchamo chënga atše imomna ca. Mochántsicamo: “Atše chë Cristo sëndmëna”, y “Mora chë tempo entsemna ca”. Pero ndoñe smatjóyaunaye. 9 Y tsëngaftanga, entsanga imojtsentsjanama y entsanga mandadëngbe contra imojtsemnama chašmojtsuenana ora, ndoñe smattsauatja, er entseyta natšana chë soyënga chaochnëngo; pero masque chca, chë quem luare jopochóca tempo cabá ndoñe queochátsmëna ca.

10 Y mëntšánaca Jesús tojanéyana: “Canÿe luarentša entsanga, inÿe luaroca entsángaftaca mochántsentsejanaye; y canÿe amëndayábentša entsanga, inÿe amëndayábioaca entsangaftácnaca. 11 Ba luarënguñe jabuache echanjuangmëmana, bëts shëntšana, y entsanga pochócaye šocanënga echanjóshjango; y celoca echántsemna puerte uabouana

soyënga y bëts soyënga, entsanga jinÿanjÿiyama quem luare ya yochtopochócama.

¹² “Pero cabá ndoñe chca chaondochnëngo ora, tšëngaftanga cmochanjishëche y chašmosufrima mochántsama; bënga judiëngbe enefjuana yebnëngoye cmochanjunatse játssetënama y cárceloyñaca cmochanjáutame, y reyënga y mandadëngbióynaca cmochanjunatse, atšbe ústonënga bëtsemna causa. ¹³ Chca šmochanjapása, ntšamo atšbiana šmotatšëmbcá chënga chašmëyanama. ¹⁴ Natsana ndoñe šmatjátsjuabnaye jenëuyanama ntšamo chora jóyebuambayana, ¹⁵ er atše chanjama puerta tšabá y osertanáñaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmonsichamo ca, y ndocá jojuama quemochatobenaye. ¹⁶ Pero uayayëngbe cucuatšinë cmochanjábashejuana cach tšëngaftangbe bëtsëtsanga, catšátanga, pamíllanga y amiguënga; y tšëngaftanguentsana báseftanga cmochantsëbaye. ¹⁷ Y nÿetsca entsanga cmochantsëbuayënja, atšbe ústonënga bëtsemna causa. ¹⁸ Pero tšëngaftangbe bestšašentsana ni mo canÿe stjënëja quemochátabajajo. ¹⁹ Tšëngaftanga nÿets tempo átšbeñe ošbuáchiyënga chašmojtsemnëse, chë nÿetsca tescama yomna tšabe vida šmochántsebomna ca.

²⁰ “Jerusalén nÿets šhëconana soldadënga chašmojanÿe ora, šmochtsetátšëmbo Jerusalén jopochócama tojobuáchama. ²¹ Chorna, chë Judeoca oyenënga batsjabengoye chamotsacheta; Jerusalemntše chamojtsemnënga, chentsana chamuaisebocana; y chë jajenache chamojtsemnënga, Jerusalemoye ndoñe chamondésamashjna. ²² Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrenguiñe endayancá chora echanjochnëngo. ²³ ¡Tša lastema chë tempo shembásenga ngomámanëngbiama o ochóchaye básenga chamojtsabamnëngbiama! Er chora corente ngménana quem luarentše echántsemna, y quem luarentša entsangbiama chë uabouana castigo. ²⁴ Inÿenga espadëjaca mochanjóbana, y inÿengbioye nÿetsca luarënguëjana utámenënga mochanjunatse; y chë ndoñe judiëngna, Jerusalemoca entsángbioye mochántsatsejaye y mochantsëbaye, chca chaotsemnana Bëngbe Bëtsá tojalesenciantscuana ca” —Jesús tojánayana.

Bëngbe Bëtsá Entšá tbojanbemá quem luaroye echanjésabo

(Mt 24.29-35, 42-44; Mc 13.24-37)

²⁵ Mëntšánaca Jesús tojánayana: “Chora bëts soyënga echantsinÿna shinÿiñe, juashconiñe y estrellënguïñe; y quem luarentša entsanga tša mochántsauatja, ndayá jamama ntsetatšëmbcá, chë mar béjaye y olëshënga corente echantsefshauenana causa. ²⁶ Entšanga echantsabu-atëcja tša auatja causa y ndayá quem luariñe yochjopásama enócochinÿena causa; er chë quem luarentša tšbanánoca espíritënga obenana bomnënga echanjángmëmëmana. ²⁷ Y chora entsanga mochanjinÿe, chë Bëngbe Bëtsá Entšá tbojanbemá jantšetëshiñe echántsaboye, puerta obenánaca y corente buashinÿinÿaniñe. ²⁸ Chë soyënga jochnënguama chaojobjatšé ora, añemo šmochjentšetaye y bestšaše játsbanase šmochjarrepára, er chora echántsemna chë tšëngaftangbe atsebacayana ca” —Jesús tojánayana.

²⁹ Mëntšánaca Jesús tojánëyana jabuátambama: “Šmochjinÿe canÿe higo betiye o ndaye inÿe betiynaca. ³⁰ Tojtsaisëjotsanama šmojinÿe ora, jtsetatšëmbuana chë tšabe tempo ya yojtsaisobecuama. ³¹ Cachcá,

chë soyënga yojtsëchnëjuanama chašmojinÿe ora, šmochtsetátšëmbo chë Bëngbe Bëtsabe amëndayana ya yojtsobecuama.

³² “Ndegombre chëyana, lempe chca echanjochnëngo, morsca entsanga cabá ndóbana ora. ³³ Celoca y quem luare echanjopochóca, pero atšbe palabra ndocna te queochaisopochóca.

³⁴⁻³⁵ “Cuedado smochtsebomna y ndoñe šmatjaleséncia tšëngaftangbe ainana bacna juabnëngaca chaotsemnana, jenomándama ntsobencá mocá enobuena causa, tmoye causa y nÿe quem luarentša soyëngama enócochinÿena causa; y tšëngaftanga prontánënga šmochtsemna, nÿe ndeolpe chë te chaojobuache ora; y tšëngaftanga ndëprontánënga ndoñe chašmondëtsemna, mo tšëngaftangbiana canÿe uachmaniñe cuaftsemná. Er nÿetsca quem luarentša entsangbiana chca echántsemna. ³⁶ Cuedado smochtsebomna y yejuana šmochtsantješna; nÿe ntseco órnaca Bëngbe Bëtsáftaca šmochtsencuéntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojanëyana.

³⁷ Jesús, bnëté Bëngbe Bëtsabe bëts yebnentše yojánabuatambaye, y ibetna, Olivos uabaina tjashoye yojánaye joquédama. ³⁸ Y nÿetsca entsanga cabá cachëse Bëngbe Bëtsabe bëts yebnoye imojánajna Jesús joyeunayama.

22

*Entsanga tmojanjuabó ntšamo jamëse Jesúsbioye jishachama
(Mt 26.1-5, 14-16; Mc 14.1-2, 10-11; Jn 11.45-53)*

¹ Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama. ² Chë bachnangbe amëndayënga y ley abuátambayënga imojtsenguaye ntšamo jamëse Jesús jóbana, pero entsangbiana imojtsauatja.

³ Chora Satanás, Judas chë Iscariote ca uabobuatmabe ainaniñe bacna juabnënga tojanajó. Chánaca yojamna chë bnëtsana uta uatsjendayënguentsá; ⁴ y tojána, chë bachnangbe amëndayënga y Bëngbe Bëtsabe bëts yebnocca soldadëngbe amëndayëngaftaca jencuéntama, ntšamo Jesús chëngbe cucuatšinë jayentšbáshejuanama. ⁵ As chënga imojóyejuaye, y Judas tmojanšbuachená crocénana chama jtatšetayana. ⁶ Y Júdasna aíñe ca tojánayana; y cach orscana cha yojtsenguaye ntšamo jamana y ndëmuu ora Jesús chëngbioye jayentšbáshejuanama, ndocna entsanga ora.

*Jesús chabe uatsjëndayëngaftaca Bashco saná tojanse
(Mt 26.17-29; Mc 14.12-25; Jn 13.21-30; 1 Co 11.23-26)*

⁷ Chë Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canÿe oveshá jóbana chora jasama. ⁸ As Jesús, Pedro y Juánbioye tojanëyana: —Motsata y saná šochjapróna Bashco fiestama bënga mochjasama ca.

⁹ Chora chata tbojantjá: —¿Ndëmoca cojtseboše chë saná fchjaprónama ca?

¹⁰ Y Jesús tojanëjua: —Jerusalenentše chašojámashëngo ora, canÿe bacó cmochanjóbatše, matbajiñe búyeshe echantsabayambaye. Cha šochjuasto, y šochtsonÿaye ndëmuanyë yebnentše cha yochjámashënguama; ¹¹ y chentša nduiño šochjauyana: “Chë Buatëmbayá

šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjéndayëngaftaca jasama ca?’ ”¹² As cha cmochanjínÿanÿiye canÿe bëts tsañe, tsbanana pisoca; ya lempe echántseprontana, y chentše, Bashco fiestama saná šochjaprónta ca.

¹³ As chë útata tbojána, y tbojáninÿena lempe ntšamo Jesús tojanëyancá, y chentše chë Bashco saná tbojanprontata.

¹⁴ Jasama tojanobuache ora, Jesús mesëshentše tojanótbema chabe uatsjéndayëngaftaca, chë cachënga más chcoye chabe ichmónënga ca uabáinënga. ¹⁵ Chora Jesús tojanëyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufri ora. ¹⁶ Muentšana ndoñe más quemëntša saná quicháise, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

¹⁷ Chorna canÿe coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšenga; y cbëyana, ¹⁸ chë uvas betiyentša shajuanentšana obocniye ndoñe más quichaisofšiyë, Bëngbe Bëtsabe amëndayana candóshjanguëntscuana ca.”

¹⁹ Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiamá. Ntšamo mora bënga montsamcá šmochtsama, atšbiamá jtenójuaboyama ca.”

²⁰ Tmojansentšana, chë coptémaca tojanma cachcá ntšamo chë tandëseca tojanmá y mëntšá tojánayana: “Quem coptema vínoye entsemna chë Bëngbe Bëtsabe tsëm trato entšángaftaca. Atšbe buiñe echanjuábuashana, tšëngaftanga chašmotsetatšëmbuama ntšamo Bëngbe Bëtsá entšanga tojanašebuachenacá ndegombre yochjochnënguama. Chë buiñe tšëngaftangbe tšabiamá echanjuábuashana. ²¹ Pero chë uayayëngbe cucuatšinë šochjaboshjoná, mesëshentše átšeftaca entsemna. ²² Ndegombre, chë Bëngbe Bëtsá Entšá tbojanbemáftaca echanjopása, ntšamo Bëngbe Bëtsá chabiamá tojanjuabocá. ¡Pero tša lastema chë bochjáboshjonabiamá ca!” —Jesús tojánayana.

²³ Chorna chë uatsjéndayënga tmojanontšé entjanayana, chënguentšá nda chë boshjuaná bétsemnana.

Nda chë más uamaná yomna

²⁴ Chë uatsjéndayënga imojtsenatsëtsnaye chënguentšá nda chë más uamaná bétsemnana. ²⁵ As Jesús tojanëyana: “Chë ndoñe judiëngbeñe, chë reyënga chëngbe entšángbioye nÿe ntšámnaca jtsamëndayana, y chentša amëndayënga jtsamana, entšanga chëngbioye tšabe soye amënga ca chamotsëbobuátmama. ²⁶ Pero tšëngaftangbeñe ndoñe chca chaondëtsemna; chamna, tšëngaftangbeñe chë más uamaná mo chë más basacá chaóbema, y chë mandayá mo chë oservenacá. ²⁷ Er, ¿ndase chë más uamaná yomna, chë mesëshentše jasama tojotbemá o chë uajuatšnayá? Ndegombre co chë mesëshentše tojotbemá; pero atšna tšëngaftangbeñe sëntsemna mo chë oservenacá.

²⁸ “Atšbe padecëniñe tšëngaftanga sempre átšeftaca šmondëtsemna. ²⁹ Chíyeca, atšbe bariëna, canÿe amëndayana cbochanjatsataye, ntšamo atšbe taitá canÿe amëndayana šojatštacá; ³⁰ chca, atšbe amëndayoca mesëshentše átšeftaca šmochanjase y šmochanjofšiyë, y uámana tbe-maniñe mo reyëngcá šmochanjotbiamá, chë Israeloca bnëtsana uta

pamíllanga entšangbiana chašmuayanama tšabá o ndoñe tšabá chënga tmonjamama ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayanama

(Mt 26.31-35; Mc 14.27-31; Jn 13.36-38)

³¹ Jesús mēntšánaca tojánayana: —Simón, Simón; cochtsetátšëmbo, Satanás obenana tonjotjañe tšēngaftangaftaca n̄ye ntšámnaca jamama, mo chē trigo matēnga tcojtsashatiyeynacá; ³² pero atšna Bēngbe Bētsá sēnjaimpadá, átšbeñe ošbuáchiyana ndoñe chacmondētsebuáshbenama. Y aca, n̄yets ošbuáchiyana átšbeñe chacojtsatsbomna ora, chē in̄ye ošbuáchiyēnga cochjújabuache átšbeñe sempre chamotsošbuáchemaca.

³³ Chora Simón tbojaniyana: —Bēngbe Utabná, atše sēntseprontana ácaftaca cárceloye jámnaca y jobanámnaca.

³⁴ Y Jesús tbojaniyana: —Pedro, atše cbēyana, cam ibeta bín̄yanoye, ngallo cabá ndécanta ora, aca unga soye cochanjayana ndoñe šconduabuatma ca.

Chē más jabuache ora yojtsobeco

³⁵ Chentšana Jesús tojanatjá: —¿Chē ni shecnájaca, ni crocenánaca, ni shecochētjonēsheca tcbonjanichamó ora, nderado ndayá tcmo-janabuáshebena ca?

Y chēnga tmojanjuá: —Tondaye ca.

³⁶ Chora tojanēyana: —Mora ndoñe chca; shecnaja tobomná, chēja chauesocñe y crocenánama shecnēbénaca; y nda ndoñe espadēja tondbomna, chabe quēfsáya chaotsatábuiye y can̄ye espadēja chauatobuámiñe. ³⁷ Er cbēyana, entseyta átšeftaca chaopasá, ntšamo Bēngbe Bētsabe uabemana palabreñguíñe atšbiana iuayancá, mēntšá: “Y chábioye tmonjáníñe mo chē puerte bacna soye amēnguentšá can̄ya cuaftsemncá ca.” Y lempe ntšamo atšbiana iuabemancá, mora ya echanjochnēgo ca —Jesús tojanēyana.

³⁸ As chēnga tmojaniyana: —Bēngbe Utabná, muentše uta espadēja entsemna ca.

Y japochócamna cha tojánayana: —N̄ye n̄yetšá ponto ca.

Getsemaní luarentše, Jesús Bēngbe Bētsáftaca tbojanencuentá

(Mt 26.36-46; Mc 14.32-42)

³⁹ Chentšana, Jesús tojánbocna y ntšamo yojanamancá Olivos t̄jashoye tojána, y chabe uatsjéndayēnga tmojanasto. ⁴⁰ Choca tmojánashjajna ora, Jesús tojanēyana: “Bēngbe Bētsá moimpadanga, bacna soye jamama ndoñe chacmondócochēnguama ca.”

⁴¹ Y chē uatsjéndayēngbentšana yojoluára, mo can̄ye ndētšbé jutšenēntscoca n̄yetšá, y yojoshēntsamentšiyē Bēngbe Bētsáftaca jencuéntama. ⁴² Jesús mēntšá tojánayana: “Taita, aca tcojtsebošese, moma atše ndoñe chaondētsemna chca jasúfriana. Pero ntšamo atše stsebošcá ndoñe chaondētsemna, sinó ntšamo aca cojtsebošcá ca.”

⁴³ Chca orna celocana can̄ye ángel tbojánēbēbocna, añemo chaot-sebomnama juajabuáchama. ⁴⁴ Jesús tša ngmēniñe yojtsemna, y Bēngbe Bētsáftaca más ibojtsencuéntaye. Y chabe bosese yojtsemna mo fshantsiñe buiñe cuaftsebuastētjuancá.

⁴⁵ Bēngbe Bētsáftaca jencuéntama tojanpochocá ora, tojtantsbaná y chabe uatsjéndayēnga imojtsemnoye tojána; y chēnga imnētsomañe,

tša ngménaca imojtsemna causa. ⁴⁶ Chora tojaněyana: “¿Ndáyeca šmotsomañe? Motsbananga y Běngbe Bětsá šmochtseimpadana, bacna soye jamama ndoñe chacmondócochěnguama ca.”

Uayayěnga Jesús tmojánishache
(Mt 26.47-56; Mc 14.43-50; Jn 18.2-11)

⁴⁷ Jesús cabá yojtsoyebuambnantscuana, ba entšanga chentše tmojánashajna. Chě Judas ca uabainá, canya chě bnětsana uta uatsjendayěnguentšá, chě entšangbe natsana yojtšaye. Cha yojobeconá Jesús juamóchama; ⁴⁸ pero Jesús tbojanianyana: “Judas, ¿canye juamochese chě Běngbe Bětsá Entšá tbojanbemá uayayěngbe cucuatšiče cochjaboshjona ca?”

⁴⁹ Chě Jesúseftaca imojtsemněnga tmojáninye ntšamo chora yochjanopásama; as tmojanianyana: —Běngbe Utabná, ¿espadějaca fšcotsatsejaye ca?

⁵⁰ Y canya chěnguentšá, chě bachnangbe más uámana aměndayabe bochichnayábioye catšbioica matscuaše tbojtsantětše, y tbojt-saněštjango. ⁵¹ Chora Jesús tojaněyana: —Cachcá monjá; nje nyetšá ponto ca.

Y chě bochichnayábioye chě matscuaše tbojánbojajo y tbojanshná. ⁵² Chentšana, chě bachnangbe aměndayěnga, chě Běngbe Bětsabe běts yebnentša soldaděngbe aměndayěnga y chě judiěngbeñe bětsějeměngcá aměndayěnga, chě cha juanatsama tmojánaběnga, Jesús tojaněyana: “¿Ndáyeca espadějangaca y ngarotběngaca šmojabo atše jishachama, mo atše canye bacá uamana entšá cuaftsemncá ca? ⁵³ Atše cada te tšěngaftangaftaca sěnjamna Běngbe Bětsabe běts yebnentše, y ni chešmátanbojajo. Pero ora tojjobuache tšěngaftanga chca chašmomama, y Satanás ntšamo yojtseboščá tšěngaftangbeñe echantsemándaye ca” —Jesús tojaněyana.

Pedro tojánayana Jesúsbioye ndoñe bonjanabuátma ca
(Mt 26.57-58, 69-75; Mc 14.53-54, 66-72; Jn 18.12-18, 25-27)

⁵⁴ Chentšana Jesús tmojánishache, y chě bachnangbe más uámana aměndayabe yebnoye tmojánantse. Y Pedro bėnocana ibojtsěstona. ⁵⁵ Choca, chashja tsěntsaca, canye iñeshe tmojanangbotjó y entšanga chě shěconana imojtsetbiámana; y Pédrěnaca chentše chěngaftaca yojótbema. ⁵⁶ Chora, canye shembása chentša oservená, Pédrěbioye tbojáninye chě iñe juachaca yojtsetbemana; tbojanonjinyé y tojánayana: —Muánaca cháftaca endánměna ca.

⁵⁷ Pero Pedro ndoñe ca tojánayana, y chě shembásabioye měntšá tbojanianyana: —Sobrená, atše cha ndoñe quetsatabuatma ca.

⁵⁸ Ndoñe yapa bėn y inya chábioye tbojataninye y tbojanianyana: —Acnaca chě uatsjendayěnguentšá condměna ca.

Pero Pedro tbojanjuá: —Bacó, atše ndoñe quetsátsměna ca.

⁵⁹ Chentša benětscosna, inya más yojátayana: —Ndegombre, muánaca cháftaca enjánana; muánaca Galileocá entsemna ca.

⁶⁰ Y Pedro tojánayana: —Bacó, ndayama cojtsichámuama ndoñe quetsátsstšěmbo ca.

Cachora, y Pedro cabá yojtsoyebuambnantscuana, canye ngallo yojacánta. ⁶¹ Chora Běngbe Utabná yojobuértana y Pédrěbioye tbojanonjinyé; y Pedro chora yojenójuaboye ntšamo Běngbe Utabná tbojanianama:

“Cam ibeta bínjanoye, ngallo cabá ndécánta ora, aca unga soye cochan-jayana ndoñe şconduabuatma ca.” ⁶² As Pedro shjoye tojánbocna, y corente ngménaca yojtsenóboşachna.

Jesús imojtsáboyejuana
(Mt 26.67-68; Mc 14.65)

⁶³ Chë Jesús imojtsebojanýa entsanga cha imojtsáboyejuana y imojtsejantşetaye; ⁶⁴ y jtsabuchëntsacjuase, imojtsetjanaye: “¡Momalisiá, nda tcmënjajantşetá ca!” ⁶⁵ Y imojtsóyenguaye, nýe mocá soyënga jtsatsëtsnayëse.

Jesús, chë judiëngbe uámana mándayëngbe delante
(Mt 26.59-66; Mc 14.55-64; Jn 18.19-24)

⁶⁶ Tojanbinýna ora, chë bëtsëjemëngcá amëndayënga, bachnangbe amëndayënga y ley abuátambayënga tmojánenefjna, y chëngbioye Jesús tmojanánatse. Choca tmojantjá: ⁶⁷ —Smëyana, ¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanëjua: —Aíñe ca tbojáuyanëse, tşëngaftanga chama átşbeñe ndoñe queşmochatoşbuáchiye. ⁶⁸ Y nderado tbojátjasna, tşëngaftanga ndoñe queşmochatojuá ca. ⁶⁹ Pero cam orscana, chë Bëngbe Bëtsá Entşá tbojanbemá, chë Bëngbe Bëtsá nýets obenana bomnabe catşbioica echántsatsbemana ca.

⁷⁰ Chora nýetscanga tmojantjá: —¿As, aca chë Bëngbe Bëtsabe Uaquiñá comna ca?

Y Jesús tojanëjua: —Cach tşëngaftanga chca şmonsichamo; atşe cha sëndmëna ca.

⁷¹ As chora chënga tmojánayana: —¿Ndayama más entsanga şochjátëjabeto Jesusbe contra chamuayanama? Er cach bënga chabe uayásentşana chca tmonjouena ca.

23

Jesús, Pilatbe delante
(Mt 27.1-2, 11-14; Mc 15.1-5; Jn 18.28-38)

¹ Nýetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanánatse. ² Y chentşe tmojanontşé cha mal jaquédana, mëntşá: —Bënga fsënjínýena mua entsabuatambá bacna soyënga, quem luarentşa entsangbe amëndayëngbioye ndëtsayaunanama. Cha entsichamo bënga ndoñe şontsamna Césarbiama impuesto jtsatşquécjnayana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canýe reycá ca.

³ Chora Pilato Jesúsbioye mëntşá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

⁴ As Pilato, chë bachnangbe amëndayënga y entsanga tojanëyana: —Atşe ni mo canýe soye chiyátinýena, quem boyabása castiganá chaotsemnama jayanama ca.

⁵ Pero chënga más tmojanáyebuachena: —Nýets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroca chca tonjabojatşé y mora moca Judeócnaca cachcá entsama ca.

Jesús Rey Heródesbe delante

⁶ As Pilato, Galilea luarama yojouena ora, tojanatjá Jesús Galileoca tajojamnama. ⁷ Y Jesús aínne Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna. ⁸ Herodes Jesúsbioye tbojáninýe ora, corente tojanoyejuá. Chana tempscana inaboše Jesús jinýama. Cha ba soyënga Jesusbiamna tojanuena, y yojtseboše jinýama Jesús jamana canýe bëts soye, Bëngbe Bëtsabe obenánaca. ⁹ Heródesna ba soyënga tbojantjá, pero cha ndocá tbonjanjuá. ¹⁰ Y chéntšnaca, chë bachnangbe amëndayënga y judiëngbe ley abuátambayënga imojtsemna, y Jesús corente mal imojtsequédaye.

¹¹ Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entšayangá tmojanichëtjo, mo canýe reycá; chentšana cachiñe Pilátbioye tmojesanichmó. ¹² Cach te Herodes y Pilato tbojtanenatsëtsaye; tempna chata ibojenáyata.

Jesusbiamna chaóbana ca tmojánayana

(Mt 27.15-26; Mc 15.6-15; Jn 18.39-19.16)

¹³ Chentšana Pilato, chë bachnangbe amëndayënga, chë pueblentša amëndayënga y nyetsca entšanga tojánachembo, ¹⁴ y mëntšá tojanëyana: —Tšëngaftanga quem entšá átsbioye šmojuánatse, mo bacna soye entšángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiamna šmonjayana, pero atšna ni mo canýe soye chiyátinýena, quem boyabása castiganá jtsemnama ibojtsemna ca jayanama. ¹⁵ Herodes cach ndoñe, chíyeca cachiñe bëngbioye cha tbojesichmó. Quem boyabása ni mo canýe ndoñe tonjobuachjanguá jóbanama chabotsemnama. ¹⁶ Chcasna, jabuache chamotsecastigá y chentšana chanjëtsboshjona ca —cha tojánayana.

¹⁷ Yojamna canýe utamená jëtsboshjonana, ntšamo Bashco fiesta ora jamana imojanamancá. ¹⁸ Pero chora entšanga cánýiñe tmojanáyebuachena: —¡Jesús chaóbana! ¡Barrabás matsboshjona ca!

¹⁹ Barrabás inautámena, mandadëngbioye ndëtsayaunanama chë bëts pueblentše entšanga tojánenautanama y entšá óbanaye causa. ²⁰ Pilato cachiñe tojánayana Jesúsbioye jëtsboshjonama yojtsanboše ca; ²¹ pero entšangna más tmojtëtanayebuachena: —¡Motsecrucificá! ¡Motsecrucificá ca!

²² Pilato ya unga soyama tojtëtanayana: —¿Ntšamo bacna soye mua tojobuachjanguá ca? Ni mo canýe bacna soye chiyátinýena, mua jóbanama chabotsemnama. Chcasna, chanjacastigá y chora chanjëtsboshjona ca.

²³ Pero chëngna más imojtsechembumbuana Jesús chamotsecrucificama. Cabana, chë bachnangbe amëndayënga y chë entšangbe jabuache chembumbuanánaca, Pilato tmojanëyëñaná Jesús chamóbama.

²⁴ As Pilato tojanmandá ntšamo chë entšanga imojtsotjanañcá chaotsemnama; ²⁵ as chora Pilato, Barrabásbioye cachcá tbojtanboshjona, chë nda inautámena mandadëngbioye ndëtsayaunanama entšángbioye tojánenautanama y entšá óbanaye causa. Y Jesusna entšangbe cucuatšinë tbojánboshjona, ntšamo chënga tmojtsebošcá chamomama.

Jesús tmojanrucificá

(Mt 27.32-44; Mc 15.21-32; Jn 19.17-27)

26 As jacrucificama Jesús tmojanánatse. Chora jajocana inátaboye canýe boyabása, Simón ca uabainá, Cirene luarocá; y cha Jesusbe cruz tmojan-cutsá, Jesusbe ústonoye chaotsambama.

27 Y banga chë pueblésha entsanga imojtséstona; y chë shembásenga imojtséstonëgna imojtsayošachiye y ngménaca imojtsanioye, Jesús chca yojtsepásama. 28 As Jesús chëngbiyoye tojanobuértana y tojanéyana: “Jerusalenentša shembásenga, atšbiana ndoñe matošachena; cach tšëngaftangbiana y tšëngaftangbe básengbiana šmochjenóbošachna. 29 Canýe te echanjóshjango y chë te šmochántsihamo: ‘Tša tšabá chë shembásenga šešona ndbomnëngbiana, chë quem luaroye šešonga ndoñe tmonjëftséshejainëngbiana, y chë šešonga ndoñe tmonjëftsabachengbiana ca.’ 30 Chora entsanga jetsóitanama mochántseboše y mochanjontsé ichámuana: ‘¡Tjashënga šmotsëtebuantsá y batsjabenga šmotsaitame ca!’ 31 Atše, chë ndocna bacna soye amá, chíyeca puerte obená, chca šmojaborlase, ¿ntšamo mochjama chë ndegombre bacna soye amëngaftaca, chíyeca ndobenënga? O mëntšá, ¿chë nguëfshna betíyeca chca tmojsamëse, ntšamo chë tojtsebuashá betíyeca mochjama ca?” —cha tojanéyana.

32 Jesúseftaca cruciñe jóbanama, útata bëts bacna soyënga ochjaj-nayátnaca imojtsënachaye. 33 Chë “Obanabe Bestšashe ca” uabaina lu-aroje tmojánashjajna ora, Jesús tmojanrucificá y chë bëts bacna soyënga ochjajnayátnaca, canýa chabe catšbioica y chë ínýana chabe uañicuayoica. 34 Chora Jesús mëntšá tojánayana: “Taita, mëngbe bacna soye mot-saperdónaye, er ntšamo montsamama chënga ndoñe quemátstatšëmbo ca.”

Chë soldadënga Jesusbe entsayamna, tsbanánoye tmojanëtšena, chënga jtenájatayama. 35 Entšanga chentše imojtsemnënga chca imojtsonýaye, y chë pueblentša mandayëngnaca Jesús imojtsáboyejuana y mëntšá imojt-senatsëtsnaye: “Inýengna aiñe tojëftsatsëbacá; mora cachá chauentsbocá, cha ndegombre Cristo, chë Bëngbe Bëtsabe Uámana Uabuayaná tomñëse ca.”

36 Soldadëngnaca Jesús imojtsáboyejuana; tmojanobeconá y untja vínoye imojtsefsëšnaye, 37 y mëntšá imojtsatsaye: “¡Chë judiëngbe Rey tcomnësna, cach aca mentsbocá ca!”

38 Jesusbe bestšaše juatsboicna canýe uabemana soye tmojananjo; chiñe mëntšá yojtsanábemana: MUA CHË JUDIËNGBE REY ENDMËNA ca.

39 Canýe bëts bacna soyënga ochjajnayá yojtsecrucificaná, Jesúsbiyoye mëntšá tbojanóyenguango: —Chë Bëngbe Bëtsabe Uámana Uabuayaná tcomnësna, mentsbocá y bëndátnaca šmatsebocá ca.

40 Pero chë inýe bëts bacna soyënga ochjajnayana mëntšá tbojanácacana: —¿Ni mo Bëngbe Bëtsá ndoñe condërrespetana? Bëndátnaca bontsamna chacá jóbanama. 41 Ndegombre bëndata muentše bontsemna bëts bacna soyënga ochjajnyaye causa, y chíyeca chca jasúfriama bontsamna. Pero quem boyabása ni mo canýe bacna soye ndoñe tonjobuachjanguá ca.

42 Y chorna, quem bëts bacna soyënga ochjajnayá Jesúsbiyoye tbo-janiyana: —Jesús, atšbiana cochtenójuaboye aca reycá jabomándama chacojtabo ora ca.

43 Y Jesús tbojanjá: —Ndegombre cbëyana, mënté átšeftaca celoca, chë nýetscanga oyejuayënga mondbetsemnoca, aca cochantsatsmëna ca.

*Jesús tojanóbana**(Mt 27.45-56; Mc 15.33-41; Jn 19.28-30)*

⁴⁴ Njëtsto orscana las treséntscoñe njëts quem luare yojtseibétata. ⁴⁵ Y shinÿe yojtsajbaná binÿnayana, y Bëngbe Bëtsabe bëts yebnentse yojújonÿana entšëjua tséntsaca yojtsenájataye. Chëjua bënëjua inauamna y chë tsatséntsaca inaújonÿana. ⁴⁶ As Jesús tojanáye buachena: “Taita, atšbe espíritu acbe cucuatšifne šcoboshjona ca.”

Y chca jayanama tojanpochocá ora, tojanóbana.

⁴⁷ Chë romano soldadëngbe amëndayá chca tojáninÿe ora, Bëngbe Bëtsábioye tbojtanadorá, mëntšá jayanëse: “Ndegombre, quem boyabása ainaniñe tšabe juabnënga bomná inamna ca.”

⁴⁸ Njëtscá entšanga chë soye jinÿama tmojánabënga, chca tojanopasama tmojáninÿe ora, tmojanontšé jtangana enocochjantšetaye, ngménama. ⁴⁹ Pero Jesusbe njëtscá ubuátmënga y chë shembásenga Galileocana tmojanastëngna, chaboca tmojanoquedá chë soyënga onÿayifne.

*Jesús tmojanatbontsá**(Mt 27.57-61; Mc 15.42-47; Jn 19.38-42)*

⁵⁰ Yojanmëna canÿe boyabása, José ca uabainá, canÿe Judeoca pueblócá, Arimatea ca uabaina; cha inamna canÿa chë pueblentša uámana amëndayënguentsá y canÿe tšabe entšá y njëtscá soyënguiñe tšabá amá. ⁵¹ Chánaca yojanobátmana chë Bëngbe Bëtsabe amëndayana chaóshjanguama, y tondaye tbonjanogustá ntšamo chë inÿe amëndayënga tmojanjuabó y Jesúseftaca tmojanmcá. ⁵² Cha Pilátbioye tojána y Jesusbe cuerpo tbojanotjañe. ⁵³ José chë cruzocana Jesusbe cuerpo tbojtánštjango, canÿe lino entšëjuaca tbojanandmaná y canÿe cuevēšifne, peñëšifne pormániñe, tbojanjajó. Chentše cabá ndocná mondëjajo. ⁵⁴ Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebínÿana.

⁵⁵ Chë shembásenga, Galileocana Jesús tmojantjëm bamba, tmojána y chë cuevēshe tmojáninÿe, y tmojanrrepará ntšamo Jesusbe cuerpo tmojanjajoma. ⁵⁶ Yebnoye tmojtaná orna, tmojanprontá botamana uanguëtše bëjayënga y soyënga chë cuerpiñe janëtjuama.

Chë ochnaytena chënga tmojanochná, ntšamo Moisesbe leyifne yojanmandancá.

24*Jesús tojtana yena**(Mt 28.1-10; Mc 16.1-8; Jn 20.1-10)*

¹ Y tmengo, chë inÿe semana bojatséntena, cabá cachëse, Jesús tmojanatbontsá cuevēshoye chë shembásenga tmojána, y tmojanamba chë tmojanprontá botamana uanguëtše soyënga. ² Pero choye tmojánashjajna orna, tmojáninÿena chë cuevēshoye amashjuantšá ndëtšbé chentšana juanániñe, ³ y choye tmojánamashjna ora, Bëngbe Utabná Jesusbe cuerpo ndoñe tmonjáninÿena. ⁴ Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinÿinÿana entšayá uichëtjonata chentše tbojabántsaye. ⁵ Y chë shembásenga tmojanëuatjanama y fshantsoye imojtsatsejbënama, chata tbojanéyana: “¿Ndáyeca obanëngbentše chë vida totsobomñá šmojtsenguá ca? ⁶ Muentše cha ndocná quenátsmëna,

er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana: ⁷ ‘Chë Bëngbe Bëtsá Entsó tbojanbemá bontsemna bacna soye amëngbe cucuatšíñe chamoboshjona, chamocrucificama y unga tianoye cháuatayenama ca’ —chata tbojánayana.

⁸ Chora chë shembásenga Jesusbe palabréngama imojtenójuaboje, ⁹ y chë cuevēshentsana tmojtaná ora, chë tsabe noticiénga chë bnétsana canye uatsjéndayénga y inye entsángbioje tmojanacuntá. ¹⁰ Chë uatsjéndayéngbioje chca cuentayéngna imojamna María Magdalena, Juana, y María, chë Santiagbe mamá, y chë inye shembásenga chëngaftaca imojamnënga. ¹¹ Pero chë uatsjéndayéngna mëntsó chë shembásengbiama imojétsejuabnaye: “Chënga montsoyebuambná mo corente juabna ndbomnëngá ca.” Y chca, chënga chë soyíñe ndoñe montsanošbuaché.

¹² Pero chentsana, Pedro tojéftsantsbaná y ochamanana chë Jesús tmojanajó cuevēshoye tojána. Y choca yojtsemna ora, yojtsejbéna tsoye jontješiyama, pero nye ena entsëjuangá yojuinye, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

Chë Emaús puebloje benachiñe
(Mc 16.12-13)

¹³ Cach te, uta uatsjéndayata Emaús puebloje ibojtsaye. Emaús yojamna Jerusalenocana bnétsana canye kilómetroca. ¹⁴ Chata ibojtsayencuéntaye lempe ntšamo tojanopasama. ¹⁵ Y tojanopasá, ibojtsencuéntaye y ibojtsenatsëtsnayëntscuana, cach Jesús tojanobeconá y chátaftaca cányiñe yojtsaye; ¹⁶ masque imojtsonyaye, ndoñe ibontsobena cha jótëmbana. ¹⁷ Jesús tojanéyana: —¿Ndayama benachiñe šuabanencuéntaye ca?

As chata ngménaca ibojtsaye, ¹⁸ y canya, Cleofás ca uabainá, tbojanayana: —¿Nye aca cojtsemna, inye luarocana ashjanganá Jerusaleñtše oyená, ndayá chentše quem diénga yopasánama ndëtatšëmbuá ca?

¹⁹ Chora cha tojanéyana: —¿Ndaye soyënga ca?

Y chata tbojanayana: —Chë Jesús Nazaretocáftaca tonjopasá soyëngama. Cha enjamna canye Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nyetsca entsangbe delante. ²⁰ Y ntšamo, chë bachnangbe amëndayénga y chentša mandadënga ínÿengbe cucuatšíñe tmonjáboshjona, jóbanama ibojtsemna ca entsanga chamuayanama y chamocrucificama. ²¹ Bënga chabiamama fsënjanobátmana, Césarbe cucuatšentsana Israeloca entsangbe atsebacayá chaotsemnama; pero morna ya unga te entsemna chca tonjopasá. ²² Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanajó cuevēshoye tmonjá, ²³ y chabe cuerpo ndoñe tmonjínÿena; as chora chënga bëngbioje tmontabo y montsabíchamo angelënga tmojëftsanye y chënga catmëñjayana cha ainá yojtsatsmëna ca. ²⁴ Bëngbentsana baseftángna chentsana chë cuevēshoye tmonjá, y tmojínÿena ntšamo chë shembásenga tmonjayancá, pero Jesús ndoñe tmojëftsinye ca —chata ibojtsichamo.

²⁵ As Jesús chata tojanéyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! ²⁶ ¿Mo ndoñe yonjamna chë Uámana Uabuayaná

chë soyënga chaosufrima, y chentshana nyetsca entsanga corente cha chamuatschuama ca?

²⁷ Chentshana Jesús tojanontsé chata jábuayenana, lempe ntšamo chabiama yojanoyebuambnacá chë Bëngbe Bëtsabe uabemana palabrënguifne; yojontsé Moisesbe librëšangañe y chë Bëngbe Bëtsabe juabna oyebuambnayëngbe librëšangañnaca.

²⁸ Chë ibojétsaye puebloye imojtsebeconá ora, Jesús tojanma mo más chcoye cuaftsacá. ²⁹ Pero chatna tmojanatarié chentše chaotsoquedañama, mëntsá jauyanëse: —Bëndáftaca motsoquedañe; ya jetiñe entsemna y ya echanjaibétata ca.

As Jesús cháftaca tojtsanoquedañe. ³⁰ Chentshana tojanopasá, juasama mesëshentše imojtsetbiámama ora, Jesús chë tandëse tojanca, Bëngbe Bëtsabioye tbojtanchuá, chë tandëse tojanjatá, y chata tojanatsatá. ³¹ As, chora chë uatsjëndayata ibojobenaye Jesús jótëmbana; pero chana nÿe ndeolpe yojuenatjëmbe. ³² Chora chata ibojtsenatsëtsnaye: “Chë benachiñe Bëngbe Bëtsabe uabemana palabrëngama šondabuayiyiná ora, ndegombre bëngbe ainaniñe más bontseboše cha más chašotsabuayiyinama, ¿ndoñe chca ca?”

³³ As, cachora tbojëftsantsbanata y Jerusalenoye tbojtanata; choca tmojáninÿena chë bnëtsana canÿe uatsjëndayënga cánÿentše imojtsemna y chëngbe enutëngnaca; ³⁴ y mëntsá imojtsichamo: —¡Ndegombre Bëngbe Utabná tojtayena; Simónbioye tbojébëbocna ca!

³⁵ As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojótëmbe, chë tandëse tojanjatá ora.

*Jesús chabe uatsjëndayënga tojánebëbuacna
(Mt 28.16-20; Mc 16.14-18; Jn 20.19-23)*

³⁶ Chë uatsjëndayënga chë soyëngama cabá imojtsencuëntantscuana, Jesús chëngbe tsëntsaca tojabantsaye y mëntsá tojanëyana: “Chë atšbe ainaniñe tšabe ebionana tšëngaftangaftaca chaotsemna ca.”

³⁷ Pero chënga tša auatjanánënga imojtsemna, y canÿe añemëse imojétsonÿaye ca imojtsejuabnaye. ³⁸ Pero Jesús tojanëyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca? ³⁹ Atšbe cucuatšënga y atšbe shecuatšënga minÿënga; šmobjajo y šmochanjinÿe. Cach atše sëntsemna. Canÿe añemëсна, ni mëntsana ni betašënga ntsebomnana; pero tšëngaftanga šmontsonÿá, atšna aíñe ca” —tojanëyana.

⁴⁰ Chca yojtsichámëse, chabe cucuatšënga y chabe shecuatšënga tojaninÿanjé. ⁴¹ Y chënga cabá ndoñe montsanošbuaché, chca noticiama corente imojtsóyejuama y tša ojnanánënga imojtsemna causa; as Jesús tojanatjá: “¿Muentše ndayá jasama quešmëbomna ca?”

⁴² As canÿe tabena buana beonbiana tmojanoyé; ⁴³ Jesús tojanocñe y chëngbentše tojanse. ⁴⁴ Chentshana Jesús tojanëyana: “Quem palabrënga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiama iuabemancá, Moisesbe leyënguifne, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

⁴⁵ Y chora chë uatsjëndayënga, Jesúsbeyeca tmojanobená chë Bëngbe Bëtsabe uabemana palabrëngama josértana. ⁴⁶ Chentshana Jesús tojanëyana: “Ntšamo atšbiana iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca.

⁴⁷ Y morna atšbe uabaina jayanëse, átšbeñe betsošbuáchema, nýets quem luarentše smochjóntša entsanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuperdonama; chë soyënga Jerusalenentše chaobojašé. ⁴⁸ Tšëngaftanga atšbiana soyënga smonjinýe y smondétatsëmbo. ⁴⁹ Atšbe Taitabe šbuachenaná, tšëngaftangbiana chanjíchmua. Pero morna camuentše Jerusalenentše moquedanga, Bëngbe Bëtsabe obenana chašmóyëngacñëntscuana ca” —cha tojanéyana.

Jesús celoye tojtantsjuá
(Mc 16.19-20)

⁵⁰ Chentšana, Jesús chabe uatsjédayënga ínýoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjédayënga tšabe bendicionënga chamóyëngacñama. ⁵¹ Chca yojsamëntscuana, cha chëngbentšana tojanoluaré y tojanontšé celoye játsjuana. ⁵² Chë uatsjédayëngna, Jesús tmojtanadorá chentšana, Jerusalenoje oyejuayënga tmojtaná; ⁵³ y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

San Juan

Cristo, chë Bëngbe Bëtsabe Uámana Oyebuambnayana ca Uabainá

¹ Quem luare ndobojátša ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. ² Ndegombre cha, chë tempscana Bëngbe Bëtsáftaca yojtsanmëna. ³ Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matënjanna. ⁴ Cachábeñe nÿets vida inamna, y quem vídaca tojánabo quem luarentša entsangbe juabnënga jabuábinÿayama. ⁵ Cha tonjánabo moye, chë entsangbe juabnënga ndoñe binÿniñe yonjamnoye, chiñe jabobinÿayama. Cha sempre chca yobinÿna, y Satanás chë entsangbe juabnënga ndoñe binÿniñe chaondëtsemnama amá, ndoñe yondobena chë binÿnayabe obenana jtsejuánana.

⁶ Inamna canÿe boyabása, Juan ca uabainá; y Bëngbe Bëtsá tbojanichmó, ⁷ binÿnayabiama chaóyeuambama; entsángbeñe binÿnayabiama cháuyanama, chca, ntšamo Juan chë binÿnayabiama tojayana soyéngaca, nÿetscanga Jesúsbeñe chamotsošbuáchema. ⁸ Juan ndoñe yonjamna chë binÿnayá. Cha inamna canÿe ichmoná, chë nda binÿnayá yomnabiama entsángbeñe chauabáyanama. ⁹ Chë ndegombrá quem luaroye tonjánabo chë entsangbe juabnënga jabuábinÿayama.

¹⁰ Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatšëmbo. ¹¹ Cachabe luare entsángbiyoe tonjánabo, y entsanga ndoñe tmonjánbošena cha jofjana. ¹² Nÿetscanga, ndëmuanÿenga cha tmojanébuaja y chábeñe tmojtsošbuáchenga, cha derecho tonjanatšatá jtsobenama Bëngbe Bëtsabe básenga ca jtsabáinama. ¹³ Quem ošbuáchiyëngna, chca jtsemnama ndoñe tmonjanobená entsangbe buiñtšana tmojanonÿnáyeca, o ndaye entsabe juabnentšana. Nÿe Bëngbe Bëtsábeyeca chca chabe básenga imojtsabaina.

¹⁴ Cha, chë Bëngbe Bëtsabe Uámana Oyebuambnayana, entsá tojanóbema, y quem luare bëngaftaca yojéftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tšabe juabna, chë Bëngbe Bëtsábentšana tojanóyëngacñana. Cha corente jtsababuánÿeshanëse šojánanÿena y yojéftsiyena ntšamo ndegombre inamncá. ¹⁵ Juan mëntšá chabiama yojanáyebuache: “Chabiama sënjanoyebuambná, chë ndabiama chora atše sënjánayana, chë átšbentšana jabamana atšbiamá más uamaná endmëna, er atše cabá ndonÿna orna, cha ya yojtsemna ca.”

¹⁶ Cha tša tšabe ainana bómnayeca, bënga nÿetscanga mallajta tšabe bendicionënga tmojóyëngacñe. ¹⁷ Moishesbiajana tifjanóyëngacñe chë Bëngbe Bëtsá tojanmandá soyënga. Pero Jesucrístbeyeca, Bëngbe Bëtsá tšabe bendicionënga bëngbiama tojama y chë ndegombre soyënga bënga tmojëftsashjache. ¹⁸ Ndocná, ndocna te Bëngbe Bëtsábioye tbonjinÿe. Chë nÿe canÿe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánÿiñe no canÿacá yomna. Mua, chë Uaquiñá, bëngbiama tojama, Bëngbe Bëtsá juabuátmanama chaotsopodénama.

Juan chë Ubayaná Jesucristbiana tojanabuayená

(Mt 3.11-12; Mc 1.7-8; Lc 3.15-17)

¹⁹ Canÿe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnama chamuatjayama. ²⁰ Chocna, Juan chëngbeñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsásmëna ca.

²¹ As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanëjua: —Atše cha ndoñe quetsásmëna ca.

Chora chënga tmojantjá: —As, ¿chë Bëngbe Bëtsabe juabna jabóyebuambayama jabamá ca?

Y Juan tojanëjua: —Ndoñe ca.

²² Chora chënga tmojaniana: —Asna, ¿aca ndase cojtsemna? Bënga šontsamna nda aca cojtsemnama jtsetatsëmbuana, as chë šonjadespachenga jacúntama. ¿Ndayá cojtsobena cach acbiana jayanama ca?

²³ Y Juan mëntšá tojanëjua: —Atše sëntsemna chë ndabiana Bëngbe Bëtsabe juabna oyebuambnayá Isaías mëntšá tojanábema: “Entšanga ndoyenoca canÿe abuayinayá echántsemna, y entšanga mëntšá echantsabuayinaye: Bëngbe Utabná echanjabo ca. Mo nda canÿe benache tojtseprontacá, tsëngaftãgnaca cachcá, cha jabama tsabe juabnëngaca šmochtseprontana ca.”

²⁴ Chorna, báseftanga chë fariseungbe ichmónënguentšana, ²⁵ Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnësna, ni Elías, ni chë Bëngbe Bëtsabe juabna jabóyebuambayama jabamá ndóñesna, ¿ndáyeca entšanga cojtsëbayana ca?

²⁶ Chora Juan tojanëjua: —Atšna, béjayeca entšanga sëndëubáyana. Pero tsëngaftangbeñe canÿa entsemna; cha ndoñe quešmatábuatma; ²⁷ y cha atšbe ústonoye echanjáshjango. Atše merecido taitsatobujoñe, ni mo jotsejbiyama, chabe shecochëtjonëshentša corriëja jajafjonama ca.

²⁸ Chca tojanopasá, canÿe pueblo Betania ca uabáinentše, Jordán béjaye chenguana. Cach béjayiñe, Juan entšanga yojanëbáyana.

Jesús chë Bëngbe Bëtsabe Oveshatema ca uabainá

²⁹ Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanéyana: “Smochjinÿe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbanëse, quem luarentša entšanga bacna soyëngama perdonánënga mochántsemna. ³⁰ Atše chabiana chonjutsëtsná, mëntšá sënjanayana ora: ‘Atšbe ústonoye canÿa echanjáshjango. Cha atšbiana más uamaná endmëna, er atše cabá ndonÿna ora, cha ya yojtsemna ca.’ ³¹ Tempna, cach atše ndoñe quetsjátantatsëmbo nda cha bëtsemnana. Pero atšna ínÿenga béjayeca ubáyana sëndabó, Israeloca entšanga quem boyabása chamuábuatmanama ca” —Juan tojanéyana.

³² Chentšana Juan mëntšánaca tojanobuambá: “Chabiana mëntšá bominÿe sënjanajó: chë Uámana Espíritu, mo canÿe palomatemcá, celocana tonjánastjango y quem boyabásabe juatsbuañe tonjanototóna. ³³ Atše cabá ndoñe quetsjátantatsëmbo nda cha bëtsemnana, pero chë béjayeca jubáyama šonjanichmó cha, mëntšá šonjaniana: ‘Nda chacojinÿe, chë Uámana

Espíritu jastjanguana y chabe juatsbuañe jototonana, chábeyeca atse chanjíchmuca chë Uámana Espiritu entsangbe ainaniñe cháumashënguama ca.’³⁴ Y morna, atse añe chca tijinÿe, y ndegombre tsëngaftanga cbëyana, cha chë Bëngbe Bëtsabe Uaquiñá entsemna ca” —cha tojanëyana.

Chë Jesusbe natsana ústonënga

³⁵ Yëfsana, Juan chabe uatsjëndayënguentsana útataftaca cachoca yojtësemna. ³⁶ Jesús yojtsachnëjuanama, Juan tbojáninÿe ora, tojanëyana: “Sochjinÿe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

³⁷ Chora chë Juanbe uta uatsjëndayata, chca tbojanuena ora, Jesús tmojanasto. ³⁸ Jesús tojesanontjesé y tojánanÿe chata imojétsëstonama. As, tojanatjá: —¿Ndayá sojtsenguá ca?

Y chata tbojaniyana: —¿Rabí, ndayentse icoyena ca? (Rabí endayana “Buatëmbayá ca”).

³⁹ Chora Jesús tojanëjua: —Mabo y sochjinÿe ca.

As chata tbojána y tbojáninÿe ndayentse cha yojaniyenana. Y chentse cháftaca tojëftsanajëtana, ya jetiñe mo las cuatro ora yojtsemna causa.

⁴⁰ Chë Jesusbiam a oyebuambnayana Juánbioye tbojanóyeunata y Jesús tbojanasto útatentsana cánÿana Andrés ca yojanabaina; cha yojamna Simón Pédrëbe catsata. ⁴¹ Andrés, cabá ndocna inÿe soye ndëma ora, tojána chabe catsata Simón janguanguama. Y tbojáninÿena ora, Simónbioye tbojaniyana: “Chë Bëngbe Bëtsabe Uámana Uabuayaná, Cristo, fsënjínÿena ca.”

⁴² Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninÿe ora, tbojaniyana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtšbé ca”).

Jesús, Felipe y Natanael tojánachembo chamuastama

⁴³ Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojaniyana: “Smasto ca.”

⁴⁴ Chë boyabása Felipe, Betsaida pueblócá inamna. Andrés y Pédrëna cach pueblócata ibnamna. ⁴⁵ Chentšana Felipe tojána Natanael janguanguama; y tbojaniyana: —Chë ndabiam a leyënga librëšangañe Moisés tojanábema cha fsënjínÿena ca. Cachabiam a, Bëngbe Bëtsabe juabna oyebuambnayëgnaca tmojanábema. Cha Jesús entsemna, Josebe uaquiñá, chë Nazaretocá ca.

⁴⁶ Chora Natanael tbojaniyana: —¿Ndaye tsabe soye Nazaretocana nanjopódia jóboconama ca?

Y Felipe tbojanjuá: —Mabo y cochjinÿe ca.

⁴⁷ Natanael yojtsebëconama, Jesús tbojáninÿe ora tojánayana: —Moye canÿe entsá entsabó; cha ndegombre endomerecena Israelbentsana entsá jtsemnama. Cha tsabe entsá endmëna; ndocnábioye quebnatsíngña ca.

⁴⁸ Chora Natanael Jesúsbioye tbojantjá: —¿Ntsamo atse šcuabuatma ca?

Y Jesús tbojanjuá: —Felipe cabá aca ndëchembo ora, atse tbonjinÿe, chë higo betiye tchetšoye condëtsomñe ora ca.

⁴⁹ As, Natanael tbojaniyana: —Buatëmbayá, jaca chë Bëngbe Bëtsabe Uaquiñá comna! ¡Aca, chë Israeloca entsangbe Rey ca!

⁵⁰ Chora Jesús tbojanjúá: —¿Aca átšbeñe cojtsošbuaché, nýe chë higo betiye tchetšoye tcbójinýe ca tcbójuayanama? Ndegombre, chë soyama más bëts soyënga cochanjinýe ca.

⁵¹ Chentšana Jesús tojanëyana: —Ndegombre šcuayana: Tšëngaftanga šmochanjinýe celoca atëfjniñe, y Bëngbe Bëtsabe angelotëmënga jtssetsjuajana y jtsastjajuanana Bëngbe Bëtsá Entšá tbojanbemabe tatsëtsoca.

2

Canýe casamento Galilea luaroca, Caná pueblentše

¹ Chentšana unga tianoye, canýe casamento inamna, canýe pueblentše Caná ca uabáinentše, Galileoca. Chë oboyejuayoca Jesusbe mamá yojsemna. ² Jesús y chabe uatsjëndayëngnaca chë casamentoca ófjanënga imojtsemna. ³ Chë oboyejuayentše, vínoye yojtsopochóca y Jesusbe mamá tbojaniyana: —Ya tondaye vínoye quemátsbomna ca.

⁴ As, Jesús tbojanjúá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

⁵ Chentšana, chabe mamá, chentša oservënënga tojanëyana: —Lempe šmochjama, ntšamo cha chacmojuayancá ca.

⁶ Chocna, chnënguana ndëtsbé matbaja inamna. Chca matbajënguentša béjeyeca, judiënga imojanamana jtsacuëntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábënga jtsatsmënama. Cada matbajiñe, mo shachna o canýsëfta bnëtsanájuá béjaye yojanába.

⁷ Chora Jesús chë oservënënga tojanamëndá: “Quem matbajënga béjeyeca mobuajutetjé ca.” Y chënga, chora lempe tmojanbuajutetjé.

⁸ Y Jesús tojanëyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

⁹ Chora, chë fiesta otocaná, chë béjaye Jesús vínoye tojanbemiye tojanftantiá, ndëmocana yojóboconama ntsetatšëmbcá. Pero chë oservënëngna aiñe imojtsetatšëmbo ndëmocana, er cachënga chë béjaye tmojanbuatsjo. As, chë fiesta otocanana, chë bobontse bouamnábioye tbojanchembo, ¹⁰ y tbojaniyana: “Nýetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batšá uámaniye. Pero acna, chë más uámana vínoye morscama tcojtsabofjajó ca.”

¹¹ Ntšamo Jesús tojanmcá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninýanyé; y as, chabe uatsjëndayënga chábeñe imojtsošbuaché.

¹² Chca tojanopasá chentšana, Jesús canýe pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjëndayënga cha tmojantjëmbambá, y choca baseftatescama tmojanouedá.

*Jesús Bëngbe Bëtsabe bëts yebnentsana bacna entsanga tojtanébuacna
(Mt 21.12-13; Mc 11.15-18; Lc 19.45-46)*

¹³ Ya canýe judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána. ¹⁴ Jerusalenoca, Bëngbe Bëtsabe bëts yebnentše, Jesús tojánanyëna uacnënga, oveshënga y paloma enënga, y entsángbioye crocénana atrócayënga, chëngbe luarënguenache imojtsetbiámana. ¹⁵ Jesús chca tojánanyé ora, biajënga

tojanaca, tjanjanëja tojanobopormá, y Bëngbe Bëtsabe bëts yebnentšana nÿetscanga tojtanébuacna, chëngbe oveshënga y uacnëngaca. Chentšana Jesús, Bëngbe Bëtsabe bëts yebnentšana yojanoserverna crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. ¹⁶ Chë paloma enëngna Jesús tojanëyana: — ¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentše, mo cánÿentše jiyama luarentše cuaftsemncá ca!

¹⁷ Y as, chabe uatsjëndayënga tmojanenujabó ntšamo Bëngbe Bëtsabe uabemana palabrénguiñe iuayanama: “Bëngbe Bëtsabe yebna jtseboguanama juabna, nÿets átšbeñe entsemna ca.”

¹⁸ Chora, judiënga Jesús tmojantjá: —¿Ndaye bëts soye cochjama bënga chašcuinÿanÿema, aca ndaye deréchoca bëngaftaca chca cojtsobenama ca?

¹⁹ As Jesús tojanëjua: —Quem Bëngbe Bëtsabe yebna menásatajchca, y atše unga tese chtëtsbaná ca.

²⁰ Chora chë judiënga tmojanianama: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

²¹ Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. ²² Chama, Jesús obanënguentšana tojtanayena ora, chabe uatsjëndayënga tmojanenujabó ntšamo muentše cha tojanëyanama. Chca ora, Bëngbe Bëtsabe uabemana palabrénguiñe y Jesús chora tojánayana palabrénguiñe más chënga imojtsošbuaché.

Jesús nÿetsca entšangbe juabna iuábuatma

²³ Jesús Jerusalenoca chë Bashco fiestama yojtsemnëntscuana, entšanga tmojáninÿe Jesús jamana bëts soyënga Bëngbe Bëtsabe obenánaca. Chiyeca, ba entšanga chábeñe imojtsošbuaché. ²⁴ Pero Jesús chëngbeñe ndoñe yontsošbuaché, cha nÿetscanga yojanébuatma causa. ²⁵ Y Jesús ndoñe bonjanájaboto chë entšangbe soyëngama chabotsebuaiynama, er cachá entšangbe ainaniñe nÿetsca juabnënga yojanábuatma.

3

Jesús y Nicodemo

¹ Inamna canÿe boyabása Nicodemo ca uabainá. Cha yojamna fariseunguentšá y judiëngbe canÿe amëndayá. ² Chana ibeta Jesúsbioye tojána y tbojanianama: —Buatëmbayá, bënga fsëntsetatšëmbo aca canÿe बातëmbayá connama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chiyeca bënga chca fsëntsetatšëmbo ca —cha tbojanianama.

³ Chora Jesús tbojanjuá: —Ndegombre cbëyana, nda ndoñe cachiñe tontonÿná, cha ndoñe quenátobena Bëngbe Bëtsabe amëndayana jinÿama ca.

⁴ Y Nicodemo tbojantjá: —¿Ntšamo, canÿe entšá ya bëtsá tojtsemna ora, nantsobena cachiñe jtónÿnama ca? Ndegombre, cha ndoñe ntsobenana cachabe mamabe turpiñe jtamashënguana cachiñe jtónÿnama ca.

⁵ Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonÿnacá, ndocná quenátobena Bëngbe Bëtsabe

amëndayoye jamashënguama. ⁶ Nda bëtsëtsabentšana tojonÿná cha, quem luarentša entsàngcá jtsemnana; pero chë Uámana Espíritbeyeca tojonÿná chana, jtsemnana canÿa chë Uámana Espiritu ainaniñe bomná. ⁷ Ndoñe matenjnanana ntšamo tchonjauyana: “Nÿetscanga entsamna cachiñe jtónÿnama”. ⁸ Chë binÿia ndëmuajana tojtseboše jtsemnana, chëjana jtsanana. Masque entsànga, chë binÿiyama jtsuenanana, ndoñe ntsetatšëmbuana ndëmocana yobama y ndëmoye yojtsona. Cachcá, tšëngaftanga ndoñe quešmátstatšëmbo ntšamo entsànga chë Uámana Espíritbeyeca tmojtsonÿnama; pero tšëngaftanga šmontsetátšëmbo aiñe chca yomnama ca —Jesús tbojaniana.

⁹ Chora Nicodemo tbojantjá: —¿Ntšamo chca nántsemna ca?

¹⁰ Y Jesús tbojanjuá: —Aca, canÿe Israeloca abuatambayá, ¿chë soyëngama ndoñe condétatšëmbo ca? ¹¹ Ndegombre chëyana, bëngna chë fsttátšëmbo soyëngama fsëntsoyebuambná, y chë tifjinÿe soyëngama ndegombre bëtsemnana fsëntsichamo. Pero tšëngaftangna, chë cbontsëtsëtsná soyënguñe ndoñe quešmatošbuaché. ¹² Atše, quem luarentša soyëngama sënjoyebuambá y tšëngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyëngama cbojtšëtsëtsnase?

¹³ “Ndocná, nÿe cachábeyeca Bëngbe Bëtsábioye tonjátšjua. Nÿe chë celocana tojabá aiñe, chë Bëngbe Bëtsá Entšá tbojanbemá. ¹⁴ Y chcase, ntšamo Moisés entsànga ndoyenoca bronze mëtšcuaye tsbanánoca tbojanangüesëtjácá, šoquënga tšabá chamotsatšmënama; cachcá entsemna, Bëngbe Bëtsá Entšá tbojanbemá entsànga chamuatsbanama; ¹⁵ chca, nÿetscanga chábeñe tmojtsošbuáchenga, chë nÿetsca tescama yomna tšabe vida chamotsebomnama ca” —Jesús Nicodémioye tbojaniana.

Ntsachetšá Bëngbe Bëtsá entsànga iuababuánÿeshana

¹⁶ Mëntšánaca Jesús tojánayana: —Bëngbe Bëtsá quem luare entsàngbioye tša yojánababuanÿeshanayeca, chë nÿe canÿe Uaquiñá ibobomná, bëngbioye tbojichmó, nÿetsca chábeñe ošbuáchiyënga ndoñe chamondóbanama, y aiñe chë nÿetsca tescama yomna tšabe vida chamotsebomnama. ¹⁷ Er Bëngbe Bëtsá chabe Uaquiñá quem luaroye ndoñe tbonjichmó quem luare entsàngbiana jabáyanama ntšamo tojamama castigánënga chaotsamnama ca, sinó, entsànga chábeyeca atsebácanënga chamotsemnana.

¹⁸ “Nda Bëngbe Bëtsabe Uaquiñábeñe tojtsošbuáchebiana, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiana, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa. ¹⁹ Chca, chë ndoñe tmontsošbuáchengbiamna cha ya tojayana, ntšamo tojamama castigánënga chamotsemna ca; er chë entsàngbe juabnënga binÿnayá quem luaroye tojabo, pero ba entsànga tmojábošena jtsomñana, chë entsàngbiana bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñama. ²⁰ Chë bacna soyënga tojtšamá ndoñe ntsebošana, chë binÿnayá chabe bacna soyënga chabuinÿinÿema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binÿnayábioye jtsáboyënjana, y chë binÿnayábioye ndoñe ntjabana. ²¹ Pero nda sempre tojtšiyena ntšamo ndegombre yomncá

jtsamëse, chana aíñe chë binÿnayábiöye jabana, chë binÿnayá chabiama chabuinÿinÿema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

Juan chë Ubayaná cachiñe Jesucristbiana tojanabuayená

²² Chca tojanopasá chentšana, Jesús chabe uatsjéndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjéndayëngaftaca tojanoquedá, entšanga ubáyana. ²³ Cach tempo, Juanënaca entšanga yojanëbáyana Enonoca, Salim béconana, er choca bëtscá bėjaye inabinÿna. Ba entšanga choye imojtsaye, y Juan chënga yojanëbáyana. ²⁴ Chca tojanopasá, chë Heródesbe soldadënga Juan cabá ndutame ora.

²⁵ Chë tempo, básefta Juanbe ústonënga tmojanontsé inÿe judíoftaca enatsëtsnayana ntšamo tempo judiënga chë jtsacuëntšabiama imojanámanama. ²⁶ Chora, chënga Juánbiöye tmojánabo y tmojanianyana: —Buatëmbayá, chë Jordán chenguánoica ácaftaca enjamná, ndabiama tša tšabá conjanoyebuambná, mora entšanga entsëbayana y nÿetscanga cha montsëstona ca.

²⁷ As Juan tojanëyana: —Ndocná quenátobena tondaye ntsebomnana, Bëngbe Bëtsá ndoñe tbonjatsetase. ²⁸ Cach tšëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiama entšanga jabábuayenama. ²⁹ Chë tobiaše tojtsobouamá ora, chë bobontse chábiöye jtsebomnana; y chabe amigna, chabiama jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyebuambnama sëntsuenana ora, átsnaca corente oyejuayá sëntsemna. ³⁰ Cha bontsemna más uamaná jtsemnana, pero atše šontsemna más nduamaná jtsemnana ca —Juan tojanëyana.

Ntšamo yomna chë celocana tojabá

³¹ Mëntšánaca Juan tojánayana: “Chë tsbanánocana tojabá, nÿetsca entšangbiana más uamaná endmëna. Chë quem luare oyená quem luare entšangcá jtsemnana y quem luarentša soyëngama jtsóyebuambnayana, pero chë celocana tojabana, nÿetsca entšangbiana más uamaná endmëna. ³² Cachá ntšamo tojinÿe y tojouencá entsoyebuambná, pero chë entsichamo soyënguiñe ndocná quenatošbuaché. ³³ Nda ntšamo cha tojtsóyebuambnañe tojtsóšbuaché y chca tojtsama, jtsinÿanÿnayana Bëngbe Bëtsá ndegombre soyënga inetsichámuama. ³⁴ Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábiöye tbojichmó chë Uámana Espiritu, nÿets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. ³⁵ Chë Taitá Uaquiñábiöye bondbobonshana, y chë Uaquiñábiöye obenana tbojatsetá nÿetsca soyënguiñe jtsemándayama. ³⁶ Nda chë Uaquiñábeñe tojtsóšbuaché, chë nÿetsca tescama yomna tšabe vida echántsebomna; y nda chë Uaquiñábiöye ndoñe tboatsábuaché, chana chë vida ndoñe queochátsbomna, y chë Bëngbe Bëtsabe uabouana castigo nÿetsca tescama chábeñe echántsemna ca” —cha tojánayana.

4

Jesús y chë Samaria luaroca shembása

¹ Chë fariseunga tmojanuena Jesús, Juanbiamá más ústonënga yojsabamnama, y más entšanga yojsëbáyana. ² Pero ndegombre, cach Jesús ndocnábioye bonýanabayana, sinó chabe uatsjédayënga. ³ Bëngbe Utabná Jesús, ntšamo chë fariseunga tmojanuena tojántatsëmbona ora, Judea luarocana tojëftsanbocna y Galileoye tojtaná.

⁴ Choye jtamna ibojamna Samaria luarëjana jachnënguana. ⁵ Samariocna, canýe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaqüñá Josébioye tbojëftsanlargá fshantse bëconana. ⁶ Choca yojamna cánýentšë atëfjóniñe, býyeshe jobuatsjuama, Jacobëbe atëfjóniñe ca uabáiniñe. Mo nyetsto ora, chentšë Jesús yojtsemna, aniñe uamëntšnaya, chë atëfjóniñe batsjaca yojótbema. ⁷⁻⁸ Chabe uatsjédayëngna chë pueblöye tmojána saná jobuámiñama. Chora, canýe shembása Samariocá, chë atëfjónoye tojánashjango, býyeshe jauafcama; as Jesús tbojaniana: —Býyeshtema šmabuatsëtá ca.

⁹ Y chë shembása tbojanjá: —Aca canýe judío condmëna y atšna canýe samaritaná. ¿Ntšamo cojtsobena atšë býyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtšná.)

¹⁰ Chora Jesús tbojanjá: —Aca mo cojtsetátšëmbo nýe ntšamo Bëngbe Bëtsá aca jatšetayama yojtsebošcá, y nda chë býyeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšetaye ca.

¹¹ Y chë shembása tbojaniana: —Señor, tondaye quecátsbomna nýe mo ndayecnaca býyeshe jabuatsjuama, y chë atëfjóniñe corente tboca endmëna; y as, ¿ndayentšana cochjobenaye béjaye vida bomniye atšë juabuátšetayama? ¹² Bëngbe tempsca bëts taitá Jacob, quem atëfjóniñe bëngbiamá tojëftsanboshjona. Cachá, chabe básenga y chabe bayënga muentšana býyeshe tmojëftsanofšë; y ¿aca chabiamá más bëtsá comna ca? —chë shembása yojsichamo.

¹³ As Jesús tbojanjá: —Nyetscanga chë quem býyeshentšana tmojofšenga, chënga cachiñe echantëtëjuendaye. ¹⁴ Pero chë chanjuabuátšetaye býyeshentšana tojofšë chana ndocna te cachiñe quebochëtajuendaye. Cha chanjuabuátšetaye býyeshna, chábeñe echántsemna mo cánýentšë béjaytema obocaniñcá, chë nyetsca tescama yomna tšabe vida jtsebomnama ca —cha tbojaniana.

¹⁵ Chora chë shembása tbojaniana: —Señor, chca býyeshe šmabuatsëtá, as atšë ndoñe cachiñe chašondetsajuendama, ni býyeshe jauafcama moye jtsaboyama ndoñe chašondëtsemnama ca.

¹⁶ As Jesús tbojaniana: —Motsa acbe boyá jachembuama y cochjésabo ca.

¹⁷ Chora chë shembása tbojanjá: —Boyá ndoñe quetsátsbomna ca.

As Jesús tbojaniana: —Tšabá tcjayana boyá ndoñe condbomna ca. ¹⁸ Er, aca shachna boyanga conjánabamna, y chë mora contsebomnana, acbe boyá ndoñe quenátsmëna. Ntšamo tconjayancá ndegombre entsemna ca.

¹⁹ Chë shembása chca tojanuena ora, Jesúsbioye tbojaniana: —Señor, mora atšë sëntsetátšëmbo, aca canýa Bëngbe Bëtsabe juabna oyebuambnaya comnama. ²⁰ Bëngbe tempsca bëts taitanga quem tjoca Bëngbe

Bëtsá monjánadorana; pero tsëngaftanga, judiënga šmondbétsichamo, bënga Bëngbe Bëtsá jadóramna, Jerusalemoca chë luare canmëna ca.

²¹ Chora Jesús tbojanjuá: —Shembása, šmoyeuná; canÿe tempo echanjóshjango y chora tsëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalemoye jana. ²² Tsëngaftanga samaritanënga ndoñe quešmatábuatma nda šmetsadoránama; pero bënga aíñe fsënduábuatma, er chë atsebacayá judiënguentsana endabó. ²³ Pero ora entsoshjajuana, ya chë tempo tocjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnëngaca chábioye mochántadorana. Er chë Taitá entseboše chë chábioye adórayënga chca chamotsamama. ²⁴ Bëngbe Bëtsá, Espiritu endmëna; y chë chábioye adórayënga entsamna, chë Uámana Espíritbeyeca y ndegombre juabnëngaca cha jtsadoránana ca —Jesús tbojaniana.

²⁵ Chora chë shembása tbojaniana: —Atše sëndétatsëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojáshjango orna, cha nyetsca soyëngama cašochjabuayená ca.

²⁶ As Jesús tbojaniana: —Atše, chë ácaftaca entsoyebuambná cha, cha entsemna ca.

²⁷ Chëntscuana, Jesusbe uatsjëndayënga tmojtanashjajna, y tmojt-sanëuatjaná, Jesús canÿe shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

²⁸ Chorna, chë shembása chabe uafcanëja tojésanboshjona, y chë puebloye betscó tojtaná. Chocna, entsanga tojanëyana: ²⁹ “Mabënga canÿe boyabása jinÿama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojsichamo.

³⁰ As chë entsanga chë pueblócana tmojánbocana y Jesús yojtsemnoye tmojánashjajna. ³¹ Chca yojsopasánëntscuana, chë uatsjëndayënga Jesúsbioye imojtseimpadana: —Buatëmbayá, batšatema mose ca.

³² Pero cha tojanëyana: —Atše canÿe soye jasama sëntsebmna. Tsëngaftanga chë soyama ndoñe quešmátstatsëmbo ca.

³³ Chora chë uatsjëndayënga tmojanontsé entjanayana: —¿Nderado nda jasama chabiana tojiyëbo ca?

³⁴ Y Jesús tojanëyana: —Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna. ³⁵ Tsëngaftanga šmondbétsichamo: “Cabá canta ishinÿe entsashbena jaja saná chaotsebínÿnama ca”; pero atše cbëyana: Minÿënga tša entsanga moye montsabëbana; chënga montsemna mo jajañe saná játbana tojtseprontancá. ³⁶ Tsëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanánana jtsësháchiñana. Cachcá, tsëngaftanga cmontsamna atšbiana entsanga júbuajana, chë nyetsca tescama yomna tšabe vida chamotsebmnama. Chë jaja saná átbanaye ora, jenënga y chë atbanayënga cánÿiñe oyejuayënga jtsemnana. Cachcá, chë entsanga átšbeñe chamojtsošbuaché ora, nyetscanga, chë atšbiana obuájajanënga y chë atšbiana trabájayëngnaca cánÿiñe oyejuayënga mochántsemna.

³⁷ Quem entsangbe ichámuana, canÿe ndegombre soye endmëna: “Chë jená canÿa jtsemnana, y atbanayana inÿa ca.” ³⁸ Atše tsëngaftanga cbonjichamó canÿe soye játbana, y tsëngaftanga tondaye chešmatma chca chaotsebínÿnama. Inÿënga chiñe bëtscá tmonjëftsetrabája, y

tšəngaftangna, chəngbe trabajənguentšana šmojologaŋe ca —Jesús tojánayana.

³⁹ Bətsca entšanga, Samarioca pueblentšənga Jesúsbeñe imojtsanošbuaché, ntšamo chə shembása tojanéyanama. Chə shembása tojanéyana: “Lempe ntšamo atše tijamca cha šonjauyana ca.”

⁴⁰ As chə samaritanənga, Jesús yojtsemnentše tmojánashjajna ora, tmojanimpadá chəngaftaca chaotsoquedáñama. Y as Jesús, uta te chentše tbojəftsanjétana. ⁴¹ Y más entšanga, cach ntšamo Jesús yojtsanətsətsnacá tmonjanuena ora, chábeñe imojtsanošbuaché.

⁴² Y chə shembása chə entšanga tmojaniyana: “Mora cocayé fsəntsošbuaché, ndoñe nýe ntšamo aca šcojáuyanama, sinó cach bənga chábioye oído fsənjabuajóyeca; y mora fsəntsetatšəmo ndegombre cha yojtsemna chə quem luare entšangbiana Atsebacayá ca.”

Jesús, canýe mandado uajabuachanabe básabioye tbojanshná

⁴³ Uta te chentšana, Jesús Samariocana tojáisanbocna y Galileoye tojataná. ⁴⁴ Cach Jesús mēntšá tojánayana: “Canýa Bəngbe Bətsabe juabna oyeuambnayá, cachabe luarentše oyenənga ndoñe bətsá ntjabeməngana ca.” ⁴⁵ Galileoca oyenənga Jerusalemoye tmojána, y tmojáninýe nýetsca bəts soyənga ntšamo Jesús Bashco fiesta ora choca tojanmca. Chíyeca, Jesús Galileoye tojtanashjango ora, chənga tšabá tmojtanfja.

⁴⁶ Galileocna, Jesús cachiñe Caná puebləye tojəsanashjango, chə bəjayeca vínoye cha tojánbementše. Choca yojtsemna canýe mandadbe uajabuachaná, y chabe uaquiñana Capernaum puebləca šocá yojtsejájona. ⁴⁷ Jesús Judeocana Galileoye tojánashjanguama, chə uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca. ⁴⁸ As Jesús tbojaniyana: —Tšəngaftanga, Bəngbe Bətsabe obenana jinýanýiyama bəts soyənga atše jamama ndoñe šmonjinýəse, átšbeñe ndocna te ntsošbuáchiyana ca.

⁴⁹ Chora, chə mandadbe uajabuachaná Jesúsbioye tbojaniyana: —Taita, betesco mabo, atšbe uaquiñá cabá ndóbana ora ca.

⁵⁰ As Jesús tbojaniyana: —Acbe yebnoye motsatá. Acbe uaquiñá ainá endətsomñe ca.

Chə boyabásana tojanošbuaché ntšamo Jesús tbojaniyancá y tojtaná. ⁵¹ Cha yojtsataye orna, chabe oservénənga tmojánbocana jajəbenguama y tmojaniyana: —Acbe uaquiñá tšabá entsatsməna ca.

⁵² As cha tojanatjá: —¿Ntseco orscana tbenjatəcya ca?

Y chənga tmojanjúá: —Tonjopasá yəfse, mošenana orscana chə calentora tbonjábosana ca.

⁵³ Chora chə taitá tojanenojuabó, cachca ora Jesús tbojaniyana: “Acbe uaquiñá ainá endətsomñe ca”. Y cha y nýetscanga chabe yebnentše oyenənga Jesúsbeñe imojtsanošbuaché.

⁵⁴ Ntšamo Jesús chora, chə uajabuachanabe uaquiñabiama tojanmca, Judeocana Galileoye yojtsataye orna, yojamna chabe utama chca bəts soye jamama, Bəngbe Bətsabe obenana jinýanýiyama, Galilea luaroca.

5

Jesús canýe jama ndobenábioye tbojanshná

¹ Baseftayté chentšana, chë judiënga canÿe oboyejuaye te imojtsebomna ora, Jesús Jerusalenoye tojána. ² Choca, chë Oveshëngbe amashjuana ca uabáinentşe yojamna canÿe binche uafjájónaye, entşangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna. ³ Chiñna ba şoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. ⁴ (Nderado nderado, Bëngbe Bëtsábioca canÿe ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe şocanama tşabá jtsatsmënana.) ⁵ Chë şoquënguiñe canÿe boyabása inamna, unga bnëtsana y posufta uatama jama ndobená. ⁶ Jesús chë jajonábioye tbojáninÿe ora y ba uatama chca yojamnama tojántatşëmbona ora, tbojantjá: —¿Quecojtseboşe tşabá jtsatsmënana ca?

⁷ Y chë şocá tbojanjuá: —Taita, ndocná quetsátsbomna nda chaşuájabuache béjayoye jamashënguama, chë béjaye tojtsobonjná ora. Y atşe béjayoye jamashënguama stseboşe ora, inÿa atşbe natsana jtsamashënguana ca.

⁸ Y Jesús tbojaniana: —Matëtsbaná, acbe tjuashe mesocñe y matontsé jóyenana ca.

⁹ Cach ora chë boyabása tşabá yojsatsmëna, chabe tjuashe tojésanocñe y tojanontsé jtsanana. Chca tojanopasá ora, chë ochnayté inamna. ¹⁰ Chíyeca, chë tbojanshnábioye chë judiënga tmojaniana: —Mëntena ochnayté. Mënté ndoñe quenátopodena aca tjuashe jtsecutsnana ca.

¹¹ Y chë boyabása tojanëyana: —Chë şonjashná cha mëntşá şonjauyana: “Acbe tjuashe mesocñe y montsé jóyenana ca”.

¹² As chënga tmojantjá: —¿Nda yojtsemna chë “acbe tjuashe mesocñe y montsé jóyenana ca” tcmojauyaná ca?

¹³ Pero chë shnaná ndoñe yontsetátşëmbo nda tbojanshnama. Chocna bëtscá entşanga imojtsemna; chcasna, Jesús chëngbe tsëntsajana tojanenatjëmba.

¹⁴ Chentšana, Jesús Bëngbe Bëtsabe bëts yebnentşe chë boyabásabioye tbojáninÿena y tbojaniana: —Mouena; mora aca ya ndoñe şocá quecátsmëna; bacna soyënga ndoñe cachiñe cattsama. Aíñese, acbiamna puerte mal echanjopása ca.

¹⁵ Chë boyabása tojtsanoñe y chë judiënga tojanëyana: —Chë şonjashná cha Jesús entsemna ca.

¹⁶ Chë causa, chë judiënga imojtsenguaye ntşamo Jesús ndayánaca jabórlana, cha ochnayté chë soyënga tojanmama. ¹⁷ Pero Jesús tojanëyana: “Atşbe Taitá nyets tempo tşabe soyënga endbëtsama; cachcá, átşnaca tşabe soyënga sëntsama ca.”

¹⁸ Jesús tojanma ntşamo ochnayté ndoñe yonjanapodencá, y Bëngbe Bëtsabiamna tojánayana “Atşbe Taitá ca”. Mëntşá Jesús yojsanobiamná cach Bëngbe Bëtsacá. Chama, chë judiënga más imojtseboşe Jesús jóbama.

Bëngbe Bëtsabe Uaquiñabe obenana

¹⁹ Chentšana Jesús tojanëyana: “Ndegombre şcuayana: Bëngbe Bëtsabe Uaquiñá, nÿe cachabe cuenta tondaye quenátobena jamana. Cha jtsonÿayana ntşamo chabe Taitá tojtsamcá. Ntşamo chë Taitá tojtsamcá, chë Uaquiñánaca jtsamana. ²⁰ Er Bëngbe Taitá chabe Uaquiñábioye bondbobonshana, y lempe ntşamo cha tojtsamcá chábioye bondinÿinÿná;

y más bëts soyënga bochanjinÿinÿiye, chë soyëngama tšëngaftanga chašmenjanama. ²¹ Chë Taitá endama obanënga chámuatayenama y tšabe vida chamotsebomnama; cachcá, chë Uaquiñá entsama tšabe vida chamotsebomnama, ndëmuanÿenga cha tojtsebošcá. ²² Chë Taitá ndocnabiamá jatichámuana tšabá o ndoñe tšabá yontsama ca. Chabe Uaquiñábioye nÿets obenana tbonjatšetá nÿetscangbiamá jayanama tšabá o ndoñe tšabá tmontsamama. ²³ Chca, chënga chamuinÿinÿé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nÿetscanga mondbetsinÿinÿinaycá. Nda chë Uaquiñábioye ndoñe más uamaná tbontsebiamná, cach ndoñe más uamana ntsebiamnayana chë Taitábioye, nda chë Uaquiñá tbojichmóbioye.

²⁴ “Ndegombre šcuayana: Nda ntšamo atše sëntsichamcá šojoyeuná, y chë muentše šonjichmó chábeñe tojtsošbuaché, chë nÿetsca tescama yomna tšabe vida jtsebomnana. Chabiamá chë Uaquiñá ndoñe queochátayana castiganá chaotsemna ca. Chca, Bëngbe Bëtsabiamá cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nÿetsca tescama castiganá queochátsmëna. Y aíñe, chë nÿetsca tescama yomna tšabe vida echántsebomna.

²⁵ “Ndegombre šcuayana: Chë jobuáchama te ya tojjobuache. Chë te, chë Bëngbe Bëtsabiamá mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna. ²⁶ Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama. ²⁷ Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábioye obenana tbojatšetá nÿetscangbiamá jayanama tšabá o ndoñe tšabá tmontsamama. ²⁸ Chama ndoñe matenjanana. Er canÿe tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésevocana. ²⁹ Tšabe soyënga tmojëftsemënga, obanënguentšana mochántayena, chë nÿetsca tescama yomna tšabe vida jtsebomnama. Pero bacna soyënga tmojëftsemëngna obanënguentšana mochántayena nÿetsca tescama castigánënga jtsemnama ca” —Jesús tojanëyana.

Jesús, ndegombre Bëngbe Bëtsabe ichmoná inamana

³⁰ Mëntšánaca Jesús cachatbiamá tojánayana: “Nÿe átsbeyeca tondaye quetsátobena jamama. Chë Taitá šontsemánda ntšamo nÿetscangbiamá jayanama tšabá o ndoñe tšabá tmontsamama. Nÿe chca atše sëntsobena chë soye jamama. Ndoñe quetsátsoše jamana nÿe ntšamo cach atše stsebošcá; pero sempre sëndbétseboše jamama, ntšamo Taitá, chë šonjichmó cha tojtsebošcá. Chíyeca atše nÿetscangbiamá sëntsichamo tšabá o ndoñe tšabá tmontsamama; y ntšamo nÿetscangbiamá sëntsichamcá, ndegombre endmëna.

³¹ “Ntšamo cach atšbiamá tijayanama, ndegombre entsemna ca stsichámëse, ntšamo stsichamcá, nÿetscangbiamá tondaye ntsámanana. ³² Pero inÿa entsemna. Cha endëtatšëmbo y entsichamo ntšamo ndegombre atšbiamá yomncá; y sëntsetatšëmbo ntšamo cha atšbiamá yojtsichamcá, nÿetscangbiamá aíñe yojtsámanama. ³³ Tšëngaftanga ínÿenga šmojanichamó atšbiamá Juan jatjayama; y ntšamo cha tcmojauyancá

ndegombre endmëna. ³⁴ Masque chë soyënga cha tcmojáuyana, ndoñe quešnatájaboto ndocna entšá atšbiana chaotsichamo ‘cha aínë chca endmëna ca’. Atše quem soyënga séntsichamo ndayá nýe tšëngaftanga atsebácanënga chašmotsemnana. ³⁵ Juan enjamna mo canýe uajuinýanësha tojtsajuinýana y tojtsabuashinýinýancá. Tšëngaftanga chabe buashinýinýanana šmonjinýe, y šmonjábošena rato cháftaca oyejuayënga jtsemnana. ³⁶ Pero chë atše sënjama soyëngacna más entsinýinýena ntšamo atšbiana ndegombre yomncá, chë ntšamo Juan atšbiana tojánayanama. Ndayá atšbe Taitá šojabonýé jamama, ntšamo atše séntsamcá, entsinýinýná ndegombre chë Taitá šojichmoma. ³⁷ Atšbe Taitá, chë šojichmó chánaca entsichamo ntšamo atšbiana ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinýe. ³⁸ Pero tšëngaftangbe ainanoye chabe palabra ndoñe tonjómarshëngo, cha tbojichmóbeñe tšëngaftanga ndoñe quešmatošbuaché causa. ³⁹ Tšëngaftanga, Bëngbe Bëtsabe palabra tša jtsatsjëndayana, er šmondobátmana, chca jtsamëse chë nýetsca tescama yomna tšabe vida jónýenama. Y Bëngbe Bëtsabe uabemana palabrénguiñe atšbiana endayana ntšamo ndegombre yomncá; ⁴⁰ pero masque chca, tšëngaftanga ndoñe quešmátšboše atše jtséstonana, y chca, tšabe vida jtsebomnana.

⁴¹ “Atše ndoñe quetsátšboše entsanga yapa tšabá atšbiana chamotsichámuama. ⁴² Y inýe soye, atše puerte cbondëbuatma, y sëndëtatšëmbo tšëngaftanga Bëngbe Bëtsá ndoñe šmondobonshánama. ⁴³ Atšna atšbe Taitabe cuenta sënjabo, y tšëngaftanga ndoñe quešmátšboše atše jofjana. Pero inýa, cachabe cuenta tojabábioye cocayé aínë šmatjofja. ⁴⁴ Tšëngaftanga corente jésebošana, ínýenga tšëngaftangbiana tšabá chamotsichámuama, y ínýengbiana tšabá jtsichámuama; pero ndoñe ntsebošana chë nýe canýe Bëngbe Bëtsá tšëngaftangbiana cachcá chaotsichámuama. Chca šmojtsamëse, ¿ntšamo šmochtsobena Bëngbe Bëtsabeñe jtšošbuáchiyana? ⁴⁵ Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnana, chë ntšamo Moisesbe leyíñe endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna. ⁴⁶ Tšëngaftanga, chë Moisés tojéftsanabema soyíñe šmojtšošbuachese, átšbeñnaca šmattšošbuáchiye, er cha atšbiana tojanábema. ⁴⁷ Pero chë tojanábema soyíñe tšëngaftanga ndoñe šmontšošbuachesna, ¿ntšamo smochjobenaye chë atše séntsichamo soyënguiñe jtšošbuáchiyana ca?” —Jesús tojanéyana.

6

Jesús shachna uaranga boyabásenga saná tojanacaredadó
(Mt 14.13-21; Mc 6.30-44; Lc 9.10-17)

¹ Chë soyënga tojanopasá chentšana, Jesús chabe uatsjëndayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina. ² Ba entsanga imojtséstona, er chënga tmojáninýe cha bëtš soyënga jtsamana, šoquënga jtsashnayëse. ³ As Jesús tjoye tojántsua, y chocha chabe uatsjëndayëngaftaca tojanótbema. ⁴ Ya judiëngbe canýe fiesta, chë Bashco fiesta, yojétsobeco.

⁵ Jesús tojanótbema ora, tojanontješé y tojánanye ba entšanga chábioye imojtsebéconaye. As Felípbioye tbojaniana: —¿Ndayentše saná cuanjabuámiye nýetsca quem entšanga chamosama ca?

⁶ Jesús chca tbojaniana, ana Felípbioye jinýama ntšamo cha tabuanjojuama; er cach Jesús tšabá inatátsëmbo ndayá jamama. ⁷ Y Felipe tbojanjuá: —Ni mo uta patse denario crocenánaca nanjopódia tanděše jabuámiyama, nýetsca entšanga nýe mo batšatémnaca chamuétšesama ca.

⁸ Chorna, Jesusbe canýe uatsjendayá, Andrés ca uabainá, Simón Pédrêbe catšata, Jesúsbioye tbojaniana: ⁹ —Muentše entsemna canýe básetema y cha shachna cebada tanděše y uta beónata entsebomna. Pero, ¿ndayase nýe nýetsatema chěfta entšangbiana ca?

¹⁰ As Jesús tojánayana: —Entšanga méyana chamotbiana ca.

Becá shácuana chě luarife inamna, y nýetsca entšanga chiñe tmojanoshěntsjatbiana. Chě entšanguentše shachna uaranga boyabásenga imojtsemna. ¹¹ Chora Jesús, chě tanděše chabe cucuatšife tojanca, y Běngbe Bětsábioye chě tanděšama tbojtanchuá; y chabe uatsjéndayěnga tojanějatá, y chě uatsjéndayěngna nýetsca entšanga imojtsetbiámaněnga tmojanatšatá. Cachcá Jesús chě beónaca tojanma, y ntšamo entšanga imoanbošcá tmojanatšatá. ¹² Nýetscanga tmojanse y tmojtanošachá ora, Jesús chabe uatsjéndayěnga tojaněyana: —Chě ojamnětéměnga šmochtsatbananga, tondaye nýe cachcá ntjěftsonýayama ca.

¹³ As chěnga tmojanatbaná, y chě tmojanse shachna cebada tanděsentšana tojanójaměteměngaca, bnětsana uta sbarěcua tmojanajutjé. ¹⁴ Chě entšanga quem běts soye Jesús jamama tmojáninýe ora tmojánayana: “Ndegombre quem boyabása, chě quem luaroye jabama Běngbe Bětsabe juabna jabóyebuambayama cha entsemna ca.”

¹⁵ Jesús yojtsetátšëmbo entšanga chěngbe rey jabemama imojtsebošama. Chýyeca cach tjoye tojtsaisanoñe canýa jtsomñama.

Jesús bėjaye juatsbuacá yojtsaye
(Mt 14.22-27; Mc 6.45-52)

¹⁶ Tojanibétata ora, Jesusbe uatsjéndayěnga chě uafjajónayoye tmojantšmá; ¹⁷ barquěshañe tmojtanojajé, y tmojanontšé jenashbuachénguana, chca, Capernaumoca jenbocnama. Ya ibeta yojtsemna, y Jesús cabá ndoñe chěngbioye ntashjanguana. ¹⁸ Chca imojtsenashbuachnějuana orna, chě bėjayife jabuache binýia tojanóshjango y běts olěshěnga chě barquěshoye yojtsójantšetaye. ¹⁹ Shachna o chněnguana kilómetro chěnga tmojána ora, tmojáninýe Jesús chěngbioye yojtsebéconaye, bėjaye juatsbuacá yojtsaye. Chěnga chca tmojáninýe ora tša tmojanocochauatjaná, ²⁰ pero Jesús tojaněyana: “Atše sěndměna; ndoñe matauatjěngana ca.”

²¹ Chora chě uatsjéndayěnga oyejuayěnga imojtseboše Jesús chě barquěshoye joffjana, y ndoñe bēnēntscose ya chě imojtsaye luaroye tmojánashjajna.

Entšanga Jesús tmojánanguango

²² Yěfsana, nýetsca entšanga, chě uafjajónaye chenguánoica tmojanoquedanga tmojáninýe, chě inýe yěfsana chě nýe canýe barquěsha yojuamněshañe Jesusbe uatsjéndayěnga tmojtsanoñama, y Jesús chěngaftaca ndoñe tonjánama. ²³ Pero chěntscuana, Tiberias pueblentšana inýe barquěshagá tojanáshjajna canýe luarentše, chě

Bëngbe Utabná Jesús chabe Taitábioye tbojtanchuá chentšana, entšanga saná tmojanse luare béconana. ²⁴ Asna, ni Jesús ni chabe uatsjéundayënga chentše ndoñe montsemnama chë entšanga tmojáninÿe ora, chë barquëshangañe tmojtanenojayé y Capernaumoye tmojána Jesús jetsenguanguama.

Jesús, chë nÿetsca tescama yomna tšabe vida jtsebomnama tandëse

²⁵ Chë uafjajónaye chenguánoye tmojánashajna ora, Jesús tmojáninÿena y mëntšá tmojantjá: —¿Buatëmbayá, ntseco ora muentše tcojášjango ca?

²⁶ Y Jesús tojanëyana: —Ndegombre cbëyana, tšëngaftanga ndoñe atše quešmatsnguá, chë bëts soyënga tijamama, sinó nÿe chë jtoshachaye nÿetsá tandëse šmojasama. ²⁷ Ndoñe matenángmenana chë nÿe ndoñe bën y jopochócana sanama; chë ndmopochócaye saná, chë nÿetsca tescama yomna tšabe vida jtsebomnama saná šmochjánguango. Chë saná, Bëngbe Bëtsá Entšá tbojanbemá cmochanjátšataye, er Bëngbe Bëtsá chë Taitá tonjinÿanÿe, tšabe soyëngaca, cha chábioye tbojuábuayanama ca —tojánayana.

²⁸ Chora chë entšanga tmojantjá: —¿Ndayá fchjama ntšamo Bëngbe Bëtsá yojtsebošcá chaotsemnama ca?

²⁹ Chca tmojantjá ora, Jesús tojanëyana: —Chë Taitá entseboše tšëngaftanga chabe ichmonábeñe chašmotsošbuáchema ca.

³⁰ Chora chënga tmojanियana: —¿Ndaye tšabe soye cochjama acbe obenana bënga jinÿanÿiyama ca? Chë soye chaftsjinÿese, ábeñe fchantsošbuáchiye. ¿Bëngbiamá taicochjama ca? ³¹ Bëngbe tempsca bëts taitanga entšanga ndoyenoca maná ca uabaina saná tmojanse. Bëngbe Bëtsabe uabemana palabrenguiñe mëntšá endayana: “Cha celoca tandëse tonjanatšatá chamosama ca” —chënga tmojánayana.

³² Chora Jesús tojanëyana: —Ndegombre cbëyana, Moisés chënga ndoñe chë celoca tandëse tonjanatšatá; Bëngbe Bëtsá Bëngbe Taitá chëngbioye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatsatná. ³³ Er Bëngbe Bëtsábíocana tandëse entsemma chë celocana tojastjanguá; y cha quem luare entšangbiamá entsama chë nÿetsca tescama yomna tšabe vida chamotsebomnama ca —cha tojanëyana.

³⁴ Chora chënga tmojanimpadá: —Taita, chë tandëse sempre šcochtsatšatnaye ca.

³⁵ Y Jesús tojanëjua: —Atše sëndmëna entšanga chë nÿetsca tescama yomna tšabe vida jtsebomnama tandëse. Nda atše chašojtsëstona, sempre oyejuayá echanjëftsemna y Bëngbe Bëtsabe soyënga nÿets tempo echanjesóbomñe, mo nda nÿets tempo saná totsobomñcá, y ndocna te tbontsishëntsancá. ³⁶ Pero ntšamo ya tcbonjauyancá, tšëngaftanga atše šmonjinÿe y cabá ndoñe átšbeñe quešmatošbuaché. ³⁷ Nda atšbe Taitá atšbiamá tbojabocacá, cha atše šochantsëstona; y nda átšbioye šojtsëstona, átšbentšana quichtëtábocna. ³⁸ Er atšna celocana sënjabo chë šojichmó cha ntšamo yojtsebošcá jamama, y ndoñe nÿe ntšamo atše stsebošcá. ³⁹ Y chë šojichmó cha entseboše, ni mo canÿa chë atšbiamá tojabacacá chentšana, atše chailesenciá pochocaná chaotsemnama; y quem luare jopochócama tena, nÿetscanga atšbiamá tojabacangbiamá chámuatayenama atše chaimama. ⁴⁰ Er atšbe Taitá entseboše, nda chabe Uaquiñábioye tbojinÿe y chábeñe tojtsošbuaché, chë nÿetsca tescama

yomna tšabe vida chaotsebojna, y quem luare jopochócama tena, cha cháuatayenama atše chaimama ca —Jesús tojanéyana.

⁴¹ “Atše séntsemna chë celocana tojóshjango tandëse ca” Jesús tojanéyana causa, chë judiënga tmojanontsé chabiana podessa ichámuana.

⁴² Chënga mëntśá imojtsichamo: —¿Mua ndoñe Jesús yondmëna, chë Josebe uaquiñá? Chabe bëtsétsata bënga tmośábuatmñe. ¿Ntśamo cha mora yochjátichamo celocana tojástjango ca?

⁴³ As Jesús tojanéyana: —Atśbiana ndoñe podessa matichámuana.

⁴⁴ Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuáchëse; y atše chanjama cha cháuatayenama quem luare jopochócama te. ⁴⁵ Chë tempsquënga Bëngbe Bëtsabe juabna oyebuambnayënga mëntśá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atśbe Taitábioye tbojoyeuná, y ntśamo chë Taitá tbojabuatëmbacá tojuatsjinýe, cha atše šochanjuasto.

⁴⁶ “Ndocná atśbe Taitá tbonjinýe. Nýe chë Bëngbe Bëtsábiocana tojabá aiñe. ⁴⁷ Ndegombre šcuayana: Nda átśbeñe tojtsošbuaché, chë nyetsca tescama yomna tšabe vida echántsebojna. ⁴⁸ Atše sëndmëna entśanga chë nyetsca tescama yomna tšabe vida chamotsebojnama tandëse. ⁴⁹ Masque tšëngaftangbe bëts taitanga, entśanga ndoyenoca chë maná ca uabaina saná tmojanse, pronto tmojanóbana. ⁵⁰ Pero atśe séntsoyebuambná ndayá chë celocana tojóshjango tandëšama. Nda chë tandëse tojase, ndoñe queochatóbana. ⁵¹ Atše séntsemna entśanga chë nyetsca tescama yomna tšabe vida jtsebojnama tandëse, chë celocana tojóshjanguëse. Nda quem tandëse tojase, nyetsca tescama nýe ainá echanjesomñe. Chë chanjátataye tandëšna, cach atśbe cuerpo entsemna. Chca chanjama quem luare entśanga chë nyetsca tescama yomna tšabe vida chamotsebojnama ca” —Jesús tojánayana.

⁵² Chora chë judiënga tmojanontsé enatsëtsnayana: —¿Ntśamo cha yochjobenaye cachabe cuerpo jatśatayana bënga jasama ca?

⁵³ As Jesús tojanéyana: —Ndegombre šcuayana: Tšëngaftanga Bëngbe Bëtsá Entśá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbojna. ⁵⁴ Nda atśbe cuerpo tojase y atśbe buiñe tojofśé, chë nyetsca tescama yomna tšabe vida echántsebojna, y quem luare jopochócama te atśe chanjama cha cháuatayenama. ⁵⁵ Atśbe cuerpo ndegombre saná endmëna, y atśbe buiñe ndegombre ofšëšnaye. ⁵⁶ Nda atśbe cuerpo tojase y atśbe buiñe tojofśé, átšeftaca cányiñe mo cányacá echántsemna, y átśnaca cháftaca. ⁵⁷ Atśbe Taitá, chë šojichmó cha, vida endbojna, y atśe chábeyeca vida sëndbojna; cachcá, nda atśbe cuerpo tojase, chana átśbeyeca vida jtsebojnana. ⁵⁸ Chë ndaye soyama atśe séntsoyebuambná, atśbe cuerpo y atśbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátmëna. Nda quem tandëse tojase, nýe nyets tempo vida echanjesóbomñe ca — Jesús tojánayana.

⁵⁹ Chë soyëngna Jesús tonjanabuatambá Capernaum pueblentše, chë judiëngbe enefjuana yebnentše.

Chë nyetsca tescama yomna tšabe vida jtsebojnana palabrënga

⁶⁰ Chca tmojanuena ora, banga Jesusbe ústonënga imojtsichamo: — Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

⁶¹ Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontséuënana ca? ⁶² Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsuama šmojinÿëse, ¿ntšamo šmattsejuabnaye? ⁶³ Bëngbe Bëtsabe Espíritu entsama entšanga chë tšabe vida chamotsebmnama. Chë cuerpo ndoñe uámana soye quenátsmëna; chë tcbonjúyana soyënguiñe entsemna chë Uámana Espíritbe uajabuáchenana y chë tšabe vida. ⁶⁴ Pero masque chca entsemna, tšëngaftangbentšana banga átsbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entšanga jábuayenama Jesús tojanbojatsé orscana, cha inatátšëmbo ndëmuanyënga chábeñe ndoñe mochanjanošbuáchiye, y nda chë uayayëngbe cucuatšíñe yochjéftsayentšbashejuanana. ⁶⁵ Y Jesús yojtëtóntša oyebuambnayana: —Chíyeca, atše tšëngaftanga tcbonjúyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešchatasto ca”.

⁶⁶ Chë causa, chentšana, ba chabe ústonënga cachcá tmojesanonÿá, y cháftaca ya ndoñe imontsajna. ⁶⁷ Chora Jesús, chë bnëtsana uta uatsjëndayënga tojanëyana: —¿Y tšëngaftángnaca, jtsoñama y atše jéseboshjonama šmojtseboše ca?

⁶⁸ Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nÿe aca šcontsëtsëtsná chë nÿetsca tescama yomna tšabe vida jtsebmnama palabrënga. ⁶⁹ Acheñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

⁷⁰ Chora Jesús tojanëyana: —Atše tcbonjabacacá, chë bnëtsana útata; pero canÿa tšëngaftanguentšana, mo Satanasbe canÿe trabajayacá entsemna ca.

⁷¹ Judas Iscariote, chë Simonbe uaquiñabiama chca Jesús tojánayana. Er chana masque canÿa chabe bnëtsana uta uatsjëndayënguentsá inamna, Jesús uayayëngbe cucuatšíñe yochjáftsayentšbashejuana.

7

Jesube catšátanga chábeñe ndoñe montsanošbuaché

¹ Chë soyënguentsana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama. ² Chora, judiëngbe canÿe bëts fiesta semana yojtsobeco. Quem fiestënguentscuana, chë judiënga imojanamana tambënguiñe jtšiyenana. ³ As chora Jesusbe catšátanga tmojanianana: —Muentše ndoñe catjoquéda; Judeoye motsa, choca cond-bomna ústonënga, ntšamo contsamcá chócnaca chaminÿama. ⁴ Er nda tojtseboše chamotsábuatmama, chabe soyënga ndoñe iytëcana ntsamana. Aca bëts soyënga Bëngbe Bëtsabe obenánaca contsamëna, motsa y nÿetscangbe delante chca cochjama ca —chënga tmojanianana.

⁵ Er ni mo cach Jesusbe catšátanga chábeñe ndoñe montsanošbuaché. Chíyeca chënga chca tmojanianana.

6 Chora Jesús tojanējua: —Atšbe ora cabá ndoñe quentóshjango, pero tšëngaftangbiana mocna órnaca tšabá endëtsomñe. 7 Chë nÿe quem luarama enójuabnaye entšanga ndoñe quemátobena tšëngaftanga jtsëbuayënjana, pero átsbioyna aifne, er atše puerte tšabá sëntsinÿanÿná ntšamo chënga imojtsamcá ndoñe tšabá yontsemnana. 8 Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

9 Jesús chë soyënga tojanējyana y cach Galileoca tojtsanoquedañe.

Chë tambënguiñe jtsiyenama fiesta

10 Chabe catšátanga chë fiestoye tmojána chentšana, Jesúsna tojána, masque ndoñe entšángbeñe, sinó mo iytëcana cuenta. 11 Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

12 Entšángbeñe ba soyënga chabiana iytëcana imojtsichamo. Inÿenga chabiana imojtsichamo: “Cha tšabia endmëna ca”; pero inÿengna: “Cha entšanga entsáingña ca”.

13 Pero ndocná Jesusbiana becá añémoca yontsoyebuambná, chë judiëngbe amëndayëngbiana imojtsauatja causa.

14 Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontsé jabuátambana. 15 Chentše chë judiënga, ntšamo Jesús tojanabuatambacá tmojanuena ora, ojnánanënga imojtsichamo: —Bëtscá ntjuatsjinÿcá, ¿ntšamo nÿetsá nantsetátšëmbo ca?

16 As Jesús tojanējua: —Atšbe buatëmbayana ndoñe nÿe átsbentšana quenatóbocana, ndayá chë šonjichmó chárentšana. 17 Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábiocana yóbocanama o nÿe átsbentšana. 18 Nda nÿe cachabe juábnaca tojtsoyebuambná, jtsebošana entšanga más bëtsá chamobemama; pero nda bëtscá tojtsama, chë tbojichmóbioye entšanga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

19 “Ndegombre, Moisés tšëngaftangbiana ley tojëftsanaboshjona. Pero masque chca, tšëngaftanguentšá ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

20 Chora entšanga tmojanjuá: —¿Ndegombre aca bacna bayëjbe juabna contsbamá! ¿Nda yojtseboše aca jóbama ca?

21 Chora Jesús tojanējyana: —Nÿetsca tšëngaftanga ojnánanënga atše šmontsonÿá, atše canÿe ochnayté canÿe entšá tijashnama. 22 Pero, Moisés tcmónjanamëndá bássetema base bobachtema chë más delicadentše jatëtsana, chaotsinÿnama (ndoñe nÿe Moisésbeyeca chca, sinó Moisesbiana más tempsca bëts taitanga chca jamama imojanamánayeca); y tšëngaftanga canÿe bássetema base bobachtema chë más delicadentše jatëtsana, masque chë te canÿe ochnayté totsomñëse. 23 Y mora, ntšamo Moisés tcmojëftsanamëndacá ndoñe cachcá ntjonÿayama, canÿe bássetema chca jatëtsana masque ochnayté; as, ¿ndáyeca atše šmojtsayaná, atše ochnayté canÿe entšabe nÿets cuerpo tijashnama? 24 Nÿe batsá jinÿëse, inÿengbiana ndoñe matichámëngana tšabá o ndoñe tšabá tmonjama ca. Ntšamo chë soyënga ndegombre bëtsemnana natsana lempe tšabá

jshétsetatšëmbëse, šmochjayana tšabá o ndoñe tšabá tmonjama ca — Jesús tojánayana.

Jesús tojánayana ndëmocana cha tojánabama

²⁵ Chora báseftanga Jerusalenoca oyenënga tmojanontsé ichámuana: — ¿Mua ndoñe yontsemna chë jóbama montsenguá cha ca? ²⁶ Masque ba entšangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca? ²⁷ Pero bënga mondétatšëmbo ndëmocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndëmocana cha yochjabama ca — chënga imojtsichamo.

²⁸ Chca tojanuena ora, Bëngbe Bëtsabe bëts yebnentše Jesús yojtsabuátambayëntscuana, cha jabuache tojánayana: — ¡Tšëngaftanga šmojtsejuabná atše ndegombre šmabuatma, y ndëmocana tijabama šmojtsetátšëmbo ca! Pero nÿe atšbe cuenta, ndoñe chiyátabo, ndayá canÿa šojichmóyeca, nda ntšamo ndegombre yomncá nÿetsca soyëngama endbétsoyebuambnaye; y tšëngaftanga cha ndoñe quešmatábuatma. ²⁹ Atšna aíñe cha sënduábuatma, er atše chábentšana sënjabo y cha quem luaroye šonjichmó ca — Jesús tojánayana.

³⁰ Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango. ³¹ Banga chentše Jesúsbeñe imojtsanošbuaché y tmojánayana: “Chë Uámana Uabuayaná chaojabo ora, ¿quem boyabásabiamá más tšabe soyënga yochjama ca?”

Chë fariseunga tmojánbošena Jesús jishachama

³² Chë fariseunga tmojántatšëmbona ntšamo entšanga Jesusbiamá iytëcana imojtsencuëntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëts yebnoca josticiënga, Jesús chamuishachama. ³³ Chora Jesús tojánayana: “Muentšana nÿe baseftayté tšëngaftangaftaca chanjëftsemna; chentšana, chë šojichmó chábioye chanjëtspadésa. ³⁴ Chora tšëngaftanga atše šmochántseguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjanguama ca.”

³⁵ Chora chë judiënga tmojanontsé entjanayana: “¿Ndëmoye quem boyabása yochjá, y bënga ndoñe mochanjobenaye jinÿenama ca? ¿Inÿe fshantsëngoye, judiënga tmojuashanëngbiye yochjá, y choca chë ndoñe judiënga yochjabuatambá? ³⁶ ¿Ntšamo yojtsentšáyana cha šonjauyancá, chë ‘tšëngaftanga atše šmochántseguaye, pero ndoñe quešmochátinÿena; y ndayentše chántsemnoca ndoñe quešmochatobenaye jashjanguama ca?’ — chënga imojtsichamo.

Béjayënga vida bomniye

³⁷ Chë fiesta jopochócama te yojamna chë más uámana te. Chë te, Jesús entšángbentše tojantsá y jabuache tojánayana: “¡Nda tbojtsajuendá, átšbioye chauabo y chaofsé! ³⁸ Ntšamo Bëngbe Bëtsabe uabemana palabrerënguiñe endayancá: ‘Nda átšbeñe tojtsošbuaché, cha echántsemna mo ndabe ainantšana vida bomna béjayënga tojtsobocancá.’ Chca echántsemna átšbeñe ošbuáchiyëngbiama ca” — cha tojánayana.

³⁹ Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe

tonjánabo, Jesús corente bëtsá yojamna cabá ndoñe tmonjaninÿinÿé causa.

Nÿetsca entsanga ndoñe cachcá Jesusbiana imontsejuabnaye

⁴⁰ Chca tmojanuena ora, ínÿenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe natsana jabamá ca.

⁴¹ Inÿenga imojtsichamo: —Ndegombre cha chë Cristo, chë Uámana Uabuayaná entsemna ca.

Peró ínÿengna: —Ndoñe, er chë Cristo Galileocana ndoñe queochátabo.

⁴² Ndegombre, Bëngbe Bëtsabe uabemana palabrenguiñe endayana, chë Cristna rey Davídbentsana entsá canmëna, y Belenocana caochjabo ca, cach pueblcana ndayentsá David inamna ca —chënga imojtsichamo.

⁴³ Y chca, ínÿengna Jesusbe pavor imojtsemna, y ínÿengna chabe contra.

⁴⁴ Inÿenga imojtseboşe Jesús jishachama, pero ndocná tbonjánishache.

Chë amëndayënga Jesúsbeñe ndoñe montsanoşbuaché

⁴⁵ Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtashajna ora, tmojanatjá: —¿Ndáyeca ndoñe Jesús şmonjuánatse ca?

⁴⁶ Chora chë josticiënga tmojanëjua: —Ndocná quenatoyebuambná ntşamo chë boyabása tonjoyebuambacá ca.

⁴⁷ Chora chë fariseunga tmojanëyana: —¿Tşëngaftángnaca şmojalesenciá cha chacmaingñema ca? ⁴⁸ ¿Nderado bëngbe amëndayënguentsá o bënga fariseunguentşá nÿe mo canÿa chábeñe tayojtsoşbuaché? ⁴⁹ Pero quem entsanga, ntşamo leyíñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

⁵⁰ Chora Nicodemo, canÿa fariseunguentşá, chë Jesúseftaca jencuéntama ibeta tojána cha, tojánayana: ⁵¹ —Ntşamo bëngbe leyíñe endayancá, bënga ndoñe quemuátobena jayanana canÿe entsá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatşëmbuama ca.

⁵² Chora chënga Nicodemo tmojanjúa: —¿Acnaca chábeñe cojtsoşbuaché y mo canÿe Galileoca entsacá cojtsejuabná ca? Bëngbe Bëtsabe uabemana palabrenguiñe cochjuatsjinÿe, y cochanjinÿe ni canÿa Bëngbe Bëtsabe juabna oyebuambnayá Galileocana yochjabo ca.

Chë shema boyábioye ínÿaftaca ingñayá

⁵³ Fariseunga y bachnangbe amëndayënga chë josticiëngbioye tmojanëcácanentsana, cada ona cachabe yebnoye imojtsatóñënga.

8

¹ Pero Jesusna canÿe tjoye, Olivos ca uabáinoye tojtsanoñe. ² Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nÿetsca entsanga tmojanobeconá jouenama, y Jesús tojanótbema y tojanontşé jabuátambama.

³ Chorna, báseftanga ley abuátambayënga y fariseunga tmonjánashajna, y canÿe shembása tmojanëshjango. Chana tmojáninÿena chabe boyábioye ínÿaftaca ibnetsoíngñañëntscuana; nÿetscangbe tsëntsaca tmojanatsá, ⁴ y Jesús tmojanianya: —Buatëmbayá, quemuá fsënjínÿena chabe boyábioye ínÿaftaca bondëtsoíngñañëntscuana. ⁵ Leyíñe Moisés şonjanamëndá

měntsá uamana shembásengna ndětsbėngaca jtsėbáyama. ¿Aca ntšamo catjayana ca?

⁶ Jesús chca tmojanियana ana jisháchichiyama, chca chėnga jtsebomnana ndáyeca chabe contra jayanana. Pero Jesús nŷe fshantsoye yojotsejbėna y yojóntsá ntšabuáfjaca fshantsiŷe juabemama. ⁷ Chėnga nŷe imojtsetjanaye causa, Jesús tojantsbaná y tojanėyana: —Nda tšėngaftanguentsá tondaye bacna soyėnga tondbomná, chaobojatšė ndětsbeca jatėchėnjama ca.

⁸ Chentšana Jesús cachiŷe fshantsoye yojtotsejbėna, y yojtėtóntsá fshantsiŷe jtėtabemama. ⁹ Chca tmojanuena ora, entšanga tmojanontšė canŷánŷa chentšana jėsebocanana; natsana chė más bėtsanánėnga y chė ínŷengna ústonoye. Canŷa Jesús tonjanoquedá y chė shembásanaca. ¹⁰ As, Jesús tojtantsá y tbojantjá: —¿Shembása, ndayentše chė acbe contra ichámėnga imojtsemna? ¿Ndocná acbiama tonjayana castiganá chacotsemna ca?

¹¹ Ndoŷe, Taita, ndocná ca —chė shembása tbojanjuá.

Chora Jesús tbojanियana: —Atše cach ndoŷe acbiama quichátayana castiganá chacotsemna ca. Morna, motsatoŷe, pero ndoŷe más bacna soye cattsama ca.

Jesús yomna quem luarentša entsangbe juabna binŷnayá

¹² Jesús cachiŷe Bėngbe Bėtsabe bėts yebnentše yojsabuátambaye, y entšanga mēntsá tojanėyana: —Atše sėndbínŷna quem luare entsangbe juabnėnga. Nda atše chašojtsėstona, cha echantsiyena atše chė binŷnayáftaca; y ndoŷe mo ibetiŷcá queochátaye, y chca, tšabe vida echántsebomna ca.

¹³ Chora chė fariseunga Jesús tmojanियana: —Aca nŷe cach acbiama chca contsoyebuambná; chcana, chė ntšamo contsichamcá tondaye quenatámama ca.

¹⁴ As chora Jesús tojanėjua: —Ntšamo cach atšbiama sėntsichamcá aiŷe entsámama, masque nŷe atše stsichamo ntšamo atšbiama ndegombre yomncá. Er atše sėndėtatsėmbo ndėmocana tijabo y ndėmoye tstsá. Pero tšėngaftanga ndoŷe chca quešmatatsėmbo. ¹⁵ Tšėngaftanga šmondbėtsichamo ínŷengbiamna tšabá o ndoŷe tšabá tmontsamama, chca, nŷe ntšamo entšanga mondbetsejuabnaycá. Pero atšna ndocnabiamna chca quetsátichamo. ¹⁶ Atše ndoŷe nŷe canŷa quetsátsmėna ínŷabiamna jayanama tšabá o ndoŷe tšabá tontsamama; ndayá atšbe Taitá, chė šonjichmó cha, átseftaca chca jayanana. Chíyeca, atše ínŷabiamna tšabá o ndoŷe tšabá tonjama ca stsichamo ora, ntšamo stsichamcá ndegombre jtsemnana. ¹⁷ Tšėngaftangbe leyiŷe enduábemana, uta entšata ndayámnaca cachcá tbojyanėse, ntšamo chata tbojayancá puerte jtsámanana ca. ¹⁸ Y morna, atše sėntsichamo chė ntšamo cach atšbiama ndegombre yomncá, y atšbe Taitá, chė šonjichmó chánaca entsichamo ntšamo atšbiama ndegombre yomncá ca —Jesús tojánayana.

¹⁹ Chora chėnga tmojantjá: —¿Ndayentše acbe Taitá yojtsemna ca?

Y Jesús tojanėjua: —Tšėngaftanga ndoŷe quešmatábuatma ni atše ni atšbe Taitá. Atše šmojtsábuatmėsna, atšbe Taitánaca šmattsábuatma ca.

²⁰ Bėngbe Bėtsabe bėts yebnoca, chė crocėnana jacjayama luarentše yojsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoŷe ora tonjanóshjango.

“Chë chanjá luaroye, tsëngaftanga ndoñe quešmátobena jama”

²¹ Chora Jesús yojtétóntša oyebuambnayana: —Atše chantá, y chora tsëngaftanga atše šmochántseguaye. Masque chca, šmochanjóbana tsëngaftangbe bacna soyëngama ndëperdonánënga. Chë chanjá luaroye, tsëngaftanga ndoñe quešmátobena jama ca —Jesús tojánayana.

²² Chora chë judiënga tmojanontsé enatsëtsnayana: —¿Mo nderado yojtsejuabná jtsenóitanama, y chíyeca yojtsichamo chë cha yochjá luaroye bënga ndoñe montsobena jama ca?

²³ Chora Jesús tojanëyana: —Tsëngaftanga quem luaroquënga šmondmëna; atšna tsbananocá, celocá sëndmëna. Tsëngaftanga nÿe quem luarama enójuabnayënga šmondmëna, pero atše ndoñe. ²⁴ Chíyeca atše chca tcbonjáuyana, chë “tsëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnama ndoñe chašmontsošbuachese, tsëngaftangbe bacna soyëngama ndëperdonánënga šmochanjóbana ca.

²⁵ Chora chënga tmojantjá: —¿As aca ndase cmëna ca?

Y Jesús tojanëyana: —Entšanga jabuátambama sënjanbojatsé orscana chama tcbonjáuyana. ²⁶ Atše ba soyënga sëntsebmoma tsëngaftangbiama jayanama, tsëngaftangbe contra jayanama; pero chë šonjichmó cha nÿetsca soyëngama ndegombre endbëtsichamo, y atšna ntšamo chábentsana tijuencá, cachcá quem luare oyenënga sentsëtsëtsná ca —cha tojanëyana.

²⁷ Pero chënga ndoñe tonjanësertá Jesús cachabe Taitabiamama chca tojanëyanama. ²⁸ As Jesús tojanëyana: —Bëngbe Bëtsá Entšá tbojanbemá chašmojatsbaná ora, šmochántsetatsëmbo nda sëndmëná atše bëtsemnama. Cachcá, tsëngaftanga šmochántsetatsëmbo, nÿe cach atšbe juábna atše tondaye jamama sëndobenama. Nÿe ndayá atšbe Taitá šojabuatëmbacá atše sëndoyebuabná. ²⁹ Y chë šonjichmó cha ndoñe nÿe canÿa quešnátsboshjuana. Chca endmëna, er atše sempre sëndbëtsama ntšamo cha oyejuayá jabemama tojtsemncá ca —Jesús tojánayana.

³⁰ Jesús chca tojánayana ora, banga chábeñe imojtsanošbuaché.

Bëngbe Bëtsabe básenga y chë nÿe bacna soyë jtsamama vida bomnënga

³¹ Chora Jesús, chë chábeñe imojtsošbuaché judiënga tojanëyana: —Ntšamo cbontsëtsëtsnacá tsëngaftanga sempre šmojtsamëse, ndegombre atšbe uatsjëndayënga šmochántsemna. ³² Ntšamo ndegombre yomncá šmochántsetatsëmbo; y ntšamo ndegombre yomncá jtsetatsëmbëse, atsebácanënga šmochántsemna ca.

³³ Chora chënga tmojanjuá: —Bëngna Abrahábentsana entšanga fsëndmëna, y ndocná ndocna te chešnáisishëche nÿe chabiamama nÿets tempo jtsoservënama. As, ¿ndáyeca šcojtsëtsëtsná bënga atsebácanënga fchtsemna ca?

³⁴ Chora Jesús tojanëyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana. ³⁵ Canÿe oservená ndoñe nÿets tempo chë pamillentšá ntjëftsemnana, ntšamo canÿe uaquiñá sempre chë pamillentšá jesomñancá. ³⁶ Y chca, Bëngbe Bëtsabe Uaquiñá chacmojátsebacase, tsëngaftanga ndegombre atsebácanënga šmochántsemna bacna soyënga juabnënguentšana. ³⁷ Atše sëndëtatšëmbo tsëngaftangna Abrahábentsana entšanga šmomnana; pero tsëngaftanga šmontseboše

atše jóbama, ntšamo atše cbontsëtsëtsnacá ainaniñe jóyëngacñama ndoñe quešmátsboše causa. ³⁸ Ntšamo atšbe Taitábioca tijinýcá, cach soyëngama atše sëntsoyebuambná. Tšëngaftángnaca, cachcá ntšamo tšëngaftangbe taitábentšana šmojouencá šmontsama ca —tojanéyana.

³⁹ Chora chënga tmojanjúá: —Bëngbe uámana bëts taitá, Abraham endmëna ca.

As Jesús tojanéyana: —Tšëngaftanga Abrahambe básenga ca jtsabáinama mercedo šmojtsebuajónëse, chë ntšamo Abraham tojëftsema y cachcá tšëngaftanga šmattsama. ⁴⁰ Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenaisobuachanguá. ⁴¹ Tšëngaftangna, ntšamo tšëngaftangbe taitá tojëftsemcá y cachcá jtsamana ca —Jesús tojánayana.

Chora chënga tmojanijana: —Bënga nýe enaquécana básenga ndoñe queftsátsmëna. Chë nýe canýe taitá fsëndbomná, Bëngbe Bëtsá endmëna ca.

⁴² Chora Jesús tojanéyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo y muentše sëntsemna. Nýe atšbe ponto ndoñe chiyátabo; Bëngbe Bëtsá šonjichmó. ⁴³ ¿Ndayeca tšëngaftanga ndoñe šmontsobena atšbe palabrënga josértana? Co, ntšamo cbontsëtsëtsnacá joyeunayama ndoñe quešmátsboše causa chca. ⁴⁴ Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanasbe juabnoca, ndocna tšabe soyënga ni ndegombre soyënga ntsebínýnana. Chíyeca, ndocna te cha ntšamo ndegombre yomncá ntsamana. Cha canýe bostero endmëna, y chábentšana nýetsca bostero soyënga jtsóbcanana. Chíyeca, cha tojtsebostero ora, nýe ntšamo cachá yomnama jtsichámuana. ⁴⁵ Atšna sempre ntšamo ndegombre yomncá cbondutsëtsná; chíyeca, chë sëntsichamo soyiñe tšëngaftanga ndoñe quešmatošbuaché. ⁴⁶ ¿Nda tšëngaftanguentšá nanjobenaye jinýanýiyana atše ndaye bacna soye tija-mama? Y atše, nýe ntšamo ndegombre yomncá stsichámëse, ¿ndayeca chë tijayaniñe ndoñe šmontsošbuaché? ⁴⁷ Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanéyana.

Cristo Abrahambiamas más natsana ya yojtsemna

⁴⁸ Chora chë judiënga tmojanijana: —Ajá, bënga co ndegombre fstsichamo, aca nýe samaritano y bacna bayëjbe juabna uambayá comna ca fstsichamo ora ca.

⁴⁹ Y Jesús tojanéjua: —Atše ni mo canýe bayëjbe juabna quetsa-tambá. Ntšamo atše sëntsamcá, endmëna jinýanýiyama atšbe Taitá Bëngbe Bëtsá uamaná yomnama; pero tšëngaftangna, atše chca tsmënama ndoñe quešmatinýinýná. ⁵⁰ Atše ndoñe quetsátsboše ínýenga atše más uamaná chašmobemama. Pero inýa endmëna; cha aiñe endboše atše bëtsá bëtsemnama chaminýanýema. Y chánaca endmëna chë ínýëngbiamasáb o ndoñe tšabá tmontsamama endbetsichamuá. ⁵¹ Ndegombre šcuayana, nda ntšamo atše sëntsichamcá tojouena y chca tojama, ndocna te queochatóbana ca —Jesús tojánayana.

⁵² Chora chë judiënga tmojaniana: —Mora cocayé fsëntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nÿetscanga Bëngbe Bëtsabe juabna oyebuambnayëngnaca. ¿Y mora aca cochjátichamo, “Nda ntšamo atše sëntsichamcá tojouena y chca tojama, cha ndocna te queochatóbana ca”? ⁵³ ¿O aca, bëngbe bëts taitá Abrahambiana más bëtsá comna? Cha tojanóbana, y Bëngbe Bëtsabe juabna oyebuambnayëngnaca. ¿Ndase cojátsmëna ca aca cojatsjuabná ca? —chënga imojtsichamo.

⁵⁴ Chora Jesús tojanëjua: —Atše nÿe cach atše más bëtsá stseno-biamnasna, chë soye tondaye nantsámana. Pero chë más bëtsá šojtsebiamná cha, atšbe Taitá endmëna, cach ndabiama tšëngaftanga šmondbëtsichamo tšëngaftangbe Bëtsá canmëna ca. ⁵⁵ Pero tšëngaftanga cha ndoñe quešmatábuatma; atše aíñe. Y atše, “cha ndoñe quetsatabuatma ca” stsichámëse, átšnaca cach tšëngaftangcá canÿe booster stsemna. Pero ndegombre atše cha sënduábuatma, y ntšamo cha tojtsichamcá, atše sëndouenana y cachcá sëndbëtsama. ⁵⁶ Tšëngaftangbe uámana bëts taitá Abraham, chë atše jabama te jinÿama yojtsejuabnaye ora, puerte oyejuayá yojtsemna. Y pronto tojëftsaninÿe, y puerte tojanoyejuá ca — Jesús tojánayana.

⁵⁷ Chora chë judiënga tmojaniana: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojëftsinÿe ca?

⁵⁸ Chora Jesús tojanëjua: —Ndegombre cbëyana, Abraham cabá ndoñe ainá quenjatmëna ora, atše ya sënjëtsemna ca.

⁵⁹ Jesús chca tojanëjua ora, chënga ndëtsbenga tmojanájaca cha jtsatëchënganjama. Pero Jesusna oitanánana, Bëngbe Bëtsabe bëts yebnentšana tojésanbocna.

9

Jesús tojanma, canÿe boyabása jtaná onÿnaná chabuabínÿnama

¹ Canÿe luarëjana yojtsachnéjuana ora, Jesús canÿe boyabásabioye tbojáninÿe. Chë boyabásana jtaná inónÿna. ² Chë uatsjëndayënga Jesús tmojantjá: —Buatëmbayá, ¿ndáyeca quem boyabása jtaná inónÿna? ¿Camuá bacna soyënga tojamama, o chabe bëtsëtsangbe bacna soyënga causa ca?

³ Chora Jesús tojanëjua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entšanga jinÿanÿiyama ntšamo Bëngbe Bëtsá yobencá. ⁴ Cabá yojtsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye. ⁵ Quem luariñe chjëftsemnëntscuana, atše quem luare entšangbe juabnënga binÿnayá chanjëftsemna ca —tojanëyana.

⁶ Chca tojánayanentšana, Jesús fshantsiñe tojanbuashëtjo, y chë yebuáyeca batšá ngüiche tojábema, y chë jtaná chë ngüicheca tbojanbuchanëtjo. ⁷ Chora chë jtaná tbojaniana: —Motsa y metsobúchjabebiye, chë binche uafajónaye entšangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”.)

Y chë jtaná tojána; chocha yojetsobúchjabebiye, y yebnoye tojtána ora, ya ibojtsabinÿna. ⁸ Chë juachañe oyenënga y chë jtaná tempo lemošna

otjanañana tmojáninÿenga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

⁹ Inÿenga imojtsichamo: —Cha entsemna ca.

Y ínÿengna: —Cha ndoñe quenátsmëna, pero chacá entsábona ca.

Y cach shnaná yojtsichamo: —Atše cha sëndmëna ca.

¹⁰ As chë entsanga tmojantjá: —¿Ntsámo chca mora cmojtsabinÿna ca?

¹¹ Y cha tojanëjua: —Chë boyabása, Jesús ca uabainá, ngüiche yebuáyeca tonjábema, šonjabuchanëtjo y šonjauyana: “Motsa y Siloé uafjajónayiñe metsobúchjabebiyé ca”. Chcasna, atše sënjá, sënjetsobúchjabebiyé y cachora šontsabinÿna ca.

¹² Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatsëmbo ca —tojanëjua.

Chë jtana shnanábioye fariseunga imojtsetjanaye

¹³ Chora chë entsanga, chë jtaná inamná fariseungbíoje tmojanánatse.

¹⁴ Chë Jesús batsá yebuáyeca ngüiche tojánbema, y chë jtaná tojanma te, canÿe ochnayté inamna. ¹⁵ As chë fariseunga chë boyabása tmojantjá: —¿Ntsámoyeca mora cmojtsabinÿna ca?

Chora cha tojanëjua: —Cha ngüiche yebuáyeca tonjábema y šonjabuchanëtjo. Sënjetsobúchjabebiyé, y cachora šonjuabinÿna ca.

¹⁶ As chora básefta fariseunga imojtsichamo: —Chë jtaná chabotsabinÿnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inÿenga imojtsichamo: —Cha canÿe bacna soyënga amá tojtsemnëse, ¿ntsámo nantsobena canÿe bëts soye Bëngbe Bëtsabe obenánaca jamama ca?

Y chca, ínÿenga Jesusbe pavor imojtsemna, y ínÿengna chabe contra. ¹⁷ Chama chënga cachiñe chë jtaná inamná tmojtëtantjá: —Er aca mora chacmotsabinÿnama cha tojamëse, ¿chabiamá ntsámo catjayana ca?

Chora cha tojanëjua: —Chana canÿa Bëngbe Bëtsabe juabna oyebuamb-nayá entsemna ca.

¹⁸ Pero chë judiënga ndoñe montsanošbuaché, cha chë jtaná inamna y chora ibojtsabinÿnama. As chënga, ínÿenga tmojanichamó chë boyabásabe bëtsëtsata jobiatšama. ¹⁹ Chë bëtsëtsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonÿnama? Chcase, ¿ntsámo mora cha ibojtsabinÿna ca?

²⁰ Chora chë bëtsëtsata tmojanëjua: —Aíñe fsëndëtatšëmbo cha bëndatbe uaquiñá endmënama y jtaná tonjanonÿnama. ²¹ Pero ndoñe queftsátstatsëmbo ntsámoyeca mora chca ibojtsabinÿnama, ni bëndatbe uaquiñá chabotsabinÿnama nda tojamama cach ndoñe. Cachá motjanga. Ya bëtsá entsemna, y cachá entsobena tsëngaftanga razón jatšatayama ca —chata tbojánayana.

²² Tempo, chë judiënga imojenóyeunaye, chëngbe enefjuana yebnënguentšana jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtsëtsatna chama ibojtsauatja; ²³ chíyeca tmojanëyana: “Cha ya bëtsá entsemna. Cachá motjanga ca”.

²⁴ As cachiñe chë judiënga chë jtaná inamná tmojanchembo y tmojaniyana: —Bëngbe Bëtsabe delante cach acbiamá ndegombre

mobuambá. Bënga fsëndétatsëmbo chë boyabása canye bacna soyënga amá yomnama ca.

²⁵ Chora cha tojanējua: —Cha canye bacna soyënga amá o ndoñe tondmënema, atse ndoñe quetsátstatsëmbo. Atse nye mëntśá sëntsetatsëmbo: Atse jtaná sënjanmëna, pero mora šontsabinýna ca.

²⁶ Chora chënga cachiñe tmojatantjá: —¿Ntšamo tcmënjama? ¿Ntšamo cha tënjama chacmotsabinýnama ca?

²⁷ Y cha tojanējua: —Ya tbonjáuyana y ndoñe chešmatoyeuná. ¿Ndayeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnama ca?

²⁸ Chora chënga cha tmojtsanóyenguango y tmojanianyana: —Acna canye chabe ustoná cojtsemna, pero bënga ndoñe; bëngna Moisesbe ústonënga fsëndmëna. ²⁹ Bënga fsëndétatsëmbo, Bëngbe Bëtsá Moisésbioye tbojanatsëtsama, pero chë boyabásabiama ndoñe queftsátstatsëmbo ni mo ndëmocana cha tojabama ca —chënga imojtsichamo.

³⁰ Chora chë boyabása tojanējua: —¡Ntšamo chca nántsemna! Tšëngaftanga ndoñe šmontsetáttsëmbo ndëmocana cha tojabama; pero chašubabinýnama cha tonjama. ³¹ Bënga tšabá mondétatsëmbo, bacna soyënga amënga Bëngbe Bëtsá ndoñe queondbátayaunanama. Chana, nye chábioye adoraray y ntšamo cha tojtsebošcá amábioye joyeunayana. ³² Quem luare jobojátšama orscana ndocna te quenaisótatsëmbo canye jtaná onýnanabiama ndánaca cha chabotsabinýnama tojéftsemama. ³³ Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entśá tojánayana.

³⁴ As chë fariseunga tmojanianyana: —¡Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjátabuatabayca?

Y chora chë judiëngbe enefjuana yebnentšana cha tmojtanábocna.

Chë Bëngbe Bëtsabe soyëngama mo jtanëngcá imomnënga

³⁵ Chë jtaná tmojtanábocnama Jesús tojanuena ora, tojána cha janguanguama. Tbojáninýena ora tbojanianyana: —¿Aca Bëngbe Bëtsá Entśá tbojanbemábeñe quecojtsosbuaché ca?

³⁶ Y cha tbojanjúá: —¿Taita, nda cha yojtsemna, as atse chábeñe jtsošbuáchiyama cá?

³⁷ As Jesús tbojanianyana: —Aca ya tconjinýe; chë ácaftaca entsoyebuambná cha entsemna ca.

³⁸ Chora, chë boyabása Jesús bentše tojanoshamentśé jëtschuayama y tbojanianyana: —Atšbe Utabná, aíñe sëntsošbuaché ca.

³⁹ Chora Jesús chë entsanga tojanëyana: —Atse quem luaroye tijabo ndayá entsanga jinýanýiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atse chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotáttsëmbo ca juabnayëngna chanjínýanýiye, nye batsá Bëngbe Bëtsabe soyëngama imotatsëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

⁴⁰ Básefta fariseunga Jesús eftaca imojtsemnënga chca tmojanuena ora, cha tmojanianyana: —Ndegombre bënga ndoñe mo jtanëngcá queftsátsmëna ca.

⁴¹ Chora Jesús tojanējua: —Tšëngaftanga Bëngbe Bëtsabe soyëngama ndëtatsëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátonýaye. Pero tšëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesús tojanējyana.

10

Chë oveshënga abujējñya y chabe oveshënga

¹ As Jesús tojanējyana: “Ndegombre šcuayana: Nda chë oveshëngbe luaroye bësáshajana ndoñe tonjámashëngo, pero aíñe inýajana tojtsamáshëngo, chana canýe atbëbaná y abacayá jtsemnana. ² Pero chë bësáshajana tojamashënguana, chë oveshënga anýená jtsemnana. ³ Chë bësásha ebtafjuaná, chë bësásha jebëtafjuana, y chë oveshënga abujējñya ntšamo cada ona tmabaincá chë oveshënga jáchembuana. Y chë oveshënga jtsetatsëmbuana chëngbe abujējñya yojtsachembuanama; y chë luarentšana cha jubuacnana. ⁴ Nýetsca oveshënga tmojábocana ora, chë abujējñya chënga jtsebënatsanana, y chë oveshënga jtsëstonana, er chabe oyebuambnayana chënga joyátëmbana. ⁵ Pero chë tmonduabuatmábioyna chë oveshënga ndoñe ntjuastana; nýe chábentšana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojánayana.

⁶ Jesús entsanga chca tonjanacuntá, pero chënga ndoñe ntjosértana ntšamo yojtsentšayaná.

Jesús, chë oveshënga tšabe abujējñya

⁷ As Jesús cachiñe tojanējyana: “Ndegombre cbéyana: Atše sëndmëna chë bësásha oveshënga mondbëtsamashjuanējyana. ⁸ Nýetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana. ⁹ Atše chë bësásha sëndmëna. Nda quem bësáshajana tojamashënguá, atsbočaná echántsemna. Canýe oveshá jamashënguana y jabocnana, y shácuana jónýenana. Cachcá, chë quemëjana tojamashënguá, lempe echanjónýena.

¹⁰ “Chë atbëbaná jabana nýe jatbëbama, jóbama y lempe jtsepochócama; pero atšna, entsanga vida chamotsebomnama y átšeftaca bëtscá tšabe vida chamotsebomnama tijabo.

¹¹ “Atše sëndmëna chë oveshënga tšabe abujējñya. Chë oveshënga tšabe abujējñya sempre jtseprontánana chëngbiamá jóbana, chabe oveshënga ababuánýeshanayeca. ¹² Pero nda nýe crocenánama totrabája y chë oveshënga ndoñe chábënga tmontsemna, cha nderado tojinýe canýe tjañe queše chë oveshëngbioye tojtsobécocnana, cachora nýe cachcá jesënyayana y jtsachana. Chë tjañe queše oveshënga jtsacamiyana, y chë oveshëngna nýe cátoye jtsachetana. ¹³ Cha jtsemnana nýe crocenánama trabajayá; chabiamá nýe chë uacanána más uámana soye jtsemnana, y chë oveshëngbiamá tondayana ntsentšamnana; chíyeca cha jtsachana.

¹⁴ “Atše sëndmëna chë oveshënga tšabe abujējñya. Atše chënga sëndëubuatma, y chëngnaca atše šmonduábuatma. ¹⁵ Cachcá, chë Taitá Bëngbe Bëtsá atše šonduábuatma y atše chábioye. Atše sempre sëndëtseprontana jóbana, atšbe oveshënga sëndababuanýeshánayeca.

16 Atše inýe oveshënga sëndábamna, pero chënga ndoñe quem lulariñe oveshënga quemátmëna. Atše sontsemna chëngnaca moye junatsana. Chëngnaca atšbe oyebuambnayana mochanjouena, y muentša oveshëngaftaca cânýiñe mochántsemna, y atšna nýetsca chë oveshëngbiama chë abujénýa chántsemna.

17 “Atše sempre sëndétseprontana jóbanama, chora jtayenama. Chíyeca chë Taitá šondbobonshana. 18 Ndocná atšbe vida quešochatsbojuána, pero chënga sëndababuanýeshánayeca sempre sëndétseprontana jóbanama, cach atše chca sëndbošeyeca. Derecho sëndétsóbomñe chëngbiama jóbanama, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

19 Chë soyënga chë judiënga tmojanuena ora, cachiñe banga Jesusbe contra y ínýengna Jesusbe pavor imojtsemna. 20 Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

21 Pero ínýengna imojtsanichamo: —Ndocna bacna bayëjbe juabna uambayá ntsobenana chca jóyebuambayama. ¿Canýe bayëja nantsobena jamama canýe jtaná chabotsabinýnama ca?

Chë judiënga ndoñe imontsošbuáchiye Jesús Bëngbe Bëtsabe Uaquiñá bëtsemnama

22 Canýe uaftena tempo inamna, y Jerusalenentše canýe fiesta imojsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama. 23 Jesús Bëngbe Bëtsabe bëts yebnocca yojétsana, canýe amashjuana otsbojebniñe, Salomonbe Amashjuana ca uabáinentše. 24 Chora, chë judiënga tmojanóbobuashcona, y tmojantjá: —¿Buetaytentscuana bënga fchjéftsemna acbiama ndegombre soye ntsetatšëmbcá? Aca chë Cristo cojtsemnëse, chama lempe tšabá šmanýanýé ca.

25 As Jesús tojanéjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinýanýná nda atše bëtsemnana. 26 Pero tšëngaftanga átšbeñe ndoñe quešmatošbuaché, er tšëngaftanga atše ndoñe quešmatëstona, ntšamo chë oveshënga chë tšabe abujénýa mondbetsëstoncá. 27 Chë atše šmondústonënga, atše šmondbóyeunaye y šmondbëuasto. Atše chënga sëndëubuatma. 28 Atše chanjama, quem entšanga chë nýetsca tescama yomna tšabe vida chamotsebomnama; chënga ndocna te pochocánënga quemochátmëna, y ndocná quenátobena átšbentšana chënga jefcana. 29 Atšbe Taitá Bëngbe Bëtsá, chë entšanga atše chašmuastama tojamá, nýetscangbiama más bëtšá endmëna, chíyeca ndocná quenátobena chábentšana chënga jefcana. 30 Chë Taitá y atše canýa fsëndmëna ca —Jesús tojánayana.

31 Chora, chë judiënga cachiñe ndëtšbënga tmojanájaca Jesús jtsatëchënganjama. 32 Pero Jesús tojanéyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchënganja ca?

33 Chora chë judiënga tmojanjúá: —Ni canýe quem bëts soyëngama bënga queftsátsboše aca jtsatëchënganjama. Aca Bëngbe Bëtsabiama ndoñe tšabá quecátichamo; mo chábioye cuafjoyenguangcá entsemna. Aca nýe canýe entšá condmëna, pero acna contsichamo cach aca Bëngbe Bëtsá

comna ca; chíyeca bēnga fsēntseboše ndētšbēngaca aca jtsatēchēnganjama ca —chēnga tmojanियana.

³⁴ Chora Jesús tojanēyana: —Bēngbe Bētsabe uabemana palabrenguiñe mēntšá endayana: “Atše sēnjayana tšēngaftanga diosēnga šmomna ca.”

³⁵ Bēngbe Bētsá chca tojánayana chē chabe palábraca y cha chamot-seservénama tojánamandangiama; ndocná quenátobena jinýanýiyana ni mo canýe soye Bēngbe Bētsabe uabemana palabrenguiñe, ndoñe ndegombre soye yomnama. ³⁶ Y atšbiana, Bēngbe Bētsabiacá uabuayaná y quem luare ichmoná, ¿ntšamo tšēngaftanga šmojtsoyobena jayanama, “aca Bēngbe Bētsabiana ndoñe tšabá quecátichamo ca”, chē Bēngbe Bētsabe Uaquiñá sēndmēna ca atše tijayanama? ³⁷ Ntšamo atšbe Taitá endamcá atše ndoñe sēntsamēse, tšēngaftanga átšbeñe ndoñe šmattsošbuáchiye. ³⁸ Pero, ntšamo atšbe Taitá endamcá atše aiñe stsamēse, masque ndoñe átšbeñe šmontsošbuaché, nýe chē Taitabe obenánaca soyēnga tijamama šmochtsošbuáchiye. As, canýe ora chašmotsetátšēmo y chacmēsértá, chē Taitá átšbeñe yomnama y atše chábeñe tsmēnama ca —Jesús tojanēyana.

³⁹ Chora chēnga cachiñe tmojánbošena Jesús jishachama, pero cha chēngbentšana tojanotsbocá.

⁴⁰ Chentšana, Jesús Jordán bėjaye chenguana tojesaná y choca tojtsanoquedañe. Chentše Juan tempo entšanga yojanēbáyana. ⁴¹ Ba entšanga tmojána Jesús jinýama, y mēntšá imojtsichamo: “Ndegombre, masque Juan ni mo canýe bēts soye Bēngbe Bētsabe obenánaca tonjēftsema, lempe ntšamo quem boyabásabiana tonjanoyebuambacá, ndegombre yojamna ca.” ⁴² Y chentše, ba entšanga Jesúsbeñe imojtsanošbuaché.

11

Lázaro tojanóbana

¹ Inamna canýe boyabása šocá, Lázaro ca uabainá. Cha inoyena canýe pueblo Betania ca uabáinentše, Marta y Mariáftaca, chabe uabénata.

² Quem Mariá inamna nda Bēngbe Utabná Jesusbe shecuatšini botamana uanguētsiye tbojanáshecbuešcja, y chabe stjēnashaca tbojtsanshecbojó cha.

³ Chē uta uabénatna ínýenga tmojanichamó Jesús jauenayama: —Bēngbe Utabná, chē aca condbobonshaná šocá entsemna ca.

⁴ Jesús chca tojanuena ora, tojánayana: —Quem šocana ndoñe quenátsmēna Lázaro chaóbanama. Pero aiñe entsemna Bēngbe Bētsabe obenana entšanga jinýanýiyama, y Bēngbe Bētsabe Uaquiñá chamuatschuama ca.

⁵ Jesús corente yojánababuanýeshana Marta, Mariá y chatbe uaftše Lázaro. ⁶ Masque chcasna, Lázaro šocá yojtsemna ca Jesús tmojanियana ora, cabá uta te más cha yojésemna luarentše tojtsanoquedañe.

⁷ Chentšana, chabe uatsjēndayēnga tojanēyana: —Judeoye cachiñe cuajna ca.

⁸ As chē uatsjēndayēnga tmojanियana: —Buatēmbayá, baseftayté entsemna chē luaroca judiēnga cmonjanbuachetá ndētšbēngaca jtsóbama; y mora, ¿cabá choye jtésama cojtseboše ca?

⁹⁻¹⁰ Chora Jesús tojanēyana: —Bnētsana uta hora bnēté endmēna. Nda bnēté tojtsana, ndoñe ntjojéstjiana, binýiniñe bētsemnayeca. Cachcá átšeftaca endmēna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero ibeta tojtsanēse, cha

jtsojéstjiana, ndoñe binÿniñe causa. Cachcá, bënga sòntsamna yojsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

¹¹ Chentsana tojanéyana: —Bëngbe amigo Lázaro tojtsomaná, pero atše choye chanjá jetsefšenama ca.

¹² Chora chë uatsjéndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

¹³ Pero Jesús yojtsanëtsëtsná ndayá Lázaro tojtsanóbana ca, y chabe uatsjéndayëngna imojtsejuabnaye Lázaro ndegombre yojtsomáñama. ¹⁴ As Jesús tšabá tojanéyana: —Lázaro tontsóbana. ¹⁵ Atše sëntsoyejuá choca atše ndoñe tsmënama, tšëngaftangbe tšabiama chaotsemnana; chca, tšëngaftanga más átšbeñe chašmotsošbuáchema. Pero cuajna cha jinÿama ca.

¹⁶ Chora Tomás, chë Gemelo ca uabobainá, chë inÿe uatsjéndayënga tojanéyana: “Bëngnaca cuajna, cháftaca mochjóbana ca.”

Jesús iuama entsanga chámuatayenama y chë nÿetsca tescama yomna tšabe vida chamotsebomnana

¹⁷ Jesús chë béconana tojánashjango ora, tojántatšëmbona Lázaro ya canta te uatbontsána yojtsemnana. ¹⁸ Betania pueblo yojamna Jerusalén béconana, mo unga kilómetroca. ¹⁹ Ba judiënga tmojána Marta y María jautsëtsayama y jatjëmbabayama ndoñe tša ngmënaca chabondëtsemnana, chatbe uaftše tojanóbana causa. ²⁰ Jesús yojtsashjajuanama Marta tojántatšëmbona ora, tojánbocna cha jajëbenguama, pero María cach yebnentše tojanoquedá.

²¹ Chora Marta Jesúsbioye tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana. ²² Pero atše sëntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátšetaya ca.

²³ Y Jesús tbojanjuá: —Ache uaftše echántayena ca.

²⁴ Chora Marta tbojaniyana: —Añe, atše sëndëtatšëmbo cha yochtayenama, pero quem luare jopochócama te, nÿetsca obanënga mochtayena ora ca.

²⁵ As Jesús tbojaniyana: —Atše sëndmëna chë entsanga chámuatayenama y chë nÿetsca tescama yomna tšabe vida chamotsebomnana endamá. Nda átšbeñe tojtsošbuaché, masque chaóbana, echántayena. ²⁶ Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojantjá.

²⁷ Chora Marta tbojaniyana: —Añe, Bëngbe Utabná, atše ácebeñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnana ca.

Jesús, Lázaro yojtsátbontsana cuevëshentše yojenóbošachna

²⁸ Chca tojánayanentšana, Marta tojtaná chabe quenata María jachembuama, y iyëcana tbojaniyana: “Buatëmbayá tonjášhjango y entseboše aca jinÿama ca.”

²⁹ María chca tojanuena y cachora tojëftsanbocna y tojána Jesús jinÿama. ³⁰ Jesús cabá ndoñe chë puebloye tonjánamashëngo; yojëtsemna Marta tbojanjébingo laurentše. ³¹ Chë yebnentše imojtsemna judiënga, María tša ngmënaca ndoñe chaondëtsemnana tjëmbambayënga, tmojánbocana María juastama; er chë tojëftsantsbaná y tojëftsanbocna

ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

³² Jesús yojtsemnentše María tojánashjango ora, chá bentše tojanoshamentšé y tbojaniana: —Bëngbe Utabná, aca muentše macménese, atšbe uaftše ndoñe matënjóbana ca.

³³ María y cháftaca tmojánashjajna judiënga, nyetscanga imojetsenóbošachiye; y Jesús chca tojáninýe ora, corente tbojancochtsetšena y puerte ngménaca yojtsemna. ³⁴ Chora Jesús tojanatjá: —¿Ndayentše cha šmojuatbontsá ca?

Y chënga tmojanjúá: —Bëngbe Utabná, mabo y cochjinýe ca.

³⁵ Chora Jesús tojánenobošachna. ³⁶ As chë judiënga tmojánayana: —¡Minýënga, tša ibnabobonshana ca!

³⁷ Pero inýe judiënga imojtsichamo: —Chë jtaná chabuabínýnama tojamá, ¿tondaye tonjobená jamama, Lázaro ndoñe chaondóbanama ca?

Lázaro tojtanayena

³⁸ Jesús, cachiñe puerte cochtsetšenaná, chë uatbontsánoye tojanobecóná. Chë luarna cuevëshe inamna, y amashjuanentše canýe bëts ndëtsbeca yojtsatámena. ³⁹ Chora Jesús tojanéyana: —Chë ndëtsbé mojuánanga ca.

Chora Marta, chë obanabe uabena tbojaniana: —Bëngbe Utabná, mora ya bacá yojtsonguëtšé, er ya canta te entsemna cha tontsóbana ca.

⁴⁰ Y Jesús tbojanjúá: —Ndegombre, ya tcbonjauyana, aiñe átsbeñe tcojtsošbuáchese, cochjinýe Bëngbe Bëtsá puerte obená y bëtsá bëtsemnama ca.

⁴¹ Chora chë ndëtsbé tmojanjuaná; Jesús celoye yojontješiye y Bëngbe Bëtsábioye tbojaniana: “Taita, cbatschuá atšbe opresido tcojouenama. ⁴² Atše sëndëtatšëmbo aca sempre šcondbëtseyeananama; atše chca tcbonjauyana, muentše montsemna entšangbe tšabiama, chca, aca atše šcojichmoma, chënga chamotsošbuáchema ca.”

⁴³ Chca tojánayanentšana, jabuache tojánayana: “¡Lázaro, chentšana matsbocna ca!”

⁴⁴ Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubíá base entšëjuaca uamochëcjuaná. As Jesús tojanéyana: “Motsejafjoná y jama chaotsobena ca.”

Chë judiëngbe amëndayënga tmojanenoyeuná Jesúsbioye jóbama (Mt 26.1-5; Mc 14.1-2; Lc 22.1-2)

⁴⁵ Chë soyëngama, banga chë judiënguentšana, María jatjëmbambayama tmojánanga, y ntšamo Jesús tojanmcá tmojáninýënga, Jesúsbeñe imojtsošbuaché. ⁴⁶ Pero inýe judiënga fariseúngbioye tmojána, ntšamo Jesús tojanmama chënga jacúntama. ⁴⁷ As, chë fariseunga y chë bachnangbe amëndayënga tmojánenefna inýe judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. ⁴⁸ Nýe cachcá chamojonýase, nyetsca entšanga chábeñe mochantsošbuachiye; chë romanëngbe amëndayënga mochanjabo y lempe mochantsepochóca, Bëngbe Bëtsabe bëts yebna y bëngbe luare Israel ca —chënga imojtsichamo.

⁴⁹ Pero canýa chënguentšá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatšëmbo. ⁵⁰ Y ndoñe quešmatsjuabná, tšëngaftangbiamá más

tšabá yojtsemna nýe canýe boyabása Israeloca entšangbiana chaóbana, y ndoñe nýets bêngbe luare chamotsepochoá ca —cha tojanéyana.

⁵¹ Pero Caifás chë soye nýe cachabe juábna nadoñe chca tonjánayana. Cha, chë uata chë bachnangbe más uámana amëndayá inámnayeca, Bêngbe Bëtsabe Espíritbe obenánaca tojánayana Jesús ibojamna Israeloca entšangbiana jóbana ca. ⁵² Y ndoñe nýe Israeloca entšangbiana, sinó chë inýe luarënguifne Bêngbe Bëtsabe básenga tmojanáshanënga chamu-atábama, as chca, nýetscanga nýe canýe luarentša entšanga chamotsemnama. ⁵³ Chcasna, cach tescana judiëngbe amëndayënga tmojanenoye-uná Jesús jóbama.

⁵⁴ Chíyeca Jesús entšángbeñe, Judea luariñe ya ndoñe yontsana. Chë luarentšana tojéftsanbocna y canýe luaroye tojtsanoñe, entšanga ndoyeniñe béconana, canýe pueblo Efraín ca uabáinoe. Y chentše chabe uatsjëndayëngaftaca tojtsanoquedañe.

⁵⁵ Judiëngbe Bashco fiestama batšá yojtsájamna, y ba entšanga publënguentshana Jerusalenoye imojtsajna, soyënga choca jamama ntšamo tempo inamncá, chca, Bêngbe Bëtsabe bominyama tšábenga jsemnama, chë Bashco fiesta cabá ndobuache ora. ⁵⁶ Chocna, judiënga Jesús imojtsenguaye, y Bêngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

⁵⁷ Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatšëmbësna, chaobuambá ca, as Jesús jishachama.

12

María, botamana uanguëtsiye Jesúsbeñe tbojanášhecbuešcja
(Mt 26.6-13; Mc 14.3-9)

¹ Chnënguana te chë Bashco fiestama yojtsájamna ora, Jesús Betania pueblöye tojtaná. Lázaro, chë Jesús tbojtanayená cha, choca inoyena. ² Chentšna bëts saná Jesusbiana tmojanábua. Marta tojanëjuatšé, y Lázaro yojtsemna chë Jesúseftaca juasama mesëshañe imojtsetbiámanënguentsë. ³ As María canýe jarrëtema tojanaca; chiñe yojanaftsuamna canýe botamana uanguëtsiye, bëtscá uámaniye, ena nárdoca pormániye. Chë uanguëtsiye, María, Jesusbe shecuatšënguifne tbojanášhecbuešcja, y cachabe stjënashaca tbojtanshecbójó. Chora, chë yebnentše ena nardiñana yojtsonguëtsiye.

⁴ Chora, canýa Jesusbe uatsjëndayënguentsá, Judas Iscariote, chë Jesús uayayëngbe cucuatsiñe yochjanayentšbashejuaná, tojánayana: ⁵ —Quem botamana uanguëtsiye unga patse denario crocénana enduámana. ¿Ndáyeca ndoñe šmonjuie y ndbomnjëmënga chë crocénana mašmëntsatsatá ca?

⁶ Pero Judas chca tojánayana, chë ndbomnjëmëngbeñe ntsejuabnaycá, sinó cha atbëbaná inamna causa. Judas chëngbe crocénana shecnëšifne yojánatbëna, y ba soye, chë shecnëšoye imojanatsuáma crocénantšana cha yojánatbëbana.

⁷ As Jesús tbojanjúá: —Cachcá monýá. María mëntscoñe chë botamana uanguëtsiye iuabofjóna, cha jobenayama átšbeñe jabuéšcjama, er ndoñe bën y atše šmochanjaitëme. ⁸ Chë ndbomnjëmëngna tšëngaftangbeñe sempre mochanjesomñe, pero atše ndoñe ca — tojánayana.

Judiënga tmojanenoyeuná Lázaro jóbama

⁹ Ba judiënga tmojántatšëmbona Jesús Betanioca yojtsemnama, y choye tmojána, ndoñe nÿe Jesús jinÿama, sinó Lázarnaca, chë Jesús tbojtanayená cha. ¹⁰ As chë bachnangbe amëndayënga tmojanenoyeuná Lázarnaca jóbama. ¹¹ Chabe causa, ba judiënga chëngbiöye cachcá tmojesanénÿa y Jesúsbeñe imojtsošbuaché.

Jesús Jerusalenoye tojánashjango

(Mt 21.1-11; Mc 11.1-11; Lc 19.28-40)

¹² Chë yëfsana, mallajta entšanga, Jerusalenoca fiestama tmojánashjajnënga, tmojántatšëmbona Jesús choye yochjánashjanguama. ¹³ As chëngna palma betiye buacuafjënga tmojanatëtsetše, y Jesús jajébenguama tmojánbocana, y mëntšá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Útabnabe obenánaca tojabá! ¡Corente bendición bomná chë Israeloquëngbe Rey ca!”

¹⁴ Jesús canÿe burrotema tbojáninÿena y chábeñe tojanenoyayé. Ntšamo Bëngbe Bëtsabe uabemana palabrénguiñe iuayancá, cachcá tojanopasá. Chiñe mëntšá endayana Jerusalenoca entšangbiama:

¹⁵ Sión bëts puebloca oyenënga, ndoñe matauatjëngana.

Minÿënga, tšëngtangbe Rey burrotémiñe enjaquená entsabó ca.

¹⁶ Chca orna, Jesusbe uatsjëndayënga chë soyëngama ndoñe tonjanësertá; pero chentšana, Jesús corente bëtsá yomnama Bëngbe Bëtsá tojaninÿanyé ora, chë uatsjëndayënga chama tmojanenoyuabó, lempe ntšamo Bëngbe Bëtsabe uabemana palabrénguiñe iuayancá y cachcá Jesúséftaca tojanopasama.

¹⁷ Chë Jesúséftaca imojtsemna entšanga, Lázarböye uatbontsánoye tbojanchembo ora y chentšana tbojtanayená ora, ntšamo tmojáninÿama chora imojtsecuéntaye. ¹⁸ Chiyeca, ba entšanga tmojánbocana Jesús jajébenguama, chë bëts soye Bëngbe Bëtsabe obenánaca cha tojanmama tmojanuénayeca. ¹⁹ Pero chë fariseunga imojtsenatsëtsnaye: “Tšëngtangba šmontsonÿá bënga tondaye jamama quemúátobenama y más, jnÿetscanga cha montsëstona ca!”

Básefta Grecia luaroca entšanga Jesús tmojáanguango

²⁰ Bashco fiestama, chë Bëngbe Bëtsá jadórana Jerusalenoye tmojánangbeñe, básefta griego entšángnaca imojtsemna. ²¹ Chëngna, Felipe chë Galilea luarocá, chë Betsaida pueblócáböye, tmojanobeconá y tmojanimpadá: “Señor, bënga fsëntseboše Jesús jinÿama ca.”

²² Chora Felipe tojána Andrés jauyanama, y chë útatna Jesúsböye tbojána, chë grieguëngbiama jauenayama. ²³ Jesús chata tojanéyana: “Chë Bëngbe Bëtsá Entšá tbojanbemá corente bëtsá yomnama jinÿanyiyama te ya tocjöbuache. ²⁴ Ndegombre šcuayana: Canÿe trigo jénaye ndoñe fshantsiñe tmonjuatbontsá y ndoñe tonjóbanëse, nÿe cach canÿe trigo jénaye jesomñana. Pero tmojuatbontsá y tojóbanase, bëtscá jashájonana. ²⁵ Cachcá, nda nÿe cachá tojtsenóbobonshana, cha chabe vida echanjëftsobuetše. Pero nda nÿe cachá ndoñe tontsenóbobonshana y ntšamo atše stemandacá, quem luariñe vida tojtsebomnëntscuana cha tojtsamëse, chë nÿetsca tescama yomna tšabe vida echántsebomna. ²⁶ Nda ntšamo stemandacá jamama tojtseboše, atše chašotsëstona. Chca,

ndayentše atše chaitsemna, chánaca, chë atše oservená, chentše chaotsemna. Atše sojtseservénabiama, atšbe Taitá Bëngbe Bëtsá echanjínÿanÿiye bëtsá yomnama ca” —Jesús tojánayana.

Jesús tojánayana cha yochjanóbanama

²⁷ Y más Jesús tojánayana: “¡Mora tša cochtsetšenaná sëntsemna! ¿Atše chjayana: “Taita, chë átseftaca echanjopása soyënga šmotsebojuaná ca?” Ndoñe; er más chama atše quem luaroye tijabo. ²⁸ Taita, šminÿanÿé aca puerte bëtsá y obená comnama ca.”

Y cachora, celocana canÿe oyebuambnayana tojanóbocna mëntšá: “Ya tcbonjinÿanÿé atše puerte bëtsá y obená tsmënama, y mora cachiñe cachcá chanjama ca.”

²⁹ Entšanga chca tmojanuena ora, ínÿenga imojtsichamo nÿe tojanjuésase ca; pero ínÿengna imojtsichamo: —Canÿe ángel chábioye tbonjuatsëtsá ca.

³⁰ Chora Jesús tojanëyana: —Ntsamo šmonjouencá, atšbiama ndoñe quenátsmëna, sinó tšëngaftangbiama. ³¹ Mora chë tempo entsemna, chë quem luare entšanga tmojëftsema bacna soyënga jinÿanÿiyama y chëngbe castiguama jayanama. Y mora, chë nÿetsca bacna soyënga mandayá, quem luarentšana mochantábocna. ³² Pero atše fshantsocana atsbananá chaitsemna ora, nÿetsca entšanga átšbioye chanjúbuaja ca — Jesús tojánayana.

³³ Chca cha yojsichamo, ana jinÿanÿiyama ntšamo jóbanama ibojanama. ³⁴ Chora chë entšanga tmojanjuá: —Bëngbe Bëtsabe uabemana palabrenguiñe endayana, y chíyeca bënga fsëndétatšëmbo chë Cristo nÿetsca tescama vida yochtsebomna ca. As, ¿ndáyeca cojtsichamo, Bëngbe Bëtsá Entšá tbojanbemá chamuatsbanama yojtsemna ca? ¿Nda yojtsemna Bëngbe Bëtsá Entšá tbojanbemá ca? —chënga imojtsichamo.

³⁵ Y Jesús tojanëyana: —Nÿe baseftatescama chë entšangbe juabnënga binÿnayá tšëngaftangbeñe entsemna. Chë binÿnayá cabá tšëngaftangbeñe yojtsemnëntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binÿniñe tojtsana, cha ndoñe ntsetatšëmbuana ndëmuajana yojsana. ³⁶ Chë binÿnayá cabá tšëngaftangbeñe endëtsemnëntscuana, chábeñe šmochtsošbuáchiye; as, tšëngaftangbe juabnënga binÿniñe echántsemna ca —Jesús tojánayana.

Chë soyënga tojánayanentšana, Jesús tojtsanoñe y entšangbiama yojetsóitana.

Ndáyeca chë judiënga Jesúsbeñe ndoñe montsanosbuaché

³⁷ Masque Jesús, judiëngbe delante ba bëts soyënga Bëngbe Bëtsabe obenánaca tojëftsema, chënga ndoñe chábeñe ntsošbuáchiyana, ³⁸ ntšamo Bëngbe Bëtsabe juabna oyebuambnayá Isaías tojanabemcá, cachcá chaotsemnama. Isaías mëntšá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinÿinÿé ora ca?

³⁹ Chíyeca chënga ndoñe montsobena Jesúsbeñe jtsošbuáchiyama, er Isaías mëntšanaca tojëftsanabema:

⁴⁰ Bëngbe Bëtsá tojama chënga chabe soyëngama ndoñe botamana chamondëtsejuabnama

y chabe soyënga ainaniñe ndoñe chamondóyëngacñama, as ndoñe chaondëtšësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama, y atše ndoñe ntjåtsebacama; y chca, chënga mochántsemna mo ndëshnana entsangá ca.”

⁴¹ Isaiás chca tojánayana, er tojáninÿe Jesús puerte bëtsá y obená yojamama, y chca chë uabemaniñe Jesusbiamama yojanoyebuambná.

⁴² Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entsángbeñe ndoñe montsichamo. Chca imojánama chë fariseungbiamama auatja causa, chë judiëngbe enefjuana yebnënguentsana ndoñe chamondëtëbuacnama. ⁴³ Chëngbiamama más yojanámana, entsanga chëngbiamama chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

Jesusbe palabrëngaca yochtsótatsëmbo entsanga tšabá o ndoñe tšabá tmonjamama

⁴⁴ Chora Jesús mëntsá jabuache tojánayana: “Nda átšbeñe tojtsošbuaché, ndoñe nÿe átšbeñe ntsošbuáchiyana; chë nda šojichmó chábeñnaca cha jtsošbuáchiyana. ⁴⁵ Cachca, nda atše šojtsonÿá, chë šojichmó chábioynaca cha jtsonÿayana. ⁴⁶ Atše quem luaroye tijabo entsangbe juabnënga jabobínÿyana, chca, nda átšbeñe tojtsošbuaché, mo ibetiñcá ndoñe chaondëtsemnama. ⁴⁷ Pero nda atšbe soyëngama tojouena, pero ntšamo sëntsichamcá ndoñe tontsama, atše chabiamama ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama. ⁴⁸ Nda atše šojtsaboté y atšbe palabrëngama ndoñe šonjoyeuná, ya entsebmoma nda chabiamama yochjayana bëts castigo jtsebomnama ibojtsemna ca. Atše tijanoyebuambá palabrëngaca, quem luare jopochócama te chabiamama chca echántsayana. ⁴⁹ Er atše ndoñe nÿe atšbe juábnaca quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana. ⁵⁰ Atše sëndëtatsëmbo, atšbe Taitá tojamandá orna, cha jamándana entsanga chë nÿetsca tescama yomna tšabe vida chamotsebomnama. Chíyeca, ndayá sëntsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

13

Jesús chabe uatsjëndayënga tojanashecjabebé

¹ Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftsebocnama y chabe Taitábioye jtama. Ntšamo Jesús chábenga yojanababuanÿeshancá, chë quem luare imojamnënga, chórna yojtseboše chë bëts bonshánana puerte más jinÿanÿiyana.

² Pero Satanás, Júdasbe ainaniñe bacna juabnënga tojanajáj, uayayëngbe cucuatšinë Jesús jayentšbáshejuanama. Judas Iscariote, Simonbe uaquiñá. ³ Jesús yojtsetátšëmbo chabe Taitá Bëngbe Bëtsá nÿets obenana tbojánatsetama. Cachcá, Jesús yojtsetátšëmbo, Bëngbe Bëtsábicana cha tojánabama y cachábioye jtama ibojtsemnama. ⁴ Chcasna, chë ibeta jasama tmojanpochocá ora, mesëshentšana tojantsbaná, chabe

juatsboye uichëtjoníya tojanenátsejca y canýe tualléjua tojanenasná. ⁵ Chentsána, canýe bachešiñe búyeshe tojanbuešcja y tojanontsé chabe uatsjédayénga jushecjabebiyana y jtéshechojuana cha yojtsasnana tualléjuaca.

⁶ Pero, Simón Pedro tbojanobuache ora, Jesúsbioye tbojaniyana: — Atšbe Utabná, ¿aca šochjuashecjabíá ca?

⁷ Chora Jesús tbojanjúá: —Atše sěntsama soye mora ndoñe quecmátěsertana; pero más chcoye aíñe cmochanjosérta ca.

⁸ As Pedro tbojaniyana: —¡Ndocna te šcatjuashecjabíá ca!

Pero Jesús tbojaniyana: —Ndoñe chacbonjuáshecjabese, atšbia ndoñe quecochátsměna ca.

⁹ Y Simón Pedro tbojaniyana: —¡Atšbe Utabná, as nýe atšbe shecuatšěnga ndoñe, ndayá atšbe cucuatšěnga y bestšásnaca ca!

¹⁰ Pero Jesús tbojanjúá: —Nda bebená tojtsemna, nýe shecuatšě jtsashecjabiamá jtsajabótana, ndoñe nýetsá cachiñe. Nda tojtsobebé, ndoñe tsengá ntsemnana. Cachcá, mo bebéněnga cuenta tšěngaftanga šmontsemna; pero canýa muentše entsemna, y cha mo bebenacá ndoñe quenátsměna.

¹¹ Jesús yojtsetátšěmbo nda chě uayayěngbe cucuatšíñe boshjuaná yochtsanměnama, chíyeca tojánayana: “Tšěngaftanguentšá canýa entsemna, cha mo bebenacá ndoñe quenátsměna ca”.

¹² Jushecjabebiyama tojanpochocá ora, chabe juatsboye uichëtjoníya tojtaníhětjo, y mesěshentše tojtánótbema. Chora tojaněyana: — ¿Chě tčbonjábiamá soyama quecmojtsěsertana ca? ¹³ Tšěngaftanga atše šmondbauyana Buatěmbayá y Běngbe Utabná ca; tšabá chca šmontsichamo, er atše ndegombre chca sěndměna. ¹⁴ Atše, tšěngaftangbe Buatěmbayá y Utabná, tčbonjushecjabebé; chcasna, tšěngaftángnaca cmontsamna jenáshecjabebiyana. ¹⁵ Ntšamo quem sóyeca tčbonjanýanyecá, tšěngaftanga cachcá šmochtsama. ¹⁶ Ndegombre šcuayana, chě oservená chabe nduiñbiamá ndoñe más uamaná ntsemnana. Cachcá, chě ichmoná chě tbojichmobiamá ndoñe más uamaná quenátsměna. ¹⁷ Quem soyěnga chašmojuatsjinýe y chca chašmojaměse, tšěngaftanga puerte oyejuayěnga vida šmochanjěftsebmna.

¹⁸ “Atše sěndětátšěmbo chě tijábacacangbiamá, chíyeca atše nýetscangbiamá ndoñe chca quetsatoyebuambná. Y ntšamo Běngbe Bětsabe uabemana palabřěnguiñe endayancá cachcá chaotsemnana, chě ‘canýa átšeftaca tanděse tonjasá, atšbe contra echántsemna ca’, cachcá echanjopása. ¹⁹ Mora, cabá ndoñe chca tonjopásá ora, lempe chě soyěnga sěntsichamo. As, chca chaojopásá ora, átšbeñe šmochantsošbuáchiye, y as šmochántsetátšěmbo atše tsměna chě nda sěndměná. ²⁰ Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chě nda šojichmóbioye bochanjofja ca” —Jesús tojánayana.

Jesús tojánayana uayayěngbe cucuatšíñe Judas bochjáboshjonama (Mt 26.20-25; Mc 14.17-21; Lc 22.21-23)

²¹ Chě soyěnga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, canýa tšěngaftanguentšá uayayěngbe cucuatšíñe šochanjáboshjona ca.

²² Chora, chabe uatsjédayënga tmojanontsé enonjinyayana, y ndoñe montsetátšëmbo ndabiama Jesús chca tojánayanama. ²³ Canye uatsjendayá, chë Jesús puerte ibnabonshana, Jesusbe juachaca inatbemana. ²⁴ As, Simón Pedro chábioye tbojánefatšëmbo, ndabiama Jesús chca tojánayanama Jesúsbioye chabotjama. ²⁵ Chë puerte bonshana uatsjendayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

²⁶ Chora Jesús tbojanjuá: —Atše canye base tandëtema chanjafchëcuacuaye y ndábioye chajoyé, cha entsemna ca.

As Jesús canye base tandëtema tojanfchecuacuá, y Judas, Simón Iscariotbe uaquiñábioye, tbojanoyé. ²⁷ Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojaniyana: “Chë cochanjama soye, cam ora moma ca.”

²⁸ Pero ni canya chë jasama imojtsetbiamanënguentšá tbojanësertá, ndayama Júdasbioye chca tbojaniyanama. ²⁹ Judas inamna chëngbe crocénana shecnëšične uambayá; chíyeca ínÿenga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomñëjëmënga ndayánaca chauatšatama ca.

³⁰ Júdasna chë base tandëtema tojanóyëngacñe, y cachora chentšana tojéftsanbocna. Chora ya ibeta yojtsemna.

Chë tsëm mando

³¹ Judas tojéftsanbocnentšana, Jesús tojánayana: —Ora tojobuache, Bëngbe Bëtsá Entšá tbojanbemá corente bëtsá y obená yomnama jinÿanÿiyama; y mua echanjinÿanÿiye Bëngbe Bëtsá corente bëtsá y obená yomnama. ³² Cha echanjinÿanÿiye Bëngbe Bëtsá chca yomnama, chíyeca Bëngbe Bëtsánaca echanjinÿanÿiye corente bëtsá y obená yomnama, y mora entsemna chë ndaye ora Bëngbe Bëtsá chca chabiama yochjinÿanÿiye. ³³ Atšbe básënga, baseftatescama tšëngaftangaftaca sëntsemna. Chora šmochantsenguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca. ³⁴ Canye tsëm soye cbetsamëndá: Nÿetscanga šmochtsenbobonshana. Ntšamo atše tšëngaftanga cbondábabuanÿeshana, cachcá tšëngaftanga šmochtsenbobonshana. ³⁵ Tšëngaftanga šmojtsenbobonshánëse, nÿetsca entsanga mochántsetatšëmbo, tšëngaftanga atšbe uatsjédayënga šmomnama ca —Jesús tojanëyana.

Jesús tojánayana, chábioye ndoñe bonjanabuátma ca Pedro yochjánayanama

(Mt 26.31-35; Mc 14.27-31; Lc 22.31-34)

³⁶ Chora Simón Pedro tbojantjá: —Bëngbe Utabná, ¿ndëmoye cochjá ca?

As Jesús tbojanjuá: —Atše sëntsá luaroye, mora aca ndoñe quecátobena atše juastana, pero más chcoye aífne šcochanjuasto ca.

³⁷ As Pedro tbojaniyana: —Atšbe Utabná, ¿ndáyeca ndoñe sëntsobena mora aca juastama? ¡Atše sëntseprontana acbiamá jóbanama ca!

³⁸ Chora Jesús tbojaniyana: —¿Ndegombre cojtseprontana atšbiamá jóbanama? Ndegombre cbëyana, cabá ngallo ndëcánta ora, aca unga soye atšbiamá cochanjyana: “Cha ndoñe quetsatabuátma ca”.

14

Jesús beyeca entsanga jobenayana Bëngbe Bëtsábioye jama

¹ Měntśánaca Jesús tojánayana: —Ndoñe ainana tsetšanënga matsmënana. Tšëngaftanga Bëngbe Bëtsábeñe šmondošbuaché; átsbeñnaca šmochtsošbuáchiye. ² Atšbe Taitá Bëngbe Bëtsá endmënoca, ba luarënga joyénanama endmëna. Ndoñe chca tontsemnëse, atše chca matcbëñjáuyana. Morna, cha endmënoye atše chanjá tšëngaftangbiama canye luare joyénanama jabuáprontama. ³ Atše chajjá y chë luare chacbojabuaprontá ora, cachiñe moye chanjésabo, tšëngaftanga átsëftaca junatsama. As, atše chaitsemnoye, tšëngaftangnaca chašmotsá joyénanama. ⁴ Atše chanjá choye ntšamo jama y jashjanguama ya šmontsetátšëmbo ca —Jesús tojánayana.

⁵ Chora Tomás Jesúsbioye tbojanayana: —Bëngbe Utabná, ndëmoye cochjama ndoñe queftsátstatšëmbo. As, ¿ntšamo bënga fchtsetátšëmbo ntšamo choye jama ca?

⁶ Chca tbojanayana ora, Jesús tbojanjá: —Atše sëndmëna benachcá; chëjana tcojtsase, pronto jashjanguana. Atše sëndmëna ntšamo ndegombre yomncá sempre oyebuambnayá, y entsanga chë nyetsca tescama yomna tšabe vida chamotsebomnana endamá. Nye átsbeyeca endopodena ndayëjana jama, y atšbe Taitá Bëngbe Bëtsábioica jashjanguama. ⁷ Tšëngaftanga atše šmojtšábuatmëse, atšbe Taitánaca šmattsábuatma. Morscana ya cha šmontsábuatma y cha šmontsonyá ca —tbojanayana.

⁸ Pero Felipe tbojanayana: —Atšbe Utabná, nye chë Taitá šmanyanyé, ndayama más ca.

⁹ Chora Jesús tbojanayana: —Chëfta te tšëngaftangaftaca sëntsemna, y ¿cabá ndoñe atše šcontsábuatma, Felipe? Nda atše šojinye, chë Taitá Bëngbe Bëtsábioynaca jinýana. As, ¿ntšamo atše šcojtsatsá, chë Taitá šmanyanyé ca? ¹⁰ ¿Ndoñe condošbuaché, atšbe Taitá átsbeñe y átsnaca chábeñe nye canýacá ftsmënana? Chë cbontsëtsëtsná soyënga, ndoñe nye atšbe juábnaca chca quetsatoyebuambná. Atšbe Taitá, chë átsbeñe vida endbomná jtsamana lempe ntšamo stsamcá. ¹¹ Muiñe šmochtsošbuáchiye: Atšbe Taitá átsbeñe endmëna, y átsnaca chábeñe mo nye canýacá sëndmëna. Chama ndoñe šmontsošbuachese, as nye chë tijama soyëngámnaca átsbeñe šmochtsošbuáchiye. ¹² Ndegombre šcuayana, nda átsbeñe tojtssošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átsbeñe ošbuachiyá, chama más bëts soyënga echanjama. ¹³ Tšëngaftanga ndaye sóynaca Bëngbe Bëtsábioye šmojtjañe, y chca šmojama atše jótšëmbonëse, átsbeñe šmošbuachéyeca, lempe šmochanjóyëngacñe; chca, chë Uaquiñá echanjinýanyiye chë Taitá corente bëtsá y obená yomnana. ¹⁴ Tšëngaftanga ndaye sóynaca atše šmojtjañe, y chca šmojama atše jótšëmbonëse, átsbeñe šmošbuachéyeca, atše chë soye chanjama ca —Jesús tojánayana.

Jesús tojanasebuachená chë Uámana Espíritu jíchmuama

¹⁵ Měntśánaca Jesús tojánayana: “Tšëngaftanga atše šmojtsebobonshánëse, ntšamo cbontsamëndacá cachcá šmochanjama. ¹⁶ Chca chašmojamëse, atšbe Taitá Bëngbe Bëtsá tšëngaftangbiama chanjaimpáda, tšëngaftanga jabújabuachama y jabáñemuayama inýa cha chabuichmoma, chë Uajabuachaná nyetsca tescama tšëngaftangaftaca

chauétsemnama. ¹⁷ Cha, chë Uámana Espíritu endmëna chë nyetsca soyënguiñe ntšamo ndegombre yomncá oyebuambnayá. Chë nye quem luarama enójuabnaye entšanga, chë átšbeñe ndošbuáchiyënga ndoñe quematonýá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aíñe cha šmotsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

¹⁸ “Atše ndoñe quebocháisabashejuana, mo uajchonga cuenta chašmotsemnama. Tšëngaftangbiye chanjésabo. ¹⁹ Muentšana baseftaytese, chë nye quem luarama enójuabnaye entšanga ndoñe más quešmochátönyaye; pero tšëngaftangna aíñe, atše cachiñe šmochántinýe. Atše ainá chántsemna, chíyeca tšëngaftanga átšeftaca tšabe vida šmochántsebmna. ²⁰ Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatšëmbo, atše atšbe Taitábeñe nye canýacá tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nye canýacá šmomnama y átšnaca tšëngaftangaftaca. ²¹ Nda totátšëmbo ntšamo atše tijamandacá y siempre chca tojtsama, cha ndegombre šojtsebobonshana. Nda átšbiye šojtsebobonshana, chábiye atšbe Taitánaca bochantsebobonshana. Atšnaca cha chántsebobonshana, y nda atše tsmënama cha chanjinýinýiye ca” —Jesús tojánayana.

²² Chora, inýe Judas, ndoñe Judas chë Iscariote, Jesúsbiye tbojanianana: —Bëngbe Utabná, ¿ntšamo chca yojtsemna, nye bënga šcochjínýanýiye ntšamo cach aca connama, y nyetsca quem luarentšëngbiye ndoñe ca?

²³ Chora Jesús tbojanjuá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábiye bochantsebobonshana, y bëndata chábiye fchanjabo y chábeñe vida fchantsebmna. ²⁴ Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nye atšbe juábna quenátsmëna, sinó chë Taitá, chë šonjichmó chabe juábna.

²⁵ “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. ²⁶ Chë Uajabuachaná, chë Uámana Espíritu, atšbe impadanánaca atšbe Taitá bochanjíchmua. Cha lempe cmochántsabuatambaye, y echanjama nyetsca chë tcbonjáuyana soyëngama chašmuatenójuaboma.

²⁷ “Chë atšbe ainaniñe puerte tšabe ebionana tšëngaftangbiamá šcuétsebošhiona, cbetsatšatá. Chë nye quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana. ²⁸ Ya šmonjouena ntšamo tcbonjáuyancá: ‘chanjá y tšëngaftangbiye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábiye jama šojtsemnama, er chë Taitá atšbiamá más bëtsá endmëna. ²⁹ Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

³⁰ “Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangaftaca quichaisóyeuambaye. Pero cha ton-daya quenátobena atše jabórlana. ³¹ Masque cha chca endmëna, chca entsemna, atše chë Taitábiye tsbobonshánama quem luarentša entšanga

chamotsetatšëmbuama. Ntšamo atšbe Taitá šojamandacá, atšbe cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanéyana.

15

Jesús yomna mo chë tšabe uvas betiyá

¹ Mëntšánaca Jesús tojánayana: “Atšbe sëndmëna mo chë tšabe uvas betiyá, y atšbe Taitá Bëngbe Bëtsá chë tšabe uvas betiye inyënacá. ² Chë inyëná, chë uvas betiyentša buacuafjënga ndëshajuanëfjënga jtsebuacuetëtsetšana; pero chë uvas betiyentša buacuafjënga shajuanëfjënga jtsobolímpiana, bëtská chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga. ³ Tšëngaftanga šmonjouena ntšamo tijayancá; bëtská chca šmontsama. Chíyeca mora tšëngaftanga šmontsemna mo chë límpiana y shajuana buacuafjëngcá. ⁴ Atšeftaca cánýiñe mo canýacá šmochtsemna y atšbe tšëngaftangaftácnaca. Chë buacuafja uvas betiyentšana juanánëfja ndoñe ntsobenana nýe cachabe ponto jashájonana. Cachcá, tšëngaftanga átšeftaca ndoñe cánýiñe mo canýacá šmontsemnëse, ndoñe šmattsobena Bëngbe Bëtsabiana bëtská soyënga jamama.

⁵ “Atšbe chë tšabe uvas betiyá sëndmëna y tšëngaftanga chë buacuafjëngcá. Nda átšeftaca cánýiñe mo canýacá tojtsemna y atšbe cháftacnaca, cha Bëngbe Bëtsabiana bëtská soyënga echanjama, mo canýe buacuafja becá tojtsehanjancá. Er, tšëngaftanga atšbe uajabuáchenana ndoñe šmontsebomnëse, átšeftaca cánýiñe mo canýacá ndoñe šmontsemna causa, tondaye šmattsobena jamama. ⁶ Canýa átšeftaca cánýiñe mo canýacá ndoñe tontsemnëse, cha jtsemnana mo canýe buacuetëtsetšana buacuafja, utšenëfja y buashánëfjácá. Chca buacuafjënga, entšanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cánýiñe mo canýacá tontsemna, ndoservená jtsemnana y luaroca cha mochantsesegóra.

⁷ “Tšëngaftanga átšeftaca cánýiñe mo canýacá šmojtsemna y ntšamo atšbe tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. ⁸ Chë shajuana buacuafjëngcá tšëngaftanga chašmojtsemna ora, šmochanjínýanýiye atšbe Taitá corente bëtsá y obená yomnana. Y chca, tšëngaftanga atšbe ndegombre uatsjëndayënga šmochántsemna. ⁹ Ntšamo chë Taitá šondbobonshancá, átšnaca cachcá tšëngaftanga cbondábabuanýeshana. Chíyeca, šmochtsiyena atšbe bonshánama jtsejuabnáyëse. ¹⁰ Atšbe sëndama ntšamo atšbe Taitá šondëmandacá. Chíyeca atšbe sëndoyena chabe bonshánama jtsejuabnáyëse. Cachcá tšëngaftángnaca, ntšamo atšbe cbontsamëndacá šmojtsamëse, atšbe bonshánama jtsejuabnáyëse šmochantsiyena.

¹¹ “Atšbe chca cbontsëtsetšná, chë atšbe sëntsebmoma oyejuayana tšëngaftángnaca chašmotsebomnana, y tšëngaftanga puerte chašmotsóyejuama. ¹² Mëntšá cbetsamëndá: Ntšamo atšbe cbondababuanýeshancá, cachcá šmochtsenbobonshana. ¹³ Chë chabe amiguëngbiana tojóbanabiana, ndocna quenátobena chabiana más bonshánana jtsebmomnana. ¹⁴ Ntšamo atšbe tijamandacá tšëngaftanga šmojtsamëse, atšbe amiguënga šmochántsemna. ¹⁵ Chë oservená ndoñe ntsetatšëmbuana ndaya chabe nduñño tojtsamama. Chíyeca

atše tsëngaftanga oservénënga ca ndoñe quecbatëtsëtsná. Morscana mëntsá cbontsëtsëtsná: ‘Tsëngaftangna atšbe amiguënga šmontsemna ca’, er lempe ntšamo atšbe Taitábentsana tijuatsjinýcá, tsëngaftanga tchonjinýané. ¹⁶ Tsëngaftanga ndoñe atše chešmatábuayana, pero atše aíñe tsëngaftanga tchonjabacacá y tchonjubuáyana, Bëngbe Bëtsabe trabajo jamama; y chca, mo canýe betiye sempre tojtseshajuana y chë shajuana ndocna te tontsopochocacá, tsëngaftanga chašmotsemnana. Chca, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. ¹⁷ Mëntsá atše cbetsamëndá: Smochtsenbobonshana ca” —Jesús tojánéyana.

Jesús y chabe entsanga, chë nýe quem luarama enójuabnayëngbiana uaboyëñjanënga

¹⁸ Mëntsánaca Jesús tojánayana: “Pero chë nýe quem luarama enójuabnaye entsanga tcmojtsëbuayëñjëse, šmochjenójuaboye, natsana chënga atše šmonjanáboyënjama. ¹⁹ Tsëngaftanga, chë nýe quem luarama enójuabnaye entsanguentsana šmojtsemnëse, chënga cmattsababuánýeshana cachëngbengbioycá. Pero tsëngaftanga ndoñe chë nýe quem luarama enójuabnaye entsanguentsana quešmátsmëna, y atšna, chë quem luare oyenënguentsana tsëngaftanga tchonjabacacá. Chíyeca chë nýe quem luarama enójuabnaye entsanga tsëngaftanga cmontsëbuayëña. ²⁰ Smochjenójuaboye ntšamo tchonjáuyanama: ‘Chë oservená chabe nduiñbiana ndoñe más uamaná quenátsmëna ca’. Chënga monjánama atše chaisufrima; tsëngaftángnaca chašmotsesufrínama mochántsama. Entšanga ntšamo atše tijayanentsana ntsachetšá tmojtsamcá, cachcá chënga mochántsama ntšamo tsëngaftanga chašmojtsëtsëtsná chentšana. ²¹ Chë chacmojtsëbuayëñjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

²² “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebomna. Pero mora, chëngbe bacna soyëngama chënga ndoñe quemátobena jayanana, ‘¡Chca fsëñjama ntsetatšëmbcá ca!’ ²³ Nda atše šojtsáboyëña, atšbe Taitábioynaca jtsáboyëñjana. ²⁴ Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebomna. Pero mora, masque ntšamo sënjamcá tmonjinýëse, chënga atše šmontsáboyëña y atšbe Taitábioynaca. ²⁵ Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntsá endayana: ‘Nýe tondayama chënga šmonjanáboyëña ca.’

²⁶ “Atše, atšbe Taitábentsana chë Uajabuachaná y añemuayá tsëngaftangbiye chanjíchmuá. Cha chë Uámana Espíritu endmëna, chë nýetsca soyënguiñe ntšamo ndegombre yomncá oyebuambnayá. Cha endmëna chë Taitábentsana ichmoná; y cha lempe atšbe tsabe soyënga cmochantsëtsëtsnaye. ²⁷ Chorscana, tsëngaftángnaca atšbiana entsanga šmochantsëtsëtsnaye, er tsëngaftanga átšeftaca šmondëtsemna, entsanga jábuayenama atše sënjanbojatšé orscana ca” —Jesús tojánayana.

16

¹ Mëntsánaca Jesús tojánayana: “Atše quem soyënga cbontsëtsëtsná, tsëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. ² Chëngna, chë judiëngbe enefjuana yebnënguentsana cmochantëbuacana. Chca tempo chaojobuache ora,

chë tsëngaftanga chacmojtsëbáyënga mëntsá mochántsejuabnaye: ‘Bënga tsábá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’³ Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye.⁴ Atše chca tsëngaftanga chbontsëtsëtsná, ntšamo tcbonjúyanama chašmuenójuaboma, chca tempo chaojobuache ora ca” —Jesús tojánayana.

Ndayá chë Uámana Espíritu inétsama

Mëntsánaca tojánayana: “Entšanga jábuayenama sënjanbojatšë orscana, chë echanjopása soyëngama ndoñe quecbënjatanëtsëtsná, er atše tsëngaftangaftaca sënjetsemna.⁵ Pero morna, chë šojichmó cha yomnoye chantá; y tsëngaftanguentsá ndocná šochanjatjaye, ‘¿ndëmoye cojtsá ca?’⁶ Mora, tsëngaftangbe ainana ngménaca entsemna, atše chca tcbonjúyana causa.⁷ Pero ndegombre šcuayana: Atše chanjá y chca tsëngaftangbe tsábiana echántsemna. Atše ndoñe quetsjase, chë Uajabuachaná y añemuayá ndoñe tsëngaftangbioye queochátabo. Pero aíñe chanjá, y chora cha tsëngaftangbioye chanjíchmuá.⁸ Cha chaojášhango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominiñe tsábiana jtsemnana, y ndayá yomna chë Bëngbe Bëtsá entšangbiana jayanana tsábá o ndoñe tsábá tmonjamama.⁹ Entšanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana.¹⁰ Chë Taitábioye chanjá y atše ndoñe más quešmochátinje. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominiñe tsábiana jtsemnana.¹¹ Quem luarentša bacna soyënga mándayabiana Bëngbe Bëtsá ya tonjayana, ntšamo cha tojamama ndoñe tsábá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiana jayanana tsábá o ndoñe tsábá tmonjamama.

¹² “Atše cabá ba soyënga séntsebmoma tsëngaftanga jáuyanama. Masque chcasna, mora tsëngaftanga ndoñe quešmatobena chë soyëngama josértana.¹³ Pero chë Uámana Espíritu, chë nyetsca soyënguiñe ntšamo ndegombre yomncá oyebuambnayá, chaojášhango ora, lempe ntšamo ndegombre yomncá cmochanjabuatabá. Cha ndoñe nye cachabe juábnaca queochátoyebuambnaye. Ntšamo chë Taitá chábioye tbojauyancá, tsëngaftanga cachcá cmochanjáuyanama, y cha cmochanjábuayenaye ntšamo yochjopásama.¹⁴ Atšbe soyënguentšana cha echanjójëngacñe, y cach soyëngama cmochanjabuatabá. Chcase cha cmochanjínñanñiye atše bëtsá y obená bëtsemnana.¹⁵ Lempe ntšamo chë Taitá endbomncá, atšbe soyëngnaca endmëna. Chíyeca atše tcbonjúyana, chë Uámana Espíritu atšbe soyënguentšana yochjójëngacñe y cach soyëngama cmochanjabuatabá ca.”

¹⁶ “Baseftayté y atše ndoñe más quešmochátinje. Inje baseftayté y cachiñe šmochantëtinje ca” —Jesús tojanëyana.

“Tsëngaftangbe ngménana, oyejuayana echanjóbema”

¹⁷ Chora Jesusbe básefta uatsjëndayënga imojtsentjanaye: —¿Ntšamo yojtsentšáyana, chë “baseftayté y atše ndoñe más quešmochátinje, y

inÿe baseftayté y cachiñe atse šmochantétinÿe, er atse chë Taitábioye chanjá ca”? ¹⁸ ¿Ntšamo yojtsentšáyana, chë “baseftayté ca”? Ndoñe quemuátstatšëmbo ntšamo yojtsentšáyanama ca —chënga imojtsichamo.

¹⁹ Jesús yojtsetátšëmbo chënga chca jatjayama imojtsebošama, y tojanëyana: —Atse tcbonjáuyana: “Baseftayté y atse ya ndoñe más quešmochátinÿe, y inÿe baseftayté y cachiñe atse šmochantétinÿe ca.” ¿Chë soyëngama šmojtstentjaná ntšamo tsentšáyanama? ²⁰ Ndegombre šcuayana: Tšëngaftanga šmochanjenóbošachna y puerte ngmëñënga šmochántsemna, pero chë nÿe quem luarama enójuabnaye entšanga corente oyejuayënga mochántsemna. Masque tša ngmëñënga šmochántsemna, chentšana tšëngaftangbe ngmëñana, oyejuayana echanjóbema. ²¹ Canÿe shembása tbojontšabuache šešona jónÿnama ora, tša ngmëñaca cha jésemnana, puerte tbojtsetsetše causa. Chë šešona ya tojonÿná ora, cha ndoñe ntsenójuabnayana chë tša ibuántsetšama. Canÿe šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana. ²² Ndegombre, tšëngaftángnaca cachcá, chora tša ngmëñaca šmochántsemna. Pero atse tšëngaftangbioye chajjésabo ora, atse šmochantétinÿe y corente oyejuayënga šmochántsmëna. Y ndocná queochatobenaye chë oyejuayana jabuajuánana.

²³ “Chë te chaojóshjango ora, tšëngaftanga ndocá atse quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atse jótšëmbonëse, átšbeñe šmošbuachéyeca, cha lempe cmochanjátataye. ²⁴ Mëntscoñama, atšbe Taitá tondaye chešmatotjañe atse jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebmna ca” —Jesús tojanëyana.

Jesucristo, quem luarentše mandayábioye yëñjanayá

²⁵ Mëntšánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atse ya ndoñe más cuentëngaca quechóhátëtsëtsnaye; chë cuentna, puerte botamana lempe atšbe Taitabiana cbochanjáuyana. ²⁶ Chë tena, atse jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atse chëyana; chca, chë te ndoñe quešochatájaboto tšëngaftangbiana atšbe Taitá jatsimpadánana. ²⁷ Atse ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atse šmondobonshánama, y Bëngbe Bëtsábiocana atse tijabama smojtsošbuáchema, chë Taitá cmondábabuanÿeshana. ²⁸ Atse chë Taitábiocana sënjabocna y quem luaroye sënjabo. Pero mora quem luare chanjëftsebošhona atšbe Taitábioye jtama ca” —Jesús tojánayana.

²⁹ Chora chabe uatsjëndayënga tmojanianayana: —Mora ya ndoñe cuentëngaca quecatoyebuambná, chiyecca lempe paselo josértama bëngbiana entsemna. ³⁰ Mora fsëntsetatšëmbo aca nÿetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabatmana, chënga cabá aca ndëtjaye ora. Chiyecca bënga fsëntsošbuaché aca Bëngbe Bëtsábiocana tcojabama ca —chënga tmojanianayana.

³¹ As Jesús tojanëyana: —¿Mora chiñe smojtsošbuaché ca? ³² Ya tempo tojobuache y cam ora entsemna, tšëngaftanga nÿetsquénache šmochanjúashana y atse nÿe canÿa šmochanjésebošhona. Pero atse ndoñe nÿe canÿa quichátsmëna, chë Taitá átseftaca entsémnayeca. ³³ Atse lempe

quem soyënga cbontsëtsëtná, tšëngaftangbe ainaniñe tšabe ebionana chašmotseboznama, átseftaca cánÿiñe mo canÿacá jtsemnëse. Quem luarentše šmochanjasufrina; pero añemo šmochtseboznama, atše ya chë quem luarentša mandayá sënjayëñjaná ca —Jesús tojánayana.

17

Jesús chabe uatsjëndayëngbiama Bëngbe Bëtsábioye tbojanimpadá

¹ Jesús chë soyënga tojánayanentšana, celoye tojanontješé y Bëngbe Bëtsábioye tbojanianana: “Taita, atšbe te ya tocojbuache. Minÿanyé, atše acbe Uaquiñá, corente bëtsá y obená bëtsemnana. As, atše acbe Uaquiñá, aca corente bëtsá y obená comnana chainÿanjëma. ² Mora aca nÿets obenana šconjatšetá nÿetsca entšángbeñe, nÿetscanga chë atšbiana tcojábacacanga chë nÿetsca tescama yomna tšabe vida chamotseboznama atše chaimama. ³ Chë nÿetsca tescama yomna tšabe vida jtseboznana endmëna aca, chë nÿe canÿe y ndegombre Bëngbe Bëtsá jtsabuatzmana, y atše Jesucristo, acbe ichmoná.

⁴ “Lempe ntšamo šconjamandacá atše sënjapochocá, y chca quem luariñe sënjama aca corente bëtsá y obená comnana jinÿanjÿiyama. ⁵ Taita, quem luare cabá ndoñe quenjatsmëna ora, aca tconjaninÿanjë atše corente bëtsá y obená ácaftaca bëtsemnana. Mora moma atše cachcá ácaftaca chaitsemnana.

⁶ “Aca quem luarentša entšanguentšana quem boyabásenga tconjabacacá y atšbiana šconjinÿinÿyé. Atše chënga sënjanÿanjë ntšamo ndegombre aca comnana. Chënga acbe entšanga mondmëna; y acna, chë atšbiana chënga šconjinÿinÿiyá. Chënga acbe palabra tmonjouena y tšabá tconjoyeuná. ⁷ Chíyeca chënga mondetatšëmbo, lempe ntšamo atše tsbomncá ácbentšana tijóyëngacñama. ⁸ Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondetatšëmbo atše acbiocana tijabama, y montsošbuaché aca chë atše šcojichmó cha comnana.

⁹ “Atše chëngbiama cbontseimpadana. Chë nÿe quem luarama enójuabnaye entšangbiama ndoñe quecbátsimpadana, pero añe chë atšbiana šcojinÿinÿiyëngbiama, er chënga acbe entšanga mondmëna. ¹⁰ Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidëngaca aca tcojinÿanjë atše corente bëtsá y obená bëtsemnana.

¹¹ “Atše ndoñe quem luarentše quešocháisetotona, pero chënga añe cabá camuentše mochanjëftsemna. Atše chantá ácaftaca jtsatsmënama. Uámana Taitá, chë atšbiana šconjinÿinÿiyënga acbe obenánaca cochtšanÿena. Chca ntšamo bëndata mo canÿacá bondmëna, chëngnaca cachcá chamotsemnana. ¹² Atše chëngaftaca sëntsemnëntscuana, chënga sëntšanÿena, aca šconjatšetá obenánaca. Atše chënga sëndánÿena, y ni canÿa queochátsmëna infernoca pochocaná, nÿe chë infernoca pochocaná jtsemnana ibomná chana añe, ntšamo acbe uabemana palabrenguiñe endayancá, cachcá chaotsemnana.

¹³ “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtná, chca, chë atše sëntseboznama puerte bëtscá oyejuayana chëngnaca chamotseboznama. ¹⁴ Atše chënga sënjáuyana ntšamo aca šcojauyancá. Ntšamo atše ndoñe quetsátsmëna chë nÿe quem luarama enójuabnaye entšanguentšá,

cachcá, chënga cach ndoñe quemátsmëna. Chíyeca, chë nÿe quem luarama enójuabnaye entšanga chënga montsëbuayënja. ¹⁵ Atše ndoñe quecbátsimpadana, chënga quem luarentšana chacúbuacanama; pero aíñe, nÿetsca bacna soyënguentšana chacuatsebacama. ¹⁶ Ntšamo atše ndoñe quetsátsmëna chë nÿe quem luarama enójuabnaye entšanguentšá, cachcá, chënga cach ndoñe quemátsmëna. ¹⁷ Cochjama chënga acbe entšanga chamuétsemnama, y chca, nÿe acbiama vida chamotsebobna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. ¹⁸ Ntšamo aca quem luaroje šconjanichmocá, cachcá átšnaca chënga sentsachamná, quem luare entšanga jábuayenama. ¹⁹ Chëngbiamá atše cachiñe mëntšá cbëyana: Atše nÿe acbiama sëndmëna. Y chca, chëngnaca, ntšamo acbiama ndegombre yomncá jtsóyebuambnayëse acbe entšanga chamotsemna, y chca, nÿe acbiama vida chamuétsebobna, ntšamo ndegombre yomncá chënga imoyenama.

²⁰ “Pero nÿe chëngbiamá ndoñe quecbátsimpadana, sinó chë átšbeñe mochtsošbuáchiyëngbiamnaca, chë atšbiamá šconjínÿinÿiyënga, chëngbioye atšbiamá ínÿenga chamojtsabuayiná ora; ²¹ as chënga nÿetscanga cánÿiñe mo canÿacá chamotsemnama. Ntšamo aca, Taita, átšeftaca cánÿiñe mo canÿacá bondmëna y átšnaca ácaftaca, cachcá chëngnaca cánÿiñe mo canÿacá bëndátaftaca chamotsemnama cbontseimpadana. Y chca, quem luarentša nÿetsca entšanga, atše šcojichmoma chamotsošbuáchema. ²² Ntšamo chë obenana y uámanana šconjatsetacá, cachcá átšnaca chënga sënjatsatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnama. ²³ Atše chëngbe ainaniñe sëntsemna, y aca átšeftaca cánÿiñe mo canÿacá bondmëna; as, chëngnaca nÿetsca soyënguiñe cánÿiñe mo canÿacá chamotsemnama. Y chca, quem luarentša entšanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

²⁴ “Taita, atšbiamá chënga šconjínÿinÿiye. Atše mëntšá sëntseboše: chë atše chántsemnama, chëngnaca chamotsemna, y chentše, chë šconjatsetá obenana y uámanana chënga chámuinÿe. Quem luare cabá ndoñe quenjatsmëna orscana, šconjábobonshana; chíyeca, cachora tconjaninÿyanÿé atše corente bëtšá y obená bétsemnama. ²⁵ Taita, nÿetsca soyënguiñe tšabá amá, masque chë nÿe quem luarama enójuabnaye entšanga ndoñe quematábuatma, atše aíñe cbonduábuatma, y quem boyabásenga montsetátšëmbo, aca comna chë šcojichmó cha. ²⁶ Atše chënga sënjinÿyanÿé ntšamo ndegombre aca comnama, y más chanjínÿanÿiye; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.

18

Uayayënga Jesús tmojánishache

(Mt 26.47-56; Mc 14.43-50; Lc 22.47-53)

¹ Chë soyënga Jesús tojëftsanayanentšana, chabe uatsjëndayëngaftaca tojëftsanbobna, chë binche béjaye Cedrón ca uabániye chenguana jama. Chentše inamna canÿe tjšahetema; y Jesús chabe uatsjëndayëngaftaca choye tojánamengo. ² Y Judas, chë Jesús uayayëngbe cucuatšíñe boshjuaná, tšabá chë luare yojanábuatma, er Jesús y chabe uatsjëndayënga

ba soye chentše imojánenefjuana. ³ Chora Judas tojánashjango, y cháftaca ba soldadënga y básefta Bëngbe Bëtsabe bëts yebnoca josticiënga; chënga imojamna chë bachnangbe amëndayënga y fariseungbe ichmónënga; nÿetscanga uajuinÿanëshangaca, lamparëshangaca y espadëjangaca uajátënga.

⁴ Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entsanga tojanëyana: —¿Nda šmojtsenguá ca?

⁵ Y chënga tmojanjuá: —Jesús, chë Nazaretocá fsëntsenguá ca.

As Jesús tojanëjua: —Atše cha sëndmëna ca.

Y Judas, chë boshjuaná, chánaca chë entsángaftaca yojtsemna. ⁶ Jesús tojanëyana: “Atše cha sëndmëna ca”, y cachora chë entsanga tmojtanostëtšánanga y fshantsoye tmojánshajaye.

⁷ Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

⁸ As Jesús tojanëyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónÿaye chamotsóñëngama ca.

⁹ Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínÿinÿiye entsanguentsana ni canÿa pochocana queochátsmëna ca”.

¹⁰ Simón Pedro canÿe espadëja inasëngbuájonÿana; asna, tojanenosëngbotëntšena y chë bachnangbe más uámana amëndayabe canÿe oservenábioye catšbioica matscuaše tbojtsanëštjango. Chë oservená Malco ca inauabaina. ¹¹ As Jesús, Pédrëbioye tbojanianyana: “Acbe espadëja matosëngbuajonÿá. Ntšamo atšbe Taitá Bëngbe Bëtsá tojanmandacá, chë atše puerte ngmënana jtsebomnama, ¿ndoñe chca chaondëtsemna ca?”

Jesús, Anasbe yebnoca

(Mt 26.57-58; Mc 14.53-54; Lc 22.54)

¹² Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuëbatsëca.

¹³ Natsanëna, Anás, Caifasbe uambën taitábioye Jesús tmojanánatse. Caifás chë uata inamna chë bachnangbe más uámana amëndayá.

¹⁴ Caifás yojamna nda judiënga tojanëyana: “Tšëngafangbiamá más tšabá entsemna canÿe boyabása Israeloca entsangbiamá chaóbana ca.”

Pedro tojánayana Jesúsbioye ndoñe bonjanabuátma ca

(Mt 26.69-70; Mc 14.66-68; Lc 22.55-57)

¹⁵ Simón Pedro y inÿe uatsjendayá Anasbe yebnoye Jesús imojtsëstona. Chë inÿe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana. ¹⁶ Pero Pédrëna nÿe shjoca, amashjuanentše tojanoquedá. Chcasna, chë inÿe uatsjendayá tojánbocna y chë bësásá ebtafjuana shembásaftaca tojanoyebuambá. Chora Pedro tbojanëmashëngo. ¹⁷ As chë shembása Pédrëbioye tbojanianyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

¹⁸ Tša yojtsesësna causna, chë oservënënga y chë josticiënga shjoca tmojanniñe y chentše imojtósboniye. Y Pédrënaca chëngaftaca yojtsešbonena.

Ntšamo chë bachnangbe más uámana pasado amëndayá, Jesúsbioye tbojantjá

(Mt 26.59-66; Mc 14.55-64; Lc 22.66-71)

¹⁹ Chora, chë bachnangbe más uámana pasado amëndayá tojanontsé Jesús jatjayama chabe uatsjéndayëngbiama y ndayá cha entšanga vojánabuatambamnaca. ²⁰ Y Jesús tbojanjuá: —Atše nÿetsca entšangbe delante sënjoyebuambá. Sempre chë entšangbe enefjuana yebnënguenache sëndabuatambá, y Bëngbe Bëtsabe bëts yebnócnaca, nÿetsca judiënga mondbëtsenefjuanentše; y chca, iytëmencá tondaye chiyatoyebuambá. ²¹ ¿Ndáyeca chca šcojstetjaná? Atšbe palabra tmojouenënga májtjaye, as chënga chacmëyana ntšamo atše tijáuyanama. Chënga mondétatšëmbo ntšamo atše tijayanca ca —Jesús tbojanjuá.

²² Jesús chë soyënga tojánayana ora, canÿe josticio chentše yojtsemná, Jesúsbioye tbojanjuebjantšetá y tbojaniyana: —¿Chca chë bachnangbe más uámana amëndayá cuanjojuá ca?

²³ Y Jesús tbojanjuá: —Ndoñe tšabá tijayanësna, šmëyana ndayentše chë podesca palabra yojtsemna; y tšabá tijóyebuambasna, ¿ndáyeca šcojajuebjantšetá ca?

²⁴ Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

Pedro cachiñe tojánayana Jesúsbioye ndoñe bonjanabuátma ca

(Mt 26.71-75; Mc 14.69-72; Lc 22.58-62)

²⁵ Chëntscuana, Pedro yojtsešbonena, tsanana chë iñe juachaca. Chora chë entšanga tmojantjá: —¿Aca ndoñe chabe uatsjendayënguentšá condmëna ca?

Y Pedro ndoñe ca tojánayana: —Atše ndoñe quetsátsmëna ca —cha tojánayana.

²⁶ Chora, chë bachnangbe más uámana amëndayabe canÿe oservená Pédrëbioye tbojaniyana: —¿Atše ndoñe cháftaca chë tjashetémoca tcbonjinÿe ca?

Chë oservená inamna chë Pedro tbojtsanmatstëtšabe pamillo.

²⁷ Y Pédrëna cachiñe ndoñe ca tojánayana, y cachora canÿe ngallo yojacánta.

Jesús Pilatbe delante

(Mt 27.1-2, 11-14; Mc 15.1-5; Lc 23.1-5)

²⁸ Chentšana, Caifasbe yebnentšana Jesús tmojanánatse chë romano mandadbe yebnoye. Ya yojtsebínÿana, y chë bëts yebnoye chë judiënga ndoñe tmonjánamashjna, er chënga imojtseboše chë Bashco saná jasama. Judiënga ndoñe imonjobena Bashco saná jasana, chca tempo canÿe ndoñe judiëbe yebnoye nda tojámashënguse. ²⁹ Chíyeca Pilato tojánbocna y chënga tojanëyana: —¿Ndayá quem boyabásabe contra šmochjayana ca?

³⁰ Chora chë entšanga tmojanjuá: —Bacá uamaná ndoñe tontsemnëse, ndoñe matifjuánatse ca.

³¹ As Pilato tojanëyana: —Tšëngaftanga matánatse, y ntšamo cach tšëngaftangbe leyíñe iyayancá muabiamama šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

³² Chca tojanopasá, ana ntšamo Jesús cachá jóbanama tojanayancá cachá chaotsemnama. ³³ As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

³⁴ Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínÿenga atšbiana tcmojacuentáyeca ca?

³⁵ Chora Pilato tbojaniana: —¿Mo atše judío quetsmëna? Cach ábioca entšanga y chë bachnangbe amëndayënga muentše tcmonjúshjango. ¿Ndayá tcojama ca?

³⁶ Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatsiñe ndoñe chašmondoboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

³⁷ As Pilato tbojaniana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonÿná y quem luaroye tijabo; y atše sënjabo ndegombre soyëngama jabóyebuambayama. Y chca soyënga jtsamëse tmoyenënga, atše jtseyenanána ca.

³⁸ Chora Pilato tbojaniana: —¿Y ndayase chë ndegombre soye yomna ca?

Jesusbiana tmojánayana chaóbana ca
(Mt 27.15-31; Mc 15.6-20; Lc 23.13-25)

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanëyana: —Atše ni mo canÿe soye chiyátinÿena, quem boyabása castiganá chaotsemna ca jayanama. ³⁹ Pero tšëngaftanga šmondëtatšëmbo, Bashco fiestama atše canÿe utamená cachá jëtsboshjonama. ¿Šmojtseboše chë judiëngbe Rey chjëtsboshjona ca?

⁴⁰ Chorna nÿetsca entšanga cachiñe tmojánáyeuachena: —¡Ndoñe, cha ndoñe! ¡Barrabás matsboshjona ca!

Barrabasa canÿe bacá uamana entšá inamna.

19

¹ Chora Pilato, Jesús tbojanánatse y tojanmandá chamotsetjanjama. ² Y canÿe coronësha uchmašëfjangaca chë soldadënga tmojanapormá y Jesús tmojanabestšajó; y canÿe shbuenda uafjatsenga entšayá mo reycá tmojanichëtjo. ³ Chorna chënga imojtsóbobecocnaye y jtsafchayama imojtsatsëtsnaye: “¡Bayté judiëngbe Rey cochtsemna ca!” Y imojtsejuebantšetaye.

⁴ Pilato cachiñe tojánbocna y entšanga tojanëyana: —Smochjouena; cha chanjuábocna, chë boyabása castiganá chaotsemna ca jayanama atše ni mo canÿe soye ndoñe sënjinÿenama chašmotsetatšëmbuama ca.

⁵ As Jesús tojánbocna chë uchmašëfjangaca coronësha uabestšajoná y chë shbuenda uafjatsenga entšayá mo reycá uichëtjoná. Y Pilato tojanëyana: —¡Muentše chë boyabása entsemna ca!

⁶ Chë bachnangbe amëndayënga y chëngbe josticiënga cha tmojáninÿe ora, tmojanontsé uayeubáchana: —¡Motsecrucificá! ¡Motsecrucificá ca!

Chora Pilato tojanëyana: —Cach tšëngaftanga mánatse y šmochjacrucificá; atše ni mo canÿe soye chiyátinÿena quem boyabása castiganá chaotsemna ca jayanama ca.

⁷ Chora chë judiënga tmojanjuá: —Bëngna canye ley fsëndbomna, ntšamo chiñe endayancana, quem boyabása jóbanama bontsemna, Bëngbe Bëtsabe Uaquiniá entsenobiamná causa ca.

⁸ Pilato chca tojanuena ora, más vojtsauatja. ⁹ Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbojanjuá. ¹⁰ Chora Pilato tbojaniana: —¿Ndoñe šcochanjojuá ca? ¿Ndoñe condétatšëmbo, aca jacrucificama o jëtsboshjonama atše tsobenama ca?

¹¹ As Jesús tbojanjuá: —Acbe obenana Bëngbe Bëtsá ndoñe macmënjánatšetase, tondaye cattsobena átšeftaca jamama; chíyeca, acbe cucuatšiče šonjaboshjoná, acbiama más bëts bacna soye tonjama ca.

¹² Cach orscana Pilato vojtsenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonësna, Césarbe amigo ndoñe condmëna! ¡Nda rey tojtšenobiamná chana, Césarbe uayayá jtsemnana ca!

¹³ Pilato chë soyënga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chë tribunaloca chashjañna hebreo biyañe Gabata ca inauabaina, y endayana “ndëtsbéngaca pormániñe ca”. ¹⁴ Bashco fiestama canye te vojtsájamna, y mo njetsto ora yojtsemna. Chora Pilato chë judiënga tojanëyana: —¡Muentše tšëngaftangbe rey entsemna ca!

¹⁵ Pero chënga tmojanáyebuachena: —¡Chaóbaná! ¡Chaóbaná! ¡Motsecrucificá ca!

As Pilato tojanatjá: —¿Tšëngaftangbe rey atše chjacrucificá ca?

Y chë bachnangbe amëndayënga tmojanjuá: —Bëngbe rey nje César endmëna, ndocná más ca.

¹⁶ Chentšana Pilato, chëngbe cucuatšiče Jesús tbojánboshjona chamocrucificama y chë judiënga cha tmojanánatse.

Jesús tmojanrucificá

(Mt 27.32-44; Mc 15.21-32; Lc 23.26-43)

¹⁷ Jesús tojánbocna chabe cruz tantšajónana y tmojanánatse canye luaroje, “Obanabe Bestšashe ca” uabáinoje (hebreo biyañe Gólgota ca inauabaina). ¹⁸ Chentše cha tmojanrucificá y inye útatnaca cátaoica tmojanrucificá; Jesusna tsëntsaca. ¹⁹ Pilato tojanmandá canye uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca. ²⁰ Y ba judiënga chë uabemana soye tmojanalía, er chë Jesús tmojanrucificá luare Jerusalenó béconana inamna, hebreo, latín y griego biyañe yojetsábemana. ²¹ Chca juabemama tojanmandáyeca, chë bachnangbe amëndayënga Pilato tmojaniana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

²² Pero Pilato tojanëjua: —Ntšamo tijuábema cachcá chaotsábemana ca.

²³ Chë soldadënga Jesús tmojanrucificá chentšana, chabe entšayangá tmojanájaca y cántañe tmojanajatá, njetasca canta soldadëngbiama. Chabe cmešëjua tmojanaca; chëjuana yojanamna nduajonanëjua, njetšëjua uabianánëjua. ²⁴ As chë soldadënga tmojáneniyana: “Ndoñe matjuátanëca; más tšabana tsbanánoje mochjútšëna, ndabiama yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrënguïñe endayancá cachcá chaotsemnana, chë “Atšbe entšayangá tmojatanájataye; atšbe cmešëjuamna tsbanánoye tmonjanëtšena, ndabiana juaquédama jtsotatšëmbuama ca.” Y lempe chca chë soldadënga tmojanma.

²⁵ Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. ²⁶ Jesús chabe mamábioye tbojáninÿe, y chabe juachacna chë Jesusbe bonshana uatsjendayá yojtsemna. Chora chabe mamá tbojaniana: “Mama, chentše acbe uaquiñá entsemna ca.”

²⁷ Y chë bonshana uatsjendayá tbojaniana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

Jesús tojanóbana

(Mt 27.45-56; Mc 15.33-41; Lc 23.44-49)

²⁸ Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrënguïñe endayancá cachcá chaotsemnana, tojánayana: “Sontsajuendá ca.”

²⁹ Chentše inamna canÿe matbaja buajútjena untja vínoyeca. As, chë soldadënga canÿe esponjëshe chë vínoyeca tmojanfchequacuá, canÿe hisopo niñëfiñe tmojananguësëtjo y játsbanase, Jesusbe uayásoye tmojanbeconá. ³⁰ Chë untja vínoye Jesús tojanofšé ora, tojánayana: “Ya lempe tojochnëngo ca.”

Tojanotsejbé y tojanóbana.

Canÿe soldado chabe lanzësaca costillaca Jesúsbioye tbojanashacuá

³¹ Bashco fiestama canÿe te yojtsámna, y chë judiënga ndoñe imontseboše chë crucificánënga cachentše chë ochnayté chamotsemnana, chë te puerte uámana te bëtsemnayeca. As Pilato tmojanimpadá chë crucificánënga shecuatšënga jetsatcacayama y chë cuerpënga chentšana jtsejuánama chaomandama. ³² As chë soldadënga tmojána y shecuatšënga imojtsatcacaye, natsana canÿa y chentšana chë inÿa, Jesúsfeftaca yojtsecrucificaná. ³³ Pero Jesúsbioye tmojanobeconá ora, ya obaná tmojáninÿe; chíyeca chabe shecuatšënga ndoñe tmonjanatcacá. ³⁴ Masque chca, canÿe soldado Jesúsbioye costillaca canÿe lanzësaca tbojanashacuá. Y cachora buiñe y búyeshe chentšana tonjanóbocna. ³⁵ Chë mëntšá cuentayá chentše enjamna y tonjáninÿe, y ndegombre entsichamo; cha endétatšëmbo ndegombre yojtsichámuama, chca, tšëngaftángnaca chiñe chašmotsošbuáchema. ³⁶ Chë soyënga chca tojanopasá, ntšamo Bëngbe Bëtsabe uabemana palabrënguïñe endayancá cachcá chaotsemnana. Chiñe endayana: “Ni mo canÿe betaše cha quemochatsëntšátca ca.” ³⁷ Y inÿoca, Bëngbe Bëtsabe uabemana palabrënguïñe endayana: “Chë tmojenachentšá bominÿe mochanjabuájua ca.”

Jesús tmojanatbontsá

(Mt 27.57-61; Mc 15.42-47; Lc 23.50-56)

³⁸ Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canÿe uestoná, masque nÿe iytécana, chë judiëngbiama auatja causa. Pilato aíñe tbojanlesenciá; as José tojána y Jesusbe cuerpo yojtsámna.

³⁹ Nicodemo, chë ibeta Jesúsbiöye tbojanbuachá, chánaca tojánashjango y tojanëyamba unga bnëtsana kilo mirra y áloe enájua bnana. ⁴⁰ As José y Nicodemo Jesúsbe cuerpo tbojanca y tmojanandmaná chë botamana uanguëtse soyéngaca unëtjona entsëjuangaca. Judiénga chca innauamana, obaná juatbontsama ora. ⁴¹ Jesús tmojanrucificá luarentse canye base jajañe inamna, y chiñe canye tsëm cuevëshe, entsangbe pormánëshe, obanëngbiana; chëshiñe cabá ndocna obaná mondëjajo. ⁴² Asna, nye chentse Jesúsbe cuerpo tmojansegorá, chë Bashco fiestama canye te yojtšájamna causa, y chë cuevëshe chë béconana inámnayeca.

20

Jesús tojtanayena

(Mt 28.1-10; Mc 16.1-8; Lc 24.1-12)

¹ Chë inye semana bojatsenté, cabá cachëse, cabá ndëbinýna ora, María Magdalena chë cuevëshoye tojána y tojáninýe inýoca yojtsemna chë cuevëshoye amashjuanentša ndëtsbé. ² Asna, tojëftsantójtajo y tojána chë Simón Pedro y chë inye uatsjendayá, ndábiöye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentsana tmojtšambañe y ndayentse tmojtšájoma ndoñe queftsátstatšëmbo ca.”

³ Chora Pedro y chë inye uatsjendayá chentšana tbojëftsanböcna y chë cuevëshoye tbojánata. ⁴ Nýets útata ibojtsëchamana, pero chë inye uatsjendayá Pédrëbiama más betscó tojanótjajo y natsana chë cuevëshoye tojánashjango. ⁵ Tojanotsejbé y chë chentse tmojanacjá entsëjuangá tojáninýe, pero choye ndoñe tonjánamashëngo. ⁶ Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninýe chë chentse tmojanacjá entsëjuangá. ⁷ Y chë Jesús juabestšentsacjuama tojanaservé entsëjuana ndoñe chë inýájua ngaca yontsamna, sinó inýoca botamana uandmanánëjua. ⁸ Chora chë inye uatsjendayá, chë cuevëshoye natsana tojanashjanguá, choye tojánamashëngo. Tojáninýe y Jesús tojtanayenama yojtšanošbuaché. ⁹ Chëntscoñe chë útata cabá ndoñe yontsörtana ntšamo Bëngbe Bëtsabe uabemana palabrénguñe endayancá, chë Jesús obanënguentsana jtayenama ibojamnama. ¹⁰ Chentšana chë uatsjéndayata chatbe oyenoye tbojtaná.

Jesús, María Magdalénbiöye tbojánëböcna

(Mc 16.9-11)

¹¹ Pero María chentse tojanoquedá, chë cuevëshe juachaca šachénaca; yojtšošachentscuana tojanotsejbé cuevëshoye jarrepárama. ¹² Y tojáninýe uta angelotémata uafjantsëjua uichëtjónata, Jesúsbe cuerpo yojëftsejajóntse ibojtsetbemana. Canya tsëntšénëshoica y chë inýana matsëscoica. ¹³ Chora chata tmojanianyana: —Shembása, ¿ndayama cošaché ca?

As cha tojanjuá: —Atšbe Utabná tmojtšambañe, y ndayentse tmojtsejájoma ndoñe quetsátstatšëmbo ca.

¹⁴ Chca tojánayana ora, tojanostëtsantješé y tojáninýe chentse Jesús yojtsemna, pero María ndoñe yontsetátšëmbo cha Jesús bëtsemnama. ¹⁵ Chora Jesús tbojanianyana: —Shembása ¿ndayama cošaché? ¿Nda congúa ca?

María yojtsejuabnaye chë boyabásana yojtsemna chentša base jajañe uaišanýá ca; chíyeca tbojantjá: —Bacó, aca tcojuambëсна, šmëyana ndayentse cojtsejájó, as atše cha jesocñama ca.

16 As Jesús tbojaniyana: —¡María ca!

Chora María chábioye tojanontješé y tbojaniyana: —¡Rabuni ca! (hebreo biyañe chca endayana “Buatëmbayá ca”).

17 Chora Jesús tbojaniyana: —Ndoñe šcatábojajo, er atše cabá ndoñe atšbe Taitábioye quetstétstsjua. Pero motsa atšbe catšátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

18 As María Magdalena tojána y Jesusbe uatsjëndayënga tojanëyana cha chë Utabnábioye tbojáninÿe ca y cha chë palabrënga tojánayana ca.

Jesús chabe uatsjëndayënga tojánebëbuacna
(Mt 28.16-20; Mc 16.14-18; Lc 24.36-49)

19 Tojanibétata ora, cach semana bojatsënté, chë uatsjëndayënga tmojánenefjna canÿe luarentše, pero lempe tmojtanatame, chë judiëngbiama auatja causa. Chora Jesús tojánamashëngo, chëngbe tsëntsaca tojantsá y mëntšá tojanacheuá: “Chë atšbe ainaniñe tšabe ebionana tšëngaftangaftaca chaotsema ca.”

20 Y chca tojanëyana ora, chabe cucuatšënga y costillaca tojaninÿanÿe. Chora chë uatsjëndayënga oyejuayënga imojtsemna, chëngbe Utabná tmojáninÿama. 21 As Jesús cachiñe tojanëyana: “Chë atšbe ainaniñe tšabe ebionana tšëngaftangaftaca chaotsemna. Ntšamo atšbe Taitá Bëngbe Bëtsá šojichmocá, átsnaca cachcá tšëngaftanga cbontšachamná ca.”

22 Chca tojánayana ora, chëngbioye tojangouo y tojanëyana: “Chë Uámana Espiritu šmochjójyëngacñe. 23 Ndëmuanÿenga chëngbe bacna soyëngama chašmojáperdonanga, perdonánënga mochántsmëna; y ndoñe chašmonjáperdonasna, ndëperdonánënga mochántsemna ca.”

Tomás, Bëngbe Utabnábioye ainá tbojáninÿe

24 Pero Tomás, chë Gemelo ca uabobainá, canÿa chë bnëtsana uta uatsjëndayënguentšá, chë uatsjëndayëngaftaca ndoñe yontsemna, Jesús tojánashjango ora.

25 Chiyeca, “bënga chë Utabná fsënjinÿe ca”, chë inÿe uatsjëndayënga tmojaniyana ora, Tomás tojanëjua: “Atšbe chabe cucuatšinë chë uajabonjana uinÿiniñe ndoñe sënjinÿe, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátosbuachiye ca.”

26 Canÿe semana tojanochnëngo ora, chë uatsjëndayënga cachiñe canÿe luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanëyana: —Atšbe ainaniñe tšabe ebionana tšëngaftangaftaca chaotsemna ca.

27 Chora Tomásbioye tbojaniyana: —Acbe ntšabuafja muentše mojué y atšbe cucuatše minÿe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayenama cochtsošbuáchiye ca.

28 As Tomás tbojaniyana: —¡Atšbe Utabná y atšbe Bëtsá ca!

29 Chora Jesús tbojaniyana: —Tomás, nÿe šconjínÿeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nÿe ntjinÿcá tmojšbuachenga ca!

Ndayama quem librëša tmojanábema

30 Jesús, chabe uatsjëndayëngbe delante inÿe bëts soyënga Bëngbe Bëtsabe obenánaca tonjëftsema, pero quem librëšañe ndoñe

quenatábemana. ³¹ Y quem librësañe soyëngna, entsábemana tšëngaftanga chašmotsošbuáchema, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe chašmojtsošbuachese, chábeyeca chë nÿetsca tescama yomna tšabe vida chašmotsebomnama.

21

Jesús, canÿsëfta chabe uatsjëndayënga tojánëbëbuacna

¹ Chca tojanopasá chentsana, Jesús inÿe soye chabe uatsjëndayënga tojánëbëbuacna, Tiberias mar béjaye tsachañe. Chora mëntsá tojanopasá: ² Cánÿentse imojëtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesusbe inÿe uta uatsjëndayata. ³ Simón Pedro chënga tojanëyana: — Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canÿe barquëshoye tmojánamashjna; pero chë ibeta tondaye tmonjáninÿena. ⁴ Ya yojtsebínÿana orna, Jesús chë tsachoca yojtsemna, pero chë uatsjëndayënga ndoñe imontsetátšëmbo cha Jesús yojamnama. ⁵ Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

⁶ As Jesús tojanëyana: —Barquëshca catsbioica chë atarraiësha mëtšena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nÿetšá beonga tmojánishëche causa. ⁷ As chë Jesusbe bonshana uatsjëndayá, Pédrëbioye tbojanianyana: “¡Bëngbe Utabná entsemna ca!”

Simón Pedro chca soye tojanuena y cachora entsáyá tojtánichëtjo, er nduichëtjoná yojtsemna, y chë béjayoye tojanoshbuëtse. ⁸ Chë inÿe uatsjëndayëngna chë barquëshañe tmojána, y chë atarraiësha jútjena beóngaca imojtsásjaye, er chë tsachocama bécoñe imojtsemna, nÿe canÿe patse metroca. ⁹ Fshantsoye tmojánastjajna ora, chënga tmojáninÿena canÿe chebániñe pormániñe, y chentsna canÿe beona y tandëšnaca yojtsesegorana. ¹⁰ Chora Jesús tojanëyana: “Chë šmonjáshebuaye beonguentšana báseftanga miyëbo ca.”

¹¹ Simón Pedro chë barquëshoye tojánamashëngo, y chë atarraiësha jútjena bëts beóngaca, uasjojónana tsachóntsoñe tojanëyamba. Mo canÿe patse y shachna bnëtsana y unga beóngaca; pero masque nÿetšá beonga, chë atarraiësha ndoñe ntjuatanëcanana. ¹² Chora Jesús tojanëyana: “Mabënga, šmochjase ca.”

Chë uatsjëndayënguentšana ni canÿa yontsenñëmua cha jatjayama nda cha yojamnama, er nÿetscanga imojtsetátšëmbo cha chë Utabná bëtsemnama. ¹³ Chora Jesús tojanobeconá, chë tandëse tojanca y chënga tojanatšatá, y chë beónacnaca cachcá tojanma.

¹⁴ Chóracna, Jesús ya unga soyama chabe uatsjëndayënga yojtsanëbëbuacana, obanënguentšana tojtanayenentšana.

Jesús, Simón Pédroftaca tojanoyebuambá

¹⁵ Jasama tmojanpochocá ora, Jesús, Simón Pédrëbioye tbojantjá: — Simón, Juanbe uaquiñá, ¿quemëngbiama más quešcbobonshana ca?

Y Pedro tbojanjuá: —Atšbe Utabná, aiñe. Aca condëtatšëmbo atše aiñe cbondbobonshánama ca.

As Jesús tbojaniyana: —Atšbe entsanga, mo oveshatemëngcá imomnënga, cochtsanÿena ca.

16 Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atšbe Utabná, aífne. Aca condétatšëmbo atše aífne cbondbobonshánama ca.

As Jesús tbojaniyana: —Atšbe entsanga, mo oveshëngcá imomnënga, cochtsanÿena ca.

17 Y unga soyama tbojtétantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbojantjá causa; y tbojanjuá: —Atšbe Utabná, aca lempe condétatšëmbo. Aca condétatšëmbo atše aífne cbondbobonshánama ca.

As Jesús tbojaniyana: —Atšbe entsanga, mo oveshëngcá imomnënga, cochtsanÿena. 18 Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacuatšënga cochanjatsbaná, y inÿa cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojaniyana.

19 Chca tojánayana, ana jtsotatšëmbuama ntšamo Pedro jóbana ibojamnama, y chë chca jóbane, Bëngbe Bëtsá corente bëtsá y obená bëtsemnama Pedro yochjáninÿanÿiyama. Y chca tojánayanentšana, Pédrëbioye tbojaniyana: —Smasto ca.

Jesusbe bonshana uatsjendayá

20 Pedro tojesanenostëtsantješé y tojáninÿe, Jesusbe bonshana uatsjendayá ústonoye yojtseye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbojantjá: “Bëngbe Utabná, ¿nda chë boshjuaná yochtsemna ca?” 21 Pedro chábioye tojáninÿe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

22 Chora Jesús tbojanjuá: —Atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? Acna nÿe šmasto ca.

23 Chíyeca, chentšana, Jesucristbeñe ošbuáchiyëngbenache nÿetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? ca”.

24 Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondétatšëmbo cha ndegombre soye endóyebuambnama.

25 Jesús inÿe ba soyënga tonjëftsema; tša bëtscá soyënga endmëna, nderado lempe cada canÿe soye tcojuábema y librëšangá tcojuapormá, atše sëntsejuabná, nÿetsca chëšangá quem luarentše ndoñe nanjuába.

Hechos

Jesús tojanašebuachená chë Uámana Espíritu jíchmuama

¹ Teófilo, atšbe natsana librěšaŋe tcbonjuábobema lempe ntšamo Jesús tojanmama y tojánabuatambama, chca tojanbojatsé orscana, ² y Běngbe Bětsá celoye tbojtanatsbanantscuana. Cabá celoye nděta orna, chë chabe ichmoněngcá tojanabacacá boyabásengna Jesús tojěftsanaměndá, chë Uámana Espíritbiajana, ndayá jamama yojánamnama. ³ Jesús cruciŋe tojanóbana y tojtanayenštana, ba soye chë ichmóněnga yojánebėbuacana, chca, chěnga jinýanyiyama cha ndegombre tojtanayenama. Canta bnětsana tentscuana cha yojánebėbuacana y Běngbe Bětsabe aměndayama chěnga yojanabuatambá.

⁴ Canýe, Jesús chabe ichmóněngaftaca yojětsemna ora, měntšá tojanaměndá: —Jerusalenštana ndoŋe šmatjábocana. Camuentše šmochjobátma, ntšamo atšbe Taitá tcmonjanašebuachenacá chaóshjanguěntscuana, ndayama atše tcbonjáuyana. ⁵ Ndegombre, Juan entšanga bėjayeca tonjanėbaye; pero ndoŋe baytesna, Běngbe Bětsá chë Uámana Espíritu bochanjíchmu, tšěngaftangbe ainaniŋe jtsemándayama cháuamashěnguama ca.

Jesús celoye tojtantsjuá

⁶ Canýe, chë ichmóněnga Jesúsftaca cánýiŋe imojtsemna ora, chěnga tmojantjá: —¿César y chë Romoquěngbe aměndayenštana tašcochjatsebacá, y mora běnga, Israeloca entšanga, canýe Rey quemochtsatsbomna ca?

⁷ As Jesús tojanėyana: —Tšěngaftanga ndoŋe quecmátamna chë soyěngama jtsetatšěmbuana. Nýe atšbe Taitá aiŋe; y cha, chabe obenánaca echanjamánda mocna ora y ndayté chca chaopasama. ⁸ Chë Uámana Espíritu tšěngaftangbe ainaniŋe jtsemándayama chaojabo ora, tšěngaftanga obenana šmochanjóyěngacŋe. Chentšana, ntšamo atšbiana šmotatšěmbcá, chë tcbonjabuatambá soyěnga, entšanga šmochjáuyana Jerusalenště, nýets Judea luariŋe, Samarioca y quem luarentša nýets luarěnguenáchnaca ca.

⁹ Chë soyěnga tojánayanenštana y chabe uatsjěndayěnga imojtsonýaye ora, Běngbe Bětsá, Jesúsbiyoe tbojtanatsbaná y canýe jantšetěshe chábiyoe ibojútsbotse y ndoŋe más tmonjanobená cha jinýama. ¹⁰ Jesús celoye yojtsetsjuama chěnga bėn imojtserreparáněntscuana, nýe ndeolpe, uta boyabásata uafjantse entšayaca bopormánata chěngbe juachaca tbojabántsaye, ¹¹ y chěngbiyoe tmojanėyana: “Galileoca entšanga, ¿ndáyeca celoye šmojtsantješana? Jesús, chë tšěngaftangftaca enjamná celoye tontá y ntšamo mora šmonjinýcá cha celoye jtama, cachcá quem luaroye cha echanjėsabo ca.”

Júdasbe cuenta Matías tmojanábuayana

¹² Jesusbe ichmóněnga chë Olivos tjšhocana Jerusalenoye tmojtaná. Chë tjocana Jerusalenóntscofiŋa bécoŋe inamna, ndayěntscoca canýe ochnayté jama yojanlesenciana nýetšá. ¹³ Jerusalenoye tmojtanashajna orna, chë yebnentša tsbanánoca tsoye tmojtanášěngo. Chentše yojánatana

Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiñá, Simón chë Celote ca uabobainá, y Judas, chë Santiagbe uaquiñá. ¹⁴ Chënga sempre imojanamana jtenefjnana Bëngbe Bëtsáftaca jencuéntama básefta shembásengaftaca, María Jesusbe mamá y Jesusbe catsátangaftaca.

¹⁵ Chë tempo tmojánenefjna canye patse y uta bnëtsana Jesucristbeñe ošbuáchiyënga, y canye, Pedro tojantsá y tojanëyana: ¹⁶ “Jesucristbeyeca atšbe catsátanga, endánëyta ntšamo Bëngbe Bëtsabe uabemana palabrenguine iuabemancá chaochnënguama, y tempo, David chë Uámana Espíritbeyeca chiñe tojanábema ntšamo Júdaseftaca yochjanopásama; chcasna, Judas uayayënga tojanënatse Jesús chamuishachama. ¹⁷ Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuine jtsoservénama. ¹⁸ Tšëngaftanga šmondëtatšëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentšana cha tojtsanótsatše y chabe bestšaše tsëntsaca tbojtsanashtëtšena y chabe uafsbentšana nyetsca chabe chunchullëjuangá tojtsanáshana. ¹⁹ Jerusalenentše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’. ²⁰ Salmos librëšañe, Jesucristo uayayëngbe cucuatšine boshjuanabiamana mëntšá enduábemana: Chabe yebna éñañe chaotsemna y ndocná chentše chaondëtsiyena ca.

Y mëntšánaca endayana:

Chabe cuenta inya chabe trabajo chaoma ca.

²¹ “Chcasna, mora muentše montsemna taitanga bëngaftaca mondenutënga, Bëngbe Utabná Jesús bëngaftaca enjamnëntscuana, ²² Juan Jesúsbiye tbonjanabaye orscana y Bëngbe Bëtsá Jesúsbiye bëngbentšana celoye tbontanatsbanantscuana. Y mora šontsamna canya mënguentsá juabuáyanama, Jesús tojtanayenama entšángbiye bëngaftaca jábuayenama ca.”

²³ As chora útata tmojanabocacá: José, nda Barsabás ca imojanábuatma y inyënga Justo ca; y chentšana Matías. ²⁴ Chora Bëngbe Bëtsáftaca mëntšá tmojanencuentá: “Bëngbe Utabná, aca nyetscangbe ainana icuabuatma; chcasna, šminyanýe nda quem útatentšana cochjuábuayanana, ²⁵ canye ichmonacá Júdasbe cuenta chaotrabajama. Judas ya ndoñe canye ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

²⁶ Y nda chë ichmoná yochtsemnama jtsotatšëmbuamna tsbanánoye tmojanëtšena y Matías tbojanobuache; as cach orscana, Jesucristbeñe ošbuáchiyënga chabiamana imojanjuabná mo canye Jesusbe ustonacá, cachcá ntšamo chë bnëtsana canye uatsjëndayëngbiama chënga imojanjuabnacá.

2

Chë Uámana Espíritu ošbuachiyëngbeñe tojánamashëngo

¹ Pentecostés ca uabaina fiesta tojanobuache ora, chë jaja sananga tmojanobuátnamana fiesta te, Jesucristbeñe ošbuáchiyënga nyetscanga cánýiñe canye luarentse imojtsemna. ² Ndeolpe, celocana mo canye jabuache binýiëcá yojtsaishauenana y chca, tša jabuache shauenanana

tojanóshjango nyets yebnentše, chënga imojtsetbiámanentše. ³ Y chora bichtajënga mo iñeshcá vojónÿna y canÿánÿabeñe yojojátaye. ⁴ Chca chë Uámana Espíritu tojánamashëngo chëngbe ainaniñe jtsemándayama; chora nyetscanga tmojanontsé inÿetšá biyangana, chënga tempo ndmabiyañe, ntšamo chë Uámana Espíritu vojtsamcá chënga inÿetšá chamotsebiyama.

⁵ Chë tempo Jerusalenentše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama. ⁶ Entšanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá vojtsopasánama, er chë inÿe luarocana áshjajnënga imojtsuenana chë Jesucristbeñe ošbuáchiyënga inÿetšá biyangana jtsóyebuambnayana, ntšamo cada ona chënga imojanbiyacá. ⁷ Chë soyëngama entšanga puerte imojenjaná y mëntšá imojtsenatsëtsnaye: “Chë chca montsóyebuambnanga Galileoquënga mondmëna. ⁸ Chcase, ¿ntšámoyeca bënga imojtsobena chënga joyaunayana cach bënga mondëbiyacá ca? ⁹ Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëngnaca, ¹⁰ Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna; ¹¹ chëngbeñe nderado judiënga camuentše onÿnánënga, pero inÿengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inÿengna Cretocana y Arabiocánëngnaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entšanga imojtsichamo.

¹² Chë causa nyetscanga imojtsenjanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye vojtsayana ca?”

¹³ Pero inÿengna, chë soyëngama chëngbioye imojtsëbayajuana y imojtsichamo: “Chënga tëmiënga montsemna ca.”

Ntšamo Pedro chora tojanoyebuambá

¹⁴ Chentšana, Pedro tojantsá chë inÿe bnëtsana canÿe ichmónëngaftaca y jabuache tojanontsé chë entšanga jáuyanana, mëntšá: “Atšbe entšanga judiënga y nyetscanga Jerusalenentše oyenënga, tšabá šmochjouena. Ntšamo tojopasama cbochanjábuayenaye, as chacmësertama. ¹⁵ Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátmëna; cabá cachëse, base mošenana ora ctsomñe. ¹⁶ Pero ntšamo entsopasánamna, Bëngbe Bëtsabe juabna oyebuambnayá Joel mëntšá tojanábema:

¹⁷ Bëngbe Bëtsá mëntšá tojánayana: ‘Quem luare jopochócama te chaojt-sobeco ora, chë soyënga echanjochnëngo.

Atše chanjama, atšbe Espíritu nyetscangbe ainaniñe cháuamashënguama. Chentšana, tšëngaftangbe uaquiñënga y bemianga atšbe soyëngama entšanga mochantsëtsëtsnaye;

tšëngaftangbe bobontšëngna, atše chanjama soyënga mochantsonÿaye mo otjenayoquécá;

y tšëngaftangbe bëtsëjmëngna atšbe soyënga mochantsotjénaye.

¹⁸ Chca ora, atše chanjama nyetsca atšbe oservénëngbiana, boyabásenga y shembásenga,

chëngbe ainaniñe atšbe Espíritu cháuamashënguama,

as chënga atšbe soyëngama entšanga mochantsëtsëtsnaye.

¹⁹ Atše chanjama bëts soyënga celoca;

y quem luariñe echántsemna buiñe, iñeshe y ngona mo jantšetëshcá, atšbe obenana jinñanñiyama.

²⁰ Cabá chë puerte uamana te, chë Bëngbe Utabná bëts soyënga jamama ndobuache ora,

shinÿe ndoñe queochátsbuashinñinñana

y juashcona buárganëtema mo buiñcá echántsemna.

²¹ Y as, ndánaca Bëngbe Utabná tbojtsotsëmbuaná, cha bochanjatsbocá.’

Chca Joel tempo tojanábema ca” —Pedro tojánayana.

²² Chora Pedro tojatanëyana: “Israeloquënga, šmochjouena ntšamo cbochanjauyancá: Bëngbe Bëtsá ndegombre tcmónjaninñanñé, Jesúsbioye chabe trabajo biamnayá cha tbojánbemama. Chë soye Bëngbe Bëtsá tcmónjaninñanñé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinñanñiyama. Cach tšëngaftanga chë soyëngama šmondëtatšëmbo, Bëngbe Bëtsabe obenánaca chë soyënga tšëngaftangbeñe Jesús tonjánmayeca.

²³ Ndegombre tšëngaftangbe cucuatšinë Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana yojamnama; y ntšamo tšëngaftanga cháftaca šmochjanmámnaca cha inatátšëmbo. Tšëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšinë. ²⁴ Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

²⁵ Chora Pedro tojatanëyana: “Rey David tempo Jesusbiamna mëntšá tojëftsanabema, ntšamo cha Bëngbe Bëtsábioye tbojanianama:

Atšbe Utabná, aca sempre átšeftaca condbëtsemna,

y siempre átšeftaca condboquedá atše juajabuáchama,

chíyeca ndocná queochatobenaye atše jauátjanama.

²⁶ Chíyeca atše corente oyejuayá sëntsemna,

y atšbe uayášaca chontsatschuaná.

Atše masque chanjóbana, tšabá sëndëtatšëmbo aca atšbe Bëtsá, atše chaitayenama cochjamama.

²⁷ Aca, Bëngbe Bëtsá, obanëngbe luarentše ndoñe quešcochátsboshjona,

y ndoñe quecochatslesencia acbe uamana oservenabe cuerpo chaot-sopochocama.

²⁸ Aca chë tšabe benache šconjaninñinñé, ntšamo tšabe vida jtsebom-nama.

Aca átšeftaca condbëtsemnama, atše puerte oyejuayá sëntsemna ca — David tojëftsanabema ca.”

²⁹ Chentšana Pedro tojatanëyana: “Baconga y batanga, šontsemna ndegombre tšëngaftanga jábuayenana tšabá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana. ³⁰ Cach David canñe Bëngbe Bëtsabe juabna oyebuambnayá inamna. Cha tšabá inatátšëmbo Bëngbe Bëtsá bëtská tbojansbuáchenama, Davidbe entšanguentšana canña, Cristo, cach Davidcá rey jabemama. ³¹ David inatátšëmbo chë Uamana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojëftsanabema, obanëngbe luarentše Cristo ndoñe ntjëftseboshjonana y Bëngbe Bëtsá ndoñe

ntjalesénciana chabe cuerpo chaotsopochocama ca. ³² Bëngbe Bëtsá tojama Jesús cháuatayenama y bënga cha fsënjinÿe. Chíyeca bënga fsëntsetatšëmbo chca ndegombre bëtsemnama. ³³ Bëngbe Bëtsá, Jesús celoye tbonanatsbaná chabe catšbioica jtsatsmënama jtsemándayama, y Bëngbe Bëtsá chë Uámama Espiritu Jesúsbioye tbojanëntšabuaché ntšamo chë Taitá tbojanšbuachenacá. Ntšamo tšëngaftanga šmontsonÿá y šmontsuenancá entsemna, Jesucrísoftaca chë Uámama Espiritu bëngbe ainaniñe cháumashënguama Bëngbe Bëtsá tojámayeca. ³⁴ David ndoñe Jesuscá celoye tonjána, pero mëntšá tojëftsaná bema:

Bëngbe Bëtsá atšbe Utabná Crístbioye tbonjaniana:

‘Atšbe catšbioica cochtsetbemana,

³⁵ acbe uayayënga acbe cucuatšifne chamoquedama atšbe obenánaca chjamëntscuana ca.’ ”

³⁶ Chora Pedro tojatanëyana: “Tšëngaftanga nÿets Israeloquënga šmochtsetátšëmbo, atše ndegombre cach Jesusbiana sëntsoyebuambnama. Cha tšëngaftanga šmonjancrucificá, pero Bëngbe Bëtsá chábioye tbonjábema Bëngbe Utabná y chabe Uámama Uabuayaná, chë Cristo ca.”

³⁷ Chë soyënga tmojanuena ora, entšanga cochtsetšënanënga imojtsemna, y Pedro y chë inÿe ichmónëngbioye tmojanëyana: —Baconga, ¿ndayá mora jamama šojtsamna ca?

³⁸ As Pedro tojanëjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámama Espiritu tšëngaftangbe ainaniñe jtsemándayama cháumashënguama. ³⁹ Bëngbe Bëtsá chë soyënga tcmonjanašebuachená tšëngaftangbiana, tšëngaftangbe básengbiana y nÿets chë bën luarënguenache imomna entsangbiana, nÿetscanga chë Bëngbe Utabná Bëngbe Bëtsá chábioye jabama chaojubuáyanënga ca.

⁴⁰ Inÿe palabrëngnaca Pedro tojatanëyana y bëtscá tojanabuayená mëntšá: “¡Bëngbe Bëtsá chë Israeloca bacna entsanga echanjácastigaye. Chašmótsbocamna, chëngbentšana šmochtsojuánañe ca!”

⁴¹ Ba entsanga imojtsanošbuaché ntšamo Pedro tojanëyanama y tmojánenabaye. Cach te mo unga uaranga entsanga nÿetsá tmojanoboté, Jesucrístbeñe ošbuáchiyënga jtsemnama. ⁴² Chënga corente imojtseboše jtsamaca chë Jesusbe ichmónënga imojtsabuatambá soyënga. Tšabá yojtsacohebiona nÿetscanga cánÿiñe jtsemnama y imojanamana mo chë Jesucrístbeñe ošbuachiyëngcá cánÿiñe jtsesayana y cánÿiñe Bëngbe Bëtsáftaca jtsencuéntayana.

Ntšamo chë natsana Crístbeñe ošbuáchiyënga vida imnabomna

⁴³ Nÿetscanga imojtsenjanaye, chë ichmónënga bëts soyënga y inÿe soyënga chabe obenana jinÿanÿiyama chamomama Bëngbe Bëtsá tojánmayeca. ⁴⁴ Nÿetsca chë Jesucrístbeñe ošbuáchiyënga sempre cánÿiñe mo canÿacá imojtsemna y nÿetsca chëngbe bomna soyënga nÿetscangbiana yojtsemna. ⁴⁵ Chënga imojanamana fshantsënga jtsatobuÿyana y chë imojánbomna soyëngnaca, y chë crocénana jujátayana ntšamo chë inÿyënga tojtšëjbotcá. ⁴⁶ Cada te imojanamana Bëngbe Bëtsabe bëts yebnentšë jënefnana cha jëtschuayama, y yebnënguenache cánÿiñe imojtsesaye

oyejuayënga y ndoñe ojëndayënga. ⁴⁷ Chënga imojanamana Bëngbe Bëtsá jtsatschuanayana, y nyetsca entsanga imojtsejuabnaye chë Jesucristbeñe ošbuáchiyëngbiama tsabe entsanga imojamna ca. Y cada te Bëngbe Bëtsá yojt sama más ošbuáchiyënga chamóbotema, chë ndëmuanyënga cha yojt satsebacayënga.

3

Pedro canye coshétbioye tbojanshná

¹ Canye te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entsanga imojanamana Bëngbe Bëtsáftaca jtsencuëntayana. ² Bëngbe Bëtsabe bëts yebnentše canye cosheto yojtsemna; tojanonýná orscana chca šocá inamna. Entsanga imojanamana cada te cha juanatsana canye luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojt sachtñëjuanënga lemošna chaótejañama. ³ Pedro y Juan Bëngbe Bëtsabe bëts yebnoye jamashënguama chë cosheto tojánanye ora, canye lemošna chátbioye yojótejañe. ⁴ Chatna chë šocá imojtsonýaye, y Pedro tbojaniyana: “Scochtsénýaye ca.”

⁵ As cha yojtсэнýaye y yojtsejuabnaye ndayá chjójyëngacñe ca. ⁶ Chora Pedro tbojaniyana: “Quetsátsbomna ni crocénana, ni castellano aca jatšetayama, pero atše chanjama Jesucristbe obenánaca ndayá acbiama jamama atše stsobencá: Jesús chë Nazaretocá obenana endbomna; chíyeca atše cbëyana chabe mándoca, matëtšbaná y cochtsana ca.”

⁷ Pedro chca tbojaniyana ora, tbojanábuacueshache catšbióicatše y tbojtanatsbaná, y cachora chë cosheto shecuatšíñe y shëmiabeñe añemo yojtatsbomna. ⁸ As chë cosheto, canye jontсэнjëse tsabá tojtantsá y tojanontšé tsabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojt sayontсэнjnaye y Bëngbe Bëtsá ibojtsatschuanaye, tbojanshnama. ⁹ Chë Bëngbe Bëtsabe bëts yebnentše imojétsemnënga nyetscanga cha tmojáninýe tsabá jtsanana y Bëngbe Bëtsá jtsatschuanayana. ¹⁰ Chënga imnatátšëmbo cha chë cosheto yojamnama, chë nda yojanamana Bëngbe Bëtsabe bëts yebnoca, chë Botamana Amashjuanentše jótbemana, entsanga lemošna jotejañama. Cha tsabá yojtatsmënamna entsanga ojanánënga imojtsemna.

Ntsamo Pedro tojanoyebuambá Salomonbe Amashjuana ca uabáinentše

¹¹ Chë cosheto ya shnaná ora, ndoñe yontseboše Juan y Pédrëbentšana joluárana. As, nyetsca entsanga ojanánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojétsemnoye. ¹² Pedro chë entsanga tojánanye ora, tojanëyana: “Taitanga y mamanga, Israeloquënga, ¿ndáyeca chë soyëngama ojanánënga šmojtsemna? ¿Ndayeca nýe šcojtsëbuátjja? ¿šmojtsejuabná nýe bëndatbe obenánaca quem boyabása tiffashná ca? ¿O šmojtsejuabná quem boyabása tiffashná bëndata Bëngbe Bëtsá puerte tsabá ftsadoránayeca? ¹³ Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinýanyé chabe oservená Jesús chë más uamaná yomnama. Cha tšëngaftanga chë mándayëngbe cucuatšíñe šmonjáboshjona chamóbama. Pilato enjëtseboše Jesús jëtšboshjonama, pero tšëngaftanga Pilatbe delante šmonjányana chca ndoñe šmontsanboše ca, y chíyeca Pilato ndoñe tbontanboshjona. ¹⁴ Jesús

uamaná y nyetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canye boyabása, entšá obanayá, chabuatsboshjonama. ¹⁵ Y chca, chë ndegombre tšabe vida chašmotsebonnama amábioye tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninye y chama fsëndétatsëmbo. ¹⁶ Jesús puerte obená endmënayeca, quem cosheto añémoca entsatsmëna. Ntšamo šmonjinnye y šmonjatatsëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

¹⁷ “Taitanga y mamanga, atše sëndétatsëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatsëmbcá. ¹⁸ Tempo, Bëngbe Bëtsá chë chabe juabna oyebuambnayënga tojanamëndá entšanga jábuayenama, chë Bëngbe Bëtsabe Uámana Uabuayaná puerte ngmënanana yochtsanbomnama. Morna, ntšamo Bëngbe Bëtsá tojanayancá ya tonjochnëgo. ¹⁹ Chcasna, ngmënaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtsachache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbonñama, ²⁰ y tšëngaftangbioye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá. ²¹ Canye te echanjóshjango, Bëngbe Bëtsá lempe tsmëmácá jëtsbemama. Chë tentscuana Jesús bontsemna celoca joquédana. Chca echanjochnëgo ntšamo Bëngbe Bëtsá chabe juabna oyebuambnayëngbiajana entšanga tojanabuayenacá. ²² Moisés bëngbe bëts taitanga tojanabuayená: ‘Chë Utabná Bëngbe Bëtsá canye chabe juabna oyebuambnayá ntšamo atše sëndmëncá, cmochanjayentšíchmuá. Cha tšëngaftangbentsana echanjábocna y tšëngaftanga cmontsamna ntšamo chacmojtsëtsëtsnacá cha jtseyeunanana. ²³ Ndánaca chábioye ndoñe chabonjoyeuná, cha bontsemna chë Bëngbe Bëtsabe entšángbentsana luaroca jtsemnama y chamotsepochochocama ca’ —cha tojánayana.

²⁴ “Y nyetsca chë Bëngbe Bëtsabe juabna oyebuambnayëngnaca Samuel orscana, entšanga tmojanabuayená ndayá quem tempo yochjanchnënguama, ntšamo mora montsonyácá. ²⁵ Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiamá, y tšëngaftangbe bëts taitángaftaca canye trato tojánbema; chë soyënga cabá tšëngaftangbiamá entsemna. Bëngbe Bëtsá Abrahámioye mëntšá tbojanianyana: ‘Chë ácbentsana entšángbeyeca tšabe bendicionënga chanjama nyetsca quem luarentša entšangbiamá ca.’ ²⁶ Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” —Pedro tojánayana.

4

Pedro y Juan Jerusalenentša mandadëngbe delante

¹ Pedro y Juan cabá entšanga imojtsëtsëtsnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe

amëndayënga. ² Chatna entsángbioye imojtsabuátambaye Jesús tojanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojánëtëna. ³ As, Pedro y Juan tmojánishëche y ya jetiñe yojtsemna causa, cárceloye tojanëtame yëfsanëntscuana. ⁴ Masque chca, banga entsanguentsana, ntšamo Pedro y Juan tbojanayancá tmojanuenënga, aíñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

⁵ Yëfsana, chë judiëngbe amëndayënga, judiëngbeñe bëtsëjemëngcá amëndayënga y ley abuátambayënga Jerusalenentše tmojánenefjna. ⁶ Chéntsna imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca. ⁷ Chora chënga tmojanmandá Pedro y Juan junatsama, y chëngbe tsëntsca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

⁸ As Pedro, chë Uámana Espíritu chabe ainaniñe corente jtsemándayëse, mëntšá tojanëjua: —Israeloca mándayënga y bëtsëjemënga, ⁹ mënté šconjatjá chë jama ndobenáftaca tšabe soye tifjamama y ntšamo cha mora jama yojtsatobenama. ¹⁰ Chcasna, ntšamo tojopasama cbochanjabuayená, chca, tsëngaftanga y nÿetsca Israeloca entsanga chë soyënga chašmotsetatšëmbuama. Quem boyabása, chë tsëngaftangbe tsëntsca entsemná, Jesucristo chë Nazaretocabe bëts obenánaca chca tšabá entsatsmëna. Y Jesús endmëna nda tsëngaftanga šmonjancrucificá y ndabiamama Bëngbe Bëtsá tojanma cháuatayenama. ¹¹ Jesusbiamama Bëngbe Bëtsabe uabemana palabrënguifne mëntšá endayana: “Chë yebna jebuanënga tmontsanaboté ndëtsbé, mora chë más bëts uashacuanësentše entsejájona ca”. Tsëngaftanga šmondmëna mo chë yebna jebuanëngcá, er Jesúsbioye šmontsanaboté y mora cha chë más uamaná entsemna. ¹² Nÿe cha yobena tsëngaftanga játsebacama. Bëngbe Bëtsá ndocna inÿe entsábioye tbonjatšetá chabe obenana chca jamama; chíyeca quem luarentše ndocná más quenátobena bënga játsebacama. Nÿe Jesucristbe obenánaca aíñe ca —Pedro tojánayana.

¹³ Chënga imojenjnaná Pedro y Juan tša añémoca ibojtsóyebuambnama tmojáninÿe ora, y chata tempo nduatsjínÿenata y librëša nduabuatmata bëtsemnama tmojántatšëmbona ora. Chca chë mándayënga tmojántatšëmbona chata Jesúseftaca baytë ibojamnama. ¹⁴ Y entsanga imojtsonÿaye chë tmojanshná cha chentše chátaftaca yojtsemnama; chë causa, chënga ndocá más tmonjanobená chatbe contra jatichámuana. ¹⁵ As chora tmojanamëndá chentšana chábuaisebocnama y chentše tmojanoquedangna chë soyama imojtsenatsëtsnaye. ¹⁶ Chënga imojtsentjanaye: “¿Ndayá chátaftaca mochjama ca? Jerusalenentše oyenënga montsetátšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca. ¹⁷ Pero entsanga chama ndoñe más chamondëtsencuéntamna, chata mochjáuyana: ‘Ndoñe más entsángbeñe Jesús šmattsebéyana; y ndoñe chašmonjoudenëse, jabuache castigo šochántsebomna ca.’”

¹⁸ As chë mándayënga cachiñe chata tmojánachembo y tmojanamëndá ndoñe más Jesús jtsebáyanana, ni chabiamama entsángbeñe

jtsabuátambayana. ¹⁹ Pero Pedro y Juan tbojánayana: “¿Ntšamo tšëngaftanga šmatjayana ntšamo fchanjayanama ca? Ndegombre, Bëngbe Bëtsabe bominýiñe ndoñe tšabá quenátsmëna tšëngaftangbioye aíñe joyaanayana y chábioye ndoñe. ²⁰ Er bënga queftsátobena jtsajbanana oyebuambnayana chë tiffinýe y tiffjouena soyëngama ca.”

²¹ Chë mandayëngna chátbioye tojtsanautatjá, pero chentšana tmojtan-abáshejuana. Nýetsca entsanga Bëngbe Bëtsá imojtsatschuanaye ntšamo tojanopasama; chíyeca, chë mándayënga ndoñe tmonjanobená tondaye ntjinýenana ntšamo chata jácastigama. ²² Chë boyabása, ndáftaca chata chë bëts soye Bëngbe Bëtsabe obenánaca tbojanma, inabomna canta bnëtsana uatama más.

Jesucristbeñe ošbuáchiyënga Bëngbe Bëtsá tmojanimpadá más añemo chau-atšatama

²³ Pedro y Juan ya tmojtanabáshejuana ora, tbojánata chë inýe ošbuáchiyëngaftaca jateninýenama y lempe ntšamo chë bachnangbe amëndayënga y bëtsëjemëngcá mándayënga chátbioye tmojanëyancá, chëngbioye tmojanacuntá. ²⁴ Chënga chca tmojanuenentšana, nýetscanga cánýiñe tmojanontsé Bëngbe Bëtsáftaca mëntšá jencuëntama: “Bëngbe Utabná, aca chë nda tojama celoca, fshantse, nýetsca béjayënga y lempe ntšamo chenache yomncá, ²⁵ chë Uámana Espíritbiajana tcojánayana y acbe oservená David, ntšamo tcojanayancá tojanábema, mëntšá:

¿Ndáyeca entsanga yapa imojtsetšátjaye ca?

¿Ndáyeca imojtsejuabná nýe bonamentiamá soyënga jamana?

²⁶ Quem luarentša reyënga y amëndayënga imoprontánënga, nýetscanga tmojenoyeuná Bëngbe Bëtsá y chabe Uámana Uabuayaná chë Cristbe contra jtsemnama ca —cha tojanábema.

²⁷ “Ndegombre chca tonjopasá. Rey Herodes y Poncio Pilato, quem bëts pueblentše, ndoñe judiëngaftaca y israelitëngaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama. ²⁸ Tempo, Bëngbe Bëtsá, acbe obenánaca y ntšamo icnabošcá tcojanmandá ntšamo mora chaotsemnama, y chënga chca Jesúseftaca tmonjama. ²⁹ Morna Bëngbe Bëtsá, mouena ntšamo chënga montsichamo, bënga jasúfriama cašojtsamna ca; chcasna, cochjama bënga fchayobená Jesusbe tšabe noticiënga bëts añémoca entsángbeñe jtsóyebuambnayama, ³⁰ y cochjama acbe obenánaca šoquënga tšabá chamotsatsmënama y cochjama bënga fchayobená bëts soyënga jamana, Jesús chë uámana oservenabe obenánaca y cha jótšëmbonëse ca” —chënga tmojánayana.

³¹ Bëngbe Bëtsáftaca jencuëntama tmojanpochocá orna, chë tmojánenefjntše tojanangmëmana; y nýetscangbe ainaniñe chë Uámana Espíritu tojanontsé más jtsemándayana, y chënga tmojanontsé más añémoca Bëngbe Bëtsabe soyëngama entsanga jábuayenama.

Nýetsca bomna soyënga nýetscangbiama yojtsemna

³² Jesucristbeñe ošbuáchiyënga, nýetscanga canýe juabna imojtsebomna y ainaniñe cach canýe ebionana. Ndocná ntjatichamuana chabe soyënga nýe chabiamá yojtsemna ca, pero aíñe imojtsichamo, “atše sëndbomna soyënga nýetscangbiama entsemna ca”. ³³ Chë Jesusbe ichmónëngna puerte obenánaca mëntšá imojtsichamo: “Fsënjinýe y fsëntsetatšëmbo Bëngbe Utabná Jesús obanënguentšana tojtayenama ca.” Y Bëngbe Bëtsá

yojtsama chë ichmónënga bëtscá tšabe bendicionënga chamotsebomnama. ³⁴ Jesucristbeñe ošbuachiyëngbeñe ndocná yonjamna ndayánaca uajabotá, er nyëtscanga fshantse o yebna bomnënga imojanamana jtsatobuíyana, y chë crocénana ³⁵ chë ichmónëngbioye jayentšbuáchiyana, ntšamo tojtsëjabotcá nyëtscanga jujátayama. ³⁶ Chca tojanma canya Bëngbe Bëtsabe bëts yebnoca trabajayá, José ca uabainá; cha chë ichmónënga imojanábobuatma Bernabé ca (y chca iuayana “Añemuyá ca”). Bernabé yojamna Chipre luarocá. ³⁷ Chana, fshantse yojtsatobuiye, y chë crocénana Jesusbe ichmónëngbioye yojáyentšbuachiye, chë uajabótëngbiana chaoservema.

5

Ntšamo Ananías y Safirafaca tojanopasá

¹ Inamna canye bacó, Ananías ca uabainá, y chabe shemna, Safira ca. Chatna canye fshantse tbojániye. ² Ananías y Safirna tbojanenóyeunata; chcasna, batšá crocénana cachatbiana tbojanobuajó y chë tojanójama crocénana ichmónëngbioye Ananías tojanamba, pero tojanéyana chana canjamna nyëts crocénana ntsachetšá chë fshantsama tbojanosháchiñe ca. ³ As Pedro tbojaniyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámama Espíritu chë crocénánama jabuambayama ca? Acna chë fshantsama tcmojtabuená crocénánentsana cach acbiana batšá tcontábojama. ⁴ Cabá ntsatobuiye ora, chë fshantse ábeshe endánmëna y tcojtsatobuíyentšana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocénánama chca jobostérama? Chca jamëse, ndoñe nyë entšángbioye quecatabuambná, sínó Bëngbe Bëtsánaca ca” —Pedro tbojaniyana.

⁵ Ananías chë palabrenga tojanuena ora, obaná tojánshajaye. Y nyëtscanga chama tmojántatšëmbonënga corente imojtsauatja. ⁶ Chentšana, básefta bobontsënga tmojánashajjna y Ananíasbe cuerpo entšëjuaca tmojanandmaná y jauátbontsama tmojanamba.

⁷ Mo unga horëntscose, Ananíasbe shema Safira tojánashjango, pero ndoñe yontsetátšëmbo ntšamo chabe boyáftaca tojanopasama. ⁸ Chora Pedro tbojantjá: —Ndegombre šmëyana, ¿chë šmonjayana nyëtsnama chë fshantse šmojiye ca?

As chë shema tbojanjuá: —Aíñe, nyëtsnama fsënjiye ca.

⁹ Pedro tbojaniyana: —¿Ndáyeca tsëndata šojenoyeuná Bëngbe Utanabe Espíritu jabuambayama, y cabá castigo jtsebomnama ndoñe šontsobatmana ca? Acbe boyá jauátbontsama tmonjuambënga muentšë bëšoca montsemna y mora ácnaca cmochanjuamba ca.

¹⁰ Cachora Safira Pédrëbe shecuatšentše obaná tojánshajaye. Chë bobontsënga tmojtanamáshjna ora, obaná Safira tmojáninýena; asna, chentšana tmojanamba y cachabe boyabe juachaca tmojanatbontsá. ¹¹ Y nyëtsca Jesucristbeñe ošbuáchiyënga chentše imojtsemnënga y nyëtscanga chë soye tmojántatšëmbonënga, corente imojtsauatja.

Ba bëts soyënga chë ichmónënga tmojanma, Bëngbe Bëtsabe obenana jinýanyiyama

¹² Chë Jesucristbe ichmónëngaftaca ba bëts soyënga entšángbeñe yojtsebinýna Bëngbe Bëtsabe obenana jinýanyiyama; y nyëtsca Jesucristbeñe

ošbuáchiyënga imojanamana Bëngbe Bëtsabe bëts yebnoca jénefnana, Salomonbe Amashjuana otsbojebnentse. ¹³ Chë ínÿenga, chë Jesucristbeñe ndošbuáchiyënga, imojtsauatja Jesucristbeñe ošbuáchiyëngaftaca jtsenutana; pero entšangna chë ošbuáchiyëngbiana tšabá imojtsencuëntaye. ¹⁴ Bëngbe Utabnábeñe ošbuáchiyënga más imojtsóbotena, bëtsca boyabásenga y shembásengnaca. ¹⁵ Tša bëts soyënga chë ichmónëngaftaca yojtsebinÿna; chíyeca entšangna imojanamana jutsnëshangañe y tjuashënguiñe tsáshenoye šoquënga jubuacnana, chca, Pedro chëjana tojtsachnëjuana ora, nÿe mo chabe sómbrënaca chëngbe cuerpëjana chaochnënguama, shnánënga jtsatsmënana. ¹⁶ Jerusalén chábuañe pueblënguentšana ba entšangna imojanamana jabana, y šoquënga y bacna bayëjbe juabna uambayënga imojtsëyabó; y nÿetscanga shnánënga imojtsatsmëna.

Bëngbe Bëtsá tojanma Pedro y chë inÿe ichmónënga cárcelocana natjëmbana chámuaisebocnama

¹⁷ Chë ichmónënga tša tšabá imojtsamama, chë judío bachnangbe más uámana amëndayá y chabe ústonënga, chë saduceunga, puerta envidia imojtsebomna. ¹⁸ As chë ichmónëngbioye tmojánishëche y chë bëts pueblentša cárceloye tojtsanëtame. ¹⁹ Pero ibetna, Bëngbe Utabná canÿe ángel tbojanichmó y chë utámenentša bëšašangá cha tojánatëfjo, chënga tojtanebuacna y mëntšá tojanëyana: ²⁰ “Motsajna, Bëngbe Bëtsabe bëts yebnentše šmochjámashjna, y entšangna šmochjabuayená ntšamo cuanjama chë nÿetsca tescama yomna tšabe vida jtsebomnama, Jesucristoftaca cánÿiñe mo canÿacá jtsemnëse ca.” ²¹ Ntšamo tmojanuencá, yëfsana cabá cachëse Bëngbe Bëtsabe bëts yebnoye tmojána y tmojanontsé entšangna jabuátambana.

Chëntscuana, chë bachnangbe más uámana amëndayá y chabe ústonënga, chë Israeloca bëtsëjemëngcá mándayënga y inÿe chentša amëndayënga tmojánachembo jénefnama y jenóyeunayama; as chora chënga tmojanmandá chë utámenocana chë ichmónënga jobiatšama. ²² Pero chë soldadënga chë utámenoye tmojánashjajna ora, chënga chentše ndoñe tmonjánanÿena. Chcasna, chënga tmojtana chë mándayënga chca jaúnayama. ²³ Y tmojánayana: “Chë utámenoca fsënjínÿena lempe tšabá endëtsëtameñe y soldadënga nÿetsca bëšašangá monduabojanÿanga; pero fsënjatëfjo y toyse fsënjámashjna orna ndocná chibiátinÿena ca.”

²⁴ Chë bachnangbe amëndayënga y chë Bëngbe Bëtsabe bëts yebnentša soldadëngbe amëndayá chca tmojanuena ora, yojtsetëmnnana y imojtsentjanaye ndayá chentšana yochjanopásama. ²⁵ Chorna, chënga imojtsemnentše canÿe boyabása tojánashjango y mëntšá tojanëyana: “Chë šmojutámiënga mora Bëngbe Bëtsabe bëts yebnoca montsemna, entšangna montsabuatabá ca.”

²⁶ Chë soldadëngbe amëndayá tojána soldadëngaca, chë Jesusbe ichmónënga junatsama; pero nÿe tšabá tmojanënatse, er chënga entšangbiana imojtsauatja, nderado cachëngbioye ndëtsbéngaca muantsëbaye. ²⁷ Chëngbioca tmojanëshejajna ora, mandayëngbioye tmojanënatse; chora chë bachnangbe más uámana amëndayá mëntšá tojanëyana: ²⁸ —Bënga jabuachana tcbontsëuyaná y tcbonjáuyana ndoñe šmontselesenciana jtsóyebuambnayama chë boyabása Jesús tojánayana yojtsemna jabuátambana soyëngama ca. Masque chcasna, mora tšëngaftanga nÿetsca chë Jerusalenentša oyenënga chabe soyëngama

šmojtšabatambá y šmojtseboše, cha tojanóbanama castigo bēngbeñe chaotsemnama ca.

²⁹ Chorna, Pedro y chē inye ichmónēnga tmojánayana: —Bēnga šontsamna natsana Bēngbe Bētsá joyeunayana y chentšana entšāngbioye. ³⁰ Chē Taitá, nda bēngbe bēts taitanga monjánadorana, cha tojama Jesús cháuatayenama, chē nda tšēngaftanga šmonjanóba canye cruciñe juajabonjese. ³¹ Bēngbe Bētsá tbontatsbaná y chabe catšbioica tbojētstbema, jtsamēndayama, y tbojábema entšāngbe Unachayá y Atsebacayá, chca, Israeloca entšānga ngmēnaca chamuenójuaboma bacna soyēnga imojtsamama y chca amana chamotsajbanama, y chēngbe bacna soyēngama perdonánēnga chamotsemnama. ³² Bēnga fsēntsichamo ndayá bēnga ndegombre tifjinye Bēngbe Bētsá chca jtsamana ca; chē Uámana Espíritnaca chē soyēngama endbétsoyebuambnaye. Bēngbe Bētsá endbétsama chē Uámana Espíritu cháumashēngo chē tmojtseyeunanēngbe ainaniñe jtsemāndayama ca —chēnga tmojánayana.

³³ Chē mándayēnga chca tmojanuena ora, puerta tmojanotjayaná y tmojánbošena chē ichmónēnga jtsēbáyama. ³⁴ Pero chē mándayēnguēntše yojtsemna canye fariseo, Gamaliel ca uabainá. Chana canye ley abuatambayá inamna y entšānga puerta innarrespetana. As cha tojantsá y tojanmandá chē ichmónēnga ratotema chentšana jubuacnama. ³⁵ Chentšana chē inye mándayēnga tojanéyana: “Israeloca taitanga, puerta cuedado šmochtsebmna ntšamo quem boyabásēngaftaca šmochjamama. ³⁶ Quem soyama šmochjenójuaboye: Ndoñe bayté quenátsmēna, Teudas tonjánbocna y cha enjánichamo canye uámana entšá canjamna ca, y mo canta patse entšānga cha tmojanasto. Pero chora ínŷēnga cha tmontsanóba y chabe ústonēnga tmontsanáshana, y chca lempe tontsanopochocá. ³⁷ Chentšana, chē entšānga jenábemama enjamna ora, Judas chē Galileocá tonjánbocna y tonjanma báseftanga cha chamuastama; pero chánaca ínŷēnga tmontsanóba y nŷetsca chabe ústonēnga tmontsanáshana. ³⁸ Chiyeca atše cbéyana, quem boyabásēnga matabáshejuana y ndocá mataborlánana. Ntšamo chēnga montsamancá, nŷe entšāngbe juabna y nŷe chēngbe trabajo tojtsemnēse, betscó echanjopochocá. ³⁹ Pero chca Bēngbe Bētsabe soye tomnēse, tšēngaftanga ndoñe quešmochatobenaye jáyēnjanama. Cuedado šmochtsebmna, nderado mo Bēngbe Bētsabe uayayēnga šmuatjanenobiama ca” —cha tojanéyana.

Y as chēnga Gamaliel tmojanoyeuná. ⁴⁰ Chcasna, chē ichmónēngbioye tmojánachembo, tmojtšanachebuánganja y tmojanéyana Jesusbe uabáinaca entšāngbeñe ndoñe chamondētsoyebuambná ca; y chentšana tmojtšanabáshejuana. ⁴¹ Chora chē ichmónēnga chē amēndayēngbentšana puerta oyejuayēnga tmojésanbocna, er Bēngbe Bētsá tojanalesenciá jasúfriama, chēnga Jesusbiamá oservénēnga bétsemnayeca. ⁴² Chentšana, chēnga cada te imojanabuatambá y Jesús, chē Uámana Uabuayaná, chē Cristo bétsemnama entšāngbioye imojanabuayiyiná, Bēngbe Bētsabe bēts yebnentše y yebnēnguenáchnaca.

6

Chē ichmónēngbiama ujabuáchanēnga tmojanēbuáyana

¹ Chē tempo, Jesucristbeñe ošbuáchiyēnga betscó imojtsóbotena. Chora chē Jesucristbeñe ošbuáchiyēngbentše, chē judiēnga griego biyanga batšá imojtsetsátjaye y chē judiēnga hebreo biyangbiamá

měntsá tmojánayana: “Chě griego biyangbe viudángbioye ndoñe cachcá quemnatějabuáchana ntsamo chě hebreo biyangbe viudángbioye cada te montsějabuachancá ca.”

² Asna, chě bnětsana uta ichmóněnga nřetsca chě Jesucristbeñe ošbuáchiyěnga tmojaněbuaja y tmojaněyana: “Ndoñe tšabá quenátsměna, běnga jtsajbanana Běngbe Bětsabe palabra oyebuambnayana nře chě viudanga jtsanřenama chě tojtsějaboto soyěnguiñe. ³ Chcasna, baconga y batanga, tšěngaftanguentšana canřsěftanga měbuáyana, tšabá mandbomněngcá šměbuátměnga, chamotsemna osertáněnga y chě Uámama Espíritu chěngbe ainaniñe chaotsemánda, as chěnga chě ujabótěnga jtsějabuáchanama trabajo fchanjábanřyie. ⁴ Y běngna šontsamna nřets tempo Běngbe Bětsáftaca jtsencuéntayana y Běngbe Bětsabe palabra entsānga jtsabuayiyayana ca” —chěnga tmojánayana.

⁵ Nřetscanga tojanogusetá ntsamo chě ichmóněnga tmojanayancá; as, Esteban tmojanábuayana; canře boyabása puerte ošbuachiyá cha inamna y chě Uámama Espíritu chabe ainaniñe yojanmánda. Chentšana tmojaněbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía běts pueblócá, y cha yojanamana Běngbe Bětsá jtsadoránana mo cach judiěngcá). ⁶ Chentšana chěnga tmojaněnatse Jesucristbe ichmóněnga imojtsemnoye; chocna, chě Jesusbe ichmóněnga Běngbe Bětsá tmojanimpadá chě ichmóněngbe trabajěnguiñe chě ubuáyaněnga chaujabuachama, chěngbe cucuatšěnga chěngbe bestšaentše jajájuase.

⁷ Más banga Běngbe Bětsabe palabra imojtsuenana, y chca, Jesucristbeñe ošbuáchiyěnga más imojtsóbotena, y Jerusalenentše más ošbuáchiyěnga betscó imojtsóbotena. Y ba judiěngbe bachnāngnaca tmojanontšě Jesucristbeñe jtsošbuáchiyana, ntsamo chě inřyenga imojtsanošbuachecá.

Esteban tmojánishache

⁸ Esteban, Běngbe Bětsabe obenana y chábentšana tšabe bendicioněnga yojtsebomněse, entsāngbeñe běts soyěnga yojtsama. ⁹ Báseftanga “Ya Cachcá Atabashejuana Oservěněnga ca” uabainěngna tmojanontšě Estėbanoftaca enatsětsnayana. Chěnga imojamna judiěnga Cirenoquěnga, Alejandrioquěnga, Cilicia y Asioquěngnaca, y chěngbe enefjuana luare yojanabaina “Ya Cachcá Atabashejuana Oservěněngbe Yebna ca”.

¹⁰ Pero chě Uámama Espíritu tojanma Esteban chaóyebuambama bětscá osertanacá, y chíyeca chěnga ndoñe imontsobena ntsamo cha jojuana.

¹¹ As chěnga báseftanga tmojaněbuénaye Estėbanbe contra podesca soye chamuayanama, měntsá: “Cha fsěnjoyeuná Moisesbiana y Běngbe Bětsabiana ndoñe tšabá jtsóyebuambnayana, mo cuafjoyanguangcá ca.”

¹² Chcase chěnga tmojanma entsānga, bětsějeměngcá mándayěnga y ley abuatambayěnga Estėbanbe contra chamóntša enbouenanana; y as, Esteban tmojanotbá y chě mándayěnga imojtsemnoye imojuíchěmo. ¹³ Y tmojaněnatse básefta entsānga, uayátsenaye soyěnga y podesca soyěnga Estėbanbe contra chamuayanama; as chěnga měntsá tmojánayana: “Mua bacna soyěnga entsichamo chě Běngbe Bětsá jtsadoránama běts yebnama y Moisesbe leyěngama. ¹⁴ Y fsěnjoyeuná cha jayanana, Jesús Nazaretocá Běngbe Bětsabe běts yebna caochtsepochóca y caochjama běnga nře chabe manděngaca mandáněnga chamotsiyenama y ndoñe ntsamo Moisés běngbe běts taitanga tojěftsanabuatambacá ca.”

¹⁵ Chë mándayënga y nÿetscanga chentše imojétsetbiamanënga Esteban tmojanonÿinÿë ora, tojánínÿë chabe jubiá yojtsebuashinÿinÿëna mo canÿe ángelbe jubiácá.

7

Ntsamo Esteban tojanenëuyaná

¹ Chora chë bachnangbe más uámana amëndayá, Estébanbioye tbojantjá: —¿Ntsamo acbiamá montsichamcá ndegombre yojtsemna ca?

² As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endméná, Abrahámbioye tbojánëbëbocna, cha Mesopotamioca yojaniyena ora; tbojánëbëbocna, Harán bëts puebloca joyénanama cabá nda ora, ³ y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinÿinÿiye luaroye cochjá ca.” ⁴ As Abraham chabe luare Caldea tojéftsanboshjona y tojána Haránoca joyénanama. Chabe taitá tojanóbanentsána, Bëngbe Bëtsá Abrahámbioye chë luaroye tbojanánatse, chë mora tšëngaftanga šmontsiyenentše. ⁵ Pero quem luariñe ni mo base fshantse ndoñe tbonjéftsanatsetá, ni mo ndayentše jtsiyenama. Pero aíñe Abrahámbioye tbojanšbuachená chë fshantse jatsetayama, chabiamá y chabe básengbiamá, Abraham tojóbanentsána. Chca tbojanšbuachená ora, Abraham ni canÿe šešona bonjánbomna. ⁶ Y Bëngbe Bëtsá mëntšá tbojaniyana: “Chë ácbentsána entsanga, ínÿengbe luaroca áshjainënga mochantsemna, y choca oyenënga chëngbe oservénënga chëngbioye mochanjábiamá y canta patse uatëntscuana jabuache mochanjasufrina ca.” ⁷ Y mëntšánaca tbojaniyana: “Pero atše chanjácastigaye chca oservénënga chacmojábiamá luarentša entsanga; y as, chentšana chë ácbentsána entsanga mochanjësebocana y mora bontsemna luaroye mochanjésabo y muentše atše šmochántadorana ca.” ⁸ Bëngbe Bëtsá Abrahámbioye tbojanšbuachená nÿe cha y chabe básengbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinÿnamna tbojanmandá chabe šešona, boyabásetema tojonÿná ora, base bobachtema chë más delicadentše jatëtšana. Chíyeca, chabe uaquiñá Isaac tojanonÿná ora, posufta tianoye Abraham base bobachtema chë más delicadentše tbojantëtše. Isaac cachcá tojanma chë chabe bnëtsana uta uaquiñëngaftaca. Chënga monjamna chë Israeloca bnëtsana uta bëts pamíllangbe taitanga.

⁹ “Quem uaquiñënga bëngbe bëts taitanga monjamna. Chëngna, chëngbe uabentsá Josébioye envidia innabomna y tmojtsatanobuiye, Egiptoye canÿe oservenacá chamotsánatseñama. Pero Bëngbe Bëtsá Josébioye nÿets tempo ibnauájabuachana, ¹⁰ chíyeca nÿetsca chabe ngmenënguentsána tbojanatsbocá y Bëngbe Bëtsá tojanma cha chaotsetatšëmbuama tšabá jóyebuambayama chë Egiptoca réybentše, Faraón ca uabainá. Bëngbe Bëtsá tojanma chë Faraón chaoyeuá ntsamo José yojamnama; chíyeca Faraón Josébioye tbojánbema Egiptoca mandado y chabe yebnënguentsë oyenëngbiámnaca.

¹¹ “Chë tempo, Egiptó y Canaán luariñe bëts shëntsana tojanóshjango y puerte ngménana yojtsemna y bëngbe bëts taitanga ndoñe imontsobena saná jónÿenama. ¹² Pero Jacob tojántatšëmbona Egiptoca saná yojtsemnama; asna, chabe uaquiñënga, chë bëngbe bëts taitanga choye

tojanichamó. Chora yojamna chë natsanama chënga Egiptoje jama. ¹³ Uta soyama chënga tmojtesaná ora, José chabe catšátanga tojanéyana: ‘Atše José sëndmëna, tšëngaftangbe uabentsá ca.’ Chca chë Faraón Josebe pamíllangbiana tojántatšëmbona. ¹⁴ Chentsana, José tojanmandá chabe taitá Jacob y nýetsca pamíllanga Egiptoje chamotsama. Canýsëfta bnëtsana shachnënga imojamna chë Egiptoje tmojánanga. ¹⁵ Chcasna, Jacob Egiptoje tojána choca joyénanama. Choca cha tojanóbana y chë inýe bëngbe bëts taitángnaca. ¹⁶ Jacob y chabe básenga, ntšamo imojt-sobancá, chëngbe cuerpo Siquem bëts puebloye imojtsatambaye y tmojanëtebuantsá, Abraham tojëftsanbuamé cuevëshënguiñe. Abraham canýe crocenánama Hamorbe uaquiñëngbioye, chëshënga yojtëyentsbuamiñe Siquem pueblocá.

¹⁷ “Ntšamo Bëngbe Bëtsá Abrahámbioye tbojanšbuachenacá jamama yojtsobeco ora, Egiptoca corente tmojanoboté Israeloca entšanga y banga chënga imojtsemna. ¹⁸ Cabana, Egiptoca inýe rey tojanoyayé y cha Josébioye ndoñe tbonjanabuátmana. ¹⁹ Chë reyna, bëngbe entšanga, chë bëngbe bëts taitángbioye tojanaingñé y tojanma chënga puerta chamosufrima; tojanamëndá, chë tmojtsónýna šesonatëmënga cachcá jtsënyayana chamotsóbanama. ²⁰ Chë tempo canýe básetema tojanonýná y cha Moisés ca tmojanabaye. Bëngbe Bëtsá Moisesbiana oyejuayá yojtsemna y chabe bëtsëtsata cach yebnentše tmojanboché unga ish-inýëntscuana. ²¹ Cachcá jonýayama yojtsamna orna, Faraonbe bembe tbojanocñe y mo cachabe uaquiñá cuenta tbojanboché. ²² Chca, chë Egiptoquënga imnatátšëmbo soyënga Moisés tmojanbuatëmbá y canýe uámana entšá tojánocna jóyebuambayama y ndayánaca jamama.

²³ “Canta bnëtsana uata tojánashjache ora, tojanenojuabó jama jtsetatšëmbuama ntšamo chë Israeloquënga, chabe entšanga imojtsemnana. ²⁴ Canýe, Moisés tojáninýe canýe Egiptocá canýe Israelocábioye ibojtsetantšetaye ora; as Moisés tbojanoboguiyaná y chë Egiptocábioye tbojtsanóba. ²⁵ Moisés yojtsanjuabnaye chë Israeloquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandëtsana chëngbioye játsebacama ca. Pero chë Israeloquënga ndoñe yontšësertana. ²⁶ Yëfsana, Moisés tojánanyëna útata, cach Israelocata, ibojtsentsjanaye; chora cha betscó tojána jetsëuyanama y tojanéyana: ‘Tsëndata catšata šondmëna, ¿ndáyeca šojtsentsjanata ca?’ ²⁷ As, chë inýabioye ibojtsetsjanayá Moisésbioye tbojtsanajuatsëntše y tbojanianyana: ‘¿Nda bëngbeñe tcmënjajayé mandado y chë tšabá o ndoñe tšabá fst-samama chacuayanama ca? ²⁸ ¿Cojtseboše átsnaca jóbama, ntšamo ton-jopasá yëfse chë Egiptocábioye tconjobacá ca?’ ²⁹ Moisés chca tojanuena ora, Madián luaroye tojtsanachá y choca yojoyena inýe luarocana ash-jangonacá. Chentše uta uaquiñata yojëftsabamna.

³⁰ “Chentsana canta bnëtsana uatëse, entšanga ndoyena luariñe, Sinai tjañe béconana, canýe ángel tbojánëbëbocna zarzësha yojtsángbototjuanentše. ³¹ Moisés yojenjananá ndayá yojtsonýama y tšabá jinýama tojanobeconá ora, tojanuena Bëngbe Bëtsá mëntšá ibojtsatsëtsnaye: ³² ‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, ibojtsengmëmnaye y añemo ndoñe yontsebmóna choye jontjësiyama. ³³ As Bëngbe Utabná tbojanianyana: ‘Motsenóshecbotsca, er aca contsemnentše nýe atšbiana luare endmëna, er átsnaca chentše

sěntsemna. ³⁴ Ndegombre sěnjinye ntšamo atšbe entšanga Egiptoca montsesufrina y sěnjouena chěngbe oyabojuayana, y atše sěnjabo chěnga jabátsebacama. Chcasna, mabouena, Egiptoeye cbochanjíchmuca ca' — Běngbe Bětsá tbojaniana.”

³⁵ Chentšana Esteban tojaněyana: “Quem Moisés entšanga tmojtsanaboté y tmojaniana: ‘¿Nda běngbeñe tcměnjajayé mandado y chě tšabá o ndoñe tšabá fstsamama chacuayanama ca?’ Masque chca, Běngbe Bětsá mo mandayacá y atsebacayacá tbojesanichmó, chě zarzěshentše tojanobiněná ángeloftaca. ³⁶ As Moisés, běngbe běts taitanga Egiptocana tojésaněbuacna y běts soyěnga tojanma, y ině soyěnga Běngbe Bětsabe obenana jiněyaněyama Egiptentše, chě Buángana ca uabaina mar bėjayentše y entšanga ndoyena luarentše, canta bnětsana uatěntscuana. ³⁷ Cach Moisés Israeloca entšanga měntšá tojaněyana: ‘Běngbe Bětsá tšěngaftanguentšana caně bochanjábema atšcá Běngbe Bětsabe juabna oyebuambnayá ca.’ ³⁸ Moisés Israeloca entšangaftaca yojěftsemna chě entšanga ndoyena luaroca. Choca chě entšanga tmojánenefna Sinaí tjañe béconana. Chentšana caně ángel Moisésoftaca tojanoyebuambá, běngbe běts taitángbiyoe chě buayenana soye Moisés chaóyebuambama, chě entšanga tšabe vida jónyēnana palabrěnga; y Moisés chca tojanma, běngnaca chě palabrěnga jouenama jobenayama.

³⁹ “Pero běngbe běts taitanga ndoñe tmonjānbošena joyeunayama, masna ně tmojtsanaboté y Egiptoeye jesshěconama imojtsaiseboše. ⁴⁰ Moisés cabá chě tja tsjuanoca chě ángeloftaca yojtsemna ora, chěngbe bachnangbe más uámana aměndayá Aarónbiyoe měntšá tmojaniana: ‘Běngbe Bětsabe cuenta šmayentšpormá caně buashiněyina soye jadórama, běnga chašunatsama. Er běnga quemátstatšěmbo ndayá yojtsopasana Moisés, chě Egiptocana šonjěftšěbuacnáftaca ca.’ ⁴¹ As tmojanma caně buashiněyina soye mo caně uacnabecá y cha jadórama ba bayěnga tmojaněbaye, y tmojanóboyējuanga cachěnga chě soye tmojanpormáyeca. ⁴² Chě causa, Běngbe Bětsá chěngbentšana tojtsanojuánañe y cachcá tojesaněnyaye chěngbe bacna soyěnga causa, estrellatéměnga chamotsadoránama. Chca jochněnguama, Běngbe Bětsabe juabna oye-buambayěngbe librěšañe měntšá endayana, ntšamo Běngbe Bětsá tojanayancá:

Israeloca entšanga,

¿Atše jětschuayama bayěnga chešměnjāněbaye y chě soyěnga chešměnjānátšěmbona,

chě canta bnětsana uata entšanga ndoyena luarentše tšěngaftanga šmonjěftsemna ora?

⁴³ Atše jadóra cuentna, chě Molocbiana jebna soye šmonjanacutsá y cha šmonjānadorana,

y chě Refánbe estréllacnaca cachcá šmonjānama.

Chě soyěnga mo Běngbe Bětsá cuenta šmonjānbomna y cach tšěngaftanga šmonjanobopormá jadórama.

Mora chě causa atše chanjama, Babilonientšana más chcoye tšěngaftanga chacmotsénatsama ca” —chiñe endayana.

⁴⁴ “Běngbe tempsca běts taitanga entšanga ndoyena luaroca, chě jatsjacama opodena yebna imnabomna; chě yebnentše Běngbe Bětsá chěngaftaca tojanoyebuambá. Inajebna ntšamo Běngbe Bětsá Moisésbiyoe tbojanmandacá, y cha tojanma ntšamo chaojebuama Běngbe

Bětsá tbojaninŷinŷecá. ⁴⁵ Běngbe běts taitangna chěngbe taitángbentšana chě jatsjacama opodena yebna chěngbiama tmojanóyengacñe, y chěnga chě Canaán luaroye Josuéftaca, chě inŷe luaroquéngaftaca jětsjama tmojána ora, chě jebna soye tmojanamba y chocna, Běngbe Bětsábeyeca chentša entsángbiyoye Israeloquéngbentšana tmojtaněbuacna; y chě jebna soyna chě tmojanayěnjana luarentše tojanoquedá, rey David yojěftsiyeněntscuana. ⁴⁶ David tšabá mandbomná inamna, chíyeca Běngbe Bětsá cháftaca puerte yotsóyejuaye. David chábiyoye lesencia tbojanotjañe jajebuama, Běngbe Bětsá chě Jacob tbojanadorá cha, chentše chaotsiyenama. ⁴⁷ Pero Salomón inamna nda chě Běngbe Bětsabe běts yebna tojanjebuá. ⁴⁸ Masque chě celoca Běngbe Bětsá, entsangbe jebna yebniñe ndoñe quenatiyena. Ntšamo Běngbe Bětsabe juabna oyebuambnayá tojanabemcá, ndayá Běngbe Bětsá tojanayancá:

⁴⁹ ‘Celoca endmēna chě luare ndayentšana atše tsmánda, y quem luare endmēna nŷe mo canŷe tšenētemcá ndayentše atšbe shecu-atšěnga chjacjaye.

As, ¿ntšamo atšbiama jebna yebna šmochjajebo ca?’ —chě Utabná jayanana—;

‘o ¿ndaye yebnentše atše jóchnama chjobenaye,

⁵⁰ ndegombre cach atše nŷetsca chě soyěnga tijaměse ca?’ ”

⁵¹ Esteban mēntšánaca tojaněyana: “Tšěngaftanga nŷets tempo josértama nděbošěnga šmondmēna; šmondbomna ainana mo chě Běngbe Bětsábeñe ndošbuáchiyěngbe ainancá, y Běngbe Bětsabe soyěngama nduauenaněnga šmondmēna. Tšěngaftanga ndocna te quešmátsboše chě Uámana Espíritu joyeunayana. Ntšamo tšěngaftangbe běts taitanga monjanियencá, tšěngaftángnaca cachcá. ⁵² ¿Běngbe Bětsabe juabna oyebuambnayěnguentšana, ndábíoye tšěngaftangbe běts taitanga ndoñe monjanacmena? Chě Běngbe Bětsá tojanichamó entsanga chěnga tmojtsaněbaye, y mēngna entsángbiyoye imojanabuayiyná Cristo, chě ntšamo Běngbe Bětsá yobošcá amá yochjánabama. Pero morna, uayayěngbe cucuatšíñe cha šmojábošhona y šmojóba. ⁵³ Běngbe Bětsabe manděnga angelěngaftaca tšěngaftanga šmonjanóyengacñe, pero chě soyěnga ndoñe quešmátsyeunana ca” —cha tojaněyana.

Esteban ndětsbėngaca tmojanóba

⁵⁴ Chentša mándayěnga chca tmojanuena ora, Estébanoftaca tmojanotjayaná y tmojanenaftěšbonzentsé, rábiaca imojtsemnana. ⁵⁵ Pero chě Uámana Espíritu Estébanbe ainaniñe corente yojtsemándaye. Celoye yojontješiye y Běngbe Bětsabe buashinŷinŷanana yojinŷe, y Jesús, Běngbe Bětsabe catšbioica yojtsatsana. ⁵⁶ As, Esteban tojánayana: “¡Moueněnga, sěntsonŷá celoca entsatěfjna y Běngbe Bětsá Entšá tbojanbemá Běngbe Bětsabe catšbioica entsemna jtsaměndayama ca!”

⁵⁷ Chora chěnga jabuache imojtseyoye, imojtsenamatsachto ndoñe más ntsuenanama y Estébanbiyoye tmojanontšěnja. ⁵⁸ Chentšana, chěnga chě pueblentšana tmojtsanábocna y ndětsbėngaca tmojtsanatěchěnganja. Chě Estébanbiyoye mal tmojanquedangna entsayangá tmojtsanenátsejca y canŷe bobontse, Saulo ca uabainá, tmojesanábonyiñe chaotsinŷenama.

⁵⁹ Ndětsbėngaca imojtsėnanantscuana, Esteban Běngbe Bětsáftaca ibojtsencuěntaye y mēntšá tojánayana: “Běngbe Utabná Jesús, atšbe espíritu šmóyěngaca ca.”

⁶⁰ Chentšana Esteban tojanoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

8

¹ Saulo chentše yojtsemna y tšabá imojtsama ca yojtsejuabnaye, Esteban tmojanóbama.

Saulo yojánama chë Crístbeñe ošbuáchiyënga chamotsesufrínama

Cach te, ínÿenga tmojanontšé Jesucristbeñe ošbuáchiyënga Jerusale-
nentše ucamenana y jtsamana puerta chamotsesufrínama; chcasna,
chënga tmojtsanacheta y Samarioye y Judeoye tmojanáshana. Nÿe chë
Jesucristbe ichmónënga ndócnoye tmonjánacheta. ² Básefta boyabásenga,
Bëngbe Bëtsá adórayëngna, Esteban tmojanamba jauátbontsama y chabi-
ama puerta tmojánenobošachna. ³ Chëntscuana, Saulo yojtsentšena Jesu-
cristbeñe ošbuáchiyënga jtsapochócama y yebnënguenache yojánamashjuana
boyabásenga y shembásenga sjojónana ubuacana jutámia.

Felipe Samaria luaroca tšabe noticiëngama yojanabuayiyná

⁴ Y Jesucristbeñe ošbuáchiyënga tmojanáshanënga nÿetsquénache
imojánabuayiyenaye Jesusbe tšabe noticiënga. ⁵ Chca, Felipe Samarioye
tojána y tojanontšé chë Bëngbe Bëtsabe Uámana Uabuayaná, Cristbiana,
chentša entšanga jábuayenama. ⁶ Entšanga imojánenefjuana Felipe
joyeunayama y tmojáninÿe bëts soyënga cha jtsamana, Bëngbe
Bëtsabe obenana jinÿanÿiyama. Chënga nÿetscanga ntšamo Felipe
yojtsichamcá tšabá imojtseyeunana. ⁷ Banga bayëjbe juabna
uambayënga tšabá imojtsatsmëna y chë bacna bayëjënga jabuache
jtsaiyoyëse chëngbentšana imojtsaisebocana; y banga jama ndobenënga
y coshetënga tšabá imojtsatsmëna. ⁸ Chë soyama chë pueblentša
oyenënga corente imojtsóyejuaye.

⁹ Pero canÿe pueblentše Samarioca inamna canÿe boyabása, Simón ca
uabainá; cha tempo inamna canÿe bocjuaná y chë Samarioca entšanga
chabe soyëngama imojánenjanaye. Cha yojánichamo cha canÿe uámana
entšá canjamna ca. ¹⁰ Y chábioye corente inmayerunana nÿetscanga,
uámanënga y nduámanëngna. Entšanga imojánichamo: “Mua entsemna
chë Bëngbe Bëtsabe bëts obenana inÿanÿinayá ca.”

¹¹ Y ndegombre chënga corente inmayerunana, er cha chë bocjuanana
soyëngaca bayté chë entšanga ingñénënga y ojanánënga yojtsabamna.
¹² Pero chë luarentša entšangna, Felipe tmojanoyeuná chë cha yo-
jtsëtsëtná tšabe noticiënga Bëngbe Bëtsabe amëndayama y chë Jesucrist-
biana tšabe soyënga. Chorna chënga Jesucristbeñe imojtsošbuáchiye, y
boyabásenga y shembásenga tmojánenabaye. ¹³ Y cach Simónëna Jesu-
cristbeñe yojtsošbuáchiye y tojanenábaye, y chentšana cada te Felípeftaca
cha yojtsanmëna. Cha tojáninÿe Felipe chë bëts soyënga Bëngbe Bëtsabe
obenánaca jamana, y chama ojananá yojtsemna.

¹⁴ Chë Jerusaleoca imojtsemna ichmónënga tmojántatšëmbona Samar-
ioca entšanga Bëngbe Bëtsabe palabra tmojanóyeunama; as, chora Pedro y
Juan choye tmojanichamó. ¹⁵ Pedro y Juan Samarioye tbojánashjango ora,
chentše Jesucristbeñe ošbuáchiyëngbiana Bëngbe Bëtsá tmojanimpadá,
as chë Uámana Espiritu chëngbeñe cháumashënguama jtsemándayama.
¹⁶ Er cabá ni mo cánÿabeñe chë Uámana Espiritu tonjánamashëngo; chënga

tmojánenabaye Bèngbe Utabná Jesús jótšëmbonëse, chábeñe ošbuáchiyënga jtsemnana imojtsebóseyeca. ¹⁷ As Pedro y Juan chëngbe bestšašíñe cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

¹⁸ Simón tojáninýe, chë ichmónënga entsángbeñe cucuatšënga tmojacjá ora, chë Uámana Espíritu chëngbeñe jamashënguana. As chora Simón chë ichmónënga tojanéyana: —Quem crocénana mosháchiñe, ¹⁹ y átsnaca chë obenana šmatšetá, y ndábeñnaca cucuatšënga chajajajó ora, chábeñnaca chë Uámana Espíritu cháuamashëngo ca.

²⁰ As Pedro tbojaniyana: —¡Acbe crocénana infiernoye chaotsá y ácnaca, chë Bëngbe Bëtsabe tšetana soye crocénánaca jobuámiñama yopodena ca tcojajuabó causa! ²¹ Ndegombre, aca bëngaftaca ndoñe quecátsmëna, ni bëngbe trabajo achiamo quenátsmëna, Bëngbe Bëtsabe delante acbe ainaniñe tšabe juabnënga ndoñe quecátbomna causa. ²² Ngmëna cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojajuaboma nderádose cmatjaperdóna. ²³ Atše sëntsetatšëmbo, acbe ainaniñe tša bacna juabnënga ínýengbiamá yojtsemnana; y bacna soyënga amana jtsajbanama ndoñe quecátobena causa, aca mo canýe ntsacjuanacá cõtsemna ca —Pedro tbojaniyana.

²⁴ As chora Simón tojanéyana: —Bëngbe Utabná atšbiamá šochjaimpáda, ntšamo šmonjauyancá ndoñe chandëpasama ca.

²⁵ Pedro y Juan, ntšamo Bëngbe Utabná Jesucristbiamá tbojaninýcá y ibnatatšëmbcá entsanga imojtsëtsëtsnaye. Chentšana, Jerusalemoye tbojésanata y tbojánachnëngo ba Samarioca pueblënguëjana, tšabe notiçiënga entsanga abuayinaye.

Felipe y chë Etiopía luaroca reinabe uajabuachaná

²⁶ Chentšana, Bëngbe Utabnabe canýe ángel Felípbioye tbojaniyana: “Moprontá y tsmána luarëngoye motsa, Jerusalemšana Gaza ca uabaina bëts pueblöye benachëjana ca.” Chë benachna entsanga ndoyena luarëjana yojanachnëngona. ²⁷ As Felipe yojëtsëtsbaná y tojána. Benachiñe tbojáneninýena canýa Etiopía luarocáftaca. Etiopía luaroca canýe reiná inamna y chë boyabásana chabe uajabuachaná y chabe crocénana bojanýá inamna. Chana Jerusalemoye tojánabo Bëngbe Bëtsá jadórama. ²⁸ Chora Etiopía luaroye yojtsataye, chabe cochëshañe inayésenotbemañe, y chë Bëngbe Bëtsabe juabna oyebuambnayá Isaiásbe uabemana librëša yojtsaiualíaye.

²⁹ Chora chë Uámana Espíritu Felípbioye tbojaniyana: “Mobeconá y chë cochësha juachaca cochtsaye ca.” ³⁰ As Felipe betscó yojobeconá. Chora yojouena chë Etiopía luarocá, Isaiásbe uabemana librëša yojtsaiualíaye; as tbojantjá: —¿Chë contsalía soye quecmojtsosertana ca?

³¹ Y chë Etiopía luarocá tbojanjuá: —¿Ntšamo šochjosërta, ndocná šonjabuayenase ca?

Y Felípbioye tbojaniyana: —Diosmanda, atšbe cochëshoye másëngo y atšbe juachaca mabótbema ca.

³² Isaiásbe uabemana librëšañe mëntšá yojtsalíaye: Cha tmojanánatse mo canýe oveshá jóbama cuafjuanatscá; y chë mo canýe oveshá tmojtsëtsbotjná ora, cha iytëca jtsemnana, chánaca cachcá, chacá tondaye chenátanayana.

³³ Entšanga tmonjanma cha puerte chaosufrima, mo cha canye nduamaná cuaftsemncá y ntšamo ndoñe betsomerecencá cháftaca tmonjanma.

Ndocná nanjobenaye chabe básengbiamá jacuéntana, quem laurentša chabe vida tmontsanbojuaná causa ca.

³⁴ Chora chë Etiopía luaroca uajabuachaná Felípbioye tbojanियana: — Diosmanda, šmobuayená, ¿ndabiamá Bëngbe Bëtsabe juabna oyebuambnaya chca yojsichamo, cachabiamá o ínñabiamá ca?

³⁵ As Felipe tojanontšé, chë Isaíasbe librëšañe yojsayana sóyeca, Jesusbe tšabe noticiënga jábuayenama.

³⁶ Chentša bënëse, canye bėjaye obëjniñe juachañe ibojsachnëjuana. Chora chë uajabuachaná tojánayana: —Muentše bėjaye entsemna. ¿Ndáyeca ndoñe nanjopódia atše muentše uabainá jtsemnama ca? Diosmanda, šmabaye ca.

³⁷ As Felipe tbojanियana: —Jesucristbeñe nýets acbe ainánaca tcojtsosbuáchese, aiñe echanjopódia juabáyama ca.

Y chë boyabása tbojanjuá: —Aiñe, sëntsošbuaché Jesucristo Bëngbe Bëtsabe Uaquíña yomnama ca.

³⁸ As chë Etiopiocá tojanmandá chë cochësha chauátotonama. Chentšana, nýets útata chë bėjayoye tbojanashëbëbuástjango y Felipe, chë Etiopioca uajabuachanábioye tbojanabaye.

³⁹ Chë bėjayentsana tbojtancocna ora, chë Uámána Espíritu Felipe ibojtsánatseñe y chë uajabuachaná ya ndoñe más Felípbioye ibontsonýaye, pero corente oyejuayá yojsatoñe. ⁴⁰ Felipe tojántatsëmbona Azoto bëts pueblaca yojssemnama, y chentšana tojána nýetsca pueblënguenache chë tšabe noticiënga abuyayinaye, Cesarea pueblöye jashjanguëntscuana.

9

Ntšamo Saulo Crístbeñe ošbuachiyá tojanóbema

(Hch 22.6-16; 26.12-18)

¹ Saulo chëntscuana cabá Bëngbe Utabnábeñe ošbuáchiyënga yojanautatjná jtsëbáyama. Chama cha tojána chë bachnangbe más uámána amëndayábioye, ² uabemana tsbuanachangá jauátjañama, as chëchangaca jobenayama chë Damascoca judiëngbe enefjuana yebnëngoye jama, y chocna, chë Jesucristo tojaninýanyé Benache ustoniñe, boyabásenga o shembásenga tojánýenëse, jótabayama y Jerusalemoye junatsama. Y chca jamama tojánocna. ³ Pero ya Damasco béconana yojsyaye orna, nýe ndeolpe chabe juachañe celocana canye bëts tcuinýe tojanbuashinýinýena. ⁴ Chora Saulo fshantsoye tojánshajaye y canye oyebuambnayanana tojanuena, mëntšá: —Saulo, Saulo, ¿ndáyeca chca šcojtsacmena ca?

⁵ As Saulo tbojantjá: —¿Nda comna, Bëngbe Utabná ca?

Y chë oyebuambnayanana tbojanjuá: —Atše sëndmëna Jesús y aca condama atšbe entšanga chamotsesufrínama. ⁶ Pero matëtsbaná y Damascöye mamáshëngo; chentše canya cmochanjabuayená ndayá jamama cmojtsemnama ca.

⁷ Chë Sáuloftaca imojánajna boyabásenga tša auatjanánënga imojtsemna y chíyeca ndoñe imontsobena jóyebuambayana; er nýe chë oyebuambnayanana tmojanuena, pero ndocná tmonjáninýe. ⁸ As Saulo fshantsensana tojtantsbaná y tojtancobuchatéfjona ora, tondaye yontsobena jinýana. Chcasna, chë ínñyenga tmojëftsanobuacuetëntsé y

chca, Damascoye tmojanánatse. ⁹ Chentše yojëftsemna unga te, jinýama ntsobercá, ni ntjascá y tondaye ntjofšiyá.

¹⁰ Damascoca Jesucristbeñe canýe ošbuachiyá inoyena, Ananías ca uabainá. Cha Bëngbe Utabnábioye mo otjenayoquécá tbojáninýe y Bëngbe Bëtsá tbojaniana: —Ananías ca.

As cha tbojanjuá: —Bëngbe Utabná, ¿ndayá chjama ca?

¹¹ Y Bëngbe Utabná tbojaniana: —Moprontá y motsa chë “Ndericho tsáshenañe ca” uabainoye, y Júdasbe yebnentše cochjanotícia canýe boy-abásabiama, Saulo ca uabainábiamá, Tarso pueblócá; cha mora Bëngbe Bëtsáftaca bentsencuénta. ¹² Saulo ya tonjinýe mo otjenayoquécá, canýe entšá Ananías ca uabainá entsamashjuana y chabe cucuatšënga chabe bestšašifne entsejájua, chca, cha chabuatabinýnama ca.

¹³ Ananías chca tojanuena ora, tojánayana: —Bëngbe Utabná, banga ba soyënga chabiamá šmonjacuéntá; Jerusalenoca tša bacá acbe entsanga imomnënga tojábórlaye. ¹⁴ Y mora entsebomna mando chë bachnangbe amëndayëngbentsana, muentše aca otšëmbuanënga jótabayama ca.

¹⁵ As Bëngbe Utabná tbojaniana: —Motsa, er atše cha sënjuábuayana atšbiamá chaotrabajama; chaóyebuambama ndoñe judiëngbeñe, reyëngbeñe y Israeloca entšángbeñnaca, y chca, chënga atšbiamá chamotatsëmbonama. ¹⁶ Atše cha chanjinýinýiye ntsachetšá ibojtsemna átšbeyeca jasúfriama ca.

¹⁷ As Ananías tojána Saulo yojtšanmëna yebnoye. Tojánamashëngo ora, Saulëbe bestšašifne chabe cucuatšënga tojanajó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabinýnama y chë Uámana Espíritu acbe ainaniñe jtsemándayama cháuamashënguama ca.”

¹⁸ Cachora, Sálëbe bominýentsana mo beonbe bobachëshëngcá tojantquëcjana, y chca, ibojtsatabinýna; chora tojantsbaná y tojanenábaye. ¹⁹ Chentšana, Saulo tojanse y añemo yojtšatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

Damasco puebloca Saulo entsanga yojanabuayinýa

²⁰ Saulo cachorscana tojanontšé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama. ²¹ Chë imojtsuenanënga nýetscanga imojtsenjnanaye y mëntšá imojtsichamo: “Mua entsemna chë Jerusalenoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšifne jabáshejuanama.”

²² Pero Saulo cada ora más añémoca yojtšóyebuambnaye y puerte tšabá yojaninýanýná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntsamo cha jोजना.

Ntšamo Saulo judiëngbentsana tojtšanachá

²³ Bayté tojanochnëngo ora, judiënga tmojanenoyeuná ntšamo jamëse Saulo jóbama, ²⁴ pero Saulo chë soye tojántatsëmbona. Bnëté y ibeta, chë bëtš pueblentša bëšašanguenache chënga chabiamá imojananýá, jtsóbama; ²⁵ pero chë Jesucristbeñe ošbuáchiyënga, ibeta, cha canýe bëtš sbarëcuiñe tojtšanatsuamá, y chë pueblentša shëconana tapiëšëjana tmojtšanëštjango. Chca cha tojanotsbocá.

Saulo Jerusalenoca

²⁶ Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nyetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. ²⁷ Chcasna, Bernabé Sálulëbioye tbojëftsanbetse y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninÿama, ntšamo Bëngbe Utabná tbojanianama y ntšamo cha Damascoca tša añémoca Jesusbiamama entšanga tojánabuayenama. ²⁸ As Saulo Jerusalenentše tojanototoná y chë Jesucristbe ichmónëngaftaca yojánana. Bëngbe Utabnabiamama bëts añémoca entšanga yojanabuayiná y ²⁹ yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama. ³⁰ Jesucristbeñe ošbuáchiyënga chca tmojántatšëmbona ora, Saulo Cesarea luaroye tmojanánatse, y chentšana Tarso pueblroye tmojanichmó.

³¹ Y chca, Jesucristbeñe ošbuáchiyënga Judeoca, Galilea y Samaria luar-entše chora ya ndoñe más montsansufrina y natjëmbana imojtsemna, y nyetscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámana Espíritbe uajabuáchenanaca, Jesucristbeñe ošbuáchiyënga más tmojanoboté.

Pedro Enéasbioye tbojanshná

³² Pedro yojánabuache nyetsca chë Jesucristbeñe ošbuáchiyëngbenache. Y chca, Lida pueblroca Bëngbe Bëtsabe entšanga jabuachámnaca tojána. ³³ Lida pueblentše canÿa tbojáninÿena, Eneas ca uabainá. Cha jama ndobená inamna y posufta uata jutsnëshañe chca inajájona. ³⁴ Pedro tbojaniana: “Eneas, Jesucristo tcmonejashná. Matëtsbaná y acbe tjuashe motsejacaná ca.” Y cachora chë jama ndobená tojtantsbaná.

³⁵ Nyetscanga chë Lida pueblentše y Saronoca oyenënga chë entšá shnaná tmojáninÿe. Y as, chënga bacna soyënga amana tmojtсанajbaná y cach orscana tmojanontšë Bëngbe Utabnábeñe ošbuáchiyana.

Pedro tojanma Dorcas cháuatayenama

³⁶ Chë tempo, Jope pueblroca yojaniana canÿe shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyets tempo tšabe soyënga yojánama y yojanamana chë tojtsëjabortënga jubabuáchana. ³⁷ Pero chora, socana tbojanshache y tojtсанóvana. Tmojtсанbebé chentšana, canÿe tsoye tsbanana tsañoca chabe cuerpo tmojtсанajajó. ³⁸ Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatšëmbona Pedro choca yojtsemnama. Asna, uta boyabásata tmojanichamá Pedro jauyanama: “Diosmanda, betscó Jope pueblroye mabo ca.”

³⁹ As Pedro tojëftsantsbaná y chë uta boyabásaftaca tojána. Choye tmojánashajna ora, tmojanánatse chë Dórcasbe cuerpo yojtsemnoye, tsbanánoca; chorna, nyetsca viudanga šachénaca Pédrëbioye tmojanóbobuashcona y imojtsinÿinÿenaye chë Dorcas yojuajonaná entšayangá y cmešëjuangá, cabá chëngaftaca yojëftsemna ora. ⁴⁰ Pedro tojanmandá nyetscanga chentšana chamotsebocanama; chora Pedro yojoshëntsamentšiyey y Bëngbe Bëtsáftaca ibojencuentá. Chentšana, Pedro chë obanábioye tbojanonÿinÿé y tbojaniana: “Tabita, matëtsbaná ca.”

As Dorcas tojanobuchatefjona y Pédrëbioye tbojáninÿe ora, tojanótbema. ⁴¹ Chora Pedro tbojanábuacueshache y tbojtсанatsbaná.

As Pedro tojánachembo n̄yetsca ch̄e Jesucristbeñe ošbuáchiyēnga, ch̄e viudanga y ch̄e ín̄yēnga, y Dorcas ainá tojtaniñyan̄yé. ⁴² Ch̄e soye n̄yets Jope pueblent̄se tojanótat̄šēmbona y banga Bēngbe Utabnábeñe imojtsošbuáchiye. ⁴³ Y Pedro bayt̄e Jope pueblent̄se tojanoquedá, Simón ch̄e bobáchēshiñe trabajayabe yebnent̄se.

10

Pedro y Cornelio

¹ Cesarea pueblent̄se inamna can̄ye boyabása Cornelio ca uabainá; cha inamna ch̄e Italiano ca uabaina soldadēngbe amēndayá. ² Cornelio Bēngbe Bētsábioye ibnarrespetana y n̄yetsca chabe yebnent̄sa oyenēngaftaca Bēngbe Bētsá puerte imojánadorana. Becá crocénana inaquēcn̄yaye ch̄e judiēnga ndbomn̄jémēnga jujabuáchama y sempre Bēngbe Bētsáftaca ibn̄écuentaye.

³ Can̄ye te, mo bēts mošenana ora, cha botamana tojánin̄ye mo otjenayoquēcá, mēnt̄sá: Bēngbe Bētsabe can̄ye ángel Cornelio yojtsemnoye yojtsamashjuana y tbojaniyana: —¡Cornelio ca!

⁴ Cornelio ch̄e ángelbioye ibojtson̄yaye y auatjananá tbojaniyana: —Taita, ¿ndayá yojtsemna ca?

Y ch̄e ángel tbojaniyana: —Bēngbe Bētsá condbétseimpadanama y ch̄e ujabótēnga condbétsējabuachanama, Bēngbe Bētsá ácaftaca entsoyejuá y lempe cmochanjóyeunaye. ⁵ Chcasna, mora básefta boyabásenga Jope bēts puebloye michamó y Simón, ch̄e Pedro ca monduabobuatmá, moye chamuánatse. ⁶ Cha posada entsebmna in̄ye Simónbent̄se, ch̄e bobáchēshiñe trabajayabe yebnent̄se. Chabe yebna mar bējaye tsachañe endmēna. Cha cmochanjauyana ndayá jamama cmojtsemna ca.

⁷ Ch̄e Cornéliēbioye ibojuatsētsaye ángel tojtsatanoñe ora, Cornelio chabe oservenēnguentsana útata tojánachembo y can̄ye soldádnaca, chabe uajabuachaná, Bēngbe Bētsá adorayá; ⁸ lempe nt̄samo yojopasacá chēnga tojanuacantá y chent̄šana Jope puebloye tojanichamó.

⁹ Yēfsana mo n̄yetssto ora, chēnga benachiñe Jope béconana imojtsajnēnt̄scuana, Pedro yebnent̄sa tsbanánoye tojánashēngo, Bēngbe Bētsáftaca jencuéntama. ¹⁰ Becá tojánishēntsena y jasama yojtseboše; pero imojtsebopróntantscuana, Pedro mo otjenayoquēcá mēnt̄sá tojánin̄ye: ¹¹ Celoca yojtsatēf̄na y mo can̄ye bēts ent̄sayējuacá yojtsabá y n̄yets canta sibientsana yojtsējon̄yana. ¹² Ch̄e ent̄sayējuañe imojtsemna n̄yetscna bayēnga, ósjojnaye bayēnga y n̄yetscna shloft̄šēngnaca. ¹³ Y tojanuena can̄ye oyebuambnayana mēnt̄sá: —Motsbaná, Pedro; mobaye y quem bayēnga mose ca.

¹⁴ Chora Pedro tojánayana: —Ndoñe, at̄sbe Utabná. At̄se ndocna te chiyáisese Moisesbe leyíñe ndoñe yondēlesenciana jasama bayēnga y ch̄e jasama ndoñe t̄sabá imomna bayēnga ca.

¹⁵ Y cachiñe tojtétanuena ch̄e oyebuambnayana mēnt̄sá: —Bēngbe Bētsá tojalesenciá y can̄ye bayá t̄sabá jasama yomna ca tojayanēse, aca ndoñe matsjuabnana ch̄e bayá jasama ndoñe t̄sabá yontsemna ca.

¹⁶ Ch̄e soye unga soyama chca tojanopasá chent̄šana, ch̄e ent̄sayējua celoye tojtanátsjua. ¹⁷ Pero Pedro ndoñe yontsetát̄šēmo nt̄samo tojanin̄ycá ndayá chabiama yojtsayanama. Chēnt̄scuana, ch̄e Cornéliēbe ichmónēnga noticiánana Simónbe yebnoca tmojánashajna y shjoca bēšoca

imojtsobátmana. ¹⁸ Tmojanchembo ora, tmojanënoticiá Simón, chë Pedro ca uabobainá, chentše taibojatanama.

¹⁹ Pedro, ndayá tojáninÿama chabosertama yojtsenójuabnantscuana, chë Uámana Espíritu tbojanianyana: “Mouena, muentše mora unga boyabásenga cmontsenguá. ²⁰ Motsbaná, mocana matastjango y yapa nt-jatenuabuabnycá chëngaftaca cochjá, er atše chënga sënjichamó ca”.

²¹ As Pedro tojtanastjango y chë tmojánashjajnënga tojanëyana: —Atše sëndmëna chë šmontsenguá cha. ¿Ndáyeca moye šmojabo ca?

²² Chora chënga tmojanjuá: —Cornelio šonjichamó. Cha endmëna chë soldadëngbe amëndayá, canÿe tšabá mándbomna entšá y Bëngbe Bëtsábioye adorayá, y nÿetsca judiënga chabiamá tšabá mondbëtsoyebuambnaye. Bëngbe Bëtsabe canÿe ángel chábioye tbojabuayená ntšamo jamana aca chábioye chacotsama, as chë ndayá cha jauyanama cojtsebomncá cha jouenama ca.

²³ As chënga tojanëmashengo y posada tojanëyentsame. Yëfsana Pedro chë unga boyabásengaftaca tojána. Básefta Jesucrístbeñe ošbuáchiyënga Jope pueblentsënga Pedro tmojantjëmbambá.

²⁴ Chë inÿe yëfsana Cesarea puebloye tmojánashjajna. Chentše Cornelio Pédrëbiamá yojtsobatmana, y Cornelio tojanëbuaja pamíllanga y tšabe amiguëngnaca chentše imojtsemna. ²⁵ Pedro tojánashjango ora, Cornelio tojánocna jajëbenguama y chabe shecuatsentše yojoshëntsamentšiyë cha jadórana. ²⁶ Pero Pédrëna tbojtanatsbaná y mëntšá tbojanianyana: —Matëtsbaná, atše cach aquëcá nÿe canÿe entšá sëndmëna ca.

²⁷ Pedro Cornélioftaca encuëntaye chë yebnentše tojánamashëngo y ba entšanga tojánanÿena, chentše tmojanójotënga. ²⁸ Chora Pedro tojanëyana: —Cach tšëngaftanga šmondëtatšëmbo chë judiëngbe leyënguifne endayana ndoñe yondopodena canÿe judío ndoñe judío entšángaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinÿinÿé atše ndocna te šondmëna inÿabiamá jatsjuabnayaná cháftaca jenútanama ndoñe tšabá yondmëna ca. ²⁹ Chíyeca, šmonjobetše ora, ndocá ntjatichamcá nÿe sënjabo ca.

Chora tojanatjá: —¿Ndáyeca šmojobetše ca?

³⁰ As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinÿe atšbe delante canÿe boyabása uabuashinÿinÿana entšayaca bopormaná.

³¹ Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyëjuá y lempe cmochanjóyeunaye ca. ³² Básefta boyabásenga Jope bëts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inÿe Simónbentše, chë bobáchëshiñe trabajayabe yebnentše, y chabe yebna mar bėjaye tsachañe endmëna. Cha cmochanjauyana ndayá jamama cmojtsemna ca.” ³³ Chcasna, cachora sënjichamó aca jobetšama, y aslëpaye jabama tcojóyaunama. Y as morna, nÿetscanga Bëngbe Utabnabe delante fsëntseprontana jouenama lempe ntšamo Bëngbe Bëtsá tcmojamandacá ca —cha tojánayana.

Ntsamo Pedro tojanoyebuambá Cornéliëbe yebnentše

³⁴ Pedro chora tojanontsé mëntšá jóyebuambayama: —Mora atše šontsosertana, ndegombre Bëngbe Bëtsabiamá nÿetscanga cachcá uámanënga imomnana. ³⁵ Nÿets luarënguenache Bëngbe Bëtsá júbuajana

cha tmojtsatschuaná y tšabe soyënga tmojtsamënga. ³⁶ Tšëngaftanga šmondëtatšëmbo, Bëngbe Bëtsá Israeloca entšanga tojánabuayenama, tšabe noticiënga jtsóyebuambnayëse, chënga nyëtscanga ainaniñe tšabe ebionana chamotsebomnama, Jesucristbeyeca; y cha endmëna nyëtsca entšangbe Utabná. ³⁷ Tšëngaftanga šmondëtatšëmbo ntšamo nyëts Judeoca tonjanopasama. Chë soye Galilea luaroca tojanobojatšé, Juan entšanga yojanabuayiyná orscana, chënga bacna soyënga amana chamotsajbanama y chamuenabayama. ³⁸ Smondëtatšëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espíritu chabe ainaniñe cháúamashënguama, y tojanma Jesús corente obená chaotsemnama; y šmondëtatšëmbo ntšamo Jesús enjánana entšangbiana tšabe soyënga amiñe y nyëtscanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

³⁹ “Bënga fsënjáninye y fsëndëtatšëmbo lempe ntšamo Jesús tojanmá Jerusalenoca y nyëts Judea luariñe; y cha tmonjanóba, canye cruciñe jacrucifícase. ⁴⁰ Pero Bëngbe Bëtsá tonjanma unga tianoye cha cháuatayenama y bëngbeñe chaonýnama. ⁴¹ Cha nyëtsca entšangbe delante ndoñe chenátanbocna, pero aiñe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinýama. Y tojtanayenšana bënga cháftaca fsënjanse y fsënjanošé. ⁴² Cha šonjichamó entšanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiana y ainëngbiana yochjayana tšabá o ndoñe tšabá tmonjamama. ⁴³ Bëngbe Bëtsabe juabna oye-buambnayënga nyëtscanga cach Jesusbiana tmojánayana, nda Jesúsbeñe tojtsošbuaché, chábioye Bëngbe Bëtsá chabe bacna soyëngama bochan-japerdóna, Jesusbe obenánaca ca.”

Ndoñe judiënga chë Uámana Espíritu tmojanóyëngacñe

⁴⁴ Pedro chë palabrënga cabá yojtsóyebuambnantscuana, chë Uámana Espíritu tojánamashëngo nyëtsca chë imojtsuenanëngbe ainaniñe jtsemándayama. ⁴⁵ Chë judiënga Jesucristbeñe ošbuáchiyënga Pédroftaca tmojánabënga imojenjaná, chë Uámana Espíritu ndoñe judiëngbeñnaca cháúamashënguama Bëngbe Bëtsá tojanmama. ⁴⁶ Chënga imojtsuenana chënga inyëtsá jtsebiyangana, chënga tempo ndmabiyañe y jtsichámuana Bëngbe Bëtsá bëts soyënga tojanmama.

⁴⁷ Chora Pedro tojánayana: “Pero mëngna chë Uámana Espíritu tmonjóyëngacñe ntšamo bënga tmonjoyëngacñecá. Chcasna, ndocná queochatobenaye jamana chënga uabáinënga ndoñe chamondëtsemnama ca.” ⁴⁸ As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

11

Ntšamo Pedro chë Jerusalenoca imojánenefjuana ošbuachiyëngbioye tojanéyana

¹ Jesucristbe ichmónënga y chë Judeoca Jesucristbeñe ošbuáchiyënga tmojánatšëmbona, chë ndoñe judiëngnaca Bëngbe Bëtsabe palabriñe imojtsošbuáchema. ² Pero Pedro Jerusalenoye tojesaná ora, báseftanga chabiana ndoñe tšabá tmojánayana. Chënga imojamna chë juabnayënga, chë

ndoñe judiënga ošbuáchiyënga boyabásenga canjánamna chë más delicadentše base bobachtema tëtšenënga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. ³ As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

⁴ Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanéyana: ⁵ —Atše Jope puebloca sënjamna y Bëngbe Bëtsáftaca sënjencuénta ora, mo otjenayoquécá sënjáninýe celocana mo canýe bëts entšëjuacá átšbioye enjétsabeconaye y nyëts canta sibiocana enjétsëjonýana. ⁶ Y botamana sënjanrrepará ndayá chë tsoye bétsemnama y sënjáninýe choye monjésemna uamna y tjoca bayënga, ósojnyaye bayënga y nyëtsca shloftšëgnaca. ⁷ Y sënjanuena canýe oyebuambnayana mëntšá: “Motsbaná, Pedro; mobaye y quem bayënga mose ca.” ⁸ Chora atše sënjánayana: “Bëngbe Utabná, ndoñe; atše ndocna te chiyáisese chë Moisesbe leyiñe ndoñe yondëlesenciana jasama bayënga y jasama ndoñe tšabá imomnënga ca.” ⁹ Chentšana cachiñe sëntëtanuena chë celocana oyebuambnayana mëntšá: “Bëngbe Bëtsá tojalesenciá y canýe bayá tšabá jasama yomna ca tojayanëse, ndoñe matsjuabnana chë bayá jasama ndoñe tšabá yontsemna ca.” ¹⁰ Chë soye unga soyama chca tonjanopasá y chentšana chë entšëjua celoye tontanátsjua. ¹¹ Y cachora unga boyabásenga Cesarea puebloca ichmónënga, chë posada sëndbomnentše tmonjánashajna, atše janguanguama. ¹² Y chë Uámana Espíritu šonjanmandá atše yapa ntjatenojuabnaycá chëngaftaca jama; y quem chnënguana Jesucristbeñe ošbuachiyëngnaca átšeftaca tmonjána. Nyëtscanga canýe entšá Cornelio ca uabainabe yebnoye fsënjánamashjna; ¹³ y chana bënga šonjanacuntá ntšamo tojáninýe, cachabe yebnentše canýe ángel ibojtsebiatsana y mëntšá tbojaniyana: “Básefta boyabásenga Jope bëts pueblöye michamó y moye chamuánatse Simón, chë Pedro ca monduabobuatmá, ¹⁴ y cha cmochanjabuayená ntšamo aca y acbe yebnentša oyenënga šmochjotsbocá ca.” ¹⁵ As, atše jóyebuambayama sënjanbojatsé orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

¹⁶ “Chora sënjanenojuabó ntšamo Bëngbe Utabná tonjánayanama: ‘Ndegombre, Juan entšanga béjayeca tonjanëbaye; pero Bëngbe Bëtsá chë Uámana Espíritu bochanjíchmuá, tšëngaftangbe ainaniñe jtsemándayama cháuamashënguama ca.’ ¹⁷ Chcasna, chëngnaca Bëngbe Bëtsá chë Uámana Espíritu tonjatšatá, ntšamo bënga, chë Utabná Jesucristbeñe ošbuáchiyënga, šonjanatšatacá. Y chca, atše ndoñe quetsátsmëna canýe tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

¹⁸ Jerusalenoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmëncaca chamuatenujuaboma y chca amana chamotsajbanama, chë nyëtsca tescama yomna tšabe vida chamotsebomnama ca!

Ntšamo Antioquía puebloca tojanobojatsé, entsanga Jesucristbeñe ošbuáchiyana

¹⁹ Esteban tmojanóba chentšana, tmojanontsé chë Jesucristbeñe inye ošbuachiyëgnaca jatëcamiyama. As chentšana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nye judiëngbiama. ²⁰ Pero báseftanga imojamna Chipre y Cirene luaroquënga, y chënga Antioquía bëts puebloye tmojánashjajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase. ²¹ Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontsé Bëngbe Utabnábeñe jtsošbuáchiyana.

²² Jerusalemoca Jesucristbeñe ošbuáchiyënga chë soye tmojántatšëmbona ora, Antioquía luaroye Bernabé tmojanichmó. ²³ Bernabé choye tojánashjango orna, tojáninýe ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nýetscanga tojanabuayená chamotsiyena nýets ainánaca Bëngbe Utabnábeñe jtsošbuáchiyëse. ²⁴ Bernabé inamna canýe entšá tšabe soyënga amá, chë Uámana Espíritu chabe ainaniñe yojtsemándaye y bëtscá ošbuachiyá inamna. Y banga tmojanontsé Bëngbe Utabnábeñe jtsošbuáchiyana.

²⁵ Chentšana, Bernabé Tarso puebloye tojána Saulo janguanguama, ²⁶ y tbojáninýena ora, Antioquía luaroye tbojëftsanbetše. Antioquía luarentšna canýe uata nýetšá Jesucristbeñe ošbuáchiyëngaftaca cányíñe ibojëftsemna y ba entšanga tmojanabuatambá. Antioquioca inamna chë ndayentše natsanama Jesucristbeñe ošbuáchiyënga Cristbe ústonënga ca imojtsëbuatma.

²⁷ Chë tempo, básefta Bëngbe Bëtsabe juabna oyebuambnayënga Jerusalemocana Antioquía luaroye tmojána. ²⁸ Chënguentšana canýa Agabo ca uabainá tojantsá y chë Uámana Espíritbeyeca tojánayana, mëntšá: “Nýets luariñe entšanga oyeníñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora. ²⁹ Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocénanëncaca júichmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama. ³⁰ Chca tmojanma, y Bernabé y Sáuloftaca chë crocénana tmojanichmó chë Judeoca Jesucristbeñe ošbuáchiyënguentše bëtsëjemëngcá amëndayëngbiyoe.

12

Santiago tmojanóba; Pedro tmojanëtame

¹ Chë tempo, rey Herodes básefta Jesucristbeñe ošbuáchiyënga tojánishëche jutámíama y jatsetšenama. ² Tojanmandá espadëjaca chamóbama Santiago, Juanbe catšata; ³ y Herodes tojántatšëmbona judiënga chë soye tojanogúsetama; as, cha tojanmandá Pédrëncaca chamutámíama. Chca tojanopasá chë levadúracaca ndëpormana tandëse sayté, Bashco fiesta ora. ⁴ Pedro tmojánishache orna, Herodes tojanmandá chamutámíama, y chë cárceloca soldadënga cantátanga tmojanenajatá cántentše cha chamotsebojanýama. Herodes yojëtsejuabnaye, Bashco fiesta tojochnëngo ora Pedro juabocnama, entšangbe delante jayanama cha chaóbanama. ⁵ Chcasna, Pedro yojtsëtamena y chë soldadëngna corente imojtsebojanýá. Pero

Jesucristbeñe ošbuáchiyëngna bètská Bëngbe Bëtsá imojtseimpadana Pédrëbiamá.

Bëngbe Bëtsá tojanma Pedro natjëmbana cárcelocana cháuaisebocnama

⁶ Canye te yojtsájamna Herodes entsangbe delante Pedro juabocnama. Chë te ibetna, Pedro yojtsomañe y cátatoica canye soldado yojtsemna; uta cadenëjuaca yojtsabatsëcna y inye soldadëngna bësócana chë utámeniñe imojtsebojanýá. ⁷ Ndeolpe, Bëngbe Utabnabe canye ángel tojánbocna, y lempe chë utámeniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojanianyana: “Betsco motsbaná ca.” Y cachora chë cadenëjuangá Pédrëbe buacuatšënguentšana tojanatquëcjana, ⁸ y chë ángel tbojanianyana: “Matichëtjo y matóshecochëtjo ca.” Pedro tojanma ntšamo chë ángel tbojaniancá, y chora chë ángel tbojátaniyana: “Mataquëfsayé y šmasto ca.”

⁹ Pedro utámenocana chë ángel ibojtsëstona, pero ndoñe yontsetátšëmbo aiñe ndegombre o ndoñe bentsemna chë ángel yojtsama cha chocana cháuaisebocnama; masna, ibojtsinýana mo canye otjéna yoca cuaftsemncá ca. ¹⁰ Y útentše chë soldadënga imojtsebojanýajana chata tbojánachnëngo y yerëša bësásoye tbojánashjango, chë ndayëša yojanamna tsáshenoye jabocnama; y chë bësásana nye cachabe ponto yojotëfjo. Chentšana tbojëftsanbocna ora, canye tsáshenëjana ibojtsaye, y nye ndeolpe chë ángel Pédrëbentšana yojtsojuánañe.

¹¹ Nya chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atše jatsbocama Heródesbe cucuatšentšana y lempe ntšamo judiënga átšeftaca jamama imojuabnámnaca ca.”

¹² Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentše banga cánýiñe imojtsemna, Bëngbe Bëtsáftaca encuëntaye. ¹³ Pedro chë tsashenoica bësásoca tojanchembo ora, canye oservená, Rode ca uabainá, tojánbocna jarrepárama. ¹⁴ Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jaúnayama, Pedro bësoca yojtsemna ca. ¹⁵ Chë tsoca imojtsemnëngna chora tmojanianyana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojanianyana: “¡Chabe ángel ctsemna ca!”

¹⁶ Chëntscuana Pedro cabá yojtsechembuana; tmojánebiatëfjo y tmojáninýe ora, chënga puerte imojenjaná. ¹⁷ Pero Pedro tojánëfatšëmbo iytëca chamobiamama y tojanacuntá ntšamo Bëngbe Utabná utámenocana tbojánatsbocama. Chentšana tojanëyana: “Ntšamo tonjopasama Santiago y chë Jesucristbeñe inye ošbuáchiyënga šmochjaúnaye ca.”

Chora Pedro chë yebnentšana tojtáisebocna y ínýoye yojáta.

¹⁸ Tojanbinýna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa. ¹⁹ As Herodes tojanmandá Pedro chamotsenguanguama; pero jtsinýenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojanbojanýá soldadënga jtsëbáyama. Chë soyënga tojanochnëngo chentšana,

Herodes Judea luarentšana tojěftsanbocna y Cesarea luaroye tojtsanoñe, y choca tojtsanoquedañe.

Herodes tojanóbana

²⁰ Herodes corente yojtsetsátjaye Tiro y Sidonoquëngaftaca; as chënga tmojanenoyeuná Heródesbioye jama. Canye uámana uajabuachaná, Blasto ca uabainábioye tmojanayeuamaná, y chana tojanašebuachená Herodes jauyanama ndoñe más entjayánanënga chamondětsemnama, er Tiro y Sidonoca entšanga vida imnabomna Heródesbe luaroca sanángaca. ²¹ Chcasna, rey Herodes inye tescama tojánachembo. Chë tena, jóyebuambayama Herodes uámana entšayaca yojtopórma y yojótbema chabe mándaye tbemanentše; chentšana tojanonguamé. ²² Chora entšanga tmojanontsé mëntšá uayebuáchana: “¡Chë entsoyebuambná cha entšá ndoñe quenátsmëna! ¡Chana canye dios entsemna ca!” ²³ Cachora, Bëngbe Bëtsabe canye ángel tojanma Herodes šocana chaboshachama, chabe cuenta Bëngbe Bëtsá chamuatschuama entšanga ndoñe yonjáuyana causa. Herodes tojanóbana mamángaca sasná.

²⁴ Pero chë tempo más bëtská entšanga Bëngbe Bëtsabe palabra imojtsuenana y Jesucristbeñe imojtsošbuáchiye.

²⁵ Bernabé y Saulo chatbe trabajo tbojěftsanma ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tmojěftsanbetše.

13

Bernabé y Saulo tbojanbojatsé Bëngbe Bëtsabe trabajo jamama

¹ Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyeubuambnayënga y ošbuachiyëngbioye abuátambayënga. Chënga imojanabaina Bernabé, Simón (chë Sibetá ca uabobuatmá), Lucio Cirenocá, Manaén (nda tojanoboché cányiñe Herodes, chë Galileoca réyëftaca) y Saulo. ² Canye te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espíritu tojánayana: “Mora šmochjaleséncia Bernabé y Saulo tšëngaftangbentšana chabuětsebocnama; chatna canye trabajuama sënjabacá ca.”

³ Bëngbe Bëtsá jëtschuayama tondaye ntjascá imojtsemnëntscuana y cháftaca imojtsencuëntantscuana, chëngbe cucuatšënga chatbe bestšaše juatsboica tmojancjá, chatbe trabajuiñe chaujúabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

Bernabé y Saulo Chipre luaroca

⁴ As Bernabé y Saulo, chë Uámana Espíritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. ⁵ Salamina bëts pueblöye tbojánashjango ora, tbojanontsé Bëngbe Bëtsabe palabrama entšanga jábuayenama, chentša judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

⁶ Nyets chë luarëjana tmojánachnëngo orna, Pafos pueblöye tmojánashjajna; y chentše tmojáninýena canye judío tatšëmbuá, Barjesús ca uabainá. Cha yojánichamo cha canjamna canye Bëngbe Bëtsabe juabna oyeubuambnayá ca, pero ndoñe chca yonjamna. ⁷ Chë tatšëmbuá inatrabájaye chë Chipre luaroca mandadbiama, Sergio Paulo ca uabainá; y chë mandadna corente osertaná inamna. Cha yojtseboše Bëngbe

Bëtsabe palabra jouenama; as tojanmandá Bernabé y Saulo jobiatšana. ⁸ Pero chë tatsëmbuá, grieguiñe Elimas ca uabainá, Saulo y Bernabebe contra yojtsame y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá. ⁹ Chora, Saulo chë Pablo ca imojanábobuatmabe ainaniñe chë Uámana Espiritu corente yojtsemándaye; as chë tatsëmbuábioye yejuana ibojonýinýiye, ¹⁰ y tbojaniyana: “¡Abuambnayá, puerte bacna entšá, Satanasbe uaquiñá y tšabe soyënga ndoñe chaondëtsebínýnama trabajayá! Bëngbe Utabnabe nýetsca ndegombre soyëngama aca contsichamo uayátsenaye soyënga yojtsemna ca. ¹¹ Mora, Bëngbe Bëtsá cmochanjacastiga, jtaná cochanjoquéda y baseftayté jinýama quecochatobenaye ca.”

Cachora Elimas mo ibetiñcá yojoquéda y ibojtsonguaye canýa buacuetëntšnana chabuánatsama, jtaná yojtsemna causa. ¹² Chë mandado chca tojáninýe ora, Jesucristbeñe yojtsošbuaché y yojenjnáná Bëngbe Utabnabe soyënga tojanatsjínýama.

Pablo y Bernabé Antioquía pueblentse, Pisidia luaroca

¹³ Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona. ¹⁴ Pergentšana Antioquía puebloye tbojátanata; chë pueblo inamna Pisidia luare béconana. Chentšna, ochnayté, chë judiëngbe enefjuana yebnoye tbojánamashëngo y tbojanótbema. ¹⁵ Moisesbe leyiñe y Bëngbe Bëtsabe juabna oyebuambnayëngbe uabemana libréšangañe tmojanalía orna, chë enefjuana yebnentsa mándayënga canýa tmojanichmó chënga jáuyanama: —Israeloquënga, bënga fsëntseboše entšanga chašmabuayená, nderado ndayá jayanama šmojtsebošnëse, muentša entšanga añemo chamotsebošnama ca.

¹⁶ As Pablo tojantsá y entšángbioye cucuátseca tojánefjatsëmbo iytéca chamobiamama, y tojánayana: —Smochjouena Israeloquënga y ndoñe judiënga Bëngbe Bëtsá adórayënga. ¹⁷ Israeloca entšanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtscanga chamotsemnana, chënga Egiptoca inýe luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana. ¹⁸ Canta bnëtsana uata nýetsá, Bëngbe Bëtsá entšanga ndoyena luaroca chënga yojanëuantana, ¹⁹ y cha tojanma chë Canaán luaroca canýsëftentša entšanga chamopochocama y bëngbe bëts taitanga chëngbe fshantsënga nduiñënga tojánabiama. ²⁰ Chë tempo, chë Bëngbe Bëtsá Abrahámbioye quem fshantse jatšetayama tbojanšbuachená orscana, y chë tempo, chë bëngbe bëts taitanga chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentšana, Bëngbe Bëtsá chëngbiana mandadënga tojánabiama, Bëngbe Bëtsabe juabna oyebuambnayá Samuel chëngbe mandayá yojéftsemna tempëntscuana. ²¹ Chentšana, Israeloquënga Samuel tmojanimpadá canýe rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentšá. ²² Más chcoyna, Bëngbe Bëtsá Saúlbioye chë mándayentsana tbojtsanjuaná, y chentšana Davidbioye mo chëngbe reycá tbojánbema. Chabiana Bëngbe Bëtsá tojánayana: ‘Atše sëndétatsëmbo, David, Isaibe uaquiñá, canýe tšabe entšá

yomnama y chama atše sëndoyeuja, y cha sempre endëprontana ntšamo atše stsebošcá jtsamama ca.’²³ Davídbentšana canÿe entšá Jesús enjamna, nda Bëngbe Bëtsá tbojanichmó Israeloca entšanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá.²⁴ Cabá Jesús ndébozna ora, Juan nÿetsca Israeloquënga tojanabuayená bacna soyënga amana chamotsajbanama y chamuenábayama.²⁵ Juanbe trabajo jopochócama yojtsobeco ora, cha tojánayana: ‘¿Nda atše tsmënama tšëngaftanga šmojuabná ca? Chë tšëngaftanga šmontsejuabná atše tsmëna ca cha, atše ndoñe quetsátsmëna. Pero átsbentšana echanjabo canÿa, y atše merecido taitatobuajoñe ni mo jotsejbiyama chabe shecochëtjonëshentša corriëja jajafjonama ca.’

²⁶ “Chcase morna, Abrahámbentšana entšanga y ndoñe judiënga Bëngbe Bëtsá adórayënga; bëngbiana entsemna quem buayenana soye, chë Bëngbe Bëtsá entšanga játsebacana.²⁷ Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentše, Jerusalemntša oyenënga y chentša mándayënga ndoñe quenjánanësertana nda Jesús bëtsemnama, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librëšangañe iuabemancá.²⁸ Y masque ndocna bacna soye tmonjáninÿena Jesús jóbana chabotsemnama, Pilato tmojanimpadá chaomandá chábioye jóbama.²⁹ Chentšana, lempe ntšamo Bëngbe Bëtsabe uabemana palabrënguñe iuayancá Jesúseftaca tojanochnëngo ora, chabe ústonënga chë cruzocana tmojtanëstjango y tmojanatbontsá.³⁰ Pero Bëngbe Bëtsá tojanma Jesús cháuatayenama.³¹ Chë Galileocana Jerusalemoye cháftaca tmojánanga, baytentscuana Jesús yojánëbëbuacana; y morna, lempe ntšamo Jesusbiana tmojaninÿcá, chënga entšángbeñe montsoyebuambná.

³² “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá,³³ cha tonjama, bënga chë chëngbe entšanguentšëngbiana, chca chaotsemnama. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabrënguñe, segundo salmentše mëntšá tojanábema, ntšamo Bëngbe Bëtsá Jesúsbioye tbojanianama: Aca atšbe uaquiñá condmëna.

Mënté entšanga sënjinÿanÿé aca atšbe Uaquiñá comnama ca.

³⁴ Y tempo Bëngbe Bëtsá chabe uabemana palabrënguñe tojaninÿanÿé cachá jamama Jesús cháuatayenama y ndoñe cachiñe chaondóbanama, mëntšá tojánayana ora:

Chë ndegombre soyënga y chë tšabe bendicionënga ntšamo David sënjanšbuachenacá,

tšëngaftanga cbochanjátataye ca.

³⁵ Inÿoca Bëngbe Bëtsabe uabemana palabrënguñe, Salmos librëša uabiamnayá, mëntšá tojanábema ntšamo Jesús Bëngbe Bëtsábioye tbojanianama:

Aca ndoñe quecochatsleséncia atšbe cuerpo,

chë acbe Uámana oservenabe cuerpo chaotsochocama ca.

³⁶ David, chabe tempo imojyenëngbiana tojanma, ndayá cha chao-mama Bëngbe Bëtsá tojanjuabocá. Cha tojanóbana y tojanatbontsá chë chabe bëts taitángbioye tmojanëtabuantsá luarentše, y chabe cuerpo

tojanopochocá. ³⁷ Pero chë Bëngbe Bëtsá tojanma chauatayenamabe cuerpna, ndoñe tonjanopochocá.

³⁸⁻³⁹ “Asna, baconga y batanga, atše séntseboše tšëngaftanga quem soye chašmotsetátšëmbo: Ndayá Jesús tojanmama, entšanga chëngbe bacna soyëngama perdonánënga montsemna. Jesúsbeveca, nyëtsca chábeñe tmojtsošbuáchenga, bacna soyëngama perdonánënga mochántsemna. Ntšamo Moisesbe leyiñe iuayancá tmojanmama, chënga ndoñe tmonjanobená chca perdonánënga jtsemnama; nyë Jesúsbeñe jtsošbuáchiyëse chënga perdonánënga jtsemnana. ⁴⁰ Cuedado šmochtsebmna, ntšamo Bëngbe Bëtsabe juabna oyebuambnayënga tmojanayancá, tšëngaftangaftaca ndoñe chaondochnënguama. ⁴¹ Bëngbe Bëtsá mëntšá tojánayana:

Smochjouena. Tšëngaftanga chë ntšamo atše tijayancá šmojtšábotenga, ojnánënga šmochántsemna y šmochanjóbana.

Tšëngaftanga cabá vida šmobomnëntscuana, atše bëts soyënga chanjëftsema,

y masque ndánaca chë soyëngama chacmojtšacúnta, tšëngaftanga chiñe ndoñe quešmochatošbuáchiye ca” —Pablo tojanoyebuambá.

⁴² Pablo y chabe enutënga chë judiëngbe enefjuana yebnentšana tmojëftšanbocna ora, chë ndoñe judiënga chëngbiyoe tmojanaimpadá, chë inyë ochnaytescama chë soyëngama más jábuayenama. ⁴³ Chentše chë te jénefnama tempo tojanopochocá ora, ba judiënga y ndoñe judiënga, chë Bëngbe Bëtsábioye imojánadorana mo chë judiëngcá, Pablo y Bernabé tmojanéseto. Y chatna chënga tmojanabuayená nyëts tempo chamotsejuabnama, Bëngbe Bëtsá chëngbiana tšabe soyënga yojtšamama.

⁴⁴ Chë inyë semana, chë ochnaytena, nya mo nyëtsca chë pueblentše oyenënga tmojanobeconá Bëngbe Bëtsabe palabra jouenama. ⁴⁵ Pero ba entšanga choye jouenama tmojánama chë judiënga tmojáninye ora, tmojanotjayaná, ba entšanga Pablo imojtseyeunanama; as chënga tmojanontšé mocá ichámuana ndayá cha yojtšoyebuambnama, y chábioye oyenguayana. ⁴⁶ As Pablo y Bernabé más añémoca mëntšá tbojánayana: “Endánëyta, natsana tšëngaftanga, chë judiënga šmomnënga, Bëngbe Bëtsabe palabra jshabuayenana. Pero tšëngaftangna chë palabra šmontsaboté, y šmontsejuabná tšëngaftangbiana ndoñe tšabá yontsemna chë nyëtsca tescama yomna tšabe vida jtsebomnana ca; chë causa, bënga fchantsoñe chë ndoñe judiëngbeñe Bëngbe Bëtsabe palabra jóyebuambayama. ⁴⁷ Er Bëngbe Bëtsá chama šjanichamó, mëntšá jauyanëse: Aca tčbonjuábuayana chë ndoñe judiëngbiyoe tšabe noticiënga jábuayenama, chaósertama.

Y chca, aca chëngbiana cochántsemna mo canye binñyayacá.

Chca, ácbeyeca nyëts luarënguénache entšanga atše chanjatsebacá ca.”

⁴⁸ Chë ndoñe judiënga chca tmojanuena ora, puerte imojtšoyejuaye y tmojanontšé mëntšá ichámuana: “Bëngbe Utabnabe palabra tšabá bëngbiana entsemna ca.” Y chora, chë nyëtsca tescama yomna tšabe vida jtsebomnana Bëngbe Bëtsá tempo tojánabacacanga, tmojanontšé Jesúsbeñe jtsošbuáchiyana. ⁴⁹ Y chca, nyëts chë luariñe más entšanga Bëngbe Bëtsabe palabra imojtsuenana. ⁵⁰ Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y

chë pueblentša uámana taitángaftaca, jamama Pablo y Bernabé chabosufrima y chë luarentšana jtëbuacnama. ⁵¹ As, Pablo y Bernabé tbojésanshecstëtonata, judiënga jinýanýiyama chënga ndoñe tšabá tmojanmama; y chentšana, Iconio pueblöye tbojtsanoñe. ⁵² Pero Jesucristbeñe ošbuáchiyënga corente oyejuayënga imojtsemna, y chë Uámana Espiritu chëngbe ainaniñe corente yojtsemándaye.

14

Pablo y Bernabé Iconio puebloca

¹ Iconioca, Pablo y Bernabé cánýiñe tbojánamashëngo chë judiëngbe enefjuana yebnentše y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. ² Pero chë judiënga Jesucristbeñe ndošbuáchiyënga, chë ndoñe judiëngbioye tmojanayëñaná, Pablo y Bernabebiamama podesca chamotsejuabnama. ³ Chíyeca, Pablo y Bernabé bayté chentše tbojanototoná y ndauatjácá Bëngbe Utabná Jesucristbiamama tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninýanýe, ndayá chë ichmónata ibojtsoyebuambnacá ndegombre bëtsemnana, chë Bëngbe Bëtsá nýetscanga iuababuánýeshanana. ⁴ Pero nýetsca chë pueblentša entšanga ndoñe cachcá imontsejuabnaye; inýenga chë judiëngaftaca imojtsemna, y inýengna chë Jesucristbe ichmonátaftaca. ⁵ As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtšbënggaca jtsëbáyama. ⁶ Pero Pablo y Bernabé chama tbojántatšëmbona orna, tbojtsanëchañe Listra y Derbe pueblöye, Licaonia luaroca, y chocha chábuañe luarëngoye; ⁷ y chë luarënguenáchnaca, chata Jesucristbe tšabe noticiënga entšanga tmojanabuayená.

Listra puebloca, ndëtšbënggaca Pablo tmojtsanatëchënganja jtsóbama

⁸ Listra puebloca inamna canýe boyabása jama ndobená. Ndocna te yondobena jana, chca cosheto inónýna causa. Chë boyabásana yojtsetbemana ⁹ ouenana ntšamo Pablo yojtsichamcá. Y Pablo chábioye tbojanonýinýe ora, tojántatšëmbona chë sócá tša yojtsošbuáchemama, shnaná jtsatsmënamama; ¹⁰ as Pablo, juayebuáchenëse tbojaniyana: “¡Motsbaná y acbe shecuatšëngaca tšabá motsa ca!”

Chora chë boyabása, canýe jontsenýese tojantsá y yojóntša anana. ¹¹ As chë entšanga, ndayá Pablo tojanmácá tmojáninýe ora, tmojanontšé uayebuáchana chë Licaonia luarentša biyañe, mëntšá: “¡Bëngbe diosënga bëngbioye tbojátšma mo entšatcá ca!”

¹² Bernabé imojtsábobuatma Zeus ca, mo chë chëngbe diosënga amëndayacá; y Páblëna Hermes ca, mo chë inýe diosëngbiamama oyebuambnacá. Páblëbioye chca imojtsábobuatma, er cha más yotsoyebuambná. ¹³ Zeusbiamama chentša bachna inabomna canýe yebna chë pueblo chaboca, chábioye jadórama. Chë bachna, uacnënga tojanënatse y uantšëfjushangá tojanëyamba chë Zeus jadórama yebnentša amashjuanoye; y cha y chë entšanga imojtseboše chë uacnënga jashebuáyana y jajuinýiyana, chca, chë ichmonátbioye jadórama.

¹⁴ Bernabé y Pablo chama tbojántatšëmbona ora, entšayá tbojtsanenántšajatanëca, entšanga jinýanýiyama, ntšamo chënga imojtsamcá chata tondaye yonjógusetama, y tbojëftsantjajo entšangbe tsëntšajana y

měntšá ibojtsaychembumbuana: ¹⁵ “Baconga y batanga, ¿ndáyeca chca šmojtsama ca? Běndata cach tšěngaftangcá entšata fsěndměna. Muentše běndata fsěntsemna nýe jábuayenama Běngbe Utabná Jesucristbe tšabe noticiěnga, tšěngaftanga chě quem ndoserverna soyěnga, vida ndbomna soyěnga adórayana chašmotsajbanama, y Běngbe Bětsá Ainabe benache chašmatishachama. Ndegombre, cha tojanma celoca, fshantse, nýetsca bėjayěnga y lempe ntšamo chenache yobinýncá. ¹⁶ Masque tempo, Běngbe Bětsá entšanga tojanalesenciá cada ona chaoma ntšamo tojtsejuabnacá, tšabá cachěngbiama vojtsémnayeca, ¹⁷ Běngbe Bětsá ndocna te ntjájbanana tšěngaftanga jtsinýanýnayana, cachá tojama tšabe soyěngaca, mocna Bětsá cha yomnana. Cha endama tšěngaftangbiama chauaftema y chě matěnga botamana chaoshájonama, y becá saná cmondatsatná; y cha endama tšěngaftangbe ainaniñe corente oyejuayana chašmotsebomnama ca” — chata tbojánayana.

¹⁸ Masque chě soyěnga tbojánayana, nýe batšatema más bėn y ya ndoñe matbėnjanobenata chě entšanga jtsėuyanana uacněnga jashebuáyama, chca, chátbioye jadórama.

¹⁹ Chca ora, básefta judiěnga tmojánashjajna Pisidioca, Antioquíocana y Iconiocana, y chentša entšángbioye tmojanayėnjaná, Jesucristbe ichmonatbe contra chamotsemnama. Chcasna, Pablo ndětsbėngaca imojtsėnanaye y chabe cuerpo chě pueblo chaboye tmojtsansjojó, er chěnga imojtsejuabnaye Pablo ya obaná vojtsemna ca. ²⁰ Pero Jesucristbeñe ošbuáchiyěnga Pablo tmojanóbobuashcona orna, cha tojtantsbaná y cachiñe chě pueblloye tojtesaná; y chě yěfsana, Bernaběftaca Derbe pueblloye tojána.

²¹ Derbe pueblloca Jesucristbe tšabe noticiěnga entšanga tmojanabuayená, y chca, entšanga Jesucristbeñe imojtsošbuáchioye. Chentšana chata tbojėsanshěconca Listra, Iconio y Pisidioca Antioquiioye. ²² Chě luarěnguenache chata ibojánana chě Jesucristbe ustoněngbioye atañėmuaye, cada te chábeñe más chamotsošbuáchema. Y entšángbioye tmojanėyana: “Běngbe Bětsabe aměndayoye jamashėnguanma, bėnga šontsamna quem luarentše bětscá jěftsepacėcėnana ca.” ²³ Nýetsca ošbuachiyěngcá enefjuanenache, bětsėjeměngcá mándayěnga tmojanabacacá, chentša Jesucristbeñe ošbuáchiyěngentšana, cachěnga chentša ošbuachiyěngbioye jtsaměndayama. Běngbe Bětsá jětschuyayama tondaye ntjascá imojtsemna y cháftaca imojtsencuėnta ora, cha tmojanimpadá, chě ošbuáchiyěnga Běngbe Utabnabe cucuatšĩñe chamotsemnama, ndábeñe chěnga imojtsošbuaché.

Pablo y Bernabé, Sirioca Antioquía pueblloye tbojtanata

²⁴ Pisidia luarėjana tbojánachněgo ora, Panfilia luaroye tbojánashjango. ²⁵ Perge pueblentše Jesucristbe tšabe noticiěnga entšángbioye tmojanabuayená, y chentšana Atalia pueblloye tbojánata. ²⁶ Chentšana, Bernabé y Pablo, bejaycá tbojtanata Sirioca Antioquía pueblloye. Chentša entšanga Běngbe Bětsá tmojanimpadá chata chabe cucuatšĩñe chabotsemnama, chě trabajuiñe chaotsanýenama; y chorna, chě trabajo ya tbojanpochocá. ²⁷ Choye tbojtanashjango ora, nýetsca Jesucristbeñe ošbuachiyěngbioye tmojánachembo, y tmojanacuntá ntšamo Běngbe

Bëtsá tšabe soyënga chátaftaca tojanmama, y ntšamo Bëngbe Bëtsá tojaninÿanÿé, chë ndoñe judiëngnaca chamotsobenama Jesucristbeñe jtsošbuáchiyama. ²⁸ Y Pablo y Bernabé bayté chentše tbojanototoná Jesucristbeñe ošbuáchiyëngaftaca.

15

Ichmónënga y bëtsëjemëngcá mándayënga Jerusalemoca tmojánenefjna jencuëntama

¹ Chë tempo, báseftanga Judeocana áshjajnënga tmojanontsé, Antioquia pueblentše, chentša Jesucristbeñe ošbuáchiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyinë endayancá, ndoñe quenátopodena tšëngaftanga atsebácanënga jtsemnama ca.” ² Chiyeca, Pablo y Bernabé jabuachana chca buatëmbayëngaftaca imojánenatsëtsnaye. Cabana, tmojanëbuáyana Pablo, Bernabé y ínÿenga Jerusalemoye chamotsama, choca chë Jesucristbe ichmónëngaftaca y chë chentše Jesucristbeñe ošbuachiyëngbeñe bëtsëjemëngcá mandayëngaftaca chama chamencuentama.

³ Chcasna, chë Antioquioca imojánenefjuana Jesucristbeñe ošbuáchiyënga Jerusalemoye chënga tmojanichamó. Fenicia y Samaria luarëjana imojtsachnjëjuana ora, chënga tmojanacuntá ntšamo chë ndoñe judiënga chëngbe tempsca soyënguiñe ošbuáchiyana tmojtšanajbanama y chora Bëngbe Bëtsábeñe imojtsošbuáchema. Jesucristbeñe chentša ošbuáchiyënga chca tmojanuena ora, puerte oyejuayënga imojtsemna.

⁴ Pablo y chë ínÿenga Jerusalemoye tmojánashjajna ora, chentša Jesucristbeñe ošbuáchiyënga, Jesucristbe ichmónënga y bëtsëjemëngcá mándayënga chëngbiöye tmojanëbuaja. Chentšana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. ⁵ Pero básefta fariseunga, chora ya Jesucristbeñe ošbuáchiyënga, tmojantsá y mëntšá tmojánayana: “Chë ndoñe judiënga entsamna chë más delicadentše base bobachtema tëtšenënga jtsemnana, bënga judiëngcá; y tšëngaftanga cmontsamna chënga jáuyanana, ntšamo Moisesbe leyënguiñe iuayancá chamotsamama ca.”

⁶ As, chë Jesucristbe ichmónënga y bëtsëjemëngcá mándayënga tmojánenefjna jencuëntama, chë ndoñe judiënga aíñe o ndoñe yonjánamnama chë más delicadentše base bobachtema tëtšenënga jtsemnama, ntšamo chë judiënga imojanamancá. ⁷ Bën y bëtscá chënga tmojanencuentá chentšana, Pedro tojantsbaná y mëntšá tojanëyana: “Jesucristbeyeca catšátanga, tšëngaftanga šmondétatsëmbo, ya bayté entsemna Bëngbe Bëtsá tšëngaftangbentšana atše šonjanábuayana, Jesucristbe tšabe noticiënga chë ndoñe judiënga jábuayenama, chca, chënga Bëngbe Utabnábeñe chamotsošbuáchema. ⁸ Bëngbe Bëtsá jtsetatšëmbuana lempe ntšamo entšanga tmojtsejuabnacá. Y cha šonjaninÿanÿé, chë ndoñe judiëngnaca imnobena chabe entšanga jtsemnama, chábeñe tmojtsošbuáchese, chë Uámana Espiritu chëngbe ainaniñe cháúamashënguama cha tojanma ora, ntšamo cha bëngbe ainaniñe tojanmcá. ⁹ Y chca, Bëngbe Bëtsabiama nÿetscanga cachcá monduámana, judiënga y ndoñe judiëngnaca; y cha tojama chë ndoñe judiëngnaca chëngbe bacna soyëngama perdonánënga chamotsemnama y ainaniñe tšabe juabna chamotsebomnama, Bëngbe Bëtsabe palabriñe

jtsošbuáchiyése. ¹⁰ Y mora, ¿ndáyeca tsëngaftanga ndoñe šmontseboše ntšamo Bëngbe Bëtsá tojamcá? Pero tsëngaftanga šmontseboše, chë ndoñe judiënga Jesucristbeñe ošbuáchiyënga lempe chë leyentsá mandënga chamotsocumplínama, mo nda inýabioye uauta uasmanësha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana. ¹¹ Y chca ndoñe chaondëtsemna. Bënga mondošbuaché bënga atsebácanënga imomnama Bëngbe Utabná Jesús chabe tsabe juabna šojaninýanjëyeca, y Bëngbe Bëtsá cachcá chë ndoñe judiëngnaca tojatsebacá ca” —cha tojanëyana.

¹² Chorna, chentše imojtsemna entšanga nyëtscanga iytëca tmojanobiama, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entšanga jinýanjiyama, y inýe soyëngama chabe obenánaca, ntšamo chë ndoñe judiëngbeñe Bëngbe Bëtsá chátaftaca tojanmcá.

¹³ Chë útata jóyebuambayama tbojanpochocá ora, Santiago mëntšá tojánayana: “Jesucristbeyeca catsátanga, šmochjouena: ¹⁴ Simón šonjabuayená ntšamo Bëngbe Bëtsá natsana tojaninýanjë, chë ndoñe judiëngnaca cha iuanýenama, y chíyeca cha chënguentšana banga tojubuáyana chabe entšanga chamotsemnama. ¹⁵ Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyebuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrenguiñe endayancá, mëntšá:

¹⁶ Chentšana atše chanjésabo

y chë Rey Davidbe pamíllanga cachiñe uámanënga chantabiama; mo nda canýe uáshajayena yebna tojëtsejbcá, atše, Davidbe pamíllanga cachiñe uámanënga chantabiama;

¹⁷ chca, chë inýe entšanga chamonguango ndayá jamana atše, tsëngaftangbe Utabná, más chašmotsábuatmama, nyëtsca ndoñe judiënga, chë atšbe entšanga chamotsemnama atše tijábacacanga.

¹⁸ Chca atše, tsëngaftangbe Utabná sëntsichamo, nda ya bayté entsemna tonjanma entšanga chë soyënga chamotsetatšëmbuama ca —chiñe endayana.”

¹⁹ Chentšana Santiago mëntšá tojanëyana: “Chíyeca atše sëntsejuabná, bënga ndoñe šontsamna chë ndoñe judiëngbiama jamana más totcá chaotsemnama Jesucristo jtsëstonama. ²⁰ Chamna, šontsamna chënga juabuábiamana y jáuyanana ndoñe chamondëtšesá, sananga chë ndaye soyënga entšanga tmojubná diosënga yomna ca jadórama tmojuiyëbana; bacna soyënga shembásenga o boyabásengaftaca ndoñe chamondëtšama y ndoñe chamondëtšesá tšëšana bayëngbe mëntšena, y buiñe cach ndoñe ca. ²¹ Er chë natsana tempënga orscana, nyëtsca pueblënguenache mondmëna chë Moisés tojëftsanayana soyënga entšángbiyoye abuayiyayënga; y chabe leyënga, nyëtsca ochnayté mondbetsalíaye chë bënga judiëngbe enefjuana yebnënguenache ca” —cha tojanëyana

Chë Jerusalenoca ichmónënga y bëtsëjemëngcá mándayënga canýe ts-buanácha tmojanichmó chë ndoñe judiëngbiama

²² Chentšana, chë Jesucristbeñe ichmónënga y bëtsëjemëngcá mándayënga, nyëtsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía

puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše. ²³ Y chëngaftaca canye tsbuanácha tmojanichmó, y chiñe mëntšá yojétsayana:

Bënga chë Jesucristbe ìchmónënga y chë bëtsëjemëngcá mándayënga, cach tsëngaftangcá Jesucristbeñe ošbuáchiyënga, fsëntseboše Bëngbe Bëtsá salúdoca chacmotsábouamna, tsëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

²⁴ Bënga fsëntsetatšëmbo bëngbentšana báseftanga choye tmojángama, bënga ntjamëndacá, y fsëntsetatšëmbo mocna soyënga cmojtsabuátambama y chë causa, tsëngaftanga ndoñe šmontsetatšëmbo ntšamo jtsejuabnayana ndayá jamama yomnana, Jesucristbe canye ndegombre ustoná jtsemnana. ²⁵ Chcasna, bënga fsënjenoyeuná y šonjúnynana tsábá yojtsemna báseftanga bënguentšana jabacacayana tsëngaftangbiyoye jontješiyama chamotsama, y Pablo y Bernabé, chë Jesucristbeyeca bëngbe bonshana catsátataftaca, choye chamotsama. ²⁶ Chë útatna ba soye tbojotsbocá vida jáshbiana, Bëngbe Utabná Jesucristbiana oservëniñe. ²⁷ Chátaftaca Judas y Silas fsënjichamó; y chatna cach tsëngaftangaftaca bochanjóyebuambaye ntšamo quem tsbuanáchañe yojtsábemanama. ²⁸ Chë Uámana Espíritu y bënga cachcá fsëntsejuabná, bënga ndoñe šontsamna tsëngaftanga jamëndana bëtscá jabuache mandënga Moisesbe leyënguiñe chašmotsocumplínama. Nye quem uámana soyënga chiñe añe cmontsamna jtsobedecénana: ²⁹ Ndoñe šmattsesaye mëntšëna, chë ndaye soyënga entšanga tmojuabná diosënga yomna ca jadórama tmojóba bayëngbiana; ndoñe šmatjofsiye buiñe, ni šmatjase tšešana bayëngbe mëntšëna; y shembásënga y boyabásëngaftaca bacna soyënga ndoñe šmattsama. Chë soyënga ntšamcá, tsábá šmochanjama.

Bëngbe Bëtsá salúdoca chacmotsábouamna ca —chiñe yojétsayana.

³⁰ Chcasna, chë quem Jerusalenocana ìchmónënga tmojésanodiošoftanentšana, Antioquía puebloye tmojána; y chocna, nyetsca chë Jesucristbeñe ošbuachiyëngbiyoye tmojanëbuaja y chë tsbuanácha tmojanayentšbuaché ³¹ Chë Antioquía pueblentša Jesucristbeñe ošbuáchiyënga ntšamo chë tsbuanáchañe yojtsabemancá tmojanalía ora, bëts añemo tmojtanca y corente imojtsóyejuaye. ³² Judas y Silas Bëngbe Bëtsabe juabna oyebuambnayata ibnamna; as, chátanaca chë chentša Jesucristbeñe ošbuachiyëngbiyoye ba soyënga tmojanéyana, chënga añemo chamotsatsbomnana y Jesucristbeñe corente chamotsošbuáchema. ³³ Chentšana baseftaytese, chentša Jesucristbeñe ošbuáchiyënga chëngbiyoye tmojtanadiošoftá, chë ndëmanýënga tmojanichamóngbiyoye jtama. ³⁴ Pero Sílasna tsábá ibojtsinýana cachentše más jéftsajëtanama. ³⁵ Pablo y Bernabé baseftayshinýe Antioquía pueblentše tbojanototoná y ba inýëngaftaca Bëngbe Utabná Jesucristbe tsabe noticiënga entšanga tmojanabuatambá y tmojanabuayená.

Pablo cachiñe inye luarëngoye tojána, Bëngbe Bëtsabe trabajo jamama

³⁶ Chentšana baseftaytese, Pablo Bernabébioye tbojanianya: “Bèngbe Utabnabe palabra tbonjanabuayená luarèngoye bochjésa, choca Jesucristbeñe ošbuáchiyènga jábuachama y jányama ntšamo imojtsemnama ca.”

³⁷ Bernabé yojtseboše, Juan chë Marcos ca uabobuatmábioye cháftaca jéftsbtšama. ³⁸ Pero Páblèna ndoñe tšabá ibontsinýana cha jéftsbtšana, er Juan chátbentšana tojtšanujuánañe Panfilia luarocana, y ndoñe tonjanatjèmbambá, Bèngbe Bètsabe trabajo japochócantscuana. ³⁹ Y chë palabrama tondaye tbonjanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojéftsanbetše, y bejaycá Chipre luaroye tbojánata; ⁴⁰ y Páblèna, Silas tbojanábuayana jéftsbtšama. Chë Antioquia pueblentša Jesucristbeñe ošbuáchiyènga Bèngbe Bètsá tmojanimpadá Pablo y Silas Bèngbe Utabnabe cucuatšifne chabotsemnama, chatbe trabajuifne chaotsanýenama. Chentšana, Pablo Sílaséftaca tbojánbocna y ⁴¹ Siria, Cilicia luarènguèjana tojánachnèngo entšanga añemo atšatnaye, chë luarenache enefjuana ošbuáchiyènga Jesucristbeñe más chamotsošbuáchemá.

16

Pablo Timotéobioye tbojáninýena

¹ Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiná y chabe taitana griego entšá inamna. ² Chë Listra y Iconioca Jesucristbeñe ošbuáchiyènga Timoteobiamá tšabá imojanoyebuambná. ³ Pablo tojánbošena Timoteo jéftsbtšama; pero cabá ndetsbetše orna, Pablo base bobachtema chë más delicadentše tbojantètše, ntšamo judiènga imojanamancá. Cha chca tojanma, jobenayama chë judiènga imojoyena luarèngoye cháftaca jama, er nyetsca judiènga imnatátšëmbo Timoteobe taitá griego inamna. ⁴ Chë ibojtsachnèjuana pueblènguenache chatá ibojtsana Jesucristbeñe ošbuachiyèngbioye abuyiynaye, ntšamo Jerusalenoca Jesusbe ichmónènga y bètsèjemèngcá mándayènga tmojanamèndacá, ndayá chë Jesucristbeñe ošbuáchiyènga ndoñe judiènga jamama yojtsamncá. ⁵ Nyets luarenache enefjuana ošbuáchiyènga, Jesucristbeñe más imojtsošbuáchiye, y cada te Jesucristbeñe ošbuáchiyènga más imojtsošbotena.

Pablo mo otjenayoquécá canýe Macedonioca entšábioye tbojáninýe

⁶ Chë Uámana Espíritu, Pablo y Sílasbioye tojaninýanjé, chata ndoñe yontsanamna Asia luaroca Bèngbe Bètsabe palabra entšanga jábuayenana; asna, tbojánachnèngo Frigia y Galacia luarèjana. ⁷ Y Misia luaroca enajébanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondètsama. ⁸ Misia luarèjana tmojánachnèngo ora, Troas luaroye chènga tmojána. ⁹ Chë te ibeta, Pablo mo otjenayoquécá tojáninýe canýe Macedonioca boyabása ibojtsebiatsana y mèntšá ibojtseimpadana: “Diosmanda Macedoniocyte mabo y šmabèjabuache ca.” ¹⁰ Pablo chca tojáninýe y cachora lempe tmonjanprontá Macedoniocyte jama. Atšnaca, chë quem soyènga uabiamnayá, chènga sènjétsetjèmbambnaye. Bènga fsènjétsetjuabnaye ndegombre Bèngbe Bètsá šojtsanachembuana choye jama ca, Jesucristbe tšabe noticiènga choca entšanga jábuayenama.

Pablo y Silas Filipos puebloca

¹¹ As, Troasentsana bejaycá fsënjána Samotracia luaroye, y yëfsana Neápolis puebloye, ¹² y chentšana Filíposoye. Filipos enjamna canÿe uámana bëts pueblo Macedonioca y bëtscá romanënga oyeninë. Chë luarentse baseftayté fsënjanoquedanga. ¹³ Canÿe ochnaytena, chë pueblentsana fsënjëftsanbocna y chë fshájaye tsachoye fsënjána. Fsënjanuena chentše canjamna canÿe luare Bëngbe Bëtsáftaca jencuéntama ca, y fsënjána janguanguama. Fsënjáninÿena ora, chentše fsënjanothiama y Bëngbe Bëtsabe palabra fsënjanoeyebuambá chentše tmojanójoto shembásenghiama. ¹⁴ Enjamna canÿe shembása, Lidia ca uabainá, Tiatora pueblócá, y cha enjamna uámana uabuángana uafjatsenga entsáyá uená. Cha inamna Bëngbe Bëtsábioye adorayá y chentše Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema. ¹⁵ Cha y chabe yebnentše oyenënga tmonjánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átšbentše chašmoquedama ca.”

Y šonjanëtaríe bënga chentše joquédama.

¹⁶ Canÿe te, chë Bëngbe Bëtsáftaca encuéntaye luaroye fsënjëtsajna orna, šonjanëbiatše canÿe tobiáše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiáše yojanmalisiaye soyëngama. ¹⁷ Chë tobiáše tonjanontsé Pablo y bënga usetonana y mëntšá enjëtsaychembumbuana: “¡Quem boyabásenga montsemna chë celoca Bëngbe Bëtsabe oservénënga y tšëngaftanga cmontsabuyayiná ntšamo Bëngbe Bëtsá yobena tšëngaftanga játsebacama ca!”

¹⁸ Y bayté chca enjanchembumbuana; chë causa, Pablo bonjëtsetana y cabana, tonjanobuértana y chë bacna bayëjbioye mëntšá tbonjanianana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

¹⁹ Pero, chë bayëjbe juabna chábentšana tojésanbocnama y chëngbiama más crocénana jabemama chora chë tobiáše ndoñe yontsobenama, chë tobiáše nduiñënga tmojáninÿe ora, Pablo y Sílasbioye tmojánishëche y tmojtšanasojoye plazoye, mandayëngbioye.

²⁰ Chë mandayëngbioye tmojanënatse ora, chënga mëntšá imojtsichamo: “Quem boyabásata judío entsáta bondmëna, y muatbe causa bëngbe pueblentsa entsanga montsenbouenana, ²¹ y bontsabuatambá soyënga jamama ntšamo chë judiënga imuamancá y bëngbe leyënguiñe chë soyënga jamama ndoñe quenátšlesenciana. Bënga ndoñe quešnátamna ni jouenana, ni jamana chë soyënga, romanënga bëtsemnayeca ca” — chënga imojtsichamo.

²² Chora chë entsanga tmojanontsé uayebuáchana; as, chë mándayënga tmojanamëndá chata entsáyá jtsëtsejquëcana y niñëfjëngaca jtsachebuáanganjana. ²³ Jabuache tmojanachebuáanganjentsana, cárceloye tmojanautame y chë utámenënga shanÿá tmojanmandá yejuana chaotsabuajëñÿama. ²⁴ Chca tmojanmandá ora, chë utamianá chata tojanënatse chë más tsoye utámenoye y shecuatšentsana tsbuanëšine tojanatsebuá.

25 Pero tséntseto orna, Pablo y Silas ibnétsocantañe Bèngbe Bètsá jètschuayama, y cháftaca ibnéncuentaye; y chë inye utámenèngna chca imojtsuenana. 26 Ndeolpe, corente jabuache yojtsébánjua y chë utámena yebna fshantsocana yojtsábonjnaye. Cachora, nyetsca chë utámenentša bësášangá tojantëfjo y nyetsca utámenèngna chë cadenëjuangá yojtsayentšjafjona. 27 Pero chë utámenèngna shanýá tojanofšená y chë utámenentša bësášangá yojtsatëfjnama tojáninýe ora, cha tojanjuabó nyetsca utámenèngna tmojtsanacheta ca; chë causa, chabe espadëja yojenosëngbotëntšena jtsenóitanama. 28 Pero Pablo tbojánbochembo: — ¡Acbe cuerpo ndocá matenábomana; nyetscanga camuentše fsëndëtsomñe ca!

29 Asna, chë utámenentša shanýá canýe uajuinýanëshá tojanëýá y chë utámenoye ochamanana tojánamashëngo y auatja causa ngmëmnyá Pablo y Sílasbe shecuatšentše yojshëntsamentšiyé. 30 Chentšana tojtanëbuacna y tojanëýana: —Señórata, ¿ndayá šojtsemna jamama atše atsbocaná jtsennama ca?

31 Y chata tbojanjuá: —Bèngbe Utabná Jesúsbeñe cochtsošbuáchiye, y chca, Bèngbe Bètsá aca cmochanjatsbocá y acbe yebnentše oyenëngnaca ca.

32 Y cha y nyetscanga chë yebnentše imojtsemnënga, Bèngbe Utabnabe palabra tmojanabuayená. 33 Cach ora chë ibeta, chë utamianá chata tojanënatse chë lisianënguñe jetsajabiama. Chentšana, cha y chabe pamíllanga tmojánenabaye. 34 Chentšana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentše oyenënga oyejuayënga imojtsemna, Bèngbe Bètsábeñe imojtsošbuáchema.

35 Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. 36 Chë utamianá Páblëbioye tbojaniana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

37 Pero Pablo chë soldadënga tojanëýana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entšangbe delante, bacna soyënga aiñe o ndoñe tatifjamama cabá ndinýanýiyé ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

38 Chentšana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatsëmbona chatna mo Romoca onýnanatcá derecho bomnata ibnamnama; chë causa, chë mándayënga puerta imojtsauatja. 39 Chcasna, cach mándayënga tmojána chata perdón jatëtejañama; chentšana tmojtanëbuacna y tmojanëýana: “Diosmanda, muentšana inye luaroye motsoñata ca.” 40 As chata chë utámenentšana tbojéftsanbocna y Lídiëbe yebnoye tbojéftsanata. Chentšna, Jesucristbeñe ošbuáchiyëngtaftaca tmojánenefjna y chata tbojánayana soyëngaca chëngbioye tmojanañemó. Y chentšana, chata ínýoye tbojtsanoñe.

17

Tesalónica puebloca, Pablo y Sílasbioye ndoñe tšabá tmonjanëbuaja

1 Pablo y Silas inye luaroye ibojtsaye ora, Anfípolis y Apolonia bëts pueblënguëjana tbojánachnëngo y canýe bëts pueblo, Tesalónica

ca uabáinoye tbojánashjango. Chentše, chë judiënga canye yebna imnabomna chënga jénefnama. ² Páblëna, ntšamo enjanamancá, cada ochnayté chë jénefnama yebnoye yojánaye, unga semanantscuana, y chentše chë judiëngaftaca yojanoyebuambná y imojánëtsëtsnaye. Bëngbe Bëtsabe uabemana palabrenguife iuayana soyëngaca, ³ chënga yojanabuayiyá y ndegombre yojaninÿanÿná, Bëngbe Bëtsabe Uámana Uabuayaná jóbanama y chentšana jtayenama ibojamnama. Y mëntšá yojanëtsëtsná: “Chë Cristo, Jesús endmëna, ndabiama atše cbontsabuayiyá ca.”

⁴ Judiënguentsana báseftanga chiñe imojtsošbuáchiye y Pablo y Silas tmojanëseto más jouenama. Ba grieguënga, Bëngbe Bëtsá adórayënga, Jesucristbeñe imojtsošbuáchiye y ba uámana shembásengnaca. ⁵ Pero chë judiënga ndošbuáchiyënga chca tmojáninÿe ora, puerta envidia imojtsebomna. Asna, chënga tmojanachembo banga, tondaye amënga y bacna entšanga, y chënga tmojanenutaná jamama nyetsca chë pueblntša entšanga chamotsenbouénanama; y canye entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentšana jesëbuacnama y entšangbe cucuatšine jabáshejuanama. ⁶ Pero chentše ndocná tmonjáninÿena; as chë entšanga Jasón imojtsetsjojoye y chentša mándayënga imojëtsemnoye tmojanánatse y Jesucristbeñe inÿe ošbuachiyëngnaca choye tmojanënatse, y mëntšá imojtsáyebuache: “¡Chë boyabásata, chë ndëmuanyáta ibojtsama nyetsca luarentša entšanga chamuenbouénanama, quem luaróynaca tbojabo, ⁷ y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguife ndoñe quenatslesenciancá, er chënga montsichamo inÿe rey canmëna, Jesús ca, y cha, César chë Romoca mandadbe cuenta nyetscángbeñe yojtsemánda ca!” —chënga imojtsáyebuache.

⁸ Chë entšanga y chë pueblntša mándayënga chca tmojanuena ora, corente imojenbouénnana. ⁹ Pero Jasón y chë inÿyënga, cháftaca imojtsemnënga, crocénana tmojtanjajó, y as tmojtanabáshejuana.

Pablo y Silas Berea Pueblo

¹⁰ Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuëtsebocnama. Y chata choye tbojánashjango ora, chë judiëngbe enefjuana luaroye tbojánata. ¹¹ Chentša judiënga imojamna más tšabe ainana bomnënga chë Tesalonicoca judiëngbiana; chcasna, oyejuayënga chë buayenana soye Jesucristbiana tmojanóyëngacñe, y cada te Bëngbe Bëtsabe uabemana palabra imojanalía, jtsetatsëmbuama, ntšamo Pablo y Silas ibojtsëtsëtsnacá aíñe o ndoñe ndegombre yojtsemnama. ¹² Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca. ¹³ Pero, Pablo Bereoca chë Bëngbe Bëtsabe buayenana soyama entšanga yojtsabuayiyinama chë Tesalonicoca judiënga tmojántatsëmbona ora, chënga choye tmojána y tmojanma chentša entšanga chamuenbouénanama. ¹⁴ Chcasna, banga Jesucristbeñe ošbuáchiyënga tmojanma cachora Pablo chentšana chauëtsebocnama y béjaye tsachoye chaotsoñama; chëntscuana, Silas y Timoteo Bereoca tbojanoquedá. ¹⁵ Pablo tmojantjëmbambá entšangna, Atenas ca uabaina bëts pueblóntscoñe cháftaca tmojána. Chentšana, Pablo chënga tojanabuayená chamuauisshëconama Silas y Timoteo jaúnayama betscó jtsayana, Pábloftaca jateninÿenama.

Pablo Atenas puebloca

¹⁶ Pablo Atenas bëts puebloca Silas y Timoteo yojtsebátmanëntscuana, puerte tbojanongmé, er cha tojáninÿe chentša entsanga imojtsadorana bëtsá cachëngbe pormana soyënga, ndayama chënga imojanjabná diosënga yojamna ca. ¹⁷ Chiyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanyënga chentše imojanashjauanëngaftácnaca. ¹⁸ Y báseftanga, ntšamo jtsejuabnayama entsanga abuátambayënga, epicureunga y estoiquënga ca uabainëngnaca Pábloftaca imojánenatsëtsnaye. Inÿenga imojtsichamo: “¿Ndayama quem bostero yojtsoyebuambná ca?” Y ínÿengna: “Chana inÿe luarëngoca entsangbe diosëngbiana muentše entsabóyebuambnaye ca.”

Chënga chca imojtsichamo, er Páblëna Jesusbiana y chë obanënga jtayenama yojanoyebuambná. ¹⁹ Asna, chentša entsanga cha tmojanánatse canÿe luaroye, entsanga jénefnama y oyebuambnayënga joyayunayama luare, Areópago ca uabáinoye. Chentše imojanamana uámanënga jénefnana, nderado ndabiana jayanama tšabá o ndoñe tšabá tonjamama. Chora Pablo tmojantjá: —¿Chë aca contsabuatambá soyënga ndayá bëtsayanana bënga quefstsobena jtsetatšëmbuama ca? ²⁰ Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bëtsayanana.

²¹ Er nÿetscanga Atenasentša oyenënga y inÿe luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuëntayana.

²² As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entsanga: ntšamo bominÿe sënjjajjá, atše sëntsetatšëmbo tsëngaftanga ba diosënga puerte šmayaunana y šmadoránama. ²³ Atše sëndánrreparana tsëngaftangbe diosënga šmétsadorana luarënguenache y sënjinÿena canÿe altar y chentše mëntšá iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše cbontsabuaiyiná.

²⁴ “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórana entsangbe jebna yebnënguifne, ²⁵ ni quebnatájaboto ndocná chabiana tondaye chaondëtsama, er cha endmëna nda inëtsama bënga vida chamotsebonnama y jtseshachnayama chamotsobenama, y cha nÿetsca soyënga šnetsatšatnaye.

²⁶ “Cha nÿe canÿe boyabásabentšana nÿets luarënguentša entsanga tojánabiama, nÿets quem luarentše chamotsiyenama; y cha quem soyënga cabá ndëma ora, tojanjubó mocna ora y ndayentše entsanga chamuetsiyenama; ²⁷ chca, Bëngbe Bëtsá chamonguanguama, masque chabiana ndoñe corente tmontsetatšëmbo, y chamuinÿena y chábeñe chamotsošbuáchema; pero ndegombre, Bëngbe Bëtsá bëngbentše cada cánÿabentšana ndoñe bënoca quenátsmëna. ²⁸ Ntšamo canÿa tojanayancá: ‘Bënga Bëngbe Bëtsáftaca cánÿiñe mo canÿacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tsëngaftanguentša báseftanga bëts soyëngama uabiamnayëngnaca tmojanayancá: ‘Bënga nÿetscanga Bëngbe Bëtsabe básenga mondmëna ca’. ²⁹ Y chcasna, Bëngbe Bëtsabe pamíllanga bënga tmomnëse, ndoñe quešnátamna jtsejuabnayana Bëngbe Bëtsá yomna mo cach entsangbe

castellano, midio o chë ndëtsbeca pormana soyëngcá ca, er chë soyëngna nÿe ntšamo entšanga tmojajuabocá y tmojtsobencá japórmana. ³⁰ Pero Bëngbe Bëtsá tojanjuabó ndoñe ntjatonÿayana chë entšangbe tempsca ndosertánana, y morna, nÿetsca luarënguentsá entšanga entsamënda, ndaye bacna soyënga tmojtsamama ngmënaca chamuenojuabó, chca amama chamotsajbaná y Bëngbe Bëtsabe benache chamuatishache ca. ³¹ Bëngbe Bëtsá canÿe te tojuinÿaná, y chë tena, ndocnábioye ínÿabiamá más tšabá ntjatonÿayacá, cha echanjayana entšanga tšabá o ndoñe tšabá tmonjamama; lempe chca cha echanjama canÿa cachá tbojabocacá entšáftaca, Jesús; y chca yochtsemnamna, Bëngbe Bëtsá entšanga tojinÿanÿé, chë bocacaná Jesús cháuatayenama cachá tojánmayeca ca” — Pablo tojánayana.

³² Chë obanënga mochtayenama ichámuana chë entšanga tmojanuena ora, báseftanga Pablo imojtsáboyejuana, y ínÿengna mëntšá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

³³ As Pablo chëngbentsana tojésanbocna. ³⁴ Pero báseftanga aíñe Jesucristbeñe imojtsošbuáchiye y Pablo tmojanasto más jatuenama; chënguentsë imojamna Dionisio, canÿa chë Areopagoca tbiananënguentsá; canÿe shembásanaca, Dámaris ca uabaina, y ínÿenga.

18

Pablo Corinto puebloca

¹ Chë soyënga tojanochnëngüentsana, Pablo Aténasentšana Corinto bëts puebloye tojána. ² Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama, ³ y ntšamo chata jamama Páblënaca jamama inatátsëmboyecna, chátaftaca yojtsoquedañe y cánÿiñe chënga innatrabájaye; chënga innatátsëmbo mo tambotemëngcá entšëjuaca japórmana. ⁴ Y nÿetsca ochnayté, Pablo yojanamana chentša judío entšangbe enefjuana yebnoye jana, Bëngbe Bëtsabe soyëngama jóyebuambayama, y puerte yojtsentšena judiënga y ndoñe judiënga chamotsošbuáchema, ntšamo cha yojtsanëtsëtsnacá ndegombre bëtsemnama.

⁵ Silas y Timoteo Macedoniocana choye tbojánashjango ora, Pablo nÿets tempo Bëngbe Bëtsabe soyëngama entšanga yojtsabuayiynaye y puerte tšabá chë judiënga yojaninÿanÿná, Jesús ndegombre Bëngbe Bëtsabe Uámana Uabuayaná bëtsemnama. ⁶ Pero chë judiënga Páblëbe contra imojtsemna y tmojanontšë podesca chabiamá ichámuana. Asna, Pablo chabe uichëtjoniyangá yojtsenántšasajaye, chënga jinÿanÿiyama chënga ndoñe tšabá tmonjánchjanguama, y tojanëyana: “Tšëngaftanga ndatsebácanënga chašmojóbanëse, cach tšëngaftanga šmochtsótátšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

⁷ Chorna, chë judiëngbe enefjuana yebnentsana tojëftsanbocna y canÿe boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentsá juachaca inoyena.

⁸ Y Crispo, canÿe chë enefjuana yebnentša mandayá, Bëngbe Utabná Jesucristbeñe yojtsošbuáchiye y nÿetsca chabe pamíllangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. ⁹ Canÿe ibeta, Bëngbe Bëtsá Páblëbioye mo canÿe otjenayoquécá tbojanianyana: “Ndoñe matauatjana; nÿe cochtsana atšbe soyëngama oyebuambnaye y ndoñe iytëca cattsemana. ¹⁰ Er atšbe ácaftaca sëntsemna y ndocná quecmochátsbojajo ntšámnaca jáborlama; atšbe bëtská entsanga quem pueblentše sëndábamna ca.” ¹¹ Chcasna, Pablo Corintentsë canÿe uata y chnënguana shinÿe tojanototóná, Bëngbe Bëtsabe palabra entsanga abuátambaye.

¹² Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojánánatse. ¹³ Chocna, chë mandado tmojanianyana: —Mua entsanga entsëtsëtsná y entsama chënga Bëngbe Bëtsá chamotsadorana, pero ndoñe ntšamo bëngbe leyënguiñe endayancá ca.

¹⁴ Pablo jóyebuambayama uatajanóntša orna, Galión chë judiënga tojanéyana: —Quem entsá nderado ínÿabioye matbënjóba o ndayánaca chca matënjobuachjanguá, as cocayé atšbe matijótbema tšëngaftanga judiënga yejuana joyaunayama; ¹⁵ pero ntšamo šmontsichamcá entsemna nÿe बातëmbana soyëngama, nÿe tšëngaftanga šmëbuatma entsangbiamia y cach tšëngaftangbe leyëngama; chcasna, cach tšëngaftanga cmontsamna jenóyeunayana y jamana ntšamo chašmojenoyeunacá. Atšbe quem base soyëngama ndoñe quetsátsboše ngoberna jtsemnana ca.

¹⁶ As Galión tojanamëndá chë tribunal luarentšana chë judiënga jtëbuacnama. ¹⁷ Chorna, chë entsanga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

Pablo Antioquiroye tojtaná y chentšana cachiñe inÿe luarëngoye tojána, Bëngbe Bëtsabe trabajo jamama

¹⁸ Pablo cabá bayté Corintentsë tbojántotona. Chentšana, Jesucristbeñe ošbuachiyëngbentsšana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioye nda ora, Cencrea pueblaca nÿets stjénashe yojtsenátsbotje, Bëngbe Bëtsábioye jinÿinÿiyama canÿe soye tbojanšbuáchenama. ¹⁹ Efeso pueblroye tmojánashjajna ora, Páblëna Priscila y Aquila tojésanabashejuana. Chentšana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye. ²⁰ Báseftanga Pablo tmojanimpadá inÿe baseftayté chentše chauesomñama, pero chana ndoñe tonjanoyauná; ²¹ chentšana, chëngbentsšana tojesanodiošoftá, mëntšá jëtséyanëse: “Nderádose cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna. ²² Cesarea pueblroye tojánashjango ora, tojána jacheuayama Jesucristbeñe ošbuáchiyënga Jerusalenoca; y chentšana Antioquiroye tojána. ²³ Chentše baseftayté yojëftsemna; y chentšana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

Apolos, Efeso pueblaca Bëngbe Bëtsabe soyëngama yojanabuayiyiná

²⁴ Cach tempo, Efesoye tojánashjango canÿe judío, Apolos ca uabainá, Alejandría bëts pueblócá; cha puerta obená inamna jonguamiyama y

corente inatátšëmbo Bëngbe Bëtsabe uabemana palabrëngama. ²⁵ Bëtsá tojánatsjinýe chë Bëngbe Utabná tojaninýanýé benachama; añémoca yojanoyebuambná y Jesusbe soyëngama botamana yojanabuatambá, masque cha nýe ntšamo Juan entšanga tojánabuatambama y tojanëbáyama inatátšëmbo. ²⁶ Ndauatjá Apolos tojanontšé jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo Bëngbe Bëtsabe inýinýena benache bëtsemnama. ²⁷ Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañémó y choca Jesucristbeñe ošbuáchiyëngbiana canýe tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiana yojanjuabnáyeca, chënga Jesucristbeñe corente imojtsošbuáchiye. ²⁸ Entšangbe delante chë judiëngaftaca jabuachana imojánenatsëtsnaye y nýetscanga tojaninýanýé, ntšamo ndoñe tšabá inamncá chë judiënga imnatátšëmbuama; y Bëngbe Bëtsabe uabemana palabrëngaca chënga tojaninýanýé, Jesús Bëngbe Bëtsabe Uámana Uabuayaná bëtsemnama.

19

Pablo Efeso puebloca

¹ Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanýena, pero chëngna nýe ntšamo Juan chë Ubayaná tojanabuatambacá imnatátšëmbo. ² Pablo chënga tojanatjá: —¿Uámana Espiritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiana ora ca?

Chora chënga tmojanjuá: —Ni mo queftsátstatšëmbo chë Uámana Espiritu yomnama ca.

³ Y Pablo tojanëyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entšanga yojanëbayancá ca.

⁴ As Pablo tojanëyana: —Juan tojanëbaye chë bacna soyënga amama ngmënaca tmojanenajuabó, chca amana tmojanajbaná y chë Bëngbe Bëtsabe benache tmojánishachënga, y entšanga yojanëtsëtsná chë chábentšana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

⁵ Chca tmojanuena ora, chënga tmojánenabaye Bëngbe Utabná Jesús jótsëmbonëse, chábeñe imojtsošbuáchema. ⁶ Pablo chëngbe bestšašinë chabe cucuatšënga tojanjajó ora, Uámana Espiritu chëngbe ainaniñe tojánamashëngo jtsemándayama; tmojanontšé inýetsá biyangana, chënga tempo ndmabiyañe, y Bëngbe Bëtsabe juabna imojtsoyebuambná. ⁷ Chentše imojtsemna bnëtsana uta entšanga.

⁸ Unga shinýëntscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entšangaftaca imojánenatsëtsnaye y entšanga yojanëtsëtsná Bëngbe Bëtsabe amëndayama, chënga chábeñe chamotsošbuáchema. ⁹ Pero ba nduauenanënga ndoñe imontsošbuaché y Bëngbe Utabná tojaninýanýé Benachama entšangbeñe bacna soyënga imojtsichamo. Chcasna, Pablo chëngbentšana tojtsanojuánañe y nýe chë Jesucristbeñe ošbuáchiyënga

tojanëbuaja canÿe scueloye, canÿe entšá Tirano ca uabainabe yebnoye. Chentše cada te chë ouenanëngaftaca yojanoyebuambná, ¹⁰ y chca yojánama uta uatëntscuana; y chca, nÿetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. ¹¹ Y Bëngbe Bëtsá puerte bëts soyënga Pábloftaca vojtsama. ¹² Tša bëts soyënga tojanma; chíyeca, nÿetsca chë Pablo tojuabojajo entšayá y pañuelëjuangá, entšanga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entšángbentšana jésebocanana.

¹³ Pero básefta judiënga tsáshenañe bacna bayëjënga entšángbentšana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntšá imojtsëtsëtsnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca chontsamënda muabentšana chašmuaisebocnama ca.”

¹⁴ Chca imojánama chë judío Esceva ca uabainabe canÿsëfta uaquiñënga. Esceva inamna bachnangbe amëndayá. ¹⁵ Pero canÿe, Escévëbe uaquiñënga chca tmojánayana orna, chë bacna bayëja mëntšá tojanëjua: “Atše Jesús sënduábuatma y sëndëtatsëmbo nda Pablo yomnana; pero tsëngaftanga, ¿ndëmuanÿënga šmomna ca?”

¹⁶ As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëñjaná, jabuache jtsajantšetayëse; chë causa, chënga chë yebnentšana tmojtsanacheta enašënga y lisiánënga. ¹⁷ Nÿetscanga Efesoca oyenënga, judiënga y ndoñe judiënga, chca tmojántatsëmbona y corente imojtsanauatja. Y chca, Bëngbe Utabná Jesús entšanga más imojtsatschuanaye.

¹⁸ Jesucristbeñe imojtsošbuachiyënguentsana, banga imojánashjajuana y entšangbe delante imojtsecompšaye, tempo bacna soyënga tmojanama; ¹⁹ banga, chë bocjuanana soyënga jamama imojanëntsënënga, chëngbe bocjuanana librëšangá tmojaniyëbo y entšanga imojtsantješna ora, chëšangá imojtsajuinÿiye. Tmojanjuabó ntsachetšá chë librëšangá betsámanama y tojanóbcna shachna bnëtsana uaranga crocénana nÿetsá. ²⁰ Y chca, Bëngbe Utabnabe palabra más ba entšanga imojtsuenana y chiñe imojtsošbuáchiye y Bëngbe Bëtsá chabe obenana entšángbeñe vojtsinÿinÿnaye.

²¹ Chca tojanochnëngüentsana, Pablo tojanjuabó Macedonia y Acaya luarënguëjana jachnënguse, Jerusalenoye jésama. Y yojtsejuabnaye cha ibojtsemna Jerusalenentsana Romoye jama ca. ²² Asna, chabe uajabuachanënguentsana útata, Timoteo y Erasto, Macedonioye cha tojanichamó. Chëntscuana Pablo baseftayté más Asia luarentše tbojanjëtana.

Efesoca entšanga tmojánenbouenana

²³ Chë tempo, Efesoca entšanga corente tmojánenbouenana, chë Bëngbe Utabná vojtsinÿanÿná Benache imojtsisháchichanëngbe causa. ²⁴ Chë entšanga chca tmojanma, er canÿe entšá mídioca soyënga pormayá, Demetrio ca uabainá, chënga tojanayëñjaná chca jamama. Cha yojanamana binche soyetëmënga japórmama y chëtëmënga yojáninÿna mo chë Efeso puebloquëngbe diosá Artemisa jadórama bëts yebncá. Demétrioftaca imojantrabájangna bëts cá crocénana imojanójacañe chë soyetëmënga eniñe. ²⁵ Demetrio tojanëbuaja

cháftaca imojantrabájanga y ínÿenga cach mídioca soyënga pórmayënga, y mëntśá tojanéyana: “Baconga, tšëngaftanga šmondétatšëmbo, bënga bëtsá crocénana jtsebomnamna quem trabajuentsana chca jopódiana. ²⁶ Pero tšëngaftanga šmontsonÿá y šmotsuënana ntšamo chë Pablo ca uabainá yojtsichamcá. Cha entsichamo, chë entsangbe pormana soyënga ndoñe yontsemna jtsadoránana ca; y chca ba entsanga tojabuayená y chënga aíñe montseyeunana. Chë soyna ndoñe nÿe muentše Efesentše chca quenátopasana; nÿets Asia luariñnaca chca entsopasana. ²⁷ Resjo entsemna; chca causa, entsanga bëngbe trabajuama ndoñe tšabá quemochátichamo y chë uámana Artemisa jadórana bëts yebnama mochántichamo uámana yebna ndoñe yondmëna ca. Y chca, Artemisbe obenana entsanga mochantsábotena y Artemisa ndoñe bañe quemochátabuatma, nda Asientše y nÿets luariñnaca mondadorana ca.”

²⁸ Chca tmojanuena ora, chca pórmayënga puerte tojánëtëna y tmojanáyebuachena: “¡Efesoquëngbe Artemisa corente bëtsá endmëna ca!”

²⁹ Y chca, nÿetsca chë pueblentša entsanga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojónana tmojanënatse chëngbe nefjuana yebnóntscöñe. ³⁰ Pablo tojánbošena choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá. ³¹ Chë Asioca mándayëngbentše báseftanga inmamna Páblëbe amiguënga, y chënga Páblëbioye palabra tmojanafja chë jénefnama yebnoye ndoñe chaondámashënguama.

³² Chëntscuana, entsanga imojtsejotonocna, ínÿenga imojtsechembumbuana canÿe soye y ínÿengna inÿe soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama. ³³ Pero básefta judiënga, canÿe entsá, Alejandro ca uabainá, chë entsangbe natsanoye tmojanajuatsëntše, y báseftanga cha tmojanbuayená ntšamo yojtsopasánama. Asna, Alejandro tojánëfjatšëmbo cucuátšeca iytëca chamobiamama, er cha yojtseboše entsangbe delante chë judiënga jobuauyanama. ³⁴ Pero, Alejandro judío bemnama chë entsanga tmojánatšëmbona ora, nÿetscanga tmojanáyebuachena uta horëntscuana, mëntśá: “¡Efesoquëngbe Artemisa corente bëtsá endmëna ca!”

³⁵ Chë pueblentša mándayëngbe uajabuachaná, entsanga iytëca jábiamama tojanobená ora, tojanéyana: “Efesoquënga, nÿets luariñe endótatšëmbo, quem pueblentše oyenënga iuamna jtsinÿenana chë Artemisa jadórana bëts yebna y chë cha jadórana celocana otsatšëna ndëtšbé. ³⁶ Ndocná quenátobena chama jayanama ndoñe ndegombre yondmëna ca. Chcasna, natjëmbana motsomñënga y tondaye matamëngana corente tšabá ntjshajuaboycá. ³⁷ Tšëngaftanga quem boyabásenga moye šmojunatse, masque Artemisbe yebnentše tondaye tmonjatbëba y bëngbe Artemisbiama ndoñe podesca tmonjoyebuambá. ³⁸ Demetrio y cháftaca šmotrabájanga, nderado ndabiama ndaye demanda šmojtsebomnëna, cabildoca endatëfjna y chentše mándayënga montsemna chë demandënga jouenama, y chëngbentše cada ona šmochjëftsendemánda. ³⁹ Y tšëngaftanga inÿe soye šmojtseguasna, cmontsamna ntšamo bëngbe leyënguifne yomandancá, nÿetsca quem pueblentše oyenëngaftaca jenóyeunayana. ⁴⁰ Ndayá mënté tojopasá

causa, resjo entsemna bēngbiama chamuayana, ntšamo leyēnguiñe yomncá bēnga ndoñe montsama ca; y bēnga ndoñe quemuátobena ndayá jojuana, ndáyeca quem enbouenanana tojopasá ca šojátjayēse ca” —cha tojanéyana. ⁴¹ Y chca jayanēse, chē entsānga tojtanichamó.

20

Pablo, Macedonia y Grecia luaroye tojána

¹ Chē enbouenanana tojanochñēngo ora, Pablo chē Jesucristbeñe ošbuachiyēngbioye tojanēbuaja jábuayenama, añemo chamotsats-bomnama; tojesanodiošoftá y Macedonioye tojéftsanbocna. ² Chē luarēnguējana cha tojánachñēngo Jesucristbeñe ošbuachiyēnga beca añemo atatšatnaye, ba chabe palabrēngaca; chentšana, Grecia luaroye tojánashjango, ³ y chentše unga ishinye tojanoquedá. Barquēshañe Sirioye játama Pablo yojtseprontana orna, tojántatšēmbona chē judiēnga cha jtsóbama tmojanenóyeunama. Asna, tojanenajuabó jesshēconama, cach Macedonia luarējana jésachñēnguse. ⁴ Pablo quem boyabásenga tmojantjēmbambá: Sópater, chē Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófimnaca, Asia luarocata. ⁵ Chēnga tmonjanonatsé y šonjanēbatma Troasoca. ⁶ Chē levadúraca ndēpormana tandēse saye fiestentšana, Filíposentšana barquēshañe fsēnjéftsanbocna y shachna tianoye, Troasoca chē tmonjanonatsenga fsēntanishēche, y chentše canye semana fsēnjanoquedanga.

Ntšamo tojanopasá Troas puebloca

⁷ Chē inye semana jobojátsama te, fsēnjánenefjna Jesucristbeñe ošbuachiyēngcá tandēse jajátayama, cánjiñe jasama; y Pablo entsānga enjétsétsēsnaye. Cha bonjamna yēfsana chentšana jéftsebocnana; chē causa, más bēn chēngaftaca tonjanoyebuambá, tsēntsetēntscuana. ⁸ Fsēnjamna canye tsoye tsbanana tsañoca y chentše ba uajuinýanēshangá enjanamna; ⁹ y canye bobontse, Eutico ca uabainá, ventanentše enjántbemana. Pablo bēn enjanoyebuambná causa, chē bobontse ocnayana tbojanábuache. Cabana, corente tojtsanomaná ora, chē unga tsañocana tontsanótsatše y obaná chora tmontanatsbaná. ¹⁰ As, Pablo tonjánastjango, chē bobóntsbioye tbonjanotsbuajó y tbonjanotsejcuá. Y chē entsānga tonjanéyana: “Ndoñe nyētsá matauatjēngana; ainá cha entsatsmēna ca.”

¹¹ Chentšana Pablo cach tsbanánoye tonjesaná y tandēse tonjanjátá, jtenójuaboyama ndayá Jesús jóbanēse tojanmama. Chora Pablo chē entsāngaftaca tonjanse y tontētanontsé oyebuambnayana, jabinýnēntscuana. Chora Pablo chentšana tontsanoñe. ¹² Y chē otsatsēna bobontsna ainá imojtsatnatseñe, y chama chē entsānga corente oyejuayēnga imojtsemna.

Pablo Troasentšana Mileto pueblloye tojána

¹³ Bēngna fsēnjanonatsé y barquēshañe fsēnjána Aso pueblóntscōñe, chentšana Pablo jtesbetšama, ntšamo fsēnjanenoyeunacá, er Pablo tonjánbošēna fshantscá choye jana. ¹⁴ Asoca Pábloftaca fsēntaneninýena ora, bēngaftaca barquēshañe cha tonjána Mitilene pueblloye. ¹⁵ Chentšana fsēnjéftsanbocna y yēfsana Quío luarējana fsēnjánachñēngo, y chē inye yēfsana Samos luaroye fsēnjánashjajna. Chentšana fsēnjána

y yěsana Mileto puebloye fsenjánashjajna. ¹⁶ Chca tonjanochnëngo er Pablo ndoñe chenátanbošena Efesoye jama, Asia luariñe ndoñe yapa ndétsemnana. Chca tojánbošena er cha enjétseboše betscó Jerusalenoca jtsatsmënana, tojopodesna chë judiëngbe fiesta, Pentecostés ca uabaina fiestama.

Ntšamo Pablo chë Efesoca ošbuachiyëngbeñe bëtsëjemëngcá mándayënga tojanëyana

¹⁷ Miletocana Pablo tonjanmandá chë Efesoca ošbuachiyëngbeñe bëtsëjemëngcá mándayënga jobiatšana. ¹⁸ Chënga tmonjánashjajna ora, Pablo tonjanëyana: “Tšëngaftanga šmondétatsëmbo ntšamo atše quem Asia luaroye sënjabánashjango orscana tšëngaftangbeñe snetsamana. ¹⁹ Njëtš tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijëftsoperdé y ba soyënguiñe tijasufrí, chë judiënga atše jóbama mondboše causa. ²⁰ Y lempe ntšamo tšëngaftangbe tšabiamá yomncá tchbonjabuayená; tondaye ntjatsbuetamencá. Njëtscangbe delante sënjabuatambá y tšëngaftangbe yebnënguenáchnaca. ²¹ Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmënaca chamuénójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsošbuáchemá. ²² Y mora Jerusalenoye chanjá; Uámana Espiritu chca šontsemánda y ndayá choca chjapásamna ndoñe quetsátstatsëmbo. ²³ Një mëntšá aiñe sëndétatsëmbo: Njëtšca bëts pueblënguenache ndayëjana atše chandbétsana, Uámana Espiritu šondbëtsebuayiyayey entšanga cašmochjutame y puerte chaisufrima camochjama ca. ²⁴ Atšbe vida cach atšbiamá ndoñe yapa quenatámana, chaitsaina o chayóbana. Pero atšbiamá iuámanana endmëna ndayá atše jobenayana atšbe trabajo jëftsepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entšángaftaca tšabia yomnana jábuayenama.

²⁵ “Y mora atše ndegombre sëntsetatsëmbo, tšëngaftangbentšana, chë ndëmuanyëngbentšë Bëngbe Bëtsabe amëndayama sënjabuayená, ndocná atše más quešmochátinyë. ²⁶ Chíyeca, atše ndegombre mënté cbetsëyana: Atše tondaye quetsátstatsëmbo nderado nda ndatsbocaná chaojóbanabiamá, ²⁷ er atše ntšamo Bëngbe Bëtsá jamama yojuabnacá lempe tchbonjabuayená, tondaye ntsebuetamencá. ²⁸ Chcasna, cach tšëngaftangbiamá šmochtsantješna y njëtscanga muentšë Jesucristbeñe ošbuachiyëngbiámnaca. Chëngbeñe mo chëngbe abujënyëngcá Uámana Espiritu tchmonjajayé, Bëngbe Bëtsabe entšanga chašmotsanýenama, chënga Bëngbe Bëtsá chábenga tojábiamá, chabe Uaquiñabe buiñe juabuáshanëse y jóbanyëse, mo bëtscá cuafjopagacá. ²⁹ Atše sëntsetatsëmbo, atše chaitsoñe orna, banga mochanjabo y chënga mochántsemna mo corente tšátjaye tjañe quešëngcá, Jesucristbeñe ošbuachiyënga chábeñe ošbuáchiyana chamotsajbanama chënga jamama. ³⁰ Y tšëngaftangbentšánëncá báseftanga mochanjábocana y entšángbiyoye uayátšenayey soyënga mochanjabuatambá, chca, báseftanga Jesucristbeñe ošbuáchiyënga chë ínýëngbentšana chamotsoluarema y një chë abuatambayëngbiyoye chamotsésetonama. ³¹ Chcasna, sempre šmochtsantješna; ndoñe chacmondëbnëtjomba, atše unga uatëntscuana, bnëté y íbeta, tšëngaftanga cada ona chondétsabuayiyayey y chama atše puerte tijasufrí.

32 “Y morna, Jesucristbeyeca catsátanga, Bëngbe Bëtsabe cucuatšíñe cbétsabashejuana y ntšamo tšëngaftangbiana chabe tšabe juabna yomnama palabrëngaca, tšabá chašmuesomñe. Cha endobena jamama tšëngaftangbe ainaniñe más chašmotsošbuáchemá, y endobena tšabe soyënga tšëngaftanga jatsatayama, ndayá jatsatayama tojanašebuachenacá mo tšëngaftangcá entšángbioye, ndëmuanýenga cha tojáchembo chabe entšanga chamotsemnana. 33 Atše ndocnabe crocénana, o castellano o entšayá atšbiana quetsatántšaboše; 34 más inýetsá, y tšëngaftanga lempe šmondétatšëmbo, atše cach atšbe cucuatšeca tijéftsetrabajama, atšbiana y átšeftaca imojamnëngbiana opresido enjamna soyënga janguanguama. 35 Atše nyëts tempo sëndinýanýná entšá chca ibomnama, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabrëngama sempre jtsejuabnayëse: ‘Canýe entšá más oyejuayá jtsemnana ndayánaca inýabioye tbojtsatšetná ora, y inýabioye tbojtseyëngacá ora ndoñe nýa nyëtsá ca’ ” —Pablo tonjanoyebuambá.

36 Pablo chë soyënga tonjánayanentšana, tonjanoshamentšé y nyëtscanga chentšë monjëtsemnëngaftaca Bëngbe Bëtsá tmonjanótšëmbona. 37 Nyëtscanga tmonjánenobošachna y Pablo tmontanotsejcuá y tmontanámocho. 38 Y entšanga corente ngménaca monjëtsemna, chënga ndocna te más cha mochántinýe ca Pablo tojanéyana causa. Chentšana, chënga chë barquësha enjetsamnëntšcoñe cha tmonjantjëmbambá.

21

Pablo Jerusalenoye tojána

1 Chë Jesucristbeñe ošbuáchiyënga fsënjéftsanabashejuana ora, barquëshañe fsënjanojayé y ndericho Cos luaroye fsënjána; chë yëfsana Rodasoye y chentšana Pátara pueblöye. 2 Pátara pueblentšë canýe barquësha fsënjáninýena, Fenicioye enjétsaye; asna, chëshañe fsënjanojayé y chentšana fsënjéftsanbocna. 3 Fsëntsanachnëjuana ora, fsënjáninýe Chipre luare; Chipre bëngbe uañicuayoica tonjanoquedá y bëngna Siroye fsënjétsaye. Tiro pueblentšë chë barquëshentša uasmanëshangá jéftšáboshjonama yojámnyeca, chë pueblöye bënga fsënjéftsanamashjna. 4 Chentšana, Jesucristbeñe ošbuáchiyënga fsënjánanýena y canýsëfta te chëngaftaca fsënjanoquedá. Chënga Pablo tmonjanianya cha ndoñe ibonjamna Jerusalenoye jtsayana ca, er chë Uámana Espiritu tojanabuayená ndayá choca cháftaca jopásama. 5 Chë canýsëfta te tonjanochnëngo ora, chentšana fsënjéftsanbocna y nyëtscanga parejo chëngbe shémangaftaca y básengaftaca šonjanatjëmbambá chë pueblo chabóntšcoñe; y chentšë, chë chënyañe fsënjanošamentšé y Bëngbe Bëtsá fsënjanimpadá. 6 Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

7 Tirentšana fsënjéftsanbocna y Tolemaida pueblöye fsënjánashajna; y chentšë tonjanopochocá bëngbiana bejaycá chë te ayana. Tolemaidentšë Jesucristbeñe ošbuáchiyënga fsënjanacheuá y chëngaftaca canýe te fsënjanoquedanga. 8 Yëfsana, bënga chentšana fsënjéftsanbocna y Cesarea luaroye fsënjánashajna. Chocna, bënga fsënjána Felipe chë Jesucristbiana tšabe noticiënga abuayinayabe yebnoye y cháftaca fsënjanoquedanga. Felipe enjamna canýa chë Jesucristbe ichmónëngbioye ujabuachanënguentšá, Jerusalenoca ubuáyanënga. 9 Felipe enjánabamna

canta ndébouamna bemianga y chënga monjamna Bëngbe Bëtsabe juabna oyebuambnayënga. ¹⁰ Ya bayté chentše fsënjétsemna orna, Judeocana tonjánashjango canya Bëngbe Bëtsabe juabna oyebuambnayá, Agaboca uabainá. ¹¹ Agabo bëngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espíritu entsichamo, Jerusalemoca quem uasnanëja nduíñbioye chë judiënga mëntšá camochjama y ndoñe judiëngbe cucuatšëne camochjáboshjona ca.”

¹² Chca fsënjanuena ora, bënga y chentša entsãnga Pablo fsënjanimpadá Jerusalemoye ndoñe chaondëtsama. ¹³ Chora Pablo tonjánayana: — ¿Ndáyeca šmojtsošaché y šmojtsama atšbe ainaniñe puerte ngmënana chaotsemnana ca? Atše sëntseprontana y ndoñe nýe chašmobatsëcama; Jerusalemoca jobanámnaca sëntseprontana, Bëngbe Utabná Jesusbiamaca —cha tonjánayana.

¹⁴ Jáyëñjanama ndoñe chibiatanobená ora, ndoñe más chibiatanimpadá; nýe mëntšá fsënjanianana: —Ntšamo Bëngbe Utabná yojtsebošcá chaotsemnana ca.

¹⁵ Chë soyënga tonjanochnëngüentsana, fsënjanoprontá y Jerusalemoye fsënjána. ¹⁶ Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canye Chipre luaroca entšabe yebnoye, Mnasón ca uabainá, ndábentše bënga joquédama. Mnasón tempscana inamna Jesucristbeñe ošbuachiyá.

Pablo tojána Santiago jauatsëtsayama

¹⁷ Jerusalemoye fsënjánashjajna orna, chentša Jesucristbeñe ošbuáchiyënga oyejuayënga šonjanëbuaja. ¹⁸ Yëfsana, Pablo bëngaftaca tonjána Santiago jábuachama, y chentše, nýetsca chë ošbuachiyëngbeñe bëtsëjemëngcá mandayëngnaca monjëtsemna. ¹⁹ Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

²⁰ Chca tmonjanuena ora, Bëngbe Bëtsá tmontanchuá y Pablo mëntšá tmonjanianana: “Morna, Jesucristbeyeca bëngbe catšata, contsonyá ntšamo ba uaranga judiënga Jesucristbeñe imojtsošbuáchema, y chënga nýetscanga montsantješna nýetsca Jesucristbeñe ošbuáchiyënga chë Moisesbe leyentša nýetsca mandënga chamotsocumplínama. ²¹ Y entsãnga chëngbioye noticia tmojatšatá, aca chë inýe luarënguenache imoyena judiënga cojtsabuatambá, Moisés tojanmandá soyënga ndoñe ntseyeunanama y basetëmënga base bobachtema chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca. ²² Y morna, ¿ntšamo chë soyëngama cochtsemana? Ndegombre, chënga mochanjátatšëmbona aca moye tcojabama. ²³ Chcasna, ntšamo cbochanjabuayenacá cochjama: Bëngbentše canta boyabásenga montsemna y chënga entsamna Bëngbe Bëtsabiamaca canye šbuachenana soye jamama. ²⁴ Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábenga jtsatsmënana ntšamo chamojtsama ora, y ntsachetšá jëtsjájuama chaojtsamncá, aca cochjëtšájua, as chënga chamobená nýets stjënashë jtsenátšbotjiamaca, jinýanýiyama, ntšamo Bëngbe Bëtsábioye tmojašbuachenacá ya tmojamama. Y chca, nýetsca judiënga mochanjinýe ndoñe ndegombre yontsemna chë ntšamo chëngbioye acbiamaca tmojacuntacá; masna, chënga mochanjátatšëmbona

aca ndegombre ntšamo Moisesbe leyiñe yomandancá icuamama.
 25 Y chë ndoñe judiënga Jesucristbeñe imojtsošbuachengbiamna,
 bënga ya fsënjubuábiamna y fsënjáuyana ndayá jtsocumplínama chënga
 yojtsamnama, mëntšá: ‘Ndoñe chamondëtsesá mëntšena, chë entšanga
 tmojtsejuabná diosënga imomna soyënga jadórana tmojiyëbana; ni buiñe,
 ni tsešana bayëngbe mëntšena; y ndoñe chamondëtsama bacna soyënga
 shembásenga y boyabásengaftaca ca’ ” —chënga tmojánayana.

Bëngbe Bëtsabe bëts yebnentse judiënga Pablo tmojánishache

26 As Pablo, yëfsana chë cántanga tonjanënatse y chëngaftaca tonjanma
 soyënga Bëngbe Bëtsabe delante tsábenga jtsatsmënana. Chentšana, Pablo
 Bëngbe Bëtsabe bëts yebnoye tonjánamashëngo chë bachnanga júnayama,
 ndayténtscöfe yojamna chë cantangbiamna soyënga jtsamama, Bëngbe
 Bëtsabe delante tsábenga jtsatsmënana, y jayanama ndayté chëngbiamna
 yojtsemna ndaye ora cada ona ibojtsemna ndayánaca Bëngbe Bëtsabe bëts
 yebnoye juambana, Bëngbe Bëtsabiamna juatšëmbonama.

27 Chënga tmojanenoyeuná y tmojánayana canýsëfta tentscuana chca
 jamana ca. Chë canýsëfta te ya jochnënguama yojtsemna orna, básefta
 judiënga Asioquënga Pablo tmojáninýe Bëngbe Bëtsabe bëts yebnoca y tmo-
 janma entšanga chamuenbouënanama. Y cha tmojánishache, 28 mëntšá jt-
 sayebuáchëse: “¡Israeloca entšanga, šmabétsëjebuache ca! Quem boyabása
 entsemna chë nyëts luarënguenache iuana abuátambaye soyënga bëngbe
 entšangbe contra, y ntšamo bëngbe leyënguiñe endayanama contra, y
 quem Bëngbe Bëtsabe bëts yebnama ndoñe tsabá yontsoyebuambná. Y ca-
 bana quem Bëngbe Bëtsabe bëts yebnoye grieguënga tojúmashengo, y chca
 cha tonjama chë Bëngbe Bëtsabe bëts yebna Bëngbe Bëtsabe bominyiñe
 ndoñe tsabá chaondëtsemnama ca” —chënga imojtsichamo.

29 Chca imojtsichamo, er entšanga Pablo tmojáninýe chë bëts
 pueblentse Trófimo Efesocáftaca; y imojtsejuabnaye chábioye Bëngbe
 Bëtsabe bëts yebnoye Pablo tbojanánatse ca.

30 Nyëtsca chë pueblentša entšanga tmojánenbouenana, y ochamanana
 chë Pablo yojtsemnoye tmojánashjajna. Pablo tmojánishache y Bëngbe
 Bëtsabe bëts yebnentšana shjoye tmojtsansjojó, y cachora chentša
 bëšašangá tmojtanatame. 31 Jtsóbama ya imojtsebuachéta ora, chë Ro-
 moca soldadëngbe mandayá tojántatšëmbona nyëtsca chë bëts pueblentša
 entšanga imojtsenbouenana. 32 Asna, chë mandayá chabe sol-
 dadënga y inýe chentša amëndayënga tojánachembo y cánýiñe chë
 entšanga imojtsemnoye tmojëtsanótjajo. Entšanga, chë mandayá y chë
 soldadëngbioye tmojánanýe ora, tmojtsanajbaná Pablo jantšetayana.

33 Chorna, chë soldadëngbe amëndayá tojanobeconá, Páblëbioye
 tbojánishache y tojanmandá uta cadenëjuaca cha chamotsebátsëcama
 y tojanatjá: “¿Nda mua yomna y ndayá tojama ca?” 34 Pero chë
 entšangbeñe, inýenga canýe soye imojtsáyebuache y inýenga inýe
 soye; y chca, ntšamo ndegombre tojanopasama jtsetatšëmbuama chë
 mandayá ndoñe tonjanobená; chcasna, cha tojanmandá Pablo chë
 soldadëngbe oyenoye chamuánatsama. 35 Chë soldadëngbe oyenoca
 grádasbengoye tmojánashjajna ora, chë soldadënga tojanotocá Pablo
 cutsnana juambana, chë entšanga tša rábiaca imojtsemna causa, 36 er
 chënga ústonoye imojétsaye y “¡Chaóbana ca!” imojtsaiuáyebuache.

Ntšamo Pablo entšangbe delante tojanenëuyaná

³⁷ Chë soldadëngbe oyenoye ya jamashënguama imojtsemna orna, Pablo chë soldadëngbe amëndayábioye tbojantjá: —¿Tašcatjaleséncia ratotema ácaftaca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama! ³⁸ As, ¿aca ndoñe condmëna chë Egiptocá, chë ndoñe bayté quenátsmëna entsanga yojanëtsëtsná chë mándayëngbe contra chamotsemnana y chë canta uaranga podesca uamana entsanga puñálaca uajatëngaftaca, entsanga ndoyena luaroye tojanbočná ca?

³⁹ Chora Pablo tbojanjuá: —Atše judío sëndmëna, Tarso puebloca onýnaná, canye uamana pueblentše Cilicia luaroca; Diosmanda šmoleseñciá entsanga jáuyanama ca.

⁴⁰ As, chë soldadëngbe amëndayá chca tbojanleseñciá. Páblëna chë gradasbenguñe tojantsá y cucuatše tojanatsbaná entsanga iyteca chamobiamama. Nýetscanga iyteca imojtsemna orna, Pablo hebreo biyañe mëntšá entsanga tojanëyana:

22

¹ “Baconga y taitanga, mora šmochjouena atše jenëuyanama ntšamo chjayancá ca.”

² Pablo cachëngbe biyañe, hebreo biyañe yojsóyebuambnana entsanga tmojanuena ora, más iyteca tmojanobiama. As Pablo tojanëyana: ³ “Atše judío sëndmëna. Tarso pueblentše, Cilicia luaroca sënjanonýná, pero muentše Jerusalemntše sënjanoboché y sëndëtatšëmbo soyëngna Gamaliélbeyeca chca botamana sënjanatsjinýe. Cha corente tšabá šonjanbuatëmbá bëngbe bëts taitangbe leyënga; nýets atšbe ainánaca Bëngbe Bëtsá sëndëserveda, ntšamo nýetsca tšëngaftanga mora šmontsamancá. ⁴ Atše sënjánama chë Jesucristo tojaninýanýe Benache ústonënga chamosufrima y chamóbanama; boyabásenga y shembásenga sënjanëtabaye y cárceloye sënjanautame. ⁵ Chë judío bachnangbe más uamana amëndayá, nýetsca chë judiëngbeñe bëtsëjemëngcá mándayënga y inye muentša mándayënga mondobena jayanana ntšamo sentsichamcá ndegombre yomnana. Chënga uabemana tsbuanachangá šmonjaninyé, bëngbe catšátanga judiënga chamotsetatšëmbuama atše mando stsanbomnana, Jesucristbeñe ošbuáchiyënga jótabayama; y Damascoye sënjánana choca Jesucristbeñe ošbuáchiyënga jótabayama, moye Jerusalemoye junatsama jacastígayama.”

Pablo tojanacuntá ntšamo Jesucristbeñe ošbuachiyá tojanóbema (Hch 9.1-19; 26.12-18)

⁶ “Pero canye te benachiñe Damasco béconana sënjëtsaye orna, mo nýetsto ora, nýe ndeolpe atšbe juachañe canye bëts tcuinýe celocana tonjanbuashinýinýena. ⁷ Y fshantsoye sënjëtseshajaye y canye oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’ ⁸ Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atše sëndmëna Jesús Nazaretocá, y aca condama atšbe entsanga chamotsesufrínama ca.’ ⁹ Chë átšeftaca monjánajnënga chë bëts tcuinýe tmojáninýe y tmojanouatjananga, pero chë oyebuambnayana ndoñe tmonjanuena. ¹⁰ Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaninyana: ‘Matëtsbaná y mëtëtontšé Damascoye jama. Chentše canya cmochanjabuayená ndayá jamama cmojtsemnana ca.’ ¹¹ Chë tcuinýe yapa tonjanbuashinýinýena causa,

atše jtaná sēnjanoquedá. Chcasna, chē ín̄yēnga šmontanobuacuetētšé y chca, Damascoye sēnjánashjango.

12 “Chentše enjamna can̄ye bacó Ananías ca uabainá; cha inoyena ntšamo Bēngbe Bētsá yobošcá y yojánama ntšamo bēngbe leyēnguiñe iuayancá, y n̄yetsca chentša judiēnga monjanamana chabiama tšabá jtsóyebuambnayana. 13 Cha tonjánabo atše jin̄yama y tonjánashjango ora, šonjaniyana: ‘Jesucristbeyeca atšbe catsata, Saulo, chacmotsatabin̄yana ca.’ Cachora y cha sēnjánin̄ye.

14 “Chentšana cha tonjánayana: ‘Bēngbe bēts taitangbe Bētsá aca tcmojuábuayana, ntšamo cha acbiama yobošcá chacotsetatšēmbuama, chē n̄yetsca soyēnguiñe Tšabá Amá chacuin̄yama y cachabe uayásentšana chacóyeunama. 15 Bēngbe Bētsá chca tojama, aca chē chabe buayenana soyēngama entšángbeñe chacóyebuambama, y chamna n̄yets luarentša entšángbeñe cochjacuénta, ntšamo tcojin̄ye y tcojouencá. 16 Y mora, j̄ndoñe más matobátmanana! Motsbaná y cochjenábaye Jesucristo jótšēmbonēse, chca, acbe bacna soyēngama perdonaná chacotsemnana ca’ ” —cha šonjaniyana.

Pablo tojanacuntá ntšamo chē ndoñe judiēngbiōye tmojánichmoma

17 “Jerusalenoye sēntaná ora, Bēngbe Bētsabe bēts yebnoye sēnjána cháftaca jencuéntama, y ndeolpe atše mo otjenayoquécá sēnjanoquedá. 18 Chca orna, Bēngbe Utabná sēnjánin̄ye y cha mēntšá šonjaniyana: ‘Betsco motsa y cam ora Jerusalenentšana mētsebocna; quemuentša entšanga ndoñe quecmochatóyeunaye ntšamo atšbiama condétatšēmo y contsētšētnacá ca.’ 19 Atše sēnjanjuá: ‘Bēngbe Utabná, chēnga mondétatšēmo atše sēnjánana n̄yetsca chēngbe enefjuana yebnēnguenache y chē ácheñe ošbuáchiyēnga sēnjanētámiana y sēnjánatsetšenaye; 20 y acbiama ndegombre oyeuambnayá Esteban tmonjanóba ora, átsnaca chentše sēnjamma y tšabá imojtsama ca chama sēnjétsejuabnaye, y cabá chē monjanóbanangbe entšayējuangá atše chora sēnjanabojan̄yá ca’ —atše sēnjanjuá. 21 Pero chca sēnjánayana ora, Bēngbe Utabná šonjaniyana: ‘Motsa; atše bēn luarēngoye, ndoñe judiēngbiōye cbochanjíchmuca ca.’ ”

Pablo y chē soldadēngbe amēndayá

22 Chē entšanga chēntsoñe tmojanuena; pero chē ndoñe judiēngbiama tojanoyebuambá orna, chēnga tmojanontšé uayebuáchana: “¡Ndoñe tšabá quenátsmēna cha vídaca chaotsemnana! ¡Motsóba ca!” 23 Y chēnga más imojtsáyebuache; puerte rábiaca chēngbe uichētjonējuangá tsbanánoye imojtsébéntaye y tsbanánoye polvēshe imojtsētšana; 24 chē causa, chē mandayá tojánayana chē soldadēngbe oyenoye Pablo chamotsēmashēngo ca, y tojanmandá chamotsetjanja chaobuambama ndáyeca entšanga chca chabe contra imojtsáyebuache. 25 Pero jtsetjanjama ya tmojanbatsēca orna, chentše imojtsemna soldadēngbe amēndayábioye Pablo tbojantjá: —¿Tšēngaftanga šmobena can̄ye entšá derecho bomná mo can̄ya Romoca on̄ynanacá jatjanjana, ndegombre tšabá o ndoñe tšabá tonjamama cabá ndayana ora ca?

26 Chē básefta soldadēngbe mandayá chē soye tojanuena ora, tojána y n̄yetsca soldadēngbe amēndayábioye chama ibojuenaye, mēntšá: —¿Ndayá cochjama? Chē entšá derecho bomna mo can̄ya Romoca on̄ynanacá canmēna ca.

²⁷ As chë amëndayá tojána Pablo yojtsemnoye y tbojaniana: — Smëyana, ¿aca derecho bomná mo canÿa Romoca onÿnanacá comna ca?

Y cha tbojanjuá: —Arseñor ca.

²⁸ Chora chë amëndayá tojánayana: —Atše beca crocénana sënjetsajó mo canÿa Romoca onÿnanacá derecho jtsebomnama ca.

As Pablo tbojanjuá: —Y atšna derecho bomná mo canÿa Romoca onÿnanacá sëndmëna atše tijanonÿná orscana, er atšbe taitá chca derecho bomná inamna ca.

²⁹ Chcasna, chë jatjanjama imojtseprontanënga, Páblëbentsana tmojanjuaná; y chë mandayánaca tojanjuaná y yojtsauatja, Pablo derecho bomná mo canÿa Romoca onÿnanacá yojamnama tojántatsëmbona ora, er cha tojanmandá Pablo chamotsebátsëcama.

Pablo, Jerusalenentša uámana mándayëngbe delante

³⁰ Chë soldadëngbe amëndayá yojtseboše ndegombre jtsetatsëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nÿetsca chë judiëngbe amëndayënga chamobéconama. Chentsana, Pablo tbojanábocna y chëngbe delante tbojanatsá.

23

¹ Chora Pablo, nÿetsca chë mandayëngbioye tojanënÿanÿé y tojanëyana: —Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

² As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamotsáyejantšetama. ³ Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtsjantšetá, bacna entsá, ntšamo ndegombre tcojuabnacá ndinÿinÿayá! Aca chentše contsetbemana tšabá o ndoñe tšabá tijamama jayanama, ntšamo Moisesbe leyiñe yomandancá; as, ¿ndáyeca cojtsemánda chašmojantšetama? Chca chë leyiñe ndoñe quenátslesenciana ca.

⁴ As, chabe béconana imojtsemna entsanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjójyenguango ca?

⁵ Chora Pablo tojánayana: —Taitanga, atše ndoñe quetsátstatsëmbo cha chë bachnangbe más uámana amëndayá yomnama. Er Bëngbe Bëtsabe uabemana palabrënguiñe mëntšá endayana: “Entsangbe mandayabe contra ndoñe catjyana ca.”

⁶ Pablo tojáninÿe chë mándayënguëntše báseftanga saduceunga y inÿengna fariseunga imojtsemnama; as, mëntšá tojanáyebuachena: —Taitanga, atše fariseo sëndmëna; atšbe bëtsëtsanga fariseunga mondmëna. Atše, jtsošbuáchiyëse chë obanënga mochtayenama tsobatmana causa, atše ndoñe tšabá sentsama ca tšëngaftanga smochjyana ca.

⁷ Pablo chca tojánayana ora, chë fariseunga y saduceunga tmojanontsé enatsëtsnayana, y chë causa nÿetsca entsanga ndoñe cachcá imontsejuabnaye. ⁸ Er chë saduceunga jtsichámuana chë obanënga ndoñe ntayenana ca, y ni angelënga, ni espritënga ndoñe mondmëna ca; pero chë fariseunga aíñe chë soyënguiñe jtsošbuáchiyana. ⁹ Y nÿetscanga tša

imojtsáyebuache; asna, básefta fariseunga ley abuatambayënga tmojantsbaná y jabuachana mëntsá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canÿe ángel o espíritu muábioye ndegombre tbojayuana ca.”

¹⁰ Entšanga más imojtsáyebuache y chë soldadëngbe amëndayá yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentsana jaisábocnama y chë soldadëngbe oyenoye cachiñe jesánatsama.

¹¹ Yëfsana ibeta, Bëngbe Utabná Páblëbioye tbojánëbëbocna y tbojaniyana: “Pablo, ainaniñe añemo cochtsebomna. Ntsamo aca atšbiana condétatsëmbo y muentše Jerusalemntše condoyebuambnacá, cachcá cmontsemna Romoca jamama ca.”

Judiënga tmojanenoyeuná Pablo jtsóbama

¹² Chë inÿe yëfsana, judiënguentšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofšiyana, cha jóbantscuana. ¹³ Chca jamama tmojanjuabó entšanga imojamna canta bnëtsanëngama más. ¹⁴ Chënga tmojána chë bachnangbe amëndayënga y judiëngbeñe bëtsëjemëngcá mandayëngbioye y mëntsá tmojánayana: “Bënga Bëngbe Bëtsá mëntsá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofšiyana, Pablo jóbantscuana. ¹⁵ Morna, tšëngaftanga y chë inÿe muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjayuana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

¹⁶ Pero, Páblëbe uabenbe uaquiñá chë soye tojántatsëmbona; asna, tojána chë soldadëngbe oyenoye, chama Pablo jauenayama. ¹⁷ Chorna, Pablo canÿe básefta soldadëngbe mandayábioye tbojanchembo y tbojaniyana: “Diosmanda quem basa mánatse chë nÿetsca soldadëngbe amëndayábioye; canÿe soye entsebomna chábioye juenayama ca.”

¹⁸ As, cha chë bobontse tbojëftsanbetše, chë nÿetsca soldadëngbe amëndayábioye tbojanánatse y tbojaniyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebomna canÿe soye aca jauyanama ca.”

¹⁹ Chë soldadëngbe amëndayá chë bobóntsbioye tbojëftsanobuácuëntëntsiye, luaroye tbojanánatse y tbojantjá: —¿Ndayá cojtsebomna atše jauyanama ca?

²⁰ As chë bobontse tbojaniyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. ²¹ Pero ndoñe catjóyaunaye; chënguentšana canta bnëtsanëngama más entšanga iytëmenënga Pablëbiana montsanjá. Chënga tmojanjurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofšiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojaniyana.

²² Chentšana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntsecuëntayana, y chentšana tbojtanicnmó.

Pablo tmojanánatse Félix, chë Cesareoca mandádbioye

²³ Chentsana, chë soldadëngbe amëndayá tojánachembo útata chë inÿe soldadëngbioye mándayënguentšana, y tojanamëndá chamoprontama uta patse soldadënga, inÿe canÿséfta bnétsanënga couayënguiñe y inÿe uta patse lanzëshangaca, Cesareca puebloye ibeta, las nueve ora jabocanama; ²⁴ y tojanamëndá couayënga chamoprontá Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. ²⁵ Y canÿe tsbuanácha chëngaftaca tojanichmó y chëchañe mëntšá yojtšábemana:

²⁶ Claudio Lisias, chë bëts uámana mandado Felixbiana: Salud bomná chacotsomñe.

²⁷ Judiënga quem boyabása tmojishache y montseboše jtsóbama; pero cha mo canÿa Romoca onÿnanacá derecho bomná yomnama sënjåtatsëmbona ora, atšbe soldadëngaftaca sënjá y chëngbe cucuatšentsana cha sënjatsbocá. ²⁸ Atše sëntseboše jtsetatsëmbuana ndaye soyama chënga chabe contra imojtsichámuama; as, cha sënjuánatse nÿetsca chë judiëngbe amëndayënga montsemnoye; ²⁹ y chentsana, atše sënjåtatsëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloye jutámia. ³⁰ Pero atše sënjåtatsëmbona chë judiënga tmojenoyeuná cha jtsóbama; chíyeca, cam ora cha ácbioye sentsichamná, y chabe contra ichámëngna sënjáuyana, ndayá muabe contra jayanama imojtsebomncá acbe delante chamuayana ca.

³¹ Chentsana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloye tmojanánatse.

³² Yëfsana, chë shecuátseca tmojána soldadëngna cach soldadëngbe oyenoye tmojésanshëcuana, y chë couayiñe enjaquenënga Pábloftaca tmojána. ³³ Cesareoye chënga tmojánashjajna ora, chë tsbuanácha chë mandádbioye tmojanantšabuaché, y Páblënaca chabe cucuatšifne tmojáboshjona. ³⁴ As chë mandado chë tsbuanácha tojanalía; chentsana, cha tojanënoticiá ndaye luarocá Pablo inamnana, y Cilicia luarocá cha inamnana cha tojántatsëmbona ora, ³⁵ tbojaniyana: “Acbe contra ichámënga chamobeconá ora, ácbioye oído cbochjabuájua ca.”

Chentsana, cha tojanmandá Rey Heródesbe bëts yebnoca Pablo chamotsebojanÿama.

24

Ntšamo Pablo chë mandado Félixbe delante tojanenëuyaná

¹ Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtšëjemëngcá mándayënguentšana y canÿa entšanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

² Pablo tmojanábocna ora, Tértulo tojanontsé chabe contra jayanama y Félixbioye tbojaniyana: “Aslëpaye, taita mandado, ácbeyeca bënga natjëmbana fsëndoyena y aca puerta obiashjachá cómnayeca ba tšabe soyënga quem luarentša entsangbiana yojtšebinÿna. ³ Nÿets tempo y nÿetsquénache chë soyënga fsëndóyëngacañe, bëts uámana mandado, y bënga chama corente chbondetsechuaná. ⁴ Pero ndoñe yapa bën jatenbiamnayamna, Diosmanda ratotema šmotsoyauná. ⁵ Bënga

fséntsetatsēmbo quem boyabása entšanguentše entsemna mo bacna shacuancá, nýets luarēnguenache yojtsana y yojtsama chē judiēnga nýetscanga cachca soye ndoñe chamondětsejuabnama, y cha yojtsemna chē Nazaretocabe ustonēngbe uanatsaná. ⁶ Y tonjábošena jamama Bēngbe Bětsabe bēts yebna, Bēngbe Bětsabe bominýiñe ndoñe tšabá chaondětsemnama; chíyeca bēnga cha fsēnjotbá. Bēnga fsēnjábošena chabiamana jayanana tšabá o ndoñe tšabá tonjamama, ntšamo bēngbe leyēnguiñe endayancá; ⁷ pero chē soldadēngbe amēndayá Lisias tonjontremeté y jabuachana bēngbe cucuatšentsana tbojtsánatseñe, ⁸ y tonjayana chē chabe contra ichámēngna caojtsamna ácbioye chama jabana ca. Cach taitá chacojatjá ora, ndegombre soyēnga cochántsetatsēmbo ndáyecá bēnga muabe contra fstsichámuama ca” — cha tojánayana.

⁹ Y chē judiēnga chentše imojětsemnēngna imojtsanichamo aíñe chca tojanopasá y lempe ndegombre yojtsemna ca.

¹⁰ Chentsana, chē mandado Páblēbioye tbojánefjatsēmbo chaóyebuambama; as Pablo tojánayana: “Atše sēndětatsēmbo aca ba uatama comna muentša entšangbiana tšabá o ndoñe tšabá tmonjamama ichamuá; chcasna, tondayama ntsauatjá y puerte oyejuayá acbe delante šcuenēuyaná. ¹¹ Ntšamo cach aca jtsetatsēmbuama contsobencá, cabá bnětsana uta te entsemna atše Jerusalenoye sēnjá, Bēngbe Bětsá jadórana. ¹² Y quemēnga ndoñe chešmátinýena nderado ndáftaca jabuachana enatsětsnayıñe, ni entšanga chamuenbouénanama amiñe, Bēngbe Bětsabe bēts yebnoca, ni chēngbe enefjuana yebnēnguenache, ni inýe luarēnguenache chē bēts pueblentše. ¹³ Quem entšanga tondaye quemátsbomna ntšamo jayanama, atšbe contra montsichamo soyēnga ndegombre yojtsemna ca. ¹⁴ Pero ndegombre endmēna y chanjayana, atše bēngbe taitangbe Bětsá sēnděservena, jtsiyeněse ntšamo Bēngbe Bětsá šonjaninýanýe benache yomncá; y quem entšanga montsichamo, básefta soyēnga ntšamo bēnga quem Tsēm Benache ústonēnga fstsošbuachecá, ndoñe ndegombre yondmēna ca. Pero atšna nýetsca chē Moisesbe leyiñe y Bēngbe Bětsabe juabna oyebuambnayēngbe uabemana librěšanguentša soyēnguiñe sēndošbuaché; ¹⁵ y atše cach chēngcá, puerte jtsošbuáchiyěse Bēngbe Bětsábeñe sēndobátmana cha yochjama chē mochjóbanēnga chámuatayenama, nýetsca entšanga, lempe tšabá amēnga y chē ndoñe tšabá amēngnaca. ¹⁶ Chíyeca, atše nýets tempo puerte tšabá sēndama, tondayama ntjatenócochinýenama y atšbe ainana natjěmbana chaotsomñama, Bēngbe Bětsabe delante y entšangbe delántnaca.

¹⁷ “Básefta uatama inýe luarēnguenache atše sēndánana; ndoñe bayté quenátsmēna cach atšbe luaroye sēntashjango, chentša ndbomnjěmēnga jujabuáchama ndayánaca jatsatayama y bayēnga jobáyama, Bēngbe Bětsá jětschuayama. ¹⁸ Atše sēnjama soyēnga Bēngbe Bětsabe delante tšabá jtsatsmēnama; chentsana, básefta Asioca judiēnga Bēngbe Bětsabe bēts yebnentše šmonjínýena, pero ndoñe chešmátinýena ni ba entšángaftaca, ni enbouenaniñe. ¹⁹ Chē šmonjinýenēnga entsamna ácbioye jabana y acbe delante atšbe contra chamuayana, nderado ndayá tmojtse-bomněse. ²⁰ O ndóñesna, cach quemēnga, muentše montsemnēnga chamuayana, chē judiēngbe amēndayēngbioye atše šmonjánatse ora, atše ndayá tijobuáchjanguama chešmējínýena, atše castiganá jtsemnama šojtsemna ca chēnga chamuayana; ²¹ o nderado nántsemna chē

atše chëngbentše sëntsemna ora, mëntšá tijuáyebuachenama: ‘Atše chë obanënga mochtayenama puerte jtsošbuáchiyëse sëndobátmana causa, tšëngaftanga atšbe contra šmochjayana ca.’ ”

²² Félix bëtscă inatátšëmbo Bëngbe Utabná tojaninýinýe Benache ústonënga imojanošbuaché soyëngama; as, Pablo chca yojtsoyebuambná ora, cha tojanmandá ndoñe más chë soyama chë te jatóyebuambnayana, y chë entsanga tojanéyana: “Chë soldadëngbe amëndayá Lisias chaojáshjango ora, chanjayana ntšamo quem tšëngaftangbe sóyeca jamama ca.”

²³ Y chentša soldadëngbe amëndayábioye tbojanmandá Pablo jtsebojanýama, pero nýe utamená ndoñe chaondëtsemna ca; y tojanmandá, Páblëbe amiguënga jalesénciayana ntšamo tmojtsebošcă cha chamuauájabuachama.

²⁴ Chentšana baseftaytese, chë mandado Félix Cesareoye tojtanashjango, chabe shema Drusíaftaca, canýe judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canýa nanjobenaye Jesucrístbeñe ošbuachiyá jtsemnama. ²⁵ Pero, nýetsca soyënguiñe tšabá jtsamama, cachá jenomándama jtsobenama y ntšamo tmojamama nýetsca entsangbiana Bëngbe Bëtsá yochjayanama Pablo tojanoyebuambá ora, Félix tojanëuatjaná y Páblëbioye tbojanianyana: “Mora, mata; luare quétstsebmna ora, cbochjachembo ca.”

²⁶ Jëtsboshjonama Pablo crocénana chabuatabuenámnaca Félix inobátmana; y chca, ba soye ibojanóffajana cháftaca jencuéntama. ²⁷ Y chca uta uata tojanochnëngo; chentšana, Félix ya ndoñe más chë mandado yontsemna y chabe cuentna Porcio Festo mandadcă tmojántbema. Félix yojtseboše chë judiëngbe delante tšabá joquédama, chíyeca utamená Pablo tbojëftsanboshjona.

25

Pablo Festbe delante

¹ Festo chë luaroye tojánashjango y unga tianoye, Cesarea pueblentšana Jerusalenoye cha tojána. ² Chocna, chë bachnangbe amëndayënga y chë más uamana judiënga Féstbioye tmojána Páblëbe contra jayanama. ³ Y tmojanimpadá, mo chëngbiana canýe bëts pavor cuenta, cha chaomandá Pablo Jerusalenoye chamuánatsama. Chëngna imojëtsejuabnaye Pablo benachiñe chamotsóbama. ⁴ Pero Festo tojanéyana, Páblëna Cesareoca utamená yojtsemna y baseftaytese cha choye jtama ca. ⁵ Y tojanéyana: “Chamna, tšëngaftangbe amëndayënga átšeftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

⁶ Festo Jerusalenentše posufta o bnëtsana te más chëngaftaca tbojëftsanjétana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. ⁷ Pablo choye tojánashjango ora, Jerusalenocana tmojánashjajna judiënga tmojanobobeconá y ba uabouana soyënga chabe contra imojtsichamo, pero ni canýe chë soyëngama tmonjanobená jinýanýiyana chca ndegombre bëtsemnama.

⁸ Y Pablo, cachá jenéuyanama mëntšá yojtsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

⁹ Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

¹⁰ As Pablo tojánayana: —Atše sëntsemna chë Romoca bëts mandado tojichamó amëndayëngbe delante y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma. ¹¹ Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšifne atše jaboshjonana. Chíyeca, Dios-manda chë Romoca bëts mandado cháuyayana tšabá o ndoñe tšabá sënjamama ca —Pablo tojánayana.

¹² As Festo, chë soyama chabe buayiynayënga tojanatjá y chentshana tojánayana: —Chë Romoca bëts mandado quem soyama cháuyayana tcojábóšenëсна, chábioye cochjá ca.

Festo, Rey Agrípaftaca tbojanencuentá ntšamo Pábloftaca jamama

¹³ Chentshana baseftayté tojanochnëngo ora, Rey Agripa y Berenice Cesareoye tbojána, Festo jauatsëtsayama. ¹⁴ Bayté chata chentše tojanajétana; y chca, Festo chë réybioye tbojanencuentá Páblëbe soyama. Cha mëntšá tbojanianya: —Muentše endmëna canye entšá, Pablo ca uabainá; Félix utamená tbonjëftsebošjona, atše mandadca sënjontsé ora. ¹⁵ Jerusalenoca sëndánmëna ora, chë bachnangbe amëndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. ¹⁶ Y atše sënjáuyana: “Chë romanënga ndoñe quematamana ndocnabiamama jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenéuyayana cha chaobenama ca.” ¹⁷ Chíyeca, chënga moye tmonjabo ora, ndoñe yapa bën ntjatenobiamnaycá cach yëfsana atšbe puestentše tribunaloca sëntótbema y sënjamandá chë boyabása jobetsana. ¹⁸ Pero chabe contra ichámënga, ntšamo atše sëndanjuabnacá chënga mochjayanamna ni mo canye bëts soye chabe contra chemátayana, chënga jóyebuambayama tonjóyentsbuache ora. ¹⁹ Chënga chabe contra montsichamo, nye cachëngbe Dios ntšamo jadórama yomnana y canya Jesús ca uabainábiamama; cha tojanóbana, pero Pablo entsichamo cha ainá yotsomñe ca.

²⁰ “Chora atše ndoñe quetstëtsetatsëmbo ntšamo chë soyifne jamana; asna, Pablo sënjantjá Jerusalenoye jama tajojéteboše ca, choca atše jayanama tšabá o ndoñe tšabá cha tonjanmama. ²¹ Pero cha šonjaimpadá camuentše jaboshjonana, cach Romoca bëts uámana mandado chë soyama tojayanëntscuana ca. Chcasna, atše sënjamandá cha chamotsebojanýama, chë mandádbioye jíchmuama atše jobenayëntscuana ca” —Festo tbojanencuentá.

²² Chca tbojanencuentá ora, Agripa Fëstbioye tbojanianya: —Atšnaca sëntseboše chë boyabása joyeunayama ca.

Y Festo tbojanjá: —Cach yëfse oído chábioye cochanjabuájua ca.

²³ Chë yëfsana, Agripa y Berenice corente uachuanentse chë tribunaloye tbojánamashjna y chátaftaca tmojánamashjna chë soldadëngbe

amëndayënga y chë pueblentša uámana taitanga. Chentšana Festo tojanmandá Pablo jobetsana; ²⁴ y chora cha tojánayana: “Rey Agripa y nyetsca taitanga bëngaftaca šmojtsemnënga: Chentše entsemna chë boyabása. Nyetsca judiënga chabe contra átsbentše montsabíchamo, Jerusalenoca y quem Cesarea puebléntšnaca, y nya jtsayebuáchëse tša šmontseimpadana cha chaóbanama; ²⁵ pero atše sëntsejuabná quem boyabása tondaye tonjama, jóbanama chabotsemnama ca. Y más, cachá šonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmu. ²⁶ Pero atše, atšbe bëts uámana mandádbioye quem boyabásabíama juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentšana, ndayá juabemama atše chaitsebomnana. ²⁷ Er atše sëntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

26

Pablo tojanontsé rey Agripbe delante jóyebuambayama

¹ Chentšana, Agripa Páblëbioye tbojanianana: —Jóyebuambayama contselesenciana, cach aca chacuenëyanama ca.

As Pablo, chë réybioye jachuyayama cucuatše tojanatsbaná y jenëyanama tojanontsé mëntšá jayanama: ² —Atše ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atše jenëyanama nyetsca soyëngama ntšamo judiënga atšbe contra montsichámuama; ³ y más sëntsoyejuá, taitá conduábuatmama lempe ntšamo judiënga monduamancá y condétatšëmbo chë judiënga ndayama imuenoboyebuambnana. Chcasna, Diosmanda uantádoca šmotsoyeuná.

Pablo tojanacuntá ntšamo cha tempo inamnana

⁴ “Nyetsca judiënga mondétatšëmbo ntšamo atše tempscana chëngbeñe tsiyenama, bobontse sënjamna orscana, atše sënjanonýná luarentše y Jerusalenentše. ⁵ Chëngnaca mondétatšëmbo y montsobena jayanana, chënga tmojtsebošëse, chca ndegombre yomnana; atše nyets tempo fariseucá vida sëndbomna, y chë fariseunga mondoyena más soyënga jtsamëse chë judiëngbe leyëngaca chë inye judiëngbiana. ⁶ Y mora, ntšamo Bëngbe Bëtsá bëngbe bëts taitanga tojanašebuachenacá, chë obanënga jtayenama cha yochjamama puerta jtsošbuáchiyëse atše obatmana causa, šmojuánatse atšbe contra jayanama. ⁷ Bëngbe bnëtsana uta Israeloca bëts pamállanga mondobátmana chë šbuachenana soye chëngbiana chaóshjanguama y chíyeca, cada te bnëtë y íbeta chënga Bëngbe Bëtsá mondadorana y mondësverena. Y atše cach soyama obatmana causa, bëts rey Agripa, judiënga mora atšbe contra montsabíchamo. ⁸ ¿Ndáyeca tšëngaftanga judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

Pablo tojanacuntá, ntšamo tempo cha Jesucristbeñe ošbuáchiyënga yojanaborlánama

9 “Y cach átsnaca sënjanjuabná atše šojamna lempe ntšamo stjobenacá jamana, Jesús chë Nazaretocábeñe ošbuáchiyënga corente chamosufrima,¹⁰ y chca Jerusalenentše atše sënjanma. Chë bachnangbe amëndayënga mando šmonjanatšetá, y chca, banga Jesucristbeñe ošbuáchiyënga cárceloye sënjanëtame; y jtsëbáyama ca chëngbiamá montsanichamo ora, átsnaca aíñe chca chamorma ca sënjánichamo.¹¹ Y ba soye, chë judiëngbe enefjuana yebnënguenache jabuache chënga sënjanatsetšená, chënga Jesucristo ústonana chamotsajbanama, y chëngaftaca tša etonaná sënjetsemna causa, chë inye luarëngoca bëts publënguenáchnaca chënga sënjanëcamena.”

Pablo tojanacuntá ntšamo cha Jesucristbeñe ošbuachiyá tojanóbema (Hch 9.1-19; 22.6-16)

¹² “Y cachá jamana canye te Damascoye sënjetsaye; chë bachnangbe amëndayënga uabemanëchangá šmonjanëntšabuaché chca jamama y, cachënga choye šmonjanichmó.¹³ Pero, uámana rey, chë benachëjana mo njetsto ora, sënjáninye canye bëts tcuinye celocana, shinýama corente más enjëtsebinýnaye, y atše y chë átseftaca ajnëngbe shëconana corente enjëtsebuashinýinýana.¹⁴ Nýetscanga fsënjánshajaye y atše sënjanuena canye oyebuambnayana, hebreo biyañe, mëntšá šonjetsatsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsoscunjá orcá, cachá jenótsetšenana ca.’¹⁵ As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca.’¹⁶ Pero matëtsbaná y matëtsá. Atše cbonjébëbocna jinýinýiyama aca tbojuábuayanama atše šcochjasérviamá, y chacotsetatšëmbuama y entšanga chacuacuntama, mora tconjinye soyama y más chcoye atšbiama cbochanjinýinýiye soyëngámna.¹⁷ Atše chanjama judiënga y ndoñe judiënga tondaye chacmondëborlama; y morna, ndoñe judiëngbiyoe cbontsichamná,¹⁸ chënga atšbe soyëngama josértama aca chacomama. Chca, chënga bacna juabnënga ndoñe chamondëtsebomna, mo ibetiñe cuaftsemnëngcá, sinó mo binýniñcá chamotsemna átseftaca, atše chë entsangbe juabnënga binýnayá. Satanasbe cucuatšifne ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebomnama canye luare entšángaftaca, chë ndëmuanyëngbiyoe Bëngbe Bëtsá tšabe entšanga y chabe entšanga tojabiamá, chënga átšbeñe betsošbuáchiyama ca’ ” —cha šonjanianá.

Pablo tojanma ntšamo chë mo otjenayoquëcá tojaninýcá

¹⁹ “Chcasna, bëts rey Agripa, atše sënjanma chë mo otjenayoquëcá sënjáninye ora ntšamo Cristo šonjaniancá;²⁰ y natsana, Damascoca entšanga chë tšabe noticiëngama sënjanabuayená; chentšana, Jerusalemocquënga y nýetsca chë Judea luarocquënga y ndoñe judiëngnaca; chënga sënjánaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinýinýiyama chca ndegombre tmojanmama.²¹ Chca sënjánama causa, judiënga Bëngbe Bëtsabe bëts yebnocá šmonjanishache y tmonjánbošena atše

jtsóbana. ²² Pero Bëngbe Bëtsá sempre šonduájabuachana, y chca, cada te mëntscoñama, nyëtscanga Bëngbe Bëtsabiana sëndabuayiná, uámanëngbioye y nduámanëngbioynaca; nye ntšamo Moisés y Bëngbe Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inyëtsá ndoñe. ²³ Chënga tmonjánayana: 'Bëngbe Bëtsabe Uámana Uabuayaná, Cristo jóbanama bontsemna; pero chaojóbanentsana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatsëmbo nyëtscanga chábeñe tmojtsošbuáchenga atsebácanënga mochtsemnana ca.' "

Pablo tojanma rey Agrípbioye jáyëñjanama, Jesucristbeñe ošbuachiyá chaóbemama

²⁴ Pablo, cachá jenëuyanama chë soyënga tojánayana ora, Festo mëntsá tojanáyebuachena: —¡Pablo, opá cojtsóbema! Yapa ualíaye causa, opá tcojtsóbema ca.

²⁵ Pero Pablo tbojanjuá: —Opá ndoñe quetsásmëna, bëts uámana Festo; inyëtsá entsemna; atše sëntsoyebuambná nyëts juábnaca, y ndegombre soyënga. ²⁶ Chentše rey Agripa entsuenana, y cha puerte tšabá chë soyëngama endétatsëmbo, chíyeca, tondayama ntjatauajcá, atše chabe delante sëntsoyebuambná; atše corente sëndétatsëmbo chánaca chë soyëngama yotatsëmbuama, er ndayá Jesús tojanmcá, ndoñe tonjopasá ndaye iytëmena chaboye. ²⁷ Bëts rey Agripa, ¿Bëngbe Bëtsabe juabna oyebuambnayënga tmojánayana soyënguifë aca quecošbuaché? Atše sëntsetatsëmbo aifë chiñe cošbuáchema ca —Pablo tbojaniana.

²⁸ Chora Agripa tbojanjuá: —Batšatema más y mašcjayëñjaná Jesucristbe ustoná atše jóbemama ca.

²⁹ As Pablo tojánayana: —Nye batšatema más o bëts cama más, atše Bëngbe Bëtsá sëntseimpadana, ndoñe nye bëndatbe barie, sinó nyëtscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondëtsemna, ntšamo mora atše sëntsemncá ca.

³⁰ Chorna, chë rey, chë mandado, Berenice y chë chëngaftaca imojantbiámanënga tmojantsbaná, ³¹ y luaroye tmojána chë soyama jencuëntama. Mëntsá imojtsichamo: —Quem boyabása ndocna bacna soye tonjama jóbanama chabotsemnana, ni mo utamená jtsemnana ndoñe quebnátsmëna ca.

³² Y Agripa Féstbioye tbojaniana: —Chë Romoca bëts mandado, quem chabe soyama cháuyanama cachá ndoñe matëñjábosenëse, bënga matmëñjobená quem boyabása jëtsboshjonama ca.

27

Roma bëts puebløye Pablo tmojanichmó

¹ Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inye utámenënga Julio ca uabainabe cucuatšifë tmonjánabashejuana. Julio enjamna canya chë Romoca bëts mandadbe soldadënguentša mandayá. ² Asna, fsëñjánasëngo canyë Adramitio puebløca barcuifë; ya chë Asioca bëts pueblëngoye juama enjëtsemna. Cesarea pueblentsana fsëñjánbocna y Aristárncaca bëngaftaca enjëtsemna; cha enjamna Tesalónica bëts puebløcá, Macedonia luaroca.

³ Chë inÿe yëfsana, Sidón puebloye fsënjánashjajna. Chentše Julio, tsábá mandbomná Pábloftaca enjétsemna; tbonjanlesenciá chabe amiguëngbloye chauabuáchama, chënga chamofjama y chamóbocuedama. ⁴ Sidonocana fsënjëftsanbocnentsana, bëngbe contra corente enjétsebinÿiaye. Chíyeca, Chipre fshantsënga catsbioicajana, ndoñe yapa quentétsebinÿiayëjana bënga fsënjána. ⁵ Cilicia y Panfilia luarënga béconana mar bejaycá fsënjánachnëngo, y Mira bëtš puebloye fsënjánashjajna, Licia luaroca.

⁶ Chë soldadëngbe amëndayá, canÿe Alejandría puebloca barco chentše tonjáninÿena, Italia luaroye yojétsaye; asna, šonjanamëndá chë barcuinë jenójayiyana. ⁷ Baseftaytentscuana uenana fsënjánana y pordonto fsënjánobená Gnido pueblentsa ndirichiñe jashjanguana. Cabá bëngbe contra enjétsebinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentétsebinÿiayëjana. ⁸ Y chca, pordonto bejaycá fsënjánana, fshantsënga béconana; chentšana, canÿe pueblo, Tsabe Puertënga ca uabáinentše fsënjánashjajna, Lasea ca uabaina pueblo béconana.

⁹ Chca, bayté tonjanochnëngo y chora chë bejaycá jama puerte resjo enjétsemna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuperdonama, y chora chë uaftena tempo joshjanguama ya enjétsobeco.

¹⁰ Chíyeca Pablo chë entsanga mëntsá tonjanabuayená: “Baconga, atše šontsinÿana mora puerte resjo entsemna bejaycá játama, y ndoñe tsábá queochátsmëna, ni chë uasmanëshangama, ni chë barcuama y bëngbiama cach ndoñe, mo nderado muanjanóbana ca.”

¹¹ Pero chë soldadëngbe amëndayá Páblëbloye ndoñe ntjoyeunayana; más, chë barcuentsa mandayá y chë barco nduñbloye aiñe. ¹² Ndoñe tsábá yonjamna, chë barco chora enjétsemnentše chë uaftena tempëntsacuana jëftsemnana; chë causa, nÿa mo nÿetscanga tmonjanenoyeuná cachiñe bejaycá chentšana játama, nderado cuanjobenaye Fenice puebloye jashjanguama y chentše jëftsemnana chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinÿe endbetsenatjëmbambana juachoica tsjuanoicajana y tsmanoicajana.

Mar béjayiñe puerte uaftena y binÿia tojanóshjango

¹³ Chentšana tonjanontsé tsmanoicana batsá binÿiayana, chíyeca chë entsanga tmonjanjuabó ya yojtsanopodena jtëtóntsana jama ca. As, chentšana fsënjëftsanbocna y bejaycá fsënjána, Creta fshantsënga beconanëjana. ¹⁴ Pero baseftayté chentšana, chë fshantsëngocana tonjanontsé corente jabuache binÿiayana y chë barquëshoye enjétsoshjajuana. Chë binÿia yojanabaina Nordeste binÿia ca. ¹⁵ Chë barcna nÿe chë binÿiëbe ponto tonjanontsé uayana; chë binÿia enjétsobayëjana jama ndoñe quentétsopodena causa, šonjanotocá nÿe ntšamo tojtsebinÿiacá chašúyambama. ¹⁶ Chentšana fsënjánachnëjna Cauda ca uabaina stëtsoicajana, base fshantsënga mar béjayoca; chiñe ya ndoñe tša jabuache quentétsebinÿiaye y pordonto fsënjánobená buyeshoicana jtabocnana chë barco enjanasjá canouše, ndoñe chaondëtsónbemama. ¹⁷ Ya chë barquëshoye fsëntanëšëngo orna, chë entsanga lazëjangaca chë barquëshá tmonsanabatsécaca, más uamorochësha chaotsamnana. Pero chënga monjétsauatja nderado

chë barco chë Sirte ca uabaina cascajuentše nanjetsánjua; asna, chë barcuentsa ancla tmonjanashëbëútsena, chë barco ndoñe betsco chaondëtsábonjnama, y ntšamo enjetsanbinÿiaycá fsënjána. ¹⁸ Chë inÿe yëfsana y chë binÿiayana cabá jabuache enjëtsemna causa, chënga tmonjanontsé chë barcuentsa uasmanëshangá jtsëshbuëtsetšana; ¹⁹ y unga tianoye bëngnaca šonjanotocá, cach bëngbe cucuátseca, chë barcuentsa soyënga buyeshoye jtsëtšanana. ²⁰ Baytentscuana bënga ndoñe chibiatanobená jinÿana ni shinÿe, ni estrellatémënga, tša tonjëtseibetata causa; y tša jabuache enjëtsebinÿiaye causa, bënga ya ndoñe quefstëtsanobatmana chentšana jótsbocana.

²¹ Ya bayté enjëtsemna y chëntscuana tondaye saná ntjascá fsënjëtsemna. Chentšana, Pablo bëngbe tsëntsaca tonjantsá y tonjánayana: “Baconga, tšabá manjamna atše mašmënjanoyeuná y Creta luarocana ndoñe matmënjëtfsanbocna; chca mora ndoñe mal mamojtsepasá y ndoñe nÿa nÿetsá matmënjobuëtše. ²² Pero mora ngmënaca ndoñe matsmëñëngana; masque chë barco echantsenatjëmbe, tšëngaftanguentšá ndocná queochatóbana. ²³ Ibeta canÿe ángel šonjébëbocna; Bëngbe Bëtsá, ndabia atše sëndmëna y nda sëndëserveda, cha tbojichmó; ²⁴ y chë ángel mëntšá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nÿetsa quem barcuñe ajnënga jobanámentšana cha echanjatsebacá ca.’ ²⁵ Chcasna, baconga, ndoñe matauatjëngana, er atše Bëngbe Bëtsábeñe corente sëntsošbuache y lempe ntšamo chë ángel šonjauyancá echanjóbcna. ²⁶ Pero mora entseyta canÿe fshantse mar béjayiñe chašúshejanguama ca” —cha tonjanëyana.

²⁷ Canÿe ibeta, uta semana fsënjánana chentšana chë Adriático ca uabaina mar béjayiñe fsënjëtsemna, y nÿe inÿoye y inÿoye chë binÿia šonjëtšëyambaye. Y mo tsëntseto yojëtsemna orna, chë barcuentsa trabájayënga tmojanjuabó ya fshantse béconana imojëtsemna ca. ²⁸ As chënga tmonjanmedidá ntsachetšá chë búyeshe buatjoye inamnama y tonjanóbocna unga bnëtsana y chnënguana metro; más chcoye cachiñe tmonjanmedidá y uta bnëtsana canÿsëfta metro tonjanóbocna. ²⁹ Chënga monjétsauatja nderado bëts ndëtšbéngaca nanjetsántšëtjijama; asna, chë barco stëtšoiçajana canta ancla buyeshoye tmonjanashëbëútsena, chë barco ndoñe más chaondëtsábonjnama, y tša monjëtseboše betsco chaobínÿnama. ³⁰ Chëntscuana, chë barcuentsa trabájayënga tmojánbošena chentšana jtsachetana; chamna, chënga tmojanontsé chë canouše buyeshoye justjanguana, pero chca imojétsama, mo chë anclënga chë barco natsanoica cuaftšëstjajuancá. ³¹ Pero Pablo chë soye tojáninÿe, y chë soldadëngbe amëndayábioye y chë soldadëngbioye tonjanená y mëntšá tonjanëyana: “Chë barcuentsa trabájayënga cach quem barcuentsë ndoñe chamonjoquedase, tšëngaftanga ndoñe quešmochatobenaye muentšana jótsbocama ca.”

³² As, chë soldadënga tmonjána y chë canoušentsa lazëjënga tmontsantëtsetše y buyeshoye chëse tmontsantsatše.

³³ Enjëtsebinÿana ora, Pablo nÿetscanga tonjanaimpadá ndayánaca chamosëngama, mëntšá jáuyanëse: “Ya uta semana entsemna y tšëngaftanga ni mo batšatema chešmatamaná, y tondaye chešmatsbmuangana. ³⁴ Diosmanda, masque nÿe mo batšatémnaca

šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

³⁵ Pablo, chca tonjánayanentšana, canýe tandëse tonjanca y nýetscangbe delante Bëngbe Bëtsábioye tbontanchuá. Chorna, tonjanjatá y tonjanontsé jasama. ³⁶ Chentšana nýetscanga tmonjanenñemó y chëngnaca tmonjanse. ³⁷ (Chë barcuentše nýetscanga fsënjamna uta patse y canýséfta bnëtsana y chnënguanënga.) ³⁸ Ntšamo imnabošcá tmonjansentšana, buyeshoye trigo tmontsanashaná, chca, chë barco ndoñe yapa chaondëtsautama.

Chë barco tojtsanenatjëmba

³⁹ Ya tonjanbinýna ora, chë barcuentša trabájayënga ndoñe quemëntétsetatšëmbo ndaye fshantse chentše bëtsemnama, pero tmonjáninýe chë fshantsentše canýe luare jachañe, chë béjaye chë luaroye omashjuanentše, y chiñe canýe chënyañe enjamna; as chënga tmonjanjuabó jarrepárana nderado cuanjobenaye chëjana chë barco chë fshantsoye juyambana. ⁴⁰ Asna, chë anclentša lazëjënga tmontsantëtsetše y chë anclënga buyeshoye tmontsanboshjuana, y chë timón, chë barco juyambama oservena soyentša uabatsëcnëjëngnaca tmontsanjafjoná. Chorna, chë barcuentša natsanoica niñëšiñe entšëjua tsbanánoye tmontanëšëngo, y chë binýia tonjanma chë barco chaontsé chë chënyoye juabéconama. ⁴¹ Pero chë barco canýe luaroye tonjánashjango, y chentše chë béjaye catatoicajana enjetsobuá y chë barco cánýentše, bëtscá cascajo buyeshiñe binýnentše tontsanajo. Chë barcuentša natsanoica lado chë cascajuiñe entsanajuena, ndócnoye juabónjuama ntsopodencá, y chë stëtsoica lado puerte entsanashatiyiná y lempe entsanandbiamná, yapa binýia causa y búyeshe chentše enjëtsojantšetaye causa.

⁴² Chora, chë soldadënga tmonjanjuabó chë utámenënga jtsëbáyana, jachbabëse chënga ndoñe chamondëtsachetama. ⁴³ Pero chë soldadëngbe amëndayá inaboše Pablo jatsbocama, y chíyeca chë soldadëngbioye ndoñe chenatanalesenciá chca jamana; y tojanmandá nýetscanga chë jachbabama obenëngna natsana chë buyeshoye joshbuetšana tsachoye chamuashjanguama, ⁴⁴ y chë inýengna tablëshënguiñe o chë barcuentša pedazënguiñe chamoshbuetšama. Y chca, nýetscanga fsënjano bená tšabá y ndocá ntjapasacá fshantsoye jashjanguama.

28

Pablo Malta luaroca

¹ Ya nýetscanga fshantsoca tšabá fsënjëtsemna ora; fsënjántatsëmbona chë luare Malta ca yojanabaina. ² Chë luarentša entšanga bëngaftaca corente tšabá mándbomnënga monjëtsemna; canýe íñeshe tmonjanangbotjó y šonjanëbuaja choca bënga jatóšboniyama, er tša enjëtsoftena y yapa enjëtssesëсна. ³ Pablo tojanatbaná básefta buashana chamesëfjënga y chë íñeshoye enjëtsseshacjnaye ora, canýe mëtscuaye tojánbocna y enjët-sachaye, chentše yapa obonýaye causa, y Páblëbe cucuatšiñe tontsanonjonýá. ⁴ Chë luarentša entšanga, chë mëtscuaye Páblëbe cucuatšiñe yojtsajonýanama tmonjáninýe ora, monjëtssensatsëtsnaye: “Quem boyabása

ndegombre inÿa obanayá cuanmëna; mar béjayoca jobanámentšana tojotsbocá, pero chca uamana causa, diosá Justicia ndoñe quebnatsleséncia cha vida chaotsebomnama ca.”

⁵ Pero Pablo tontsanenacuestëtoná y íñeshoye chë mëtšcuaye tbontsantsatše y Pablo ndocá chenatanpasá. ⁶ Chë entsanga imojëtsejuabnaye chábioye bochtsacuefshachá y nÿe ndeolpe obaná yochjashajaye ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntëtsanjuabnaye y tmonjanontsé ichámuana Pablo canÿe dios inamna ca.

⁷ Chentša béconana inamna chë luarentša mandayabe fshantsënga. Cha šonjanëbuaja y corente tšabá šonjanacuedá, unga tentscuana. Chë taitana Publio ca inauabaina. ⁸ Chë tempo, Públiëbe taitá šocá jutšnëshañe inajájona, calentóraca y buñeca buamachnëjuanáca. Pablo tonjána cha jinÿama y tonjánamashëngo; Bëngbe Bëtsábioye tbonjanimpadá y chë šocábeñe chabe cucuatšënga tonjanajó, y chca, cha shnaná enjëtšatsmëna. ⁹ Chca tonjanopasá chentšana, chë luarentša inÿe šoquënga Páblëbioye monjánajna y cha enjánashnaye. ¹⁰ Bëtscá tšabe soyënga chentše bëngbiana tmonjanma, y cachiñe játama ya chë barcuñe fsëntanenojayenga orna, lempe ntšamo bejaycá jama šonjanëjbotcá chënga šonjanatšatá.

Pablo Romoye tojánashjango

¹¹ Chë fshantsentše mar béjayoca unga ishinÿe fsënjëftsemna, y chentšana canÿe Alejandriocana yojanabá barcuñe fsënjanojayé; chë barco nÿets uaftena tempo chë luarentše yojëftsamna y enjanabaina Cástor y Pólux ca, mo chë romanëngbe uta diosata catšatcá. ¹² Chentšana, Siracusa bëts puebloye fsënjánashjajna y chentše unga te fsënjëftsemna; ¹³ y chentšana fshantse béconana bejaycá fsënjána, Regio puebloye jashjanguëntscuana. Yëfsana, tsmanoicana tsjuanoye enjëtsebinÿiaye, y chca, chë inÿe yëfsana Puteoli puebloye fsënjánashjajna. ¹⁴ Chentše básefta Jesucristbeñe ošbuáchiyënga fsënjánanÿena, y šonjanëbuaja chëngaftaca canÿe semana chentše jëftsajëtanama; y chentšana Romoye fsënjëftsambocna. ¹⁵ Romoca Jesucristbeñe ošbuáchiyënga ya imojëtsetatšëmbo bënga choye fchjanashjajnama; chcasna, chënga tmonjánbocna bënga jajëbenguama canÿe luare Foro del Apio y Unga Tabernënga ca uabainóntscóñe. Pablo chënga tonjánanÿe ora, Bëngbe Bëtsá tbontanchuá y puerte añémoca enjëtsemna. ¹⁶ Romoye fsënjánashjajna ora, soldadëngbe amëndayá Páblëbioye tbonjalesenciá cánÿabe yebnentše chaotsiyenama, y tonjanmandá canÿe soldado chabotsebojanÿama.

Ndayá Pablo Romoca tojanma

¹⁷ Choye fsënjánashjajnentšana unga tianoye, Pablo tonjanmandá chentše inmoyena judiënga más uámanënga chamobëconama; y nÿetscanga ya tmojánenefjna ora, cha tojanëyana: —Catšátanga judiënga, masque atše tondaye chiyatsma bënga judiënga mondbëtsama soyëngama contra, ni bëngbe bëts taitanga imojanamana soyëngama contra, judiënga Jerusalenoca šmonjanishache y romanëngbe cucuatšñe šmonjánboshjona. ¹⁸ Chë romanënga lempe šmonjantjá chentšana, monjëtseboše atše jëtsboshjonana, er ndocna bacna soye chemátaninÿena atše jóbana chašotsemnama. ¹⁹ Pero chë judiënga ndoñe quemëtseboše atše chašmuatsboshjonama; chíyeca, šonjanotocá jáimpadana cach

Romoca bëts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entsanga, judiëngbe contra jayanama. ²⁰ Chiyeca, atše tcbonjúbuaja jányama y jáuyanama, er ndayama chë Israeloca entsanga puerte jtsošbuáchiyëse mondobátmanama, chë obanënga mochtayenama, atše mora utamená sëntsemna ca—tojanëyana.

²¹ Chora chënga tmojanianyana: —Bënga ni mo canyë tsbuanácha Judeocana fchiyatáyëngaca acbiama noticiëngaca, y ni canyë catšata judío, chocana moye ashjajnënguentšá, ndocna bacna soye acbiama chešnatacuntá. ²² Bënga fsëntseboše jouenana ntšamo aca cojuabnama, er ntšamo Jesucristbe ustonëngbiama fstsétatšëmbcá, entsemna ana nyëts luarenache chëngbe contra entsanga imojtsichamo ca.

²³ Asna, canyë tescama Pablo tmojanianyana chca chaotsemnana; y chë tena, ba entsanga chë Pablo posada inabomnoye tmojanobeconá. Y cachëscana tojanjétanëntscuana, Pablo entsanga yojanëtsëtsná Bëngbe Bëtsabe amëndayama, ndayama cha ininÿe y inatátšëmbo; y yojtsentšena chënga jáyëñjanama Jesúsbeñe chamotsošbuáchema, Moisesbe leyënguentša soyëngaca y Bëngbe Bëtsabe juabna oyebuambnayëngbe uabemana librëšangañe soyëngaca. ²⁴ Báseftanga aíñe imojtsošbuáchiye ntšamo Pablo yojtsanëtsëtsnacá ndegombre bëtsemnana, pero ínÿengna ndoñe. ²⁵ Nyëtscanga ndoñe cachcá montsanjuabnaye causa, tmojanontšé chentšana jësebocanana. As Pablo tojanëyana: “Nyëts razónaca chë Uámana Espíritu tšëngaftangbe taitanga tojanëyana, Bëngbe Bëtsabe juabna oyebuambnayá Isaiásbiajana, mëntšá:

²⁶ Motsa chë entsanga jauyanama:

‘Bëtscá šmochantsuenana, pero tondaye quecmochátësertana; tša šmochantsafšna, pero tondaye quešmochátinÿe.

²⁷ Muentša entsanga ainánaca josértama ndoñe quemátsboše causa, chënga nduauenanënga montsemna y nduabinÿnëngnaca; chënga bomínÿeca ndoñe chamondobená jinÿama, ni chëngbe matscuašeca jouenama, ni chëngbe ainánaca josértama ndoñe chamondobená, chca, atšbe benache ndoñe chamondishachama, atše ndoñe ntjätsebacama ca.’ ”

²⁸ Pablo chora mëntšá tojanëyana: “Ndegombre šmochtsetátšëmbo, cach quem Bëngbe Bëtsabe buayenana soyënga entsanga bacna soyënguentšana játsëbacama, chë ndoñe judiëngbiyoye mochanjábuayenaye, y ndegombre chënga cocayé aíñe mochanjóyeunaye ca.” ²⁹ (Pablo chca tojánayana ora, chë judiënga chentšana imojjësebocana y tša imojtsenatsëtsnaye.)

³⁰ Pablo uta uata chentšë tonjanoquedá canyë uántšamena yebnentšë; y nyëtscanga cha jauatsëtsayama monjánajnënga cha enjanëbuájajana. ³¹ Nyëtscangbe delante puerte añémoca entsanga enjanabuayiyná Bëngbe Bëtsabe amëndayama, y enjanabuatambá soyënga Bëngbe Utabná Jesucristbiamana, y ndocna Romoca mandayá quebëñjatanauyá chca jtsamama.

Romanos

Pablo Romoca ošbuáchiyënga jacheuayama

¹ Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

² Ya bayté entsemna, Bëngbe Bëtsá chabe juabna oyebuambnayëngaftaca chë tšabe noticiënga entšanga tojanašebuachená, y chënga chca tmojëftsanábema Bëngbe Bëtsabe uabemana palabrénguifne. ³⁻⁴ Chë tšabe noticiëngna, chabe Uaquiñá Bëngbe Utabná Jesucristbiamna jtsóyebuambnayana. Entšá quetsomñecana, tojanonýná canýe rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyé Jesucristo chabe Uaquiñá bëtsemnama. Cha chca tojaninýanyé chë Uaquiñá cháuatayenama cha tojanma ora.

⁵ Chábeyeca, Bëngbe Bëtsá atše canýe bëtš soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nýets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama. ⁶⁻⁷ Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýenga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiamna sentsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chémbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebomnama.

Pablo tša inaboše Roma bëtš puebløye jama

⁸ Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentšabiamna, er nýets quem luariñe entšanga tša monjesoyebuambná tšëngaftanga Jesucristbeñe bëtšcá šmojtsošbuáchema. ⁹ Bëngbe Bëtsá, nda nýets ainánaca sëndëserveda, tšabe noticiënga chabe Uaquiñabiamna abuayinayifne, endétatšëmbo atše nýets tempo Bëngbe Bëtsáftaca stencuénta ora, tšëngaftangbiamna sëndétseimpadanama; ¹⁰ y mora Bëngbe Bëtsá sëntseimpadana, nýa mora y cha tojtsebošese, chašolesenciá jama tšëngaftanga jautsëtsayama. ¹¹ Er atše tša sënýéseboše tšëngaftanga jányama, chca, atše chayobená jamama chë Uámana Espíritbentšana yóbocana tšabe soyënga tšëngaftanga chašmotsebomnama; y chca, tšëngaftanga ainaniñe bëtš añemo chašmotsebomnama, y Jesucristbeñe corente chašmotsošbuáchema; ¹² o más tšabá jayanamna, tšëngaftanga y átšeftaca mochjenájabuache ainaniñe bëtš añemo jtsebomnama, tšëngaftanga y átšnaca Jesucristbeñe tša imošbuachéyeca.

¹³ Y morna, Jesucristbeyeca catšátanga, sëntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero mëntscoñama ndoñe tsjobenaye. Atše sëntseboše ndayá chayobená jamana inýenga tšëngaftangbioca Jesucristbeñe chamotsošbuáchema, ntšamo inýengbeñe ndoñe judiëngbeñe tonjopasacá. ¹⁴ Atše Jesucristbiamna canýe oservená sëndmëna, y

chíyeca nyetscángaftaca obligaciúnaca séntsemna, chë pueblënguifne oyenëngaftaca y bën tjoye oyenëngaftaca, chë uatsjinýenëngaftaca y ndoñe chcangaftácnaca. ¹⁵ Chíyeca atše tša séntseboše tšëngaftanga chë Romoca šmoyenëngnaca chë tšabe noticiënga jábuayenama.

Chë tšabe noticiënga Bëngbe Bëtsabe obenana jtsinýanýnáyana

¹⁶ Atše ndoñe quetsátëuatja chë tšabe noticiënga jtsabuayinayama, er chë noticiënga jtsinýanýnáyana Bëngbe Bëtsabe obenana; y chë obenánaca, nyetscanga Jesucristbeñe ošbuáchiyënga jtsobenana atsebácanënga jtsemnama, natsana chë judiënga chca ošbuáchiyënga, pero chë ndoñe judiëngnaca. ¹⁷ Er chë tšabe noticiënga jtsinýanýnáyana ntšamo Bëngbe Bëtsá inétsama entšanga chabe bominýiñe tšábenga chamotsemnama. Y entšanga chabe bominýiñe tšábenga jábiamana, chënga Jesucristbeñe tmojtsošbuáchema. Ntšamo Bëngbe Bëtsabe uabemana palabrënguifne endayanca: “Nýe ndabiama Bëngbe Bëtsá tojama chabe bominýiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebojna ca.”

Bëngbe Bëtsabe delante nyetscanga culpa bomnënga mondmëna

¹⁸ Bëngbe Bëtsá celocana tojinýanýe, chë uabouana castigo, tša tbojetnama entšangbiamana chaotsemnama, ainaniñe bacna juabnënga bomnëngbiamana y chë bacna soyënga amëngbiamana y ndëmuanyëngbiamana, masque Bëngbe Bëtsabe ndegombre soyënga jtsotatsëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá. ¹⁹ Bëngbe Bëtsá echanjácastigaye, er ntšamo entšanga imobencá Bëngbe Bëtsabiamana jtsetatsëmbuama soye, chëngaftaca sempre endésemna. Y chca endmëna, Bëngbe Bëtsá chë soye tojinýanýeyeca. ²⁰ Bëngbe Bëtsá quem luare tojanma orscana, entšanga mondetsobena botamana josértana, Bëngbe Bëtsabe obenana ndocna te yochjëtsopochócama y cha ndegombre Bëngbe Bëtsá yomnama. Chë soyënga Bëngbe Bëtsabiamana entšanga quemúatobena jinýana; nýe jtsetatsëmbuamna aíñe. Entšanga mondobena chë soyënga Bëngbe Bëtsabiamana jtsetatsëmbuana, cachá tojanma soyëngaca. Chcasna, chënga ndoñe quemátobena jayanana bacna soye tmojama, cha nduabatma causa ca. ²¹ Chënga Bëngbe Bëtsabiamana mondëtatšëmbo, pero ndoñe ntsebošana chábioye jádórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnëngaca y bacna juabnëngaca montsiyena, y chca, chënga montsiyena, jtsamëse ntšamo cachëngbe juabnënga yomncá, mo ibetiñe cuaftsajncá. ²² Chënga jtsichámuana corente osertánënga imomna ca, pero ndegombrna juabna ndbomnënga mondmëna. ²³ Chënga ndoñe ntsadoránana Bëngbe Bëtsá, chë ndocna te yochjëtsobaná; chë cuenta, soyënga tmojobopormá mo entšangcá, y chëngna aíñe jóbanana; o soyënga shloftšëngcá o bayëngcá, o osjojnayëngcá, y chënga diosënga imomna ca jtsejuabnayëse jtsadoránana.

²⁴ Chíyeca, Bëngbe Bëtsá cachcá tojónýa, cachëngbe ainaniñe puerte bacna juabnëngaca mandánënga chamotsiyenama, y chca, bacna soyëngnaca ínýengaftaca imojtsama; chë soyëngamna jtsëuatjana chënga entsamna. ²⁵ Chënga chca jtsemnana, er ndoñe tmonjábošena Bëngbe Bëtsabe ndegombre soyënguifne jtsošbuáchiyana, pero chë ndoñe ndegombre soyënguifne cocayé jtsošbuáchiyana; chënga jtsadoránana

y jtseservénana, Bèngbe Bètsá quem luarentše tojama soyènga; pero ndoñe ntsadoránana, ni ntseservénana cach Bèngbe Bètsá, chë nyetsca chë soyènga tojaná. Entšanga nyets tempo cha chamotsatschuaná. Chca chaotsemna.

²⁶ Entšanga chca ndoñe tšabá tmonjámayeca, Bèngbe Bètsá cachcá tojónya, chënga ínÿengaftaca bacna soyènga jtsamama chamotsebošama; chë soyèngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyènga jtsamama. ²⁷ Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyènga jtsamama. Chënga chë inÿe boyabásengaftaca bacna soyènga imojtsama causa, entsamna jtsëuatjana, y chë soyèngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyèngama yojtsëmerecencá.

²⁸ Chënga ndoñe tmonjábošena jtsiyenana jtsejuabnayëse, ntšamo entšanga Bèngbe Bètsabiana imotatšëmbcá ndegombre bëtsemnana. Chíyeca Bèngbe Bètsá cachcá tojónya, cachëngbe ndbémana juábnaca chamotsiyenama; y chca, chënga ba soyènga jtsamana, jamama ndoñe yontsamncá. ²⁹ Chënga nyetscna bacna soye jtsamana: ainaniñe nyetscna bacna juabna jtsebomnana, nÿe cachëngbiama bëtscá soyènga jtsebomnana tša jésebošana, y ínÿengbioye ntšámnaca jáborlama jtsebošana; chënga nÿe játsbošana inÿa tojtsebomna soyènga jtsebomnana, ínÿenga jtsébánayana. Mondmëna penzenterënga, ínÿenga ángñayënga, puerte bacna soyènga ínÿengbiama bošënga, y uayátsenayënga. ³⁰ Chënga ínÿengbiama podesca jtsóyebuambnayana, Bèngbe Bètsá jtsáyayana, ínÿenga jtsóyanguayana, nÿe cachëngbe soyènga más iuámana ca jésejuabnayana, tša jtšenábotamnayana, jésejuabnayana ntšamo muanjobenaye más bacna soyènga jamana; chëngbe bëtšëtsangbioye ndoñe ntsayaunanana. ³¹ Chënga ndoñe ntsebošana chë tšabe soyèngama chaósertama, tondayama palabra ndbomnënga, ndocnábioye ntsebobonshánana y ndocnabiana ntjóngmiana. ³² Y chënga corente mondëtatšëmbo chca soyènga amëngbiama, Bèngbe Bètsá chabe leyíne tojayana jóbanama yojtsëmerecena ca; pero masque chca, chënga nyets tempo chca jtsamana, y oyejuayënga jtsënyayana ínÿenga cachcá tmojtsama ora.

2

Bèngbe Bètsá echanjama chë ndoñe tšabe soye amënga bëtš castigo chamotsebomnana

¹ Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tšëngaftanga šmojama soyèngama. Tšëngaftanga chca ínÿengbiama šmojtsichamo ora, jtsinÿanÿnayana cach tšëngaftangnaca ndoñe tšabá šmonjamama, y castigánënga jtsemnana cmontsamna, er tšëngaftanga cachëngcá šmojtsiyena. ² Bënga mondëtatšëmbo, Bèngbe Bètsá ntšamo ndegombre yomncá inétsamama, chë chca amëngbiama ndoñe tšabá tmonjama ca y castigánënga jtsemnana yojtsamna ca cha tojayana ora. ³ Y tšëngaftanga, chë ínÿenga ndoñe tšabá montsama ca šmojtsichámënga, y cachca soyènga šmojtsama, ¿šmojatsjuabná Bèngbe Bètsabe castigüentšana šmochjotsbocá ca? ⁴ Bèngbe Bètsá tšëngaftangbiama

corente tšabe juabna endbomna; mora ndoñe quecmátacastigaye, y tšéngaftangafacta puerta uantado nñe chca endétsemna. ¿Chama tšéngaftanga cha šmojtsábotena? ¿Ndoñe šmondétatsēmo Bēngbe Bētsá chca corente jtsababuánñeshanēse cmojtsēñya, tšéngaftanga juabna chašmotrocama y chabe benache chašmuishachama cha yobóseyeca? ⁵ Er tšéngaftanga ndoñe quešmátsboše chacmotsēsertánama, y bacna soyēnga amama jtsajbanama ndoñe quešmátsboše causa, šmontsama más bēts castigo chašmotsebomnama, chē ndayté Bēngbe Bētsá ntšamo entšanga tmojamcá tšabá o ndoñe tšabá bétsemnama yochjayana ora; chē te, Bēngbe Bētsá echanjamánda chē ndoñe tšabe soye amēnga bēts castigo chamotsebomnama, y chē tšabe soye amēngna, uacanana soye; y chca echanjama ntšamo ndegombre yomncá, y echanjñyanñiye cha tša tbojetna, entšanga ndoñe tšabá tmonjamama. ⁶ Chca, chē te, ntšamo cada ona tojéftsemama, Bēngbe Bētsábentšana echanjóyēngacñe. ⁷ Ndēmuanñyēnga nñets tempo tšabá jtsamēse imoyena, y chca imonguá Bēngbe Bētsá más uámanēnga chauabiamama, cha chēngbiamama tšabá chaotsoyebuambná y tšabe vida jtsebomnama chaoma; chē te chēngbiamama Bēngbe Bētsá echanjama, chē nñetsca tescama yomna tšabe vida chamotsebomnama. ⁸ Inñyēnga imoyena, nñe cachēngbe juabnēngaca cachēnga tšabá jtsomñiamama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bēngbe Bētsá chē te, ndoñe tšabá tmonjéftsobuachjanguamna puerta etonaná echanjayana nñetsca tescama castigánēnga jtsemnana chēnga yojtsamna ca. ⁹ Bēngbe Bētsá echanjama, chca amēngna puerta chamosufrima y lastemcá chēngbiamama chaotsemnana, er yapa tsetšénana chēngbiamama echanjéftsemna; chca echántsemna chē chcángbeñe judiēnga imomnēngbiamama natsana, y ndoñe judiēngbiámna. ¹⁰ Pero chē te, Bēngbe Bētsá echanjama, ntšamo tšabá yomncá amēngna puerta uámanēnga chamotsemnana, chēngbiamama corente tšabá echanjóyebuambaye, y echanjama chēnga cháftaca tšabá tempcá chamotsatsmēnamama; y chca echántsemna chē chcángbeñe judiēnga imomnēngbiamama natsana, pero ndoñe judiēngbiámna.

¹¹ Er Bēngbe Bētsabiamama nñetscanga cachcá monduámama. ¹² Chē Moisesbe ley ndoñe monduábomnēnga, bacna soye tmojamamna castigo mochántsebmoma, masque leyēnga ndoñe tmonduábomnēse, ndayá yojtsamna jamama chaúyanama; y chē Moisesbe leyēnga imuabomnēngbiamama, bacna soye tmojamama, Bēngbe Bētsá echanjayana chēnga ndoñe tšabá tmonjama ca y castigo chamotsebomna ca, chē leyēnguiñe iuayana soyēngaca. ¹³ Chca endmēna, er Bēngbe Bētsá ndoñe queonñbatsma entšanga chabe bominiñe tšábēnga chamotsemnana, nñe ntšamo chē leyiñe iuayancá tmojtsuenanama, sinó ntšamo leyēnguiñe iuayancá, ndayá jamama yojtsamncá tmojtsamēse. ¹⁴ Chē ndoñe judiēnga chca leyēnga ndoñe quematábomna, pero chēngbe ainanentša juabnēnga tojtsētsētsná ndayánaca jamana, y ndayá chamotsamama ntšamo chē leyēnguiñe tomandancá chēnga tmojamēse, chēnga jtsinñyanñayana tšabá imotátšēmo ndayá añe o ndoñe inétsamna jamama, masque leyēnga ndoñe tmonduábomnēse, ndayá yojtsamna jamama chaúyanama. ¹⁵ Ntšamo tmojtsiyencá chēnga jtsinñyanñayana, ndayá leyiñe yomandánama chēnga ainaniñe cachcá imojuabnama. Ntšamo chēnga ainaniñe imotátšēmo y

imojuabnacá ndayá cachënga tmojamama, jtsinÿanÿnayana chënga ntšamo chë leyiñe yomandánama cachcá imojuabnama. Inÿe ora, chëngbe juabnënga echantsëtsësnaye aiñe o ndoñe tšabá tmonjama ca; y ndayté, Bëngbe Bëtsá nÿetscangbiana ntšamo tmojamama yochjayana ora, cachëngbe ainaniñe tmojuabó soyëngaca, cha echanjínÿanÿiye ndayá tšabá o ndoñe tšabá tmonjamama. ¹⁶ Chë te, Bëngbe Bëtsá nÿetscangbiana echanjayana chëngbe juabnëngama y ntšamo tmojamama, ndayá entšanga tempo ndoñe tmonjánínÿama; cha chca echanjama Jesucrístoftaca; y chë atše sëndabuayiyiná tšabe noticiënga entsichamo ndegombre chca yochtsemnama.

Judiënga y Moisesbe ley

¹⁷ Y mora tsëngaftangbiana, chë judiënga šmomna ca ichámënga, y tša šmojtsejuabná Moisesbe léyeca tsëngaftanga tšabe vida jtsebomnama, y jtsenábotamnayana Bëngbe Bëtsabe ubuáyana entšanga šmomna ca; ¹⁸ tsëngaftanga chë ntšamo Bëngbe Bëtsá yobošcá tsëngaftanga chašmotsamama tatšëmbënga, y chë leyentšana šmojuatsjinÿe jobocacayana ndayá más tšabá jamama tojtsemncá. ¹⁹ Tsëngaftanga tša jësejuabnayana, šmobena ínÿenga chë ntšamo tsëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binÿniñcá oyenëngbe juabnënga binÿnayëngcá; ²⁰ tsëngaftanga jtsejuabnayana chë ntšamo tšabá yomncá ndosertánëngbiana abuayiyayënga šmomna ca, y mo chë basengcá tondaye nduatsjínÿenëngbiana abuátambayënga ca. Tsëngaftanga tša jësejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca. ²¹ Y chcasna, tsëngaftanga chë ínÿenga abuátambayënga, ¿ndáyeca ndoñe cach tsëngaftanga šmondëtsánatsana? Tsëngaftanga ínÿengbioye jtsabuayiyayana ndoñe chamondëtsatbëbanama; as, ¿ndáyeca cach tsëngaftanga šmnëtsatbëbana? ²² Tsëngaftanga jtsichámuana, acbe shema o boyábioye ndoñe ínÿaftaca cattseíngñaye ca; as, ¿ndáyeca tsëngaftanga cachcá šmnëtsama? Tsëngaftanga jtsáboyënjana soyënga chë ndayama ínÿenga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentsana uámana soyënga šmnëtsatbëbana? ²³ Tsëngaftanga tša jtsenábotamnayana chë ley šmobomnama; as, ¿ndáyeca šmonÿbétsama ínÿenga Bëngbe Bëtsabiana podësca chamotsóyebuambnama, tsëngaftanga chë leyentša mandënga jobedésama ndocna te ntsebošana causa? ²⁴ Chama, Bëngbe Bëtsabe uabemana palabrenguiñe mëntšá endayana: “Tsëngaftanga judiëngbe causa, ndoñe judiëngbeñe Bëngbe Bëtsabiana ndoñe tšabá quematoyebuambná ca.”

²⁵ Tsëngaftanga ntšamo leyiñe yomandancá šmojtsamëse, Bëngbe Bëtsábënga šmomnama jinÿanÿiyama, chë más delicadentse base bobachtema tëtšenënga jtsemnana tšabá nántsemna; pero ntšamo chiñe tomandancá ndoñe šmotsamëse, chca tëtšenënga jtsemnana, tondayama ntsošervénana, y chca, tsëngaftanga jtsemnana mo chë más delicadentse base bobachtema tëtëtšenëngcá. ²⁶ Y chë ndoñe judiënga chë más delicadentse base bobachtema tëtšenënga, judiëngcá ndoñe quemátsmëna; pero chënga ntšamo leyiñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entsangcá. ²⁷ Y chca, tsëngaftanga judiëngbiana Bëngbe Bëtsá echanjayana ndoñe

tšabá šmonjama ca, ntšamo leyíñe yomandancá ndoñe šmontsama causa. Cha chca echanjama, er bétscá ndoñe judiënga mondmëna y chënga ntšamo leyíñe yomandancá mondocumplina, pero chënga ndoñe quemátsmëna tšëngaftanga tétšenënga, jtsinýnama Bëngbe Bëtsábenga šmonnana. Tšëngaftanga, masque Bëngbe Bëtsabe uabemana ley šmonduábomna y chë más delicadentše base bobachtema tétšenënga šmondmëna, cabá ndoñe šmontsama ntšamo leyíñe iuayancá, ndayá jamama cmojtsamnama.

²⁸ Chcasna, nda chë más delicadentše base bobachtema tmojatëtše ora, chábioye chë soye ndoñe ntjábemana canye ndegombre judío. Y canye entsá ndoñe Bëngbe Bëtsábia ntsemnana nýe inýenga chë más delicadentše base bobachtema tmojatëtšama. ²⁹ Y canye entsá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entsá yomnana tojtsinýanýnase. Y chca, canye ndegombre judío, Bëngbe Bëtsabe entsá yomnana chaotsinýnamna ndoñe quenátsmëna chë más delicadentše base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínýnama. Bëngbe Bëtsabe Espiritu jamana entsá chca ainana chaotsebomnana, ndayá inétsinýanýnaye cha canye ndegombre judío yomnana; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entsábiamama ichamuá; entsanga ndoñe.

3

¹ Chcase, ndánaca šuatjatjaye, as ¿Bëngbe Bëtsabe entsá jtsemnana jëtsashjáchama, más tšabá yojtsemna canye judío jtsemnana ca? ¿Base bobachtema chë más delicadentše tétšená jtsemnana beca yojtsámama ca? ² Aíñe, chca jtsemnana corente enduámama y nýetsca soyënguiñe; natsana chjayana, Bëngbe Bëtsá, judiënga chabe palabra tojanabanýe, nýetscangbiamama chamotsinýenama. ³ Y morna, ¿ndayá yochjopása nderado judiënguentše báseftanga ya ndoñe chca tmontsentšënëse? Y chë causa, ¿Bëngbe Bëtsánaca yochtsajbaná ntšamo tojašebuachenacá amana? ⁴ ¡Ndoñe, ndegombre ndoñe! Chca ndoñe cha queochatsma; tšëngaftanga šmondétatšëmbo Bëngbe Bëtsá sempre endbëtsama ndayá jamama tojašebuachenacá, masque nýetsca entsanga bosterënga chamot-somñe. Er Bëngbe Bëtsabe uabemana palabrénguiñe Bëngbe Bëtsábiamama mëntšá endayana:

Aca ntšamo chacojayana ora, nýetscanga mochanjinýe aca ntšamo ndegombre yomncá cnétsamama;
y chacojtsenëuyaná ora, sempre cochanjínýanýiye acbe contra tmojtsoyebuambnángbioye, chënga ndoñe tšabá montsamama ca.

⁵ Pero bënga ndoñe tšabe soye montsama ca báseftanga tmojayana ora, Bëngbe Bëtsá sempre tšabá inétsamama entsanga más tšabá jinýama tmojtsoyebenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiamama castigo chaotsemna ca cha tojayana ora? (Morna atše sëntsoyebuambná ntšamo entsanga jóyebuambayama monduamancá.) ⁶ ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nýets tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nýetsca quem luarentša entsangbiamama, ntšamo tmojamcá tšabá o ndoñe tšabá bésemnana.

⁷ Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerte uamaná y bëtsá yomnama jinÿanÿiyama, y Bëngbe Bëtsá sempre ntšamo ndegombre yomncá tojtsamama jinÿyama entšanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canÿe bacna soye amá stsemna ca?” ⁸ Y chcase, ndánaca mëntšá nanjátayana: “Ntšamo ndoñe tšabá yondmëncá mochjama, chca, entšanga chámuinÿe Bëngbe Bëtsá puerte tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá chca abuátambayënga echanjácastigaye, ntšamo castigánënga jtsemnama imomerecencá.

Ntšamo entšá tojtsamama, Bëngbe Bëtsabe bominiÿiñe ndocná tšabia ntsemnana

⁹ Y asna, ¿Bëngbe Bëtsá bënga judiënga ínÿengbiamá más tšabá šonÿa? ¡Ndoñe, ndegombre ndoñe! Atše ya sënjinÿinÿé judiënga y ndoñe judiëngnaca, chë bacna soyënga jamama juabnëngaca mandánënga imomnama. ¹⁰ Er Bëngbe Bëtsabe uabemana palabrënguiniñe mëntšá endayana:

Ntšamo entšá tojtsamama, ndocná Bëngbe Bëtsabe bominiÿiñe tšabia quenátsmëna.

¡Ndoñe, ndegombre ndoñe, ni mo canÿa chca quenátsmëna!

¹¹ Ndocná quenátsmëna ntšamo ndegombre yomncá chabotsosertánama; ¡Ndocná quenátsmëna nda chaotseboše Bëngbe Bëtsáftaca jtsemnama!

¹² Nÿetscanga ndoñe tšabe benache tmojishache y chiñe montsajna. Chënga nÿetscanga Bëngbe Bëtsabe bominiÿiñe tondayama quemátoserverna. Ndocná quenátsmëna ntšamo tšabá yomncá chaotsamama, ¡ni canÿa ndoñe!

¹³ Ntšamo tmojtsichamcá puerte bëts bacna soye jtsemnana, mo canÿe obanabe cuevëshe atëfnëshe puerte bacá tojtsonguëtsecá.

Chënga tmojtsoyebuambná soyëngaca ínÿengbioye jtsaíngñayana. Chë tmojtsichamo soyëngaca puerte bacna soye ínÿengbiamá jtsamana, mo canÿe mëtscuaye tbojtseftëtse orcá, chë veneno canÿe entšábioye jóbana.

¹⁴ Chënga, nÿets tempo ínÿengbiamá podësca jtsichámuana, y siempre jtsóyebuambnayana chë ínÿenga ntšámnaca jáborlama.

¹⁵ Siempre jtseprontánana ínÿengbioye ntšámnaca jáborlama y jobáyama.

¹⁶ Chënga siempre jtsiyenana ínÿenga chamotsesufrínama jtsamëse, y nÿe ntšámnaca jtsaborlánana.

¹⁷ Chënga ndocna te tondaye ntjamana nÿetscanga natjëmbana chamot-siyenama;

¹⁸ Chënga ndoñe ntsiyenana Bëngbe Bëtsabiamá jtsejuabnayëse, cha chë más bëtsá nÿetscangbiamá yomnama ca —chiñe endayana.

¹⁹ Er bënga mondétatšëmbo, lempe ntšamo leyiniñe iuabemancá, chë leyëngaca mandánënga imoyenëngbiamá yomnama. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tšabá tonjama, chama ndoñe yonjátatšëmbo causa ca; y endmëna jinÿanÿiyama, ntšamo tmojamcá tšabá o ndoñe tšabá bëtsemnama Bëngbe Bëtsá nÿetscangbiamá yochjayana ora, nÿetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca.

²⁰ Er, Bëngbe Bëtsá ndoñe queochatsma ndocná chabe bominiÿiñe

tšabia chaotsemna, ntšamo leyiñe yomandancá cha tojamama; chë ley bëngbiama jamana, nÿe bënga bacna soye tmojamama chamotset-tatšëmbuama.

Ntšamo Bëngbe Bëtsá inama entšanga chabe bominiñiñe tšábenga chamotsemnana

²¹ Pero mora, Bëngbe Bëtsá tonjinÿanÿé ntšamo cha inama entšanga tšábenga chabe bominiñiñe chamotsemnana; y Bëngbe Bëtsá ndoñe ntjamana canÿa chabe bominiñiñe tšabia chaotsemnana, ntšamo ibomncá cha tojtsamama, ntšamo chë leyënguñiñe y mandënguñiñe yomncá. Pero masque mora chca, Bëngbe Bëtsá tonjinÿanÿé, Moisesbe leyiñe y Bëngbe Bëtsabe juabna oyebuambnayëngbe librëššangañe yopodena jinÿenana chca yochtsemnana. ²² Bëngbe Bëtsá jamana entšanga chabe bominiñiñe tšábenga chamotsemnana, chënga Jesucristbeñe tmojtsošbuáchema. Bëngbe Bëtsá nÿetscanga Cristbeñe ošbuáchiyëngbiama chca jamana, y chabiama nÿetscanga cachcá monduámana; ²³ er nÿetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnana y puerte bëtsá jtsemnana, ntšamo Bëngbe Bëtsá tojanjuabocá entšanga chamotsemnana. ²⁴ Pero Bëngbe Bëtsá chëngbiama corente tšabe juabna bómnyeca, mo ndayá cuafjatšatacá, cha jamana chënga chabe bominiñiñe tšábenga chamotsemnana. Bëngbe Bëtsá chca tojanma, Cristo Jesúsbeyeca, entšanga atsebácanënga chamotsemnana y ya ndoñe más bacna soyënga jamama juabnëngaca mandánënga chamondëtsemnana cha tojanma ora. ²⁵ Bëngbe Bëtsá cha tbojanábuayana, chabe buiñe juabuáshanëse y jóbanëse, cha chaotsemna ndábeyeca Bëngbe Bëtsá entšanga bacna soyëngama jáperdonama; Jesucristbeñe jtsošbuáchiyëse entšanga jobenayana perdonánënga jtsemnana. Bëngbe Bëtsá chca tojanma, jinÿanÿiyama cha inétsama entšanga tšábenga chabe bominiñiñe chamotsemnana, chë entšanga bacna soyënga tmojanmama chë tempo ntjatonyaycá, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye. ²⁶ Cha lempe chca tojanma, jinÿanÿiyama cha sempre ntšamo ndegombre yomncá inétsamama, y nÿetscanga Jesucristbeñe ošbuáchiyënga chabe bominiñiñe tšábenga chamotsemnana inétsamama.

²⁷ Chcáyeca, entšá ndoñe ntsobenana tondayama ntsenábotamnayana. Chca endmëna, er Bëngbe Bëtsá tšabia chabe bominiñiñe jabemana, ndoñe ntšamo leyiñe tomandancá cha tojtsamama, sinó nÿe Jesucristbeñe tojtsošbuáchema. ²⁸ Y chca jayanëse, mora bënga tšabá montsetatšëmbo, Bëngbe Bëtsá inétsama canÿe entšá tšabia chabe bominiñiñe chaotsemnana, nÿe Jesucristbeñe tojtsošbuáchema, y ndoñe ntšamo leyiñe yomandancá cha tojtsamama.

²⁹ ¿O Bëngbe Bëtsá nÿe judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna; ³⁰ er nÿe canÿe Bëtsá nÿetscangbiama endmëna, y cha echanjama chë más delicadentse base bobachtema tëtšenënga imomnëngbiama y ndoñe chcangbiámnaca, chabe bominiñiñe tšábenga chamotsemnana, Jesucristbeñe tmojtsošbuáchema. ³¹ Chcasna, Bëngbe Bëtsá jamana entšanga chabe bominiñiñe tšábenga chamotsemnana, Jesucristbeñe tmojtsošbuáchema; ¿chca yojtsayana chë ley nÿe tondayama yondoservena

ca? ¡Ndoñe, ndegombre ndoñe! Inyetsá, chca jamana chë ley más chaotsámanama.

4

Ntšamo Abrahánoftaca tojanopasá

¹ Morna Abrahambiana mochjóyebuambaye, bēngbe tempsca bēts taitá, y mochjinýe ndayá tojánatsjinýe Bēngbe Bētsábeñe ošbuáchiyana bomnentsana. ² Abraham chabe bominiýiñe tšabia chaotsemnana, ndayá cha tojanmama Bēngbe Bētsá matēnjanmēse, cha matēnjanobená entšángbeñe ndayama jtsenábotamnayana, pero Bēngbe Bētsabe delante ndoñe; ³ er Bēngbe Bētsabe uabemana palabrēnguñe mēntšá endayana: “Abraham, Bēngbe Bētsábeñe yojtsošbuáchiye, y chíyeca Bēngbe Bētsá tonjánayana cha chabe bominiýiñe tšabia yojamna ca.”

⁴ Canýe entsá trabajayá, crocénana josháchiñana ndayá tojamama, pero chë crocénana ndoñe nýe tšetánana ntsemnana, sinó chana jtsemnana ntšamo cha tojtsomerecencá. ⁵ Er menójuabonga, nda tondaye tontsama Bēngbe Bētsá cháuyanama cha chabe bominiýiñe tšabia yomna ca, pero aiñe tojtsošbuaché Bēngbe Bētsábeñe, nda endbáyana chë bacna soye tmojamēnga mora mo ndoñe chca cuafjamcá chamotsemna ca, chabiama Bēngbe Bētsá echanjama chabe bominiýiñe tšabia chaotsemnana, chabe ošbuáchiyama. ⁶ Rey David cachcá chabe librēšañe tojánayana, chë ndabiana Bēngbe Bētsá jayanana chabe bominiýiñe tšabia chaotsemna ca, masque chabiama chca cháuyanama tondaye tonjamēse. David chca entšabiama tojánayana, cha puerte echantsoyejuaye ca. ⁷ Chabe librēšañe mēntšá tojanábema:

¡Tša oyejuayēnga jtsemnana chë Bēngbe Bētsá chēngbe bacna soyēnga tojáperdonanga,

chë Bēngbe Bētsá chēngbe bacna soyēnga tojabuajuánanga!

⁸ ¡Puerte oyejuayá jtsemnana chë Bēngbe Bētsá mo ndoñe bacna soye cuafjama cuenta tbojtsonýá cha ca!

⁹ ¿David tojánayana nýe chë más delicadentse base bobachtema tētšenēnga imomnēngbiana oyejuayana yomna ca? Ndoñe; ndoñe chca mondmēnēngbiámnaca. Y muentse tmonjayana, Abraham Bēngbe Bētsábeñe yojtsošbuachéyeca, Bēngbe Bētsá tojánayana cha chabe bominiýiñe tšabia yojamna ca. ¹⁰ Y ¿ntseco chca tojanopasá? ¿Abraham ya chë más delicadentse base bobachtema tētšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tētšená yontsemna ora. ¹¹ Y cabá chentšana, Abraham base bobachtema chë más delicadentse tētšená yojtsemna; y chca yojamna jinýanýiyama, Bēngbe Bētsá tempo ya chabiama tojánayana cha chabe bominiýiñe tšabia yojamna ca, cha Bēngbe Bētsábeñe yojtsošbuáchema. Lempe chca tojanopasá, jinýanýiyama Abraham mo taitacá yomnama Bēngbe Bētsábeñe imošbuachēngbiana, masque ndoñe base bobachtema chë más delicadentse tētšenēnga mondmēna. Y cachcá Bēngbe Bētsá chë ošbuáchiyēngbiana tojánayana, chēnga chabe bominiýiñe tšábenga imomna ca. ¹² Y Abrahámnaca endmēna mo chë taitacá, chë más delicadentse base bobachtema tētšenēnga imomnēngbiana, pero aiñe Bēngbe Bētsábeñe corente jtsošbuáchiyēse imoyenēngbiana, cachcá ntšamo bēngbe bēts taitá Abraham Bēngbe Bētsábeñe yojtsošbuachecá. Y cha cabá chë más delicadentse base bobachtema ntsetētšena ora, ya chca yojtsošbuáchiye.

Jtsošbuáchiyëse, ntšamo Bëngbe Bëtsá tojašebuachenacá jóshjanguana

¹³ Bëngbe Bëtsá tojanašebuachená Abrahambiana y chábentšana entšangbiana, quem luare chëngbiana yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojtsanošbuáchema, y chíyeca Bëngbe Bëtsá tojánayana cha chabe bominiñe tšabia yojamna ca. ¹⁴ Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiana yojtsemna ca tmojayanëse, Bëngbe Bëtsábeñe jtsošbuáchiyana tondayama nantsoSERVERNA, y ntšamo Bëngbe Bëtsá tojanašebuachenacá tondaye ntsámanana. ¹⁵ Chë ley juabocnana, Bëngbe Bëtsá puerte etonaná entšanga cháuacastigama, chënga ntšamo chíñe iuayancá ndoñe tmontsamama; pero ndocna mandënga tontsemnëse, ndocná ntsoBENANA chë ndoñe tontsayancá ndoñe ntjamana.

¹⁶ Y chca, Bëngbe Bëtsá Abrahámbioye tbojanšbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnana chë Bëngbe Bëtsábeñe imošbuáchema mo Abrahámbentšana entšangcá imomnëngbiana; y Bëngbe Bëtsá chca tojanašebuachená, cha chëngbe tšabiana iuantjéshayeca. Chë mo Abrahámbentšana entšangcá imomnëngbeñe, ndoñe quemnatsmëna nÿe chë ntšamo ley yomandancá imnétsamënga, sinó nÿetscanga chë ntšamo Abraham tojanošbuachecá Bëngbe Bëtsábeñe imošbuachéngnaca. Y Abraham nÿetscanga bëngbiana, Bëngbe Bëtsábeñe ošbuáchiyënga, mo taitacá endmëna. ¹⁷ Ntšamo Bëngbe Bëtsábe uabemana palabrénguiñe endayancá, Bëngbe Bëtsá Abrahámbioye ibojtsatsétsnaye ora: “Atše sënjama aca ba luariñe entšangbiana atšbe bominiñe taitá chacotsemnana ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiana yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entšanga chámuatayenama, y nda inamánda y entšanga jobenayana jinÿama ndayá ndocna te tmonjaninÿcá.

¹⁸ Abraham Bëngbe Bëtsábeñe yojtsošbuáchiye y yojtsoBATMANA ntšamo tbojanšbuachenacá chaotsemnana, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entšangbe taitá”, ntšamo Bëngbe Bëtsá tbojaniancá: “AcBentšana entšanga tša mallajta mochántsemna, ndocná queochatobenaye jacúntana ca”. ¹⁹ Abraham yojanobatmanéntscuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsonÿaye ya bëtsanánëjema yojtsemnana, er ya mo patse uata yojtseBOMNA, y chabe shema, Sara, ndoñe yonjobena šešonga jtsabamnama. ²⁰ Abraham ndocna te tonjanajbaná Bëngbe Bëtsábeñe ošbuáchiyana, y ni mo canÿe ndoñe yonjanjuaboYE chë ntšamo Bëngbe Bëtsá tbojanšbuachenacá ndoñe joparéjana ca; sinó más corente chábeñe yojtsanošbuaché, y chca Bëngbe Bëtsábioye ibojtsatschuanaye, ²¹ er cha tšabá inatátsëmbo, ntšamo tbojanšbuachenacá jamama, ndegombre Bëngbe Bëtsá obená inamnama. ²² Chíyeca, Bëngbe Bëtsá tojánayana cha chabe bominiñe tšabia yojamna ca.

²³ Pero, chabe bominiñe tšabia yojamna ca Bëngbe Bëtsá tojánayana ora, ndoñe nÿe Abrahambiana chca ntsóyebuambnayana; ²⁴ ndayá

bēngbiámna, ndēmuanjēngbiam Bēngbe Bētsá yochjayana chabe bominiñe tsábenga imomna ca, bēnga Bēngbe Bētsábeñe imošbuachéyeca; Bēngbe Bētsá, nda tojanma Bēngbe Utabná Jesús cháuatayenama. ²⁵ Bēngbe Bētsá tojanaleenciá entsanga Jesús chamóbama, bēnga bacna soyēnga tmojanma causa, y Bēngbe Bētsá tojanma cha cháuatayenama. Bēngbe Bētsá chca tojanma jobenayama, bēnga chabe bominiñe tsábenga jábiamama.

5

Mora bēnga Bēngbe Bētsabe bominiñe tsábenga montsemna

¹ Er Bēngbe Bētsá tojama bēnga chabe bominiñe tsábenga chamotsemnana, bēnga chábeñe imošbuachéyeca; mora tempcá tsábá Bēngbe Bētsáftaca bēnga montsatsmēna, Bēngbe Utabná Jesucristbeyeca. ² Bēnga Crístbeñe mondošbuáchema, cha tojama bēnga chamotsetatsēmbuama Bēngbe Bētsá tša tsabia yomnana, y Bēngbe Bētsábicana tsabe soyēnga jtsebomñese mora chamotsiyenama. Bēnga tša oyejuayēnga jésemnana, er Bēngbe Bētsábeñe jtsošbuáchiyēse mondobátmana cha puerte uámanēnga y bētsétsanga šochjábiamama, batśá ntšamo cachá yomncá. ³ Y ndoñe nñe chama bēnga oyejuayēnga jésemnana, ndayá bēnga tmojtseufrina y padecena soyēnguiñe tmojtšajna órnaca. Chca mondbama, er bēnga mondetatsēmo bēnga tmojtseufrina orna, bēnga juatsjínñana ntšamo uantadēnga jtsemnana padecena soyēnguiñe tmojtsemna ora, Bēngbe Bētsábeñe jtsošbuáchiyēse. ⁴ Bēnga padecena soyēnguiñe tmojtsemna ora, más tsábá uantadēnga jtsemnana mondobēnayeca, Bēngbe Bētsá oyejuayá bēngaftaca jtsemnana, padecena soyēnguentšana ndegombre tsábá tmojachnēngo ora. Bēngbe Bētsá oyejuayá bēngaftaca chaotsemnana bēnga tmojama ora, bēnga jtsobenana más jtsobátmanana, ntšamo šojašebuachenacá cha yochjamama. ⁵ Bēnga chca tmojt-sobátmanēse, ndocna te nñe bonamente quemochatobátmana, er Bēngbe Bētsá šojinñanýé tša bētsacá cha šuababuánýeshanama. Bēngbe Bētsá chca tojama chē Uámana Espíritbeyeca, y cha endmēna nda Bēngbe Bētsá tbojanichmó bēngbe ainaniñe chaotsemnana jtsemándayama.

⁶ Tempo bēnga tondaye chemuatanobená jamana Bēngbe Bētsabe bominiñe tsábenga jtsemnana, y chora Cristo tojanóbana bēnga chē bacna soyēnga tmojamēngbe tsabiama, nña chama tempo yojamna ora. ⁷ Ndoñe paselo quenátsmēna jajuaboyana, ndáyeca canña nantseprontana jóbana canña ntšamo chē leyiñe yomandancá jamama tojtamanabiama; pero, canña bētsacá jtsababuánýeshanēse tsabe soyēnga ínñyēngbiam tojtšamabiama, nderádose chabiama jóbana cuantseprontana. ⁸ Pero Bēngbe Bētsá bēnga šojanñanýé tša šuababuánýeshanama, er bēnga cabá bacna soyēnga ntsamcá imojoyena ora, Cristo bēngbiam tojanóbana.

⁹ Cristo, chabe buiñe juabuáshanēse bēngbiam tojanóbanayeca, Bēngbe Bētsá tojanma bēnga chabe bominiñe tsábenga jtsemnana. Y chca endmēnayeca, ndegombre Cristo šochanjátsebacaye, entsanga ndoñe tsábá tmonjama ca y castigo chēngbiam chaotsemna ca Bēngbe Bētsá chaojayana ora. ¹⁰ Bēnga tempo Bēngbe Bētsá imojanáya; pero cha tojanma bēnga cháftaca tempcá tsábá chamotsatsmēnana, chabe Uaquiñá tojanóbanayeca. Y mora, bēnga natjēmbana cháftaca chamotsemnana ya tojama ora, ndegombre atsebácanēnga mochántsemna, chabe Uaquiñá

ainá yómnayeca. ¹¹ Y ndoñe n̄ye chca, ndayá b̄enga cháftaca puerte oyejuaȳenga chamotsemnám̄naca B̄engbe B̄etsá jamana, ndayá B̄engbe Utabná Jesucristo b̄engbiama tojánmayeca. Y mora, chábeyeca B̄engbe B̄etsá tojama b̄enga cháftaca tempca t̄sabá chamotsatsm̄enama.

Adán y Cristo

¹² Can̄ye ent̄sá bacna soye tojanma causa, n̄yetsca ent̄sanga bacna soȳenga am̄enga tmojábcana; y cha tojanóbana, bacna soȳenga tojanma causa. Y chca, n̄yetsca ent̄sanga entsamna jóbana, er n̄yetscanga bacna soȳenga tmojama. ¹³ B̄engbe B̄etsá Moisésbioye ch̄e leȳenga cabá nduánt̄saboshjona ora, ent̄sanga quem luarent̄se bacna soȳenga tmojanma. Pero ndocna ley tontsemna ora, B̄engbe B̄etsá ndoñe ntjaton̄yayana ent̄sanga bacna soȳenga tmojamama. ¹⁴ N̄yetsca ent̄sanga, Adánbent̄šana Moisésbent̄scoñe, n̄yetscanga yojánamna jóbana, nt̄samo cach Adán tojanmcá ndoñe tmonjanm̄éngnaca, nt̄samo cha ndoñe chaond̄emama B̄engbe B̄etsá tbojanmandacá cha tojanma ora. Y Adánbeñe ent̄sanga mondobena jin̄yama, nt̄samo ch̄e jabama ibojamná can̄ye soȳenguiñe yochtsanm̄ena.

¹⁵ Pero nt̄samo ch̄e útata tbojanmcá ndoñe cachca soye quenát̄sm̄ena; er B̄engbe B̄etsá ent̄sangbe t̄sabiama jtsejuabn̄aȳese t̄sabe soȳenga ch̄engbiama tojanma ora, ndoñe yonjamna mo nt̄samo B̄engbe B̄etsá tbojanmandacá ndoñe chaond̄emama Adán tojanma orcá. T̄s̄engaftanga šmond̄etat̄š̄embo, n̄ye can̄ye ent̄sá can̄ye bacna soye tojanma causa, cha tojanma n̄yetsca ent̄sanga jóbana chaotsamnama, pero B̄engbe B̄etsá ent̄sangbe t̄sabiama yojuabn̄aȳeca, más b̄ets soȳenga jamana, ch̄e Adanbe bacna soye ent̄sangbiama bacna soȳenga tojanmama. Chca, B̄engbe B̄etsá tojanma ba ent̄sanga b̄etscá t̄sabe soȳenga chamotsebomnama; y chca tojama, n̄ye can̄ye ent̄sá, Jesucristo, t̄sabe soȳenga tojánmayeca. ¹⁶ Ch̄e ba ent̄sanga b̄etscá t̄sabe soȳenga chamotsebomnama B̄engbe B̄etsá tojament̄šana endóbocana soye, puerte in̄yetsá comna, ch̄e ent̄sá Adán, can̄ye bacna soye tojanment̄šana tojanóbocna soyama. Adán bacna soye tojanment̄šana, B̄engbe B̄etsá tojánayana chana bacna soye tojanma y castigo jtsebomnama ibojtsemna ca, y n̄yetsca ent̄sángnaca ch̄e causa; pero masque n̄yetscanga bacna soȳenga tmojama, B̄engbe B̄etsá ent̄sangbe t̄sabiama ndoñe b̄end̄etsebnat̄j̄embayeyeca, tojanma ent̄sanga chabe bomin̄ȳiñe t̄sábenga chamotsemnama y ch̄e bacna soȳengama castigán̄enga ndoñe chamond̄etsemnama. ¹⁷ Ndegombre endm̄ena, can̄ye ent̄sá bacna soye tojanma causa, n̄yetsca ent̄sanga jóbana yojtsamna. Pero puerte más, can̄ye ent̄sá Jesucristo tojanma. Nd̄emuan̄ȳengbiama B̄engbe B̄etsá tojama b̄etscá t̄sabe soȳenga chamotsebomnama, nd̄emuan̄ȳengbiama B̄engbe B̄etsá tojama chabe bomin̄ȳiñe t̄sábenga chamotsemnama, y B̄engbe B̄etsábiocana chca tmojóȳengacñ̄enga, ch̄enga n̄yetscanga mochantsiyena bacna soȳenga jtseȳnjanaȳese y n̄yetsca tescama mo b̄ets̄sangcá; y chca echánt̄semna ndayá Cristo tojánmayeca.

¹⁸ Y chca, nt̄samo can̄ye ent̄sá, Adán, can̄ye bacna soye tojanmama, B̄engbe B̄etsá tojánayana n̄yetscanga bacna soye tmojanma y castigán̄enga chamotsemna ca; cachcá nt̄samo can̄ye ent̄sá, Cristo, puerte t̄sabe soye tojánmayeca, B̄engbe B̄etsá jayanana n̄yetscanga imojtsobena chabe bomin̄ȳiñe t̄sábenga jtsemnama y ch̄e n̄yetsca tescama yomna t̄sabe vida jtsebomnama ca. ¹⁹ Y nt̄samo B̄engbe B̄etsá tbojanmandacá

ndoñe chaondēmama canye entsá tojanma causa, nyetsca entsanga bacna soye amēnga tmojanbiamma; cachcá, ntšamo Bēngbe Bētsá tbojanmandacá canye entsá, Jesucristo, tojánmayeca, Bēngbe Bētsá tojanma bētsca entsanga chabe bominyiñe tšábenga chamotsemnnama.

²⁰ Chē ley entsangbe cucuatsiñe tmojanáboshjona, jinñanñiyama ntšamo ndegombre yomna bacna soyēnga jtsamana; pero entsanga más bacna soyēnga imojtsama ora, Bēngbe Bētsá cabá más chēngbe tšabiamma yojtsanjuabnaye y más tšabe soyēnga chēngbiamma yojtsama. ²¹ Chcasna, mora mochjayana, entsanga bacna soyēngaca puerte mandánēnga imojamna, y chca, nyetscanga jóbanama yojamna ca. Pero mora, ya ndoñe chca quenátsmēna, er Bēngbe Bētsá tojama entsanga chabe bominyiñe tšábenga chamotsemnnama, Bēngbe Utabná Jesucristbeyeca chē nyetsca tescama yomna tšabe vida chamotsebomnnama; chíyeca mora bēnga montsobena jtsiyenama, Bēngbe Bētsá šojatšatá tšabe soyēnga lempe bēngaftaca jtsemnēse.

6

Crístbeyeca bēnga tšabe vida jtsebomnana

¹ Y asna, ¿ntšamo mochjayana? ¿šojtsamna jtsiyenana sempre bacna soyēnga jtsamēse, chca, Bēngbe Bētsá šuababuánñeshanama más chašotsinñanñinama, cha más bacna soyēnga bēnga jtsaperdónayēse?

² ¡Ndoñe, ndegombre ndoñe! Tempo bēnga monjaniiyena bacna soyēnga jamama juabnēngaca mandánēnga, pero mora bēnga montsobena jtsiyenana chē juabnēnga tondaye bēngbioye ntsamcá, y chca, bēnga montsobena mo obanēngcá chē soyēngama jtsemnana; y as, ¿ndáyeca bēnga muatjatsjuabnaye ntšamo ndoñe tšabá tontsemncá jatiyenana?

³ Er ndegombre tšēngaftanga šmondētatsēmbo, bēnga uabáinēnga tmojananoquedá ora, tmonjaninñanyé bēnga Cristo Jesúseftaca cányiñe mo canyácá bētssemnnama; y bēnga uabáinēnga tmonjanoquedá ora, enjamna mo bēnga cuafjobancá, ntšamo Cristo tojanobancá. ⁴ Bēnga uabáinēnga tmonjanoquedá ora, enjamna mo bēngnaca cháftaca cuafjobancá, y cháftaca uatabuantsanēngcá. Chca yojamna, bēnga chamotsobenama mo tsem entsangcá jtsiyenama, ntšamo Crísoftaca tojanopasacá, cha cháuatayenama Bēngbe Bētsá tojanma ora, chabe puerte bēts obenánaca.

⁵ Bēnga Crísoftaca cányiñe mo canyácá jtsemnēse, cha tojanóbana ora mo bēngnaca cháftaca cuafjobancá enjámnayeca, ndegombre bēnga cányiñe mo canyácá cháftaca mochántsemna, bēnga cachiñe vida nyetsca tescama chamotsatsbomnnama Bēngbe Bētsá jtsamēse, ntšamo Cristo cháuatayenama cha tojanmca. ⁶ Y bēnga mondētatsēmbo, chē ntšamo bēngbe vida enjamncá, bacna juabnēngaca mandánēnga, Jesucristbeñe cabá ntsošbuáchiye ora, mora ya ndoñe chca yontsemnnama; y chca entsemna mo chē tempsca vida chaóbanama cuafjamcá, Cristo tmojanancrucificá ora. Chca yojamna, Bēngbe Bētsá jobenayama chē bacna soyēnga jamama bēngbe juabnēnga jtsepochócama; y chca, ya ndoñe más chē bacna soyēngaca mandánēnga chamondētsemnnama, mo nyets tempo nñe inñabiamma oservernēngcá. ⁷ Er canye entsá tojóbana ora, chē bacna soyēnga chábioye ya ndoñe más ntsemándayana. ⁸ Er Cristo tojanóbana ora, mo bēngnaca cháftaca cuafjobancá endmēnayeca, cháftaca jtsiyenámna bēnga montsošbuaché. ⁹ Bēnga mondētatsēmbo Cristo cháuatayenama y ndocna te cha cachiñe jatóbana Bēngbe Bētsá tojanmama; y ndocna

obenana queochatsma cha cachiñe chauatóbanama. ¹⁰ Cha tojanóbana, y chë bacna soye jamama juabñenga ndocna te ntjobenayana chábioye jamándana, y ínÿenga ndoñe imontsobena ntšamo cha jabórlana; y ntšamo mora cha yoyencá, Bëngbe Bëtsá jtse servénama yomna. ¹¹ Cachcá, tšëngaftanga cmontsamna jtsejuabnyana, chë ya ndoñe más bacna soyëngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca canÿiñe mo canÿacá jtsemnëse.

¹² Tšëngaftanga cmontsamna, chë bacna soyënga jamama ainanentšë šmobomna juabñëngaca ndoñe más mandánënga ntsemnana, chca, tšëngaftanga ndoñe chašmondëtsamama juabñëngaca nÿe cach tšëngaftanga, tšëngaftangbe cuerpiñe tšabá jtsomñama. ¹³ Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jasérviana chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiana, y tojanma tšabe vida chašmotsebmomna; y jauyanana nÿetsca tšëngaftangbe cuerpentša soyëngna Bëngbe Bëtsá jasérviana yojtsemna ca. ¹⁴ Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyiñe iuayana soyëngaca mandánënga, y šmondoyena Bëngbe Bëtsá tšëngaftangbiana tšabá jtsejuabnyayëse.

Ošbuachiyá obligaciónaca jtsemnana ntšamo tšabá yomncá jamama

¹⁵ Y asna, ¿bënga imojt sobena bacna soyënga jamana, chë leyiñe iuayana soyëngaca ndëmandánënga imomnana, y Bëngbe Bëtsá bëngbiana tšabá jtsejuabnyayëse bënga imoyenama? ¡Ndoñe, ndegombre ndoñe! ¹⁶ Tšëngaftanga tšabá šmondëtatšëmbo, ínÿabe cucuatšïñe mo nÿets tempo nÿe ínÿabiana oservenëngcá šmojoquedá ora, cha jtso bedecénama, ndegombre tšëngaftanga chë nduiñbiana nÿets tempo oservenënga jtsemnana. Chcasna, cachcá jtsemnana, chë tšëngaftanga šmojabocacá bacna soyëngaca mandánënga jtsemnana, y chca jtsemnana mo Bëngbe Bëtsabe bominiñe tšëngaftanga nÿetsca tescama obanënga cuaftsemncá, o Bëngbe Bëtsá jtso bedecénama, y chca, chabe bominiñe tšábënga jabocanana. ¹⁷ Pero šontsamna Bëngbe Bëtsá jtsatschuanayana, er tempo tšëngaftanga mo nÿe ínÿabiana oservenëngcá šmojamna, bacna soyënga jamama juabñëngaca mandánënga; pero mora nÿets ainánaca šmojoyeuná, ntšamo chë tcmojanabuatambá soyënguiñe šmojoyëngacñëcá. ¹⁸ Bëngbe Bëtsá tšëngaftanga cmojatsebacá, bacna soyëngaca ndëmandánënga chašmotsemnana, y morna mo Bëngbe Bëtsabiana oservenëngcá šmojabocna, ntšamo tšabá yomncá jtsamama. ¹⁹ Muentšë sënjoyebuambá ntšamo entšanga mondbetsichamcá, er tšëngaftanga ndoñe corente juabna quešmátsbomna toto palabrënga chacmósertama. Tempo, tšëngaftanga šmonjanamana jalesénciana, lempe ntšamo šmojamncá mandánënga jtsemnana, bacna soyënga shembásaftaca o boyabásaftaca jamama juabñëngaca, y nÿe ndaye bacna soyënga jamama juabñëngaca. Cachcá, mora tšëngaftanga cmontsamna jalesénciana tšëngaftanga chašmotsemnana juabñëngaca mandánënga tšabe soyënga jtsamama, chca, ndegombre Bëngbe Bëtsabe entšanga chašmotsemnana.

²⁰ Tšëngaftanga, cabá bacna soyënga jamama juabnëngaca mandánënga šmonjamna ora, tšëngaftanga ndoñe obligaciönaca quešmënjatšmëna ntšamo Bëngbe Bëtsabiana tšabá yomncá játamama. ²¹ ¿Ndaye tšabe soyë tšëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtsëuatja. Chca soyënga tcojamentšana jóbocnana, entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obaná cuaftsemncá. ²² Pero mora, ndoñe quešmátšmëna bacna soyënga jamama juabnëngaca mandánënga, y mora bëtscá šmojtsentšena Bëngbe Bëtsá jtseyeunanana y jtseservénana. Chca jtsamana, tšëngaftangbiana puerte tšabá entsemna, er chca, Bëngbe Bëtsabe entšanga šmochántsemna, y cabana, chë nÿetsca tescama yomna tšabe vida šmochántsebomna. ²³ Bacna soyënga tcojtsamentšana jóbocnana entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obanënga cuaftsemncá; pero, Bëngbe Bëtsá šojtsatšatná soyënguentsana, jóbocnana chë nÿetsca tescama yomna tšabe vida jtsebomnana, Cristo Jesús Bëngbe Utabnáftaca cánÿiñe mo canÿacá jtsemnëse.

7

Chë bouamnátbentsana ndayá bëngbiana mochjuatsjinÿe

¹ Jesucristbeyeca catšátanga, tšëngaftanga šmotátšëmbo ntšamo chë leyënga entšangbiana inëtsemnana; tšëngaftanga šmotátšëmbo, ntšamo chë leyiñe tojtsayancá canÿe entšá chaotsamamna, nÿe chë entšá tojtsainëntscuana chábioye jtsemándayana. ² Chcasna, canÿe bouamna shembása, ntšamo chë leyiñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanësna, chë leyiñe endayana, chë shemna canÿa jtoquédana, chë boyabiana ndëmandaná ca. ³ Y chca, chë shema inÿe boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye inÿaftaca ingñayá ca. Pero chabe boyá tojtsóbanëse, chë leyiñe endayana chë shemna canÿa jtoquédana, chë boyabiana ndëmandaná ca, y cha jtsobenana inÿaftaca jtobouamayana; y chca tojama ora, boyábioye inÿaftaca ingñayana ndoñe ntsemnana.

⁴ Tšëngaftanga chë ošbuachiyëngaftácnaca cachcá endmëna; ya ndoñe más chë léyeca mandánënga quešmátšmëna, er Cristo tojanóbana ora šmojánbocna, mo chë soyëngama obanënga cuaftjoquedangcá, inÿabe entšanga jtsemnana, Crístbenga, ndabiana Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jaserviama. ⁵ Bënga chë nÿe ntšamo cabënga inmabošcá monjanijena ora, chë ley enjanoservena bëngbe ainaniñe chamotsebomnana bacna soyënga jamama puerte bëtš juabnënga, nÿe bënga tšabá jtsomñama. Ba bacna soyënga tmonjanma, y chë causa bënga šonjánamna nÿetsca tescama castigánënga jtsemnana, mo Bëngbe Bëtsabe bominiñe nÿetsca tescama obanënga cuaftsemncá. ⁶ Pero mora Bëngbe Bëtsá šojatsebacá chë léyeca ndëmandánënga chamotsemnana; chë ley tempo enjamna bëngbiana mo canÿe amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aiñe tsmécá chamotsiyenama, ntšamo chë Uámana Espíritu iuamcá bënga vida chamotsebomnana.

Bacna soye jamama juabna tcojtsebomněse, chě ley jamana entšá bacna soye chaomama

⁷ Báseftanga muanjayana cach ley bacna soye yomna ca; ndegombre, chě ley ndoñe chca quenátsměna. Chě léyeca atše tšabá sěndětatsěmbo ndayá yomna bacna soye jamana. Atše ndocna te matijántatsěmbona ndayá yomna chě “inŷabioye jtsántšabošana”, “inŷabioye ndoñe cattsantšaboše ca” chě leyiñe ndoñe matmėnjanábeměse. ⁸ Pero bacna soyěnga jamama juabněnga atše bomna causa tonjanma, atše puerte chaitsebošama chě ndoñe šonjamna jtsebošana soyěnga; y chca chě juabněngaca tonjanopasá, atše chě leyěnguiñe ndayá iuayanama jtsejuabnayěse. Er ndocna ley tondměna ora, entšá ndoñe ntsetatsěmbuana ndayá yomna bacna soye jtsamana. ⁹ Canŷe tempo enjamna, chora atše sėnjaniyena leyěngama ntsetatsěmbcá, pero ntšamo leyiñe iuayancá sėnjanabuátmana ora, ndayá jamama ndoñe yonjamnama, atše sėnjanontšě chě bacna soyěnga jamama juabněngaca mandaná jtsemnama; ¹⁰ y chora atše sėnjántatsěmbona, chě causa šojtsanměna nŷetsca tescama castiganá jtsemnama, mo Běngbe Bětsabe bominiñe nŷetsca tescama obaná cuaftsemncá. Běngbe Bětsá chě mando tojanma, atše chě nŷetsca tescama yomna tšabe vida jtsebomnama chayobenama, chě ley jtseyeunaněse; pero ndoñe chiyatanobedecé causa, chě mando tonjanma atše chašotsemna nŷetsca tescama castiganá jtsemnama. ¹¹ Chě leyentša mandiñe inŷe soyěnga ndoñe šonjtsemna jamama ca yojtsayánayeca, chě bacna soyěnga jamama juabněnga átšbeñe, šmonjaniñe bacna soyěnga jamama; y chě mando bětsemnama, chě bacna soyěnga jamama juabněnga tmonjanma atše chašotsemna nŷetsca tescama castiganá jtsemnama, mo Běngbe Bětsabe bominiñe nŷetsca tescama obaná cuaftsemncá.

¹² Pero běnga měntšá mochjayana: chě ley na tšabe soye endměna, er Běngbe Bětsábocana tojanóbocna, y chě manděgnaca Běngbe Bětsábocana tojanóbocna ca; chiñe endayana ndayá tšabá yomna jamana y chca tšabá jtsemnana. ¹³ Y asna, ¿quem tšabe soye tojanma atše chašotsemna nŷetsca tescama castiganá jtsemnama, mo Běngbe Bětsabe bominiñe nŷetsca tescama obaná cuaftsemncá? ¡Ndoñe, ndegombre ndoñe! Chě bacna soyěnga jamama juabněnga atše bomna causa, chca átšeftaca tonjanopasá. Chě tšabá yomna sóyeca, chě bacna soyěnga jamama juabněnga tmonjanma atše chašotsemna nŷetsca tescama castiganá jtsemnama. Chca chě juabněngaca tonjanopasá, entšanga jobenayama jtsetatsěmbuama ndayá yomna bacna soye jamana; y chě mando, bacna soye jamama ndoñe yondměna ca jtsichámuana causa, nŷetsca entšanga mondobena jinŷana canŷe bacna soye, mo canŷe puerte bětš bacna soyčá.

¹⁴ Běnga mondětatsěmbo chě ley Běngbe Bětsabe ley yomnama, pero atšna nŷe canŷe entšá sěndměna, canŷa nŷets tempo nŷe bacna soyěnga jamama juabněngaca mandaná. ¹⁵ Ndegombre ndoñe quešnátěsertana ntšamo sěntsamcá, er ndoñe ntsamana ndayá jamama stsebošcá, pero aiñe jtsamana ndayá jamama ndoñe šontsogustancá. ¹⁶ Pero chě atšbe ainaniñe stsejuabná ndoñe tšabá tontsemna soye stsaměse, ndayama leyiñe iuayana ndoñe candměna ntsamana ca, chca atše jtsinŷanŷnayana chě ley ndegombre tšabe soye yomnama. ¹⁷ Chcasna, atše ya ndoñe ntsemnana chě chca tojtšamá, ndayá chě bacna soye jamama atšbe ainaniñe yomna juabněnga jtsamana atše chca jamama. ¹⁸ Atše

sëndétatšëmbo, atšbe ainaniñe tondaye yontsemna ntšamo tšabá yomncá atše jamama. Masque sëntseboše ntšamo tšabá yomncá jamama, ndoñe quetsátobena chca jamama. ¹⁹ Atše ndoñe quetsátama chë tšabe soye ndayá jamama sëndbošcá, pero aiñe sëntsama chë bacna soye ndayá jamama ndoñe sëndbošcá. ²⁰ Chë ndayá ndoñe jamama sëntsebošcá stsamëse, chca jtsayanana, atše ya ndoñe stsemna chë chca yojtšamá, sinó chë bacna soye jamama atšbe ainaniñe yomna juabnënga chca yojtšama.

²¹ Chca, atše tijátatšëmbona ndayá átšeftaca yojtšopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama. ²² Atšbe ainanoca puerte sëntsoyejuá, Bëngbe Bëtsábiocana yóbocana mandëngama. ²³ Pero atše sënjinýena inye soye átšeftaca yojtšopasánana; chë bacna soye jamama atšbe ainaniñe yomna juabnënga yojtšama atše ndoñe ntjamama ntšamo atšbe juabnoca yomna mo ndegombre soycá, mo chë bacna soyëngaca mandaná cuaftsemncá.

²⁴ ¡Tša lastema atšbiama! Chë bacna soye jamama juabnënga átšbeñe entsemánda, y entsama atše chašotsemna nýetsca tescama castigáná jtsemnama, mo Bëngbe Bëtsabe bominiñe nýetsca tescama obaná cuaftsemncá. ¿Nda nanjobenaye chentšana atše jatsbocama? ²⁵ Nye Bëngbe Bëtsá endmëna nda yobena atše jatsbocama, Bëngbe Utabná Jesucristbeyeca. Chábioye chama mochtsatschuanaye. Atšbe ainanoca atše aiñe sëntsejuabná chë ley puerte tšabe soye yomna ca, y jobedésama sëntseboše; pero chë bacna soye jamama átšbeñe yomna juabnëngaca, atše bacna soyënga sëntsama, ntšamo chë juabnënga šontsemandacá.

8

Ntšamo Bëngbe Bëtsabe Espíritu yomandacá jtsiyenana

¹ Y chca, Bëngbe Bëtsá ndoñe ntjayanana, Cristo Jesúseftaca cánýiñe mo canýacá imomnënga, chëngbe bacna soyëngama nýetsca tescama castigánënga jtsemnama yojtšamna ca. ² Er, chë Uámana Espíritoftaca mandánënga mondmënayeca, Bëngbe Bëtsá šojatsebacá, bënga chë bacna soye jamama juabnëngaca mandánënga ndëtsemnama, y nýetsca tescama castigánënga ndëtsemnama, mo Bëngbe Bëtsabe bominiñe nýetsca tescama obanënga cuaftsemncá. Chë Uámana Espíritu jamana bënga ndegombre tšabe vida chamotsebomnama, cánýiñe mo canýacá Cristo Jesúseftaca jtsemnëse. ³ Bëngbe Bëtsá tojanma ndayá Moisesbe ley ndoñe tonjanobenacá, er entšanga mondoyena nýe ntšamo cachënga imobošcá, y nýe cánýenga ndoñe ntšobenana jamana ntšamo tojtšamncá. Bëngbe Bëtsá tojánayana entšángbeñe bacna juabnëngbe mando jtsepochócama ca, y chama chabe Uaquiñá tbojanichmó. Cha quem luaroye mo canýe entšacá tojánabo, canýe ainánaca, mo chë entšanga bacna soye amëngbe ainancá, pero ndocna te ni mo canýe bacna soye ndoñe tonjëftsema; y tojánabo, chábeyeca entšanga bacna soyëngama perdonánënga chamotsemnama. ⁴ Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espíritu ainaniñe yomandacá y ndoñe nýe ntšamo bënga entšanga tmojtsebošcá, chamobenama tšabá jamana ntšamo chë leyiñe yomandacá, ntšamo šojtsamncá.

⁵ Chë nýe cachënga tšabá jtsomñama cachëngbe juabnëngaca imoyenënga, nýe sempre jésejuabnayana bacna soyënga jtsamama, chca

bacna juabnëngaca mandánënga; pero ntšamo chë Uámana Espíritu ainaniñe iuamëndacá oyenënga, sempre jésejuabnayana tšabe soyënga jamama, ntšamo chë Uámana Espíritu yobošcá. ⁶ Ntšamo chë nÿe cachá tšabá jtsomñama juabnëngaca mandaná oyenentšana jóbocnana entšá nÿetsca tescama castiganá chaotsemnana, mo Bëngbe Bëtsabe bominiñe nÿetsca tescama obaná cuaftsemncá; y ntšamo chë Uámana Espíritu tojtsemandacá oyenentšana jóbocnana chë nÿetsca tescama yomna tšabe vida jtsebomnana y ainaniñe tšabe ebionana. ⁷ Chë nÿets tempo oyenënga nÿe ntšamo tmojtsebošcá nÿe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntsamana ntšamo cha tojtsamëndacá, y chca jamama ndoñe ntsobenana; ⁸ y chca, chë nÿe chca bacna juabnëngaca oyenënga, ndoñe ntsobenana jamana ntšamo Bëngbe Bëtsá tšabá tbojtsinjancá.

⁹ Pero tšëngaftanga ndoñe quešmátiyena nÿe cach tšëngaftanga tšabá jtsomñama cach tšëngaftangbe juabnëngaca, sinó šmojtsiyena ntšamo chë Uámana Espíritu tšëngaftangbe ainaniñe cmamëndacá, er chë Uámana Espíritu sempre tšëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana. ¹⁰ Pero Cristo sempre tšëngaftangbe ainanentše vida totsóbomñëse, masque tšëngaftangbe cuerpënga yochjopochóca, quem luarentše entšanga bacna soyënga jtsamana causa, tšëngaftangbe espíritu nÿets tempo vida echanjesóbomñe, er Bëngbe Bëtsá tojama tšëngaftanga chabe bominiñe tšábënga chašmotsemnana. ¹¹ Y Bëngbe Bëtsabe Espíritu, Jesús cháuatayenama tojamabe Espíritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbana cuerpo, cachiñe vida chaotsatsbomnana. Cha chca echanjama chabe Espíritoftaca, y mua sempre tšëngaftangbe ainaniñe iuétsemna.

¹² Chcasna, Jesucristbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nÿe bënga tšabá jtsomñama cabëngbe bacna juabnëngaca; ¹³ er nÿe bënga tšabá jtsomñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe bominiñe obanënga cuaftsemncá; pero Uámana Espíritbeyeca, chca juabnëngaca nÿetsca bacna soyënga jtsamana jtsajbanama šmojobenase, chë nÿetsca tescama yomna tšabe vida šmochántsebomna.

¹⁴ Ntšamo chë Uámana Espíritu yomandacá tmojtsamëngna, Bëngbe Bëtsabe básënga jtsemnana. ¹⁵ Er Bëngbe Bëtsá ndoñe tonjama bënga ainaniñe canÿe espíritu chamotsebomnana, mo nÿe ínÿabiamana nÿets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebomnana Espíritu jamana bënga Bëngbe Bëtsabe básënga chamotsemnana, y chë Espíritu endama “Atšbe Taitá ca” bënga Bëngbe Bëtsá chamotsechembuanama. ¹⁶ Y chë Uámana Espíritu y bëngbe espíritu canÿe ora jayanana bënga Bëngbe Bëtsabe básënga imomna ca. ¹⁷ Y Bëngbe Bëtsabe básënga mondménayeca, bëngnaca mochanjójyëngacñe ndayá cha chabe básënga jatšatayama tojašebuachenacá; bënga y Cristo cánÿiñe chë soyënga mochanjójyëngacñe, er bënga inÿe soyënguñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsétsanga chášubiamama, ntšamo cach Cristo yomncá.

Bëngbe Bëtsá bëtsétsanga y uámanënga šochjábiamana

18 Atše ndegombre sëndétatsëmbo, ntšamo quem tempo bēnga imo-sufrincá, puerte batsatema yomna chē bēngbe tšabíama uámanana y buashinŷinŷanana Bēngbe Bētsá ŷochjínŷanŷiyama. 19 Lempe ntšamo Bēngbe Bētsá tojamcá endmēna mo tša cuaftsobatmancá, chaobuache chē Bēngbe Bētsá ntšamo chabe básenga imomnoma jinŷanŷiyama ora. 20 Er lempe ntšamo Bēngbe Bētsá tojamcá, mora ndoñe yontoservena ntšamo chaotsemnama cha tojanjuabocá. Chca tojanopasá, ndoñe chē lempe ntšamo cha tojanmcá chca chaotsemnama tojánbošenayeca, ndayá cabá chē soyēnga tojanmentsana, Adán bacna soye tojanmentsana, Bēngbe Bētsá tojanjuabó ntšamo cha tojanmcá josérvíama ndoñe ndayama ntšamo cha tempo tojanjuabocá. Pero lempe ntšamo Bēngbe Bētsá tojanmcá entsemna mo cuaftsobatmancá canŷe te, ndēmua ora chē soyēnga chaoservema cha yochjamama jtsetatšembēse, ntšamo quem luare jobojátšama ora chama cha yojanjuabnacá; 21 Bēngbe Bētsá canŷe te yochjama lempe ya ndoñe más chaondetsopochocama. Y chora, ntšamo Bēngbe Bētsá yochjamcá chabe básenga chamotsemnama, lempe ntšamo cha yojanjuabnacá, chabe uámanana y buashinŷinŷanana jtsebmomnama, cachcá yochjama lempe chē cha tojanma soyēngaca.

22 Er bēnga mondétatsëmbo lempe ntšamo Bēngbe Bētsá tojanmcá mēntscoñama yomna mo canŷe shembása šešona jtsebmomnama ora tbojtsetsetšama tojtsobēsncá; er lempe ntšamo cha tojanmcá entsemna mo tša cuaftsebošcá Bēngbe Bētsá chaomama, chē soyēnga chaoservema ndayama cha tempo tojanjuabocá. 23 Pero ndoñe nŷe chē lempe ntšamo Bēngbe Bētsá tojanmcá yojtsemna mo chē shembasacá, sinó bēngnaca; y bēnga ainaniñe mondbomna chē Uámana Espíritu, y chē soye endmēna ndayá natsana bēnga tmojanóyēngacñe, chē Bēngbe Bētsá bētscá soyēnga ŷochjátšatayentšana; bēnga bēngbe ainanoca tša jesobēsnyana, bēnga chabe básenga chamotsemnama Bēngbe Bētsá chaomama mondobátmanēntscuana, y chca, Bēngbe Bētsá chaoma bēnga ndocna te ndopochócama cuerpēnga chamotsebmomnama. 24 Bēnga, Bēngbe Bētsábeñe jtsošbuáchiyēse monjobátmana ntšamo cha tojanayancá chaomama, y chíyeca cha bēnga ŷojatsebacá; pero ndayama tmobatmancá, ya tojtsēchnējuanama bēnga tmojtsonŷase, chora chama ya ndoñe ntjátobatmanēngana. Er ndocná jatobátmanana chē ndayá jinŷama ya tojobenacá. 25 Pero ndayama bēnga tmobatmancá, cabá ndoñe jinŷama tmontsobena soye tojtsemnēse, bēnga jtsamnana Bēngbe Bētsábeñe jt-sobátmanana, uantadēnga jtsemnēse, ntšamo tojayancá Bēngbe Bētsá chaomēntscuana.

26 Uámana Espíritnaca bēnga ŷochandbētsējabuachana, er bēnga ainaniñe ndoñe corente ntsošbuáchiyana. Bēnga ndoñe quemuátstatšëmbo Bēngbe Bētsáftaca jencuéntana ntšamo ndegombre tšabá yomncá; pero cach Espíritu Bēngbe Bētsábioye bēngbíama jtsotjanañana, mo chca ora chabe ainanoca tša cuaftsobēsncá; y ndayá chca ora tbojtsotjanañamna, bēnga ndoñe ntjobenayana bēngbe palábraca chama jóyebuambayama. 27 Y Bēngbe Bētsana, ntšamo entšanga ainanoca tmojtsebošcá yonŷá, y ntšamo chē Espíritu jayanama tojtsebošcá yotátšëmbo, er chē Espíritu chabe entšangbíama íbotjanañe, ntšamo Bēngbe Bētsá yobošcá.

Bēnga ayēnjanayēngama más tmojábocana

28 Y bēnga mondétatsëmbo, Bēngbe Bētsá nŷetsca soyēnguiñe inétsama cha imobobonshánēngbe tšabíama, ndēmuanŷyēnga cha tojáchembo

chabe entsanga chamotsemnama, ntšamo cha jamama yojanjuabnacá. ²⁹ Jesucristbeñe imošbuachéngbiamna, Bèngbe Bètsá quem luare tojanma orscana yojanjuabná y chénga tojanabacacá chca chamotsemnama, y ché tempšana tojaninýnana chénga chabe Uaquiñacá chamotsemnama; chca, chabe Uaquiñá chë bëtscá catšátangbeñe chë natsaná chaotsemnama. ³⁰ Y chë Bèngbe Bètsá chca tojánabacacangnaca, tojánachembo chabe entsanga chamotsemnama; chéngbiamna tojanma chabe bominiñe tšábenga chamotsemnama, y chéngbiámnaca yochjama chabe uámanana y obenanentšana chamotsebomnama.

³¹ Y asna, ¿chë soyèngama ntšamo mochjayana? Co Bèngbe Bètsá bèngaftaca tojtsemnëse, bènga jáyèñjanama ndocná queochatobenaye ca. ³² Cha tondaye tonjanma chabe Uaquiñá jasúfriama ndoñe chabondëtsemnama, sinó tojanalesenciá entsanga chamóba, nyetsca bèngbe tšabiamna. Bèngbe Bètsá chabe Uaquiñáftaca chca tojanmëse, ndegombre Bèngbe Bètsá lempe sochanjátátaye. ³³ ¿Nda nanjobenaye jayanama chë Bèngbe Bètsá tojábacacanga bacna soyènga tmojama y castigánènga chamotsemna ca? Ndocná; er cach Bèngbe Bètsá endmëna nda tojayana bènga chabe bominiñe tšábenga imomna ca. ³⁴ Y asna, ¿nda nanjobenaye jayanama bènga castigánènga jtsemnama sojtsamna ca? ¿Cristo Jesús cha yojtsemna? Ndoñe. Cristo, nda bèngbiamna tojanóbana, pero cabá más, ndabiamna Bèngbe Bètsá tojanma cháuatayenama, y mora Bèngbe Bètsabe catšbioica yojtsetbemana, jamándama y puerte bëtscá chentše jtsemnama; y choca, chánaca bèngbiamna Bèngbe Bètsábioye ibotjanañe. ³⁵ ¿Ndayá nanjobenaye Crístbentšana, chë tša šondababuanýeshaná bentšana bènga jtsajuánayana? ¿Padecena soyènguiñe jtsemnana, tša jtsetsetšana, bènga chamosufrima ínýenga tmojtsama ora, tondaye saná shèntsana ora, tondaye entsáyá tmontsábomna ora, o resjo bèngbiamna tojtsemna ora, o bènga jtsébáyama ínýenga tmojtseboše ora? ³⁶ Ntšamo Bèngbe Bètsabe uabemana palabrenguiñe endayancá, canýe entsá Bèngbe Bètsábioye ibojauyana ora:

Acbe causa entsanga cada te šontsètsètsná bènga jtsébáyama ca;

entsanga bèngbioye nýe ntšámnaca jtsaborlánana;

bèngaftaca jamana mo chë jobáyama oveshèngaftaca mondbetsamcá ca.

³⁷ Pero ndoñe; nyetsca chë soyènguentsana bèngna ayèñjanayèngama más tmonjábocana, cha bènga šuababuánýeshanayeca. ³⁸ Er atše tšabá sèndétatšëmbo tondaye yondobena, bènga Bèngbe Bètsábentšana, chë tša šondababuanýeshaná bentšana jtsajuánayana: masque ainènga o obanènga tmojtsemna; ni angelènga, ni améndayènga chca jamama quemátobena; ni chë mora yojtsèchnèjuana soyènga, ni chë más chcoye yochjopása soyènga; ni ndocna obenana cach ndoñe; ³⁹ ndocna quem luarentša tsbanánoca soye, ni quem luarentša tajsoica soye; ni ndocna inýe soye ntšamo Bèngbe Bètsá tojamcá, quenátobena chca bènga jtsajuánayama. ¡Ndocna soye quenátobena bènga Bèngbe Bètsábentšana, chë bènga šondababuanýeshaná bentšana jtsajuánayana, chë Cristo Jesús Bèngbe Utabnáftaca Bèngbe Bètsá šojanýanyé bonshánentšana!

9

Bèngbe Bètsá Israeloca entsanga tojabacacá, uámanènga chamotsemnama

¹ Atše, Crísoftaca cánjiñe mo canýacá quetsomñecana, ntšamo sentsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemándánëse, chë šmonybëuyana tšabá o ndoñe tšabá tijamama, šmontsatsëtsná atše ndoñe stsebosterama. ²Ndegombre, atše puerthe ngmënaca atšbe entsangbiamia, chë Israeloquëngbiamia sëntsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa. ³Tšabá tojtsemnëse, atše stjobenaye jtsebošana cach atše Bëngbe Bëtsábeyeca nýetsca tescama castiganá y Crístbentsána luaroca jtsemnama, atšbe entsanga, chë cach atšcá buiñe bomna entsanga jujabuáchama. ⁴Chënga mondmëna chë Israeloca entsanga, chë Bëngbe Bëtsabe bocacana entsanga. Bëngbe Bëtsá chënga chabe basengcá tojánabiamia y chë tša bëtsá y uamaná cha yomnama chënga tojaninýanýé. Bëngbe Bëtsá ba soye chënga tojanabuayená ndayá cha chëngbiamia yojánboše y ndayá chëngbiamia jamama, y chë ley chëngbe cucuatšíñe tojánáboshjona. Chënga monjántatsëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana. ⁵Chënga mondmëna chë bëngbe tempsca uámana bëts taitangbentsánënga, y Crístnaca mo canýe entsacá, mo canýe Israeloca entsangbentsacá tojánabo; y cha endmëna Bëngbe Bëtsá, nýetsca soyënguiñe mandayá. Nýetsca entsanga nýets tempo cha chamotsatschuaná. Chca chaotsemna.

⁶ Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nýetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna. ⁷Ni nýetsca Abrahámbentsána entsanga, ndoñe chabe ndegombre básenga quemátsmëna; er Bëngbe Bëtsá Abrahámioye tbojanianyana: “Chë ácbentsána entsanga nýe Isaácbentsána mochanjabo ca.” ⁸Chca entsayana, bëngna ndoñe šontsamna jtsejuabnayana Abrahámbentsána nýetsca entsangbiamia mo Bëngbe Bëtsabe basengcá; inýetsá, nýe chë Bëngbe Bëtsá tbojanšbuachenáyeca Abraham yojánabamna básengbiamia cocayé entsemna jtsejuabnayana, Abrahámbentsána ndegombre entsanga bëtsemnama. ⁹Er mëntšá endmëna ntšamo Bëngbe Bëtsá tojánayana, Abrahámioye tbojanšbuachená ora: “Camëntša tempo entsba uata chanjésabo, y Sara canýe šešona bochántsebomna ca.”

¹⁰ Pero nýe nýetsá ndoñe quenátsmëna. Chë Rebecbe uta básatna canýe taitá ibnabomna, bëngbe tempsca bëts taitá Isaac. ¹¹⁻¹² Bëngbe Bëtsá, Rebécbioye tbojanianyana: “Acbe mayor uaquiñá, acbe ngomënche uaquiñábioye bochanjasérvia ca.” Cha chca tojánayana jinýinýiyama chë básatbentsána canýa cha tbojánbocacama, Jacob, y ndoñe chë inýe basa, Esaú, chca jamama tempo cha tojanjuabóyeca. Rebécbioye chca tbojanianyana chë básata cabá ndonýna ora, y ni canýe basa cabá ndocna soye ndama ora. Y chca, ntšamo tojanopasacana, tojanopasá chë básatbentsána canýa y ndoñe chë inýa chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama. ¹³Ntšamo Bëngbe Bëtsá chabe uabemana palabrenguiñe tojanayancá: “Jacob sënjanbobonshana, y Esaú sënjanáboyënja ca.”

¹⁴ Y asna, ¿ntšamo mochiyana? ¿Bëngbe Bëtsá ndoñe cachcá nýetscángaftaca endëtsemna ca? ¡Ndoñe, ndegombre ndoñe! ¹⁵ Er Bëngbe Bëtsá Moisésbioye tbojanianyana:

Atše šochanjóngmia nda chaitsebošabiamia,

y nda chaitsebošá chanjalastéma ca.

¹⁶ Y chca, Bèngbe Bètsá canye entsá jabocacayana, ndoñe ndayá chë entsá tojtsebošama o tojamama, ndayá Bèngbe Bètsá tbojalastemama. ¹⁷ Er Bèngbe Bètsabe uabemana palabrengüiñe, Faraón chë Egiptoca réybioye cha tbojaniana: “Atše rey tbonjábema, tša bëtscá atšbe obenana yomnama nyetscanga ácbeñe chayinñanñema, y nyets luarentša entsanga atšbiana chamotatšëmbonama ca.” ¹⁸ Y chca, Bèngbe Bètsá jalastémama nda tojtsebošábioye, y nda tojtsebošábioye jalesénciana chabiana nduaue-naná chaotsomñama.

¹⁹ Pero ndánaca tšëngaftanguentsá šuatjatjaye: “Bèngbe Bètsá chca tojtsamëse, ¿ntšamo cha nantsobena jayanana canye entsá bacna soye tojama ca? ¿Nda nanjobenaye chë ndayá Bèngbe Bètsá tojtsebošama corente contra jtsemnana?” ²⁰ Pero, nye entsá quecotsemñecá, ¿ntšamo catjobenaye tša uamaná comna ca jtsejuabnayana, Bèngbe Bètsá jatstjanayama ndáyeca canye soye chca yojtama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?”” ²¹ Chë fshantse soyënga pormayá jtsoobenana canye fshantsentsana jamana, canye matbaja uámana tescama, y inñajna cada te chaotsoservénama. Cachcá, Bèngbe Bètsá jtsoobenana jamana ntšamo cha tojtsebošcá, ndayá cha tojama sóyeca.

²² Bèngbe Bètsá yojáboše jinñanñiyama entsángaftaca tbojánetnama, chëngbe bacna soyëngama; y yojáboše cha puerte obená yomnama jinñanñiyama. Chíyeca, chënga tša yojanëuantana, chënga chë ndëmuanñengbiana Bèngbe Bètsá yochjánayana chëngbe bacna soyëngama castigánënga jtsemnana yojánamna ca, chë ndëmuanñënga jtsapochócama Bèngbe Bètsá yojtšanprontana. ²³ Y chánaca yojáboše jinñanñiyama cha puerte uamaná y bëtscá yomnama. Cha tojama, bënga chë ndëmuanñënga cha šojanalastemá, chabe obenanentsana y uámananentsana chamotsebonnama; y cha tempo chca tojanjuabó bënga uámanënga y bëtscétsanga jábiamama. ²⁴ Bënga mondmëna chë ndëmuanñënga Bèngbe Bètsá chama šojánachembo, inñënga judío entsanguentsana, y inñënga ndoñe judiëngbentsana. ²⁵ Ntšamo chabe uabemana palabrengüiñe, Oséasbe librëšañe Bèngbe Bètsá tojanayancá:

Entsanga ndoñe átšbenga mondmënënga, chënga “atšbe entsanga ca” chantsëbobuatma;
y canye luarentša entsanga ndoñe sënjánabubuanñëshanënga, chënga “atšbe bonshánënga ca” chantsëbobuatma.

²⁶ Y cach luare ndayentše Bèngbe Bètsá tojánayana: “Tšëngaftanga atšbe entsanga ndoñe quešmátsmëna ca”,

cachentše Bèngbe Bètsá ainá chënga echanjáuyana “atšbe básenga ca”.

²⁷ Israeloca entsangbiana, Isaías jabuachana tojánayana:

Masque Israeloca entsanga puerte banga chamotsemna, nña mo chë mar béjayoca chëñyañe casajcá,

Bèngbe Bètsá nye báseftanga chentsana echanjätsebacaye;

²⁸ er, ndoñe bën y Bèngbe Utabná canye y nyetsca tescama echanjayana, nyets quem luarentša entsangbiana ndayá chënga tmojamama tšabá o ndoñe tšabá bëtsemnana,

y chëngaftaca echanjama ntšamo chaojayancá ca —cha tojánayana.

²⁹ Ntšamo Isaías tojanayancá, Bèngbe Bètsá Israeloca entsángaftaca ntšamo jamama tojanoyebuambá ora:

Bëngbe Utabná, nÿets obenana bomná,
 ínÿenga bënga jtsapochócama cha tojanalesenciá ora,
 báseftanga bëngbe entšanguentšénga ainénga chamotsomñama ndoñe
 maténjanmése,
 bënga mora pochocánénga mamojtsemna, mo chë Sodoma y Gomorra
 puebléngoca entšangcá ca,
 cha nÿetscanga y nÿetsca tescama tojtsanapochócaye ca.

Israeloca entšanga y chë tsabe noticiénga

³⁰ Chcasna, mora mëntšá mochjayana: ndoñe judiénga tondaye monjánama Bëngbe Bëtsabe bominiñe tsábenga jtsemnama, pero cha tojanma chénga chabe bominiñe tsábenga chamotsemnama, chénga chábeñe imojtsošbuáchiyama. ³¹ Pero, Israeloca entšanga imojánboše Bëngbe Bëtsabe bominiñe tsábenga jtsemnama, ntšamo chë leyiñe iuayancá jtsamése; pero ndoñe chca tmonjanobená. ³² ¿Y ndáyeca chca? Co chë Bëngbe Bëtsabe bominiñe tsábenga jtsemnama, chábeñe jtsosbuáchiyése, chénga tondaye monjánama causa chca, sinó chca jtsemnama imojánboše nÿe ntšamo leyiñe iuayancá jtsamése. Y chca, chéngna Jesús tmojtsanaboté, ntšamo chë Bëngbe Bëtsabe uabemana palabrénguiñe chë tmojtsanábotengbiana endayancá, chéngbiana cha yomna mo chë ndëtsbé ndayiñe chénga jtsojestjamcá ca. ³³ Bëngbe Bëtsabe uabemana palabrénguiñe cha chca tojánayana:

Smochjinÿe, atše sënjama Jerusalenentše canÿa chaotsemna, y cha endmëna mo ndëtsbecá ndayentše chénga mochjojestje, y canÿe peñéscá ndayése yochjama chénga chamotsótsatšama; pero nda chábeñe tojtsosbuaché, ndocna te nÿe bonamente queochátobatmana ca.

10

¹ Jesucristbeyeca catšátanga, atše nÿets ainánaca sëntseboše y Bëngbe Bëtsá sëntseimpadana, cha Israeloca entšanga cháuatsebacama. ² Atše sëndétatšëmbo y sëntsobena chéngbiana jayanama, chénga puerte mondboše Bëngbe Bëtsá jaserviama, pero ntšamo chénga yojtsésertancá, ntšamo Bëngbe Bëtsá jaserviama yojtsamnamna, ndoñe quenátsmëna ntšamo ndegombre yomncá. ³ Chénga ndoñe tonjanésertá ntšamo Bëngbe Bëtsá inétsama entšanga chabe bominiñe tsábenga chamotsemnama, y cachénga tmojánanguango ntšamo jamése jobenayama Bëngbe Bëtsabe bominiñe tsábenga jtsemnama; pero ndoñe chca tmonjanobená, chë entšanga chabe bominiñe tsábenga chamotsemnama ntšamo Bëngbe Bëtsá inetsamcá ainánaca ntjoyéngacñécá. ⁴ Er Cristo tojama entšanga ndoñe chamondétsama ntšamo leyiñe iuayancá, Bëngbe Bëtsabe bominiñe tsábenga jtsemnama, chca, chénga chamobenama chabe bominiñe tsábenga jtsemnama, Crístbeñe jtsosbuáchiyése.

⁵ Chë Bëngbe Bëtsabe bominiñe tsábenga jtsemnama bošéngbiana, ntšamo leyiñe iuayancá jtsamése, Moisés mëntšá tojánayana, chéngbiana tojanábema ora: “Nda tojtsama nÿetsca mandénga ntšamo leyénguiñe endayancá, tsabe vida echántsebomna, nÿets tempo chë leyéngaca mandaná ca.” ⁶ Mëntšá endmëna ntšamo Bëngbe Bëtsabe uabemana palabrénguiñe iuayana, entšanga chabe bominiñe tsábenga chamotsemnama ntšamo cha inétsamama, Jesucristbeñe jtsosbuáchiyése: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye

chaotsmama); ⁷ o, ‘¿Chë obanënga imomna luaroye yochjâtsma ca?’ (chca endmëna ndayá Cristo chë obanënga imomna luarentšana chaot-sjuama).” ⁸ Ntšamo Bëngbe Bëtsabe uabemana palabrënguiñe iuayancá mëntšá endmëna: “Tšëngaftanga paselo šmontsobena ntšamo Bëngbe Bëtsá tojabuayenacá jouenama, tšëngaftanga ya chama palabrëngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca. ⁹ Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bëtsá tojanmama, nyëts ainánaca tcojtsošbuáchese, Bëngbe Bëtsá cmochjatsbocá ca. ¹⁰ Er ainanoca bënga Jesucristbeñe jtsošbuáchiyana y Bëngbe Bëtsá jamana cachabe bominyiñe tšábenga chamotsemnana; palabrëngaca bënga jinÿanÿiyana ndegombre Jesucristbeñe imojtsošbuáchema, y Bëngbe Bëtsá bënga játsebacana.

¹¹ Er Bëngbe Bëtsabe uabemana palabrënguiñe mëntšá endayana: “Nda Bëngbe Bëtsábeñe tojtsošbuaché, ndocna te nyë bonamente queochátobatmana ca.” ¹² Judiënga y ndoñe judiënga atsebacánënga mondëna cach sóyeca, er canÿe Utabná nyëtscangbe Utabná endmëna, y cha tmojtsošëmbuanëngbiama, cha bëtsá jtsamana. ¹³ Er Bëngbe Bëtsabe uabemana palabrënguiñe mëntšá endayana: “Ndánaca Bëngbe Utabná tbojtsošëmbuanábioye, cha bochanjatsbocá ca.” ¹⁴ Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiamá jóyebuambayama ndoñe tmonjouenëse? ¿Y ntšamo chabiamá mochjouena, chabe buayenana soyënga chënga jáuyanama ndocná tontsemnëse? ¹⁵ ¿Y ntšamo chabe buayenánana mochtsabuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrënguiñe endayancá: “¡Tša tšabá chë buayenánana abuátambayënga tmojáshjajna ora ca!”

¹⁶ Pero nyëtscanga chë tšabe noticiënga ndoñe ntjoyeunayana. Cach Isaías mëntšá tojánayana: “Utabná, ¿nda chë mondabuayiyná soyënguiñe yojtsošbuaché ca?” ¹⁷ Chcasna, chë tšabe noticiënga jouenëse, entšanga jobenayana Jesucristbeñe jtsošbuáchiyana; y nda Cristbiamá tojtsošbuayiynase, entšanga chabe buayenánana jouenana.

¹⁸ Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrënguiñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nyëts quem luariñe tojóshjango, y chëngbe palabrënga nyëts luarënguentsa entšangbenache tojuáshana ca.

¹⁹ Pero cachiñe šcotjá: ¿Israeloca entšanga chë buayenánana ndoñe tonjanësertá ca? Natsana, Moisés mëntšá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mochtsanjuabnaya tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmotsiyentsbuašama, chënga chë ndoñe monjamna mo tšëngaftangcá atšbe entšanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

²⁰ Isaíasnaca, Bëngbe Bëtsabiamá tojanoyebuambá ora, puerte añémoca tojánayana:

Chë atše ndoñe šmondënguanga, šmonjínjena;
 y chë atšbiamana ndoñe mondënotíciangiobioye sënjenonjinyé ca.
²¹ Pero Israeloca entšangbiamana mëntšá tojánayana:
 Njyets tempo atše tša sënjánama, chënga átšeftaca tšabá tempcá chamot-
 satsmënama,
 pero chënga ndoñe chemátanbošena jouenama, y atšbe contra
 monjëtsemna ca.

11

*Bëngbe Bëtsá, Israeloca entšangbiamana tšabe juabna yobomnama to-
 jinjányé*

¹ Y as mora šcotjá: ¿Bëngbe Bëtsá chabe entšanga tojtsanëbaté?
 ¡Ndoñe, ndegombre ndoñe! Cach atše canye Israelocá sëndmëna,
 Abrahábentsana entsá y Benjaminbe bëts pamillentsana entsá. ² Bëngbe
 Bëtsá chabe entšanga ndoñe tonjubaté, chë tempscana tojánabacacanga.
 Tšëngaftanga šmondëtatsëmbo ntšamo Bëngbe Bëtsabe uabemana pal-
 abrënguine endayancá, Bëngbe Bëtsabe juabna oyeuambnayá Elías,
 Israeloca entšangbe contra Bëngbe Bëtsábioye cha ibojanatsëtsná ora:
³ “Bëngbe Utabná, acbe juabna oyeuambnayënga tmojtsëbaye y acbiamana
 pormana altarënga tmojtsepochochá; nye atše vídaca tijoquedá, y chënga
 montseboše átšnaca jóbama ca.” ⁴ Y mëntšá Bëngbe Bëtsá tbojanjá:
 “Atše canyësëfta uaranga boyabásenga atšbiamana sënjacuedá, Baal ndoñe
 tmonjadoranga, ndayá entšanga tmojobopormá y imojtsejuabná canye
 dios yomna ca.” ⁵ Mórncaca cachcá entsemna, judiënguentše báseftanga
 monduájamna Jesucristbeñe ošbuáchiyënga, ndëmuanyënga Bëngbe Bëtsá
 tojabacacá, cha chëngbiamana tšabe juabna bómnyeyeca. ⁶ Bëngbe Bëtsá
 entšanga jabacacayana chëngbiamana tšabe juabna bómnyeyeca; y ndoñe
 chca ntjamana ndayá entšanga tmojamama. Er ndayá tmojamama
 Bëngbe Bëtsá entšanga tojabacacase, cha nanjínjányiye cha chca inétsama,
 ndoñe nye chëngbiamana tšabe juabna bómnyeyeca.

⁷ ¿Y asna? Israeloca entšanga ndoñe chemátaninjena ntšamo Bëngbe
 Bëtsabe bominyiñe tšábenga jtsemnana, pero chënguentšënga básefta bo-
 cacánëngna aiñe tmojanobená. Bëngbe Bëtsá tojanalesenciá chë ínjenaga
 Israeloquënguentšana chabe buayenana soyënga ainaniñe ndoñe cha-
 mondóyëngacñama; ⁸ ntšamo Bëngbe Bëtsabe uabemana palabrënguine en-
 dayancá: “Bëngbe Bëtsá tojama chënga chabe soyëngama jósertama ndoñe
 chamondëtsobenama, y mëntscoñama chënga ndoñe quemátobena chabe
 soyëngama ni jinjana ni josértana, mo nduabínynënga o nduauenanënga
 cuaftsemnëngcá ca.” ⁹ Davídnaca chëngbiamana mëntšá tojánayana:

Mo chë entšanga canye fiestentše oboyejuayënga, chëngbe
 uayayëngbeyeca nye ndeolpe ishëchenëngcá,
 y mo chë bayëngbiamana uachmaniñe ishëchenëngcá, chënga mal
 chamopasama chaomama Bëngbe Bëtsá sëntseimpadana, mo
 nda ndëtšbeñe cuaftsojestjá.

Chca Bëngbe Bëtsá chaoma, chëngbe bacna soyëngama;
 y cha cháuyana chënga puerte castigánënga jtsemnana yojtsamna ca,
 bacna soyënga tmojama causa;

¹⁰ Bëngbe Bëtsá chaoma ntšamo mochjapásama chënga ndoñe chamon-
 dobená jtsetatsëmbuana,

y chaoma puerte chamosufrima, n̄yets tempo padecena soyēnguiñe jt-siyenēse ca —cha tojánayana.

Bēngbe Bētsá ndoñe judiēnga tojatsebaca

¹¹ As mora šcotjá: ¿Israeloca entšanga Bēngbe Bētsá ndoñe tmonjanoye-uná ora, cha tojánayana chēnga n̄yetsca tescama castigánēnga jtsemnana yojtsamna ca, ndocna in̄ye soye chēngbiamā ntsemncá? ¿Chēngbiamā yojamna mo chē ndētsbeñe jojéstjiana y jtētsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmēna. Chēnga Bēngbe Bētsá ndoñe chematanoyeuná causa, ndoñe judiēnga tmonjántatšēmbona ndayá bétsemnana Bēngbe Bētsábeyeca atsbocaná jtsemnana; y chē causa, mora, judiēnga, ndayá chē ndoñe judiēnga Bēngbe Bētsábentšana tmojoshachiñcá montsiyentšbuaše. ¹² Judiēnga bacna soyēnga tmojanma causa, in̄ye entšanga quem luarentše tmojobená ba tšabe soyēnga jtsebonnama. Chē judiēnga tmonjanorrebajā causa, chē ndoñe judiēnga ba tšabe bendicionēnga Bēngbe Bētsábentšana tmojoshachiñe. Y chca, chē bētscá judiēnga Bēngbe Bētsá jātsebacama, chēnga atsebácanēnga chamojtsemna ora, más bētscá tšabe bendicionēnga Bēngbe Bētsábentšana n̄yetsca entšangbiamā echántsemna.

¹³ Ntšamo mora chanjayancá, tšēngaftanga ndoñe judiēngbiamā entsemna. Bēngbe Bētsá šojichmó chabe soyēngama chē ndoñe judiēnga jábuayenama; atše sēntsejuabná puerte uámana trabajo stsebonma ca. ¹⁴ Atše sēntsobátmana, quem trabájoca atše jobenayana jamama chē cach atscá buiñe bomna entšanguentšēnga, ndayá chē ndoñe judiēnga Bēngbe Bētsábentšana tmojoshachiñcá chamotsiyentšbuaše, y chca, ndayá tijamama, Bēngbe Bētsá chēnguentšana báseftanga cháuatsebacama. ¹⁵ Er chē judiēnga Bēngbe Bētsá tojtsanēbaté ora, cha tojanma in̄ye entšanga quem luarentše cháftaca tempcá tšabá chamotsatsmēnama; y chēnga cha chamojoyeuná ora, corente tšabá echántsemna, n̄ya chēnga mo obanēnga cuabmēncá y cuaftsatayanēngcá. ¹⁶ Nda can̄ye arnin̄yentšana chē natsana tandēse Bēngbe Bētsabiamā josérviamā yojtsemna ca tojanayēse, jtsemnana mo n̄yetsana chabiamā cuaftsemncá. Can̄ye betiyentša tbētējēnga Bēngbe Bētsabiamā yojtsemna ca can̄ya tojanayēse, n̄yetsca chē betiyentša buacuafjēngnacā Bēngbe Bētsabiamā jtsemnana.

¹⁷ Chē judiēnguentše báseftanga Jesucristbeñe ndoñe montsanošbuaché ora, tšēngaftanga chē ndoñe judiēnga šmonjanobená chábeñe jtsošbuáchiyana. Y chca, judiēnga monjamna mo can̄ye jena olivo betiyentšana entšanga tmojatētše buacuafjēngcá, y tšēngaftangna mo tjoca olivo betiyentša buacuafjēnga, chē jena olivo betiyeshiñe jenēfjēngcá. Mora tšēngaftanga Bēngbe Bētsábentšana cachca tšabe soyēnga chē judiēngaftaca šmontsebonma, mo chē jena buacuafjēnga y cachentša buacuafjēnga cach tbētējentšana lempe cuaftsoyēngacañcá. ¹⁸ Ndoñe šmattsenábotamnaye, tšēngaftanga Bēngbe Bētsabe tšabe soyēnga šmojtsebonnama, chē Jesucristbeñe ndoñe montsanošbuaché judiēngbiamā yojamna soyēnga. Smochtsejuabnaye, buacuafjēngna chē tbētējēngayeca vida jtsebonnana, y ndoñe tbētējēnga chē buacuafjēngayeca; cachcá, tšēngaftanga n̄ye Bēngbe Bētsábeyeca chē tšabe soyēnga šmojtsebonma.

¹⁹ Pero tšēngaftanga šmuatjayana: “Aíñe, pero Bēngbe Bētsá básefta judiēnga tojanēbaté, Jesucristbeñe ndoñe montsanošbuaché causa;

chíyeca bēnga fsēnjanobená mo buacuafjēnga betiyiñe jenēfjēngcá chca tšabe bendicionēnga Bēngbe Bētsábentšana jójēngacñana ca.”²⁰ Ndegombre, chēnga Jesucristbeñe ndoñe montsanošbuaché causa, mo buacuetētšenēfjēngcá tmonjanoquedá, pero Jesucristbeñe šmojtsošbuáchema, tšēngaftanga šmojoquedá Bēngbe Bētsábentšana tšabe bendicionēnga jtsoyēngacañcá. Chcasna, chama ndoñe šmattsenábotamnaye; más tšabana cuedado jtsebomnana.²¹ Er Bēngbe Bētsá, chē Jesucristbeñe ndoñe montsanošbuaché judiēnga, ndoñe tonjanaperdoná, y chēnga chabe entšanga bétsemnamna, monjamna mo cach betiyentša buacuafjēngcá; tšēngaftanga, chē mo betiyiñe jena buacuafjēngcá šmomnēnga, cha cach ndoñe quecmochátaperdonaye, chábeñe ošbuáchiyana šmojtšajbanase.

²² Bētscá šmochtsejuabnaye Bēngbe Bētsá puerte tšabia yomnama, pero cha tšatjayá yomnámnaca šmochtsejuabnaye; tšatjayá endmēna chē bacna soyēnga tmojtšamēngaftaca, pero tšēngaftangaftacna puerte tšabia. Cha tšēngaftangaftaca chca echántsemna, tšēngaftanga chca chašmojtšomerecénēntscuana; pero ndoñesna, Bēngbe Bētsá echanjama tšēngaftángnaca mo buacuetētšenēfjēngcá chašmoquedama, chē tšabe bendicionēnga Bēngbe Bētsábentšana ntsoyēngacañcá.²³ Y ntšamo mora imojtsejuabnacá chē judiēnga tmojatrocá y tmojtšé Jesucristbeñe jtsošbuáchiyana, chēngnaca cachiñe chē tšabe bendicionēnga Bēngbe Bētsábentšana mochanjójyēngacñe, y mochántsemna mo betiyiñe jena buacuafjēngcá, er Bēngbe Bētsá becá obenana endbomna jamama ntšamo chē judiēnga tempo imojanbomncá cachiñe chamotsatsbomnama.²⁴ Chcasna, más paselo jtsemnana canye jena olivo betiyentša buacuatētšenēfja cach betiyiñe jētsjena, y ndoñe, chē tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chē Jesucristbeñe ndoñe montsošbuaché judiēngbiama, jóntšana jtošbuáchiyana y tšabe bendicionēnga Bēngbe Bētsábentšana jójēngacñana, tšēngaftanga ndoñe judiēnga chē tempo Bēngbe Bētsá ndoñe šmonjanábuatmēngbiama.

Bēngbe Bētsá nyetscángaftaca puerte tšabia endmēna

²⁵ Jesucristbeyeca catšátanga, atše sēntseboše tšēngaftanga chašmotsetátšēmo chē tempo Bēngbe Bētsá entšanga ndoñe tonjaninjanýe soyēngama. Atše sēntseboše tšēngaftanga quem soyēngama chašmotsetátšēmo, chca, tšēngaftanga ndoñe judiēnga chē judiēngbiama más uámanēnga šmomna ca ndoñe chašmondētsejuabnama. Ndayá Bēngbe Bētsá tempo entšanga ndoñe tonjaninjanýecá, quem soye endmēna: Bēngbe Bētsá tojalesenciá, nye baseftatescama banga Israeloquēnga Bēngbe Bētsabe soyēnga ainaniñe ndoñe chamondójyēngacñama; pero chca echántsemna, chē ndoñe judiēnguentše atsebácanēnga jtšamnama imomnēnga, atsebácanēnga chamojtšemnēntscuana.²⁶ Chca chaojopasá ora, nyetsca Israelentša entšanga atsebácanēnga mochántsemna; ntšamo Bēngbe Bētsabe uabemana palabrenguiñe endayancá:

Entšangbe atsebacayá Israelocana echanjabo,
y echanjama nyetsca Jacóbēbentšana entšanga ndoñe más vida chamondētsebomna, bacna soyēnga jtšamēse ca.

²⁷ Y mēntšá endmēna ntšamo chēngbiama chjašebuachená:

chënga játsebacana, chëngbe bacna soyëngama chajaperdónaye ora ca — chiñe endayana.

²⁸ Chë tšabe noticiënga tmojtsanaboté causa, judiënga Bëngbe Bëtsabe uayayënga mondmëna, chca, tšëngaftangbe tšabiamana chaotsemnana. Pero Bëngbe Bëtsá tojánabacayeca, chëngnaca Bëngbe Bëtsabe bonshánënga mondmëna, er Bëngbe Bëtsá chëngbe tempsca uámana bëts taitanga chca tojanašebuachená. ²⁹ Chca endmëna, er Bëngbe Bëtsá ndocna te juabna ntjatrócana; nyetscanga chabe entšanga chamotsemnana tojáchembënga, nyets tempo cha echántsababuanjeshana, y echanjama chëngbeñe tšabe bendicionënga chaotsemnana. ³⁰ Tšëngaftanga ndoñe judiënga tempo ndoñe šmonjánama ntšamo Bëngbe Bëtsá inabošcá; y mora, Bëngbe Bëtsá tcmojalastemá, judiënga Bëngbe Bëtsá ndoñe tmonjoyeuná causa. ³¹ Cachcá, Bëngbe Bëtsá tšëngaftanga tcmojalastemama, judiënga montsemna chë Bëngbe Bëtsá ndoñe montsobedecënënga, chca, Bëngbe Bëtsá chëngnaca cháualastemama. ³² Er Bëngbe Bëtsá tojinjanyé, cha ndoñe ntjoyeunayama juabnëngaca nyetscanga mandánënga imomnana, chca, nyetscanga jálastemama cha jobenayama.

³³ ¡Ndegombre, Bëngbe Bëtsá nyetscangbiamana puente tšabia endmëna, puente osertaná y puente obiashjachá! Ndocná quenátobena ínÿenga jábuayenama ndayá Bëngbe Bëtsá jamama inetsejuabnaycá, y ndocná quenátobena corente josértana ntšamo cha inetsamcá. ³⁴ Ntšamo Bëngbe Bëtsabe uabemana palabrënguiñe endayancá:

Ndocná quenátstatsëmbo ntšamo Bëngbe Bëtsá inetsejuabnaycá;
ndocná quenátobena cha jábuayenama ndayá jamana ibomnana.

³⁵ Ndocná quenátobena ndayánaca cha natsana jshatsetayana, chë tbojatsetabiamana ndebená cha jatsmënana,
y chë ndebënana ndayánaca jtoyiyama chabotsemnana ca.

³⁶ Er lempe cha tojama, lempe cha iútabna, y lempe chabiamana yomna. ¡Nyetscanga nyetsca tescama cha chamotsatschuaná! Chca chaotsemna.

12

Ntšamo jtsiyenëse Bëngbe Bëtsá jtse servénama

¹ Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puente cbontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórana ca, Bëngbe Bëtsá jadórana mo ndayá cuafjobacá y cuafjuatšëmboncá, mo cabá ainá cuaftsomñcá. Smochjauyana tšëngaftanga sempre šmochtsentšena cha servénana y jtsamëse cha tšabá bëngaftaca chaotsemnana. As, chca chašmojtsama ora, ndegombre oyejuayá Bëngbe Bëtsá šmochántsebiamnaye. ² Ndoñe šmattsiyena jtsamëse ntšamo chë nye quem luarama enójuabnaye entšanga monduamancá, y šmochjaleséncia Bëngbe Bëtsá mo tsëm entšangcá chácmabiamama, tšëngaftangbe ainana y juabna mo tsëmcá chaomëse. Chca, tšëngaftanga šmochanjobenaye jtsejuabnayana y šmochántsetatsëmbo ntšamo Bëngbe Bëtsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnana.

³ Ndayá Bëngbe Bëtsá atšbiamana tšabá jtsejuabnayešë šojatsetama, nyetsca tšëngaftanga cbochjáuyana, ndocná cachabiamana chaondëtsejuabná más uamaná yomna ca, nye ntsachetšá jtsenójuabnayana ibomna nyetšá.

Más tšabá, cada ona cachabiamá tšabá chaotsenujuabná, y chca chaotsenujuabná ntšamo chabe ošbuáchiyana yomncá, chca, chë Bëngbe Bëtsá tbojatšetá ošbuáchiyana chabiamá chaotsetrabájama. ⁴ Er, ntšamo bënga cada ona mondbomna canÿe cuerpo y chë cuerpiñe ba soyënga jtsebonnana, y nÿetsca soyënga ndoñe cach soyama cuerpiñe ntoservénana, ⁵ cachcá bënga ošbuáchiyënga, masque bëtscanga imomna, Crístoftaca cánÿiñe mo canÿacá mondménayeca, bënga mondmëna mo chabe cuerpo cuaftsemncá, y cada ona cánÿiñe mo canÿacá nÿetscángaftaca.

⁶ Bëngbe Bëtsá tojama bënga cada ona chamotsebonnana ndoñe cachca chabe tšetana obenana, ntšamo Bëngbe Bëtsá cada ona bëngbe tšabiamá inajuabnycá. Y chabe juábnaca bënga jtsóyebuambnayama jt-sobenama Bëngbe Bëtsá tojamëse, chca mochtsama ntsachetšá chábeñe bëngbe ošbuáchiyana yomncá. ⁷ Ošbuáchiyënga bëtscá jaserviama bënga chamotsobenama Bëngbe Bëtsá tojamëse, chca mochtsama. Tšabá jtsabuátambayama bënga chamotsobenama Bëngbe Bëtsá tojamëse, chca mochtsama. ⁸ Inÿënga jañëmuama bënga chamotsobenama Bëngbe Bëtsá tojamëse, chca šontsamna. Lempe ntšamo bënga tmobomncá inÿëngbiámnaca chaotsemnana bënga jamama chamotsobenama Bëngbe Bëtsá tojamëse, nÿets ainánaca chca šontsamna. Amëndayënga jtsemnana bënga chamotsobenama Bëngbe Bëtsá tojamëse, šontsamna bëtscá jamana tšabá jtsamëndayama. Inÿënga jálastemama bënga chamotsobenama Bëngbe Bëtsá tojamëse, šontsamna oyejuayënga chca jamana.

Ntšamo bënga Jesucristbeñe ošbuáchiyënga jtsamana šojtsamna

⁹ Inÿa chašmojtsebobonshana ora, nÿets ainánaca chca šmochtsama. Ndayá yomna ndoñe tšabe soye šmochtsaboté y chentsana šmochtsojuánañe; šmochtsentšena ntšamo tšabá yomncá jtsamama. ¹⁰ Cmontsamna nÿetscanga puerte jtsebobonshánana, Jesucristbeyeca catšátanga quetsomñecá, chë inÿënga bëngbiama más uámanënga imomna ca jtsejuabnayëse.

¹¹ Ndoñe oyënjayënga šmattsemna, ndayá bëtscá Bëngbe Utabnabiamá šmochtsetrabájaye; ainaniñe corente añemo jtsebonnëse, Bëngbe Utabná sempre šmochtseservena.

¹² Tšëngaftanga Bëngbe Bëtsábeñe jtsošbuáchiyëse, chábeñe šmobatmánayeca, puerte oyejuayënga šmochtsemna; padecena soyënguiñe chašmojtsachnëjuana ora, puerte uantadënga šmochtsemna, y sempre Bëngbe Bëtsáftaca šmochtsencuëntaye.

¹³ Bëngbe Bëtsabe entšanga opresido bomnënga šmochjújabuache, y šmochtseprontana tšëngaftangbe yebnentše posada inÿënga júyentšamiama.

¹⁴ Bëngbe Bëtsá šmochtseimpadana, chë tšëngaftanga chašmosufrima amëngbiama tšabe bendicionënga cha chaotsamama; añe, cha šmochjaimpáda tšabe bendicionënga chëngbiama chaotsamama, bacna soyënga ndoñe.

¹⁵ Oyejuayënga inÿëngaftaca šmochtsemna, chënga oyejuayënga chamojtsemna ora; ngménaca šmochtsemna, inÿënga ngmëniñe chamojtsemna ora.

¹⁶ Smochtsiyena nÿetscanga jtseñeyeanëse. Nÿe cach tšëngaftanga uámanënga ndoñe šmattsenobiamnaye, sinó chë nduámanënga imomnëngaftaca tšabá mándbomnënga šmochtsemna. Ndoñe šmattsejuabnaye yapa osertánënga šmomna ca.

17 Inyenga bacá chacmojtsaborlana ora, ndoñe šmattsatéché nanguaye; corente šmochtsentšena ntšamo nyetsca entšangbiana tšabá yomncá jtsamama. 18 Ntsachetšá šmojobenacá, lempe šmochtsama natjémbana nyetsca entšangaftaca jtsiyenama. 19 Atšbe bonshánēnga, ínŷenga bacá chacmojtsaborlana ora, ndoñe šmatjama chēnga chē causa chamot-sesufrínama, ndayá Bēngbe Bētsá šmochjaleséncia chēnga cháúacastigama; er Bēngbe Bētsabe uabemana palabrēnguiñe cha tojánayana: “Atše chan-jama chēnga chamosufrima, ínŷenga chamosufrima tmojama causa; y chēnga chanjácastigaye, ínŷengbioye bacá tmojaborlá causa ca.” 20 Chca játamamna, mēntšá šmochjama, ntšamo cachánaca tojanayancá:

Acbe uayayá tbojtseshēntsanēse, saná cochjacaredáda,

y tbojtsajuendase, cochjuáfsiye.

Chca chacojamēse, cochanjama cha puerte chaotsēuatja ntšamo tcmo-jaborlana,

y ainana corente chabotsetsena, mo chebana iñbenga chabe bestšasiñe cuafjacacá ca.

21 Ndoñe šmatjaleséncia, ntšamo ndoñe tšabá tontsemncá tšēngaftanga chacmayēnjanama. Chamna, ntšamo tšabá yomncá jtsamēse, chē ndoñe tšabe soye šmochjayēnjaná.

13

1 Nyetsca entšanga entsamna jtsamana ntšamo chē amēndayēnga tmojtsamēndacá, er ndocná obenana ntsebomnana, Bēngbe Bētsá ndoñe chca tbonjalesenciase, y nŷe Bēngbe Bētsá tojama amēndayēnga obenana chamotsebomnama. 2 Chca, chē amēndayēngbe contra tmojtsemnēngna, ntšamo chaotsemnana Bēngbe Bētsá tojayancá contra chēnga jtsemnana; y chca contra tmojtsemnēngna, castigánēnga mochántsemna; 3 er ntšamo tšabá yomncá amēnga, ndoñe quenátamna ndayama chē amēndayēnga jatebēuatjana, nŷe chē bacna soye amēngna aiñe. Tšēngaftanga šmojtseboše jtsiyenama chē amēndayēngbioye ntjatebēuatjá; chcasna, ntšamo tšabá yomncá šmochtsama, y chē amēndayēngna tšabe bomínŷeca mochantsonŷaye ntšamo chašmojtsamcá; 4 er chē amēndayēngna Bēngbe Bētsabe trabajo amēnga mondmēna, tšēngaftangbe tšabiana. Pero bacna soyēnga šmojtsamēsna, cmontsamna jtsiyenana chē amēndayēnga jtsebēuatjēse, er chēnga jacastigama obenana mondbomna, y chca mondbétsama. Chēnga, Bēngbe Bētsabe mándoca jayanana chē bacna soye amēnga ndoñe tšabá tmonjama ca, y jamana chēnga chamosufrima. 5 Chíyeca, jtseytana ntšamo chē amēndayēnga tmojtsichamcá jtsamana, pero ndoñe nŷe chē castigo ndoñe chašmondētsebomnama, ndoñe chca šmontsama causa, sinó chē ainanentša tšabe juabnēnga ntšamo tbojtsētsētnacá joyeunayama yómnyayeca. 6 Cachca soyēngama, amēndayēngbiana impuesto tšēngaftanga jtsatsquécjnayana; er chē amēndayēnga Bēngbe Bētsabe oservénēnga mondmēna, ntšamo chiñe jtsamama tojtsamncá corente tmojtsentšena ora.

7 Chcasna, tšēngaftanga šmochjáyentšbuachiye ntšamo chēnga jtsebom-nama tojtsamncá. Chē crocénana entšanga ayēngacayēngbioye, ndaye impuéstnaca šmochtēbuénaye; chēngna šmochtsarrespetana ntšamo yomncá, y chēnga uámanēnga chamotsemnana šmochtsejuabnaye.

⁸ Crocénana inŷa jĕtsĕntšabuáchiyama chacmojtsamnĕse, nŷe ntoyiycá ndoñe šmatjoquĕda, nŷets tempo ndebĕnĕnga; nŷe quem soye sempre šmochtsama: nŷetscanga šmochtsenbobonshana; er nda ndĕmua entšábioye tbojtsebobonshana, ya tojama ntšamo leyiñe yomandancá. ⁹ Quem mandĕnga, “acbe shema inŷaftaca ndoñe cattseingñaye, inŷa ndoñe catjóba, ndoñe catjatbĕba, inŷa tojtsebmna soye ndoñe nŷe acbiama cattseboše”, y chĕ inŷe mandĕnga leyiñe lempe quem mandiñe entsemna: “Ndĕmua entšánaca cochtsebobonshana ntšamo cach aca cuenobobonshancá”. ¹⁰ Nda ndĕmua entšábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánĕse, entšá jamana lempe ntšamo leyiñe yomandancá.

¹¹ Chĕ soyĕnga cmontsamna jtsamana, er bĕnga mondĕtatšĕmbo ya chĕ uámana tempini imojtsiyenama, chĕ mocna ora šojtsamna prontánĕnga jtsemnana, mo ocnayentšana cuafjofšenangcá, Jesucristo jaserviama jtsentšĕnĕse. Chca cmontsamna jamana, er chĕ Bĕngbe Bĕtsá bĕnga játsebacama te, mora ya más bécoñe entsemna, ntšamo chĕ Jesucristbeñe jtsošbuáchiyama tmonjanontšĕ ora enjamnama. ¹² Mora bĕnga mondoyena canŷe luarentše bĕtscá bacna soyĕngaca y ngmenánaca, y chca jtsemnana mo bĕnga nŷets tempo ibetiñe cuaftsajncá. Pero ya entsobeco chĕ Bĕngbe Bĕtsá bĕnga játsebacama te, mo chĕ ibetiñe ya jtsopochócama y binŷiniñe ya jontšamcá. Chíyeca mochtsajbaná bacna soyĕnga amana, y mochtsiyena tšabe soyĕnga jtsamĕse, Satanás játsjama y jáyĕnjanama bĕnga jtseprontánĕse, mo canŷe soldado jenĕuyanama y inŷa jayĕnjanama ba soyĕnga tojenocjacá. ¹³ Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ínŷengbiana lempe chaotsinŷnĕse. Chcasna, ndoñe quešnátamna yapa tmoyĕnga ntsemnana, ndoñe fiestĕnguenache ndoñe tšabe soyĕnga ntsamana, ndoñe bacna soye boyabása o shembásaftaca ntsamana y jenomándama ntsoybencá chca soyĕnga ndoñe ntsamana, nŷetscanga ndoñe cachcá ntsejuabnayama ndoñe ntsamana y ndoñe inŷenga yapa ntsíyentsbuašana. ¹⁴ Chca játamamna, šmochtsiyena jtsamĕse ntšamo Bĕngbe Utabná Jesucristo endbetsamcá, y ndoñe nŷe šmatjĕsejuabnaye jtsamana nŷe cach tšĕngaftanga tšabá jtsomñama juabnĕngaca, ndayá tšĕngaftanga chašmotsamama chĕ juabnĕnguiñe tojtsemncá.

14

Ndoñe šmattsóyebuambnaye inŷe ošbuáchiyĕngbe contra

¹ Chĕ Jesucristbeñe nŷe batšatema ošbuáchiyĕnga tšabá šmochjúbuaja, y chĕngaftaca ndoñe šmattsenatsĕsnaye ndayá aiñe o ndoñe jamana yontsamnama. ² Er básefta ošbuáchiyĕnga corente imotátšĕmbo chĕnga nŷe ndayánaca jasama imobenama, pero chĕ Jesucristbeñe nŷe batšatema ošbuáchiyĕngna, ndocna mĕntšena ntsesayana, er chĕnga jtsejuabnayana aiñe jasana canŷe bacna soye nántsemna ca. ³ Chĕ nŷetsca saná sayĕnga ndoñe chamondĕtsejuabná chĕ inŷe soyĕnga ndoñe mondĕtsetsayĕngbiana, chĕ causa chĕnga más batšá uámanĕnga imomna ca; y chĕ ndaye soyĕnga ndoñe mondĕtsetsayĕngna, chĕ nŷetsca saná sayĕngbe contra ndoñe chamondĕtsoyebuambná, er Bĕngbe Bĕtsá chĕnga tojúbuaja mo chabe entšangcá. ⁴ Tšĕngaftanga ndoñe quecmátamna chĕ inŷabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chĕ oservená jamana

ntšamo tbojtsemncá, er Bëngbe Utabná obenana endbomna cha chca chaotsamama.

⁵ Báseftanga mondmëna, chënga jtsejuabnayana canye te inye tescama más uámana te yomna ca; pero ínÿengna jtsejuabnayana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yojuabnacá ndáyeca chca ca. ⁶ Nda tojtsejuabná canye te inye tescama más uámana te yomna ca, chca jamana Bëngbe Utabnábiama jtenójuaboyama. Y nda nÿetsca saná tojttesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiama jtenójuaboyama, y chánaca Bëngbe Bëtsábioye chë sanama jëtschuayana.

⁷ Bënga ošbuáchiyënguentšana ndocná ainá ntsemnana nÿe cachabiama, ni jóbanana nÿe cachabiama. ⁸ Bënga tmojtсийenëse, Bëngbe Utabnabiama jtсийenana; y tmojóbanësna, Bëngbe Utabnabiama jóbanana. Chca, masque ainënga o obanënga, bënga Bëngbe Utabnábenga jtsemnana. ⁹ Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

¹⁰ As, ¿ndáyeca tšëngaftanguentšë báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿenga tšëngaftanguentšë jtsichámuana, catšátanga ndoñe uámanënga montsemna ca, ndayá chënga tmojtsamama? Er nÿetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama. ¹¹ Er Bëngbe Bëtsabe uabemana palabrënguñe Bëngbe Utabná mëntšá tojánayana:

Ndegombre atše ainá sëndëtsomñe, y chíyeca atše šcojurá, nÿetscanga atšbe delante mochanjoshëntsaméntša atše jadórama, y nÿetscanga šmochanjauyana, “ndegombre aca Bëngbe Bëtsá condmëna ca”.

¹² Chcasna, cada ona bënga šontsamna Bëngbe Bëtsá jauyanana ntšamo tojamama ndáyeca chca ca.

Ndoñe šmatjama inye ošbuáchiyënga bacna benachiñe chamótsatsama

¹³ Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucristbeyeca acbe catšata, chaojuabó y bacna soyënga chaoma. ¹⁴ Atše sëndëtatšëmbo, mo canya Bëngbe Utabnáftaca cánÿiñe mo canyáca quetsomñecá, ndocna soye yondmëna, nÿe cachabe ponto chaotsemna ndoñe tšabe soye. Pero canye entšá tojtsejuabná ndayánaca ndoñe tšabe soye yondmëna ca, ni jasama, ni jabojuama, chabiama cocayé chë soye nÿets tempo jëftsemnana ndoñe tšabe soye. ¹⁵ Tšëngaftanga inya becá šmojtsatsësná, inye soyënga tšabá endmëna jasama ca, y cha tojtsejuabná, chca soyënga jasama ndoñe tšabá yondmëna ca, pero tšëngaftanga tša šmojtsatsá causa, cha chca soyënga tojase, y chentšana tbojtsebiona puerta bacna soye tojamama, chca, tšëngaftanga jtšinÿanÿnayana ndoñe šmondoyena jtsemëse chë ínÿenga jtsababuánÿeshanëse. Nÿe tšëngaftanga inye soyënga šmëtsesayama ndoñe šmatjaleséncia chë soye chaoma inya, ndabiama Cristo tojanóbana, chë ndoñe ndegombre benachiñe chaoquedama.

16 Ndoñe šmatjaleséncia ndayá tšéngaftanga tšabá šmétsamama, ínŷenga ndoñe tšabá tšéngaftangbiana chamotsóyebuambnama. Chca šmochanjobenaye, ntšamo šmojtsamcá jtsajbanase, ínŷenga ndoñe tšabá tšmotsóyebuambná ora. ¹⁷ Běngbe Bětsabe aměndayana běngbeñe ndoñe quenátměna inŷe soyěnga aíně jasana o inŷe soyěnga ndoñe, canŷe soye aíně jofšiyana o inŷe soye ndoñe. Pero chabe aměndayana běngbeñe aíně endměna jtsamana soyěnga ndayama Běngbe Bětsá tojayana aíně tšabá jamama yomna ca, cháftaca tempcá tšabá jtsatsmėnana y ainaniñe oyejuayana jtsebmōnana; y Uámana Espíritbeyeca běnga jobenayana chca jamana. ¹⁸ Y nda Crístbioye chca tbojtseserverna, jamana Běngbe Bětsá cháftaca oyejuayá chaotsemnana, y entšangbe bominiñe tšabía jtsemnana.

¹⁹ Sempre šontsamna tšabe soyěnga jtsamana y chě soyěngaca chaopodé jamana nŷetscanga natjěmbana chamotsiyenama, y ndaye sóynaca šmochtsama, ndayá ínŷenga chaújabuache Jesucrístbeñe corente jtsošbuáchiyama y ainaniñe bětscá añemo jtsebmōnana. ²⁰ Tšéngaftanga ndaye sanánaca jasama šmobėnayeca, ndoñe šmatjama chaotsopochocama ndayá Běngbe Bětsá ainaniñe tojamcá. Ndegombre, nŷetsca sananga tšabá jasama endměna; pero ndayá tšéngaftanga šmojasama, inŷa bacna benachiñe chaótsatšama šmojaměse, chě soye cocayé ndoñe tšabá ntsemnana. ²¹ Tšabá endměna měntšena ndoñe ntjasana, vínoye ndoñe ntjofšiyana o ndayánaca ndoñe ntjamana, pero chě soye aíně tcojama ora, Jesucrístbeyeca canŷe catšata chaojuaboma y bacna soye chaomama tojoservese.

²² Asna, ntšamo tšéngaftanga chě soyěngama ndegombre šmošbuachecá, nŷe Běngbe Bětsá y tšéngaftangaftaca chaotsemna. Canŷe entšá ndegombre oyejuayá jtsemnana, canŷe soye jamama tšabá yomna ca tojtsejuabnase, y chě soye tojamentšana, ndoñe tšabá chca yonjamna ca juabněnga ainaniñe ndoñe tontsebmōněse. ²³ Pero canŷe entšá ndayá tojamentšana tojayana, bacna soye tojama ca chě ndayá tojasama o tojamama, as Běngbe Bětsánaca echanjayana cha ndoñe tšabá tonjama ca, er ntšamo tojamcá ndoñe tonjama chě soye aíně tšabá yomnama jtsošbuáchiyěse; y ndayánaca chca ora tojtsaměse, chca jamana bacna soye jtsemnana.

15

Ntšamo ínŷengbiana tšabá tojtsemncá mochtsama, ndoñe nŷe běngbiana

¹ Běnga, chě Jesucrístbeñe corente ošbuáchiyěnga, šontsamna chě nŷe batšatema ošbuáchiyěnga jujabuáchana, chěnga bacna soyěnga tmojtsama ora, nŷe batšá ošbuáchiyana bomna causa; y ndoñe nŷe jatsěnguayana nŷe ndaye soyěngaca yopodena běnga tšabá jtsemnana. ² Cada ona běnga šontsamna jamana ntšamo cach běngcá Jesucrístbeñe ošbuachiyabiana tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bětscá Jesucrístbeñe chaotsošbuáchema, y ainaniñe más añemo chaotsebmōnana. ³ Er Cristo, ntšamo tojanmca cach ndoñe tonjanma nŷe cha oyejuayá jtsemnana. Inŷetšá, cháftaca tojanopasá ntšamo Běngbe Bětsabe uabemana palabrenguñe endayanca, mo Cristo Běngbe Bětsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsětsná ca.” ⁴ Er

lempe ntšamo tempo Běngbe Bětsabe uabemana palabrenguine tmojan-abemcá, bēnga jabuátambama endmēna. Ndayá bēnga chiñe tmojuat-sjínýama, bēnga jtsoebenana padecena soyēnguine tmojtsachnějuana ora uantadēnga jtsemnana, y ainaniñe más añemo jtsebonnana; y chíyeca bēnga montsobena, chábeñe jtsošbuáchiyēse, chábeñe jobátmana, ntšamo tojanayancá chaomama. ⁵ Atše, Běngbe Bětsá sěntseimpadana, nda inétsama bēnga padecena soyēnguine uantadēnga chamotsemnana, y nda inétsama bēnga ainaniñe más añemo chamotsebomnana, cha chaoma nýetscanga canýe juabna chašmotsebomnana, ntšamo Cristo Jesús yojanjuabnacá tšēngaftanga jtsejuabnayēse; ⁶ cha chca chaoma, nýetsca tšēngaftanga mo cányiñe cuafsemncá, y mo nýetscanga canýe ora cuaf-jayancá, Běngbe Bětsá, Běngbe Utabná Jesucristbe Taitá, puerte bětsá y uamaná yomnana chašmuinýanýema.

Chē ndoñe judiēngbiámnaca chē tšabe noticiēnga jtsemnana

⁷ Nýetscanga oyejuayēnga šmochjenofja, ntšamo Crístnaca tšēngaftanga tmojaněbuajcá, chca, entšanga chamuinýanýe Běngbe Bětsá puerte bětsá y obená yomnana. ⁸ Atše sěntseboše ndayá jayanana, Cristo tojánabo judiēnga jabáserviama ca, chca, jinýanýiyama Běngbe Bětsá sempre inétsamama ntšamo tojašebuachenacá; tojánabo ntšamo Běngbe Bětsá bēngbe tempsca uámana běts taitanga tojanašebuachenacá chaocumpli; ⁹ y Běngbe Bětsá puerte bětsá yomna ca chē ndoñe judiēngnaca chamuayanámnaca, cha chēnga inétsalastemanama, ntšamo Běngbe Bětsabe uabemana palabrenguine endayancá, y chca tojanocumpli:

Chíyeca, atše chē ndoñe judiēngbeñe chaitsemna ora, aca
cbochantsatschuanaye, Běngbe Bětsá;

y jacántase chanjayana aca puerte bětsá y uamaná comna ca.

¹⁰ Inýoca mēntšá endayana:

Puerte oyejuayēnga chē ndoñe judiēnga šmochtsemna, Běngbe Bětsabe
bocacana entšangaftaca cányiñe ca.

¹¹ Y inýoca mēntšá endayana:

Běngbe Utabná šmochtsatschuanaye tšēngaftanga ndoñe judiēnga,
y cha šmochtsatschuanaye nýetsca tšēngaftanga nýets luarēnguenache
entšanga ca.

¹² Y Isaíasnaca Běngbe Bětsabe uabemana palabrenguine mēntšá to-
janábema:

Canýa Isaibe entšanguentsana echanjabo,

y Běngbe Bětsá chábioye uamaná bochanjábema, nýets luarēnguenache
entšanga chaotsamēndama,

y chēnga chábeñe jtsošbuáchiyēse, chábeñe mochantsobátmana tšabe
soyēnga chēngbiama chaotsamama ca.

¹³ Atše, Běngbe Bětsá sěntseimpadana, nda inétsama bēnga chábeñe
chamotsobátmanama tšabe soyēnga bēngbiama chaomama, cha chaoma
tšēngaftanga ainaniñe puerte oyejuayēnga chašmotsemnana y ainaniñe
tšabe ebionana chašmotsebomnana, chábeñe jtsošbuáchiyēse; y Běngbe
Bětsá chca tšēngaftangbiam chaoma, tšēngaftanga cada te más chábeñe
chašmotsobátmanama, chē Uámana Espíritbe obenánaca.

¹⁴ Jesucristbeyeca atšbe catšátanga, atše corente sēndětatsēmbo
tšēngaftanga puerte tšábenga šmomnana, ndayá cmamnama corente
šmotatsēmbuama, y jtsebuayiyayama šmobenámnaca. ¹⁵⁻¹⁶ Quem

tsbuanáchañe básefta soyëngama sënjuábema, ntšamo šmatjátsjuabnayama atše ntjatauatjácá; chca sënjama, básefta soyëngama chašmuatenójuaboma; y chca sëntsobena juabemana, er Bëngbe Bëtsá tojama atše chaitsebomna chë uámana trabajo, Cristo jtseservénana, chë ndoñe judiënga jtsëjabuáchanëse. Atše bachnëcá sëntsoserverna, Cristo stseserverna ora, entšanga tšabe noticiëngama jtsabuayiynayëse; atše chca sëndama chë ndoñe judiënga Jesucristbeñe chamotsošbuáchema, y ndayánaca chamotsamama Bëngbe Bëtsá oyejuayá chëngaftaca chaotsemnana, mo chabiamana canye uatšëmbonancá. Chcánaca atše sëndama, ndoñe judiënga ndegombre Bëngbe Bëtsábenga chamotsemnana, chë Uámana Espíritbeyeca.

¹⁷ Chca, atše Cristo Jesúsëftaca cányiñe mo canyácá quetsomñecá, ndegombre sëntsobena jtsëjuabnayana ntšamo Cristo jasérviamana atše sëndamcá, puerte uámana soye yomnana. ¹⁸ Atše añemo sëntsebomna nye chë ndayá Cristo átšëftaca tojamama jóyëbuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama, ¹⁹ chë Bëngbe Bëtsabe obenana jinñanñiyama bëts soyëngama, chë chabe obenánaca tojopasá tšabe soyëngama, y chë Uámana Espiritu bëts obenánaca tojama soyëngama. Y chca, Jerusalenocana jabojátsase, nyetsca luarënguëjana Iliria luaróntsoñe, Cristbe tšabe noticiëngama nyets luarënguenache entšanga tijabuayená. ²⁰ Atše sempre canye soye inye soyëngama más sënjánboše, y enjamna chë tšabe noticiëngama jábuayenana, entšanga ndocna te Cristbiamana oyebuambnayana tmonjanuena luarënguenache; y chca sënjanma, atše ndoñe játamama inya tojanbojatsé trabajo, mo inyabe bojatsena yebnentse jajebuama cuafjantontšecá. ²¹ Ntšamo Bëngbe Bëtsabe uabemana palabrënguñe endayancá, chë tempo Cristbiamana ndoñe tmonjanuenëngbiamana:

Chë ndëmuanyënga tempo ndocná chabiamana tonjanabuayená, chënga tšabá mochanjinnye ntšamo cha yomnana;
y chë ndocna te chabiamana tmonjouenënga, chabe soyëngama echanjósertaye ca.

Pablo yojanjuabná Roma bëts puebløye jama

²² Y nya chë causa, atše ndoñe chiyjobená tšëngaftangbioye jana tšëngaftanga jányama, masque ba soye tsjenojuabná chøye jama. ²³ Pero mora atšbe trabajo quem luarënguñe sënjapochocá y tempscana tšëngaftanga jányama tša sëndánbošeyeca, ²⁴ sëntsejuabná mora aiñe chjobenaye chøye jama, tšëngaftanga jautsëtsayama, chëjana chajjachnëngo ora, España luaroye chaitsá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjätsetaye jobenayama Españaoye ayana jtëtóntšama. ²⁵ Morna Jerusalenoye chanjá, choca entšanga Bëngbe Bëtsábenga imomnënga jaujabuáchama; ²⁶ er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yojtsemna crocénana jájuabana chë Jerusalenoca entšanga, Bëngbe Bëtsábenga imomnënga y ndbomnñëmënga imomnënga jujabuáchama; y oyejuayënga chca tmonjama. ²⁷ Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábicana tmojanóyëngacñe soyënga ndoñe judiëngnaca chamotsebomnana;

chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatšatayëse, chënga vida jtsebmnama chamotsobenama. ²⁸ Y chca, quem trabajo chajjapochocá ora, y chë ndoñe judiënga ošbuáchiyënga lempe tmojátbanana chajjäftsayentsbuachiye ora, chanjontsé Españaoye jama, y tšëngaftangbiajana chanjachnëngo tšëngaftanga jáftsanýama, tšëngaftangftaca baseftayté jëftsemnama. ²⁹ Atše corente sëntsetatšëmbo tšëngaftangbioye chajjá ora, chjášhango y chjama tšëngaftanga bëtscá tšabe bendicionënga Crístbentsana chašmotsebmnama, tondaye chacmondëtsabuáshebenëntscuana.

³⁰ Jesucristbeyeca catsátanga, Bëngbe Utabná Jesucristbeñe ošbuáchiyënga quetsomñecá, y bënga bonshánana chamotsebmnama chë Uámana Espíritu inétsamayeca, tšëngaftanga cbontsaimpadana, bëtscá chašmotsentsëna Bëngbe Bëtsá nýets ainánaca jtseimpadánama, ntšamo atše sëndbetseimpadancá, cha atše chašotsinýënama. ³¹ Cha šmochtseimpadana chë Judea luaroca ndošbuáchiyënga ndocá chašmondëborlama, y chë Jerusalenoquënga Bëngbe Bëtsábënga, tšabá chamóyëngacñama ndayá chënga jujabuáchama chajjäftsayentsbuachiye ora. ³² Y chentšana, y Bëngbe Bëtsá chca chaojábosenëse, atše chayobená bëtscá oyejuayá tšëngaftangbioca jashjanguana tšëngaftanga jányama, y tšëngaftangftaca chaitsemna ora, batšá jóchnama chayobená. ³³ Atše, Bëngbe Bëtsá sëntseimpadana, nda inétsama bënga ainaniñe tšabe ebionana chamotsebmnama, nýetsca tšëngaftangftaca chaotsemnama. Chca chaotsemna.

16

Ubuátmënga jacheuayama

¹ Atše sëntseboše tšëngaftanga jáuyanana Febe, Jesucristbeyeca bëngbe uabena, canýe tšabe entšá endmënama; cha chë Cencrea pueblaca enefjuana ošbuáchiyënga endújabuachana. ² Tšabá cha šmochjofja, mo canýa Bëngbe Utabnábia quetsomñecá, ntšamo Bëngbe Bëtsabe entšanga entsamncá inýëngaftaca jenofjana. Šmochjuájabuache ntšamo tbojtsajabotcá, er cha banga tonjújabuache; átšbioynaca.

³ Atšbe cuenta Prisca y Aquila šmochjácheuaye, chë átšeftaca tbonjatrabajata, Cristo Jesusbiana oservëniñe. ⁴ Jobanámnaca bonjanprontana, atše jatsbocama, ndoñe chašmondóbama. Atše chama chata sëntsatacheuaná; y ndoñe nýe atše, sinó nýets luarenache enefjuana ndoñe judiënga ošbuachiyëngnaca chca. ⁵ Chë ošbuáchiyënga, chë Bëngbe Bëtsá jëtschuayama chatbe yebnentše jénefnama imuamanëngnaca, šmochjácheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtšošbuáchiyama. ⁶ María šmochjachuaye; cha tšëngaftangbeñe bëtscá tojatrabajá. ⁷ Chë cach atšcá judeocata Andrónico y Junias šmochjácheuaye. Chata canýe ora átšeftaca cárceloye bonjanëtámëna, y Jesucristbe ichmónëngbiana chata puerta uámanata bonjamna, y atšbiana más natsana tbojanontsé Jesucristbeñe jtšošbuáchiyama.

⁸ Ampliato šmochjachuaye, atšbe bonshaná, er atšcá cha Bëngbe Utabnáftaca cánýiñe mo canýacá bondmëna. ⁹ Urbano šmochjachuaye, chë bëngaftaca Crístbiana oservëniñe trabajayá; y atšbe bonshana Estáquisnaca šmochjachuaye. ¹⁰ Apeles šmochjachuaye; cha ba

soye tonjinñanýe Jesucristbeñe puerte yošbuáchema; y Aristóbulbe yebnentšéngnaca šmochjácheuaye. ¹¹ Chê cach atšcá judeocá Herodión šmochjachuaye, y chë Narcisbe pamillentšana Bëngbe Utabnábeñe ošbuachiyëngnaca. ¹² Trifena y Trifosa šmochjácheuaye; chata Bëngbe Utabnabiamia puerte bondëtrabája; y bëngbe bonshaná Pérsidnaca šmochjachuaye; cha bëtscá endëtrabája, Bëngbe Utabnabiamia oservéniñe. ¹³ Rufo, chë Bëngbe Utabnabiamia uámana trabajayá, šmochjachuaye, y chabe mamánaca; cha mo atšbe mamacá endmëna. ¹⁴ Asíncrito, Flegonte, Hermes, Patrobas y Hermas šmochjácheuaye, y chë ínýenga Jesucristbeñe ošbuáchiyënga chëngaftaca inménutanangnaca. ¹⁵ Filólogo y Julia, Nereo y chabe uabena, Olimpas y nyetsca Bëngbe Bëtsabe entšanga chëngaftaca inménutanangnaca šmochjácheuaye.

¹⁶ Nyetscanga mo Jesucristbeyeca catšatangcá šmochjenchuaye, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá. Nyets luarenache enefjuana Cristbeñe ošbuáchiyënga cmontsacheuaná.

¹⁷ Jesucristbeyeca catšátanga, atše cbontsaimpadana tšabá šmochjuáfsna y cuedado šmochtsebmna chë cánýenga ínýengaftaca contra chamotsemnama y ínýenga Jesucristbeñe ošbuáchiyana chamotsajbanama inmëtsamëngbiamia; chëngna, chë tšëngaftanga ndaye šmojóyëngacñe buatëmbana soyëngama contra jtsóyebuambnayana. ¹⁸ Er chca amënga, ndoñe ntsentšénana Cristo Bëngbe Utabná jtseservénana, sinó jtsamana ndayá cachënga tmojtsebošcá, nýe cachëngbe cuerpama tšabá tojtsemncá; y tšabe y botamana palabréngaca chë paselo jáingñama yomna entšanga jáingñana, chëngbe ainaniñe chëngcá chamotsejuabnama. ¹⁹ Nyetsca entšanga tmojouena, chë Bëngbe Bëtsabe soyëngama ntšamo ínýenga tcmojabuatambacá, tšëngaftanga corente šmnétsayaunanama, y chiyeca atše puerte oyejuayá tšëngaftangaftaca sëntsemna. Atše sëntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamamna chašmotsemna mo ndoñe cuaftsetatšëmbcá. ²⁰ Y Bëngbe Bëtsá, nda inétsama bënga ainaniñe tšabe ebionana chamotsebmnama, ndoñe bën y echanjama tšëngaftanga Satanás chašmoyëñjanama, mo cha tšëngaftangbe cucuatšíñe cuafjaboshjoncá. Atše sëntseimpadana Bëngbe Utabná Jesús, chaoma tšabe bendicionënga tšëngaftangbeñe chaotsemnama.

²¹ Timoteo, chë átšeftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

²² Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánýiñe mo canýacá quetsomñecá.

²³ Gayo cmontsacheuaná; atše Pablo chabe yebnentše posada sëntsebmna, y cha enduamana nyetsca chë muentša ošbuáchiyënga tšabá júbuajana. Erasto, chë quem pueblentša crocénana bojanýá, tšëngaftanga cmontsacheuaná, y Jesucristbeyeca bëngbe catšata Cuártëñaca.

²⁴ Atše, Bëngbe Utabná Jesucristo sëntseimpadana, cha chaoma tšëngaftangbeñe tšabe bendicionënga chaotsemnama. Chca chaotsemna.

Quem tsbuanácha juapochócama, Pablo Bëngbe Bëtsábioye tbojtanchuá

25 Bënga sempre mochtsinÿanÿnaye Bëngbe Bëtsá puerte uamaná yomnama. Cha endobena jamama tšëngaftanga puerte chašmotsošbuáchema; y chca, cha echanjama ntšamo chë bënga fsëndabuayiyiná tšabe noticiënguifne yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinÿanÿé ndegombre soyënga yomncá. Nÿets tempo mëntscoñama, Bëngbe Bëtsá chë soyënga entšanga ndoñe tonjinÿanÿé, y chë causa chënga chë soye ndoñe ntsetatšëmbuana. 26 Pero morna, ntšamo Bëngbe Bëtsabe juabna oyebuambnayënga tmojanabemcá, tojama bëtscá entšanga chë ndegombre soyëngama chamotsetatšëmbuama; Bëngbe Bëtsá, chë nÿets tempo vida bomná, tojanmandá entšanga nÿets luarënguenache chë ndegombre soyëngama chamotsetatšëmbuama, chënga chábeñe chamotsošbuáchema y ntšamo cha yobošcá chamotsamama.

27 Nÿe canÿe Bëngbe Bëtsá endmëna, y cha nÿets osertánana endbomna. ¡Nÿetscanga chamotsinÿanÿná cha puerte bëtscá y uamaná yomnama, ndayá Jesucristo tojanmama! Chca chaotsemna.

1 Corintios

Pablo chënga jacheuayama

¹ Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánboşeyeca, cánÿiñe chë Jesucristbeyeca catšata Sóstenesefaca, ² quem tsbuanácha sentsabiamná tšëngaftanga chë Corinto bëts pueblocá Jesucristbeñe oşbuáchiyëngbiamá; ndëmuanÿënga Cristo Jesúseftaca Bëngbe Bëtsá tojábiama chabe entšanga nÿe chábioye oservénënga, ndëmuanÿënga Bëngbe Bëtsá tojáchembo chabe entšanga chaşmotsemnama, chë nÿe quem luarama enójuabnaye entšanguentsana luarénënga, Bëngbe Utabná Jesucristbioye tmojotšëmbonëngaftaca, Jesucristo nda yomna Bëngbe Utabná y chëngbe Utabná. ³ Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chaşmotsebonnama.

Bëngbe Bëtsá Jesucristbeyeca tojama tšëngaftanga ba tšabe bendicionënga chaşmotsebonnama

⁴ Bëngbe Bëtsá tšëngaftangbiamá sempre sëndbëtsatschuanaye, er tšëngaftanga cánÿiñe mo canÿacá Cristo Jesúseftaca şmómnayeca, Bëngbe Bëtsá tšëngaftangbeñe tojajuabó, tšëngaftangbe tšabiama. ⁵ Chca Crístoftaca şmómnayeca, Bëngbe Bëtsá tojama tšëngaftanga chaşmotsebonnama chábensana nÿetsca tšabe soyënga, tšëngaftanga obenana chaşmotsebonnama cha jamëse, Bëngbe Bëtsabe soyëngama jóyebumayama y chë soyëngama chacmësertama. ⁶ Chca, ntšamo cbonjanabuayiyinacá mo Jesucristbe ndegombre soyëngcá, tšëngaftángnaca ínÿëngbioye tšabá şmojinÿanyé ndegombre soyënga bëtsemnama, chë ntšamo jtsiyenama. ⁷ Y chca, Bëngbe Bëtsá chabe entšanga inétsatsatnaye tšabe soyënguentsana tondaye quecmochatabuáshebena, Bëngbe Utabná Jesucristo quem luarentše yochtonÿna tescama Bëngbe Bëtsábeñe jtsoşbuáchiyëse chaşmojtsobátmanëntscuana. ⁸ Cha echanjama tšëngaftanga chábeñe corente chaşmotsoşbuáchema y ainaniñe bëts añemo chaşmotsebonnama, ndayá tšëngaftangaftaca jamama cha yojuabnacá chaojapochocantscuana; chca, chë Bëngbe Utabná Jesucristo nÿetsca entšangbiamá tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá şmonjama ca. ⁹ Bëngbe Bëtsá nÿets tempo jtsamana ntšamo tojaşebuachenacá, y cha endmëna nda tcmojánachembo cánÿiñe mo canÿacá chaşmotsemnama chabe Uaquiniá Jesucristoftaca, Bëngbe Utabná.

Choca oşbuachiyëngbeñe nÿetscanga ndoñe cachcá montsanjuabná

¹⁰ Jesucristbeyeca atšbe catšátanga, tša cbontsaimpadana, chë ndayá Bëngbe Utabná Jesucristo nÿetsca bëngbiamá yomnama, tšëngaftanga nÿetscanga cachcá chaşmotsejuabnama, y tšëngaftangbeñe ndoñe más báseftanga canÿe soye y ínÿënga inÿe soye chamuatsjuabná. Y aiñe şmochtsiyena mo canÿacá, nÿetscanga cachcá jtsejuabnayëse y cachcá jamama jtseboşëse. ¹¹ Jesucristbeyeca atšbe catšátanga, atše chca sënjayana, er Cloebe yebnentsënga şmonjabëuenaye, tšëngaftangbeñe şmojtsenpenzentserama. ¹² Ntšamo sentsichamcá entsemna ndayá

tšëngaftangbentše báseftanga šmojtsichamo: “Atše Páblëbe ustoná sëndmëna ca”; ínÿengna imojtsichamo: “Atšna Apólosbe ustoná sëndmëna ca”; ínÿenga: “Atšna Pédrëbe ustoná sëndmëna ca”, y ínÿengna: “Atšna Cristbe ustoná sëndmëna ca” imojtsichamo. ¹³ Chca šmojtsamama, jtsóbočanana mo cada básefta ošbuáchiyënga canÿe Cristo tmojtsebomncá. ¿Pablo yojamna nda tmojancrucificá tšëngaftangbe tšabíama? ¿O tšëngaftanga uabáinënga šmomna, atše jótšëmbonëse, tšëngaftanga atšbe ústonënga bétsemnama? ¹⁴ ¡Bëngbe Bëtsá sëndbëtsatschuanaye atšë ndocná tšëngaftanguentšá tijanábayama; nÿe Crispo y Gáybioye aíñe! ¹⁵ Chca, ndocná quenátobena jayanana, atšë jótšëmbonëse uabainá cha tojanoquedá ca, mo átšbeñe ošbuáchiyënga cuaftsemncá. ¹⁶ Estéfanasbe pamillentsëngnaca sënjanëbaye, pero ndoñe quetsatabouínÿna ínÿa tijanábayama. ¹⁷ Er Cristo ndoñe chešnatanichmó ínÿenga jubáyama, ndayá chë chabe tšabe noticiëngama entšanga jábuayenama. Ndoñe chešnatanichmó chë soyënga jayanama, corente osertana entšangbe soyënga jtsichámëse; chca, entšanga Crístbeñe chamotsošbuáchemá, ndoñe chë atšbe osertánanentsšana palabrëngama, sinó nÿe chë buayenánama, Cristo cruzoca bëngbíama tojanóbanama.

Crístbeñe yomna Bëngbe Bëtsabe obenana y osertánana

¹⁸ Quem buayenánana, Cristo entšangbíama cruzoca tojanóbanama, chë pochocánënga jtsemnama tmojtsajnëngbioye jtsinÿanana mo ndoñe corente juabna bomnëngbe soycá; pero bëngbíama, chë Bëngbe Bëtsá nÿetsca tescama šochjátsebacangbíamna, quem buayenánana jtsinÿanÿanana Bëngbe Bëtsabe obenana. ¹⁹ Ntsamo Bëngbe Bëtsá chabe uabemana palabrënguiñe tojanayancá:

Atše chanjama chë tša osertánëngbe osertánana tondayama chaondëtsoservénama; y chanjama chë ba soyëngama osertánëngbe osertánana tondayama chaondëtsámanama.

²⁰ ¿Ntsachetšá yojtsámama chë tša osertaná y chë puerte uatsjinÿená tbojayana soyënga? ¿Ntsachetšá yojtsámama chë tša tšabá chë soyëngama juabnayá, morscá, y ínÿengaftaca enatsëtsnaye ora chëngbe ayëñjanayá tojayana soyënga? Ndegombre Bëngbe Bëtsá tojinÿanÿé, chë quem luarentša bëts osertánanaca tmojayana soyënga tondaye yonduámanama. ²¹ Bëngbe Bëtsá, nÿets osertánana bomná quetsomñecá y puerte tšabá jtsejuabnayëse, ndoñe tonjanalesenciá quem luarentša entšanga cha chamotsábuatmama, chë quem luarentšënga tša osertánënga tmojánayana soyëngama. Chamna, cha tšabá tbojanínÿnana chábeñe ošbuáchiyënga játsebacana chë bënga fsëndabuayiná soyëngama, masque ínÿengbioyña mo ndoñe corente juabna bomnabe soycá jtsinÿanana.

²² Judiënga tša jtsebošana y Bëngbe Bëtsábioye jtsotjanañana bëts soyënga chaomama, chabe obenana jinÿanÿiyama; y ndoñe judiëngna tša jtsenguayana chë puerte osertánëngbe soyënga jtsetatšëmbuama. ²³ Pero bëngna Cristbíama entšanga fsëndabuayiná, chë ínÿenga tmojancrucificabíama. Quem buayenánana chë judiënga ndoñe tšabá ntjéuénanana. Y ndoñe judiënga mondbétsejuabnaye chca yomna mo canÿe ndoñe corente juabna bomnabe soycá ca; ²⁴ pero bëngbíama, nÿetscanga Bëngbe Bëtsá chabe entšanga chamotsemnama šojáchembëngbíamna, masque judiënga o ndoñe judiënga, Crístbeñe endmëna nÿets Bëngbe Bëtsabe obenana y osertánana; ²⁵ er ndayá Bëngbe Bëtsá tojanmncá, Cristo cruzoca

chaóbanama jalesénciase, banga jtsinŷanana mo canŷe ndoñe corente juabna bomnabe soycá, pero ndegombre endmēna canŷe puerte osertaná tojama soyé, lempe ntšamo entšanga imotatsēmbuama. Y ndayá cha tojamcá masque bángbioye jtsinŷanana mo canŷe tondaye obenabe soycá, ndegombre chē soye jtsinŷanŷayana Bēngbe Bētsá puerte más obenana yobomnama, nŷets obenana ntšamo entšanga imobomnama. ²⁶ Jesucristbeyeca atšbe catšátanga, šmochtsejuabnaye ntšamo yojamnama, Bēngbe Bētsá chabe entšanga chašmotsemnama tcmojánachembo ora. Tšēngaftangbentše nŷe báseftanga tša osertánēnga šmojamna, ntšamo chē osertánana bomnēnga imomnama entšanga mondbetsejuabnaycá; y báseftanga šmojamna becá mando atsetanēnga o uámana pamillentšēnga. ²⁷ Pero Bēngbe Bētsá, quem luarentše ndoñe tša osertánēnga tojanabacacá, chca, cha jamama chē quem luarentša soyēngama tša osertánēnga chamotsēuatjama; y cha, quem luarentše ndobenēnga tojanabacacá, chca, chē obenana bomnēnga chamotsēuatjama. ²⁸ Bēngbe Bētsá quem luarentšana tojanbocacá ndayá tondaye yonduamancá y ndayá ínŷega imuabotencá; tojanbocacá ndayá tondaye yonduamancá, chca, ndayá quem luarentše tša uamancá tondaye chaondēsámanama. ²⁹ Y chca, Bēngbe Bētsabe delante ndocná quenátobena jayanana tša bētsá cha yomna ca. ³⁰ Bēngbe Bētsá tojama bēnga Crístoftaca cánŷiñe mo canŷacá jtsemnēse chamotsiyenama, y chábeyeca tojama bēnga chamóyēngacñama chabe osertánana bomna soyēnga; chábeyeca tojama bēnga tšábenga chabe bominŷiñe chamotsemnama, chabe entšanga jtsemnama chamobenama, puerte tšábenga cach Bēngbe Bētsacá, y atsebácanēnga chamotsemnama. ³¹ Y chca, ntšamo Bēngbe Bētsabe uabemana palabrénguiñe endayancá: “Nda tojtseboše jayanama cha canŷe uamaná yomna ca, chamna más tšabá cha bontsemna jayanama Bēngbe Utabná puerte uamaná yomna ca.”

2

Ntšamo Pablo Cristo crucificanábiamá chēnga tojanabuayená

¹ Pero, Jesucristbeyeca atšbe catšátanga, Bēngbe Bētsabe ndegombre soyēngama tšēngaftanga jábuayenama sēnjána ora, chca sēnjamna ndoñe chē uamanēngbe palabréngaca, ni chē tša osertánēngbe palabréngaca. ² Y tšēngaftangaftaca sēnjamna ora, ndoñe quetstétseboše nŷe ndayíñnaca jatsjuabnayana, ndayá nŷe Jesucristbeñe, nda bēngbe tšabiamá tmojanrucificá. ³ Atše tšēngaftangbeñe sēnjamna, mo canŷa ba soyēnga jamama ndobenacá, y mo canŷa puerte auatjacá y tbojtsengmēmncá, chabe trabajo jamama ndoñe jobenayama juabnaye causa. ⁴ Ntšamo cbonjanētsētsná y cbonjanabuayiynacá atše sēnjanoyebuambá ndoñe chē tša osertánēngbe palabréngaca, tšēngaftanga jáyēnjanama chiñe chašmotsošbuáchema; pero aínne tcbonjanayēnjaná, Bēngbe Bētsabe Espíritu y chabe obenana tšēngaftanga jinŷanŷiyēse, ⁵ chca, tšēngaftanga Bēngbe Bētsabeñe chašmotsošbuáchema, ndoñe nŷe entšangbe osertánanaca, sinó Bēngbe Bētsabe obenanama.

Uámana Espíritbeyeca, Bēngbe Bētsá jamana entšanga cha chamotsábuatmama

⁶ Pero, chē ya tmojashjáchēnga Bēngbe Bētsabeñe puerte jtsošbuáchiyama y chabe soyēngama corente jtsoertánama, chēngbeñe bēnga fchandóyebuambaye becá osertánana bomna soyēnga. Pero ndoñe

quenátsmëna quem luarentša entsanga quem tempo mondbétsichamo soyënga, ni mora quem luarentše amëndayëngbe soyënga, ndëmuanÿënga ndoñe bën y ndocna obenana bomnënga mochanjëftsoquëda. ⁷ Y aïñe, chë bënga fsëndoyebuambná osertánana bomna soyënga endmëna chë Bëngbe Bëtsá quem luarentša entsángbioye baytentscuana ndoñe tonjaninÿanyé soyënga, y chca, entsanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsétsanga y uámanënga jtsemnana, cháftaca chë nyëtsca tescama yomna tsabe vida jtsebomnama. ⁸ Quem Bëngbe Bëtsabe puerte osertánana bomna soyënga endmëna canÿe soye ndayá quem luarentša amëndayënga ndoñe ntsësertánana, er chënga aïñe matëñjanësértase, Bëngbe Utabnábioye chënga ndoñe matmëñjanrucificá, Bëngbe Utabná nda puerte bëtsá y uamaná yomna. ⁹ Bëngbe Bëtsabe uabemana palabrénguiñe quem Bëngbe Bëtsabe puerte osertánana bomna soyëngama mëntsá endayana:

Cha imobobonshánëngbiama Bëngbe Bëtsá tojaprontá soyënga, ndocná tonjinÿe, ni tonjouena y ni mo tonjajuabó ca.

¹⁰ Pero Bëngbe Bëtsá quem soyënga chabe Espíritoftaca bënga šojanÿanyé, er chë Espíritu lempe jtsetatšëmbuana, chë Bëngbe Bëtsabe soyëngama puerte totcá josértama yomna soyëngámna.

¹¹ Entsángbeñe ndocná quenátobena jtsetatšëmbuana ndayá entsabe ainaniñe tomnama, sinó nÿe chë entsabe espíritu, chë chábeñe yomná. Cachcá, nÿe Bëngbe Bëtsabe Espíritu jtsetatšëmbuana ndayá Bëngbe Bëtsá tojuabnacá. ¹² Y bëngna, Bëngbe Bëtsábíocana Espíritu tmojóyëngacñe, ndoñe canÿe quem luarentša espíritu, chca, bënga chašósertama chë Bëngbe Bëtsá tojama bënga chamotsebomna soyëngama, bëngbe tsabiama cha jtsejuabnayëse. ¹³ Bënga chë soyëngama fsëndoyebuambná, ndoñe chë quem luarentša entsángbentšana tifjuatsjinÿe osertánana bomna palabréngaca, sinó chë Bëngbe Bëtsabe Espíritu šojabuatambá palabréngaca. Chca, Bëngbe Bëtsábíocana soyëngama bënga fsëndabuayiná, Bëngbe Bëtsabe Espíritbentšana yóbocana palabréngaca, chë Uámana Espíritu ainaniñe imobomnëngbioye.

¹⁴ Bëngbe Bëtsabe Espíritu ndoñe tondbomná, chabe ainaniñe ndoñe ntjóyëngacñana chë Bëngbe Bëtsabe Espíritbíocana yóbocana soyënga, er chë entsabiama chë soyënga jtsemnana mo canÿe ndoñe corente yuabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatšëmbuana y josértama, nÿe chabe ainaniñe chë Uámana Espíritu tbojtsájabuachanëse. ¹⁵ Pero nda aïñe chë Espíritu tbojtsebomna jtsobenana nyëtsca soyënga tsabá jinÿama chabosertama, y ndocná chë Espíritu ndoñe tbondbomná ntsobenana josértana ntšamo chë Espíritu bomná yomnama. ¹⁶ Er Bëngbe Bëtsabe uabemana palabrénguiñe mëntsá endayana: “Ndocná quenátabuatma Bëngbe Utabnabe juabna, chábioye jabuátëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo yojuabnacá.

3

Jatrabájama enutanánënga Bëngbe Bëtsá jasérviamá

¹ Pero, Jesucristbeyeca atšbe catšátanga, atše ndoñe chiyatanobena jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nÿe cachënga tšabá jtsomñama juabnënga bomna entšangbiocyá, mo basetemëngbiocyá, Cristbe soyëngama josértama ndobenënga. ² Mo canÿe bebmácá, chabe basetëmbioye nÿe létšiyë jafšiyana y paselo jabmuánama sananga, chë básetema chcana jasama cabá ndoñe ntsobenana causa, cachcá, atše chonjanabuatambá Bëngbe Bëtsabiana nÿe chë más paselo josértama soyëngama, y ndoñe inÿe soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; ³ er tšëngaftanga cabá šmojtsama, nÿe ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga ínÿengaftaca cabá yapa šmojtsenántšaboše y nÿe ínÿengbioye jayënjanama soyënga šmojtsamëntscuana, tšëngaftanga šmojtsama nÿe ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nÿe quem luarama enójuabnaye entšangcá. ⁴ Er canÿa: “Atše Páblëbe ustóná sëndmëna ca”, y inÿana: “Atše Apólosbe ustóná sëndmëna ca” tojayana ora, chca jtsamana mo chë nÿe quem luarama enójuabnaye entšangcá.

⁵ Tšëngaftanga chca šmojamama, atše šontsemna tšëngaftanga játjayana: ¿Ndayá Apolos yomna? ¿Ndayá Pablo? Chatna co nÿe Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsošbuaché, y bëndata cada ona fsënjama chë Bëngbe Bëtsá šojanÿanÿé trabajo. ⁶ Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguiñe béjaye cuaftebuešcjinacá, enjantrabája cach atše sënjanbojatsé chiñe; pero Bëngbe Bëtsá, ntšamo matatëmënga chauájuama endbetsamcá, tojama banga tšëngaftanguentše Jesucristbeñe chamotsošbuáchema. ⁷ Ntšamo, chë jená y chë matënguiñe béjaye buešcjinayá ndoñe yapa ntsámanana chiñe shajuanënga chaóboचना, nÿe Bëngbe Bëtsá aiñe, cachcá, nda Bëngbe Bëtsabiana entšanga jábuayenama trabajo tojabojatsé y nda chentšana tojáshjango cach trabajuiñe jóntšama, ndoñe ntjamana entšanga Jesucristbeñe chamotsošbuáchema; nÿe Bëngbe Bëtsá chca jamana. ⁸ Chë jená y chë matiñe béjaye buešcjinayá cach trabajuiñe jtsentšënanana, y chatna mo trabajayatcá jtsámanana; y cada ona juácana ntšamo chabe trabajo tomncá.

⁹ Bëndata fsëndmëna trabájayata Bëngbe Bëtsabiana oservëniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóboचना, y šmondmëna mo chë cha yojtsejebuana bëts yebncá. ¹⁰ Er Bëngbe Bëtsá atšbe tšabiana jtsejuabnayeše, chë trabajo šojabonÿé, y atše mo canÿe puerte tšabe jebuanacá, canÿe yebna ndayiñe chaotsécuatjonama tojapormacá, sënjanbojatsé chë trabajo, Bëngbe Bëtsabe soyëngama tšëngaftangbeñe jábuayenama. Chentšana inÿa, mo chë inÿe yebna jebuaná tojabojatsé jajebuama chiñe más jatsjebuama nda tojatontšecá, cach atše sënjanbojatsé trabajuiñe tojanontšé. Pero cada ona botamana chaotsantješna ntšamo chë trabajo yojtsamama. ¹¹ Mo chë cánÿabentšana inÿe trabajayacá, ndoñe ntsobenana chë yebna jajebuama

tojanbojatsé cha chë yebna chaotsécuatjonama tojanpormañe inye soye cachcá chaoservema jatspórmana, cachcá, ndocná chaondétsabuatambá inye soyënga, nye ntšamo Jesucristbe soyënga yomncá aíñe, chë ntšamo atše natsana sënjanabuatambacá. ¹² Chë Jesucristbiana más uámana soyënga buatëmbayá jtsemnana mo chë castellano, midio y inye uámana soyëngaca yebna jebuanacá; y chë Jesucristbiana nye nduámana soyënga buatëmbayana mo chë niñëbenga, butsjajësha y tëshenjñesheca yebna jebuanacá. ¹³ Y Cristo chaojésabo te, Bëngbe Bëtsá echanjínñanyíye ntšamo cada cánñabe trabajo yomnama. Cha chë te íñesheca chca echanjínñanyíye, y chë íñesheca, Bëngbe Bëtsá echanjinñe y echanjínñanyíye ndaye trabajo cada ona tojamama. ¹⁴ Ntšamo cada cánñabe trabajo yojtsámanama jtsetatsëmbuama Bëngbe Bëtsá chaojinñe ora, cha chabe trabajo aíñe yojtsámana ca queojayanëse, chë tšabe trabajayá Bëngbe Bëtsábíocana canñe uacanana soye echanjóyëngacñe, er cha jtsemnana mo canñe entsacá, nda canñe yebna tojtsejebuana jtsejuinñama ndoñe paselo tondmëna soyëngaca. ¹⁵ Pero chë te cánñabe trabajo nye batšá yojtsámanama Bëngbe Bëtsá íñesheca chaojinñanyëse, chora chabe trabajo echántsemna mo chë jtsejuinñama paselo tomna soyëngaca jebuanabe soyëngcá, chentsana nyets yebna jtsejuinñana. Chë jebuaná jtsachana, pero chabe trabajo lempe jobuétšana. Cachcá, chë Bëngbe Bëtsabiana trabajo tojtsamá, nye batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquëda.

¹⁶ ¿O tšëngaftanga ndoñe šmondétatsëmbo nyetscanga cánñiñe Jesucristbeñe ošbuachiyëngcá, mo chë Bëngbe Bëtsabe bëts yebncá šmomnama, y tšëngaftanguentšë Bëngbe Bëtsabe Espíritu yomnama? ¹⁷ Nderado nda tojama, tšëngaftanga nyetscanga cánñiñe Jesucristbeñe ošbuachiyëngcá jtsemnana chaotsopochocama, Bëngbe Bëtsá chábioye bochantsepochóca, er chë Jesucristbeñe ošbuachiyëngcá cánñiñe imomnënga, jtsemnana mo chë Bëngbe Bëtsabe bëts yebncá, chabe entsanga nye chábioye jaserviama; y tšëngaftanga chca šmondmëna.

¹⁸ Ndocná cachá chaondétsenoíngña. Nderado nda tšëngaftanguentšá tojtsejuabná cha tša osertaná yomna ca, ntšamo quem luarentša entsanga mondbétsejuabnaye ntšamo canñe puerte osertaná inésemnana, cha bontsemna jóbemama mo canña ndabiana quem luarentša entsanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama. ¹⁹ Er chë quem luarentša entsanga tša osertánënga imotátšëmbo soyënga, Bëngbe Bëtsabe bominiñe yomna mo chë corente juabna ndbomnabe soycá. Bëngbe Bëtsabe uabemana palabrënguiñe mëntšá endayana: “Bëngbe Bëtsá chë tša osertánënga jáyëñanana, ndayá cachënga ínñenga jáingñama tša osertánánaca tmojtsama soyëngaca ca.” ²⁰ Y mëntšánaca endayana: “Bëngbe Utabná endétatsëmbo chë tša osertánëngbe juabnënga tondayama yondoservënama ca.” ²¹ Chíyeca, ndocná chaondétsichamo corente uamaná yomna ca, ndaye entsabe ustoná tomnama, er lempe ntšamo šmobomncá, Crístbeñe ošbuachiyënga bëtsemnana, tšëngaftangbe tšabiana endmëna, y nyetscanga chë tcmojujabuachëngnaca cachcá. ²² Lempe tšëngaftangbe soye endëtsumñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóbana ora, ndayá mora yomncá y chë más chcoye yocht-

semncánaca. ²³ Y tsëngaftanga Crístbenga šmondmëna, y Cristna Bëngbe Bëtsábia.

4

Jesucristbe ichmónëngbe trabajo

¹ Entšanga entsamna bëngbiana jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšángbioye ndoñe tonjaninÿanÿé, pero mora aíñe tojinÿanÿé soyënga jtsabuátambayama trabajo bomnënga. ² Chca, nda canÿe trabajo tojtsebojanÿabiamna, chabe mandayá jtsobátmanana cha aíñe tsabe palabra bomná chaotsemnama. ³ Atšbe bariëna, tondaye quenátamana, ntšamo tijamcá šmojinÿe y ndoñe tsabá tijama ca šmojanenëse, o inÿe entsanga cachcá tmojanenëse mo canÿe tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tayojtsemnama. ⁴ Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna nda atšbe trabajo yonÿá y nda ndegombre yobena jayanama atše tsabá o ndoñe tsabá tijamama. ⁵ Chíyeca, tsëngaftanga ndoñe quecmátamna jinÿana y jayanana inÿyenga ndoñe tsabá tmonjama ca, chë nÿa chama tempo cabá ndóshjanguëntscuana, Bëngbe Utabná chama chaojésabo ora. Cha chaojésabo ora, puerte tsabá echanjínÿanÿiye chë iytemencá yomna soyëngama, mo ibetiñe cuaftsemncá, y botamana echanjínÿanÿiye, mo binÿniñcá, ndayá jamama nÿe chëngbe ainanoca entšanga tmojajuabocá. Y chora Bëngbe Bëtsá cada entšabiana echanjayana tsabe soyënga, ntšamo tbojtsomerecencá.

⁶ Jesucristbeyeca atšbe catsátanga, chë soyëngama tsabá jábuayenamna, atše sënjama ntšamo Apolos y atše tifjatrabájama botamana chašminÿama, y chca sënjama tsëngaftangbe tsabiana, ntšamo bëndata tifjamentšana chašmuatsjínÿama jtsiyenana nÿe ntšamo Bëngbe Bëtsabe uabemana palabrënguñe iuayancá, y ndocná tsëngaftanguentšá canÿe entšabiana chaotšenábotamnaye, y inÿyabiana ndoñe tsabá chauátoyebuambnama. ⁷ Er, ¿nda chë inÿyëngbiana más uámanënga tsëngaftanga cmojtsabiamná? ¿Y ndayá šmobomna, Bëngbe Bëtsá ndoñe tmonjatsatá soye? Y tsëngaftanga chca chašmotsebotamnana cha tojanmëse, ¿ndáyeca šmojtsenabotamná mo Bëngbe Bëtsabe tšetana soyënga ndoñe tontsemncá, y nÿe cach tsëngaftangbeyeca šmojonÿencá?

⁸ Tsëngaftanga šmojtsejuabná ya lempe ntšamo cmëjbotcá Bëngbe Bëtsábiocana šmojtsebotmna ca, y lempe ntšamo jtsebošama šmojtsobencánaca ca. Mo reyënga cuaftsemnëngcá cmojtsabiona, bëngbentšana tondaye ntsëjbotcá. Malaye tsëngaftanga mo reyëngcá šmojtsemna, Crísoftaca cánÿiñe jtsemándayëse; chca, bëngnaca tsëngaftangaftaca jtsemnama, cánÿiñe jtsemándayëse. ⁹ Atše šontsinÿana, bënga chë Cristbe ichmónënga Bëngbe Bëtsá šojábiana mo chë nÿetscangbiana más nduamanëngcá, mo chë jóbanama yojtsamna entšangcá. Nÿetscanga chë Bëngbe Bëtsá tojábiamënga bëngbioye jtsënyayana mo ndoñe cachca entšanga fstsemncá; angelënga y entšángnaca cachcá bëngaftaca montsama. ¹⁰ Bënga, Cristbiana oservena causa, quem luarentša entšangbiana fsëntsinÿna mo corente

juabna ndbomnëngcá; chë cuenta, tsëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entšangbe bominýiñe ndocna obenana ndbomnënga; y tsëngaftangna šmojtsejuabná puerte uómanënga y bëtsëtsanga jtsabiamnayana, pero chënga bëngbioye jtsëbuayënjana. ¹¹ Y mëntscoñama, bënga šontsabuashebebiana saná, ndayá jofšiyama y entšayá. Entšanga bëngbioye bacá jtsaborlánana, y tondaye yebna queftsátsbomna. ¹² Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbëtseimpadana cha chaoma chënga tsábe bendicionënga chamotsebomnama. Bënga chamosufrima ínýenga tmojtsama ora, bënga chë soye fchandbëtsoboyaye. ¹³ Inýenga bëngbiamna bacá tmojtsoyebuambná ora, jtsababuánýeshanëse fsënduamana jtëjuana. Quem luarentša entšangbe bominýiñe bënga jtsemnana chë puerte nduámanënga, mo chë quem luarentša basurëshëngcá, chë quem luarentša entšanga tondayama ndoservënénga, mo chë quem luarentša tsengacá; y chca endmëna mëntscoñama.

¹⁴ Quem soyënga ndoñe quecbatëbuabiamná tsëngaftanga chašmotsëuatjama, sinó ndayá jábuayenama mo cach atšbe basengbioycá, atšbe bonshánënga. ¹⁵ Er masque tsëngaftanga mallajta abuátambayënga chašmotsóbomñe, jacúntama ntjobenaycá, Cristbiamna chacmotsabuátambama, ndoñe banga quešmátabamna tsëngaftangbiamna mo taitangcá, Cristo Jesúsbeñe jtsošbuáchiyama tcmošanëjabuachama. Nýe atše sëndmëna mo taitacá tsëngaftangbiamna, mo ošbuachiyëngcá, er atše natsana tcbonjanabuayená chë tsábe noticiënga Jesucristbiamna, y tsëngaftanga chiñe šmotsanošbuaché. ¹⁶ Chíyecna, cbontsaimpadana ntšamo atše tijamcá chašmotsamama.

¹⁷ Chama Timoteo tsëngaftangbioye sentsichamná, atšbe bonshaná, canýe aiñe tsábe palabra bomná; Bëngbe Utabnábeñe tojanošbuachéyecna, atše Cristbiamna sënjanbuayiyná ora, mo atšbe uaquiñacánaca cha endmëna, ntšamo chabe ošbuáchiyana yomnama. Cha echanjama tsëngaftanga chašmuatenójuaboma ntšamo atše tsëngaftangbeñe tsjoyenama, Crístbeñe ošbuachiyacá, ndayama atše nýets tempo ošbuáchiyënga sëndbetsabuatambaycá nýets luare ošbuáchiyënga enefjuanenache. ¹⁸ Tsëngaftanguentše báseftanga ya šmojatsjuabná puerte uámanënga šmojtsemna ca, er šmojtsejuabná atše stsauatja tsëngaftangbioye jama jányama ca. ¹⁹ Pero Bëngbe Bëtsá chašojalesenciase, sentsobátmana betscó tsëngaftangbioye jama jányama. As chjinýe ntsache obenana imobomna chë Bëngbe Bëtsabe entšangcá jtsiyenama tša uámanënga imomna ca juabnayënga, y ndoñe nýe ntšamo jayanama imobencá. ²⁰ Er Bëngbe Bëtsá canýe ošbuachiyabe ainaniñe tojtsemánda ora, chca jtsinýnana ndoñe nýe ntšamo tojtsichámuama, ndayá Bëngbe Bëtsabe obenana chábeñe tojtsemnama. ²¹ ¿Tsëngaftanga ndayá más šmattseboše: atše chayá tsëngaftangbioye jaucácanama, o chayá tsëngaftangbioye jányama puerte bonshanánaca y ntsetsatjaycá tsëngaftanga jauyanama?

5

Ndayá cuanjama canýe boyabása shembásaftaca bacna soye amáftaca

¹ Ndegombre n̄yets luariñe entsótats̄embo ts̄êngaftanguent̄se yojtsemna can̄ya, shembásaftaca bacna soye amá, y nt̄samo cha yojtsamcá puerte bacna soye yojtsemna; ni ch̄e B̄engbe B̄etsábioye nduabuátm̄enga chca ntsamana: can̄ye entsá cachabe mamamnáftaca bacna soye yojtsama. ² Y ts̄êngaftanga cabá šmojatsjuabná corente tsábenga šmomna ca, masque chca ts̄êngaftangbeñe yojtsopasán̄ese. Ts̄êngaftanga cmontsamna puerte ngm̄énaca jtsemnana, t̄sa uabouana soye cha yojtsama causa. Can̄ye entsá chca tojamáftacna, ts̄êngaftanga cmontsamna jamana cha ndoñe más ts̄êngaftangaftaca chaondenútanama mo ošbuachiyacá. ³ Y at̄sna, masque ts̄êngaftangaftaca choca ndoñe quetsátsm̄ena, at̄sbe juabna choca ts̄êngaftangaftaca entsemna; y chca at̄sbe espíritoca s̄entsemnayeca, B̄engbe Utabná šoj̄eftsanat̄setá mándoca, s̄enjajuabó y s̄entsetats̄embo nt̄samo ts̄êngaftanga cmojtsamnana, ch̄e entsá chca tojamáftaca. ⁴ Ts̄êngaftanga chašmojénefina ora, chent̄se at̄sbe espíritoca ts̄êngaftangaftaca at̄se chántsemna, y at̄sbe espírítu chent̄se echántsemna B̄engbe Utabná Jesusbe obenánaca. ⁵ Y chora ts̄êngaftanga cmontsamna jamándana ch̄e entsá ya ndoñe más ts̄êngaftangaftaca mo ošbuachiyacá chaondenútanama, mo Satanase cucuat̄šife cha cuafjaboshjoncá, chca, ch̄e quem entsá n̄ye cachá tsábá jtsomñama juabn̄enga chaotsopochocama, y chca, B̄engbe Utabná cachiñe chaójésabo ora, chabe espírítu atsbocaná chaotsemnana.

⁶ Ts̄êngaftanga šmojtsejuabná puerte tsábenga y uáman̄enga šmomna ca, pero šmojtseles̄encia can̄ya ts̄êngaftanguent̄se chca chaotsamama. Chca ndoñe tsábá quenátsm̄ena. Ts̄êngaftanga ya šmondétats̄embo, nt̄samo ch̄e n̄ye batsá levadura endbama, n̄yets arnin̄yá chauábochema; cachcá, ts̄êngaftanguent̄se can̄ya t̄sa bacna soye chca tojama ora, n̄yetscangbiama ndoñe tsabe soȳenga jóbocnana. ⁷ Chiyeca, ts̄êngaftanga cmontsamna, chca uabouana bacna soye tojamá jtabocnana, cha ya ndoñe más ts̄êngaftangaftaca mo ošbuachiyacá chaondenútanama; y chora ts̄êngaftanga šmochántsemna mo ts̄em arnin̄yacá, ndocna levadúraca, ch̄e bacna juabn̄engaca ya nd̄emandán̄enga šmojts̄emnayeca. Ndegombre ts̄êngaftanga chca šmond̄m̄ena, er B̄engbe B̄etsá tojama ts̄êngaftanga ts̄em vida chašmotsebm̄nama. Bashco fiesta ora, oveshá tmojanóba, Israeloca ents̄anga perdonán̄enga chamotsemnana. Cachcá Cristo, mo ch̄e oveshacá, tojanóbana bacna soȳenguent̄šana b̄enga játsebacama. ⁸ Nt̄samo ch̄e judīenga ch̄e fiesta ora mondbamcá, n̄yets levadura ojamnana cachcá jon̄yayana, cachcá, b̄enga šontsamna jtsajbanana oyenana bacna soȳenga ín̄yengbiama jamama jtseboš̄ese, y ndaye bacna soye jtsam̄ese, nt̄samo tempo imojanamcá. Nt̄samo ch̄e judīenga ch̄e fiestiñe n̄ye levadúraca nd̄epormana tand̄ese mondbetsesaycá, cachcá, b̄enga šontsamna jtsiyenana n̄yetsca soȳenga ainaniñe ndocna bacna juábna jtsam̄ese, y ndegombre yomncá jtsóyebuambnaȳese y jtsam̄ese.

⁹ Ch̄e in̄ye at̄sbe tsbuanáchañe tcbonjáyuyana, ch̄e boyabása o shembásaftaca bacna soye am̄engaftaca tondayama chašmond̄etsencuénta ca. ¹⁰ Y chca ndoñe quetst̄étseboše jáuyanana n̄ya tondayama chašmond̄etsoyebuambná n̄yetsca ch̄e quem luarent̄s̄enga boyabása o shembásaftaca bacna soye am̄engaftaca, ch̄e n̄ye cach̄engbiama b̄etscá soȳenga jtsebm̄nama t̄sa boš̄engaftaca y at̄b̄eban̄engaftaca, y ch̄e cach̄engbe pormana soȳenga dios̄enga yomnama jtsejuabnaȳese adoraȳengaftaca ca; er n̄ya chca jamanna,

tšëngaftanga cmattsamna quem luarentšana jëftsebocanana. ¹¹ Ntšamo chora sënjanayancá endmëna ndayá tondayama ntsencuëntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nýe cachabiana bëtsá soyënga jtsebmnama tša tojtseboše, o chë cachabe pormana soyënga diosënga yomnama jtsejubnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entsángaftacna, ni mo šmuatjót'bema chëngaftaca cánýiñe jasama. ¹²⁻¹³ Atše ndoñe quešnátsmëna jayanana chë ndošbuáchiyënga, chë bëngaftaca ndoñe mondbénutananga, aíñe o ndoñe tšabá tmonjamama. Bëngbe Bëtsá echántsemna nda chëngbiana yochjayana ntšamo tmojamcá tšabá o ndoñe tšabá bëtsemnama, tšëngaftanga ndoñe. Ndegombre nýe chë ošbuáchiyënga tšëngaftangftaca imnënutanangbiana cmontsamna chca jayanana. Chcasna, šmochjama ntšamo Bëngbe Bëtsabe uabemana palabreñguiñe endayancá: “Tšëngaftanga cmontsamna, chca bacna soye amá tšëngaftangbentšana jtabocnana ca.”

6

Ošbuáchiyënga jendemándama tojtsemna ora

¹ Canýe tšëngaftanguentša ošbuachiyá inýe ošbuachiyabiana canýe demanda tojtsebmna ora, ¿cha nanjá chë ndošbuáchiyënga mandadëngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entsángbioye nanjá chabe demanda chamouenama? ² Tšëngaftanga ndegombre šmondétatšëmbo, Bëngbe Bëtsabe entsanga mochjayanama quem luarentša entsangbiana tšabá o ndoñe tšabá tmonjamama. Y chënga quem luarentša entsangbiana chca jayanama tmojtsobenëse, ¿ndoñe montsobena más base soyëngama chca jayanama? ³ Tšëngaftanga ndegombre šmondétatšëmbo chë angelëngbiámnaca tšabá o ndoñe tšabá tmonjamama bënga mochjayanama. Chcasna, bënga más jtsobenana chë quem luarentše jëftsiyename soyëngama chca játayanana. ⁴ Y chcase, tšëngaftangbeñe chca demandënga chë quem luarentše jëftsiyename soyëngama tojtsemna ora, ¿ndáyeca šmatjátëbuayana chë ošbuáchiyëngbiana tondaye tmonsámama entsanga, chë soyënga chamojandmanama? ⁵ Chca sënjayana tšëngaftanga chašmotsëuatjama: ¿O tšëngaftanguentše ni mo canýa yondmëna corente osertaná, ošbuachiyëngbeñe demandënga chamojandmanama? ⁶ Pero ndoñe chca: ošbuachiyëngbeñe demandënga tojtsemna ora, mandadëngbioye jana chë soyënga chamojandmanama. Y chca jamana ndošbuáchiyënga mandadëngaftaca.

⁷ Y tšëngaftangbeñe nýe demandënga jájandmanama tojtsemna ora, tšëngaftangbiana ya canýe puerte bacna soye jtsemnana. ¿Ndáyeca ndoñe šmattsóboyaye ínýenga bacá cmojtsaborlana ora? ¿Ndáyeca ndoñe cachcá šmatjonýaye ínýenga cmojtsabiatbëbana ora? ⁸ Pero cach tšëngaftangftacna inýetšá copasana, ínýengbioye bacá jtsaborlánana y jtsabiatbëbanana, y tšëngaftangcá Crístbeñe ošbuachiyëngbioynaca.

⁹ ¿Tšëngaftanga ndoñe šmondétatšëmbo, chë bacna soye amënga Bëngbe Bëtsabe amëndayoye ndoñe mochánjámashënguama? Ndoñe matenoíngñana. Ni chë boyabása o shembásaftaca bacna soye amënga, ni chë cachëngbe pormana soyënga diosënga yomna ca jtsejubnayëse adórayënga, ni cachëngbe boyá o shema ínýaftaca íngñayënga, ni chë

boyabásenga mo shembasengcá jtsinýnama bošénga, ni chë boyabásenga inýe boyabásengaftaca bacna soye aménga, ¹⁰ ni chë atbëbanénga, ni chë nýe cachéngbiama bëtscá soyénga jtsebomnama tša bošénga, ni chë tša tsoyénga, ni chë uayátsenayénga, ni chë inýengbiama bacna soye tmoýése immétsatbëbanénga, chénga nýetscanga ndoñe quemochatobenaye Bëngbe Bëtsabe améndayoye jamashjnama. ¹¹ Y tempo báseftanga tšéngaftanguentsénga chca šmojamna, pero Bëngbe Bëtsá tšéngaftangbe bacna soyéngama tcmojaperdoná, y chca entsemna mo bebénénga cuaftsemncá; cha tojama tšéngaftanga chabe entšanga chašmotsemnama, nýe cha chašmotseservénama, y tojama tšéngaftanga mo tšabengcá chabe bominiýiñe chašmotsemnama. Lempe chca Bëngbe Bëtsá, tojama ndayá Bëngbe Utabná Jesucristo tojanmama y ndayá Bëngbe Bëtsabe Espíritu tojamama.

Bëngbe cuerpo chaotsemna Bëngbe Utabná jtseeservénama

¹² Mondbétsichamo: “Atšbiama entselesenciana ndayánaca jamama, ndayama Bëngbe Bëtsá ndocá tonjayana ca.” Pero básefta soyénga jt-samana ndoñe atšbe tšabiama ntsemnana. “Atšbiama entselesenciana ndayánaca jamama ca”, pero ndoñe quichatsleséncia ndaye sóyecnaca nýets tempo mandaná jatsménana. ¹³ Mëntšánaca mondbétsichamo: “Saná uafsbiana y uafsbía saná chaóyëngacñama ca.” Pero Bëngbe Bëtsá canýe te echanjama chë uta soye chaotsopochocama. Bëngbe Bëtsá entšabiama cuerpo ndoñe tonjanma, boyabása o shembásaftaca bacna soye cha chaotsamama, sinó chë cuérpoca Bëngbe Utabná bënga chamoservema, y Bëngbe Utabná bëngbiama tšabe bendicionénga chaotsamama. ¹⁴ Y Bëngbe Bëtsá, nda tojama Bëngbe Utabná cháuatayenama, bëngbiámnaca chabe obenánaca echanjama chámuatayenama.

¹⁵ ¿Tšéngaftanga ndoñe šmondétatšëmbo, Crístoftaca cánýiñe mo canýacá šmomnama yomna mo tšéngaftangbe cuerpo chabe cuerpentša soye cuaftsemncá? Tšéngaftangbe cuerpo Crístbioye jaserviama endménayeca, tšéngaftangbe cuerpo jtsemnana mo Cristbe cuerpentša soycá. ¿Ntšamo atše chjátobena atšbe cuérpoca, chë ndayá yomna mo Cristbe cuerpentša soycá, canýe bacna vida bomna shembásaftaca bacna soye jamana, y chca atšbe cuerpo jabemana mo chë shembásabe cuerpentša soye cuaftsemncá? ¡Ndoñe, ndegombre ndoñe! ¹⁶ ¿O tšéngaftanga ndoñe šmondétatšëmbo, canýe entšá canýe bacna vida bomna shembásaftaca tbojéninýena ora, chë útata jóbemana mo canýacá? Er Bëngbe Bëtsabe uabemana palabrénguiñe boyabása y shembása tbojéninýenama mëntšá endayana: “Chë útata mo canýacá bochantsema ca.” ¹⁷ Pero canýe entšá Bëngbe Utabnáftaca cánýiñe mo canýacá tojtsemna ora, jtsemnana mo chë útata cach canýe espíritu tbojtsebomncá.

¹⁸ Nýa ndocna te canýe boyabása o shembásaftaca bacna soyénga šmattsama. Nderado ndaye inýe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nýe cachabe cuérpoca, y chë causa, chca jamése, cachabe cuerpama más bacna soyénga jtsamana. ¹⁹ ¿Tšéngaftanga ndoñe šmondétatšëmbo tšéngaftangbe cuerpo yomna mo canýe yebncá Uámana Espíritbiana, cha tšéngaftangbe ainaniñe chaotsiyenama Bëngbe Bëtsá tojánmayeca? Ndegombre tšéngaftangbe cuerpo ndoñe tšéngaftangbe soye quenátsmëna, sinó Bëngbe Bëtsabe soye. ²⁰ Chca endmëna, er Cristo bënga játsebacama

tojanóbana ora, yojamna mo cha bëtscá cuafjopagacá tšëngaftanga Bëngbe Bëtšábenga chašmotsemnana. Chíyeca, chë tšëngaftangbe cuerpëngaca chašmojtsama soyëngaca šmochtsinÿanÿnaye Bëngbe Bëtšá puerte uamaná y bëtšá bëtsemnana.

7

Jobouamayama jábuayenama

¹ Mora chanjóyebuambaye ndayá tšëngaftanga átšbioye šmojuábobemama. Ndegombre, canÿe boyabásabiama más tšabá endmëna ndoñe chaondobouamá. ² Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá. ³ Boyábioye bontsemna jamana chabe shembiana lempe ntšamo jamama ibomncá, boyá bëtsemnana; y chabe shémnaca cachcá chabe boyabiama chaoma. ⁴ Chë shembe cuerpo ndoñe nÿe cha cánÿabiama ntsemnana, sinó chabe boyabiámnaca. Cachcá, chë boyabe cuerpo ndoñe nÿe cha cánÿabiama ntsemnana, sinó chabe shembiámnaca. ⁵ Ni boyá, ni shema ndoñe chabondëtsejuabná jtsenbiátšbuana. Aíñe chca copodena, pero nÿe chë útata chca básefta tescama tbojenóyeunase, Bëngbe Bëtšáftaca jencuëntama jtsentšënama. Pero chentšana chë útata entsamna cachiñe cánÿiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

⁶ Atše chca sëntsichamo, tšëngaftanga jábuayenama, ndayá jamama šmojtselesenciana, y chca ndoñe chašmondétsamama jamëndama. ⁷ Y atšbe bariëna, atšbe juabna entsemna malaye nÿetscanga chë soyënguiñe mo atšcá šmattsemna. Pero Bëngbe Bëtšá cada ona obenana tbojatšetá tšabe soyënga jamama, Crístbeñe ošbuáchiyënga jujabuáchama, ínÿenga canÿe soyama, ínÿengna ínÿe soyama.

⁸ Chë cabá ndbouamnënga y viudanga sëntsëtsëtsná, chëngbiana tšabá yojtsemna ntjobouamaycá joquédana, atšcá. ⁹ Pero chca jtsemnana cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nÿe boyabásabiama o shembásabiama tša nÿets tempo jésejuabnayana.

¹⁰ Pero chë bouamnënga sëntsamëndá shema chabe boyábioye ndoñe cachcá chabondetsonÿá. Chca ndoñe nÿe atše quetsatamëndá, ndayá cach Bëngbe Utabná. ¹¹ Pero, shema cachcá chabe boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

¹² Chë ínÿenga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebomna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shëmbioye ndoñe cachcá chabondetsonÿá. ¹³ Nderado canÿe ošbuachiyá tbojtsebomna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonÿayana. ¹⁴ Er Bëngbe Bëtšá tojama, canÿe shembása ošbuachiyá chabe entšá chaotsemnana, nÿe chábioye chabotseservënana, y chca, chánaca jtsejuabnayana chë shembásabe boyá Crístbeñe ndošbuáchiyabiama mo chabiama oservena entšacá, cha chëngbeñe mo canÿe pamillëcá jatrabájama tojtseboše ora; y cachcá,

chë boyá ošbuachiyábeyeca Bëngbe Bëtsá jtsejuabnayana chabe shema Cristbeñe ndošbuáchiyabiana mo chabiana oservena entšacá, cha chëngbeñe mo canye pamillëcá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondmënayeca, canya o nyets uta bëtsëtsatbe ošbuáchiyama, Bëngbe Bëtsá jtsejuabnayana chë básengbiana mo chabe entšangcá. ¹⁵ Pero chë boyá o shema Cristbeñe ndošbuachiyá cachcá jtsenónyayama tša tojtsebošëse, chca chaboma. Chora, chë ošbuachiyá ndoñe ntsotocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjëmbana chašmotsiyenama. ¹⁶ Chca šmochjama, er aca shema çntšamo cattsetátšëmbo, tacuatjobenaye acbe boyá jayénjanana Cristbeñe chaotsošbuáchema, y chca, atsbocaná chaotsemnana? o aca boyá çntšamo cattsetátšëmbo, tacuatjobenaye acbe shema jayénjanana Cristbeñe chaotsošbuáchema, y chca, atsbocaná chaotsemnana?

¹⁷ Masque ntšámnaca, cada ona chaotsiyena jtsamëse ntšamo chë Bëngbe Utabná tbojatsetá obenana yomncá, cada ona ndayá jamama Bëngbe Bëtsá tbojachembcá. Chca atše nyets luare ošbuáchiyënga ene-fjuanenache sëndbëtsamëndaye. ¹⁸ Nderado Bëngbe Bëtsá cánÿabioye tbojachembo, y cha ínÿembeyeca chë más delicadentse base bobachtema tëtšená tojtsemna, ntšamo chë judiënga monduamancá, cha ndoñe chaondëtsenobiamná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmënanana, ntšamo chë judiënga monduamancá. ¹⁹ Er ndayá iuámana, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana. ²⁰ Cada ona bontsemna jtsiyëñana, ntšamo yojoyencá, chabe entšá chaotsemnana Bëngbe Bëtsá tbojanchembo ora. ²¹ Bëngbe Bëtsá tcmojanchembo ora, nyets tempo ínÿabiana oservená cojamnëse, chama ndoñe cattsenócochinÿena. Pero nderado tojtsemna ntšámose jashjáchama ndoñe más chca ntsemnana, cach acbiana jatrabájama, as chca cochjama. ²² Er chë nÿe ínÿabiana nyets tempo oservená yojamná, Bëngbe Bëtsá chabe entšá chaotsemnana tbojanchembo ora, cha mora ošbuachiyacá, jtsemnana canya ya ndoñe más bacna soyënga jamama juabnéngaca mandaná, sinó Bëngbe Utabnabiana oservená. Cachcá, chë nÿe cachabiana trabajayá yojamná, Bëngbe Bëtsá tbojanchembo ora, mora cha nyets tempo Cristbe oservená jtsemnana. ²³ Cristo bëngbiana tojanóbana ora, yojamna mo cha bëtscá cuafjopagacá, bënga Bëngbe Bëtsabe entšanga chamotsemnana. Ndoñe šmatjaleséncia nÿe entšangbe juabnéngaca nyets tempo mandánënga chašmotsemnana, y Bëngbe Bëtsabiana chacmotsebnétjomba. ²⁴ Chcasna, Jesucristbeyeca atšbe catšátanga, cada ona bontsemna Bëngbe Bëtsáftaca jtsiyëñana, ntšamo yojoyencá Bëngbe Bëtsá tbojanchembo ora.

²⁵ Y chë ndëbouamna shembásengbiana, chënga aíñe o ndoñe yontsamna jobouamayamna, atše chama ndoñe Bëngbe Utabnabe canye mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tšabiana tojanjuabóyeca, entšanga montsobena jtsejuabnayana aíñe tšabe palabra bomná chiñe atše tsmënama. ²⁶ Atše šontsinÿana, entšá ibojtsemna jtsomñana nÿe ntšamo mora yotsomñcá, er bënga mora montsiyena puerta padecena soyënguiñe.

27 Shema tcobomñese, ndoñe cachcá catjëftsonjaye; y ndoñe tcondbomñesna, ndoñe catjásenguaye. 28 Tcojobouamase, bacna soye ndoñe quecátama; y nderado canye tobiase tojobouamase, cach bacna soye ndoñe quenátama. Pero chë tmojtsobouamangna padecena soyënguine mochanjoyena quem luarentse chamojëftsemñentscuana, y atse sëntseboše chënga jujabuáchama chca jatiyenama ndoñe chaondëtsamnama.

29 Jesucristbeyeca atšbe catsátanga, ntšamo sëntseboše jayanamna mëntšá entsemna: Cristo quem luaroye yochjésabo orscama ya nye batšá entsájamna. Chiyeca, morscana y nyets tempo más chcoye, chë bouamnënga entsamna jtsiyenana mo ndoñe bouamnënga tmontsemncá, o mëntšá, entsamna jtsentsénana Bëngbe Bëtsabe soyënguine, y ndoñe nye chë bouamná bëtsemnama tbojtsemna soyënguine. 30 Cachcá, chë puerte ngménaca tša ošachiyine imomnënga, entsamna jtsiyenana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. 31 Chë quem luarentša soyëngaca jtsiyenama imojtsentsénënga entsamna jtsiyenana mo ndoñe chca tmontsamcá, er quem luare ntšamo bënga mora monduabuatmcá, pronto echanjochnëngo.

32 Atse sëntseboše tšëngaftanga ndoñe chašmondëtsenocochinjenama. Canye entsá ndoñe bouamná tontsemna ora, jtsoyobonana jtsentsénana Bëngbe Utabnabe soyëngama jtsejuabnayama, y ntšamo oyejuayá cha jabemama; 33 pero chë bouamná nyets tempo jtsenócochinjenana quem luarentša soyëngama, jtsiyenama, y ntšamo chabe shema oyejuayá jtsebomnama; 34 y chca, cha uta soyine canye ora jtsentsénana. Chë ndëbouamna shembása y chë tobiase bontsobona jtsentsénana Bëngbe Utabnabe soyënguine sempre jtsejuabnayama. Chënga mondobona jtsentsénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inyetsá, chë bouamna shembásana, nyets tempo jesenócochinjenana quem luarentse vida jtsebomnama soyëngama, y ntšamo chabe boyá oyejuayá jtsebomnama.

35 Atse chca cbontsëtsná tšëngaftangbe tšabiama, y ndoñe jamëndama ba soyënga jamama ndoñe chašmondëtsobenama, ndayá ntšamo tšabá yomncá chašmotsiyenama, y nye Bëngbe Utabná jtseservénama chašmotsentsénama.

36 Nderado nda tojtsejuabná chabe uatsëtsnaye tobiáseftaca jtsoyobouamayama ibojtsemna ca, chca jamama chë tobiase ya bëtsá tojtsemnaye, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntsamana. 37 Pero nderado inya, tondaye obligaciönaca tontsemna y lempe ntšamo tojtsebošcá cha tojtsobona jamama, cha tšabá tojajuabó y chabe ainaniñe corente tojtsetátšëmbo, ndoñe ntsoyobouamayana tšabá yomna ca, cha tšabá chca jtsamana. 38 Chcasna, chë tobiáseftaca tojtsobouamá chana, canye tšabe soye jamana; pero chë ndoñe cháftaca tonjobouamá chana, canye más tšabe soye jamana.

39 Chë shembása bouamná jtsotocánana chabe boyáftaca sempre jëftsiyenana, chë boyá vida tojtsebomñentscuana; pero chë boyá tojóbanëse, cha jtsoyobonana cachiñe jtobouamayana, nda cha tojtsebošáftaca, pero

chca chaoma mo canya Bëngbe Utabnáftaca cányiñe mo canyáca quetsomñecá. ⁴⁰ Pero atse jayanamna, cha más oyejuayá nántsemna ndoñe tontóbouamase; y sëntsejuabná, átšnaca tsbomna chë Bëngbe Bëtsabe Espiritu chašotsebuaiyina.

8

Uátšëmbona saná entsangbe pormana soyëngama

¹ Mora chanjóyebuambaye ndayá tšëngaftanga atse šmojatjama, ndayá jtsesayama, chë tempo ínÿenga cachëngbe pormana soyënga, diosënga yomna ca jtsejuabnayëse jadórama tmojanátšëmbona soyëngama. Bënga mondétatšëmbo bënga nÿetscanga osertánënga imomnama. Canya tbojt-sosertana ora, cha nderado nanjájuaboye, chca bétsemnama puerta uamaná cha yojtsemna ca, pero canya, ínÿenga tojtsababuánÿeshana ora, cha jtsobenana chënga becá jujabuáchana. ² Nderado nda tojtsejuabná ndegombre canye soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá. ³ Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entsacá.

⁴ Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngama, atse šcuayana: bënga corente mondétatšëmbo chë chënga innëtsadorana soyënga, diosënga yomna ca jtsejuabnayëse, ndegombre ndoñe dios quemátšmëna y ñe canya Bëngbe Bëtsá endmëna. ⁵ Pero masque celoca y quem luarentše chamomna entsangbiamna “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entsangbiamna diosënga ca ubuátmënga, y banga bëts mándoca entsangbiamna “utabnënga ca” uabáinënga), ⁶ bënga chë ošbuáchiyëngbiamna ñe canya Bëngbe Bëtsá endmëna, Bëngbe Taitá, ndábentšana nÿetsca soyënga yóbocana, y ñe nda jtseservénama bënga imoyena. Y ñe canye Utabnánaca endmëna, Jesucristo, ndábeyeca nÿetsca soyënga yomna, y cach bëngnaca imomna.

⁷ Pero nÿetsca ošbuáchiyënga ndoñe chca quemátstatsëmbo. Básefta entsanga, Crístbeñe cabá ntšošbuáchiye ora, imojanamana ndaye sanánaca juatšëmbonana, chë chënga imojanjuabná diosënga yojamna ca soyënga jadórama; chënga, chca uatšëmbonana tmojtsesá ora, jtsejuabnayana chca uatšëmbonana bétsemnama, y ainaniñe juabnënga jtsebomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca. ⁸ Ndegombre, ndayá bënga tmojtsesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominÿiñe ndoñe quemochátšmëna más tšábenga aíñe tmojtsesama; ni ndoñe chcanga, ndoñe tmontsesá causa.

⁹ Pero cuedado šmochtsebomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguiñe más batsá ošbuáchiyënga y osertánënga, ntšamo tšëngaftanga šmojtsamcá chamuatšmama, y chentšana, chëngbe ainaniñe juabnënga chamotsebomna y chëngbiyoe chaotsëtsësná ndoñe tšabá tmonjama ca. ¹⁰ Er, aca chë soyëngama tatšëmbuá, nderado tcojótšbema jasama canye luarentše, canye soye ndayama entsanga dios yomna ca jtsejuabnayëse adórayentše, y canye

Crístbeñe ošbuachiyá tojtsebomna ainaniñe juabnënga ndoñe tšabá tonjamama, chca tojáseyeca, aquëcá chë soyëngama ndoñe yondëtatšëmbo causa, y cha nderado chentše cojttesama tcmojinÿëse, chë soye nanjobenaye chábioynaca jañëmuana chë saná jasana, chë tempo chë soyëngama tmojanátšëmbona saná. ¹¹ Y chca aca, chë soyëngama ntšamo betatšëmbuama tcojamama, catjama chë Jesucrístbeyeca acbe catšata, chë ndoñe corente ošbuachiyá, y ndoñe aquëcá chë soyëngama corente tatšëmbuá, cha pochocaná chaotsemnana, er chabe ainantšë echántsemna juabnënga canÿe bacna soye tojamama, chë saná tojasama. Chca nderado cánÿabioye catjama, ndabiama Cristo tojanóbana, cha jatsbocama. ¹² Jesucrístbeyeca acbe catšatbiama chca bacna soye tcojama ora, chca causa cha canÿe soye tojama, ndayama chabe juabnënga ainaniñe chabotsatsëtsná ndoñe chca chaondëtsama ca; y chca, chentšana tša tojesejuabná cha canÿe bacna soye tojamama, acna canÿe bacna soye jamana, ndoñe nÿe chë catšatbiama, ndayá cach Cristbiámnaca. ¹³ Chíyeca, nderado ndayá atše stesama, atše tsjama Jesucrístbeyeca atšbe catšata chaoma canÿe soye y chca jamana chabiama canÿe bacna soye tojtsemnëse, más tšabá nántsemna ndocna te chë soye atše ntjasana, chca, atše ndoñe jatsmama cha canÿe bacna soyiñe chaótsatsama.

9

Jesucristbe ichmónëngbe derecho

¹ Ndegombre endmëna, atše ndayánaca jamana stselesenciánama y Moisesbe leyëngaca ndoñe más mandaná séntsemnana. Cach ndegombre endmëna, atše canÿe Jesucristbe ichmoná tsmënama y Jesús Bëngbe Utabná tijinÿama; y cach tšëngaftanga mora ošbuáchiyënga jtsemnëse, šmondmëna ndayá tojóhocna Bëngbe Utabnabiama atšbe trabajuentsana. ² Masque ínÿenga atšbiama ndoñe quematsjuabná atše canÿe Jesucristbe ichmoná tsmëna ca, tšëngaftangbiamna aíñe chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánÿiñe mo canÿacá šmondmënama, puerte tšabá šmontsinÿanÿná atše Jesucristbe canÿe ichmoná tsmënama.

³ Mëntsá chanjayana chë atše ndoñe tšabá tijama ca imojtsichámëngbiana: ⁴ Ndegombre bënga nÿets derecho fsëndëtsóbomñe jtsobátmanama tšëngaftangbentsana, chë tcojujubuáchëngbentsana, bëngbe trabajuama saná o ndayá jofšiyama chašcuacaredadama. ⁵ Y bëngnaca derecho fsëndëtsóbomñe canÿe shema ošbuachiyá jtsebomnana y bëngaftaca cha jëftsëtsama inÿe luaroye fstsajna ora, ntšamo chë Jesucristbe inÿe ichmónënga, Bëngbe Utabnabe catšátanga y Pédrënaca mondbetsamcá. ⁶ ¿O nÿe Bernabé y atše šojtsëtocana cabëndatbe cucuátseca jatrabájana vida jtsebomnana, y ndoñe derecho fsëntsebomna ošbuáchiyënga chašotsacuédanama, Bëngbe Bëtsabiama trabájayama? ⁷ ¿Ndëmua mo canÿe soldacá tojtsoservená, ndayá tbojtsájabotama cachá nantsatopagana, vida jtsebomnana? Ndocná canÿe jajañe uvas betiyënga ntjájena, chentša uvasëšangá ndoñe ntjuasama. Ndocná oveshënga ntsanÿenana, chë tojabuatëba létsiyentsana ndoñe ntjofšiyama. ⁸ Ntšamo atše muentše sentsichamcá ndoñe nÿe entsangbe juabna quenátsmëna; y Moisesbe leyíñnaca cachcá endayana, ⁹ er chabe leyíñe mëntsá endayana: “Aca canÿe

toróftaca shajuana tmojtsatbaná luariñe chacojtsetrabája ora, ndoñe catjuanguétsenaye ca.” Y chca ndoñe quenátayana Bèngbe Bètsá n̄ye toronga ínètsan̄yena ca,¹⁰ sinó in̄ye más bèts soye; chca endayana ndayá ndegombre bēnga, chē Bēngbe Bētsabiana soyēngama abuyayinayīñe trabájayēnga cha šnetsan̄yena ca. Chca tmojanábema bēngbiana, er chē fshantse aráyá y chē meshēnga atbanayá, entsamna chca jamana jtsobátmanēse, chē tmojátabe shajuanentsana batšá jóyēngacñama.¹¹ Y chca, bēnga chē tsabe noticiēngama tchojábuaenase, y chca, Bēngbe Bētsábiocana tsabe bendicionēnga chašmotsebonnama bēnga tifjama, ndoñe yapa tanandásmēna tsēngaftanga jótjañana, chē šmobomna soyēnguentšana bēnga jēftsiyenama chašcuatšatama.¹² In̄yēnga derecho tmojtsebonna tsēngaftanga jótjañana chē šmobomnentšana chašmuacaredadama, tsēngaftangbeñe chēngbe trabajuama, as bēnga más derecho ftssebonna chca jamama.

Pero bēnga tondaye checbatamēndá, bēnga chē derecho bétsebonnayeca. Chca játamamna, bēnga lempe fsēntsoboyá, chca, bēnga tondaye ntjátamama, y chē causa entsānga ndoñe chašondétsayaunana, bēnga chē tsabe noticiēnga fstsabuayiyá ora.¹³ Tsēngaftanga šmondétatsēmba, Bēngbe Bētsabe bēts yebnoa trabájayēnga Bēngbe Bētsabiana oservēniñe, mondbóyēngacñe chēnga jasama, ndayá entsānga Bēngbe Bētsá jadórama chabe bēts yebnoye tmojiyēbo sananguentšana. Y chē Bēngbe Bētsá jadórama soyēnga amēnga, altaroca, chē juatšēmbonama luarentse, chēnga jasana ndayá chentse tmojuatšēmbona soyēnguentšana.¹⁴ Cachcá, Bēngbe Bētsá tojamandá, chē tsabe noticiēnga abuyayinayēngna, vida jtsebonnamna lempe ntšamo tojtsējabotcá chamóyēngacñe ca, chē tsabe noticiēnga abuyayinayama.¹⁵ Pero atše ndocna te chiyaisemandá in̄yēnga chca chašmotsecuedánama, atše chē tsabe noticiēnga abuyayinayá bétsemnama chca derecho tsbómnyeyeca, y cach ndoñe mora quem soye quecbatēbuabiarná, tsēngaftanga ndayánaca atše chašmuatšetama. Atšbiana más tsabá nántsemna jóbana, y ndoñe ntjalesénciana in̄ya chaoma atše cach atšbiana oyejuayá ndoñe ntjátsmēnama, in̄yēngbentšana soyēnga stjóyēngacñe causa.

¹⁶ Atše ndoñe quetsatsjuabná atše can̄ye bēts soye stsama ca, chē tsabe noticiēnga stsabuayiyama, er atše obligaciōnaca sēntsemna chca jtsamama, Bēngbe Bētsá chama šojanchémboyeca. ¡Tša lastemcá atšbiana nántsemna, chē tsabe noticiēnga ndoñe sēntsabuayiyenase!¹⁷ Chíyeca, atše chē tsabe noticiēnga stsabuayiyá n̄ye atše chca jamama stsebóseyeca, atšbe uacanana soye ya stsebonna; pero atše chca stjama, y ndoñe tontsemna n̄ye atše chca jamama stsebóseyeca, masque chca, atše stsama, ndayá jtsamama Bēngbe Bētsá šojanbon̄yecá.¹⁸ Y chca, atšbe uacanana soye endmēna atše oyejuayá jtsemnana chē tsabe noticiēnga abuyayinayama, ošbuachiyēngbentšana atše vida jtsebonnama tondaye ntjatoyēngacñecá; chca, atše tondaye quetsátama chē tsabe noticiēnga abuyayinayama tsbomna deréchoca, chē atšbe trabajuentsana vida jtsebonnama.

¹⁹ Atše, masque ndocna entsábeyeca n̄yets tempo mandaná quetsátsmēna, puerte nduamaná sēnjóbema, mo can̄ya n̄yets tempo in̄yabeyeca mandanacá, n̄yetscanga jasérviana, chca, atše chca jtsamēse, jobenayama beca entsānga, ntšamo tojopodecá, jayēñjanama Cristbeñe chamotsošbuáchema.²⁰ Chē judiēngbiamna atše sēnjama chaitsiyena

mo chëngcá jtsamëse y jtsejuabnayëse, chca, atše jobenayama chënga jáyënjanama Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjobema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjanama Crístbeñe chamotsošbuáchema. ²¹ Pero chë Moisesbe léyeca ndëmandánënga oyenëngbiamna, atše chëngcá sënjobema, chënga jáyënjanama Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Cristo šomandacá. ²² Chë nÿe batsatema ošbuáchiyëngbiamna y Bëngbe Bëtsabe soyëngama nÿe batsatema osertánëngbiamna, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nÿetscanga imomncá atše chaitsemnana, endmëna atše jobenayama báseftanga jáyënjanama Crístbeñe chamotsošbuáchema.

²³ Atše lempe chca sëndama, bëtscá entsanga chë tšabe noticiënguifne chamotsošbuáchema, y chca, atše atsbocaná chaitsemnana y chëngcá atše chayóyëngacñana, chë atsebácanënga Bëngbe Bëtsá yochjatsataye tšabe soyënga.

²⁴ Tšëngaftanga šmondëtatšëmbo, canÿe luaroye jashjanguama entsanga tmojótjajo orna, banga jotjajuana, pero nÿe canÿa chë uacanana soye jóyëngacñana. Chcasna, mo chë uacanana soye jóyëngacñama tmojotjajëngcá, tšëngaftanga cmontsamna jtsiyenana, chë Bëngbe Bëtsábiocana uacanana soye josháchiñama. ²⁵ Nÿetscanga chë tmojótjajënga ínÿenga jáyënjanama, chënga jopróntana nÿetsca soyënguifne jtsenomándayëse, chca, canÿe uacanana soye, tsbuanachëngaca uapormana coronësha juayëngacñama; y chësha betscó jtsanctana. Pero bënga ndoñe; bënga mondoyena Crístbiana soyënga jtsamëse, Bëngbe Bëtsábiocana ba tšabe soyënga mo uacanáncá jóyëngacñama, y chë soyënga nÿetsca tescama bënga mochanjëftsebmna. ²⁶ Y atšna, atšbe bariëna sëndëntšena Bëngbe Bëtsá jtseservénama, ndoñe mo canÿa ínÿëngbiyoye jáyënjanama tojtjajuacá, chë ndëmoye jashjanguama yomnama ntsetatšëmbcá; y cach ndoñe mo nda tojtsepeliá orcá, chora, cha nÿe ínÿoye chabe buacuatsënga tojtsëtsana y chë ínÿabe cuerpoye ndoñe. ²⁷ Mo canÿe tšabe peliyacá, chabe cuerpo játsetšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainanentša juabnënga chašotsemándama; y chca, Crístbiyoye jtseservénëse chamotsiyenama ínÿëngbiyoye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

10

Cach entsangbe pormana soyënga ndoñe chamondëtsadoránama jábuayenama

¹ Jesucrístbeyeca atšbe catšátanga, atše sëntseboše tšëngaftanga chašmotsetátšëmbo bëngbe tempsca bëts taitanga judiënga, chënga nÿetscanga Bëngbe Bëtsá canÿe jantšetësheca benache yojaninÿanÿná, y chënga nÿetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuafstomñcá. ² Chë jantšetësheca Moisés imojanëstonama, y chë mar bejayëjana tmojánama, chënga

tmojanóbema Moisesbe ústonënga. ³ Chënga nÿetscanga tmojanse cachca saná, chë Bëngbe Bëtsá celocana tojanichmó saná; ⁴ y nÿetscanga tmojanofsé chë Bëngbe Bëtsá tojanma chë peñësëntšana chaóbozna béjaye. Cristo chëngaftaca yojtsemna jtsanÿenama chënga imojtsajnëntscuana, y ntšamo chë peñësëntše chëngaftaca tojanopasacá, yojaninÿanÿná Cristo chënga yojtsanÿenama. ⁵ Masque chca, banga chënguentsënga ntšamo tmojanmama Bëngbe Bëtsá ndoñe yontsóyejuaye; y chë causa, Bëngbe Bëtsá tojanma chënga chamóbanama chë entsãnga ndoyenentše.

⁶ Lempe chca tojanopasá bënga jinÿanÿiyama y jábuayenama ntšamo inopása entsãnga bacna soyënga jamama tmojtseboše ora, bënga chca jamama ndoñe chamondëtsebošama. ⁷ Chíyeca, tšëngaftanga ndoñe šmattsadorana entsãngbe pormana soyënga, ndayama ínÿenga jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrenguifne chëngbiamá endayancá, chënga canÿe tenerá castellánoca tmojanpormá ora, mo dios cuaftsemncá jadórama: “Entšãnga tmojanotbiamá jasama y jatnuama, y chentsãna tmojantsbaná joboyeuama ca”. ⁸ Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nÿe canÿe te, uta bnëtsana y unga uaranga entsãnga tmojanóbana ⁹ Bacna soyënga ndoñe šmattsama, jinÿama buetatescama Bëngbe Utabná uantado yochjëftsemnana y ndoñe šochanjacastigayama. Báseftanga chënguentsënga chca tmojanma, y chë causa tmojanóbana mëtšcuayëngaca ftëtšenënga. ¹⁰ Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

¹¹ Lempe chca bëngbe tempsca bëts taitãngaftaca tojanopasá, bënga jinÿanÿiyama ntšamo jtsiyenana šojtsamnana, y Moisés, Bëngbe Bëtsabe uabemana palabrenguifne chca tojëftsanboshjona bënga jábuátambama, bënga, chë Jesucristo yochjésabo orscama ya batšatema yojtsájamna ora oyenëngbiamá. ¹² Chcasna, nda tojtsejuabná Bëngbe Utabnabiamá tšabá yojtsama ca y bacna soyënga ndocna te yochanjama ca, cuedado chaot-sebomna, bacna soyënga amiñe ndoñe chaondótsatsama. ¹³ Ndocna entšá jatócochënguana bacna soyënga jamama, ntšamo tempo ínÿenga ndoñe tonjanocochëngcá cachca bacna soyëngama, pero tšëngaftanga corente šmondëtatšëmbo Bëngbe Bëtsá sempre cmochtsëjabuachanama chë padecena soyënguifne, y cha ndoñe yochanjalesenciama bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebmncá; pero chë padecena soyënguifne chašmojtsemna ora, cha cmochanjinÿanÿiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

¹⁴ Chíyeca, atšbe bonshánënga, ndocna te šmattsadorana cach entsãngbe pormana soyënga, ndayama ínÿenga jtsejuabnayana diosënga yomna ca. ¹⁵ Atše sëntsoyebuambná mo tšëngaftanga corente osertánënga cuaftsemncá. Cach tšëngaftanga smochjenójuaboye y smochjayana, ntšamo cbojtsëtsësnacá aiñe o ndoñe tšabá bëtsemnana. ¹⁶ Ntšamo Jesús chë coptema vinoyama Bëngbe Bëtsábioye tbojtanchuacá, bëngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinÿanÿayana bënga Crístoftaca cánÿiñe mo canÿacá

imomnama, chabe buiñe juabuáshanëse bēngbiama tojanóbanayeca. Y chē mondbajataye tandēse tmojase ora, jtsinŷanŷnayana bēnga Crísoftaca cánŷiñe mo canŷacá imomnama, cha bēngbiama tojanóbanayeca. ¹⁷ Bēnga ošbuáchiyēnga masque banga mondmēna, chca orna nŷetscanga cach tandēsentsana bēnga jasana, y chíyeca bēnga jtsemnana mo canŷacá, mo Cristbe cuerpcá.

¹⁸ Tšēngaftanga šmochtsejuabnaye ndayá chē Israeloca bachnanga monduamanama: chēnga chē altaroca tmojóba y tmojuátšēmbona bayēnguentšana jasana, y chca chēnga chora jtsinŷanŷnayana chēnga cánŷiñe mo canŷacá imojtsemnana Bēngbe Bētsáftaca, chē chca tmojtadoranáftaca. ¹⁹ Y chca, atše ndoñe quetsátsboše jayanama chē entsangbe pormana soyēnga mo diosēnga cuaftsemncá, uámana soyēnga yomna ca. Ni chē cach entsangbe pormana soyēnga diosēnga yomna ca jtsejuabnayēse jadórama uátšēmbona saná inŷe sanama más iuámana ca. ²⁰ Pero aíñe, entsanga cach entsangbe pormana soyēngama mo diosēnga cuaftsemncá, chca tmojuátšēmbona ora, ndegombre chēnga Satanás y chabe uajabuachanēngbiyoe jtsadoránana, y ndoñe Bēngbe Bētsábíoye. Y atše ndoñe quetsátsboše, tšēngaftanga chca uatšēmbonana šmojasama, cánŷiñe mo canŷacá chē bayējēngaftaca chašmotsemnana. ²¹ Tšēngaftanga ndoñe quešmátobena chē vínoye coptémentšana jofšiyana, ntšamo chē ošbuáchiyēnga bētsemnana mondbetsamcá, y chentšana chē cach entsangbe pormana soyēnga, mo diosēnga cuaftsemncá jadórama vínoye coptémentšánēnaca. Chca šmojama ora jtsemnana mo chē diablēngaftaca cuaftsesangcá. Y cach ndoñe quešmátobena vínoye jofšiyana y tandēse jasana, ntšamo ošbuáchiyēnga bētsemnana mondbetsamcá, y chentšana cach entsangbe pormana soyēnga mo diosēnga cuaftsemncá jadórama fiestentša sanánaca jasana, y chca chē bayējēngbiyoe jt-sadoránana.

²² Bēnga chca tmojtsamama, bēnga mochanjama Bēngbe Utabná puerte etonaná bēngaftaca chaotsemnana, er chē bayējēngaftaca bēnga chca jtsamana. ¿O imojtsejuabná bēnga chabiama más obenana bomnēnga imomna ca?

Lempe šmochjama Bēngbe Bētsá puerte bētsá y uamaná yomnama jinŷanŷiyama

²³ Mondbētsichamo: “Entselesenciana ndayánaca jamana, ndayama Bēngbe Bētsá ndocá tonjayana ca”, pero básefta soyēnga atše stjama ora ndoñe nŷetscangbe tšabiama ntsemnana. “Entselesenciana ndayánaca jamama ca”, pero nŷetsca soyēnga ntšamo bēnga tmojamcá, ošbuachiyēngbiyoe ndoñe ntjujabuáchana Jesucristbeñe más chamotsošbuáchema, y ainaniñe más añemo chamotsebomnana. ²⁴ Ndocná chaondétsama lempe ntšamo tojobenacá nŷe cachabe tšabiama, ndayá más chaotsama chē ínŷengbe tšabiama.

²⁵ Lempe mercadoca tmojtsena soyēnguentšana šmochjase, ntjatstjanaycá chē mēntšena aíñe o ndoñe tmonjuátšēmbona chē cach entsangbe pormana soyēnga, mo diosēnga cuaftsemncá jadórama ca. Ndoñe chca šmattsetjanaye, ntšamo tšēngaftangbe ainaniñe juabnēnga šmojtsebomnana; ²⁶ er ntšamo Bēngbe Bētsabe uabemana palabrenguñe endayancá: “Quem luare Bēngbe Utabnabe soye endmēna, y lempe ntšamo chiñe yomncánaca ca.”

27 Nderado canye ndoşbuachiyá tcmojúbuaja chábioca jasama, y tşengaftanga choye jama tşa şmojtseboşese, lempe ntşamo cha chacmojonanjacá şmochjase, ndayentsana chë saná tojóbobnana ndocá ntjatstjanaycá, ntşamo tşengaftangbe ainaniñe juabnënga şmojtsebomnama. 28 Pero nderado nda tcmojáuyana: “Quem mëntşena cach entşangbe pormana soyënga mo diosëngcá jadórama tmonjanátşëmbona ca”, as ndoñe chana şmatjase, er canya chca tcmojáuyana, y ainanentşe şmojtsebomna juabnënga, chë chca jamama ndoñe tşabá bétsemnama. 29 Atşe sëntsoyebuambná ndayá chë chca tcmojauyanabe ainaniñe juabnëngama, chë soye jasana ndoñe tşabá yondmënama, ndoñe chë tşengaftangbe ainanentşa juabnëngama.

Pero tşengaftanga şmatjatjaye: “¿Ndáyeca atşe şojtsemna jayanana ndayá atşe stsobena jamama, oşbuachiyá bétsemnama, ntşamo chë ínÿabe ainaniñe juabna yobomnama ca? 30 Y atşe chë ndayá stsesama Bëngbe Bëtsá tijëtschuase, ¿ndáyeca inÿa şochjauyana atşe ndoñe tşabá tijama ca, chë soye tijasama, chë ndayama Bëngbe Bëtsá tijëtschuá ca?” 31 Masque ntşámnaca, cachcá, chaşmojttesá, o chaşmojtsofşësná, o ndaye inÿe soye chaşmojttsama, ndayama Bëngbe Bëtsá ndocá tonjayana, lempe şmochtsama Bëngbe Bëtsá puerte bëtşá y uamaná yomnama jtsinÿanÿnayama. 32 Tondaye şmatjama ndayá chaobená jamana, ínÿenga Cristo chamotsábotema. Ndoñe chca şmatjama, ni judiëngbiama, ni ndoñe judiëngbiama, ni chë Bëngbe Bëtsábeñe oşbuachiyëngcá enefjuanëngbiama. 33 Smochtsama ntşamo atşe sëndëntşencá, nÿetscanga nÿetsca soyënguiñe oyejuayënga jtsabamnama, lempe ntşamo stjobenacá jtsamëse, ndoñe nÿe atşbe tşabiama, ndayá masna chë ínÿengbe tşabiama, chënga chamot-sobenama chëngbe bacna soyënguentsana atsebácanënga jtsemnama.

11

1 Tşengaftanga şmochtsiyena ntşamo atşe sëndamcá jtsamëse, cach ntşamo atşe sëndoyencá, ntşamo Cristo inetsamcá jtsamëse.

Ntşamo yomna shembásenga tşabá jtsemnama, oşbuachiyëngcá tmojënefjna ora

2 Atşe sëntseboşe tşengaftanga jáuyanana tşabá şmojama ca, tşengaftanga nÿetsca soyënguiñe atşbiamá şmnëtsenojuabnana, y tşengaftanga şmojtsabuátambama y şmojtsamama ntşamo tçbonjanabuatambacá, cachcá ntşamo atşe sënjëtşanboshjoncá. 3 Pero atşe sëntseboşe tşengaftanga chacmësertá: nda nÿetsca entşanga iuamënda cha, Cristo endmëna; y nda shémbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. 4 Nderado canye boyabása chabe bestşaşe tojtsenátşbotse, inÿe oşbuáchiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestşáşeca chca tojama causa. 5 Pero nderado canye shembása chabe bestşaşe ndoñe tontsenátşbotse, inÿe oşbuáchiyëngaftaca cánÿiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjana mo cha lempe jshetëtşená cuaftsemncá. 6 Er, nderado canye shembása ndocna te tontseboşe chabe bestşaşe jtsenátşbotsana, chabiama más tşabá nántsemna lempe chaotsenójshetëtşe. Pero tojtsejuabná utsbotjená o chca lempe jshetëtşená jtsemnama cha yochtsëuatja ca, as chabe

bestšaše chaotsenátsbotse. ⁷ Boyabása ndoñe quebnátsmëna chabe bestšaše jtsenátsbotsana, er Bëngbe Bëtsá tojanma ntšamo cachá yomncá cha chaotsemnana, y chë boyabása chca jtsemnëse, jtsinýanýnáyana Bëngbe Bëtsá chabe mandayá yomnana. Pero ntšamo chë shembása yomncá, jtsinýanýnáyana chë boyabása chabe mandayá yomnana; ⁸ er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. ⁹ Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. ¹⁰ Chíyeca, y chca jamama angelënga tšabá jtsinýanánayeca, shembása jtsemnana chabe bestšaše chaotsenátsbotsama, chca, chaotsinýnaya inýa chábeñe yomándama. ¹¹ Pero, Bëngbe Utabnábeñe ošbuachiyëngcá jtsiyenamna, boyabásenga y shembásenga cachcá jtseytëtanana. ¹² Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábiocana endóbocana.

¹³ Cach tsëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canýe shembásabiamna Bëngbe Bëtsáftaca jencuëntana, bestšaše ntsenatsbotscá. ¹⁴ Ntšamo entšanga sempre mondbetsejuabnaycá, ndayá tšabá bëtsemnana, bëngbioye jtsabuátambayana, boyabása bën stjënësha chabuájuaa tojalesenciase, cha jamana cachá chama chaotséuatjama. ¹⁵ Pero shembásabiamna, chë bën stjënësha jtsinýanýnáyana chabe botamanana y uámanana, er Bëngbe Bëtsá tojanma shembása bën stjënësha chaotsábomnana, chca, cha chaotsebomna ndáyeca chabe bestšaše jtsenátsbotsama. ¹⁶ Masque ntšámncá, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatslesencia chca ndoñe chaondëtsemnana.

Bëngbe Utabnabiamna jtenójuaboyama jasama ora, chënga ndoñe tšabá imonjánama

¹⁷ Mora cbochanjamënda soyënguiñe atše ndoñe quetsátobena tsëngaftanga jáuyanana tšabá šmojama ca, er tsëngaftanga Crístbeñe ošbuachiyëngcá šmojénefna ora, Bëngbe Bëtsá jadórama, atše sontsinýana chë soye yojtsoserverna tsëngaftanga más bacá chašmotsemnana, y ndoñe tsëngaftange tšabiamna. ¹⁸ Natsana cbochjáuyana, atše sënjouena tsëngaftanga ošbuachiyëngcá šmojénefna ora, báseftanga canýe soye innëtsejuabnaye y ínýengna inýetsá ca, y atše sëntsejuabná batšana ndegombre chca yojtsemna ca. ¹⁹ Ndegombre jtseytana tsëngaftangbeñe chamotsemna báseftanga canýe soye juabnaye y ínýengna inýetsá, chca, nýetscanga chamotsetatšëmbuama ndëmuanýenga imojtsemna chë Bëngbe Bëtsá tojayana chënga tšabá tmojama ca. ²⁰ Tsëngaftanga tandëse jasama y vínoye jofsiyama šmojénefna ora, ntšamo bënga fsënduamancá, Bëngbe Utabná bëngbiama tojanóbanama jtenójuaboyama, ndayá chora tsëngaftanga šmnetsamcá, ndoñe quenátsmëna ntšamo ndegombre cmojtsamncá, chë Bëngbe Utabnabiamna jtenójuaboyama jasama ora; ²¹ er chë jasama tojobuache ora, cada ona inóntša jasama ndayá tojiyëbcá, y ndoñe ntjatobátmanana nýetscanga ndayánaca jasama chamotsebomnëntscuana; báseftanga shëntseca joquédana, y ínýengna tša jëftsesana y jofsiyana jëftsótmenantscuana. ²² ¿Tsëngaftanga ndoñe yebna šmondbomna ndayentse jasama y jofsiyama? ¿Ndáyeca tsëngaftanga šmojtsejuabná chë innénefna ošbuáchiyënga nduámanënga imomna

ca, y šmojama chë chentše tmojtsemnënga, tondaye ndbomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiamia jasama ora chca šmojamama? ¡Ndegombre ndoñe!

*Bëngbe Utabnabiamia jtenójuaboyama saná
(Mt 26.26-29; Mc 14.22-25; Lc 22.14-20)*

²³ Er atše cach Bëngbe Utabnábentsana ntšamo chontsabuatëmbacá sënjanóyëngacñe: Bëngbe Utabná cach uayayëngbe cucuatšíñe tmojánboshjona ibeta, tandëse tojanca, ²⁴ Bëngbe Bëtsábíoye tbojtanchuá chentšana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiamia chanjóbana. Ntšamo mora montsamcá šmochtsama, atšbiamia jtenójuaboyama ca.” ²⁵ Cachcá, chë saná tmojansentšana, coptema tojanaca y tojánayana: “Quem coptema vínoye atšbe buíñe entsemna. Atšbe buíñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entšanga tojanašebuachenacá pronto yochtsemnama. Cada vínoye chašmojtsofšëšná ora, chca šmochjama atšbiamia jtenójuaboyama ca.” ²⁶ Er tšëngaftanga cada quemëntša tandëse chašmojtsešá ora y quem coptementšaycá chašmojtsofšëšná ora, Bëngbe Utabná chaojésábentscuana tšëngaftanga šmochántsinýanýnaye cha entšangbiamia tojanóbanama.

Ntšamo yomna jamana, Bëngbe Utabnabiamia jtenójuaboyama jasama ora

²⁷ Chcasna, Bëngbe Utabnabiamia jtenójuaboyama jasama ora, ndánaca tandësentšana tojase y coptémentšana tojofšé, ndoñe chë ntšamo chaotsemnama Bëngbe Utabná yojanjuabnacá, chabiamia Bëngbe Bëtsá jayanana cha puerte bacna soye tojama ca. Chë entšá chca tojama ora, cha jtsinýanýnayana, Bëngbe Utabnabe cuerpo y buíñe chabiamia tondaye yonduámanama. ²⁸ Chíyeca, entsemna cada ona corente chauenojuabó jtsetatšëmbuama aíñe o ndoñe yontseprontana chca jasama y jofšiyama, cabá ndëse y ndofšé ora. ²⁹ Er nderado nda tojase y tojofšé, chë Bëngbe Utabnabiamia jtenójuaboyama jasama ora, cach Bëngbe Utabnabe cuerpo yomnana ntjajuaboycá, cha chë sóyeca jamana Bëngbe Bëtsá chabotsecastigama. ³⁰ Chíyeca, banga tšëngaftanguentšënga šoquënga šmojtsemna, ínýenga añemo ndbomnënga, y ínýengna ndoñe nýe báseftanga tmojóbana. ³¹ Pero bënga corente tmojajuabó jtsetatšëmbuama aíñe o ndoñe montseprontana ntšamo šuamncá jasama y jofšiyama, cabá ndëse y ndofšé ora; chca, Bëngbe Bëtsá ndoñe buántsemna bënga játacastigana, ntšamo tšabá yomncá ndoñe tmonjase causa. ³² Pero, Bëngbe Utabná castígoca chca šojabuayená ora, jtsemnana bënga más tšabá jtsamama chamuatšjínýama, y chca, bayté chentšana, Bëngbe Bëtsá ndoñe chabondëtsemna játayanana bënga šojtsamna nýetsca tescama castigánënga jtsemnama ca, cánýíñe chë nýe quem luarama enójuabnaye entšangaftaca.

³³ Chca, Jesucrístbeyeca atšbe catšátanga, tšëngaftanga chë Bëngbe Utabnabiamia saná jasama chašmojénefjna ora, cánýíñe nýetscanga šmochjajobátša. ³⁴ Y nderado nda tbojtseshëntsana, cachabe yebnoca chauétsese, chca, Bëngbe Bëtsá ndoñe chabondëtsemna tšëngaftanga jácastigana chora ndoñe tšabá šmonjama causa. Chë ínýe soyëngama

ndayama tsëngaftanga šmonjatjá, chamna chanjamánda tsëngaftanga jányama chajá ora.

12

Bëngbe Bëtsabe tsetana obenana, tsabe soyënga jamama

¹ Jesucristbeyeca atšbe catšátanga, atše sëntseboše tsëngaftanga chašmotsetátšëmbo Bëngbe Bëtsabe tsetana obenanama tsabe soyënga jamama, Cristbeñe ošbuáchiyënga jujabuáchama.

² Tsëngaftanga šmondétatšëmbo, tsëngaftanga Cristbeñe ndošbuáchiyënga šmonjamna ora, ínÿenga cmonjanabuatambá soyënga, y chora tsëngaftanga šmonjamna ínÿabeyeca uasjanëngcá, cach entsangbe pormana soyënga mo diosënga cuaftsemncá jadórana; y chë soyëngna ni mo jóyebuambayama ntsoobenana. ³ Chíyeca, atše mora sëntseboše tsëngaftanga chašmotsetátšëmbo, ndocná ntsoobenana jayanana: “Jesús ndoñe chë Cristo quenátšmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsoobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

⁴ Espíritu jamana bënga ndoñe chamondëtsebo mnama cachca tsetana obenana tsabe soyënga jamama, pero lempe jobayana cach canÿe Espíritbeyeca. ⁵ Bënga, Bëngbe Bëtsá mondëserveda, nÿetsca soyënguiñe jtsetrabájayëse, pero cach Utabná nÿets chë trabajënga šojabanÿé. ⁶ Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebo mnama. ⁷ Bëngbe Bëtsá inétsama cada ošbuachiyá chaotsebo mnama canÿe tsetana obenana tsabe soyënga jamama, y chë soye jtsinÿanÿnayana Bëngbe Bëtsabe Espíritu chabe ainaniñe yomnana; y chë tsetana obenana jtsemnana nÿetscangbe tsabiama. ⁸ Bëngbe Bëtsá, Espíritbeyeca, canÿa obenana jatštayana puerte osertanánaca chaóyebuambama, y ínÿana obenana cach Espíritbeyeca ndayámnaca corente jtsetatšëmbëse chaóyebuambama; ⁹ ínÿana cach Espíritbeyeca, obenana Cristbeñe puerte chaotsošbuáchema, y ínÿabiamna, cach nÿe canÿe Espíritbeyeca, obenana jatštayana šoquënga jáshnama; ¹⁰ ínÿana, obenana tsabe soyënga Bëngbe Bëtsabe obenánaca jamama, y ínÿana, obenana Bëngbe Bëtsabe juabna jóyebuambayama. Inÿana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiritëngbeyeca tojtsemnana, y ínÿana, obenana chë tempo ndmabiyáñnaca chaóyebuambama, y ínÿana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y ínÿengna chama jábuayenama. ¹¹ Pero cach Espíritu, chë nÿe canÿe Espíritu lempe chca jamana, ntšamo tsábá bëtsemnana cha tojtsejuabnacá cada entsábioye jatštayëse.

Nÿetsca ošbuáchiyënga cánÿiñe, mo Cristbe cuerpcá jtsemnana

¹² Cuerpo nÿe canÿe soye endmëna y chë cuerpna ba soyënga jtsebo mnana; masque chë cuerpo ba soyënga jtsebo mnana, nÿe canÿe cuerpo jtsemnana. Bëngaftácnaca cachcá. Bënga banga mondëmna nÿetscanga Cristbeñe ošbuáchiyënga, pero Cristbeyeca, bënga cánÿiñe mo canÿacá jtsemnana. ¹³ Er bënga nÿetscanga, judiënga o ndoñe judiënga, nÿe ínÿabiamna nÿets tempo oservëngna o cachëngbiamna trabájayënga

šojanëbaye, Crísoftaca cánÿiñe mo canÿacá, jtsemnama mo chabe cuerpcá, y chca yomna cach Espíritbeyeca; y Bëngbe Bëtsá tojama cach Espiritu nÿetscangbe ainanoye cháuamashënguama, bënga jtsamëndayama.

¹⁴ Cachcá, canÿe cuerpo ndoñe nÿe canÿe soye ntsebmomnana, ndayá ba soyënga. ¹⁵ Nderado shecuatše tojajana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana. ¹⁶ Nderado matscuaše tojajana: “Bominÿe ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana. ¹⁷ Nÿets cuerpo bomiñe tojtsemnëse, bënga ndoñe muantsobena jouenama. Y nÿets cuerpo matscuaše tojtsemnëse, bënga ndoñe muanjobenaye jonguëtsetsiyana. ¹⁸ Pero ndegombre endmëna, Bëngbe Bëtsá nÿetsca soye cuerpentše tojancjá ndayentše cha tojánbošenentše. ¹⁹ Nÿetsca cuerpentša soyënga nÿe canÿe soye tojtsemnëse, ndoñe canÿe cuerpo nántsemna. ²⁰ Pero ndegombre endmëna, masque ba soyënga cuerpentše yomna, nÿe canÿe cuerpo jtsemnana.

²¹ Bomiñe quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jáuyanana: “Ndoñe quecátsiyta ca”. ²² Inÿetsá, chë cuerpentša soyënga, chë tojtsinÿana mo obenana ndbomna y nduámana soyëngcá, jtsemnana chë cuerpama más iyta soyënga. ²³ Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entšayaca jtichëtjëse. Y chë cuerpentša soyënga, ndayama bënga jtsëuatjana ínÿenga chamotsonÿama, bënga jamana ínÿenga ndoñe chamondëtsonÿama, chiñe entšayaca jtichëtjëse. ²⁴ Pero chë cuerpentša soyëngaca, chë nÿetscanga jtonÿayana y botamana jinÿama jtsemnana soyëngacna, ndoñe ntseytana chca játamana. Bëngbe Bëtsá cuerpo tojama, ntšamo bënga chamotsamama chentša más nduámana soyënga, más chaotsámanama, ntšamo chë soyënga bënga tmojtsinÿenama. ²⁵ Chca chca tojanma, cuerpentša nÿetsca soyënga chë cuerpama trabajo cánÿiñe chamotsamama, y chca, cada soye chaotsama trabajo chë cuerpentša nÿetsca soyëngbe tšabiamama. ²⁶ Nderado canÿe cuerpentša soyama bacna soye tojopasá, chora nÿetsca chë cuerpentša soyëngámnaca chca ndoñe tšabe soye jtsebínÿnana; pero canÿe cuerpentša soyama tcojama más uámana soye chaotsemnana o ndaye tšabe soye tojopasase, chora nÿetsca chë cuerpentša soyëngámnaca chca tšabe soye jtsebínÿnana.

²⁷ Cachcá, tšëngaftanga Crístbeñe ošbuáchiyënga, cháftaca cánÿiñe mo canÿacá jtsemnëse, mo chabe cuerpcá jtsemnana, y cada ona tšëngaftanguentsá mo chë cuerpentša soyëngcá, jtsemnana mo chabe cuerpentša soyëngcá. ²⁸ Ntšamo Bëngbe Bëtsá cuerpentše soyënga tojancjá ndayentše inabošcá, cachcá, ošbuachiyëngcá enefjuanëngbeñe Bëngbe Bëtsá tojubuáayana, natsana báseftanga mo Jesucristbe ichmonëngcá, chorna Bëngbe Bëtsabe juabna oyebuambnayënga, chorna Bëngbe Bëtsabiamama abuatambayënga, chorna chë bëts soyënga Bëngbe Bëtsabe obenánaca jamama obenana bomnënga, chë šoquënga jáshnama obenana bomnënga, chë ínÿengbiocyte ujabuáchanënga, chë ínÿe ošbuachiyëngbiocyte amëndayënga, y chë nÿetsca biyañe jtsóyebuambnayama obenana bomnënga, tempo ndmabiyañe.

29 Ndegombre, ošbuachiyëngcá enefjuanëngbeñe nyëtscanga ndoñe Jesucristbe ichmónënga ntsemnana, nyëtscanga ndoñe Bëngbe Bëtsabe juabna oyebuambnayënga, nyëtscanga ndoñe abuátambayënga, nyëtscanga ndoñe Bëngbe Bëtsabe obenana bomnënga, bëts soyënga jamama. 30 Nyëtscanga ndoñe šoquënga jáshnama obenana bomnënga; nyëtscanga ndoñe nyëtsca biyañe jtsóyebuambnayama obenana bomnënga, tempo ndmabiyañe; ni nyëtscanga ndoñe obenana bomnënga quemátsmëna, chë tempo ndmabiyañe nyëtsca biyañe jtsóyebuambnayama obenana bomnënga ntšamo tmojtsichamcá josértama y ínÿengbiöye chama jtsabuayinyayama. 31 Pero tšëngaftangna puerte šmochtseboše, lempe ntšamo chašmojobenacá šmochjama, chë Bëngbe Bëtsabe más uámana tšetana obenana jëftsashjáchama.

Bonshánana jtsebomnana

Y inÿe soye más, atše cbochanjínÿanÿiye ntšamo šmojt sobena cabá más tšabá jtsiyenana, Bëngbe Bëtsá jtseservënëse.

13

1 Nderado atše stjóyebuambaye entšangbe biyañe y angelëngbe biyañe, pero ínÿengbiöye ndoñe sentsababuánÿeshanëse, atše stsemna canÿa ton-dayama uamaná, mo nÿe canÿe metalëshe tojtsenanacá, o mo nÿe canÿe platillëshcá ndoñe tšabá tontsenanëshe. 2 Y atše obenana jtsebomna Bëngbe Bëtsabe juabna jóyebuambayama y nyëtsca soyëngama, y chë Bëngbe Bëtsá tempo entšanga ndoñe tonjaninÿanÿé soyënga šojtsësertana, y Bëngbe Bëtsabe nyëtsca soyëngama stsetátšëmbo, y Cristbeñe puerte stjesošbuáchiye, chca betsošbuáchema nÿa mo chë tjashënga chamobonjoma jamama, pero ínÿenga ndoñe sentsababuánÿeshanëсна, atše ton-daye sëntsemna. 3 Y atše lempe ntšamo stsebomncá ndbomnëjémënga stšëjátaye, y ínÿengbiöye stjenontréga atšbe cuerpo chamojuinÿema, pero ínÿengbiöye ndoñe sentsababuánÿeshanëse, atše ndocna uámana soye nt-jashjáchana.

4 Canÿe entšá ínÿenga ababuanÿeshaná, uantado jtsemnana masque padecena soyënguiñe tmojtsemna órnaca, y ínÿengaftaca tšabe ainánaca mando jtsebomnana. Inÿenga ababuanÿeshaná ndoñe ntsántšabošana ntšamo inÿa tojatsbomncá, ni ntsenábotaamnayana, ni cachá chë ínÿengbiana más uamaná ntjätenobiamnayana; 5 ndoñe bacá mandbomná ínÿengaftaca ntsemnana, ni nyëts tempo ntsebošana y lempe jtsamana nÿe chabiana tšabe soye jónÿenama; cha nÿe ndayámnaca ndoñe ntjetnana, ntšamo ínÿenga tmojaborlá ora jtsaperdónayana. 6 Inÿenga ababuanÿeshaná ndoñe ntjóyejuayana chë ndoñe tšabá yondmëna soyëngama; chë ndegombre yomna soyëngamna aiñe. 7 Inÿenga ababuanÿeshaná, ainaniñe añemo jtsebomnana nyëtsca padecena soyënguiñe, lempe ntšamo más tšabá yomna soyënguiñe jtsošbuáchiyana, nyëtsca más tšabá yomna soyëngama jtsobátmanana, y jtsóboyayana nyëtsca toto soyënga.

8 Bonshánana nyëtsca tescama jëftsemnana. Canÿe te echántsemna, chora chë Uámana Espíritu ndoñe más queochátama entšanga Bëngbe Bëtsabe juabna chamotsóyebuambnama, ni chë ndocna te ndmabiyañe chamotsóyebuambnama, ni chë puerte jtsetatšëmbëse jóyebuambayama obenama chamotsebomnana; 9 er ntšamo mora bënga imotatšëmbcá y Bëngbe Bëtsabe juábnaca jóyebuambayëse tmojayana soyënga, nÿe

batšatema bəngbioye jtsinʹanʹnayana Bəngbe Bətsabe soyəngama, ndoñe lempe; ¹⁰ pero Jesucristo chaojésabo ora, y chaojama bənga chamotsemna lempe ntšamo Bəngbe Bətsá bəngbiama yojanjuabnacá, quem soyənga, chə nʹe batšatema bəngbioye jtsinʹanʹnayana Bəngbe Bətsabe soyəngama, ya ndoñe más queochátsbinʹna.

¹¹ Atše básatema ora, sənjanoyebuambná, sənjanjuabná, y soyəngama tšabá jtsetatsəmbuamna sənjanjuabná mo canʹe basetemcá; pero bətsá sənjanóbema orna, səntsanajbaná lempe amana mo canʹe basetemcá. ¹² Cachcá, mora bənga quem luarentše nʹe batšatema Bəngbe Bətsabe soyəngama jtsetatsəmbuana, mo canʹe espejuinʹe tmojtsonʹacá, pero ndoñe nʹa corente tšabá. Pero canʹe te bənga mochántsetatsəmbo lempe nʹyetsca soyəngama, bənga Bəngbe Bətsabe delante chamojtsemna ora. Mora atše səntsetatsəmbo nʹe batšatema Bəngbe Bətsabe soyəngama, pero chora lempe chanjuábuatmana, ntšamo Bəngbe Bətsá corente suabuamcá.

¹³ Pero morna, Bəngbe Bətsábeñe jtsošbuáchiyana, chábeñe jtsobátmanana, y chábioye y ínʹyengbioye jtsababuánʹyeshanana, chə soyəngna nʹyetsca tescama jəftsemnana; pero chentšana chə más uámána soye endmėna ínʹyenga jtsababuánʹyeshanana.

14

Ndmabiyañe obenana Bəngbe Bətsabe tšetánana

¹ Bətsá šmochtsama nʹyetscanga jtsababuánʹyeshanəse chašmotsiyenama, y puerte šmochtseboše jtsebonnama chə Bəngbe Bətsabe tšetana obenana tšabe soyənga jamama; pero chentšana masna, chə Bəngbe Bətsabe juabna jóyebuambayama obenana. ² Er chə tempo ndmabiyañe mora jóyebuambayama obenana bomná, Bəngbe Bətsábioye jtsatsətsnayana y ndoñe entsángbioye, er ndegombre entsanguentše ntšamo cha tojtsoyebuambnacá ndocná ntjosértana; chana chabe espíritoftaca jtsóyebuambnayana y ndoñe nʹe chabe juábnaca, chə tempo Bəngbe Bətsá ndocna entsábioye tbonjaninʹinʹyé soyəngama. ³ Pero chə Bəngbe Bətsabe juabna oyebuambnayana entsanga jtsətsətsnayana, chənga más chamotsošbuáchema y ainaniñe añemo chamotsebonnama, Bəngbe Bətsabe soyəngama jábuayenama, y jamama padecena soyənguiniñe tmojtsemna órna añemo chamotsebonnama. ⁴ Chə tempo ndmabiyañe mora jóyebuambayama obenana bomná, jtsamana nʹe cha más jtsošbuáchiyama y ainaniñe añemo jtsebonnama; pero chə Bəngbe Bətsabe juabna oyebuambnayana jtsamana chə ošbuachiyəngcá enefjuanənga chca soyənga chamotsebonnama.

⁵ Atše səntseboše nʹyetsca tšəngaftanga chə tempo ndoñe šmonjanbiyañe mora jóyebuambayama obenana chašmotsebonnama, pero chama atše más səntseboše tšəngaftanga chə Bəngbe Bətsabe juábnaca soyənga chašmotsóyebuambnama. Chə Bəngbe Bətsabe juábnaca soyənga oyebuambnayá más uamaná jtsemnana chə inʹe biyañe oyebuambnayabiama; chca ndoñe nántsemna, ntšamo canʹe biyañe tojayancá chə biyañe oyebuambnayá tbojtsəsertánəse y chə ošbuachiyəngcá enefjuanənga tojábuayenase, y chca, chə soyənga tmojouenama, chənga chamotsobena más jtsošbuáchiyama y añemo jtsebonnama. ⁶ Y mora, Jesucristbeyeca atšbe catšátanga, atše nderado tcojábuahe y nʹe inʹe biyañe tcojáuayanəse, ¿chca ntšamo

cbatjúbabuache? Atše jtsobenana jujabuáchana, nýe ntšamo chë biyañe tijayancá átsnaca šojtsésertánese, y ndayá Bëngbe Bëtsá šojinýinýecá entsanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tsëngaftanga jabuátambama cha yoboše soye.

7 Entšanga monduamana ndayanaca juénanana, mo flautëfja o arpa, vida ndbomna soyënga; cada sóyeca inýetšá juénanama ndoñe tontsopodénese, ndocná nantsobena jtsetatšëmbuama ndayá canya chë soyëngaca yojtsénanama. 8 Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inýetšá, nýa chama ndoñe tonjuájatëtëse, ndocná buanjósërta y jempéliama ndoñe nanjoprónta. 9 Tsëngaftangafácnaca cachcá jtsopasánana. Inýenga paselo josértama jobenaycnana tsëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nýe cánýenga cuaftsoyebuambnacá. 10 Atše sëntsejuabná, ndegombre quem luarentše ba inýe biyañe entšanga innétsoyebuambnayana, y ndaye biyañnaca tmojoyebuambá ora, sempre jtsemnana inýenga ntšamo chënga tmojtsichamcá osertánënga. 11 Pero ntšamo inýa chabe biyañe šojayancá atše ndoñe šontsésertánese, atše stsemna canýe chabiama ndosertana biyañe oyebuambnayá, y chánaca cachcá atšbiana. 12 Chcasna, chë Uámana Espíritu šondinýanýná obenana jtsebomnama tsëngaftanga puerte šmobóseyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebomnama inétsama obenana.

13 Chíyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inýe biyañe tojayancá chabosertama y ošbuáchiyënga jábuayenama obenana chaotsebomnama. 14 Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambnayëse, atšbe espíritu cháftaca nantsóyebuambnaye, pero atšbe juabna ndoñe ntsetatšëmbuana ntšamo chë espíritu tojtsoyebuambnacá. 15 Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsichámuama jtsejuabnayësnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse. 16 Nderado aca Bëngbe Bëtsá cojtsatschuaná nýe espíritoca, y canýa quem Bëngbe Bëtsabe tšetana obenanama ndosertaná tcmojóyeunase, cha ndoñe ntsoobenana jayanana “chca chaotsemna ca”, cach aquécá cha yojtsejuabnama jinýinýiyama, er ntšamo cojtsichamcá cha ndoñe ntšesertánana. 17 Aca jtsobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inýa ndaye tšabe soye chaotsebomnama. 18 Atše, Bëngbe Bëtsá sëntsatschuaná inýe biyañe jóyebuambayama tsëngaftangbiana más tsobenama; 19 pero Crístbeñe ošbuachiyëngcá tmojénefjna ora, atše más sëndbëtseboše nýe mo shachna palabratëmnaca jóyebuambayana, chënga aínë catafjosertacá, chca, inýenga jabuátambama, y ndoñe bnétsana uaranga palabrënga jatóyebuambnayana inýe biyañe, chënga chaósertama ndoñe tontsopodénese.

20 Jesucrístbeyeca atšbe catšátanga, šmochtsajbaná basetemëngcá juabnayana. Mo šešonatëmëngcá šmochtsemna, bacna soyënga jamama

ntsetatšëmbcá; pero mo bëtsëtsangcá tšabá šmochtsejuabnaye. ²¹ Bëngbe Bëtsabe uabemana palabrénguiñe, Bëngbe Utabná mëntsá tojánayana:

Atše quem entšángbioye chanjáuyana,

ínýenga inýe luaréngocana ashjainéngaftaca, chëngbiana canýe ndosertana biyañe oyebuambnayënga;

y chanjáuyana ndayá chëngbe biyañe chamojtsichamo soyëngaca;

pero ni chca, chënga ndoñe quešmochatóyeunaye ca.

²² Chcasna, inýe biyañe jóyeuambayama obenana jtsebmomnana endmëna, Bëngbe Bëtsá ndayánaca chë chábeñe ndošbuachiyëngbioye jinýanýiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyeuambayama obenana jtsebmomnana endmëna, Bëngbe Bëtsá ndayánaca chábeñe ošbuachiyëngbioye jinýanýiyama, y chábeñe ndošbuachiyëngbioyna ndoñe. ²³ Er tšëngaftanga nýetscanga ošbuachiyëngcá šmojënefná ora, nýetscanga ba biyañe šmojtsoyeuambná, y choye tojámarshëngo canýa chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboye tšëngaftanga opënga šmojtsóbema ca. ²⁴ Pero nýetscanga tmojtsichamo, Bëngbe Bëtsabe juábnaca jtsóyeuambnayëse, y choye tojámarshëngo canýa Bëngbe Bëtsábeñe ndošbuachiyá o canýa chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayëñaná cha bacna soyënga tojamama, y ndayá cha tojamiñe corente echántsejuabnaye, ntšamo nýetscanga tmojtsichámuama. ²⁵ Y Bëngbe Bëtsá chábioye bochanjinýinýiye ntšamo cha ainaniñe tojajuabó y tojabošencá, ndayá ndocnábioye tbonjinýinýecá, y cha echanjoshëntsamentšiyë Bëngbe Bëtsá jadórana, y tšëngaftangbe delante echanjayana Bëngbe Bëtsá ndegombre tšëngaftangbeñe yojtsemna ca.

Ošbuachiyëngcá šmojënefná ora, ntšamo tšabá yomncá lempe šmochtsama

²⁶ Chcasna, Jesucristbeyeca atšbe catšátanga, šmojënefná ora, cada ona ndayánaca jtsebmomnana nýetscangbiana: ínýengna jtsobenana javérsiama, Bëngbe Bëtsá jëtschuayama, ínýengna jtsobenana jabuátambana o jábuayenama ndayá Bëngbe Bëtsá tojinýanýecá, o tempo ndmabiyañe chora jtsóyeuambnayana, o entsanga jábuayenana ntšamo inýa inýe biyañe tojayancá. Pero lempe šmochjama, ošbuáchiyënga más chamotsošbuáchemá y más añemo chamotsebmomnana Cristo jasérvia.

²⁷ Nderado inýe biyañe jóyeuambayama tojtsemnëse, útata o nýa mäsese únganga chca chamoyebuambá, y canýánýa; y jtseytana ndánaca ntšamo tmojtsichamcá chabosertá y nýetscanga chama chauabuayená.

²⁸ Y chca chabosertama y nýetscanga jábuayenama ošbuachiyëngbeñe ndocná tontsemnëse, as ošbuachiyëngcá chamojënefná ora chë chca oyeuambnayá bontsemna ndoñe chca biyañe ntsóyeuambnayana, sínó nýe canýa tojtsemna ora cha jtsobenana chca Bëngbe Bëtsáftaca jencuëntana. ²⁹ Utata o únganga entsamna jayanana soyënga, Bëngbe Bëtsabe juábnaca jtsóyeuambnayëse; y chë ínýenga jtsamnana botamana jajuaboyana y jayanana ntšamo chënga tmojayancá aiñe o ndoñe Bëngbe Bëtsábiocana tayojsóbocanama. ³⁰ Pero canýa Bëngbe Bëtsabe juabna tojtsóyeuambnantscuana, inýa chentše ouenana tbeamanábioye Bëngbe Bëtsá tbojinýinýé ndayánaca yojtsebmomna jayanama, as chë natsana oyeuambnayá iytëca chaóbema, y chabolesenciá chë

inŷa chaóyebuambama. ³¹ Chca, nŷetscanga, canŷánŷa jtsobenana jayanana soyènga, Bèngbe Bètsabe juábnaca jtsóyebuambnayèse, nŷetscanga chamuatsjínŷama y nŷetscanga añemo jatsatayama. ³² Chè Bèngbe Bètsabe juabna oyebuambnayá endobena jtsemándayana ntšamo tojtsichamcá, cha cachabe espíritoca tojtsoyebuambná ora; ³³ er Bèngbe Bètsá endmèna nda inétsama bènga natjèmbana chamotsiyenama, y ndoñe chè bènga nŷetscanga cachcá ndoñe chamondètsejuabnama, y nŷe ntšamo cada ona tojtsebošcá chaotsamama.

Ntšamo nŷets luarènguenache, chè ošbuáchiyènga, chè Bèngbe Bètsabe entšanga mondbénéfjna luarènguenache endbetsemncá, ³⁴ tšèngaftangbéntšnaca, shembásenga entsamna iytèca jobiamèngana, ošbuachiyèngcá šmojénefjna ora, er ndoñe quenátslesenciana chènga chora chamuátoyebuambnama, y aíñe chènga entsamna chèngbe boyanga jtsayaunanana, ntšamo Moisesbe leyiñe endayancá. ³⁵ Chènga ndayánaca jtsetatšèmbuama tmojtsebošèse, cachèngbe boyángbioye yebnoca chamotjanga; er ndoñe corente tšabá ntsemnana canŷe shembása jtsóyebuambnayana tšèngaftanga ošbuachiyèngcá šmojénefjna ora.

³⁶ ¿Tšèngaftanga šmojatsjuabná, Bèngbe Bètsabe tšabe noticiènga tšèngaftangbeñe tojanobojatšé ca, o nŷe tšèngaftanga chè soyènga šmojanóyèngacñe ca? Ndegombre ndoñe chca; chíyeca tšèngaftanga nŷe cánŷenga ndoñe ntsobenana jayanama ndayá jamama cmojtsamnama. ³⁷ Nda tojtsejuabná cha Bèngbe Bètsabe juabna oyebuambnayá yomna ca, o chabe ainaniñe chè Espíritu jtsemándayama yojtsebomna ca, cha bontsemna tšabá jtsetatšèmbuana, ntšamo Bèngbe Utabná šojamandacá atše stsabiamnama. ³⁸ Pero cha ndoñe chca tontsetátšèmba y chca ndoñe yondmèna ca tojayanèse, ndayá cha tojayanacá ndoñe šmatjóyèngacñe.

³⁹ Chcasna, Jesucrístbeyeca atšbe catšátanga, puerte šmochtseboše Bèngbe Bètsabe juábnaca soyènga jtsóyebuambnayama obenana jtsebomnama, y ndoñe šmattsama chè tempo ndmabiyañe ínŷenga ndoñe chamondètsóyebuambnama; ⁴⁰ pero lempe šmochjama ntšamo jamama yomncá, y ndoñe nŷe ntšamo cada ona tojatsjuabnacá.

15

Cristo tojtanayenama

¹ Morna, Jesucrístbeyeca atšbe catšátanga, atše sèntseboše tšèngaftanga chašmuatenójuaboma atše tcbonjanabuayená tšabe noticiènguiñe, ndayá tšèngaftanga šmonjanóyèngacñe, chè ndáyeca tšèngaftanga Jesucrístbeñe šmojtsošbuaché y cha jtseeservénèse šmojtsiyena. ² Chca šmobómnayeca, tšèngaftanga atsebácanènga šmojtsemna, pero tšèngaftanga sempre chiñe šmojtsošbuachese, ntšamo cbonjanabuayiynacá; chca ndóñesna, nŷe ndoñe corente tšabá ntjajuaboycá chè buayenana soyènguiñe šmojtsanošbuaché.

³ Er atše tšèngaftangbeñe sènjéftsanboshjona, Bèngbe Bètsábiocana atše tijanóyèngacñe más uámana buatèmbana soyènga. Atše tcbonjabuatambá: Cristo tojanóbana bènga bacna soyènga tmojamama, ntšamo Bèngbe Bètsabe uabemana palabrénguiñe chabe juabna oyebuambnayènga chama tmojanayancá; ⁴ chè Cristo tmojanatbontsá y unga tianoye cha cháuatayenama Bèngbe Bètsá tojanmama, ntšamo Bèngbe Bètsabe uabemana palabrénguiñe chabe juabna oyebuambnayènga chama tmojanayancá; ⁵ chè Pédrèbioye tbojánebèbocnama, y chentšana chè

bnětsana útata ca uabobáiněngbioynaca. ⁶ Chentšana mo shachna patsama más chábeñe ošbuáchiyěnga tojáneběbuacna, chěnga cányěntse imójsemna ora; chěnguentšana banga cabá vida imotsóbomñe, masque báseftanga ya tmojóbana. ⁷ Chentšana Santiágbioye tojáneběbocna, y chentšana nyetsca chabe ichmóněngbioye.

⁸ Y chentšana átšnaca šonjáněběbocna. Mo canye šešona cabá shbená tojonynacá, Cristo chabe ichmoná šonjábema, chě tempo chama jopróntama ntsebmncá, ndayěntscuana ín्यenga cha tojanabuatambá. ⁹ Er atše sěndměna chě más batsá uamaná Jesucristbe ichmóněngbeñe; y ni mercedo taitsatobuajoñe “chabe ichmoná ca” chašmotsábobuatmama, er atše tša sěnjánama Jesucristbeñe ošbuáchiyěnga chamotsesufrínama. ¹⁰ Pero Běngbe Bětsá atšbe tšabiamama yojanjuabná, y chiyeca atše mora tsměna ntšamo sěndměncá, y chabe tšabe juábna atšbiamama jtsamana, ndoñe n्यe bonamente quenátsměna. Er atše más sěnjatrabajá, chě in्यe Jesucristbe ichmóněngbiamama; pero ndegombre atše ndoñe n्यe canya chca chiyatsma, sinó masna Běngbe Bětsá chě trabajo tojama, tšabe juabna atšbiamama jtsebmñese. ¹¹ Ndayá más yojtsámama ndoñe quenátsměna, atše o chěnga, Jesucristbe soyěngama abuayiynayiñe más tojatrabajá, sinó ndayá chě soyěnga běngbe buayenana soye yojtsemna, y tšěngaftanga chiñe šmojtsošbuaché.

Chě obaněnga cachiñe vida mochtsatsbomnama

¹² Pero běngbe buayenana soye endměna, Běngbe Bětsá tojanma Cristo cháuatayenama; as ındáyeca básefta tšěngaftanga šmnětsichamo Běngbe Bětsá ndoñe yochanjama chě mora obaněnga chámuatayenama ca? ¹³ Pero chca tojtsemna, chě obaněnga ndoñe mochántayenasna, Cristo cach ndoñe tontanayena; ¹⁴ y Cristo ndoñe matenjésayenese, běnga n्यe bonamente chabiamama ftsabuayiyná, y tšěngaftanga n्यe bonamente chábeñe šmojtsošbuaché. ¹⁵ Y canye más běts soye: chca tojtsemněsna, běnga muanjábocna mo chě Běngbe Bětsabiamama soyěnga tmojin्यe ca ichaměngcá, pero ndoñe ndegombre chca tontsemna; er běnga fsěndbětsichamo, Cristo cháuatayenama Běngbe Bětsá tojanma ca. Pero chě obaněnga ndoñe mochántayenasna, Běngbe Bětsá ndoñe tonjanma Cristo cháuatayenama. ¹⁶ Pero chě obaněnga ndoñe mochántayenasna, Cristo cach ndoñe tontanayena. ¹⁷ Y Cristo cháuatayenama Běngbe Bětsá ndoñe matěnjanněse, tšěngaftanga n्यe tondayama chábeñe šmojtsošbuaché; tšěngaftanga chě bacna soyěngama cabá ndoñe perdonáněnga smontsemna. ¹⁸ Y chca, chě tmojanóbaněnga, Crístbeñe ošbuáchiyěnga, chěnga cach ndoñe chěngbe bacna soyěnguentšana atsebácaněnga quemochátsměna, sinó n्यetsca tescama castigáněnga. ¹⁹ Běnga tmojtsobátmana Cristo běngbiamama tšabe soyěnga chaotsamama, pero chca n्यe quem luarentse běnga vida tmojtsebmñěntscuana, as běnga n्यetscangbiamama más muantsomerecena, n्यetscanga běngbiamama chaotsangměnama.

²⁰ Pero chca ndoñe ndegombre quenátsměna, er ndegombre Běngbe Bětsá tojanma Cristo cháuatayenama. Mo chě uanatsena shajuancá, jtsin्यानayana más shajuaněnga chentšana yochjóbocnama, cachcá, Cristo tojtanayena ora, cha tojanin्यानě Běngbe Bětsá yochjanma ín्यenga chábeñe ošbuáchiyěnga chámuatayenama vida chamotsatsbomnama. ²¹ Chca, ndayá canye entšá, Adán, tojanmama, n्यetscanga jóbanama yojtsamna, cachcá, ntšamo in्यe entšá, Cristo,

tojanmama, Bëngbe Bëtsá yochjama entšanga chámuatayenama. ²² Er ntšamo, Adánbentsana entšanga bétsemnayeca jóbanama jtsamnana, cachcá, Crístbeñe ošbuáchiyënga bétsemnayeca, Bëngbe Bëtsá jamana chë nyetsca tescama yomna tšabe vida chënga chamotsebmomna. ²³ Pero Bëngbe Bëtsá jamana cada ona chámuatayenama nja chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nyetscanga chë Crístbe entšanga imomnënga. ²⁴ Y chentšana, Bëngbe Bëtsá chë Taitábioye, Cristo chabe amëndayana chabojantšabuaché ora, nyetsca mandadënga, mando y obenana bomnënga corente jtsayénjanayëse. ²⁵ Er Cristo bontsemna inyënga mo reycá jtsamëndayana, chabe uayayënga chabe cucuatšíñe chamoquedama Bëngbe Bëtsá tojamëntscuana. ²⁶ Canye uayayá inétsama entšanga jóbanama; pero Cristo último echanjama chabe obenana pronto chaotsopochocama. ²⁷ Er ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama Cristo nyetsca soyënguiñe chaotsemándama ca.” Pero “tojama Cristo nyetsca soyënguiñe chaotsemándama ca” tojayana ora, jtsopodëmana puerta tšabá jinýama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá nda tojanma Cristo nyetsca soyënguiñe chaotsemándama. ²⁸ Y Cristo nyetsca soyënguiñe chaojtsemándama ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguiñe chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínýniñe.

²⁹ Inyetsánaca, báseftanga cachiñe uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnana cuafjamcá. Chë obanënga chámuatayenama ndoñe tontsemnëse, ¿ndáyeca entšanga chëngbe cuenta muantenábaye? ³⁰ Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuiñe jtsajnama, Crístbiana oservenca causa? ³¹ Atšbiana cada te resjo endmëna jóbanama. Jesucristbeyeca atšbe catšátanga, atše séntsi chamo, chca ndegombre yómnyeca, atše oyejuayá stsemna ca, mo Cristo Jesús Bëngbe Utabnabe canye oservenacá, tšëngaftanga chábeñe šmojtsošbuáchema. ³² Mo canya tšátjaye bayëngaca tojtsentsjaná orcá, atšbiana puerta resjo enjamna jóbanama, Efeso puebloca; pero nye chë entšanga mondbétsejuabnaye jéftsashjáchama soyënga jtsebošëse chca matsjamnëse, ¿ndaye tšabe soye maténjanóbocna, chca atšbiana resjo jóbanama enjamna ora? Obanënga ndoñe mochántayenësna, mochtsama ntšamo entšanga jayanana monduamancá: “¡Mochjase y mochjofšiyë, nderado yëfse muatjóbana ca!”

³³ Ndoñe matenoíngñana. Ntšamo canya tojanayancá: “Nderado nda bacna amiguëngaftaca tojtsenutaná, cha jtsajbanana chë tšabe soyënga, ntšamo jtsamëse yojoyena.” ³⁴ Tšabá šmochtenójuaboje, y juabna nd-bomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tšëngaftanguentše Bëngbe Bëtsabe soyënga ndoñe quešmatábuatma. Atše chca séntsi chamo tšëngaftanga chašmotsëuatjama.

Ntšamo chë obanënga mochtayena

³⁵ Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebmna ca?” ³⁶ ¡Juabna ndbomna entšá! Ndayá tcojajé orna, jtseytana chë jénaye chaóbanama, chë matatema vida chaotsebmnama. ³⁷ Ndayá tcojajecá ndoñe ntsemnana chë juábocnama matatema, ndayá nýe chë meshe, trigo meshe o ndaye mata méshnaca jtsemnana. ³⁸ Pero Bëngbe Bëtsá jamana chë jénayentsana mata chauábocnama, ntšamo jamama cha tojajuabocá; y cha jamana cada jénayentsana canýe mata chauábocnama, ntšamo chë jénayentsana chauábocnama tojtsemncá. ³⁹ Nýetsca cuerpënga ndoñe cachcá ntsemnana. Entšanga canýe cuerpo mondbomna, bayënga inýe cuerpo, shloftšënga inýe cuerpo, y beongna inýe cuerpo. ⁴⁰ Chë celoca vida bomnënga inýetsá jtsinýnana, y chë quem luarentse vida bomnëngna inýetsá. Pero chë buashinýinýanana y botamanana ntšamo celoca vida bomnënga jtsinýnancá, ndoñe cachcá ntsemnana chë quem luarentse vida bomnëngbe botamanancá. ⁴¹ Cachcá, shinýe ndoñe quenátsbmna cachca buashinýinýana juashconcá, ni estrellëngcá; y estrellënguentse cach ndoñe cachcá ntsebuashinýinýana.

⁴² Cachcá, chë obanënga chámuatayenama Bëngbe Bëtsá chaojama ora chamojtsebmna cuerpo, ndoñe queochátsmëna cachcá ntšamo quem luarentse imojaniyena ora imojéftsebmna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentse bënga mondbomna cuerpo jóbanana, ínýenga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántsatsbmna y ndocna te queochatopochóca. ⁴³ Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinýinýana y echantsámana. Bënga quem luarentse imoyenëntscauna imobomna cuerpo, nýe batsá obenana jtsebmnama; pero chë Bëngbe Bëtsá šochjatšataye tsëm cuerpo, puerte obenana bomna cuerpo echántsemna. ⁴⁴ Quem luarentse imobomna cuerpo endmëna cam luarentse vida chaotsebmnama; pero bënga chámuatayenama chaojama ora, chë bënga mochtsebmna tsëm cuerpo, puerte chë Espíritbeyeca echántsemandana. Canýe cuerpo quem luarentse vida chaotsebmnama yómnyayeca, canýe cuerpënaca, jtsemnana celoca vida chaotsebmnama.

⁴⁵ Chca Bëngbe Bëtsabe uabemana palabrenguiñe endayana: “Bëngbe Bëtsá, chë natsana entšá tbojanma chaotsainama ca.” Adánbentsana nýetsca entšanga jabocanana, pero Crístbeyeca, Bëngbe Bëtsá tojama banga mo tsmëma entšangcá chamotsebmnama; chca, Cristo jtsemnana mo chë ústonoye Adancá; pero Cristna canýe espíritu endmëna, y chë espíritu jamana entšanga chë nýetsca tescama yomna tšabe vida chamotsebmnama. ⁴⁶ Pero chë celoca nýetsca tescama vida jtsebmnama cuerpna ndoñe natsana ntjóbcnana, ndayá chë quem luarentse vida jtsebmnama cuerpo; chentšana chë celoca vida jtsebmnama cuerpo. ⁴⁷ Bëngbe Bëtsá, chë natsana entšá tbojanma fshántseca, y chca, cha fshantsentšana tojánbcna; Cristna, mo entšángbentšana chë natsaná tsmacá bemanacá, celocana tojánbcna. ⁴⁸ Adánbentšana, chë natsana entšá, chë fshántseca tmojanmábentšana tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamëngna, Cristcá jtsemnana; Cristo nda celocana tojánabo.

49 Ntšamo bēnga jtsinŷnana chē Bēngbe Bētsá fshántseca tbojánbema entšacá, cachcá bēngnaca mochtsinŷna ntšamo chē celocá yomnacá.

50 Jesucristbeyeca atšbe catšátanga, atšbe cbochjáuyana, nŷe quem luarentše vida jtsebomnama cuerpēngaca, bēnga ndoñe ytsjopochóca soye, ntsobenana ndayá ndoñe yochanjopochóca soye jtsebomnana. 51 Smochjouena, atšbe canŷe soye cbochanjáuyana, y chē soye Bēngbe Bētsá entšanga tempo ndoñe tonjaninŷanyē: Bēnga ošbuáchiyēnga nŷetscanga ndoñe quemochatóbana, pero Bēngbe Bētsá šochanjátrocaye mo tsmēmangcá. 52 Nŷe betseco, mo tcojofshetá y cachora tcojtafšnacá, quem luare ya jopochócama ora, canŷe ángel trompetēfjua chaojuájetēta ora, er chora trompetēfjua echanjuénana, Bēngbe Bētsá echanjama obanēnga chámuatayenama, nŷetsca tescama vida jtsebomnama; y bēnga, chē ainēnga mochtsemnēngna, cha šochanjátrocaye mo tsmēmangcá jtsebnama; 53 er jtseytana Bēngbe Bētsá chaotrocá chē bēngbeñe jopochócama yomna soye, ndocna te yochanjopochóca soyiñe; y ndayá bēngbeñe yochjóbana soye, ndocna te yochanjóbana soyiñe. 54 Bēngbe Bētsá chca bēngaftaca chaojama ora, chē cha jatrócana ndayá bēngbeñe yochjopochocacá, ndocna te yochanjopochóca soyiñe, y ndayá bēngbeñe yochjobancá, ndocna te yochanjóbana soyiñe, chora echanjochnēngo ntšamo Bēngbe Bētsabe uabemana palabrenguiñe chama endayancá: Bēngbe Bētsá tojayēnjaná chē entšanga chamóbanama endbētsama obenana;

entšanga ndoñe más quemochatóbana ca.

55 ¡Mora entšanga chamuatóbanama chaotsama obenana ya ndoñe quenátsmēna;

Bēngbe Bētsá chē obenana nŷetsca tescama tojayēnjaná ca!

56 Entšanga bacna soyēnga tmojama causa, obenana endmēna entšanga jóbanama chaotsamnana. Ndayá leyiñe iuayanama, entšá jtsetatšēmbuana ndayá yomna bacna soyēnga jamana, y chca tátšēmba causa, chca bacna soyēnga jamama juabnēngaca mandaná jtsebnana, y cabana, jóbanama jtsebnana. 57 ¡Pero Bēngbe Bētsá mochtsatschuanaye, bēnga mo ayēnjanayēngcá cha šojábiamama, er ya ndoñe šontsamna chca jtsebnama, chē Bēngbe Utabná Jesucristo bēngbiamma tojanma sóyeca!

58 Chíyeca, Jesucristbeyeca atšbe catšátanga, atšbe bonshánēnga, Jesucristbeñe sempre puerte šmochtsošbuáchiye y ndocna te šmatjaleséncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bētscá jtsamana Bēngbe Utabnabiama trabájayiñe, er tšēngaftanga šmondētātšēmba, Bēngbe Utabnabiama trabájayiñe ndayá šmojamcá, ndocna te nŷe bonamente ntsebnana.

16

Jerusalenoca ošbuáchiyēngbiamma crocenánama

1 Mora chanjóyebuambaye chē Jerusalenoca Bēngbe Bētsabe entšanga ndbomnējémēngbiamma tšēngaftanga šmochjuíchmua crocenánama. Atšbe sēntseboše tšēngaftanga chca chašmoma ntšamo chē Galacia luaroca ošbuachiyēngcá enefjuanenache chama atšbe sēnjanabuayenacá. 2 Cada tmengo, cmontsamna batšá crocénana jaluárana ntšamo chē semaniñe šmojonŷencá, y šmochtsejuabaye; chca atšbe choye chaijá ora, ndoñe

chacmondétsamna quem uajabótama chora crocénana játatbanayana. ³ Y atše choye chajjashjango ora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyëngbiyoye tšëngaftangbe crocénana chámuaýentšbuachema, y tšbuanachangá chanjúyentšbuachiye ndayá imojtsamama chënga jábuayenama. ⁴ Y nderado, átsnaca chëngaftaca jama tšabá tojtsemnëse, chënga átsëftaca chamua.

Ntšamo Pablo yojanjuabná chë luarëngoye jama

⁵ Atše sëntsejuabná tšëngaftangbiyoye jama jautsëtsayama, Macedonia luarëjana chajjachnëngüentšana, chentša ošbuáchiyënga jaftsanyëse, er atše sëntsejuabná natsana Macedonia luaroye jëftsana. ⁶ Nderado basef-tayté tšëngaftangbeñe chašuétsjetana, o nderádose nyets uaftena tempo; as tšëngaftanga inye luaroye játama chašmuájabuachama, ndëmoye jama chašojtsemnoye. ⁷ Atše ndoñe quetsátsboše nye betsko tšëngaftanga jáftsanyana, er atše sëntsobátmana más bayté tšëngaftangbeñe jaftsemnana, Bëngbe Utabná chca šojalesenciase. ⁸ Pero Efesoca šochanjajétana Pentecostés fiesta chaojobuáchëntscuana. ⁹ Er Bëngbe Bëtsá tojama atše jobenayama muentše chë tšabe noticiëngama banga jábuayenama, y chiyecca banga Crístbeñe montsošbuaché; pero bángnaca atšbe contra montsemna.

¹⁰ Timoteo tšëngaftangbiyoye chaojase, yejuana šmochtsantješna cha tondayama chaondétsauatjama, tšëngaftangbeñe tojtsemnëntscuana, er cha Bëngbe Utabnabíama endëtrabája, ntšamo atše sëndamcá. ¹¹ Chcasna, ndocná chábíoye chabondétsáboyënja. Bëtscá šmochjama cha natjëmbana átsbiyoye chauatábama, er atše cha sëntsobátmana, chë inyënga muentše Crístbeñe ošbuáchiyëngaftaca.

¹² Y Jesucrístbeyeca bëngbe catsáta Apólosna, atše bëtscá cha sënjaímpadá, chë Jesucrístbeyeca catsátanga tšëngaftanga jányama mochjángaftaca chaot-sama, pero cha ndoñe chenátsbošena choye mora jama. Cha choye caochjá, chaojobená ora ca.

Pablo chënga jtadiósoftanama

¹³ Sempre šmochtsenocuedana chë Bëngbe Utabná ndoñe chašmondétseservenama tojtsama soyëngama. Nyets tempo, Crístbeñe y chabe soyënguífñnaca šmochtsošbuáchiye. Ainaniñe puerte añemo šmochtsebonna, y bëtscá šmochtsama Bëngbe Bëtsabe obenánaca. ¹⁴ Y nyetsca soyënga ntšamo chašmojtsamcá, bonshanánaca šmochtsama.

¹⁵ Jesucrístbeyeca atšbe catsátanga, tšëngaftanga šmondétatšëmbo, Estéfnas y chabe pamíllanga chë natsanënga monjamnama Jesucrístbeñe jtsošbuáchiyama, Acaya luaroca, y bëtscá imojtsentšena Bëngbe Utabnabíama jtsetrabájayana, chabe entsanga jtsëjabuáchanëse. ¹⁶ Atše cbaimpadá, tšëngaftanga lempe šmochtsama ntšamo cmojtsamëndacá, chca entsanga mo tšëngaftangbe uanatsanëngcá, y ntšamo nyetsca chë inyënga mo bëngcá quemuiñe uajabuáchanëse trabájayënga cmojtsamëndacá.

¹⁷ Atše tša oyejuayá sëntsemna tšëngaftangbe pueblentšana Estéfnas, Fortunato y Acaico moye tmojáshjajnama, er atše sëntsobena oyejuayá chëngaftaca jtsemnana, tšëngaftangaftaca choca jtsemnana cabá ndoñe sëntsobenëntscuana. ¹⁸ Er chënga átsbiyoye tmonjabo y tšëngaftangbíama šmonjauyana, y chca chënga tmonjama, atše y tšëngaftanga natjëmbana

ainánaca chamotsomñama. Chénga šmochtsétabna mo puerte uámana entšangcá.

¹⁹ Asia luaroca ošbuachiyéngcá enefjuanénga cmontsacheuaná. Aquila y Prisca y chatbe yebnentše mondbétsenefjuana ošbuáchiyénga cmontsacheuaná, Běngbe Utabnábeñe ošbuachiyéngcá, tšéngaftangcá bétsemnayeca. ²⁰ Muentša ošbuáchiyénga nyetscanga cmontsacheuaná. Nyetscanga šmochjenchuaye mo Jesucristbeyeca catšatangcá, jtenámochése, ntšamo cach tšéngaftangbe pamíllanga puerte bonshanánaca šmondbetsacheuanaycá.

²¹ Quem palabrénga tšéngaftanga jacheuayama cach atšbe cucuátšeca sěntsabiamná.

²² Nderado nda Běngbe Utabnábioye ndoñe tbontsebobonshana, Běngbe Bětsá nyetsca tescama chabocastigá. ¡Běngbe Utabná cachiñe cochjésabo!

²³ Atše, Běngbe Bětsá sěntseimpadana, Běngbe Utabná Jesús chaoma tšéngaftangbeñe tšabe bendicionénga chaotsemnama. ²⁴ Atše, nyetsca tšéngaftanga cbondábabuanjeshana, canya mo tšéngaftangcá, Cristo Jesuseftaca cányiñe mo canyácá jtsemñese.

2 Corintios

Jacheuayama

¹ Atše Pablo, Jesucristbe canye ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catšata Timotéoftaca quem tsbuanácha sentsabiamná, Corinto pueblaca Bëngbe Bëtsábeñe ošbuachiyëngcá enefjuanëngbiana, y nÿets Acaya luarentše Bëngbe Bëtsabe nÿetsca entsangbiámnaca. ² Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama y ainaniñe tsabe ebionana chašmotsebonnama.

Ntšamo Pablo tojansufrí

³ Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiana lastemado yomná, y ndaye padecena soyënguiñe tmojtsemna ora, bënga šondbetsañemuayá. ⁴ Cha bënga jtsañëmuayana padecena soyënguiñe tmojtsemna ora, chca, bënga chamotsobenama chë tmojtsesufrinënga jañëmuayama, ntšamo Bëngbe Bëtsá šojubabuachcá chënga jubabuáchëse. ⁵ Er ntšamo Cristo tojansufricá, bënga tša fsëndësufrina chabiana oservëniñe; cachcá, Cristbeyécnaca Bëngbe Bëtsá jamana bënga puerte añemo ainaniñe fchaitsebonnama. ⁶ Er bënga tmojtsesufrinëse, jtsemnana bënga jobenayama tsëngaftanga jañëmuayama chë šmojtsesufrina ora, y atsebácanënga chašmotsebonnama, Bëngbe Bëtsabe soyëngama jounëse. Chë padecena soyënguiñe tmojtsemna ora Bëngbe Bëtsá šojañëmose, jtsemnana bënga fchayobenama tsëngaftanga jañëmuayama, padecena soyënguiñe šmojtsemna ora. Chca, bënga jobenayana tsëngaftanga jubabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufricá šmojtsesufrina ora. ⁷ Bënga sempre fsëndobátmana y tsábá fsëndëtatsëmbo chë padecena soyënguentšana tsábá šmochjábocanama, er bënga fsëndëtatsëmbo, chë ntšamo bënga fsënjasufricá tsëngaftanga šmojasufrima; y cachcá, Bëngbe Bëtsá yochjama tsëngaftanga ainaniñe puerte añemo chašmotsebonnama, ntšamo bënga fchaitsebonnama cha tojamcá.

⁸ Jesucristbeyeca atšbe catšátanga, bënga fsëntseboše tsëngaftanga chašmotsetatsëmbo ntšamo bënga Asia luaroca tša fsënjasufrinama. Bënga puerte padecena soyënguiñe fsënjanियena, nÿa ndoñe más jauantacá, chentsana vídaca jabocanama ntjatobatmancá. ⁹ Bënga šontsanëñana mo jóbanama cuaftsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana. ¹⁰ Cha šojatsebacá bënga jóbanama puerte resjo enjamnentšana, y cachcá sochjátsebacaye bëngbiana cachiñe cachcá tša resjuinë chamojtsemna ora. Bënga puerte chábeñe fsëndobátmana, puerte padecena soyënguiñe bënga chamojtsemna ora, cha cachiñe sochjátsebacama. ¹¹ Tsëngaftángnaca cmontsamna bënga jubabuáchana, bëngbiana Bëngbe Bëtsá jaimpádase; chca, ba entsanga Bëngbe Bëtsá mochanjëtschuaye, er cha tojama bënga

chábentsana tsabe bendicionënga fchayóyëngacñama, cha jamëse ntšamo chënga bëngbiana tmojanimpadacá.

Ndayeca Pablo Corinto puebloye ndoñe tonjána

¹² Canye soye endmëna ndayá oyejuayënga sojtsabiamná: bënga bëngbe ainanentsa juabnëngaca jtsetatšëmbuana puerte tsabá jtsamëse fstsiyena ca, ntšamo chë Bëngbe Bëtsabe entšanga endbetsamncá, nyetsca quem luarentša entšangbeñe, y más tsëngaftangbeñe, y bënga jtsetatšëmbuana ntšamo tsabá tifjamcá nyets ainánaca tifjamama. Bënga tondaye chibiatma quem luarentša entšangbe osertanánaca, ndayá Bëngbe Bëtsá tša tsabia bëngaftaca bëtsemnayeca, šojújabuache chca chamotsiyenama. ¹³ Er ntšamo fsëntsabiamnamna ndoñe queftsátsboše, ntšamo tsëngaftanga šmojtsalía y cmojtsësertánentsana inyetsá játayanana, y sentsobátmana puerte tsabá lempe chacmósertama. ¹⁴ Mora ndayá atše stsamama ndoñe lempe quecmátësertana. Pero atše sëntseboše tsëngaftanga chama corente chacmósertama; chca, Bëngbe Utabná quem luaroye chaojésabo ora, tsëngaftanga bëngbiana oyejuayënga chašmotsemnama, ntšamo bëngnaca tsëngaftangbiana oyejuayënga fchantsemncá.

¹⁵ Chca ndegombre yomnama atše sëndëtatšëmboyecá, atše sënjanjuabná tsëngaftangbiocyte jshëtsana jányama, y chca, chë tsabe soye tsëngaftangbiana uta soye jamana, tsëngaftangbiocyte uta soye jányëse. ¹⁶ Atše sënjanjuabná tsëngaftanga jshaftsanyána, Macedoniocyte ayiñe chëjana matijánachnëngo ora; y chentsana, ya camoye ataboye ora, tsëngaftanga cachiñe jáftsanyána. Chca, tsëngaftanga mašmëñjanobená atše juajabuáchana Judea luaroye játama. ¹⁷ Atše chca jamama tsjanjuabná ora, ¿chca tijanma ndoñe corente tsabá ntjenajuaboycá? ¿Tsëngaftanga šmatjajuaboce, ntšamo nye quem luarama enójuabnaye entšanga monduamancá, cachora canye soyama “áiñe” y “ndoñe ca” jayanëse, atše ndayánaca jamama snëtsejuabnaye ca?

¹⁸ Canye soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentsana atšbe juabna jatstrócama, mo canya cachora canye soyama “áiñe” y “ndoñe ca” cuafjatichamcá. ¹⁹ Er Cristo Jesús, Bëngbe Bëtsabe Uaquiñá, ndabiana Silvano, Timoteo y atše tsëngaftangbeñe fsënjanabuayiyiná, ndoñe ntsejuabnayana canye soye jamama y chentsana jatsjuabnayana inyetsá jatsmama, mo canye entsá cachora canye soyama “áiñe” y “ndoñe ca” cuafjatichamcá, ndayá chana nyets tempo ntšamo tojtsejuabnacá jayanana y jamana ntšamo ndegombre yomncá, chentsana ntjatsrocaycá. ²⁰ Er ndayá cha tojamiñe, lempe ntšamo Bëngbe Bëtsá tojašebuachenacá jocúmpliana, mo chë lempe ntšamo Bëngbe Bëtsá tojašebuachenama cha “áiñe ca” cuafstichamcá. Chiyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. ²¹ Pero Bëngbe Bëtsá endmëna nda inétsama bënga y tsëngaftanga puerte Crístbeñe chamotsošbuáchema, cháftaca cányiñe mo canyacá jtsemnëse; y Bëngbe Bëtsánaca endmëna nda bënga šojabacacá chabe entšanga chamotsemnama. ²² Cha tojama chë Uámana Espíritu bëngbe ainaniñe cháumashënguama jtsemándayama, y chë soye jtsinýanýanayana bënga Bëngbe Bëtsabe entšanga imomnama. Y bëngbe ainaniñe chë Espíritu imobómnyeca, bënga corente jtsetatšëmbuana

bënga mochjýöngacñama lempe ntšamo Bëngbe Bëtsá bënga jatšatayama sojašebuachenacá.

²³ Bëngbe Bëtsá entsonyá atše ndegombre stsichámuama. Atše Corinto puebloye cabá ndoñe chiyjá, er atše ndoñe quetsátsboše tšëngaftanga jašëchnana, chë bacna soyënga šmojamama, tcbojaucácanëse. ²⁴ Bënga ndoñe queftsátsboše tšëngaftanga jamëndana ndayiñe cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Cristbeñe jtsošbuáchiyana. Bëngbe fsëntseboše ndayá tšëngaftanga jujabuáchana, corente oyejuayënga chašmotsemnana.

2

¹ Chíyeca atše ndoñe chiyjá jautsëtsayama, er atše sënjanjuabó y sënjanéniyana choye ndoñe jama ca, bacna soyënga šmojtsanmama jábuayenama, y chca, ngménënga játabiamana, ntšamo chanýe sënjamcá. ² Tšëngaftanga ngménaca chašmotsemnana atše stjamëse, ¿nda yochjama atše oyejuayá chaitsemnana, sinó nýe tšëngaftanga, chë atše ngménënga tijábiamënga? ³ Chíyeca tcbonjanëbuábiamama chë ntšamo šmojualiácá, chca, atše choye stjáshjango ora, tšëngaftanga átsbioye ndoñe ngmená chašmondëbemama. Chca játamamna, tšëngaftangbiamama más tšabá endmëna oyejuayá atše chašmobema. Atše tšabá sënjántatsëmbo ndayá átsbioye oyejuayá sojabemcá, tšëngaftángnaca chca mašmënjánbošena y oyejuayënga chë soye matcmënjánabiamama. Chíyeca atše ndoñe chiyataná, nýetscanga oyejuayënga jtsemnana ndoñe quenjatopodena ora. ⁴ Pero chë tsbuanácha tcbonjanëbuábiamama ora, atše corente šonjanongmé y ainana šonjántsetšena chca jabuache soyënga tšëngaftanga jubuábiamama, y chca jamama shëchbuíynaca sënjanoperdé. Pero atše ndoñe checbátanëbuabiamama atše jatsmama tšëngaftanga puerte ngménaca chašmotsemnana, ndayá chašmotsetatšëmbuama atše tša cbababuánýeshanama.

Perdón chë bacna soye amabiamama

⁵ Y mora, chë tšëngaftangbeñe puerte ngménana chaotsemnana tojama boyabásabiamna, cha átsbioye ndoñe ngmená chešnátsbema, ntsachetšá tšëngaftanga tcmojabiamcá, ínýengbioye ínýengbiamama más. Chca séntsichamo, er atše ndoñe quetsátsboše jayanama ntsachetšá tojamama cha más bacna soye tojama ca. ⁶ Banga tšëngaftanguentšënga ntšamo šmojamcá, chë entšabiamama ya bëts castigo entsemna. Nýe nýetsá ponto. ⁷ Chamna, ndayá mora cmojtsamna jamamna entsemna, cha jtseperdónana y jañémuana, chca, ndocna tšabe soye jamama ndobená ndoñe chaondëtsemnana, chë castiguama puerte ngménaca bëtsemna causa. ⁸ Chíyeca, tšëngaftanga cbaimpadá cachiñe tšabá chašminýinýé chábioye corente šmobobonshánama. ⁹ Tempo ya chama tcbonjanëbuábiamama, atše jinýama tšëngaftanga aíñe o ndoñe šmontsanprontánama, lempe ntšamo tcbonjanamëndacá jamama. ¹⁰ Chcasna, ndánaca ndayánaca tšëngaftanga chašmojaperdoná ora, átsnaca cha chantseperdóna. Y atše cha chantseperdóna, ndayá japerdónama ndegombre tojtsemnëse. Y chca chanjama tšëngaftangbe tšabiamama y Cristbe delante. ¹¹ Atše tšëngaftangcá, quem entšábioye šcoperdoná chë bëngbiamama tojama bacna soye; chca, Satanás ndoñe chaondobenama bënga jáingñama, er bënga mondëtatšëmbo cha inétsboše ndaye bacna soye entšá chaotsamama.

Ndáyeca Pablo ndoñe natjẽmbana Troas puebloca tontsanoquedañe

¹² Atše Troas puebloca sãnjanashjango ora, Cristbe tšabe noticiẽnga jábuayenama, atše sãnjaninỹe Bẽngbe Utabná tojanma chentše banga chẽ buayenana soye chamouenama y chẽngbe ainaniñe chana chamóyẽngacñama. ¹³ Masque chca enjamna, atše ndoñe quetstétsobena natjẽmbana ainana jtsebomnana, er atše sãnjanjuabná Jesucristbeyeca bẽngbe catšata Tito chentše jinỹenana, pero ndoñe chca. Chíyeca, Troas pueblentša entsanga sãntanadiošoftaná, y Macedonia luaroye sãnjanya.

Crístoftaca cánỹiñe mo canỹacá jtsemnẽse, bẽnga mo ayẽnjanayẽngcá jtsemnana

¹⁴ Atše Bẽngbe Bẽtsábioye sãndbẽtsatschuanaye, bẽnga bacna soyẽnga jamama juabnẽnga cha tojanẽyẽnjanama, tempo šojanamẽnda juabnẽnga; y chẽ mora bẽnga Crístoftaca cánỹiñe mo canỹacá jtsemnẽse, nỹets tempo cha šnetsãnachayama, mo canỹe ayẽnjanayacá, y chẽ nỹets luarenache entsanga Crístbiamama soyẽnga chamotsábuatmama bẽngaftaca cha yojtšamama, mo nda canỹe botamana uangüetše soye nỹets luarẽnguenache chauáshanama cuaftsamcá. ¹⁵ Er chẽ incienso tojtsejuínỹyana ora, entsábioye tšabá juanguẽtsenana; cachcá Cristbe tšabe noticiẽnga fstsabuayiná ora, Bẽngbe Bẽtsabiamama bẽnga jtsemnana chẽ ndẽmuanỹyẽnga tmojtšama cha oyejuayá chaotsemnana. Incienso tcojtsejuinỹná ora, nỹetscãngbioye juanguẽtsenana. Cachcá, Bẽngbe Bẽtsabe palabra fstsoyebuambná ora nỹetscanga jouenana, Cristo yojtšatsebacanga y chẽ pochocánẽnga jtsemnana imojtšajnẽngnaca. ¹⁶ Chẽ pochocánẽnga jtsemnana imojtšajnẽngna, pochocánẽnga mochanjábocana, er ntšamo bẽnga fsẽndabuayinacá y tmojouencá chẽnga tmojtšaboté; y chca, chẽngbiamama chẽ tšabe noticiẽnga jtsemnana mo canỹe obanabe uangüetšancá. Pero chẽ Cristo yochjãtsebacangna, tšabe noticiẽnga tmojóyẽngacñeyeca, mochanjobenaye tšabe vida nỹets tempo jtsebomnana; y chca, chẽngbiamama chẽ tšabe noticiẽnga jtsemnana mo canỹe puerte botamana uangüetšancá. Y asna, ¿nda obenana yojtsebomna chẽ tšabe noticiẽnga jábuayenama trabajo jtsamama? ¹⁷ Bẽnga chẽ tšabe noticiẽnga ndoñe queftsatabuayinã, ntšamo ba entsanga imojtšamcá, mo nỹe batšá uámana soyẽnga cuaftsemncá, y ndayánaca juácanama, mo nda ndaye nduámana soyẽnga cuaftsemncá. Banga chca mondama; bẽnga ndoñe. Bẽnga, Crístoftaca cánỹiñe mo canỹacá jtsemnẽse, fsẽndabuayinã mo Bẽngbe Bẽtsabe delante cuaftsemnẽngcá, ndegombre nỹe ntšamo tšabá yomncá nỹets ainánaca jtsebošẽse, y mo Bẽngbe Bẽtsabe ichmonẽngcá.

3

Chẽ Bẽngbe Bẽtsabe tsẽm tratama buayenana soye

¹ Chca bẽngbiamama fstsjayana ora, tšẽngaftanga cmojtsinỹana ¿bẽnga cachiñe tiftẽtontsé cabẽnga bẽtsẽtsanga enobiamnayana? ¿O bẽnga šojtsamna, mo inỹengcá, tšẽngaftanga juyentšbuáchiyana o juátjañana tsbuanachangá, bẽnga tšabá fstsamama chẽchangaca jinỹanỹiyama? ² Bẽnga bẽngbe ainaniñe puerte tšabá fsẽndetãtšẽmbo, nỹetsca entsanga, ntšamo tšẽngaftanga jtsamẽse šmoyencá tmojinỹe ora, tšẽngaftanga jtsinỹanỹayana bẽnga ndegombre ntšamo tšabá yomncá fstsamama. Chca, tšẽngaftanga jtsemnana mo canỹe tsbuanachacá, nỹetscanga jtsabuatmana y jtsobenana juáliana, bẽnga tšabá fstsamama.

³ Njyetscanga tsábá mondétatsëmbo Cristo tojanma tsëngaftanga chábeñe chašmotsošbuáchema, y bëngaftaca cha chca tojanmámna. Chca, tsëngaftanga šmondmëna mo Cristbe canye tsbuanachacá, ndayëcha quem luarentsa entšángbioye tojuyentsbuaché bëngaftaca. Tsëngaftanga ndoñe chešmatanobená Crístbeñe ošbuáchiyënga jtsemnana entšangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tsëngaftanga šmondmëna mo canye tsbuanácha cháftaca uabemanëchacá, y ndoñe mo entšángbeyeca uabemana tsbuanachacá. Bëngbe Bëtsá chë mandënga ndëtsbé tablëbenguiñe tojanábema, entšanga chamotsobedecënana, pero tsëngaftangna Cristbe buayenana soye tsëngaftangbe ainaniñe šmojóyëngacñe.

⁴ Crístbeyeca Bëngbe Bëtsábeñe jtsošbuáchiyëse, bënga corente fsëndétatsëmbo chca ndegombre bëtsemnana. ⁵ Ndoñe quenátsmëna, nye bënga cányënga quem trabajo jamama ftsobena y játayanana bëngbe soye chë trabajo yojtsemna ca, er bënga jtsoobenana chca jamama, nye Bëngbe Bëtsabe ujabuáchenanaca; ⁶ er cha tojama bënga fchayobenama quem trabajo jamama, chë entšanga jábuayenana Bëngbe Bëtsá chabe entšángbioye tojanašebuachená soyëngama, ndayá Cristo tojanma sóyeca, mo canye tsëm tratcá, Bëngbe Bëtsá y chabe entšángaftaca. Quem soye ndoñe quenátsmëna mo chë Bëngbe Bëtsá tempo Israeloca entšángbioye léyeca tojanašebuachená soyëngcá. Inyëtšá; entšanga mondama Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entšá jóbana jtsemnana; pero Cristbe tsabe noticiënga, chë tsëm trato, entšanga ainaniñe tmojóyëngacñe ora, chë Uámana Espiritu jamana, chë njyetasca tescama yomna tsabe vida chënga chamotsebonnana.

⁷ Quem Moisesbe ley, chë ndoñe tmonjobedecema entšanga jóbana jtsamnana, ndëtsbé tablëbenguiñe letrëngaca tmojanábema, y Bëngbe Bëtsá Moisésbiyoe tbojanantsabuaché ora, cha tša buashinýinýaniñe tojánabo. Chë causa entšanga ndoñe imontsobena ni mo jinýana Moisesbe jubíá, er tša ibojtsanjuebëbuashinýinýana, Bëngbe Bëtsáftaca tbojánencuentëntšana tojtanabo ora. Pero betscó tojanéjbana chë jubíá chca buashinýinýanana. Chë ley, chë natsana trato, Bëngbe Bëtsá tojanayentsbuaché ora, tša buashinýinýanánaca cha tojanmëse; ⁸ ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojtsama ora, chë Uámana Espiritu bëngbe ainaniñe cháumashënguama Bëngbe Bëtsá tojama ora. ⁹ Bëngbe Bëtsá chë ley tojanayentsbuaché ora, chë ndáyeca entšanga jóbana yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinýinýanana jinýanýiyëse; ndegombre más bën y uámana tempo entsemna chë mocna ora Bëngbe Bëtsá yojtsama entšanga chabe bominiñe tsábenga chamotsemnana. ¹⁰ Er chë Bëngbe Bëtsá ley tojanayentsbuaché ora tojaninýanýé buashinýinýanana, mora jtsinýnana mo ya tondaye cuabndëtsemncá, chë Bëngbe Bëtsá entšangbiama tsëm soyënga tojtsamama tcojtsonýá ora, chë tša buashinýinýanana yojtsemna ora. ¹¹ Er chë leyama tempo, chë ya jochnënguama tempo entsemna ora, Bëngbe Bëtsá chabe buashinýinýanana y uámanana tojinýanýese; ndegombre chë Bëngbe Bëtsá tsëm soyënga entšangbiama jamama ora, chë ndocna te yochanjochnëngo tempo ora, Bëngbe Bëtsá más chabe buashinýinýanana y uámanana echántsinyánýnaye.

12 Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nyëtsca soyëngama jayanëse, tondayama ntjatauatjá. ¹³ Y chca, bënga ndoñe Moisesá queftsátama, chë chabe jubiá chaobuashinýinýenama Bëngbe Bëtsá tojanma ora, canýe entsëjuaca yojsenamochëcjua; cha chca tojanma, chë Israeloca entsanga ndoñe chamondobená jinýama chë jubiá buashinýinýanana ya yojsëchnëjuana ora. ¹⁴ Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisesbioye tbojanšbuachenacá chëngbiana jamama, Israeloca entsanga tmojtsalía ora, ndoñe ntsësertánana Bëngbe Bëtsabe ndegombre soyënga, mo chëngbiana iytëmena soyënga cuaftsemncá, mo chë Moisés yojsenamochëcjua entsëjuacá. Y chca endmëna, er nýe Crísoftaca cánýiñe mo canýacá jtsemnëse, chënga jtsobenana chë soyëngama jósertana, y iytëmencá ya ndoñe ntsemnana. ¹⁵ Y mëntscoñama, Moisesbe librëšangá chënga tmojtsalía ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa. ¹⁶ Pero canýe entsá chë Bëngbe Utabnabe benache tojishache ora, cha jtsobenana chë soyëngama jósertana. ¹⁷ Y Bëngbe Utabná y Espíritu canýa bondmëna, y Bëngbe Bëtsabe Espíritu tojtsemnëntse, chë bacna soyënga jamama juabnënga, ni chë ley ndoñe ntsemándayana. ¹⁸ Moisés chabe jubiañe Bëngbe Bëtsabe buashinýinýanana y uámanana tojaninýanyé, y chíyeca, canýe entsëjuaca yojsenamochëcjua, chca, chënga ndoñe chamondinýama. Pero bënga ošbuáchiyënga nyëtscanga jtsinýanýanana Bëngbe Utabnabe buashinýinýanana y uámanana, mo canýe espejo canýe soye tojtsinýanýnacá, y ndoñe queftsátseboše ntšámñaca jamëse chë soye jatsëytamianana. Cha bëngaftaca yojsama cada te más chë ntšamo cha yomncá bënga chamotsemnana, cada te más bëtsëtsanga chë ntšamo cha yomncá jtsemnëse. Chca endmëna ntšamo Bëngbe Utabná yojsama; y Bëngbe Utabná y Espíritu canýa bondmëna.

4

¹ Y chca, Bëngbe Bëtsá bëngbiana lastemado yómñayeca, quem trabajo sojabanyé, jtsabuayinayama chë Crísoftaca tojašebuachená soyënga; y chíyeca bënga ndocna te ntjájbanana ainaniñe añemo bomnana. ² Bënga fsëntsaboté chë ínýenga iytëmencá imnétsama soyënga, chë ínýenga tmojinýe ora chama jtsëuatjana, y chë ínýenga entsanga jáingñama imnétsama soyëngnaca, y Bëngbe Bëtsabe buayenana soye ndoñe queftsatstróca ndoñe ndegombre soyëngaca. Chamna, bënga sempre nýe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entsabe ainanentša juabnënga chamuayanama, bënga ndegombre soyënga fstsoyebuambná ca. ³ Y nderado bënga chë tšabe noticiënga fstsabuayiná ora, báseftanga chë soyënga chaósertama ndoñe tontsopodénese, nýe chë pochocánënga jtsemnana tmojtsajnëngbiana chca jtsemnana. ⁴ Chëngbiana, chë Crístbeñe ndošbuáchiyëngbiamna, chë quem luarentse mora mandayá, Satanás, tojama chë buayenana soye ndoñe chaondëtsësertánama; chca, chënga ndoñe chamondinýama chë tšabe noticiënguentšana puerta bëts y tšabe soyënga, chë Crísto puerta bëtsá y obená yomñama ínýanýnaye soyënga, nda nyëtsca

soyënguiñe Bëngbe Bëtsacá yomna. ⁵ Bënga ndoñe nÿe cabëngbe soyama queftsatabuayiyná, ndayá Jesucristbiana mo Bëngbe Utabnacá. Bënga bëngbiana fsëndbáyana mo oservenëngcá fstsmëna ca, tsëngaftanga jujabuáchama; y chca fsëndbëtsama Jesús jaserviama. ⁶ Er Bëngbe Bëtsá, nda quem luare jobojátsama ora tojanmandá binÿniñe ibetentsana chaóbcnana, chánaca tojama bënga ainaniñe tsabá chabe soyëngama chašotsësertánama, chca bënga fchayobená juabuátmanana chë Bëngbe Bëtsabe uámanana y obenanentsana inétsobocana osertánana, ndayá Crístbeñe bënga mondonjá.

Bënga fsëndoyena Crístbeñe jtsošbuáchiyëse

⁷ Pero chë puerte tsabe y bëts soye, chë Cristbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nÿe mo matbajëngcá, ndoñe yapa obenana ntsebmomnana, chca, jinÿanÿiyama tša bëts obenana Bëngbe Bëtsábicana yóbocanama, y ndoñe bëngbentsana. ⁸ Y chca, bënga nÿetsca padecena soyënguiñe vida fsëndbomna, pero ndoñe queftsátsmëna ndobenënga chë padecena soyënguentšana tsabá jabocanama; ndoñe queftsátstasëmbo ndayá jamama šojtsamna, pero ndoñe queftsátsmëna ntsobencá jtsobátmanama quem padecena soyënguentšana tsabá jabocnana. ⁹ Inÿenga montsama bënga puerte fchaisufrima, pero Bëngbe Bëtsá ndoñe nÿe cachcá šontsabashejuana; mo nda ínÿabiye cuafjutsencá tmojtsentsjaná ora, ya jóbama jtseprontánana, uayayënga bënga jtsebáyama imojtsejuabnangbe cucuatšiniñe fsëntsemna, pero cabá ndoñe ntjobáyana. ¹⁰ Inÿenga sempre jtsamana bënga bëngbe cuerpiñe puerte fchaisufrima, y jobanámnaca resjo jtsemnana, ntšamo Jesúseftaca tmojanmcá, cha chaosufrima y chaóbanama. Chca bëngaftaca endopasana, chca, ínÿenga chamobená jinÿama Jesús bëngbeñe vida yobomnana. ¹¹ Er bënga vida fchabomnëntscuana, sempre puerte resjo bëngbiana jëftsemnana jóbana, Jesúsbioye servena causa; y chca endmëna, ínÿenga chamobená jinÿama Jesús vida yobomnana bëngbe cuerpiñe, chë canÿe te yochjopochóca cuerpo. ¹² Y chca, bënga tša fsëndësufrina y jobanámnaca resjo endmëna; y tsëngaftanga tsabe noticiënga šmojóyëngacñayeca, Bëngbe Bëtsá tojama chë nÿetsca tescama yomna tsabe vida chašmotsebmomnana.

¹³ Bëngbe Bëtsabe uabemana palabrënguiñe endayana: “Atše sëntsanošbuaché y chíyeca sënjanoyebuambá ca.” Bënga cachca ošbuáchiyana fsëndbomna chë chca tojanayanacá, y chíyeca bëngnaca Bëngbe Bëtsabeñe fsëntsošbuaché y chabiana fsëntsoyebuambná. ¹⁴ Er bënga fsëndëtatšëmbo, Bëngbe Bëtsá, nda tojana Bëngbe Utabná Jesús cháuatayenama, chánaca yochjama bënga Crístoftaca cánÿiñe mo canÿacá jtsemnëse, bënga chámuatayenama, y tsëngaftangaftaca cánÿiñe cha yochtsemnoye šochjúshejango. ¹⁵ Lempe ntšamo bënga fstsama y fstsesufrincá tsëngaftangbe tsabiama endmëna; chca, más becá entšanga chábeñe chamojtsošbuaché ora, ba tsabe bendicionënga Bëngbe Bëtsá entšangbiana jtsamëse, más becá entšangnaca chábioye chamotsatschuaná, ndayá chëngbiana cha yochjamama; y lempe chca, Bëngbe Bëtsá puerte uamaná y obená yomnana nÿetsca entšanga chamotsichámuama.

¹⁶ Chíyeca bënga ndoñe ntjájbanana ainaniñe añemo bomnana. Masque quem luarentša bëngbe cuerpo cada te jtsoPOCHÓCAYANA, Bëngbe Bëtsá jamana chë bëngbentsana nÿets tempo vida yochtsebmomna soye, cada

te más obenana chaotsebmomnana; y chca, bēnga jtsemnana mo tsmēma entšangcá. ¹⁷ Ntšamo bēnga mora fsēndēsufrincá endmēna n̄ye quem luarentše vida tmojtsebmomnēntscuana, y chca, chē soye jtsemnana mo can̄ye nduámana soycá; pero ntšamo bēnga fsēndēsufrincá josérviana bēnga jtsebmomnana chē Bēngbe Bētsá šochjatsataye puerte bēts uámanana y obenana, cháftaca n̄yets tempo vida jtsebmomnana, chē ndayá yomna n̄yetsca soyēngama más bēts y uámana soye. ¹⁸ Er bēnga n̄ye chē tojtsopodena jin̄yama soyēnguiñe ndoñe n̄yets tempo queftsatsjuabná, ndayá chē ndoñe yondopodena jin̄yama soyēnguiñe; er chē bēnga imobena jin̄yama soyēnga ndoñe n̄yetsca tescama ntsemnana; pero chē bēnga ndoñe mondobena jin̄yama soyēnga cocayé n̄yetsca tescama jtsemnana.

5

¹ Bēnga mora mondbomna can̄ye cuerpo quem luarentše vida jtsebmomnana. Quem cuerpo yomna mo chē jtsatsjacama yopodena yebncá, cán̄yentše ndoñe n̄yets tempo ntjēftsemnana. Bēnga mondētatsēmo, quem cuerpo can̄ye te tojtsopochocase, Bēngbe Bētsá yochjama bēnga tsmēma cuerpēnga chamotsatsbmomnana, celoca n̄yetsca tescama vida jtsebmomnana, Bēngbe Bētsabe pormana cuerpēnga y ndoñe entšangbe pormana cuerpēnga. ² Chíyeca, bēnga quem luarentše chca vida tmojtsebmomnēntscuana, yapa tmojtsesufrina causa, bēnga tša jtsebošana betesco Bēngbe Bētsá celoye chašúyambama, y bēnga n̄yets tempo celoca jtsiyenama tsēm cuerpo jtsebmomnana cha chaomama; ³ chca, Cristo yochjésabo ora, bēnga chē tsēm cuérpoca chamotsemnana, y ndoñe n̄ye espíritu ndocna cuérpoca. ⁴ Bēnga quem cuerpiñe, chē quem luarentše vida jtsebmomnana cuerpiñe chamojtsiyenēntscuana, yapa padecena soyēnguiñe sufrina causa, bēnga jabuache mochanjášachna; chca echántsemna ndoñe n̄ye chē espíritu ndocna cuérpoca jtsemnana bēnga imojtsebóšeyeca, ndayá masna, bēnga chē tsēm cuerpo chamotsebmomnana Bēngbe Bētsá chaomama imojtsebóšeyeca. Bēnga fsēntseboše chē bēngbeñe jopochócama yomna soye Bēngbe Bētsá lempe chaotrocama, chca, bēnga chamotsobenama celoca n̄yetsca tescama vida jtsebmomnana. ⁵ Y Bēngbe Bētsá endmēna nda tojama bēnga chamotseprontánama chē tsēm cuerpo jtsebmomnana, y nda tojama Espíritu bēngbe ainaniñe cháuamashēnguama, chca bēngbioye jin̄yan̄iyama, bēnga ndegombre mochjóyēngacñe ndayá Bēngbe Bētsá tojašebuachenacá.

⁶ Y chca, bēnga sempre ainaniñe bēts añemo fchandbétsebmomna. Bēnga fsēndētatsēmo, quem cuerpiñe cabá vida bēnga mochjēftsebmomnēntscuana, bēnga ndoñe mochántsemna Bēngbe Utabná yojtsemnentše. ⁷ Er mora bēnga fsēndoyena jtsamēse, ntšamo Cristbeñe bēnga imošbuachecá, y ndoñe n̄ye ndayá jin̄yama tmojtsobenama. ⁸ Bēngbe fsēntsemna ainaniñe bēts añémoca, y más fsēntseboše jájbanana quem cuerpiñe vida jtsebmomnana, jama Bēngbe Utabnáftaca n̄yetsca tescama vida jtsebmomnana. ⁹ Chíyeca bēnga bētsacá fsēndēntšena Bēngbe Utabná sempre oyejuayá jabemama, masque bēnga quem luarentše quem cuérpoca tmojtsiyena, o ya ndoñe. ¹⁰ Er n̄yetscanga šontsamna jashjanguana Cristbe puestoca tribunalentše, cada ona ntšamo yomerecencá chaóyēngacñama, ntšamo tšabá o ndoñe tšabá quem luarentše chabe cuerpiñe vida yojjēftsebmomnēntscuana tojēftsemcá.

Jábuayenama ntšamo Bèngbe Bètsá inama entsanga tempcá tšabá cháftaca chamotsatsmènama

¹¹ Chcasna, Bèngbe Utabná nyetscangbiamia chë más bètsá yomnama jtsejuabnayëse, bènga bètsá fsëndama entsanga jáyènjana, bènga tšabá fstsamama chamotsejuabnama. Pero Bèngbe Bètsá ya endétatšëmbo ntšamo bènga fstsamènama, y atše sèntsobátmana tšèngaftángnaca chca tšabá chašmotsetátšëmbo, tšèngaftangbe ainantèša juabnèngaca, chë bèngbiamia aífne ca cmojtsètsètná juabnènga. ¹² Bènga ndoñe cachiñe cabèngbiamia queftsatoyebuambná; chca fsèntsichamo ndayá tšèngaftanga oyejuayènga bèngbiamia chašmotsemnama, chca, tšèngaftanga jojuama chašmobenama, chë uámana soyènga tmojtsebiamnángbioye ndayá entsanga canye entsábeñe tmojtsonyáca y ndoñe chca chë entsábe ainaniñe tomna soyèngaca. ¹³ Er bènga mo chë ndoñe corente juabna ndbomnèngcá fstsamèse, ntšamo báseftanga mondbetsichamcá, jtsemnana Bèngbe Bètsá jaserviama; y bènga corente juabna bomnèngcá fstsamèse, jtsemnana tšèngaftangbe tšabiamia. ¹⁴ Bènga chca fsèndmèna, Cristo šondábabuanyèshanayeca, y chë soye endama bènga nye cha fchaitsešervènama, er bènga fsèndenojuabná y puerte tšabá fsèndétatšëmbo, canya, Cristo, nyetscangbiamia tojanóbana; y cha nyetscangbiamia tojanóbana, endmèna mo cha tojanóbana ora, nyetscanga cháftaca cuafjobancá. ¹⁵ Y Cristo nyetscangbiamia tojanóbana, chë quem luarentse vida bomnènga ndoñe más nye cachèngbiamia chamondètsiyenama, sinó chabiamia, nda chèngbiamia tojanóbana y tojtanayena. ¹⁶ Chiyeca, bènga ya ndoñe ndocnabiamia queftsatsjuabná ntšamo entsanga quem luarentse jtsejuabnayama monduamancá; masque ndegombre bènga chca Cristbiamia fsènjajuabná, mora ya ndoñe chca chabiamia queftsatsjuabná. ¹⁷ Chcasna, nderado nda Crístoftaca cányiñe mo canyáca tojtsemna, Bèngbe Bètsá tojama cha mo canye tsèm entsáca chaotsemnama. Ntšamo chë Crístbioye cabá nduabuátmana ora cha yojamncá, mora ya ndoñe quenátsmèna. Morna cha jtsejuabnayana y jtsamana inye soyènga y tsèm soyènga.

¹⁸ Bèngbe Bètsá endmèna nda chca inétsama, entsanga mo tsèm entsangcá jábiamama; y cha Crístoftaca tojama bènga tempcá tšabá cháftaca chamotsatsmènama. Y cha bènga canye trabajo šonjanabanýé, bènga entsanga jábuayenama, Bèngbe Bètsá inétsama entsanga tempcá tšabá cháftaca chamotsatsmènama, y entsanga jujabuáchama chca chamotsemnama. ¹⁹ O mèntšá, Cristo tojanma sóyeca Bèngbe Bètsá yojtsama entsanga chamotsobenama tempcá tšabá cháftaca jtsatsmènama, y chca, chènga chamotsobena chèngbe bacna soyèngama perdonánènga jtsemnama, y chë soyèngama nyetsca tescama castigánènga jtsemnama ndoñe chaondètsamnama. Y bènga šonjanabanýé chë trabajo, entsanga jtsabuayinyayama ntšamo Bèngbe Bètsá inama entsanga tempcá tšabá cháftaca chamotsatsmènama. ²⁰ Y chca, bènga jtsemnana Cristbe cuenta oyebuambnayènga y amènga, mo cach Bèngbe Bètsá bèngaftaca cmojt-saimpadancá. Cristbe cuenta cbaimpadá, bètsá šmochtsentšena Bèngbe Bètsáftaca tempcá tšabá jtsatsmènama. ²¹ Cristo ndocna bacna soye tonjanma, pero bèngbe bacna soyènga jabuajuánamna, Bèngbe Bètsá cháftaca tojanma mo cha canye bacna soyènga amá cuaftsemncá, chca, bènga Crístoftaca cányiñe mo canyáca jtsemnèse, Bèngbe Bètsabe bominyiñe tšábenga jtsemnama chamotsobenama.

6

1 Chcáyeca, bēnga Bēngbe Bētsáftaca cánýiñe trabájayēnga quetsomñecana, cbontsaimpadana ndoñe nýe bonamente chašmondóyēngacñe chē Bēngbe Bētsá yojtsama soyēnga, tšēngaftangbiana tšabe juabna jtsebomñese. 2 Er Bēngbe Bētsá chabe uabemana palabrēnguiñe mēntšá tojánayana:

Chē tšabe soye jamama tšabá šonjaninýana ora, atše tcbonjanoyeuná; chē ácbioye jatsbocama te, tcbonjanájabuache ca.

Smochjinýe. Mora entsemna chē mocna ora Bēngbe Bētsá tšabá ibojtsinýana tšabe soye jamama; mora entsemna chē mocna ora Bēngbe Bētsá yojtseboše aca jatsbocama.

3 Bēnga ndocna bacna soye queftsátama, ndayá chaoma entšanga chē tšabe noticiēnga chamotsábotema, chca, ndocná podesca chaondětsóyebuambnama bēngbe trabajuama, Cristbiana. 4 Inýetsá, bēngna nýetsca soyēnguiñe fsēnjaniyena mo Bēngbe Bētsabe oservenēngcá; Bēngbe Bētsábeñe obatomancá puerte uantadēnga jtsemñese, fstsesufrina ora; puerte padecena soyēnguiñe bétsemna causa, ndayá jamama ndoñe fsěntsetatšēmo ora; y ainaniñe puerte ngménaca fstsemna ora; 5 inýenga šojtsatsetšená ora; cárceloje šojautame ora; entšanga bēngbe contra tmojtsenbouénana ora; jabuache trabájayiñe puerte uaměntšnayēnga fstsemna ora; bayté ntsamanacá fstsemna ora; y jasama tondaye fsěntsebomna ora. 6 Bēngnaca fsěntsinýanýná Bēngbe Bētsabe oservénēnga fstsmēnama, puerte tšabe vídaca, ndocna bacna soye ntjamcá jtsiyenese; Bēngbe Bētsabe soyēngama corente jtsetatšēmbese; inýenga ntšamo šojáborlaye ora puerte uantadēnga jtsemñese; inýengbioye puerte bonshanánaca jtšēnyayese; Uámana Espíritu bēngbe ainaniñe jtsebomñese; y ndegombre nýets ainánaca nýetscanga jtsababuánýeshanese; 7 ntšamo Bēngbe Bētsabiana ndegombre yomncá jtsabuayiyayese; Bēngbe Bētsabe obenánaca ba soyēnga jtsamese; y mo chē soldadēngcá, uayayēnga jáyēnjanama y chēngbiana jenéuyanama soyēnga jtsebomnana, chē Satanásbioye jáyēnjanama y chabiana jenéuyanama ndayá Bēngbe Bētsá šojatsatacá jtsebomñese; y Bēngbe Bētsá chca tojama, er cha tojama bēnga chabe bominýiñe tšábēnga chamotsemnama. 8 Bēnga fsěntsinýanýná Bēngbe Bētsabe oservénēnga fstsmēnama, inýenga bēngbiana tšabe soyēnga tmojtsejuabná ora y bēnga nduámanēnga jtsemnama chēnga tmojtsama ora; inýenga tšabe soyēnga bēngbiana tmojtsoyebuambná ora y chēnga bēngbiana podesca tmojtsichamo ora; bēnga áingñayēnga fstsmēna ca báseftanga tmojtsejuabná ora, pero bēnga ntšamo ndegombre yomncá jtsóyebuambnayese. 9 Mo nduamanēngcá bēnga entšángbeñe jtšēnyayana, pero banga corente tšabá bēnga šonděubuatma; bēngbiana sempre resjo endmēna jóbanama, pero smochjinýe, bēnga sempre vídaca chentšana jatóbocañana; bēnga juatsjínýama jobenayama, Bēngbe Bētsábeyeca castigánēnga fchandbétsemna, pero nýa jóbanana ndoñe. 10 Masque ngménēnga fstsemna, ainaniñe sempre oyejuayēnga fchandbétsomñe; masque ndbomñejemēngcá, pero fchandbétsama banga Bēngbe Bētsábicocana bētscá chamotsebomnama; quem luarentša soyēnga tondaye queftsátsbomna, pero Bēngbe Bētsabe entšanga quetsomñecana, ndegombre lempe fsěndětsóbomñe.

11 Tšēngaftangbiana, Corintoca entšanga, lempe fsēnjayana, tondaye ntjaitēmá; nýets ainánaca, corente cbondábabuanýeshana. 12 Bēnga

puerte cbondábabuanÿeshana, pero tšëngaftangna ndoñe yapa quešcátatabuanÿeshana. ¹³ Atše cbontsaïmpadana, mo canÿe taitá chabe básenga cuaftsaïmpadancá, atše puerte chašmotsebobonshánama, er atše corente cbondábabuanÿeshana.

Bënga mondmëna mo Bëngbe Bëtsabe bëts yebncá

¹⁴ Crístbeñe ndošbuáchiÿëngaftaca ndoñe šmatjenutaná ndayánaca jamama, er chca, chëngaftaca šmatjábcana mo chë jaárama uacnata ndoñe cachënchechata tbontsemncá. Ndegombre, chë tšabe soyënga amá y Bëngbe Bëtsabe bomínÿiñe tšabia mëná, nÿa tondayama cachcá ntsejuabnayana, chë Bëngbe Bëtsá tojamandacá ndoñe tontsamacá y bacna soyënga amacá. Ndegombre, chë entšangbe juabna binÿnayáftaca vida bomná, nÿa tondaye ntsebomnana chë nÿe mo ibetiñcá juabnayáftaca. ¹⁵ Cristo y Satanás, Belial cánaca uabainá, ndocna te tondayama cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca. ¹⁶ Ndocna soyiñe cachcá ntsemnana, Bëngbe Bëtsabe bëts yebna, chë nÿe canÿe Bëngbe Bëtsábioye jadórama yebna, y chë entšangbe pormana soyënga, mo diosënga cuaftsemncá jtsadoránana soyënga; chca endmëna, er bënga, nÿetscanga cánÿiñe Jesucrístbeñe ošbuachiyëngcá, mondmëna mo Bëngbe Bëtsá Ainabe bëts yebncá, ntšamo Bëngbe Bëtsá chabe uabemana palabrënguiñe chabe entšangbiama tojanayancá:

Chëngbeñe vida chántsebomna y chëngbenache chántsana;

atše chëngbe Bëtsá chántsemna

y chëngna atšbe entšanga ca.

¹⁷ Chíyeca mëntšánaca Bëngbe Utabná chabe entšanga tojanëyana:

“Chë bacna soye amëngbentšana šmochjësebocana, y chëngbentšana šmochtsojuánañe;

tondaye šmattsebana, ni šmattsama ndayá Bëngbe Bëtsabe entšangbiama ndoñe tšabá tontsemncá.

As cbochanjúbuaja,

¹⁸ y chántsemna mo canÿe taitacá tšëngaftangbiama,

y tšëngaftangna mo atšbe uaquiñënga y bemiangcá.

Chca séntsichamo atše, tšëngaftangbe Utabná, nÿets obenana bomná ca”
—chiñe enduábemana.

7

¹ Chcasna, atšbe bonshánënga, chca endmëna ntšamo Bëngbe Bëtsá šojašebuachenacá. Chíyeca šontsamna, Bëngbe Bëtsabe delante nÿetsca soyënguiñe tšábenga jtsemnana, bëngbe cuerpama o espíritbiama bacna soye ndoñe más ntsamcá; y Bëngbe Bëtsá nÿetscangbiama más uamaná yomna ca mondëjuabnáyeca, lempe ntšamo tmojobenacá mochtsiyena mo chabe entšangcá, nÿetsca soyënguiñe puerte tšábenga jtsemnëse.

Ntšamo chë Corintoca entšanga juabna tmojantrócá

² Bëngbiama šmochtšenójuabnaye tšëngaftangbe ainaniñe puerte bonshanánaca. Bënga ndocnabiama bacna soye chibiatsma, ndocnabiama chibiatsma más bacna entšá chaotsemnana, y ndocnábioye chibiatsingñé. ³ Atše chca ndoñe quetsátichamo,

ndoñe tšabá šmonjama ca tšëngaftangbiama jayanama, er ntšamo ya tbonjauyancá, atše tšëngaftangbiama sempre ainaniñe puerte bonshanánaca sëndbétsenójuabnaye; y chca, mo átšeftaca canÿiñcá

šmochántsemna, masque chayóbana o cabá vida chaitsóbomñese. ⁴ Atše puerte tšabá sëndétatsēmbo, ntšamo tšabá yomncá šmochtsamama; y tšëngaftangbiana puerte oyejuayá sëntsemna. Lempe ntšamo tsësufrincá tsiyenama, atšbe ainaniñe bëts añemo sëndëtsóbomñe y corente sëntsoyejuá.

⁵ Macedonia luaroye fsënjánashajna orscana, ndoñe luare queftsátsbomna jóchnama, sinó nyetsca soyënguiñe fsëndëpadeceña: chë bëngbe buayenana soyama contra tmojtsemnëngaftaca jabuachana enatsëtsnayëse, y bëngbe ainaniñe jtsauatjëse. ⁶ Pero Bëngbe Bëtsá, chë yapa añemo ndbomnëngbioye endbetsañemuayá, tojanma bënga ainaniñe más añemo fchaitsebomnama, Tito moye tonjánashjango ora. ⁷ Y cha tonjánabo ora, bënga ndoñe más añemo quefstétsebomna nyë cha tojánashjanguama, sinó tšëngaftanga šmojanájabuachama y ainaniñe añemo chaotsebomnama šmojanmama. Cha šonjanéyana tšëngaftanga tša šmojánboše bënga jányama ca, y šonjanacuntá ntšamo tšëngaftanga ngménaca šmojamna, atšbiana ndoñe tšabá šmonjanma causa, y ntšamo tšëngaftangbiana atšbe tšabiana puerte iuámanana; y quem chabe noticiëngaca, cabá más sëntsoyejuá.

⁸ Er masque tšëngaftanga tša ngménaca šmojamna chë tcbonjanëbuábiana tsbuanáchama, mora ndoñe quetsatsjuabná más tšabá yojamna chca ndoñe jatëbuabiamana ca; masque tempo atše chca sënjanjuabná, er atše sëtsetatsēmbo chë tsbuanácha básefta tescama ngménënga tcmojánabiana, ⁹ mora atše puerte oyejuayá sëntsemna, ndoñe tšëngaftanga ngménënga šmojamna, ndayá chë šmojánbomna ngménana tojanmama tšëngaftanga chašmuenójuaboma ndoñe tšabá šmontsamama, y chca amana chašmotsajbanama, tšëngaftangbe juabnënga jatrócase. Chca enjamna, er tšëngaftanga ngménana šmojánbomna ntšamo Bëngbe Bëtsá inabošcá; chíyeca, bënga ndocna bacna soye tšëngaftangbiana chibiatsma. ¹⁰ Ntšamo Bëngbe Bëtsá tojtsebošcá ngménana bomnentsana, jóbocnana chë bacna soyënga tcojamama jenójuaboyana y juabnënga jatrócana; y juabna jatrócana entšábioye juanatsana atsbočaná chaotsemnama, y cha ndocna te ntjátsjuabnayana más tšabá yojamna ndoñe chca ntjatstrócana ca. Pero ntšamo chë nyë quem luarama enójuabnaye entšanga mondbetsebomncá ngménana bomnentsana, ndoñe ntjóbcnana juabna jatrócana; chentsana jóbocnana nyë nyetsca tescama castigana jtsemnana, mo nyetsca tescama cuafjobancá. ¹¹ Smochjinýe ndayá tojóbcna, ntšamo Bëngbe Bëtsá inabošcá ngménana bomnentsana: tojanma chë šmojanma soyiñe puerte chašmuenójuaboma; y ntšamo jájandmanana bëtscá chašmonguanguama; tojanma tšëngaftanga chacmetonama chë bacna soye tojanmáftaca; y castigánënga jtsemnama jtsauatjámna. Chentsana, tšëngaftanga tša šmojtsanboše atše jinýama; y šmojtsanprontana lempe jamama chca bacna soye ndoñe más chaondëtsemnama y chca tojanmábioye jacastígama. Nyetsca chë soyënguiñe tšëngaftanga šmonjinýanýe chca bacna soye ndoñe šmonjanmama; y chca, mora tondaye quenátsmëna tšëngaftanga castigo jtsebomnama chacmotsamnama. ¹² Y chca, atše chë tsbuanácha tcbonjanëbuábiana ora, ndoñe checbátanëbuabiana chë puerte bacna soye tojanmábeyeca, ni chë bacna soye tojanoyëngacñábeyeca; ndayá tšëngaftanga, mo Bëngbe Bëtsabe delante cuaftsemnëngcá, chë šmojanma

soyiñe bëtscá chašmuenójuaboma, y chca, cha chašminñanyé tšëngaftanga bëngbe tšabiana puerte šmenójuabnama. ¹³ Chíyeca bënga más añemo ainaniñe fsëntsebomna.

Pero ntsachetšá añemo fstsboomnama, masna puerte oyejuayënga fsëntsemna, er bënga fsënjinñe Tito tša oyejuayá, er chabe ainaniñe lempe natjëmbana yojtsemna nyetsca tšëngaftangbiana. ¹⁴ Tito tšëngaftanga jányama cabá nda ora, atše cha sënjaniana tšëngaftanga šmochjanóyeunaye chë atše tčbonjanëbuaja palabra ca; y tšëngaftanga ndoñe chešmatsma atše chaitsëuatjama chca tijánayanama. Inyetsá, lempe ntšamo tčbojauyancá ndegombre endmëna; cachcá, ntšamo bënga Titbioye fsënjaniancá ndegombre entsemna, chë tšëngaftangbiana fstsóyejuama. ¹⁵ Y mora Tito más cmontsababuánñeshana, ntšamo cha tmojanamëndacá ndayá tšëngaftanga šmojanmama, y ntšamo puerte respétoca y mo uamaná cuaftsemncá chabiana jtsejuabnayëse šmojanofjama tojtenujabó ora. ¹⁶ Atše puerte oyejuayá sëntsemna, er atše sëndëtatšëmo tšëngaftanga ntšamo tšabá yomncá nyetsca soyënguiñe šmochtsamama.

8

Chënga jañëmuayama, inñe ošbuachiyëngbioye nyets ainánaca jujabuáchama

¹ Y mora, Jesucristbeyeca catšátanga, bënga fsëntseboše tšëngaftanga chašmotsetátšëmo ntšamo Bëngbe Bëtsá bëtscá tšabe bendicionënga tojama Macedonia luarentše ošbuachiyëngcá enefjuanëngbiana. ² Chënga puerte tmojasufri, y chora chca, chënga tmojinñanyé becá imošbuáchema y tša imoyejuama; y masque puerte ndbomnjëmënga, chënga nyets ainánaca bëtscá tmojanacaredadó Jerusalenentša ošbuachiyënga ndbomnjëmëngbiana. ³ Atše sëndëtatšëmo y sëntsobena jayanama chënga ndegombre tmojatšatá ntšamo tmojobenacá, y ntsachetšá imobenentšana cabá más, chënga chca imobóseyeca. ⁴ Tša šonjánaimpadana chëngbioye jálesenciana ndayánaca jamama, Jerusalenoca ošbuachiyëngbioye jujabuáchama. ⁵ Bënga ftsjanobatmanama cabá más chënga tmonjanma; natsana, chënga Bëngbe Utabná tmojaniana lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá. ⁶ Ndayá Macedonioca ošbuachiyënga tmojanmama bënga añemo fsënjanoyëngacñeyeca, bënga Tito fsënjaimpadá chë tšabe trabajo chaopochocama, chë tšëngaftangbeñe crocénana játbana, Jerusalenoca ošbuachiyënga jujabuáchama, ndayá cha jamama tojanbojatšecá. ⁷ Y morna, ntšamo tšëngaftanga nyetsca soyënguiñe tša šmomncá —puerte ošbuachiyënga, becá obenënga Bëngbe Bëtsabe soyëngama jóyebuambayama, puerte osertánënga Bëngbe Bëtsabe soyëngama, corente juabnayënga bëtscá jamama Cristo jaserviama y bëngbioye corente ababuánñeshanënga —cachcá, mórnaca bëtscá šmochjama quem trabajuñe chë ošbuachiyënga ndbomnjëmëngbiana, tšëngaftangbe bonshánana jtsinñanyayëse.

⁸ Chca ndoñe quechatëtsësná mo canye mandcá; atše sëntseboše ndayá nñe tšëngaftanga jáuyanana ntšamo inñenga bëtscá tmojatrabajá chë ndbomnjëmëngbiana, tšëngaftángnaca cachcá chašmotsamama; y

chca, chašminñanyëma chë tšëngaftanga šmobomna bonshánana ndegombre bétsemnama. ⁹ Er tšëngaftanga šmondétatsëmbo ntšamo Bëngbe Utabná Jesucristo puerte tšabe soyënga bëngbiana tojamama, bëngbioye puerte jtsababuánñeshanëse. Celoca, cha cabá quem luaroye ndabo ora, cha bëtská inabomna; pero tšëngaftanga ababuánñeshanayeca, mo canye puerte nduamanacá tojanóbema. Y mora, Cristo mo canye nduamanacá tojóbmeyeca, Bëngbe Bëtsá puerte tšabe soyënga šojatšatá.

¹⁰ Tšëngaftangbe tšabiana mëntšá cbabuayená, ntšamo quem soyiñe šmochjamama. Chë inye uata tšëngaftanga šmonjanbojatsé, ndoñe nye chë ndbomnjémëngbiana jacjayama, ndayá chca jamama jtsebošámnaca. ¹¹ Morna, chë ndbomnjémëngbiana trabajo šmochjapochóca; chca, ntšamo tšëngaftanga becá šmonjanprontana y jujabuáchama tša šmonjanbošcá, mórncaca cachcá chašmomama chë trabajo japochócama, ntšamo šmojobenacá jacjayëse. ¹² Er canye entšá, jatštayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

¹³ Ndoñe quenátsmëna, tšëngaftanga puerte ujabótënga chašmoquedá, ínñyëngbioye atšatnye causa, chënga ndoñe yapa ujabótënga chamondétsemnama. ¹⁴ Atše sentsichamo ndayá nyetscanga chamotsenajabuachana, chca tojtséjaboto ora ca. Mora, chë bëtská šmobomnentšana šmontsobena chënga jujabuáchana, ndayá tojtsabuáshebencá jatšatayëse; y inye orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nyetscanga jóyëngacñana ndayá tojtséjaboto ora. ¹⁵ Ntšamo Bëngbe Bëtsabe uabemana palabrenguiñe endayancá:

Chë tša bomnábioye ndoñe chebatanójama;
y chë nye batsá bomnábioye, ndoñe quebënjatanbuáshbena ca.

Tito y chabe enutënga

¹⁶ Bëngbe Bëtsá šcuatschuá, tšëngaftanga jtsanñenama Tito ainaniñe juabnënga chaotsebomnama cha tojanmama, cachcá ntšamo bënga fsëndbomncá. ¹⁷ Er tšëngaftangbioye chaotsama bënga fsënjanimpadá ora, cha oyejuayá aiñe ca tonjánayana choye jama; y chabiana puerte enduámama tšëngaftangbe tšabiana; chíyeca mora echanjá tšëngaftanga jányama, chca jamama cachá yobóseyeca.

¹⁸ Títoftaca, canya Jesucristbeyeca bëngbe catšata fsentsichamná; chabiana puerte tšabá ošbuachiyëngcá enefjuanëngbenache mondoyebuambná, chabe trabajuama chë tšabe noticiënga abuayinayama. ¹⁹ Y ndoñe nye chë soye, sinó quem luarentše ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomnjémëngbiana trabajuiñe; chë trabajo endmëna bonshánana jinñanyiyama; chca fsëntsama, Bëngbe Utabná jtsatschuanayama y jinñanyiyama bënga chca jujabuáchama tša fstsbošama. ²⁰ Títoftaca cha fsentsichamná, chca, ndocná chaondétsichamo bënga ndoñe tšabá tifjama ca, ntšamo játbanama cmojtsamniñe, chë becá juabónana játbanama, ndbomnjémënga jujabuáchama; ²¹ er bënga fsëndama lempe ntšamo fstsobencá, ndoñe nye ntšamo Bëngbe Bëtsabe bominiñe tšabá yomncá jamama, ndayá ntšamo entsangbe bominiñe tšabá yomncánaca.

²² Chátaftaca inya Jesucristbeyeca bēngbe catšátnaca fsēntsichamná; cha bēnga ba soyiñe šonjinñanyé cha yojtseboše bētsca jamama, Cristo jaserviama, y mora más, er cha puerte bētsca entsejuabná tšēngaftanga puerte tšabá šmochjamama. ²³ Y Titbiamna, cha quem trabajuiñe atšbe enutá endmēna, y atšcá tšēngaftangbiama endētrabája; y chē inyáta Jesucristbeyeca bēngbe catšatatbiamna, chata bontsemna quemuentša ošbuachiyēngcá enefjuanēngbe ichmónata, chēngbiama chabóyebuambama; y chē bontsama sóyecna, chata Crístbioye corente jtsatschuanayana. ²⁴ Chíyeca, chēngbioca ošbuachiyēngcá enefjuanēnga chca chamotsetatšēmbuama, chē ichmona boyabásēngbioye šmochjínñanyēye tšēngaftanga ndegombre chēnga šmojtsababuánñeshanama, y bēnga razón fstsebomnama tšēngaftangbiama oyejuayēnga jtsemnama.

9

Chē inye ošbuachiyēngbiama crocénana játbanama

¹ Chē Jerusalemoca Bēngbe Bētsabe entšangbiama crocénana játbanamna ndoñe quenátsiyta tšēngaftangbioye jatēbuabiamnayama, ² er atše ndegombre sēntsetatšēmbo tšēngaftanga tša šmojtseboše chca jujabuáchama. Macedonioca entšanga puerte oyejuayá sempre sēndbētsētsēsnaye, Acaya luaroquēnga chē inye uatscana quem trabajuiñe jujabuáchama šmoprontánama; y chē jujabuáchama tšēngaftange bētsca juabnēnga tmojama banga quem luarentšēnga bētsca añemo chamotsebomnama, chēngnaca chē trabajo jamama. ³ Pero Jesucristbeyeca quem catšátanga sēntsichamná, ntšamo bēnga oyejuayēnga tifjayancá tšēngaftanga chašmotsamama, chē tšēngaftanga quem trabajuiñe bētsca šmochjama ca; chca, ntšamo tijanayancá ndoñe nye bonamente chaondētsemnama, y ntšamo sēnjanayancá tšēngaftanga chašmotseprontánama; ⁴ er nderado báseftanga Macedonioquēnga átšeftaca tmojá y choca ndēprontánēnga tmojánñena chē ndbomnjēmēngbiama ujabuáchenanaca, chē soye nanjama bēnga fchaitšēuatjama, er ba soye fsēnjayana bēnga ndegombre fstsetátšēmbo tšēngaftanga prontánēnga šmochtsemna ca; y ndegombre, tšēngaftangbiama cabá más ouatjca nántsemna. ⁵ Chíyeca, tšabá šonjuínñana Jesucristbeyeca quem catšátanga jáimpadana chēnga atšbe natsana chamotsama tšēngaftanga jányama, y chacmējabuachama chē juabónana játbanama, ndayá tšēngaftanga tempo šmonjanašebuachenacá. Chca, atše choca chajjāshjango ora, tšēngaftange juabónana chaotseprontana. Chca, tšēngaftanga šmochanjínñanyēye ndbomnjēmēngbiama šmojajcá, chca jamama tša šmobóseyeca, y ndoñe nye batšatema jatšatayama y tšēngaftangbiama bētsca jobuájuama šmojtseboše.

⁶ Quemuiñe šmochtsenójuabnaye: Nda nye batšá tojajé, cach batšá chentšana josháchiñana; y nda bētsca tojajé, cach bētsca chentšana josháchiñana. ⁷ Cada ona bontsemna jajájuana ntšamo chabe ainaniñe tojajuabocá; ndoñe ngménaca o nye inyēnga chca jamama tmojtsemándayeca. Chca chaotsemna, er nda oyejuayá tojajajóbioye, Bēngbe Bētsá jtsebobonshánana. ⁸ Bēngbe Bētsá endobena jamana chábentšana nyētsca tšabe bendicionēnga y bētsca soyēnga tšēngaftanga chašmotsebomnama; chca, ntšamo nyētsca soyēnguiñe cmojtsējabotcá sempre chašmotsóbomñama, y cabá más bētsca chašmotsebomnama,

nÿetsca tšabe obrënguïñe ínÿenga chašmëjabuachama. ⁹ Bëngbe Bëtsabe uabemana palabrënguïñe, mëntšá endayana chë bëtsá tojacjabama: Cha nÿets ainánaca ndbomnëjémënga bëtsá jatsatayana; y chë tšabe soyënga ntšamo cha tojtsamcá nÿets tempo jëftsemnana.

¹⁰ Bëngbe Bëtsá, nda endbama chaotsemna jénaye jájema y sananga jasama, cmochanjátšataye lempe ntšamo cmojtsëjbotcá, y echanjama, tšëngaftanga cabá más tšabe soyënga chašmotsamama.

¹¹ Bëngbe Bëtsá echanjama tšëngaftanga nÿetsca tšabe soyënga chašmotsebonnama, chca, tšëngaftanga nÿets ainánaca puerte ínÿengbioye chašmatšatama, y bëngbeyeca, chë mochjóyëngacñënga Bëngbe Bëtsá chamotsatschuanama; ¹² er chë ujabuáchenana Bëngbe Bëtsabe entšanga tcojatsatá ora, ndoñe nÿe ndayá tojtsëjbotcá jatsatayana, ndayá chënga Bëngbe Bëtsá chamotsatschuanámna jama. ¹³ Chënga Bëngbe Bëtsá mochántatschuanaye, er chë ujabuáchenanaca chëngbioye jinÿanÿiyana, ntšamo Cristbe tšabe noticiënguïñe iuayancá tšëngaftanga šmoberdecénama, y ntšamo tšëngaftanga tšabá jamëse, nÿets ainánaca bëtsá soyënga chënga y nÿetscanga šmojátšatama. ¹⁴ Y chënga tša mochántseboše tšëngaftanga jányama y tšëngaftangbiana Bëngbe Bëtsá mochántseimpadana, er cha bëtsá tšabe soyënga tšëngaftangbiana tojama.

¹⁵ Bëngbe Bëtsá šcuatschuá ndayá cha šojátšatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

10

Ntšamo Pablo tojánayana ínÿenga chabe contra imojtsichamo ora

¹ Y mora, atše Pablo, cbochanjáimpada, tšëngaftangbioye puerte bonshanánaca jtsënyayëse, y tšëngaftangbiana tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsnenóbema atše tšëngaftangaftaca stsemna ora, pero corente añemo bomná tsnenóbema jabuache soyënga jayanama tšëngaftangbentšana bënoca stsemna ora ca. ² Tšëngaftanga cbontsaimpadana, tšëngaftanga jányama chajjá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanÿënga imojtsejuabná, nÿe bënga tšabá jtsomñama juabnëngaca bënga fstsiiyena ca. ³ Ndegombre bënga quem luarentše fsëndoyena, pero ndoñe queftsátspelia Cristbiana, ntšamo quem luarentša entšanga monduamancá; ⁴ er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë nÿe quem luarama enójuabnaye entšanga japéliama monduamancá, ntšamo nÿe chënga tšabá jtsomñama juabnënga yomncá. Inÿetsá, chë ndaye soyëngaca bënga fsëndépelia, Bëngbe Bëtsá jtsinÿanana puerte obenana bomna soyënga yomna ca; y endmëna chë Satanás tojtsemánda soyënga jayëñjanama, puerte jabuache soyënga jayëñjanama. Mo nda canÿe uayayábioye jtseepochocancá, chë Bëngbe Bëtsabe osertánana ndoñe yonduámana ca jinÿanÿiyama soyënga ichámëngbiana, ⁵ y Bëngbe Bëtsabe osertánana jtsabotema juabnënga bomnëngbiana, bënga fsëndama ntšamo chënga tmojtsichamcá tondaye chaondëtsámanaca. Y chë japéliama fsëndbomna soyëngaca, bënga fsëndbëtsama chca juabnayana chamotsajbanama, y chamotsobena ntšamo Cristo

yomandacá jtsamana. ⁶ Bënga fsëntseprontana chë Cristbiana nduauenanënga jácastigama, lempe ntšamo Cristo cmojtsamëndacá tšëngaftanga chašmojtsama ora.

⁷ Tšëngaftanga ndayánaca jtsonyayana nýe ntšamo tbojtsabinýecá. Nderado nda becá tojtsejuabná Cristbia yomna ca, cha bontsemna jtsejuabnayana bëngnaca Cristbenga ftsmënema, ntšamo cha yomncá. ⁸ Er atše masque tša sëndbétsoyebuambnaye chë Bëngbe Utabná šojatšatá mandama, chë ndáyeca bënga jamama tšëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tšëngaftanga ntjapochócama, chama atše ndoñe quetsátëuatja. ⁹ Atše ndoñe quetsátsoše tšëngaftanga chacmotsinyana, tšëngaftanga jaútatjayama atše stseboše ca, ndayá atšbe tsbuanáchangañe tijuábemama. ¹⁰ Er báseftanga mëntšá atšbiana imojtsichamo: “Chabe tsbuanáchangañe cha šontsaménda bëtscá soyënga jamama, y tša obenacá cha jtsóyebuambnayana; pero cha bëngaftaca tojtsemna ora, cha jtsóyebuambnayana mo canýe ndocna obenana ndbomnacá, y ntšamo tojtsichamcá tondaye ntsámanana ca.” ¹¹ Chca entsanga entsamna jtsetatšëmbuana, ntšamo bënga fstsichamcá, tsbuanachangá juíchmuase, tšëngaftangaftaca cabá ndoñe fsëntsemna ora, tšëngaftangaftaca fchaitsemna órnaca, bënga chca fchjamama.

¹² Ndegombre bënga ndoñe tša añemo queftsátsoyebuambnaye jayanama nýetšá uámanënga ftsmëna ca, mo chë cachënga jtsenábotamnayana uamanëngcá. Chënga jtsejuabnayana y jtsichámuana tšábenga imomna ca, nýe ntšamo cachëngbeñe ínýenga imomnama jtsonyayése; y chca tmojtsama ora, chënga juabna ndbomnënga jtsemnana. ¹³ Bënga ndoñe yapa quifchatóyebuambaye cabëngbiana, chca, tša tšábenga bënga imomna ca jtsenábotamnayama; fchanjóyebuambaye ndayá chë bënga tifjama tšabe trabajuama, ndayá Bëngbe Bëtsá šojabanýecá, y chíñnaca entsemna ntšamo tšëngaftangbeñe Corintoca tifjamcá. ¹⁴ Chíyeca, bënga ndoñe queftsatóyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tšëngaftangaftaca ndoñe mafsënjamnëse; er bënga chë natsanënga fsëñjamna tšëngaftangbióye jama, Cristbiana tšabe noticiënga jábuayenama. ¹⁵ Y ndoñe quifchatóyebuambaye tša tšabá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínýengbe soye yómnyeca. Chamna, bënga fsëntsobátmana tšëngaftanga Cristbeñe más chašmotsošbuáchema, y chca chaojtsemna ora, bënga fchayobená ba luariñe entsanga jábuayenana, ntšamo tšëngaftangbeñe fsëntsamcá. ¹⁶ Chca, fsëntsobátmana bënga jobenayama tšabe noticiëngama jábuayenama, chë tšëngaftangbentšana más chcoye imoyena entsángbióye; chca, bënga ndoñe yapa quifchatóyebuambaye ínýengbe trabajuama, Cristbe soyënga jábuayenama, mo chë soye bëngbe trabajo cuafjatsmëncá.

¹⁷ Ntšamo Bëngbe Bëtsabe uabemana palabrenguiñe endayancá: “Nda tojtseboše jayanama cha canýe uámana entšá yomna ca, más tšabá cha cháuyana Bëngbe Utabná puerte uamaná endmëna ca.” ¹⁸ Er Bëngbe Bëtsá jayanana canýe entšá ndegombre tšabá tojama ca, ndoñe nýe cachá tojtsenábotamnabiana, ndayá Bëngbe Bëtsá chca ndegombre tojama ca Bëngbe Bëtsá tojtsejuabnabiana.

11

Pablo y chë ndoñe ndegombre ichmónënga

¹ Malaye atše šmëntjëuánta, atše básefta soyënga mo canye opá tojtsoyebuambnacá stsichámëntscuana, cach atše stsenabotamná ora. Masque ntšámnaca šmochtsëuánta. ² Bëngbe Bëtsábeyeca atše tša cbondábabuanÿeshana y cbondánÿena, tšëngaftanga nÿe cha chašmotséstonama y ndoñe ínÿengbioye. Er atše Cristo sënjašbuachená tšëngaftanga sempre cha šmochtséstonama, y sëntseboše, cha quem luaroye yochjésabo ora, chábioye tšëngaftanga júshejanguana, mo nÿe chábioye sempre ustonëngcá, ntšamo canye taitá chabe bembe ndocna boyabása nduabuatmá nÿe canye boyabásaftaca chaóbuamama jushjanguancá. ³ Mëtscuaye Evábioye tbojaningñë, y cha tbojanínÿnana puerte osertanabe soyënga cuaftsatsëtsnacá, pero ndegombre ndoñe chca yonjamna. Atše sëntsauatja nderado cachcá ínÿenga tšëngaftangaftaca muanjama y tšëngaftangbe juabna chašmotrocá, y chca, tšëngaftanga chašmotsajbaná sempre jtsejuabnayana nÿe Cristo nÿetsca soyënguiñe jtseeservénama. ⁴ Atše chama sëntsauatja, er ndánaca jashjanguana y Jesusbiana tojtsabuayiná, mo cha inÿe entšá cuaftsemncá, ndoñe ntšamo bënga Jesusbiana fsëndabuayinacá, y tojtsama tšëngaftanga chašmobená canye espíritu jtsebomnana, pero ndoñe ntšamo chë Bëngbe Bëtsá tojama tšëngaftangbe ainaniñe cháuamashënguama espiritcá, chë Uámana Espiritu, tšëngaftanga tšabá cha jtsëuántana. Y atše sëntsauatja, tšëngaftangbe ainaniñe inÿe buayenana chašmóyëngacñama ndánaca tojtsamama, ndoñe cachcá chë tšabe noticiënga ntšamo ya bëngbentšana šmonjouencá, y chora tšëngaftanga chábioye becá tšabá jtsëuántana. ⁵ Pero atše sëntsejuabná tondayiñe más batsá uamaná tsmëna ca, chë Jesucristbe puerte uámana ichmónënga imomna ca juabnayëngbiana. ⁶ Atše ndoñe sënjuatsjinÿe ntšamo corente tšabá entšángaftaca jóyebuambayama; pero atše puerte tšabá sëndëtatšëmbo ntšamo stsichámuama. Bënga puerte tšabá nÿetsca soyënguiñe tšëngaftanga tcbonjanÿanÿé, ndegombre chca osertánana ftsbomnana.

⁷ ¿O atše ndoñe tšabá sënjama, tšabe noticiënga cbonjanabuayiná ora, tšëngaftangbentšana atšbiana tondaye ntjotjañcá, nduamanacá jenóbemëse; chca, tšëngaftanga puerte uámanënga chašmotsemnana Bëngbe Bëtsá chaomama? ⁸ Mo ínÿenache ošbuachiyëngcá enefjuanënga crocénana cuafjabaquëcá, crocénana sënjanóyëngacñe chë ošbuachiyëngbentšana, tšëngaftanga jujabuáchama jobenayama. ⁹ Y tšëngaftangaftaca sënjamna ora y ndayánaca šojanájaboto ora, atše ndoñe checbátantjañe atšbe opresidama, chca, tšëngaftangbiana totcá ndoñe chaondëtsemnana; er chë Jesucristbeyeca catšátanga Macedoniocana tmonjánashjainënga, šmonjanatšetá ntšamo šojanbuashbencá. Chca, atše sënjanma, atšbe causa tšëngaftangbiana totcá ndoñe chaondëtsemnana; y sempre chca chántsama. ¹⁰ Serto, Cristbe ndegombre soyënga atšbe ainaniñe sëntsebomna; chíyeca, atše corente sëntsetatšëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga stsabuayiná ora; y chca chanjama atšbe opresidama chašmoyema ínÿenga ntsamncá. ¹¹ ¿Y ndáyeca chca stsama? ¿Yojtsemna ndoñe cbondábabuanÿeshana causa? Ndoñe. Bëngbe Bëtsá endëtatšëmbo tša cbondábabuanÿeshanama.

¹² Pero atše sempre chántsama ntšamo sëndamcá, chca, chë ínÿenga, chë Jesucristbe puerte uámana ichmónënga imomna ca juabnayënga ndoñe chamondëtse bomna ndáyeca jatenábotamnyama, ntšamo bënga fstsamcá chënga imojtsetrabája ca. ¹³ Er chënga ndoñe quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondama entsanga chaotsinÿanama chënga mo Jesucristbe ndegombre ichmónënga cuaftsemncá. ¹⁴ Y chama ndoñe šmatjenjnaná, er cach Satanásnaca endbëtsama mo canÿe buashinÿinÿana angelcá jtsinÿinama; ¹⁵ chíyeca, ndoñe muatjenjnaná, chabe oservenëngnaca tmojtsamama mo tšabe entsangcá jtsinÿinama. Pero chënga mochanjopochóca, ntšamo tmojtsomerecencá, ndayá tmojamama.

Ntšamo Pablo tojansufrí, Cristbe ichmoná bétsemna causa

¹⁶ Cachiñe cbochtëtéyana: ndocná chaondëtsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átsnaca jtsenábotamnyama jobenayama. ¹⁷ Chca jayanëse, ndoñe quenátsmëna ntšamo Bëngbe Utabná endbëtsamcá, ndayá canÿe opá inetsamcá; atše tšabá jtsetatsëmbëse ndegombre stse bomna ndáyeca jobenayama jtsenábotamnyana. ¹⁸ Banga mondmëna, cachënga jtsenábotamnyana ndayá quem luarentše chënga tmojamama, as átsnaca chantsenábotamnaye. ¹⁹ Tšëngaftanga chë tša osertánënga, oyejuayënga opëngbioye jtsëuántánana. ²⁰ Atše sëndëtatšëmbo tšëngaftanga chë opëngbioye šmnettsëuántánama, er tšëngaftanga šmond bëttsëuántana chë nÿets tempo tšëngaftanga mo chëngbe oservenëngcá tcmojtsamëndayënga, o chë tšëngaftanga bëtscá tcmojtsabacanga, o tcmojtsaíngñanga, o chë uámanënga tmojtsenobiamnanga tšëngaftanga mo nduamanëngcá jtsamëndayama, o chë tcmojtsajuebiantšetayënga.

²¹ Atše chca sentsichamo masque sentsëuatja chca jayanama. Bënga fsënjamna corente obenana ndbomnënga, ntšamo tšëngaftanga bëngbiamna šmojayancá, tšëngaftangaftaca chca jamama.

Inÿenga, chë tšëngaftangbeñe imotrabájanga, ndayama jtsenábotamnyama tmojtse bomnëse, puerte uámana ichmónënga imomna ca jtsichámëse, átsnaca añemo sëntse bomna chama jtsenábotamnyama; chca stjayana ora, mo canÿe opá tojtsoyebuambnacá sëntsoyebuambná. ²² Chënga jtsenábotamnyana hebreunga imomnama. Atšnaca hebreo sëndmëna. Chënga jtsenábotamnyana Israeloquënga imomnama. Atšnaca Israelocá sëndmëna. Chënga jtsenábotamnyana Abrahámbentsana entsanga imomnama. Atšnaca Abrahámbentsana entšá sëndmëna. ²³ Chënga jtsichámuana Cristo imoservenena ca. Atše chëngbiamna cabá más tšabe oservená sëndmëna. Chca stjayana ora, mo canÿe opá tojtsoyebuambnacá sëntsoyebuambná. Atše chëngbiamna más tijatrabájá, más šmojutame, más šmojatsetšená y ba soye atšbiamna resjo endmëna jóbanama. ²⁴ Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá. ²⁵ Unga soye niñëbéngaca šmonjanëtsjanganja, y ndëtsbéngaca canÿe šmonjanatëchënganja. Unga soye chë atše sënjánenjaquena barco tontsanenatjëmba, y chca ora, canÿe šonjanotocá, chë mar bëjayoca tsachocana bënoca canÿe ibeta jëftsebobínÿnana y canÿe te jëftsejétanana. ²⁶ Atše beca sënjánana, y chca atšbiamna resjo enjamna bëtts fshajayënguifë

y uacucuatšënga chašmuebiatbëbama; resjo cach atšbe entšangbentše, judiënga y ndoñe judiëngbentše; resjo bëts pueblënguentše, entšanga ndoyenentše y mar bëjayoca. Atšbiámnaca resjo enjamna chë Jesucristbeyeca atšbiamca catšátanga imomna ca jtsichámuana, pero ndegombre chca ndoñe mondmënéngbeñe. ²⁷ Atše bëtsca tijatrabajá empás uamëntšnaya joquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebmncá; tijasufri sësname y tondaye entšayama.

²⁸ Quem soyëngama y inye ndoñe chiyátayana soyëngama más, atše cada te natjëmbana ainánaca ndoñe queschtatsmëna, er ndoñe quetsátstatsëmbo ntšamo nyetsca ošbuachiyëngcá enefjuanënga imojtsiyenana. ²⁹ Ndánaca tšabe soye jamama tondaye añemo tontsebmna ora, atše chabiamca šochandbóngmia, mo átšnaca cach tondaye añémoca cuabndëtsemncá. Nderado inyënga tmojama ndánaca bacna soyiñe chaótsatšama, atše ndegombre puerte ngmënacá chandbëtseufrina. ³⁰ Nderado nya tojátisya atše ndayama jatenábotamnayama, as chë atše tondaye obenana ndbomná tsmënama inyanynaye soyëngama chtsenábotamnaye. ³¹ Bëngbe Bëtsá y Bëngbe Utabná Jesucristbeyeca Taitá, ndábioye nyetscanga nyetsca tescama jtsatschuanayama entsamna, cha endëtatsëmbo atše ndegombre stsichámuana chë sëntsoyebuambná soyënguiñe. ³² Atše Damasco bëts puebloca sënjamna ora, chë rey Aretasbe uabuáyana mandado tojanmandá chë puebloye amashjuaniñe soldadënga chamotsebojanýama, atše chašmishachama chëjana stsebocana ora; ³³ pero básefta enutënga, canye sbarëcuiñe šmontsanëštjango chë pueblentsa shëconana tapiëšiñe canye atëfjnëjana, y chca atše sënjanobená chëngbe cucuatšentsana jótšbocana.

12

Ndayá Pablo mo otjenayoquëcá tojáninye y ndayá Satanás tojanma, Pablo chaosufrima

¹ Atše šontsemna más jtsenábotamnayana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquëcá sënjinýe Bëngbe Bëtsabe soyëngama y Bëngbe Utabná šojinýinýe soyëngama. ² Atše canye entšá sënduábutma, cha Crístoftaca cánýiñe mo canýacá endmëna y nda bnëtsana canta uata entsemna, Bëngbe Bëtsá tbojanánatse, chë celoca más tšbanánoye, Bëngbe Bëtsá yomnoye. Atše ndoñe quetsátstatsëmbo Bëngbe Bëtsá cha tbojanánatse chabe cuérpoca o nye chabe espiritiñe. ¡Nye Bëngbe Bëtsá chama yotátšëmbo! ³⁻⁴ Atše sëndëtatsëmbo Bëngbe Bëtsá chë entšábioye celoye tbojanánatsama, nyetscanga oyejuayënga imomnoye (atše ndoñe quetsátstatsëmbo Bëngbe Bëtsá tbojanánatse chabe cuérpoca o nye chabe espiritiñe; nye Bëngbe Bëtsá chama yotátšëmbo), y chentše cha tojanuena palabrenga, ndocná bontsemna jayanama palabrenga, chë ndayama entšangbiamca ndoñe yontselesenciana jatichámuana. ⁵ Atše chë entšá sëndmëna. Canye entšá ndáftaca chca tojopasabiamca, tšabá nántsemna chama jtsenábotamnayana; pero cach atšbiamca jtsenábotamnayana ndoñe tšabá ntsemnana, ndayá nye chë atše mo obenana ndbomnacá tsmënama inyanynaye soyëngama chantsenábotamnaye. ⁶ Y nderado jtsenábotamnayama atše tseboše, chca ora atše ndoñe stsama mo canye opá tojsoyebuambnacá, er ntšamo ndegombre yomncá atše stschamo. Pero chca ndoñe quetsátama,

chca, ndocná chaondětsejuabná ntšamo atšbiana tbojtsinŷanama o ntšamo atšbiana cha toujenama atše más tsmēna ca. ⁷ Chíyeca, tša uamaná tsjamna ca atše ntjátsjuabnayama, atše chē Bēngbe Bētsá tša bēts soyēnga tbojaninŷinŷé entšá bētsemnayeca, Bēngbe Bētsá tojanma atše chaitsebomna ndáyeca puerte chaisufrima, mo canŷe bēts uchmašēfja atšbe cuerpiñe tojtsashacuaná, mo Satanasbe ichmona soycá, atše chaisufrima chaomama. ⁸ Unga soye Bēngbe Utabná sēnjaimpadá chca sufrínana chašotsebojuánama; ⁹ pero Bēngbe Utabná šonjauyana: “Nŷe atšbe bonshánana endmēna lempe ntšamo cmojt-sajabotcá; nŷetscanga atšbe obenana más tšabá jinŷana, chē obenana ndbomna entšángbeñe atšbe obenana stjínŷanŷiye ora ca.” Chcasna, atše puerte oyejuayá chanjóyebuambaye chē atše mo obenana ndbomnacá tsmēnama inŷinŷnaye soyēngama, Cristbe obenana átsbeñe sempre chaotsomñama. ¹⁰ Chíyeca, Cristo jaserviama, oyejuayá chandbētsemna atše mo obenana ndbomnacá stsemna ora, inŷenga šmojtsoyenguá ora, puerte padecena soyēnga causa ndayá jamama ndoñe sēntsetatšēmo ora, atše puerte chaisufrima inŷenga tmojtsama ora y puerte tšētšena ainánaca stsemna ora; er chca soyēnguiñe stsemna ora, mo canŷa obenana ndbomnacá, chora Bēngbe Bētsá jamana atše ainaniñe bēts añemo chaitsebomnama.

Nderado ndayá Corintoca ošbuáchiyēnga muanjamama Pablo yojánauatja

¹¹ Atše chca chē soyēngama sēntsenabotamná ora sēnjoyebuambá mo canŷe opá tojtsoyebuambnacá, pero ndegombre tšēngaftanga šmonjama atše chca chaimama. Er tšēngaftanga šmondmēna ndēmuanŷenga yojtsamna atšbiana puerte tšabá jtsichámuana, atše chca jtsenábotamnayama ndoñe chašondětsemnama. Ndegombre, atše tondayiñe más batšá uamaná quetsátsmēna, chē Jesucristbe puerte uámana ichmónēnga imomna ca juabnayēngbiama, masque atše šontsebiona mo atše tondaye cuaftsamancá. ¹² Canŷa Jesucristbe ndegombre ichmoná bētsemnama inŷinŷnaye soyēnga, tšēngaftangbeñe tonjanopasá atše choca sēnjamna ora. Chca, chē Bēngbe Bētsabe obenana inŷinŷnaye soyēnga y chē tšabe soyēnga ntšamo chora tonjanopasacá, puerte tšabá jtsinŷanŷnayana atše canŷe ndegombre ichmoná tsmēnama; y atše chca sēnjamna, padecena soyēnguiñe puerte uantado jtsemñese. ¹³ ¿Ndayá tšēngaftanga ndoñe cachcá šmonjanóyēngacñe chē inŷe luarenache ošbuachiyēngcá enefjuanēngbiama? Canŷe soye aiñe, er tšēngaftangbioye tondaye ntjotjañcá, atše ndoñe chiyatslesenciá tšēngaftanga atšbe opresidama chašmuájabuachama, ntšamo inŷe ošbuáchiyēnga aiñe sēnjalesenciá. Smochtseperdóna chca bacna soye tšēngaftangbiama tijamama.

¹⁴ Atše ya sēntseprontana, móracna unga soyama jama tšēngaftanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátsboše chē tšēngaftanga šmobomna soye jatsbomnana, ndayá puerte sēntseboše tšēngaftanga Cristo sempre chašmotseservénama. Atše chca jamama sēntseboše, er atše tšēngaftangbiama mo canŷe taitacá, Cristbeñe šmontsanošbuachéyeca, atše chabiana tcbonjanabuayená ora; sēntsejuabná chē taitanga inétsamna crocénana jájuabana básenga jtsanŷenama, y ndoñe básenga chē taitangbiama. ¹⁵ Y atše corente oyejuayá lempe ntšamo tsbomncá

chanjátšataye, y atše jopochócantscuanēnaca, tšēngaftangbe tšabiama. Atše cada te más cbojtsababuánŷeshanēse, ¿tšēngaftanga más batšá atše šmochtsebobonshana?

¹⁶ Ndoñe; tšēngaftanga tšabá šmondētatsēmbo, atše uajabotá sēnjamna ora, atše tondaye tbonjanótjañama. Masque chca, báseftanga imojtsichamo ntšamo ínŷenga ndayíñnaca jáingñama atše tstátšēmbo ca, chēngbentšana crocénana josháchiñama; y atše catijama, ínŷenga jáingñase, nŷe ntšamo atše tsbošcá chamotsamama ca. ¹⁷ ¿O nderado atše tbojaingnē, canŷa chē tšēngaftangbioye sēnjichamó chentšáftaca? ¹⁸ Tito sēnjanimpadá tšēngaftanga jáñŷama chaotsama, y cháftaca sēnjanichmó chē inŷa bēngcá Crístbeyeca bēngbe catsata. ¿Nderado Tito tcmojaingñé? ¿Ndoñe ndegombre yondmēna, Tito y atše cachcá fstsjuabná y fstsboše y cachca soyēnga jtsamēse ftsiyena? Ndegombre chca endmēna.

¹⁹ Nderado tšēngaftanga šmojatsjuabná bēnga jenēuyanama chca cbojtsētsētná ca; pero ndoñe chca quenátsmēna. Inŷetsá, bēnga Crísoftaca cánŷiñe mo canŷacá entsangcá, Bēngbe Bētsabe delante fsēntsoyebuambná, y lempe ntšamo tijayancá, Jesucrístbeyeca atše bonshana catsátanga, tšēngaftangbe tšabiama tijayana, Crístbeñe corente chašmotsošbuáchema y ainaniñe bēts añemo chašmotsebonnama. ²⁰ Er atše sēntsauatja, atše jáñŷama chajjá ora, ndoñe chacbondánŷena ntšamo tsbošcá, y tšēngaftanga atše ndoñe chašmondínŷena ntšamo šmojtsebošcá. Sēntsauatja nderado bacna soyēnga šmattsama: jtsenpenzentserana, ínŷengaftaca yapa jtsenántšabošana, ndayánaca rábiaca jtsamana, nŷe tšēngaftangbiama tšabe soyēnga jtsebonnama jtsebošana, ínŷengbiama podesca ichámuana, uayátsenayēnga jtsemnana, ínŷengbiama cachēnga más uámanēnga jtsenobiamnayana, y nŷetscanga ndoñe cachcá ntsejuabnayana. Chca chacbojánŷenēse, tšēngaftanga ndoñe quešmochátsbošana jóyēngacñana ntšamo tšēngaftanga jucacánama atše šochtsemncá. ²¹ Atše sēntsauatja, cachiñe jáñŷama chajjá ora, atše Bētsá chaoma atše chaitšēuatja chca šmojtsamama, y chašotsemna puerte ngmēnaca jošachnama ba tšēngaftangbiama, ndēmuanŷenga ya bayte bacna soyēnga imojtsama y chca juabnayana ndoñe tmonjatrocá, y ndoñe tmonjajbaná chē bacna soyēnga boyabása o shembásaftaca jtsamama juabnayana, y chca soyēnga jtsamana y nŷetsca bacna soyēnga jtsamana, jenomándama ntšobencá.

13

Inŷe soyēngama jábuayenama y jádiošoftama

¹ Móraca ya unga soyama tšēngaftanga jáñŷama chanjá. Atše chajjáshjango ora, tojtseytēse chanjayana ntšamo báseftanga tmojamcá tšabá o ndoñe tšabá bētsemnana. Nda bacna soye ntšamo Moisesbe leyíñe endēmandancá tojama ora, atše chanjayana cha ndoñe tšabá tonjama ca; pero útata o únganga tmojtsemnēse, chēnga chamuayanama cha ndegombre chca tojamama. ² Atše tempo sēnjanabuayená, chē tšēngaftanguentšēnga bacna soye tmojánamēnga y chē ínŷenga, atše šojtsanmēna jácastigana, chca soyēnga amana ndoñe tmonjájbananga. Mora, tšēngaftangbentšana bēnoca sēntsemna ora, cachiñe cachcá cbētētabuayená, ntšamo sēnjanamcá chē tšēngaftangaftaca uta soyama sēnjamna ora: atše cachiñe jáñŷama chajjase, ndoñe quichatslesencia bacna soyēnga chašmotsamama y chama ntjacastigacá jatabáshejuanana.

³ Atše chca chanjama, er tšëngaftanga šmontsenguá ndayánaca tšabá chacminyanyëma Cristo atšbiajana yoyebuambnama. Cristo ndoñe quenátsmëna mo canya obenana ndbomnacá, ntšamo tšëngaftangaftaca cha tojamama; ndayá chabe bëts obenana tšëngaftangbeñe bëtscá jtsinyanyayana. ⁴Er cha tmojanrucificá mo canya obenana ndbomnacá; pero mora, Bëngbe Bëtsá puerte obená betsómñeyeca, cha tojtayena. Cachcá bëngnaca, cháftaca cányiñe mo canyacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená betsómñeyeca, tšëngaftanga jtsaservënana.

⁵ Tšëngaftanga cada ona šmochjshénojuaboje, tšabá jtsetatšëmbuama mocna entšanga bëtsemnana, jtsetatšëmbuama aiñe o ndoñe sempre Cristbeñe puerte tašmuetsosbuáchema. Smochjshénojuaboje chca šmošbuáchema ntšamo šmojtsemnana y tšabá inyënga šmochjinyanyie. ¿Ndoñe šmondëtatšëmbo Jesucristo tšëngaftangbe ainaniñe yoyenama? Ndoñesna, tšëngaftanga ndegombre ndoñe Crístbeñe ošbuáchiyënga šmontsemna. ⁶ Pero atše sentsobátmana tšëngaftanga ndegombre chašmotsejuabnama bënga Jesucristbe ndegombre ichmónënga ftsmënana. ⁷ Y Bëngbe Bëtsá fsëntseimpadana bacna soye ndoñe chašmondëtsamama, ndoñe chë Jesucristbe ndegombre ichmónënga ftsmënana tšëngaftanga jinyan'yiyama, ndayá ntšamo tšabá yomncá chašmotsamama. Nyëtscanga chca tmojtsamëse, nántsinyna mo Cristbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinyan'yiyana ntšamo bënga bëngbe mándoca ftsmënana mo ichmonëngcá, tšëngaftanga jábuayenama. Pero chë soye tondayana šattsentšamna, ⁸ er bënga queftsátobena tondaye jamana Bëngbe Bëtsabe ndegombre soyëngama contra; nyë ntšamo chabe ndegombre soyënga yomncá aiñe. ⁹ Bënga fsëntseboše ntšamo tšabá yomncá tšëngaftanga chašmotsamama, er bënga oyejuayënga fchandbëtsemna, bënga mo chë obenana ndbomnëngcá fstsemna ora, bëngbe mando jácastigama ntjatinyan'yaycá, y tšëngaftanga ainaniñe bëts añémoca šmojtsemna ora y puerte tšabá šmojtsemnanda ora. Bënga Bëngbe Bëtsá fchandbëtseimpadana, chca bacna soyënga amana jtsajbanase, chašmobená jtsemnana nyëtsca soyënguiñe tšábenga, y lempe ntšamo tšëngaftanga chašmotsemnana Bëngbe Bëtsá yobošcá. ¹⁰ Quem tsbuanácha cbontsëbuabiamná tšëngaftangaftaca cabá ndoñe sëntsemna ora; chca, atše choye chaijá ora ndoñe chašondëtsemna jabuache jucácanana, mo canya puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebomnana, y ndoñe tšëngaftanga jatapochócama.

¹¹ Morna, Jesucristbeyeca atšbe catsátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Smochjouena ntšamo tchonjabuayenacá, nyëtscanga cachcá šmochtsejuabnaye, nyëtscángaftaca natjëmbana šmochtsiyena, y Bëngbe Bëtsá, chë cmondababuan'yeshaná y tšëngaftangbe ainaniñe tšabe ebionana chašmotsebomnana endamá, tšëngaftangaftaca echántsemna. ¹² Nyëtscanga šmochjenchuaye mo Jesucristbeyeca catsatangcá, jtenámochëse, ntšamo cach tšëngaftangbe pamállanga puerte bonshanánaca šmondbsacheuanaycá. ¹³ Nyëtsca quem luaroca ošbuáchiyënga cmonsacheuaná.

¹⁴ Atše, Běngbe Bětsá sěntseimpadana, Běngbe Utabná Jesucristo chaoma, n̄jetsca tšěngaftangbeñe tšabe bendicioněnga chaotsemnama. Běngbe Bětsabe bonshánana sempre chašmotsóbomñe, y Uámána Espírítu sempre chašmotsóbomñe, y chě Uámána Espíritoftaca cán̄yĩñe mo can̄yáca chašmotsomñe.

Gálatas

Pablo Galacia luaroca ošbuáchiyënga jacheuayama

¹⁻² Atše Pablo, quem tsbuanácha sentsabiamná Jesucristbeñe ošbuáchiyëngbiama, chë Galacia luaroca ošbuachiyëngcá ene-fjuanëngbiama. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë inýenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. ³ Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebonnama. ⁴ Cristo chabe derecho vida jtšobomñama cachcá tojanonýa y tojanóbana, bëngbe bacna soyënguentsana játsebacama, y bënga chamotsobena jtšiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá. ⁵ Nýetscanga nýetsca tescama Bëngbe Bëtsá chamotsatschuaná. Chca chaotsemna.

Nýe canýe ndegombre buayenana soyënga Cristbiamna endmëna

⁶ Atšbe ainanoca inýetsá šontsebiona, er nda nanjouena, tšëngaftanga nýe baseftayshinýe y ya juabna šmojatstrocá y Bëngbe Bëtsá stëtsoye šmojtsequedá, nda tšëngaftanga tcmojáchembo chabe entšanga chašmotsebonnama. Cha chca tojanma Cristbeyeca, er mua puerte tšabia tšëngaftangtaftaca enjamna. Tšëngaftanga Bëngbe Bëtsá stëtsoye šmojtsequedá, inýengbe buayenana soye jouenama, y chë inýenga jtšichámuana chë buayenana soyënga chë tšabe noticiënga canmëna ca. ⁷ Ndegombre, ndoñe quenátsmëna inýe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiamna tšabe noticiënguentsë, ba ndegombre soyënga jtsejuánama, inýe soyënga jacjayama. ⁸ Nderado bënga o canýe celoca ángel soyënga cmojtsabuayinýá, y ndoñe tontsemna mo chë tšabe noticiënga bënga tempo tbonjanabuayenacá, as chë chca tojtsamabiamna jBëngbe Bëtsá chaoma infiernoca becá chaosufrima! ⁹ Tempo ya chca sënjánayana; mora cachiñe šcutëtayana: Nderado nda soyënga cmojtsabuayinýá, y ndoñe tontsemna mo chë tšabe noticiënga, ntšamo tempo šmonjanoyëngacñëcá, jBëngbe Bëtsá chabiamna chaoma infiernoca puerte chaosufrima!

¹⁰ Atše chca stjayana ora, ¿tšëngaftanga cmojtsinýana atše soyënga stsama entšanga oyejuayënga átšeftaca chamotsebonnama? Ndoñe chca quenátsmëna. Atše sëndboše ndayá Bëngbe Bëtsá átšeftaca oyejuayá chaotsebonnama. Entšanga oyejuayënga chamotsebonnama, atše cabá soyënga stsamëse, atše ya ndoñe Cristbe canýe oservená stsemna.

Ntšamo Běngbe Bětsá Páblěbioye tbojanchembo, Jesucristbe ichmoná jtsemnama

¹¹ Atše sěntseboše tšěngaftanga, Jesucristbeyeca atšbe catsátanga, chašmotsetátšěmbo chě tšabe noticiěnga ntšamo sěndabuayiynacá quem luarentša entsangbe juabnentsana ndoñe yondóbocanama. ¹² Ndocna entsá chě tšabe noticiěnga chešnatanbuayená, ni chešnatanbuatěmbá, ndayá cach Jesucristo šonjaninýinýé.

¹³ Tšěngaftanga šmojátatšěmbona ntšamo atše tempo tsjanamana jtsiyenana, ntšamo judiěnga Běngbe Bětsá mondadorancá atše cha sěnjanadorana ora, ntšamo atše becá tsjánamama chě ošbuachiyěngcá enefjuaněnga puerte chamosufrima, y ntšamo atše becá tsjánamama ndocná Jesucristbeñe chaondětsošbuáchema. ¹⁴ Atše inýe judiěnga cach atšcá uata bomněngbiana más sěnjánama Běngbe Bětsá adórayiñe, ntšamo judiěnga cha jadórana monduamancá, y atše nýets añémoca tša sěnjantšena jtsamama ntšamo běngbe běts taitanga básenga jabuátambama monjanamancá. ¹⁵ Pero Běngbe Bětsá atšbe tšabiama yojanjuabná, y chíyeca, atše cabá ndonýna ora, canýe běts soyama cha šojanbocacá. ¹⁶ Y cha tojánbošena ora, šonjaninýinýé ntšamo ndegombre chabe Uaquiñá yomnana, y šonjanchembo. Cha chca tojanma, atše chě tšabe noticiěnga ndoñe judiěngbeñe chayábuayenama. Y atše ndocnábioye chiyataná ndayá jamama šojtsanměnama chašobuayenama; ¹⁷ y Jerusalenoye cach ndoñe chiyataná chě atšbiana más natsana Jesucristbe ichmóněnga imojamněngaftaca jencuéntama. Chamna, cachora Arabia uabaina luaroye sěntsanoñe, y chentšana Damasco běts puebloye sěntaná.

¹⁸ Jesucristbeñe jtsošbuáchiyama sěnjanóntša orscana, unga uatěse Jerusalenoye sěnjána Pédroftaca jencuéntama, y cháftaca nýe uta semana sěnjěftsemna. ¹⁹ Y ndocna chě Jesucristbe inýe ichmóněnga chiyáisananye; nýe Santiago aíñe, Běngbe Utabnabe catsata. ²⁰ Běngbe Bětsá šontsonýá, ntšamo tšěngaftanga cbontsětsětsnacá ndegombre bětsemnama.

²¹ Jerusalenocana sěnjěftsanbocnentsana, Siria y Cilicia luarěngoye sěnjána. ²² Pero chě tempo, chě Jesucristbeñe ošbuáchiyěnga Judea luaríñe bomínýyeca ndoñe quešměnjatanábuatma. ²³ Nýe ínýengbioye imojtsayauana: “Nda tempo běnga puerte chamotsesufrínama enjanamá, mora entsanga entsabuayiyná, Jesucristbeñe jtsošbuáchiyama caojtsamna ca. Y tempo cha tša enjánboše jamama entsanga Jesucristbeñe ndoñe chamondětsošbuáchema ca” —chěnga imojtsichamo. ²⁴ Y entsanga Běngbe Bětsá imojtsatschuanaye, ndayá cha atšbiajana tojanmama.

2

Chě inýe ichmóněnga tmojánayana Pablo aíñe tšabá yojsama ca

¹ Jerusalenoye sěnjána orscana bnětsana canta uatěse, cachiñe choye sěnjesaná. Bernabé šonjantjěmbambá, y Tito běndátaftaca fsěnjěftsanbetše. ² Choye sěnjána, choye jama šojamnama Běngbe Bětsá šonjaninýanýeyeca. Atše nýe chě Jesucristbeñe ošbuáchiyěngbiana uámaněnga imojamněngaftaca sěnjanencuentá, ínýengaftaca ndoñe; y chě tšabe noticiěngama chě ndoñe judiěngbeñe sěndabuayiynama chěnga sěnjanacuntá. Chca sěnjanma atše jtsetatšěmbuama, ntšamo tijanma y sěnjěftsamcá ndoñe nýe bonamente yonjamnama. ³ Pero chěnga tmonjánayana atše aíñe tšabá tijanma ca, y Tito, chě átšeftaca enjamná,

masque Grecia luarocá enjamna, chënga ndoñe chematanmandá base bobachtema chë más delicadentse tëtšená chaotsemnama, ntšamo judiënga monduamancá, Bëngbe Bëtsábenga imomnama chaotsinýnama. ⁴ Chca tonjanopasá, masque ínýenga monjánboše Tito base bobachtema chë más delicadentse tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá yojtsanopasánama chë ošbuáchiyënga ntsetatšëmbcá, mo chë ošbuáchiyëngbiama bacna soyënga jamama cuafseitëmena cuenta. Chënga tmojánabo jtsetatšëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánýiñe mo canýacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nýets tempo mandánënga chamotsiyenama. ⁵ Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tšëngaftanga nýets tempo Jesucristbe ndegombre tšabe noticiënga chašmotsóbomñama.

⁶ Pero chë ndëmuanyëngbiama entšanga monjánichamo chë uánatsanënga imojamna ca (ndayá chënga tempo imojamna atšbiamama ndoñe quenatámana; Bëngbe Bëtsabiamama nýetscanga cachcá monduámana), chëngna tondaye chešmatanbuayená, ntšamo tempo tijanmama ínýtšá chaimama. ⁷ Maska, chënga tmonjántatšëmbona, Bëngbe Bëtsá chë tšabe noticiënga ndoñe judiënga jábuayenama trabajo atše jamama šojanëntšabuáchemama, ntšamo judiënga jábuayenama cachcá Pédrëbioye tbojanëntšabuachecá. ⁸ Er Bëngbe Bëtsá atše chabe ichmoná šonjábema, ndoñe judiënga chabiamama jábuayenama, ntšamo cachá Pédrëbioye chabe ichmoná tbojanbëmcá, judiënga chabiamama jábuayenama.

⁹ Santiago, Pedro y Juan, chë ošbuachiyënguentšá uánatsanënga, atše canýe bëts trabajo chaitsebomnana Bëngbe Bëtsá tojanmama tmonjántatšëmbona ora, cucuatše šontanatšataye atše y Bernabëbioye, jinýinýiyama chënga šojanëbuajama mo cachëngbe trabajo amatcá. Y fsënjanenoyeuná bëndata jama, maska ndoñe judiënga jtsabuayiyayama trabajo jamama, y chëngna judiëngbeñe. ¹⁰ Chënga nýe šonjanaimpádaye chë ošbuáchiyënga ndbomñëjmënga Jerusaleñoquëngbiama jtsenójuabnayama; y atše bëtscá séntsama chënga jujabuáchama.

Pablo Antioquioca Pédrëbiamama tojánayana cha ndoñe tšabá tojanma ca

¹¹ Pero Pedro Antioquía bëts puebloye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmëna. ¹² Mëntšá tonjanopasá: Santiago básefta entšanga Antioquiocyte tojanichmó, pero chënga cabá choca ndáshajna ora, Pedro yojanamama chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentse tëtšenënga jtsemnama yojánamna ca tmojánayanënga, chabiamama muanjájuaboyama yojsauatja causa. ¹³ Chë ínýe judiënga ošbuachiyëngnaca tmojanontšë amana cachcá ntšamo Pedro yojsamcá, jtsamëse ntšamo chënga imojántatšëmbo chca jamama ndoñe yonjanamncá. Y Bernabënaca, ntšamo chënga imojtsamcá jtsonýayëse, chëngcá yojsama, jtsamëse

ntšamo cha yojántatsëmbo chca jamama ndoñe ibonjamncá. ¹⁴ Chënga ndoñe queménjataniyena jtsamëse ntšamo yojanamncá, ntšamo chë Jesucristbe tsabe noticiënguentša ndegombre soyënga endmëncá. Chca sënjaninÿe ora, Pédrëbioye nÿetsca ošbuáchiyëngbe delante sënjanianana: “Aca canÿe judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuáchiyënga mo chë judiëngcá chamotsiyenama ca?”

Bëngbe Bëtsá judiënga y ndoñe judiënga játsebacana, Jesucristbeñe tmojtsošbuáchema

¹⁵ Bënga judiënga fsëndmëna, bëngbe bëtsëtsanga judiënga monjámnayeca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsátmëna. ¹⁶ Y bënga mondëtatšëmbo, canÿe entšá Jesucristbeñe tojtsošbuáchema, Bëngbe Bëtsá jamana cha chabe bominiÿiñe tsabia chaotsemnana, y Bëngbe Bëtsá ndoñe chca ntjamana, ntšamo chë judiëngbe leyënguiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominiÿiñe tsábënga chamotsemnana, pero ndoñe ntšamo chë judiëngbe leyënguiñe jamama yomna ca iuayancá bënga tmojamama. Er Bëngbe Bëtsá ndocna ora ntjamana canÿe entšá chabe bominiÿiñe tsabia chaotsemnana, ntšamo chë judiëngbe leyënguiñe iuayancá jamama ibomna ca cha tojamama.

¹⁷ Pero, bënga bëtscá mondënguá, Bëngbe Bëtsá chaomama bënga chabe bominiÿiñe tsábënga chamotsemnana, bënga Crísoftaca cánÿiñe mo canÿacá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnana. Pero inÿe entšanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe! ¹⁸ Atse, ntšamo Bëngbe Bëtsá šojaninÿinÿecá, chë šojtsemna jábanama soyënga, cachiñe jajuaboyama y jamama stëtontsese, mo chë Moisesbe ley jtsocumplínana perdonánënga jtsemnana, atse stsemna mo nda ndayá cachá tojtsembema y cachiñe tojtëtsjebuanacá; y ndegombre, atse stsemna canÿa ntšamo ndoñe tsábá yondmëncá amá. ¹⁹ Chë judiëngbe leyëngaca atse sëndëtatšëmbo, ntšamo chë leyënguiñe iuayancá tsamëse, Bëngbe Bëtsá ndoñe yochanjama atse chabe bominiÿiñe tsabia chaitsemnana; y chca, atse jtsemnana mo obanacá chë castígoca, er chë leyentša mandënga tsamëse, ndoñe quetsátobena atsbo-caná jtsemnana. Chë léyeca ndoñe más mandaná ntsemnana jtsebošëse, atse cachcá chë ley sënjanonÿá, Jesucristbeñe jtsošbuáchiyama; y chca, atse chaitsobena jtseyenana Bëngbe Bëtsá jtsestservëse. Atse Crísoftaca cánÿiñe mo canÿacá sëndmënayeca, Cristo cruciñe tojanóbana ora enjamna mo átšnaca cuafjobancá; ²⁰ y mora entsemna mo nÿe atse ya ndoñe cuafitsiyencá, Cristo becá vida atšbe ainaniñe entsebómnyeca. Y ntšamo mora atse vida sëntsebomncá, entsemna atse chë Bëngbe Bëtsabe Uaquiñábeñe betsošbuáchiyama, nda šojánbobonshana, y chabe derecho vida jtsobomñama cachcá tojanonÿá y atšbe tsábiana tojanóbana. ²¹ Atse ndoñe quetsatábotena ntšamo Bëngbe Bëtsá ntšangbe tsábiana juabna yobomncá. Nderado Bëngbe Bëtsá tojama canÿe entšá chabe bominiÿiñe

tšabia chaotsemnama, ntšamo chë leyiñe jamama yomna ca iuayancá cha tojtsamama, as Cristo nÿe tondayama matënjanóbana.

3

Ley jtsobedecénese o Jesucristbeñe jtsošbuáchiyëse

¹ ¡Tšëngaftanga Galacientša entsanga, yapa ndenójuabnayeñga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiyá, Jesucristo cruciñe tojanóbana. ² Atše sëntseboše nÿe canÿe soye atše chašmëyana: ¿Uámana Espíritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchema? ³ ¿Ndáyeca tša ndenójuabnayeñga šmomna? Bëngbe Bëtsabe Espíritbeyeca tšëngaftanga šmonjanontsé mo tsmëma entsangcá jtsemnana. ¿Y mora šmojtseboše tšëngaftangbe vidënga jachnënguama nÿe entsangbe juabnëngaca jtsiyenëse? ⁴ ¿Nÿetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. ⁵ Bëngbe Bëtsá, chë Uámana Espíritu tšëngaftangbe ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchema?

⁶ Menójuabonga ntšamo Abraham tojanpasama. Bëngbe Bëtsabe uabemana palabrënguiñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñe tšabia yojamna ca.” ⁷ Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahám bentsana entsangcá, cachcá ošbuáchiyana bëtsebomnama, chë chá bentsana ndegombre entsangbiamama más. ⁸ Bëngbe Bëtsabe uabemana palabrënguiñe endopodena jualíama, Bëngbe Bëtsá yochjanma chë ndoñe judiënga chabe bominiñe tšábenga chamotsemnama, chábeñe tmojtsošbuáchema ca. Y Bëngbe Bëtsabe uabemana palabrënguiñe, cabá chca ndëma ora, Bëngbe Bëtsá Abrahám bioye quem tšabe noticiënga tbojanbuayená: “Acbeyeca, atše chanjama nÿetsca quem luarentša entsanga tšabe bendicionënga chamotsebomnama ca.” ⁹ Bëngbe Bëtsá tojanma Abraham ba tšabe bendicionënga chaotsebomnama, cha chábeñe yojtsošbuáchema. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiamama tšabe soyënga tojanmcá.

¹⁰ Chë Bëngbe Bëtsá chabe bominiñe tšábenga yochjábiamama ca juabnayeñga, ntšamo leyiñe jamama yomna ca iuayancá lempe tmojtsobedecénama, chënga nÿets tempo jtsiyenana jtsetatšëmbëse Bëngbe Bëtsá nÿetsca tescama chënga yochjácastigayama. Er Bëngbe Bëtsabe uabemana palabrënguiñe mëntšá endayana: “Bëngbe Bëtsá jayanana nÿetsca tescama castigo chaotsebomna ca, nda nÿets tempo ndoñe tontsama nÿetsca mandënga ntšamo chë leyënguiñe iuabemancá ca.” ¹¹ Ndegombre, puerte tšabá entsinÿinÿena, Bëngbe Bëtsá ndoñe yochanjama ndocná chabe bominiñe tšabia chaotsemnama, ntšamo chë leyiñe jamama ibomna ca iuayancá tojtsobedecénese. Chca ndegombre

endmëna, er Bëngbe Bëtsabe uabemana palabrënguiñe mëntsá endayana: “Nýe ndabiana Bëngbe Bëtsá tojama chabe bominiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebmoma ca.”¹² Jtsamana ntšamo chë leyënguiñe jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrënguiñe endayancá: “Nda tojtsama nyetsca mandënga ntšamo chë leyënguiñe endayancá, tšabe vida echántsebmoma, nyets tempo chë leyëngaca mandaná ca.”

¹³ Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyiñe iuayancá ndoñe tmontsama causa. Ntšamo Bëngbe Bëtsabe uabemana palabrënguiñe endayancá: “Nyetsca tescama castigo chaotsebmoma, nda canýe niñësiñe tmojajonýa chaóbanama cha ca.”¹⁴ Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámioye tbojanšbuachenacá, ndoñe judiëngnaca chamotsebmoma, Cristo Jesúsbeyeca; y Jesucristbeñe ošbuachiyánaca, Bëngbe Bëtsá chaomama chë Uámana Espíritu bëngbe ainaniñe cháumashëngo jtsemándayama, ntšamo Bëngbe Bëtsá tojanašebuachenacá.

Ndocna ley quenátobena Bëngbe Bëtsabe šbuachenana soye jatrócama

¹⁵ Jesucristbeyeca catšátanga, chë ndayá sentsichamcá endmëna ntšamo nyets tempo entšangbeñe endbetsopasancá. Uta entšata tbojenoyeuná canýe trato jénbemama, y ntšamo tbojenšbuachenacá chaotsinýnama chatbe uabaina tsbuanáchañe tbojuábemëse, ndocná inýa más ntsobenana jayanana ntšamo tbojentratacá ndoñe yontsoservena ca; y inýe soyënga chiñe jacjayama cach ndoñe.¹⁶ Chcasna, Bëngbe Bëtsá ba soye Abrahámioye tbojanšbuachená puerte tšabe bendicionënga chabiana jamama, y chabe entšanguentšana canýabiámnaca. Y Bëngbe Bëtsabe uabemana palabrënguiñe ndoñe quenátayana: “chabe entšanguentšëngbiámnaca ca”, mo Bëngbe Bëtsá ba entšangbiama cuaftsichamcá; sinó mëntsá endayana: “acbe entšanguentšana canýabiama ca”. Y chca entsayana, nýe canýe entšá ca; y cha endmëna Cristo.¹⁷ Atše ndayá mëntsá cbontsëtsëtsná: Natsana, Bëngbe Bëtsá Abrahánoftaca canýe trato tojánbema, y tbojaniana “aiñe ca”, ntšamo tbojanšbuachenacá jamama. Chentšana canta patse y unga bnëtsana uatëse, Bëngbe Bëtsá Moisesbe cucuatšifne chë leyënga tbojanántšaboshjona; chíyeca, chë leyënga ndoñe ntsobenana jamana chë Bëngbe Bëtsá Abrahánoftaca tojánbema trato ndoñe chaondëtsošservénama, ni jamana ndayá Bëngbe Bëtsá tojanšbuachenacá ndoñe chaondëtsošservénama.¹⁸ Er ndayá Bëngbe Bëtsá chabe entšanga tojatšatacá, tojtsemna chënga ntšamo chë leyiñe jamama yomna ca iuayancá tmojtsamama, chca, chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantšana. Pero ba tšabe bendicionënga Abrahambiama jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiama tojanma.

¹⁹ Asna, ¿ndayama chë Moisesbe ley nantsoservena? Bëngbe Bëtsá chë leyënga tojanáboshjona, ba tšabe soyënga jamama Abrahámioye tbojanšbuáchenantšana baytese. Bëngbe Bëtsá yojanjuabná chë ley

chaoservé entsanga jinŷanŷiyama ndayá tšabá o ndoñe tšabá jamama bétsemnama, chë Abrahámbentsana Uámana Entśá jashjanguëntscuana, ndabiamá Bëngbe Bëtsá Abrahámbioye tbojanšbuachená ba tšabe bendicionënga jamama. Bëngbe Bëtsá angelëngaftaca chë ley Moisesbe cucuatšíñe tbojanántšaboshjona, y chë entśá Moisés enjamna chë oyebuambnayá Bëngbe Bëtsáftaca y entśángaftaca. ²⁰ Uta entśata canŷe trato jénbemamna, jtseytana inŷe entśá chë uta entśátaftaca chaóyeuambama; pero Bëngbe Bëtsá Abrahámbioye ba tšabe soyënga jamama tbojanšbuachená ora, nŷe canŷa chca tojanma, y ndoñe bonjanájaboto inŷa chabiamá Abrahánoftaca chaóyeuambama.

Ndayama chë ley yomna

²¹ ¿Chca nántsaryana, ntšamo Moisesbe leyíñe iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entśangbe cucuatšíñe canŷe ley tojanáboshjona, y chë ley tojtsobena jamana entsanga ndegombre tšabe vida chamotse-bomnama, as Bëngbe Bëtsá nanjama entsanga chabe bominiŷíñe tšábenga chamotsebnama, ntšamo chë leyíñe jamama yomna ca iuayancá tmojtsamama. ²² Pero Bëngbe Bëtsabe uabemana palabrenguifne endayana, nŷetsca quem luarentša entsanga cachëngbe bacna soyënga jamama juabnëngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchema imojtsebnomna ndayá Bëngbe Bëtsá tojanašebuachenacá.

²³ Jesucristbeñe jtsošbuáchiyama entsanga chamobenama tempo joshjanguëntscuana, bënga monjamna corente mandánënga chë léyeca, y chca enjamna mo presënga cuaftsemncá, cárcelega utámenënga. Chë ley chca enjamna, ntšamo entsanga Jesucristbeñe muanjobenaye jtsošbuáchiyama Bëngbe Bëtsá jinŷanŷiyama tempo joshjanguëntscuana. ²⁴ Cristo jabama tempo tonjanoshjanguëntscuana, chë ley bëngbiamá enjamna mo canŷe pamillentša oservenacá, cha jtsamana chentša básenga chamotsamama ntšamo tšabá tojtsemncá. Chë ley chca yojamna, bënga Cristbeñe jtsošbuáchiyama chamobenama, y chca, Bëngbe Bëtsá chaoma bënga chabe hominiŷíñe tšábenga chamotsebnama. ²⁵ Pero Jesucristbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canŷe entsacá, ndayá tšabá yomncá bënga chamotsamama cuaftsamcá. ²⁶ Cristo Jesúsbeñe šmojtsošbuáchema, nŷetsca tšëngaftanga šmojobená Bëngbe Bëtsabe básenga jtsemnama, Cristo Jesúseftaca cánŷíñe mo canŷacá jtsemnëse. ²⁷ Tšëngaftanga tcmontanëbaye, y chca, Cristoftaca cánŷíñe mo canŷacá šmontsemna. Y mora šmojobená mo cach Cristcá jtsemnama. ²⁸ Chíyeca, ndayá Bëngbe Bëtsá tojamama, judiënga y ndoñe judiënga cachcanga mondmëna; nŷets tempo nŷe ínŷabiamá oservénënga y chë nŷe cachëngbiamá trabájayënga cachcanga, y boyabásenga y shembásengnaca. Nŷetsca tšëngaftanga mo canŷacá šmondmëna, Cristo Jesúseftaca cánŷíñe mo canŷacá jtsemnëse. ²⁹ Tšëngaftanga Cristbe entsanga šmondmënayeca, šmontsemna mo Abrahámbentsana entsanga cuaftsemncá; y chca, ntšamo Bëngbe Bëtsá Abrahámbioye tbojašbuachenacá, tšëngaftanga šmochanjóyëngacñe.

4

1 Atsnaca sěntseboše jayanama, chě uaquiñá nda yochjójyěngacñe ntšamo tbojtsotocaná, ntšamo chabe taitá jatšetayama tbojašbuachenacá, cha cabá mo canye basacá tojtsemněntscuana, ndocna derecho chě soyěnguiñe ntsebomnana; y chca, cha jtsemnana mo canya nyets tempo nye inyabiama oservenacá, masque lempe ntšamo chabe taitá tbojašbuachenacá chě uaquiñabiama tojtsemna. 2 Chě uaquiñá tojtsobóchantscuana, entšanga jtsemnana nděmuanyěnga ntšamo cha tbojtsajabotcá jtsoinayana, y inyěnga jtsejuabnayana ndayá chě taitabe soyěngaca jamama, chě uaquiñá otocana soyěngaca. Y chca jtsemnana, chě taitá tojayana tempěntscuana. 3 Mo cachcá cuaftsemncá, běnga chě ndegombre soyěngama cabá ndosértaye ora, běngnaca mandáněnga monjamna mo nyets tempo nye inyabiama oserveněngcá, quem luarentše imománda espiritěngaca. 4 Pero Běngbe Bětsá chabe Uaquiñá quem luaroye tbojanichmó, nya chama tempo tojanóshjango ora; cha mo nyetsca entšangcá, canye shembásabentsana tojanonyná, y yojoyena jtsaměse ntšamo judiěngbe leyiñe jamama ibojamna ca yojanayancá jtsaměse. 5 Quem luaroye chca tojánabo běnga jabátsebacama, y chamotsobenama Běngbe Bětsabe basengcá jtsemnama, běnga chě tempo šonjánamna chě ley jtsobedecénana. 6 Y chca, tšěngaftanga ya chabe básenga šmojtsemnama jinyanjyama, Běngbe Bětsá chabe Uaquiñabe Espíritu tbojanichmó, nyetscangbe ainaniñe cháuamashěnguama, y chě Espíritu endama běnga Běngbe Bětsá chamochembo, “Atšbe Taita ca”. 7 Měntšá, cada ona tšěngaftanguentšá ya ndoñe quenátsměna mo chě nyets tempo nye inyabiama oserveněngcá, quem luarentše imománda espiritěngaca mandáněnga, y aiñe Běngbe Bětsabe basa tojoquedá. Y chabe basa tojoquedáyeca, lempe ntšamo Běngbe Bětsá chabe básenga jatšatayama tojašebuachenacá cha echanjójyěngacñe.

Pablo, Galacia luaroquěngbiana ngmėnaca yojtšanjuabnaye

8 Tempo, Běngbe Bětsá ndoñe šmonjanábuatma ora, tšěngaftanga šmojamna mo nyets tempo nye inyabiama oserveněngcá, ndoñe ndegombre diosěnga mondměna espiritěngaca mandáněnga. 9 Pero mora, Běngbe Bětsábioye šmontsábuatma ora, o tšabá jayanama, Běngbe Bětsá cmojtsěbuatma ora, ¿ntšámoyeca tšěngaftanga cachiñe chě quem luarentše imománda espiritěnga šmojtsayaunana? Chěnga ndocna obenana quemátsbomna, y nduámaněnga mondměna. ¿Ndáyeca tšěngaftanga šmojtseboše cachiñe jtsemnana mo chě nyets tempo nye inyabiama oserveněngcá, chě espiritěngaca mandáněnga? 10 Tšěngaftanga tša jtsejuabnayana diěnguiñe, shinjěnguiñe, canye uatentša tempěnguiñe y uatěnguiñe, mo uámana tempěngcá Běngbe Bětsá tšabá jadórama, y chama běts fiestěnga jtsebomnana. 11 Atše corente šontsengmena, nderado atšbe trabajo tšěngaftangbeñe tondayama tonjoservé.

12 Jesucrístbeyeca atšbe catšátanga, bětscá cbontsaimpadana, šmochtsiyena jtsaměse ntšamo atše sěndamcá, er átšnaca sěnjóbema ntšamo tšěngaftanga ndoñe judiěnga šmondmėncá. Tšěngaftanga ndocna bacna soye atše chešatsborlá. 13 Tšěngaftanga šmondětatsěmbo, atše sěnjanobená chě natsana soyama tšěngaftanga chě tšabe noticiěnga jábuayenama, canye šocana šonjanontšáshjango causa. 14 Atše canye šocana sěnjánbomna causa, tšěngaftangbiana ndoñe paselo quenjatsmėna tšěngaftangbeñe atše jofjana; pero masque chca, tšěngaftanga ndoñe

chešmatanaboté, ni quešmatanáboyënja; masna, tšëngaftangbeñe tšabá šmonjanofja; šmonjanofja mo canýe ángel Bëngbe Bëtsabe ichmoná šmojofjá, o cach Jesucristbioycá. ¹⁵ Ndayá chora tšëngaftangaftaca enjopasancá, puerte oyejuayënga tcmónjánabíama. ¿Y mora ndayá tojopasá? Ndegombre, atše sëndétatšëmbo y sëntsobena jayanama, tšëngaftanga ndaye sóynaca atšbíama mašmënjánmama. Chë más uámana šmojánbomna soyënga atšbe cucuatšíne mašmënjánboshjona, y nýa mo chë bomínýëgnaca masmënjánenobuchjatsëca atše jatšetayama. ¹⁶ Y morna, ¿ntšamo ndegombre yomncá cbojtsëtsëtsnama, atšbíama šmojtsejuabná mo tšëngaftangbe uayayá cuaftsemncá ca?

¹⁷ Chë ndoñe ndegombre soyënga buátëmbayënga montsinýinýná mo tšëngaftangbíama ndegombre tšabá chašmotsiyenama cuaftsebošcá, pero chca ndoñe quenátsmëna; ndayá jamama imojtsebošcá, tšëngaftangbíama ndoñe tšabá quenátsmëna. Chënga montseboše atšbe contra y atšbe buátëmbana soyëngama contra chašmotsemnama, chentšana tšëngaftanga chëngaftaca jtsemnama chašmotsebošama y chënga chašmotsababuánýeshanama. ¹⁸ Puerte tšabá endmëna atše y ínýenga chafstseboše tšëngaftangaftaca amiguënga jtsemnama, canýe tšabe soye jamama tojtsemnëse; y sempre chca chauétsemna, tšabíama tojtsemnëse, y ndoñe nýe atše chentše tšëngaftangaftaca stsemna ora. ¹⁹ Tšëngaftanga, chë atšbíama mo atšbe basengcá šmondmënénga, Jesucristbeñe chašmošbuáchema tcbonjanëjabuácheyeca; atše cachiñe sëntsesufrina tšëngaftangbe causa, ntšamo canýe šešona jtsebomnama ora canýe shembása jtsesufrinancá; y atše chca chanjëftsesentina, ntšamo Cristo endmëncá tšëngaftangbe vidiñe ndegombre chaojtsebínýnëntscuana. ²⁰ Malaye atše, mora tšëngaftangaftaca stsemna, atše jobenayama jinýanýiyama, cach tšëngaftanga jáuyanëse, ntšamo ndegombre atše tšëngaftangbíama tsëntínana. Atše tša šontsecochëngmena tšëngaftangbíama.

Ntšamo Agar y Sáraftaca tojanopasá

²¹ Canýe soye smochjauyana, tšëngaftanga chë Moisesbe léyeca mandánënga jtsemnama šmojtsebošënga. ¿Ntšamo chë leyiñe endayanácá tacmojtsésertana? ²² Chiñe endayana, Abraham uta uaqiñata yojánabamna ca; cánýana Agárbeñe, canýa chabe shembíama nýets tempo oservená; y chë ínýana, cachabe shémbeñe, Sara, y mua ndocnabíama nýets tempo oservená yonjamna. ²³ Chë chabe shembíama nýets tempo oservenabe šešona, tojanonýná nýe Abraham y Agar chca chaotsemnama tbojánbošenayeca; y cachabe shembe šešona tojanonýná, Bëngbe Bëtsá chë soye jamama Abrahámioye tbojanšbuachenáyeca.

²⁴ Ntšamo Agar y Sara, y chatbe šešónataftaca tojanopasacá, bënga canýe uámana soye sontsabuatambá. Ndayá chë uta shembásataftaca tojanopasacá, uta trato entsinýinýná: chë shembása Agar, chë nýets tempo nýe ínýabíama oservená yojamná, entsinýinýná chë trato Bëngbe Bëtsá y Israeloca entšángaftaca, chë Moisésoftaca Bëngbe Bëtsá leyënga entšangbe cucuatšíne tojanáboshjona ora. Agar básenga yojtsabamna ora, chëngnaca tmojanonýná nýe ínýabíama nýets tempo oservenënga jtsemnama, y chë tratentša leyiñe soyëngaca mandánënga jtsemná mojtsebošëngnaca jtsemnana mo nýe ínýabíama nýets tempo

oservenëngcá. ²⁵ Ndayá Agáraftaca tojanopasacá entsinÿinÿná chë Sinaí batsjoca tmojánbema trato, Arabia luaroca; y chë morsca bëts pueblo Jerusalénëncaca entsinÿinÿná, er chentša entsanga montsemna chë leyëngaca mandánënga. Ntsamo Agar y chabe básenga nÿe ínÿabiana nÿets tempo oservénënga monjamncá, Jerusalenentša entsángnaca cachcá chëngcá mondmëna, chë leyëngaca nÿets tempo mandánënga bëtsemnayeca. ²⁶ Ndayá Sáraftaca tojanopasacá, chë nÿe cachabiana trabájaye shembása, entsinÿinÿná chë trato, chë tšabe bendicionënga Abrahamiana jamama chábioye tbojanšbuachená ora. Chánaca entsinÿinÿná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyëngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalenentše joyénanama, y chca, ndegombre chënga mondmëna celocama entsanga. ²⁷ Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiana, y chca endmëna mo canÿe shembása šësonga ndabamná y añe chaotsabamnana Bëngbe Bëtsá cuafjamcá. Quem luarentša Jerusalén endmëna chë uámana luare chë léyeca mandánënga imomnëngbiana, y chca endmëna mo canÿe shembása añe boyaftaquécá, er Bëngbe Bëtsabe uabemana palabrënguiñe chë shembásatbiana mëntšá endayana: Shembása šësonga ndabamná, y ndocna te tsetšanënga ndbomná šësona jtsebomnana,

moyejuá y moyó oyejuayá cojtsemnana.

Chca moma, er aca, chë shembása chabe boyabiana utšená, chë shembása boyá bomnabiana más básenga cochántsabamna ca.

²⁸ Chcasna, Jesucrístbeyeca atšbe catšátanga, ntsamo Isaac Abrahambe uaquiñá tojanobemcá, Bëngbe Bëtsá chca Abrahámioye tbojanšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnana, Bëngbe Bëtsá chca tojanšbuachenáyeca. ²⁹ Ntsamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nÿe chata chca tbojánbošenayeca onÿnaná; Isaac, chë Bëngbe Bëtsabe Espíritbeyeca onÿnaná), mórncaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntsamo Isaac chaosufrima Ismael yojanamcá. ³⁰ Pero, ¿ndayá Bëngbe Bëtsabe uabemana palabrënguiñe Abrahambe básatbiana iuayana? Mëntšá endayana: “Moma, chë nÿets tempo nÿe ínÿabiana oservená y chabe basa acbe yebnentsana chábuaisebocnana, er chë nÿets tempo nÿe ínÿabiana oservenabe šësona ndoñe quenátobena chabe taitabe soyënga jtsebomnana. Nÿe chë propio shembe šësona añe, er chë shemna ndoñe nÿe ínÿabiana nÿets tempo oservená quenátsmëna.” ³¹ Chcasna, Jesucrístbeyeca atšbe catšátanga, bënga ndoñe quemuátsmëna mo canÿa nÿe ínÿabiana nÿets tempo oservenabe básenga cuaftsemncá, er mora ya ndoñe más quemuátsmëna chë léyeca nÿets tempo mandánënga. Y añe montsemna mo canÿe shema ndoñe nÿe ínÿabiana nÿets tempo oservenabe básenga cuaftsemncá, er Bëngbe Bëtsabe básenga bënga mondmëna.

5

Cristo bënga šojatsebacá

¹ Cristo bēnga šojatsebacá, ndoñe más mo chē n̄yets tempo n̄ye ín̄yabíama oservenēngcá chamondētsiyenama, chē léyeca mandánēnga. N̄ya šmochtsentsēna n̄yets tempo chca atsebácanēnga chašmoquedama, y ndoñe šmatjaleséncia tšēngaftanga cachiñe chē léyeca mandánēnga ín̄yenga chácmbíamama.

² Tšabá šmochjouena. Atše Pablo chēyana: Nderado tšēngaftanga ndoñe judiēnga, šmojalesenciá ín̄yenga chē tšēngaftangbe más delicadentše base bobachtema chamotētšama, ntšamo judiēnga monduamancá, asna, ndayá Cristo tšēngaftangbíama tojanmcá tondayama nantsoserverna. ³ Ndēmuan̄ye entšánaca, nda tojalesenciá ín̄yenga chabe más delicadentše base bobachtema chamotētšama, cachiñe cha šcobuayená: Mora aca cmontsemna n̄yetsca chē judiēngbe leyentša mandēnga jtsobedecénana. ⁴ Ndēmuan̄yenga tšēngaftangbentšana šmojtsenguá, Bēngbe Bētsabe bominiñe tšábenga jtsemnama, ntšamo leyíñe jamama yomna ca iuayancá jtsamēse, tšēngaftanga chca šmojtsamama, šmojama Crísoftaca cán̄yiñe mo can̄yácá ndoñe chašmondētsemnama; Bēngbe Bētsábentšanēnaca šmojtsoluaré, y chca, šmontsin̄yan̄ná tšēngaftanga ndoñe šmontseboše, Bēngbe Bētsá tšēngaftangbe tšabíama jtsejuabnayēse, chácmatsebacana. ⁵ Pero bēnga, Bēngbe Bētsábeñe jtsošbuáchiyēse, mondobátmana cha yochjama bēnga chabe bominiñe tšábenga n̄yets tempo chamotsemnama. Y bēnga chca mondobátmana, Jesucristbeñe ošbuáchiyana bómnayeca, y chē ošbuáchiyana chē Uámana Espíritbiajana bēngbioye endobá. ⁶ Er Crísoftaca cán̄yiñe mo can̄yácá tmojtsemna ora, aiñe base bobachtema tētšenēnga tmojtsemna o ndoñe, tondaye ntsámanana; ndayá puerte enduámana endmēna chē Jesucristbeñe bēnga mondbomna ošbuáchiyana, y chca bétsebonnamna bēnga montsin̄yan̄ná ín̄yenga jtsababuán̄yeshanēse.

⁷ Tšēngaftanga tšabá šmonjánama, chē jtsiyenana ntšamo Bēngbe Bētsabe ndegombre soyēnga yomncá jtsamēse. Y mora, ¿nda tojama tšēngaftanga chašmotsajbanama chē Bēngbe Bētsabe ndegombre soyēnga jtsuenanama? ⁸ Ndegombre, Bēngbe Bētsá ndoñe quenátsmēna, er cha tšēngaftanga tcmojáchembo chabe entšanga chašmotsemnama. ⁹ Ntšamo entšanga mondētšayancá: “N̄ye base levadura jamana n̄yetsana chauabochama ca”; cachcá, tšēngaftanga chē judiēngbe básefta leyēngaca mandánēnga jtsemnama šmojabojátse, šmuatjábocna n̄yetsca leyēngaca mandánēnga. ¹⁰ Bēnga Bēngbe Utabnáftaca cán̄yiñe mo can̄yácá bétsemnayeca, atše corente sēntsetatšēmbo, ntšamo atšbe juabna yomncá tšēngaftángnaca cachcá šmochtsejuabnayama; y átšnaca corente sēntsetatšēmbo Bēngbe Bētsá puerte bochjacastíga, nda tšēngaftanga natjēmbana ainánaca ndoñe chašmondētsiyenama tojtsamábioye, masque ndánaca cha chaotsomñe.

¹¹ Y atšbíama chanjayana, Jesucristbeyeca atšbe catšátanga, Jesucristbeñe ošbuáchiyēnga base bobachtema chēngbe más delicadentše tētšenēnga chamotsemnama entšanga cabá stsabuayiynase, entšanga ya ndoñe muantsama atše chaitsesufrínama. Atše chca stsamēse, Cristo cruciñe tojanóbanama ntšamo iuayancá entšanga stsabuayiyná ora, chēnga ya ndoñe átšeftaca nanjósentiaye. ¹² Pero chē natjēmbana ainánaca ndoñe chašmondētsiyenama imojtsamēngna, ¡malaye cachēnga muanjenocbóna!

¹³ Pero tšēngaftanga, Jesucristbeyeca atšbe catšátanga, Bēngbe Bētsá tcmojáchembo chē judiēngbe léyeca ndēmandánēnga chašmotsemnama.

Pero chca bétsemnana, mora ndoñe šmatjátsjuabnaye šmojtsobena jalesénciana, nye tšëngaftangbe cuerpënga tšabá chamotsemnana juabnéngaca mandánënga jatiyenama. Chamna, tšëngaftanga šmuenbobonshánayeca, nyetscanga šmochtsenájabuachana. ¹⁴ Er ntšamo Moisesbe leyentša nyetsca mandënguiñe endayancá, nye canye mandíñe lempe chca entsayana. Y chë mando endmëna: “Ndëmua entšánaca cochtsebobonshana ntšamo cach aca cuenobobonshancá.” ¹⁵ Pero ínÿenga chamotsesufrinana jtsamëse tšëngaftanga šmojtsiyenëse, mo tšátjaye bayënga tmojtsenashantsná y tmojtsenobanacá, cuedado šmochtsobomna. Ndoñese, nyetscanga šmatjánenpochocaye.

Ntšamo chë Bëngbe Bëtsabe Espíritbeyeca vida jtsebomnana

¹⁶ Chiyeca cbochjáuyana: Nyets tempo šmochtsiyena ntšamo chë Uámana Espíritu cmojtsamëndacá, y chca, tšëngaftanga ndoñe quešmochátama soyënga, nye cach tšëngaftanga tšabá jtsomñama juabnéngaca. ¹⁷ Er ndayá bënga, nye entšangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nye entšangbe juábnaca jamama imobošcá contra. Chca endmënayeca, ntšamo chë Uámana Espíritu chašmomama yobošcá šmojtsamëse, ndoñe quešmátobena jamana, ndayá cach tšëngaftanga, nye entšangbe juábnaca jamama šmojtsbošcá. ¹⁸ Tšëngaftanga, ntšamo chë Uámana Espíritu cmojtsamëndacá šmojtsamëse, ndoñe quecmátamna ntšamo chë leyiñe iuayancá játamama.

¹⁹ Ntšamo entšanga, nye entšangbe juábnaca tmojtsamcá, nyetscanga paselo jtsonÿayana: chënga bacna soye boyabása o shembásaftaca jtsamana, nye chca soyëngama jésejuabnayana, y ndoñe ntšobenana cachënga jenomándama, chca soyënga jtsamëse. ²⁰ Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ínÿengaftaca jtsenáyayana, nyetscanga ndoñe cachcá chamondëtsejuabnana jtsamana, ínÿengaftaca yapa jtsenántšabošana, soyënga nye rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnana jtsamana. ²¹ Nye jtsebošana ntšamo ínÿa tojatashjachcá jtsebomnana, yapa tmoyënga jtsemnana, fiestënguiñe ndoñe tšabe soyënga jtsamana, y inÿe soyëngnaca mo chë soyëngcá jtsamana. Y mora atše cbabuayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

²² Pero, Uámana Espíritu ainaniñe tojtsemánda ora, quem soyënga chentšana jóbocnana: nyetscanga jtsababuánÿeshanana, jtsóyejuayana, natjëmbana ínÿengaftaca jtsiyenana, puerte uantado nyetsca padeceniñe jtsemnana, nyetscanga corente bonshanánaca jtsenÿayana, tšabe ainana jtsebomnana, y nyétscañe tšabe palabra bomnënga jtsemnana, ²³ jtsejuabnayana chë ínÿenga mo chabiamá más uámanënga cuaftsemncá, y cachá nyetsca soyënguiñe jenomándama jtšobenana. Y ndocna ley quenátsmëna, chca soyënga tmojtsama entšangbiama contra cháuyanama. ²⁴ Jesucristbenga imomnënga tmojama, chënga chë nye entšangbe juabnéngaca mandánënga ndoñe ntsemnana; ya ndoñe más, chë nye cachënga tšabá jtsomñama bacna juabnéngaca mandánënga quemátsmëna, y chë nye cachëngbiama soyënga jamama bëtscá juabnéngaca cach ndoñe. ²⁵ Bënga ndegombre tšabe vida

chamotsebomnama Uámana Espíritu yojtsámayeca, bënga mochtsiyena jtsamëse lempe ntšamo Uámana Espíritu šojtsamëndacá. ²⁶ Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiyama, y ndoñe nÿe mochjásboše ntšamo ínÿa tojatashjachá jatsbomnama.

6

Nÿetscanga šmochtsenájabuachana

¹ Jesucrístbeyeca atšbe catšátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshanánaca jtsonÿayëse. Cuedado šmochtsebomna, er ndoñese, tšëngaftangnaca cmatjócochëngo cachcá soye jamama. ² Chë soyënguiñe chašmojtsepadecena ora, šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

³ Nderado nda tojtsejuabná, cha canÿe uámana entšá yomna ca, pero ndoñe chca cha tondmënëse, cachá jtsenoíngñayana. ⁴ Cada ona chauenojuabó, ntšamo tojamcá tšabá o ndoñe tšabá bëtsemnama. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse. ⁵ Er cada ona bontsemna jtsenójuabnayana, jtsetatšëmbuama ntšamo tojamcá tšabá o ndoñe tšabá bëtsemnama.

⁶ Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nÿetsca tšabe soyënga jenájatayana.

⁷ Ndoñe matenoíngñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñécá, er ndocná quenátobena Bëngbe Bëtsá jaíngñana. Ntšamo entšanga mondëntšayancá: “Ndayá tcojajé y cachcá josháchiñana ca.” ⁸ Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nÿe cachá tšabá jtsomñama bacna juabnéngaca, cha echanjábocna jabuache castiganá nÿetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nÿetsca tescama yomna tšabe vida echántsebomna. ⁹ Chcasna, ndoñe chašondëmantsé tšabe soye jtsamama; er masque šojtsëmantsnasna, pero chë tšabe soyënga jtsamama ndoñe tmonjajbanase, canÿe bëts te echanjóshjango, bënga bëtscá tšabe soyënga josháchiñana, mo tša tšabe shajuanënga tmojashaquécá. ¹⁰ Chíyeca, tmojtsobena ora, nÿetscangbiana tšabe soyënga mochjama, pero masna chë Jesucrístbeñe ošbuáchiyana bómnyeca, bëngcá Bëngbe Bëtsabe básenga imomnëngbiana.

Quem tsbuanácha juapochócama cach Pablo tojanábema

¹¹ ¡šmochjinÿe, tša bëts letrëngaca cach atšbe cucuátšeca mora cbontšebuabiamná!

¹² Ndëmuanÿenga imojtseboše, tšëngaftanga chë ndoñe judiënga jamëndama tšëngaftangbe más delicadentše base bobachtema

tétšenënga chašmotsemnama, ntšamo judiënga monduamancá, chënga chca jtsamana nÿe chë judiëngaftaca tšabá joquédama. Y chca jtsamëndayana, chënga chamosufrima ínÿenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entsangbiana puerte iuámana ca chënga tmojtsabuayiynase. ¹³ Pero ni mo chë más delicadentse base bobachtema tétšenënga imomnënga, ndoñe quemátama lempe ntšamo chë leyiñe iuayancá. Pero chënga jtsebošana tšëngaftanga chca tétšenënga chašmotsemna, chënga jtsenábotamnayama jobenayama, ínÿenga base bobachtema chacmatétšama tšëngaftanga šmojalesenciama. ¹⁴ Atšeftacna ndocna te chca chaondopasá. Atše nÿets tempo y becá chanjéftsóyebuambnaye ndayá atšbiana Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiana tondaye quenatámana ntšamo entsanga quem luarentše imojuabnacá y chëngbiana puerte iuámana; y ndayá atšbiana puerte iuámana, entsangbiana tondaye quenatámana; y chë causa, atše chëngbiana mo obanacá sëndmëna. ¹⁵ Chë más delicadentse base bobachtema aíñe tétšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entsangcá bënga šojábiana, Uámana Espíritu bëngbe ainaniñe jtsemándayëse. ¹⁶ Chë quem buatëmbana sóyeca jtsamëse šmoyenëngbiana, atše, Bëngbe Bëtsá séntseimpadana, cha chaoma tšëngaftangbe ainana natjëmbana chašmotsebonnama y becá chacmotsalastemánama; y ndoñe nÿe chëngbiana chca quetsatsimpadana, ndayá nÿetscanga Bëngbe Bëtsabe entsanga imomnëngbiámna.

¹⁷ Y mora, nÿe canÿe soye cbochjáuyana: morscana ndocná chaondëtsama atše jasúfriama chašotsemnama; er atšbe cuerpiñe endëtinÿna ntšamo atše tijasufri, Jesusbe oservená bëtsemnama.

¹⁸ Jesucristbeyeca atšbe catšátanga, atše séntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.

Efesios

Jacheuayama

¹ Atše Pablo, Jesucristbe ichmoná Běngbe Bětsá chca yobóseyeca, quem tsbuanácha sěntsabiamná Efeso puebloca Běngbe Bětsabe entšanga y Cristo Jesúsbeñe ošbuáchiyěnga imomněngbiamá. ² Atše sěntseimpadana Běngbe Bětsá Běngbe Taitá y Běngbe Utabná Jesucristo, chaboma tsěngaftangbeñe tsabe bendicioněnga chaotsemnama, y chata chaboma tsěngaftangbe ainaniñe tsabe ebionana chašmotsebonnama.

Crísoftaca cányiñe mo canyáca jtsemněse, běnga mochántsebonna nyetsca tsabe soyěnga, ntšamo celoca yobinyná

³ Běngbe Bětsá y Běngbe Utabná Jesucristbe Taitábioye mochjětschuaye, er běnga Crísoftaca cányiñe mo canyáca mondměnayeca, Běngbe Bětsá tojama běnga nyetsca tsabe soyěnga chamotsebonnama, ntšamo celoca yobinyná. ⁴ Běngbe Bětsá běnga šojanabacacá Crísoftaca cányiñe mo canyáca chamotsemnama, cabá quem luare cha ndama orscana, běnga chabe delante chamotsemnama chabe entšanga, bacna soyěngama perdonáněnga y chabe oservěněnga, y běnga ainaniñe bacna soye ndomněnga imomna ca cha cháuyanama. ⁵ Běngbe Bětsá šuababuányěshanayeca, tempo cha tojanjuabó y tojánbošena běnga mo cachabe basengcá jábiamama, chě Jesucristo yochjanma sóyeca. ⁶ Chíyeca běnga Běngbe Bětsábioye sempre jtsatschuanayana, cha běngbe tsabiamá juabna yobómnyayeca, ndayá chabe Bonshana Uaquiñáftaca běngbe tsabiamá cha tojamama. ⁷ Běngbe Bětsá puerte bonshanánaca běngbe tsabiamá bětscá yojuabnáyeca, cha běngbe bacna soyěngama šojtsaperdoná y šojatsebacá, er Jesús běngbiamá tojanóbana, chabe buiñe juabuáshaněse. ⁸ Běngbe Bětsá tojama běnga nyets osertánana y becá juabna chamotsebonnama, cha becá bonshanánaca běngbe tsabiamá juabna yobómnyayeca, ⁹ y tojama běnga chamotsetatšěmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninyanjé. Ndayá jamama Běngbe Bětsá tempo yojanjuabnacá, ndayá cha tojama běnga chamotsetatšěmbuama, cachá yojanjuabná chca jamama. ¹⁰ Ndayá jamama Běngbe Bětsá yojuabnacá, lempe echanjochněngo nya chama tempo chaojóshjango ora, y quem Běngbe Bětsabe juabna endmėna jamana, lempe ntšamo cha tojamcá celoca y quem luarentše, Cristo chamotsebonna nyetsca chě soyěnguiñe mo chě mandayacá.

¹¹ Běngbe Bětsá sempre jamana nyetsca soyěnga ntšamo tojtsejuabnacá y tojtsebošcá. Y Běngbe Bětsá běnga šojabacacá, ntšamo cabá chca ndama ora yojanjuabnacá; chca, běnga Crísoftaca cányiñe mo canyáca jtsemněse, běnga chamóyěngacñama ndayá Běngbe Bětsá chabe entšanga jatšatayama tojašebuachená, mo chěngbe otocana soycá. ¹² Y Běngbe Bětsá chca tojama, běnga chě Crístbeñe natsana imojtsanošbuachenga, cha běnga šochjánatsebacama, tsabe soyěnga jtsaměse chamotsiyenama, chca, chě inye entšanga Běngbe Bětsabe obenanama cha chamotsatschuanama. ¹³ Y tsěngaftāngnaca, chě ndegombre buayenánana šmojanuena ora, chě Běngbe Bětsá běnga játsebacama buayenánana, y Crístbeñe šmojtsanošbuaché ora, Běngbe Bětsá tojanma tsěngaftanga Crísoftaca

cányiñe mo canýacá chašmotsemnama y tcmojanainýnaná tšëngaftanga chabe entšanga bétsemnama. Bëngbe Bëtsá chca tojanma, Uámana Espíritu tšëngaftangbe ainaniñe cháuamashënguama tojanma ora, ntšamo tempo cha tojanašebuachenacá. ¹⁴ Bënga chë Uámana Espíritu bëngbe ainaniñe mondbómnyayeca, corente mondetátšëmbo ndayá Bëngbe Bëtsá chabe entšanga tojašebuachenacá bënga mochjóyëngacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nyetsca tescama játsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bëngbiama inétsamama, nyetscanga cha mochántatschuanaye, cha bëtsá y obená bétsemnama.

Pablo Bëngbe Bëtsábioye tbojanimpadá, ošbuáchiyënga osertánana chamotsebonnama.

¹⁵⁻¹⁶ Chcáyeca, atšna, Bëngbe Bëtsá tšëngaftangbiama stseimpadana ora, sempre cha sëndbëtsatschuanaye, er atše sënjátatšëmbona ntšamo tšëngaftanga Bëngbe Utabná Jesúsbeñe tša šmojtsošbuáchema, y ntšamo tšëngaftanga nyetsca chë Bëngbe Bëtsábenga imomnënga šmababuánýeshanama. ¹⁷ Bëngbe Bëtsá, Bëngbe Utabná Jesucristbe Taitá, nda corente iuámana, sëntseimpadana cha chaoma Uámana Espíritu chacmëjabuachama, corente osertánënga chašmotsemnama, y chacminýanýé nda Bëngbe Bëtsá yomnana, chca, más tšabá cha chašmotsábuatmama. ¹⁸ Atše, Bëngbe Bëtsá sëntseimpadana, cha chaoma tšëngaftanga Bëngbe Bëtsabe soyënguiñe corente osertánana chašmotsebonnama, tšëngaftanga chašmotsetatšëmbuama, ndayá Bëngbe Bëtsábeñe jtsošbuáchiyëse tšëngaftanga šmojtsošbatmancá cha cmochjátšatayama. Bëngbe Bëtsá tcmojáchembo chábeñe chca chašmotsobátmanama. Atše cha sëntseimpadana, chaoma tšëngaftángnaca chašmotsetátšëmbo tša bëtscá y bëtš soyënga yomna ndayá chabe entšanga cha tojašebuachenacá; ¹⁹ y chašmotsetátšëmbo tša bëtš soye y ndocna te ntjëtšopochócama chabe obenana yomnama, chë ndayá bëngbe ainaniñe tšabe soyënga yojtsama, bënga chë Crístbeñe ošbuachiyëngbeñe. Cach quem puerte bëtš obenana endmëna, ²⁰ ndáyeca Bëngbe Bëtsá tojanma Cristo cháuatayenama, y chabe catšbioica celoca tbojtantbema chaotsemándama. ²¹ Choca Cristo nyetsca soyënguiñe yojtsemándá, y más bëtscá obenana y mando yojtsebonna nyetsca mándayëngbiama, chë mando y obenana bomnëngbiama, y cha yomna más uamaná y bëtšá nyetsca chë entšangbiama mo bëtšëtsangcá utabnëngbiama, chëngbe uabaina respétoca jtsichámëse. Cristo puerte bëtšá endmëna lempe ntšamo quem luarentše yobinýnama y Cristo yochjésabentšana yochtsebinýnámna. ²² Bëngbe Bëtsá tojama Cristo nyetsca soyënguiñe chaotsemándama, y tbojanábuayana nyetsca soyënguiñe chaotsemándama, chábeñe ošbuáchiyëngbe tšabiama. ²³ Cha endmëna nyetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nyetsca luarënguíñnaca, y lempe cha endëmándá.

2

Atšebacánënga mondmëna, Bëngbe Bëtsá šuababuánýeshanayeca

¹ Tempo tšëngaftanga Bëngbe Bëtsabiama mo obanëngcá šmonjamna, er tšëngaftanga šmonjaniiyena, ntšamo Bëngbe Bëtsá yomandacá

ntsamcá, y bëtscá bacna soyënga šmojánama. ² Chca, tšëngaftanga šmonjánama mo chë nÿe quem luarama enójuabnayënga monduamancá, y šmonjanëyeunana Satanás, chë bacna espíritënga obenana bomnënga y quem luarentša tsbanánoca imomnëngbe amëndayá, chë Bëngbe Bëtsábioye ndëyeunanëngbe ainaniñe yománda espíritu. ³ Tempo bënga nÿetscanga fsënjaniyena ntšamo tšëngaftanga šmonjaniyená. Bënga soyënga fsënjánama, nÿe ntšamo ftsjanbošcá nÿe bëngbe cuerpëngbe tšabíama, y nÿe ntšamo bëngbe juabna enjamncá bacna soyënga jamama. Bënga fsënjaniyena soyënga jtsamëse mo chë Bëngbe Bëtsábioye nduabuatma entšanga mondbetsamcá; chë causa bënga fsënjanomerecena jtsebomnana chë Bëngbe Bëtsabe uabouana castigo, cachcá chë Bëngbe Bëtsábioye nduabuatmëngcá. ⁴ Pero Bëngbe Bëtsá sempre tša lastemado entšangbíama endmëna y sempre corente bënga šondábabuanÿeshana; ⁵ y chíyeca, bënga cabá mo obanëngcá chabíama fsënjamna ora, bacna soyënga fsënjánama causa, chora cha tojanma bënga tšabe vida chamotsebomnana y Cristoftaca cánÿiñe mo canÿacá chamotsemnana. Bëngbe Bëtsá tšëngaftangbe tšabíama juabna bómnyeyeca, bacna soyënguentsšana tcmojatsebacá. ⁶ Bënga Jesucristoftaca cánÿiñe mo canÿacá bëtsemnyeyeca, Cristo Jesús cháuatayenama Bëngbe Bëtsá tojanma ora y celoca tbojtantbema ora, enjamna mo bëngnaca chámuatayenama Bëngbe Bëtsá cuafjamcá y Cristo Jesúseftaca celoca cuaftatbiamcá. ⁷ Chca enjamna, Bëngbe Bëtsá entšanga cháuinÿyanÿema nÿetsca joshjanguama tempënguiñe, ntšamo cha bëngbe tšabíama bëtscá juabna bëtsebomnana, cha Cristo Jesúseftaca bëngbioye tšabe juábna šojánanÿe ora. ⁸ Er Bëngbe Bëtsá tšëngaftangbíama tšabe juabna yojánbomnyeyeca, tcmojatsebacá, Jesucristbeñe šmojtsanošbuáchemá; pero atsebácanënga šmondmëna, ndoñe cach tšëngaftanga ndayá šmojánmayeca, ndayá atsbocaná jtsemnana endmëna Bëngbe Bëtsabe canÿe tšetana soye. ⁹ Atsebácanënga šmondmëna, ndoñe cach tšëngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnana. ¹⁰ Bëngbe Bëtsá šojtabíama ntšamo bënga mondmëncá, y Cristo Jesúseftaca cánÿiñe mo canÿacá bëtsemnyeyeca, Bëngbe Bëtsá mo tsmëma entšangcá cuaftsatsmëncá šojtabíama, tšabe soyënga jtsamëse jtšiyenama. Y ndayá bënga tšabá mondamcá, Bëngbe Bëtsá tempo tojanprontá bënga chamotsamama.

Crístbeyeca tempcá tšabá Bëngbe Bëtsáftaca jtsatsmënaná

¹¹ Tšëngaftanga ndoñe judiënga, ndëmuanÿenga judiënga cmondubuatma “chë más delicadentše base bobachtema ndëtëtšenënga ca”, chëngcá uinÿnanánënga ndoñe šmondmënama; chënga cachënga jtšenábobuatmana “chë más delicadentše base bobachtema tëtšenënga ca”, y cachëngbe cuerpënguiñe chca jtsamana. Mëntšá, tšëngaftanga chë ndoñe judiënga, ¹² šmochjenójuaboje ntšamo tempo šmojamnama, Crístbeñe cabá ndošbuáchiye ora. Chora, tšëngaftanga Cristo ndoñe šmonjánbomna, Israeloca entšangbíama stëtšoye šmonjanquedana, y ndoñe šmonjantátšëmbo lempe ntšamo Bëngbe Bëtsá chabe entšanga tojanašebuachenacá. Tšëngaftanga quem luarentše šmonjaniyena ndocnábeñe ntsobatmancá y Bëngbe Bëtsá ntsabuatmncá. ¹³ Pero mora tšëngaftanga Cristo Jesúseftaca cánÿiñe mo canÿacá šmontsemna, chë tempo Bëngbe Bëtsá ndoñe šmonjanábuatmënga, y cha tojama chábioye

chašmotsábuatmama; y chca yomna, er Jesús, chabe buiñe juabuáshanése, tséngaftangbiana tojanóbana. ¹⁴ Cach Cristo yojt sama benga tempcá tsabá Bèngbe Bètsáftaca chamotsemnana. Cha tojama judiènga y ndoñe judiènga nyetscanga mo cachca entsangcá chamotsemnana, mo nda canye tapiëse tojt sendbemcá, chë ndayëseca canye luarentsa entsanga tmojt senjata, chënga enáyaye causa. ¹⁵ Cristo chënga mo cachca entsangcá tojábiana, judièngbe leyënga y mandënga ndocna obenana chamondëtse bomnana jamëse. Chca tojama, cha jóbanése, chë útoica entsanga mo nye canye tsmëma entsangcá jábiamama, cháftaca cányiñe mo canyáca jtsemnëse. Cha chca tojanma chënga nyetscanga tsabá chamotsiyenama; ¹⁶ y Cristo cruciñe tojanóbanayeca, cha tojanma chë útoica entsanga enáyayana chamotsajbanama, y tojanma chë útoica entsanga mo canye entsangcá chamotsemnana, chënga tempcá tsabá Bèngbe Bètsáftaca chamotsatsmënana.

¹⁷ Cristo quem luaroye tojánabo tsabe noticiënga jabábuayenama, tempcá tsabá Bèngbe Bètsáftaca jtsatsmënana. Cha quem tsabe noticiënga tojanabuayena tséngaftanga chë ndoñe judièngbioye, chë Bèngbe Bètsá ndoñe šmonjanábuatmënga, y chë judièngbioynaca, chë Bèngbe Bètsá imojanábuatmënga. ¹⁸ Er chábeyeca, canyányënga y ínënga montsobena chë Taitábioye jobéconana, er benga nyetscanga cachca espíritu bèngbe ainaniñe mondbomna, chë Uámana Espiritu. ¹⁹ Chiyeca tséngaftanga, Bèngbe Bètsabe entsanguentse ndoñe quešmátsmëna mo inye luarocana ashjajnëngcá, y ni mo cachëngbe yebnentse ndoyenëngcá, tondayama derecho ndbomnënga. Inyetsá endmëna; tséngaftanga derecho šmondbomna cachcá ntšamo Bèngbe Bètsabe entsanga mondbomncá, y Bèngbe Bètsabe básënga šmondmëna. ²⁰ Jesucristo y chabe entsanga mondmëna mo canye jebna yebncá. Jesucristbe ichmónënga y chë Bèngbe Bètsabe juabna oyebuambnayënga mondmëna mo chë ndëtšbënga ndayiñe chë yebna tojtšëcuatjoncá; tséngaftanga ošbuáchiyënga šmondmëna chë jebna yebnentša soyëngcá, y cach Jesucristo mo chë más uámana luarentse uashacuana ndëtšbecá. ²¹ Quem más uámana luarentse uashacuana ndëtšbeñe, nyetsca chë bëtš yebnentša soyënga jtsëcuatjonana, y tšbanánoye más tmojtšjebëse, chë bëtš yebnentse tsëm jebna sóynaca chiñe jtsëcuatjonana. Cachcá Cristo, mo chë más uámana luarentse uashacuana ndëtšbecá, jtsamana nyetsca chábëñe ošbuáchiyënga cháftaca cányiñe mo canyáca chamotsemnana, y ínëngnaca cachcá chamotsemnana. Y nyetsca ošbuáchiyënga Crísoftaca cányiñe mo canyáca tmojtsemna ora, chënga jtsemnana mo Bèngbe Utabnabiama canye bëtš yebna jebncá, chábioye jtsatschuanayama. ²² Y tséngaftanga Efesoca ošbuáchiyëngbiámnaca Cristo entsama, chë inye chábëñe ošbuáchiyëngaftaca mo canye entsangcá chašmotsemnana. Y chë Uámana Espiritu bèngbe ainaniñe yojtšiyénayeca, benga nyetscanga cányiñe mondmëna, mo canye bëtš yebncá ndayentse Bèngbe Bètsá yoyena.

3

Pablo Jesucristbe trabajo yojanbonyëna, chë ndoñe judièngbeñe jamama

¹ Chca, atše Pablo utamená sëntsemna, Cristo Jesusbiana soyënga entsanga abuayiynaye causa, tséngaftanga chë ndoñe judièngbe tsábiana. ² Er tséngaftanga ya cmontsamna jtsetatšëmbuama, Bèngbe

Bëtsá tšëngaftangbe tšabíama juabna yobomnama; y chca, chë trabajo atše šojabonyé, tšëngaftangbe tšabíama jamama. ³ Tšëngaftángnaca cmontsamna jtsetatšëmbuama ndayá Bëngbe Bëtsá šojinýinýé, ntšamo cha jamama tempo tojanjuabocá, pero entsanga chca ndoñe tonjaninýanyé, y chë soyama ya batšatema tčbonjubuábíama. ⁴ Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga, ⁵ chë tempo Bëngbe Bëtsá ndocnábioye tčonjaninýinýé soyënga; pero mora cha tojinýanyé, Jesucristbe ichmónënga nýe Bëngbe Bëtsabíama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espiritoftaca. ⁶ Ndayá tempo Bëngbe Bëtsá ndoñe tonjaninýanyécá mëntsá endmëna: chë ndoñe judiënga Jesucristbe tšabe noticiënguñe chamojtšošuaché ora, cachá ntšamo chë judiënga ošbuáchiyënga Bëngbe Bëtsábíocana mochjoshachiñcá, chëngnaca chábiocana mo otocancá chë soye mochanjóyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nyetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjóyëngacñe lempe ntšamo Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúseftaca cánýiñe mo canýacá bëtsemnayeca. ⁷ Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtšeservénama, tšabe noticiënga entsanga jtšabuayinayëse; y cha átšeftaca chca tojanma chabe obenánaca. ⁸ Atše nyetsca chë Bëngbe Bëtsabe entsanguentše sëndmëna chë más nduamaná; pero Bëngbe Bëtsá bëts pavor šontsebema, šonjalesenciá chë Cristbe bëtscá tšabe soyënga chë ndoñe judiënga jábuayenama. Chë Cristbe soyënga tša bëtscá endmëna, y chca, quenátopodena chë soyënguentsana lempe jtšabuatmana. ⁹ Y chë trabajo šonjabonyé jamama, nyetscanga botamana jinýama chamotsobenama ndayá Bëngbe Bëtsá yochjama, ndayá cachá, chë nyetsca soyënga tojamá, tempscana yojanjuabnacá. Mëntscoñama Bëngbe Bëtsá chë soye ndocnábioye tčonjinýinýé, pero mora aiñe. ¹⁰ Chca, Cristbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nyets osertánana ntšamo Bëngbe Bëtsá yobomncá. ¹¹ Bëngbe Bëtsá chca tojama, ntšamo cachá yojanjuabnacá nyetsca tescama jamama, y chca cha tojama Jesucristoftaca, Bëngbe Utabná. ¹² Bënga Cristoftaca cánýiñe mo canýacá mondmëna, y chábeñe mondošbuachéyeca, bënga montsobena Bëngbe Bëtsábíoye jobéconama tondayama ntjatauatjácá, y corente jtsetatšëmbëse cha ndoñe chašmondëtsajbaná ainaniñe añemo bomnana, atše sëntsesufrina causa, er chë tšëngaftangbe tšabíama tsësufrintšana, tšëngaftangbíama tšabe soyënga endóbocana.

Cristbe bonshánana

¹⁴⁻¹⁵ Y chca, Bëngbe Bëtsá, chë Taitá, ndábentšana nyetsca pamíllanga celoca y quem luarentše uabaina imóyëngacañe, chabe delante joshamëntsase, ¹⁶ sëntseimpadana, chabe bëtscá uámana bomnánaca chaoma, tšëngaftanga ainaniñe obenana y bëts añemo chašmotsebonnama, chabe Espíritbeyeca, ¹⁷ y tšëngaftanga Cristbeñe jtšošuáchiyëse, mua tšëngaftangbe ainaniñe chaotsiyenama.

Bëngbe Bëtsánaca sëntseimpadana, cha y ínÿenga nÿets ainánaca jtsababuánÿeshanëse, ¹⁸ tšëngaftanga y nÿetsca Bëngbe Bëtsabe entšángnaca tšëngaftangaftaca, chašmotsobena josértama Cristbe bonshánana bëngbiana tša bëtsá yomnana. Nderado nda tojontsé chabe bonshánana jatšëmbonana mo canÿe soye cuaftsemncá, cha ndocna te nanjobenaye jtsetatšëmbuana tëntsoye ndayëntscoca yomna y nÿanëjoye ndayëntscoca, jashenoye ndayëntscõe y tsbanánoye ndayëntscõe yomna. ¹⁹ Atše sëntseimpadana tšëngaftanga chašmobená chë bonshánana juabuátmanana (chë bonshánana puerte bëtsá endmëna causa, bënga ndocna te quemochatobenaye josértama ntšamo chë soye lempe yomnana). Pero sëntseboše, tšëngaftangbe ainaniñe nÿe Bëngbe Bëtsabe soyënga chaotsemna y tšëngaftanga chašmotsiyena jtsamëse, ntšamo tšëngaftanga chašmotsamama Bëngbe Bëtsá yojuabnacá.

²⁰ Y mora, nÿetscanga Bëngbe Bëtsá chamotsatschuaná. Cha obenana yobomna ntšamo bënga tmojtsojtjanañe o tmojtsejuabnama más soyënga jamama, chabe puerte bëts obenánaca; y chë obenana bëngbe ainaniñe yojtsemánda y yojtsama bënga ainaniñe sempre ošbuáchiyana chamotsebmoma. ²¹ ¡Entšanga Bëngbe Bëtsá chamotsatschuaná nÿets tempo y nÿetsca tescama, ndayá Crístbeñe ošbuáchiyënga tmojtsamama y cach Cristo tojamámnaca! Chca chaotsemna.

4

Uámana Espíribeyeca bënga cánÿiñe mo canÿacá jtsemnana

¹ As, atše chë cárceloye utamená, Bëngbe Utabnabiana trabájaye causa, tšëngaftanga cbontsaïmpadana, ndëmuanÿenga Bëngbe Bëtsá tcmojáchembo chabe entšanga chašmotsemnana, sempre chašmotsiyena mo chë entšangcá ndëmuanÿenga Bëngbe Bëtsá cach soyama tojánachembo y chca imomerecena. ² Cada ona chamotsenojuabná mo chë ínÿenga chabiana más uámanënga tmojtsemncá, y nÿetscángbioye puerte bonshanánaca šmochtsobátmana, y bëtsá bonshánana jtsebmönëse šmochtsenëuantana; ³ sempre šmochtsejuabnaye y šmochtsentšena tšëngaftanga nÿets tempo cánÿiñe mo canÿacá chašmotsemnana, nÿetsca tšëngaftanga natjëmbana jtsemnëse. Y tšëngaftanga šmotsobena cánÿiñe mo canÿacá jtsemnana chë Uámana Espíribeyeca. ⁴ Bënga Jesucrístbeñe ošbuáchiyënga bëtsemnayeca mondmëna mo cach cuerpentšëngcá, chë Cristbe cuerpo, y cachca Espíritu bënga nÿetscanga ainaniñe mondbomna. Bëngbe Bëtsá šojáchembo, bënga chábeñe jtsošbuáchiyëse, nÿetscanga cachcá šochjátšatayama chamotsobátmanama. ⁵ Bënga nÿetscanga cach Utabná mondbomna, cachca ošbuáchiyana Jesucrístbeñe mondbomna, y bënga nÿetscanga uabáinënga mondmëna chca betsošbuáchiyama. ⁶ Bënga ošbuáchiyënga nÿetscangbiana cach Bëngbe Bëtsá y Taitá endmëna. Cha bëngbe amëndayá endmëna, chabe obenana nÿetscángbeñe jtsinÿnana, y nÿetsca bëngbe ainaniñe chabe Espíritu endmëna.

⁷ Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. ⁸ Chíyeca, Bëngbe Bëtsabe uabemana palabrenguiñe Jesucristbiana mëntšá endayana:

Cha celoye tontantsjuá, y cháftaca tonjanëyamba nÿetsca chabe uayayënga, chë tojánayënjananga,

y chabe entšángbioye obenana tonjanatšatá, tšabe soyènga jamama ca.

⁹ ¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. ¹⁰ Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canÿe ora nyëtscañe cha chaotsemnama. ¹¹ Y cachá, chë tšabe soyènga jamama obenana tojanatšatá ora, tojanma chábeñe ošbuáchiyènguentše chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiana abuayinyayënga, y ínÿengna ošbuáchiyënga anÿenënga y Bëngbe Bëtsabe soyèngama abuatambayënga. ¹² Cristo tojanabacacangna chabe entšángbioye mochjanëjabuache, cha tojanabanÿé trabajo chënga chamotsamama, y nyëtscá ošbuáchiyënga, chë nyëtscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama, ¹³ bënga nyëtscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiana nyëtscanga lempe cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsëtšanga bëtscá juabna bomnëngcá, ¹⁴ y ndoñe nÿe mo basengcá, Bëngbe Bëtsabe soyèngama jtsetatšëmbuama. Chë soyènguiñe ya ndoñe más nÿe mo basengcá quemochátsmëna, ndëmuanÿënga paselo jáingñama yomna. Mo canÿe barquëshá nÿe ndaye binÿiacnaca tojtsëyambancá, básefta entšanga nÿe ndaye buatëmbana soye tmojatuenká jatsyeunanana; bënga ndoñe chca quemochátsmëna, ya ndoñe más bëngbe juabna quemochatstróca, nÿe ndaye tmojatuenta tsëm sóyeca, ínÿengbioye áingñayënga. Chënga becá montsetátšëmbo ntšamo entšanga jáingñana, y montseboše chë montsabatambá bostero soyènga bënga jtseyeunanama. ¹⁵ Chamna, chë Bëngbe Bëtsabe ndegombre soyèngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšaše chë cuerpentša soyènga jtsemandayancá. ¹⁶ Mo canÿe bestšašcá, chëse jamana nyëtscá chë cuerpentša soyènga ndayentše chamueneñnama y chiñe jobónjuama chamotsobenama, chë cuerpo saná chaotsebomnama jtsamëse, chca, nyets cuerpo tšabá chaóbochema, cachcá Cristo, chë nyëtscá ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nyets cuerpo tšabá jobóchana; cachcá, ošbuáchiyënguentše cada ona tojtsama ntšamo jamama tbojtsemncá, as nyëtscá ošbuáchiyënga cada te más ošbuáchiyana mochántsebomna, puerte jtsenbobonshánëse.

Crísoftaca cánÿiñe mo canÿacá jtsemnëse tsëm vida šmochtsebomna

¹⁷ Mëntšá entsemna ntšamo cbontsëtšësnacá, y Bëngbe Utabná endmëna nda tojama atše mando chaitsebomnama tšëngafanga chca jáuyanama: Ndoñe más šmattsiyena bacna soyènga jtsamëse, mo chë Bëngbe Bëtsábioye nduabuátmënga mondbetsamcá; chënga jtsiyenana jtsamëse ntšamo cachëngbe ndoservena juabnënga tojtsamëndacá. ¹⁸ Chëngbe juabnoca obenana mondbomna nÿe ndoñe ndegombre soyèngama josértama. Chënga ndoñe quemátsbomna chë Bëngbe Bëtsábocana yóbocana tšabe vida, er chënga ndoñe quemátsleséncia chë Bëngbe Bëtsabe soyènga chëngbe ainaniñe chaómashënguama; y

chca endmëna, er chënga tmojajuabó y tmojama chë Bëngbe Bëtsabe buayenana soye chëngbe ainaniñe tondaye chaondómashënguama. ¹⁹ Chënga bacna soyënga tmojtsama ora, tondayama ntsenócochinÿenana; chënga nÿets tempo jesentšënanan nÿetsca bacna soyënga amana, y chca jtsamana tondayama ntjatenojuabnaycá.

²⁰ Pero chca ndoñe quenjatsmëna ntšamo tsëngaftanga Cristbe soyëngama šmojanatsjinÿe y ntšamo chábioye šmojanabuatmancá. ²¹ Ndegombre tsëngaftanga chabiana šmojanuena y ínÿenga tmojanabuatambá mo chábeñe ošbuachiyëngcá y ntšamo chë ndegombre soyënga Jesucristbeñe endbinÿncá. ²² Chcasna, ntšamo tsëngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stëtsoye šmochjaquédá; ntšamo tempo tsëngaftanga šmojanjuabná, šmojansentina y šmojanamcá, canÿe ondbiamnaye juabnentšana yojóbocana, tsëngaftanga bacna soyëngama juabnëngaca mandánënga jtsemnëse, y chë juabnënga tsëngaftangbioye cmojánaingñaye. ²³ Tsëngaftanga cmontsamna tsëngaftangbe juabniñe tsëm y tsabe juabnënga jtsebomnana. ²⁴ Tsëngaftanga cmontsamna jashjáchana mo tsmëma entšangcá jtsemnama, y chë ntšamo tempo šmojanamcá mora ndoñe cachcá chašmondëtsamama. Chca, tsëngaftanga šmochanjashjache jtsemnama ntšamo Bëngbe Bëtsá yomncá. Bëngbe Bëtsá chca tsmëma entšangcá tcmojábiana, tsëngaftanga chašmotsiyenama jtsamëse Bëngbe Bëtsabe bominiñe tsábá yomna soyënga y chábioye jadórana soyënga, chë ndegombre soyënguentšana óbocana soyënga.

²⁵ Chcasna, ya ndoñe más šmattsebostero, ndayá cada ona cháuyana ndegombre soyënga cachacá Jesucristbeñe ošbuachiyáftaca, er nÿetscanga cánÿiñe mondmëna mo nÿe canÿe entšangcá. ²⁶ Nderado chacmojetëna, tcmojetëna causa ndaye bacna soye ndoñe šmatjama. Pero ndoñe šmatjaleséncia bënama chacmetëna y ndoñe nÿets te chacmondetëna. ²⁷ Ndoñe šmatjaleséncia Satanás ndayánaca tsëngaftangtaftaca chaomama.

²⁸ Chë yojanatbëbaná chauajbaná atbëbanama y jatrabájama chaontsé; cachabe cucuatšeca tsabe trabajo chaotsóboma, chca, ndayánaca cha chaotsebomnana chë ujabótënga jatšatayama.

²⁹ Bacna palabrënga ndoñe šmattsichamo, pero aiñe tsabe palabrënga y nÿa chorsca ujabótama palabrënga, chë inÿe entšangbioye jujabuáchama más Cristcá chamotsemnama, chënga Bëngbe Bëtsábocana tsabe bendicionënga chamóyëngacñama, chë ndayá chašmojtsëtsësná sóyeca. ³⁰ Ndoñe šmattsama soyënga, Bëngbe Bëtsabe Uámana Espiritu chabongmema. Bëngbe Bëtsá tojama Uámana Espiritu tsëngaftangbe ainaniñe cháuamashënguama, y chca, tcmojanainÿnaná chabe entšanga bëtsemnayeca, chë yochjóshjango tescama, Bëngbe Bëtsá chabe entšanga nÿetsca tescama yochjatsebacaye orscama.

³¹ Inÿëngbiana bacna juabnënga ainaniñe ndoñe chašmondëtsebomna, etonánënga ndoñe chašmondëtsemna, ni ínÿëngaftaca ndoñe chacmondetëna. Inÿëngbioye ndoñe chašmondëtsabuachembuana, ínÿëngbioye ndoñe šmatjoyánguango y ndaye bacna sóynaca ndoñe šmattsama. ³² Nÿetscángaftaca tsábënga šmochtsemna, nÿetscanga šmochtsenlastemana y šmochjenperdóna, ntšamo Bëngbe Bëtsá, Crístbeyeca tcmojaperdonacá.

5

Ntšamo yomna Běngbe Bětsabe básenga chamotsiyenama

¹ Tšěngaftanga, Běngbe Bětsabe bonshana básenga quetsomñecá, n̄ya šmochtsentšena cachacá jtsēmnama. ² Smochtsiyena n̄yetsca soyěnga bonshanánaca jtsaměse, ntšamo Cristo šojanababuan̄yeshancá; chca, cha chabe derecho vida jtsobomñama cachcá tojanon̄yá y bēngbiana tojanóbana. Y ntšamo Cristo tojanm̄cá, yojamna Běngbe Bětsábioye jětschuayama, y chabe bominiñe tša tšabá yojtsemna, mo ndaye ora Běngbe Bětsá oyejuayá jóyěngacñana ndayá tcojoba y altaroca tcoja-juin̄yese, y chě soye botamana jtsonguětsiyana.

³ Tšěngaftanga, Běngbe Bětsábenga šmorněnga, ndoñe quecmátamna shembása o boyabásaftaca bacna soyěnga jtsamana, ni chca játamama jtsejuabnayana y jtsebošana, y chě n̄ye yapa jésebošana más soyěnga ín̄yēngbiana jtsebomnama cach ndoñe. Ni chě soyēngama ndoñe šmattsóyebuambnaye. ⁴ Bacna soye ndoñe šmattsóyebuambnaye, ni corente ntjenujuboycá, ni n̄ye ntšámnaca bacna soye jenbotatšěmbonana cach ndoñe, er chě soyěnga tšěngaftangbiana ndoñe tšabá ntsemnana. Chca játamamna, más tšabá, Běngbe Bětsá šmochtsatschuanaye. ⁵ Er tšěngaftanga ya šmondětatsěmbo, ndocna chě shembása o boyabásaftaca bacna soye amá, ndocna chě n̄ye chabe bacna juabnēngaca soyěnga jtsamama oyená, o chě n̄ye más soyěnga ín̄yēngbiana jtsebomnama bošá y amá (chca jtsayanana chabiana más iuámana soyěnga jtsebomnana, Běngbe Bětsábioye jatsbobonshánama), chca amēnguentšana ndocná tondaye queochatóyēngacñe ndayá Běngbe Bětsá chabe entšángbioye jatšatayama tojašebuachenantšana, Cristo y Běngbe Bětsabe amēndayoca. ⁶ Ndocná chacmondaingñe ndoñe ndegombre tondmēna palabřēngaca, bacna soyěnga chašmotsamama, er chě causa chě uabouana castigo echanjobaye, ndáyeca Běngbe Bětsá chábioye nděyeunanēnga yochjácastigaye. ⁷ Chíyeca, chca amēngbe soyěnga tondaye šmattsama.

⁸ Tempo tšěngaftanga šmojaniiyena bacna juabnēnga jtsebomněse y bacna soyěnga jtsaměse, mo ibetiñe cuaftsiyencá, pero mora Běngbe Utabnáftaca cán̄yiñe mo can̄yacá bětsemnayeca, chabe soyěnga šmontsetátšěmbo y sempre šmondětsemna cháftaca, chě entšangbe juabnēnga bin̄ynayáftaca. Smochtsiyena jtsaměse mo chě bin̄ynayabe entšangcá. ⁹ Chě bin̄ynayábeyeca entšanga tšabe soyěnga jtsamana, chě Běngbe Bětsabe bominiñe tšabá yomna soyěnga, y ndegombre soyēngnaca. ¹⁰ N̄ya šmochtsentšena soyěnga jamama, Běngbe Bětsá oyejuayá chaotsemnana. ¹¹ Chě mo ibetiñe cuaftsiyencá oyenēngbe bacna soyěnga tondayama ntšoservénana, y tšěngaftanga chca ndoñe šmattsama. Chamna, chēngbioye šmochjín̄yan̄yiye chēnga ndoñe tšabá tmonjamama. ¹² Ndegombre, n̄ye chě ndayá chēnga mo iytēmencá tmojamama jóyebuambayama ya cuantsēuatja; ¹³ pero n̄yetsca soyěnga bin̄yiñe tmojacá ora jtsopodénana tšabá jin̄yama ntšamo ndegombre tomncá. Cachcá, ntšamo entšanga tmojamcá chě bin̄ynayá chaojin̄yan̄yē ora, echantsopodena jtsotatšěmbuama ntšamo chě soyěnga yomnana; ¹⁴ er ndayánaca bin̄yiñe tojtsin̄jinyena, jtsopodénana jin̄yama ntšamo ndegombre chě soye tomncá. Cachcá, ntšamo entšanga iytēmencá tmojtsamcá chě bin̄ynayá chaojin̄yan̄yē ora, chēnga mochántsetatšěmbo bacna soyěnga imojtsamama. Chíyeca mēntšá jtsichámuana:

Botamana cochjájuaboye, aca ndoñe quecátobena jenomándana, mo canya cuaftsomañcá;

chë bacna soyënga ama causa, Bëngbe Bëtsabe bominyiñe mo obanëngcá imomnënguentšana šmochtsojuánañe,

y Cristo acbe juabnënga echantsebínynaye ca.

¹⁵ Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aiñe chë chca soyëngama osertanëngcá.

¹⁶ Lempe ntšamo chašmojobenacá nyets tempo tšabe soyënga šmochtsama, er quem tempo entšanga yapa bacna soyënga montsama.

¹⁷ Ntjenojuaboycá ndoñe šmattsama, mo chë ndosertanëngcá. Pero aiñe bëtscá šmochtsentsëna ndayá Bëngbe Utabná jamama yobošcá chacmósertama.

¹⁸ Ndoñe šmattsótmenaye, er chë soye entšábioye juanatsana jenomándama ndoñe chaondëtsobenama; chamna, šmochjama Uámana Espíritu sempre y bëtscá tšëngaftangbe ainaniñe chaotsemándama.

¹⁹ Šmochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espíritu inétsama tšëngaftanga chašmotsobena jacántama soyëngaca; chca, nyets ainánaca Bëngbe Utabnabiama šmochjacántaye y cha šmochtsatschuanaye.

²⁰ Nyets tempo y lempe ntšamo cha tojamama Bëngbe Bëtsá chë Taitá šmochtsatschuanaye, Bëngbe Utabná Jesucristbiajana.

Ntšamo yomna canye yebnentšënga chamotsemnama

²¹ Nyetscanga šmochtsenëyeunana, tšëngaftanga Crístbioye puerta šmorrespetánayeca.

²² Shémanga, šmochtsetátšëmbo tšëngaftangbe boyanga chë yebnentša mándayënga imomnama; y nyets tempo chca šmochtsama, Bëngbe Utabná chašmotsobedecénama.

²³ Er boyá endmëna shembe mandayá y inyëná, ntšamo Cristo chë ošbuáchiyëngbe mandayá y inyëná endmëncá. Cha chënga tojatsebacá y mora cha chënga entsamënda, mo chë bestšaše nyets cuerpo jtsemandayancá; ²⁴ y chca, ntšamo chë ošbuáchiyënga, Cristo chëngbe amëndayá yomnama imotatsšëmbcá y chca jtsamana, cachcá, chë shemángnaca entsamna jtsemnana nyetsca soyënguiñe chëngbe boyángaftaca.

²⁵ Boyanga, tšëngaftangbe shémanga šmochtsababuánjeshana, ntšamo Cristo chábeñe ošbuáchiyënga yojanababuanjeshancá, y chca, chabe derecho vida jtsobomñama cachcá tojanonyá y chëngbiana tojanóbana.

²⁶ Chca tojanma, chënga chabe entšanga y puerta tšábënga jábiamama; y chënga tmojánenabaye ora, tmojaninyanjé Bëngbe Bëtsá chëngbe bacna soyënga tojánabuajuanama, y chabe delante tšábënga chamotsemnama cha tojanmama. Cha chca tojanma, er chënga chábeñe imojtsanošbuaché, chabiama buayenana soyënga tmojanuena ora.

²⁷ Cha chca lempe tojanma, chë ošbuáchiyënga japróntayama corente tšábënga y uámanënga cachabiama chamotsemnama, ndocna bacna soye ndbomnënga, ni ndocna entšá chaondobená jayanama chënga imomna chë ndoñe tšabá tmonjamënga ca, ni ndocna inyë cachca sóyeca.

²⁸ Ntšamo canye boyá cachabe cuerpo endbetsebobonshancá, cachcá cha bontsemna chabe shëmbioye jtsebobonshánana. Nda chabe shëmbioye tbojtsebobonshana, cachábioye jtsenobobonshánana, er chata cánjiñe jtsemnana mo nyë canye entšá

cuenta. ²⁹ Er ndocná cachabe cuerpo jtsáboyenjána, ndayá saná jan-guangoñana y jtsinñenana, ntšamo Cristo bēnga chē ošbuáchiyēngaftaca endbetsamcá; ³⁰ er bēnga n̄yetscanga cán̄yiñe mondmēna mo chabe cuerpo cuaftsemncá, y bēnga mo chabe cuerpentša soyēnga cuaftsemncá. ³¹ Ntšamo Bēngbe Bētsabe uabemana palabreñguñe endayanca: “Chíyeca, boyabása chabe taitá y chabe mamá echanjésabashejuana chabe shēmaftaca jenútanama, y chē útata mo can̄yacá bochántsemna ca.” ³² Chē soyēnga josértama puerta totcá comna, pero atše šcuayana, chē soye entsoyebuambná ntšamo Cristo chábeñe ošbuáchiyēngaftaca yomnama. ³³ Pero morna, tšēngaftanga cada ona cachabe shémbioye chabotsebobonshana, ntšamo cachá iuenobobonshancá, y shema boyábioye ndoñe stētsoye chabondēquedá.

6

¹ Bāsenga, Bēngbe Utabnáftaca cán̄yiñe mo can̄yacá bētsemnayeca, tšēngaftangbe bētsétsangbioye šmochtsayaunana, er chca jamana tšabá endmēna. ² Moisesbe leyñe can̄ye mando endmēna, y chentše endmēna chē Bēngbe Bētsabe natsana mando, ndayentše cha tojašbuachená tšabe bendicionēnga jamama: “Acbe taitá y acbe mamá ndoñe stētsoye catjētsaquédaye, ³ tšabe vida chacuetsobomñama y quem luarentše bayté chacuetsiyenama.”

⁴ Taitanga, ndoñe šmattsama tšēngaftangbe bāsenga chaueñenama; más tšabana, chēnga šmochtsabéchaye jtsabuátambayēse y jucacánēse, ntšamo Bēngbe Utabná endbetsabuatambaycá.

⁵ Tšēngaftanga, chē n̄yets tempo n̄ye ín̄yabiamá oservēnēnga, tšēngaftangbe nduiñēnga šmochtsayaunana; chca šmochtsama puerta respétoca, bētscá cuedádoca y n̄yets ainaniñe tšabe juabnēngaca, mo cach Cristbioye cuaftseservencá. ⁶ Y chca chē nduiñēngbioye šmochtsaservena, ndoñe n̄ye chēnga chacmojtsēñya ora, mo nda n̄ye entsangbe delante tšabá joquédama cuaftsebošcá, ndayá Cristbe oservēngcá, chēnga n̄yets ainánaca jtsamana ntšamo Bēngbe Bētsá tojtsebošcá. ⁷ N̄yetsca trabajotémēnga šmochtsama n̄yets tšēngaftangbe añémoca, mo Bēngbe Utabnabiamá cuaftsetrabajacá, y ndoñe n̄ye entsangbiamá. ⁸ Er tšēngaftanga ya šmondétatšēmbo, cada ona, n̄yets tempo n̄ye ín̄yabiamá trabajayá o n̄ye cachabiamá trabajayá tomna, ntšamo tšabe soyēnga tojamcá Bēngbe Utabnábiocana yochjójyēngacñe.

⁹ Y tšēngaftanga, ndēmuan̄yēngbiamá ín̄yēnga n̄yets tempo imoservena, cachcá tšabá chēngaftaca šmochjamna, tondayama ntsaútatjñayēse. Smochtsenójuabnaye, Bēngbe Utabná chē celoca endmēná, tšēngaftanga y chēngbe mandayá yomnama, y chabiamá n̄yetscanga cachcá monduámána.

Ndayá Bēngbe Bētsá entsānga tojatšatá Satanasbiamá jenēuyanama

¹⁰ Y morna, Bēngbe Utabnáftaca cán̄yiñe mo can̄yacá jtsemnēse, ainaniñe bēts añemo šmochtsebomna, chē Bēngbe Utabnabe bēts obenanentšana óbocana añemo. ¹¹ Mo can̄ye soldadcá, ba soyēnga jtochētjuana chē tmojtsentsjananga ora uayayēngbiamá jenēuyanama, tšēngaftángnaca cachcá, n̄yetsca chē Bēngbe Bētsá cmojatšatá soyēngaca šmochtseprontana jenēuyanama, tšēngaftanga jáingñama Satanás ntšámnaca tojtsama ora, ndoñe chacmondáyēñjanama. ¹² Er bēnga ndoñe quemuatenojuerzana cach quem luarentša entsāngaftaca

jenëyëjanama, ndayá bacna espíritënga mando bomnëngaftaca; bacna espíritënga obenana bomnëngaftaca; y quem luarentša entšanga, chë bacna juabna bomna causa y Bëngbe Bëtsabe soyënga nduabuata causa, mo ibetiñe cuaftsoyencá oyena entšángbioye amëndaye espiritëngaftaca; y chë tsbanánoca luarënguñe imonna y bacna soyënga chaotsebinñyama ama espiritëngaftácnaca. ¹³ Chíyeca, lempe ntšamo Bëngbe Bëtsá cmojatšatacá šmochjójyëngacñe y chë soyënga jtsamëse šmochtsiyena jtseprontánama, mo canyë soldado jenëuyanama y jáyëjanama bëtscá soyënga tojtchëtjácá. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyëñjanama, y jenëuyanama lempe jtsamëse, chašmobená cha jayëñjanama.

¹⁴ Mo canyë soldadká, jabuache jtsanayana y cochaca canyë morocho soye jenácochjatsana jtsevalentiama y ndoñe chamondëyëñjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftasnacá, y chë Bëngbe Bëtsabe bominiñe tšabá yomna soyënga jtsamëse, mo chë morocho soye cochaca cuaftjencochjatscá, chca, Satanás tšëngaftangftaca tondaye chaondobená jamama. ¹⁵ Mo canyë soldadká jtosecochëtjuana betesco jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayiyayama ntšamo Bëngbe Bëtsá inétsama entšanga tempcá tšabá cháftaca chamotsatsmënana. ¹⁶ Canyë soldado escudo jtsebomnana chë uayayabe uajuinñyana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora. ¹⁷ Mo chë soldadká, canyë morocho buchtsanëse tojtabuchëtsëse chabe bestšaše jenëuyanama, tšëngaftángnaca cachcá, sempre šmochjësejuabnaye Bëngbe Bëtsá cmojätsebacama, y chë juabna cmochanjújabuache, mo canyë morocho buchtsanëse cuaftsabuchëtsancá. Mo canyë soldadká, chë uayayábioye jayëñjanana, chabe espadëjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jayëñjanama. Uámana Espiritu jtsamana, tšëngaftanga Bëngbe Bëtsabe palabra chašmotsebomnana. ¹⁸ Njëts tempo chë Uámana Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo Bëngbe Bëtsáftaca jencuëntama yomncá y chábioye jtseimpadánëse. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuënta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuáchiyëngbiama njëtscangbiama cha šmochtseimpadana.

¹⁹ Atšbiámnaca Bëngbe Bëtsá šmochtseimpadana, atše jóyebuambayama chajontsé ora, cha chë buayenana soye chašuyanama; y atše chayobená tondayama ntjatauatjácá jóyebuambayana, y chca, entšanga chayinñanyë Jesucristbiamana tšabe noticiënga, ndayá chënga tempo ndoñe monjántatšëmbo. ²⁰ Bëngbe Bëtsá šojichmó mo canyá chabe cuenta oyebuambnayacá, chë buayenánama entšángbeñe jóyebuambayama, y chca bétsamama, mora atše utamená sëntsemna. Atšbiamana Bëngbe Bëtsá šmochtseimpadana, atše chayobenama Cristbe buayenánama tondayama ntjatauatjácá jóyebuambayana, ntšamo atše jamama šojtsemncá.

Pablo chënga jtadiósoftanama

²¹ Tíquico, Jesucristbeyeca bëngbe bonshana catšata y canye entšá tšabe palabra bomná, Bëngbe Utabnabe trabajo jamama oservéniñe, ntšamo atše stsemnama y ndayá stsamama tšëngaftanga chašmotsetatšëmbuama, lempe cmochanjácuntaye. ²² Chama cha tšëngaftangbioye sënjichmó, ntšamo muentše fstsemnama chacmëyanama, y tšëngaftanga ainaniñe añemo chašmotsebonnana chaomama.

²³ Atše sëntseimpadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catšátangbe ainaniñe tšabe ebionana chašmotsebonnana, y Bëngbe Bëtsábioye y ínÿengbioye puerte chašmotsababuánÿeshanama, Jesucristbeñe tšëngaftangbe ošbuachiyánaca; ²⁴ y chaboma, chë Bëngbe Utabná Jesucristbioye bëts bonshanánaca imobobonshanëngbeñe tšabe bendicionënga chaotsemnama, canye ndocná yondobena jatrócama bonshanánaca.

Filipenses

Jacheuayama

1 Pablo y Timoteo, Jesucristbiana oservénata, quem tsbuanácha fséntsabiamná Filipos bēts puebloca Bēngbe Bētsabe entšanga imomnēnga, y Jesucristoftaca cānyīñe mo canýacá imomnēngbiana. Fséntsabiamná nýetsca chē Jesucristbeñe ošbuáchiyēngbiana, nýetsca chentša uanatsanēngaftaca y chē inýe ošbuáchiyēnga ujabuáchanīñe trabajayēngaftaca. 2 Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chaboma tsēngaftangebeñe tsabe bendicionēnga chaotsemnana, y chaboma tsēngaftanga ainaniñe tsabe ebionana chašmotsebomnana.

Pablo Bēngbe Bētsábioye tbojtanchuá ošbuáchiyēngbiana

3 Cada tsēngaftangbiana stenojuabó ora, Bēngbe Bētsá tsēngaftangbiana sēndbētsatschuanaye; 4 y Bēngbe Bētsá tsēngaftangebe tsabiana stseimpadana ora, atše corente oyejuayá chca sēndbētsama, 5 ntšamo tsēngaftanga atše šmojuájabuachama, tsabe noticiēnga Jesucristbiana entšanga abuyiynayiñe, tsēngaftanga Jesucristbeñe jtsošbuáchiyama šmonjanbojatsé orscana y mēntscōñama. 6 Atše corente sēntsetatšēmo, Bēngbe Bētsá tojanbojatsé tsēngaftangebe ainaniñe tsabe soyēnga jtsamama, y más tsabe soyēnga yochtsamama. Y chca yochtsama, lempe ntšamo tsēngaftangbiana cha yojtsejuabnacá chaochnēnguēntscuana, y chca, Cristo Jesús yochjésabēntscuana. 7 Atše tsēngaftangbiana sempre ainaniñe sēndbētsenojuabnaye, chíyeca atšbiana puerte tsabá entsemna chca tsēngaftangbiana jtsejuabnayana. Tsēngaftanga nýetscanga atše šmonjuájabuache jamama chē Bēngbe Bētsá tša tsabia bétsemnayeca šonjanēntšabuaché trabajo. Atše chē Bēngbe Bētsabe trabajo sēndbomna jamama, mora sēntsētámena ora o natjēmbana shjoca stsana ora, nýetscāngbioye tsabá inýinýnayiñe chē tsabe noticiēnga ndegombre soyēnga bétsemnana, y bētscá amiñe entšanga chē soyēnguīñe corente chamotsošbuáchema. 8 Bēngbe Bētsá yotátšēmo ntšamo sēntsichamcá ndegombre bétsemnana. Atše tša sēntseboše tsēngaftanga jányama y chontsababuanýeshana cachcá ntšamo Cristo Jesús atše šondbobonshancá. 9 Atše, Bēngbe Bētsá sēntseimpadana tsēngaftanga cada te más cha chašmotsebobonshánama y chē inýengbioynaca, chca, osertánana chašmotsebomnana ndayá chē ndegombre soye bétsemnana jtsetatšēmbuama, y chašmotsetátšēmo ndayá tsabá o ndayá ndoñe tsabá tondmēnana; 10 y chca, chašmotsobena siempre jabocacayama chē puerte tsabá yojtsemna jamama soye. Chca, Cristo yochjésabo ora, tsēngaftanga puerte tsabe vida šmochántsebomna, bacna soyēngaca ndēmandánēnga; y tondaye quešmochátama, chora chē entšanga chca ndoñe tsabá quenátsmēna ca chamuátichamuama. 11 Y lempe ntšamo chašmojtsamcá ndegombre tsabá echántsemna, y nýe Jesucristo endobena jamama entšanga chca chamotsamama. Nýetsca chē tsabe soyēnga echántsemna, Bēngbe Bētsá puerte bētsá y uamaná bétsemnana jinýanýiyama.

Atsbe vida endmēna Cristo jtseservénama

¹² Jesucristbeyeca atšbe catsátanga, atše séntseboše tšëngaftanga chašmotsetátšëmbo, ntšamo atše tijapasama, más bëtscá entšanga Jesucristbiamá tšabe noticiënguine chamotsošbuáchema tojoservema. ¹³ Chca, nÿetscá chë romanëngbe mandadbe bëtš yebna bojanÿá soldadënga y chë inÿe entšanga quem luarentše montsetátšëmbo atše utamená stsemna, atše Cristbiamá tstrabája causa. ¹⁴ Atše utamená séntsemnayeca, ošbuáchiyënguentsana banga ainaniñe más añemo montsebmna, y chíyeca chënga Bëngbe Bëtšabe palabra más y más añémoca y tondayama ntjatauatjca entšángbioye montsabuayiyná.

¹⁵ Ndegombre entsemna, báseftanga Cristbiamá entšángbioye imojtsabuayiyná, pero chëngna nÿe ntšamo tijashjachcá šmojtsántšabošama chca, y chënga imojtseboše, bëtscá jtsamëse, atše chayotjáyanama; chíyeca chca imojtsama. Pero ínÿengna, entšángbioye montsabuayiyná tšabe soyënga ínÿengbiamá jamama ndegombre imojtsebóseyeca. ¹⁶ Mënga chca montsama, atše šmondbobonshánayeca y Bëngbe Bëtšá chë trabajo šojanëntšabuáchema mondétatšëmboeyeca, Jesucristbiamá tšabe noticiënga ndegombre bëtsemnama entšanga jtsinÿanÿanayana; ¹⁷ pero chë ínÿengna chca imojtsama, ndoñe tšabe soyënga ínÿengbiamá imojtsebóseyeca, ndoñe chënga chë ínÿengbiamá tšabe soyënga imojtsebóseyeca. Chënga Jesucristbiamá imojtsoyebuambná nÿe entšanga chënga chamotsarrespetánama, y nÿe cachëngbiamá tšabe soyënga jtsebmnama imojtsebóseyeca. Chënga jtsejuabnayana mochjobenaye jamama atše más chašotsengménama ca, muentše utamená chjëftsemnëntscuana, chënga entšángbioye chca tmojtsabuatambá ora. ¹⁸ Pero ¿ndayase chë soye atšbiamá? Masque ntšámnaca, tšabe soyënga ínÿengbiamá tmojtseboše o ndoñe, Cristbiamá montsoyebuambná, y Cristbiamá chënga montsoyebuambnama atše oyejuayá séntsemna.

Y cabá más chanjóyejuaye, ¹⁹ er atše séntsetatšëmbo quem utámenentsana atše chjëseboचना. Atše séntsetatšëmbo muentšana chjëseboचना, tšëngaftanga Bëngbe Bëtšá šmoimpadánayeca y Jesucristbe Uámana Espíritu šuajabuachánayeca. ²⁰ Atše corente jtsošbuáchiyëse Bëngbe Bëtšabeñe sëndobátmana, atše ndocna te tondaye chanjëftsema y chama chjaisëuatjama, pero aiñe nÿetscangbe delante becá añémoca chayoyebuambá, y nÿets tempo pero más mora, lempe ntšamo stsamama y stsihámuama, atše chaima entšanga chaminÿanÿema Cristo puerta bëtšá y uamaná bëtsemnama, y chca chántsama masque ainá o obaná chaitsemnëse. ²¹ Chca entsemna, er atšbe vida Cristo jtseservénama endmëna, y nderado atše chajjóbanëse, nÿetscanga puerta bëtš soye mochanjëftsashjache. ²² Pero atše ainá stsemnëse, chanjobenaye más uámana trabajo Cristbiamá jëftsemama. Chíyeca, atše ndoñe corente quetsátstatšëmbo ntšamo mora jobuáyanana, ainá jtsemnama o ndoñe. ²³ Ndegombre mora puerta šontsëtëmnana ntšamo jobuáyanana: atše tša sëndboše ndoñe más quem luarentše ntjëftsemnana, Crísoftaca jtsatsmënama, y ndegombre chca atšbiamá puerta tšabá nántsemna; ²⁴ pero, ínÿoicana tšëngaftangbiamá šontsemna ainá jëftsemnana. ²⁵ Atše corente séntsetatšëmbo chca ndegombre yochtsemnama, y chíyeca séntsetatšëmbo atše cabá ainá chjëftsemnama, tšëngaftanga jujabuáchama más Jesucristbeñe chašmotsošbuáchema, y chiñe bëtscá oyejuayana chašmotsebmnama. ²⁶ Chca, atše tšëngaftanga jutsëtsayama choye chajjá

ora, chašmobená inje soyama más Cristo Jesús jëtschuayama.

²⁷ Morna, chë más uámana soye entsemna, tšëngaftanga chašmotsama ntšamo jtsiyenama ntšamo chë Cristbiamá tšabe noticiënguñe endayancá. Y mëntsá, cachcá, jutsëtsayama chajá o ndoñe, atše chántsetatšëmbo tšëngaftanga Jesucristbeñe ošbuáchiyama ndoñe šmotsajbanama, y añe beca ošbuáchiyana chábeñe šmotsobomñama; nyetscanga cachcá šmojtsejuabnýeca y nyetscanga cach soye šmojtsebóseyeca, cányiñe nyetscanga enutanánënga jtsenojuerzánëse, ndocná chë tšabe noticiënguñe tšëngaftanga šmobomna ošbuáchiyana chacmondábuajuanama. ²⁸ Tšëngaftangbe uayayëngbiamá tondayama šmattsauatja, sempre bëtscá añemo šmochtsebmna. Chca tšëngaftanga šmochanjñyanýiye chënga pochocánënga mochtsemnama, y tšëngaftangna atsebácanënga šmochtsemnama. Y chë soye Bëngbe Bëtsá tšëngaftangbiamá echántsama, Cristbeñe šmošbuachéyeca. ²⁹ Chca echanjopása, er Bëngbe Bëtsá tšëngaftangftaca puerte tšabia endmëna, Cristbiamá oservénënga Bëngbe Bëtsá tcmojábiamá, pero ndoñe nye chábeñe chašmotsošbuáchema, ndayá chabiamá chašmosufrímnaca. ³⁰ Tšëngaftanga y atše cachca soyama montsenojuerzana. Tšëngaftanga ya šmonjinje ntšamo atše sënjánenojuerzana, entšanga jinñyanýiyama chë tšabe noticiënga ndegombre soyënga bëtsemnama. Y mora, tšëngaftanga noticiënga šmochanjóyëngacñe ntšamo atše cach soyama cachcá stsamama.

2

Ndoñe uámanënga šmattsenobiamnaye, ntšamo Cristo ndoñe tonjanmcá

¹ Tšëngaftanga, Cristoftaca cányiñe mo canýacá jtsemnëse, ainaniñe bëtscá añemo šmontsebmna. Cristo cmondábabanýeshana, y chë soye tšëngaftanga cmontséjabuachana nyetsca trabajënguentsana tšabá jabocanama. Y tšëngaftanga Cristbe Espíritoftaca cányiñe mo canýacá šmontsemna; tšëngaftanga nyetscanga šmondénbobonshana y nyetscangbiamá jóngmiamá šmonduamana. ² Tšëngaftanga lempe chca šmobómnyeca, atše corente oyejuayá šmochjábema, er tšëngaftanga nyetscanga cachcá cányiñe šmondëjuabná, cachcá nyetscanga šmondénbobonshana, nyetscanga mo canýe ainancá šmondobomna, y nyetscanga cachca soye šmondboše. ³ Tondaye šmattsama nye ínýenga chë sóyeca chamotjáyanama, o nye tšëngaftanga tša bëts soyënga amënga šmomna ca entšanga chamotsejuabnama; pero ndoñe yapa uámanënga šmojtsemna ca šmochtsejuabnaye, y cada ona chaotsejuabná chë ínýenga bëngbiamá más uámanënga imomnama. ⁴ Y ndocná tondaye chaondëtsama, nye chabiamá tšabe soyënga jónýenama, sinó ndayánaca chaotsama nyetscangbiámnaca tšabe soyënga jónýenama.

⁵ Tšëngaftanga cmontsamna jtsemnana ntšamo cach Cristo Jesús yojanjuabná y yojanamcá:

⁶ Cha nyets tempo yomna cach Bëngbe Bëtsacá y uamaná cach Bëngbe Bëtsacá,

pero masque chca, ndocna te yonjanjuabná:

“Atše sëntseboše nyetsca entšanga nyets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

⁷ Pero cha mo nduamanacá tonjanóbema, n̄yetsca chabe bomna soyēnga j̄ěftseboshjonēse,

y ndegombre, mo can̄ye oservenacá tojanóbema.

Cha can̄ye entšacá tojanon̄ȳná,

y entšanga can̄ye ndegombre entšacá tmojánin̄ye.

⁸ Cachá tojanlesenciá nduamaná jtsemnama,

y sempre Bēngbe Bētsábioye ibnayeunana, y jobanám̄naca, cruciñe j̄óbanēse.

⁹ Ndayá cha tonjanmama, Bēngbe Bētsá, chē celoca más uámana luare tbojanin̄ȳin̄yé

y chē más uámana uabaina, chē más bētsétsangbe uabainēnguentša uabaina tbojabuajo;

¹⁰ y chca, celoca imomnēnga, y quem luarentše y fshantse jashenoye imomnēnḡnaca n̄yetscanga chamóshamentšema,

Jesúsbioye j̄ětschuayama, chabe uámana uabaina jayanēse;

¹¹ y chca, n̄yetscanga chamuayana Jesucristo chēngbe Utabná yomna ca, chca, Bēngbe Bētsá chē Taitá n̄yetscanga chamotsatschuanama.

Cristbeñe ošbuáchiyēnga entsamna mo buashin̄ȳin̄yana estrellēngcá jtsemnana

¹² Chcasna, atšbe bonshana catšátanga, ntšamo atše tšēngaftangaftaca sēnjama ora, atše sempre šmonjanēyeunancá, mora más šmochtsatēnēyeunana, mora atše tšēngaftangbiana bēnoca stsemna ora. Bētsétsanga ntjatenobiamnaycá y Bēngbe Bētsá jtserrespetánēse šmochtsama soyēnga, chca, tšēngaftangbe tšabe videntše, Jesucristbeñe ošbuáchiyēnga quetsomñecá, tondaye chacmondětsabuáshebenama; ¹³ er Bēngbe Bētsá n̄yets tempo tšēngaftangbe ainaniñe inétsama tšēngaftanga ndayánaca chašmotsebošama y chašmotsamama, ntšamo cha yojubná y yobošcá chaotsemnana.

¹⁴ Ndayánaca jamama chacmojtsējaboto ora, chē soye šmochjama, chca jamama yapa totcá comna ca ntjatichamcá y ín̄yēngaftaca jabuachana ntjatenatsětsnaycá. ¹⁵ Chca cmontsamna, chca, tšēngaftanga šmojtsama soyēnguiñe ndocná ndocna bacna soye chaondín̄yēnama, y puerte tšabe vida chašmotsebonnama. Bēngbe Bētsabe puerte tšabe basengcá šmochtsiyena, tšēngaftanga chē šmojtsemnēnga can̄ye luarentše puerte bacna entšángbeñe y siempre bētscá bacna soyēnga jtsamana uamanēngbeñe. Chíyecna, tšēngaftanga šmochtsiyena puerte tšabe soyēnga jtsamēse, y chca tšēngaftanga šmochántsemna mo can̄ye ibetiñe luarentše buashin̄ȳin̄yana estrellēngcá. ¹⁶ Chē tšabe soyēngaca entšángbioye chauin̄yan̄yé ntšamo muanjobenaye tšabe vida jtsebomnama. Chca chašmojamēse, Cristo cachiñe yochjésabo ora, atše chantsobena tšēngaftangbeyeca puerte oyejuayá jtsemnana, er ntšamo chašmojamcá echanjín̄yan̄ȳiye atše ndoñe n̄ye bonamente jabuache tijatrabajá. Chca atše chántsemna mo nda bētscá tojoprontá, y chentšana ín̄yēngaftaca tojótjajo ora, chēngbioye tojtsayēnjanacá. ¹⁷ Mo chē altaroca can̄ye bachna buiñe tojuabuashanacá, Bēngbe Bētsá j̄ětschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bēngbe Bētsábioye oyejuayá jabemama. Tšēngaftanga bētscá šmojalemošná, Cristbeñe tša šmošbuachéyeca, y tšēngaftangbe ošbuachiyánēnaca endmēna Bēngbe Bētsábioye oyejuayá jabemama. Chē uta soye echántsemna mo chē buiñe y chē oveshacá, Bēngbe Bētsábioye

oyejuayá jabemama. Atše chca stjobanëse, puerte oyejuayá stsemna, y stjama tšëngaftángnaca cachcá chašmotsóyejuama. ¹⁸ Chca, tšëngaftanga cmontsamna oyejuayënga jtsemnana, y šmochjama átšnaca oyejuayá tšëngaftangaftaca chaitsemnana.

Timoteo y Epafrodito

¹⁹ Atše becá ošbuachiyánaca Bëngbe Utabná Jesúsbeñe jtsobátmanëse, sëntsejuabná pronto chjobenaye Timoteo tšëngaftangbiyoe jíchmuama, tšëngaftangbiama chašuabocuéntama, y chca, atše más añemo chaitsetsbomnana. ²⁰ Er nýe cha endmëna canya cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama; ²¹ chë ínýengna nyetscanga nýe cachëngbe tšabiamna ndayánaca jamama jtsejuabnayana, y tondaye ntsebošana Jesucristbiama jamama. ²² Pero cach tšëngaftanga ya šmondëtatšëmbo, ntšamo Timoteo chë padecena soyënguentsana tšabá tonjétsobocñama, y ntšamo Timoteo y atše, mo canye uaquiñá chabe taitábioye cuaftsajabuachancá, cánýiñe fsënjantrabája, más bëtscá entsanga chë tšabe noticiënga chamóyëngacñama. ²³ Chcasna, atše sëntsobátmana cha jíchmuana, ntšamo átšeftaca jopásama chaitsetátšëmbo y cachora; ²⁴ pero bëtscá ošbuachiyánaca sëntsobatmánayeca, sëntsejuabná, Bëngbe Utabná chašojtábocnëse, pronto átšnaca chjobenaye choye jama.

²⁵ Atše sëntsejuabná yojtsemna, Jesucristbeyeca bëngbe catšata Epafrodítnaca choye jíchmuana, nda átšeftaca cánýiñe endëtrabája y chë tšabe noticiënga ndegombre soyënga bëtsemnana jinýanyiyama endenoujierzana, nda tšëngaftanga šmojanichmó atše chašuabëuájabuachama. ²⁶ Cha chanjíchmuá; cha puerte entseboše tšëngaftanga jányama, y yapa ngmënaca entsemna, cha šocá enjamna, y enjëtšinýna mo jtsobanamcá; pero Bëngbe Bëtsá tšbonjalastemá, y ndoñe nýe chábiyoe sinó átšbioynaca, atše ndoñe más ngmenanënga chayátsbomnana, ntšamo mora sëntsebomnana. ²⁸ Chíyeca atše más sëntseboše cha pronto jíchmuana, as tšëngaftanga cha chašmojtinýe ora, puerte oyejuayënga chašmotsemnana, y atše ndoñe yapa chašondëtsengmenama. ²⁹ Šmochjofja nyets oyejuayánaca, Bëngbe Utabnábeyeca catšátanga quetsomñecá; y nyets tempo chacá amëngbiyoe mo bëtsëtsangcá šmochtsétabna, ³⁰ er batšatema más y matënjétsobana, Cristbiama trabajayíñe uajabuachaniñe. Cha chë trabajo tonjanma atše juajabuáchama, ntšamo cach tšëngaftanga ndoñe chešmatanobenacá, atše juajabuáchama.

3

Ndayá Pablëbiama ndegombre corente yojanámana

¹ Y morna, atšbe catšátanga, ndayá Bëngbe Utabná tojamama móyejuanga. Ndoñe bacá quešnatámana, ntšamo chë inýe tsbuanáchañe tšbonjanëbuabiamcá cachcá cachiñe jtëtëyanama; y chë soye bëtscá cmochanjúabuache ndoñe resjuiñe chašmondëtsemnana. ² Cuedado šmochtsebomna chë ndoñe tšabe entsangbiama, mo quešëngcá imomnënga, chë puerte bacna soyënga mondbëtsamënga, y entsangbe más delicadentše base bobachtema jatëtsana uamanënga; ³ er bënga mondmëna y ndoñe ínýenga, chë ndegombre uinýnanánana bomnënga, bënga Bëngbe Bëtsabe entsanguentsënga bëtsemnana, bënga chë Uámana

Espíritbe uajabuáchenanaca Běngbe Bětsá mondadoránama, bēnga chē Cristo Jesúseftaca cānyīñe mo canyācá bétsemnana mondbétsoyejuama, y bēnga chē ntšamo inyēnga monduamancá bēngbe cuerpiñe jamama tondayama yondoservénama mondbétsejuabnayama.

⁴ Masque atše razón sēndětsóbomñe, ndayá atšbe cuerpiñe tmojamcá ndegombre iuámanama jtsejuabnayama; nderado nda tojtsejuabná razón yojtsebomna chē soyēnga yoservena ca jtsejuabnayama, ndegombre atše chabiamama más razón chama stsóbomñe. ⁵ Sēnjanonyná y posufta tianoye base bobachtema chē más delicadentše šmojantětše; atšbe nyets uta bētsětsata Israeloca entšanguentšata bonjamna, y atšna Benjam-inbe bēts pamillentsá sēndmēna; atšbe tempsca bēts taitanga nyetscanga hebreunga imnamna. Atšna fariseo sēnjamna. Atše sēnjánama, lempe ntšamo judiēngbe leyēnguiñe endayancá, ndayá jamama šojanmēncá. ⁶ Atše tša sēnjánboše Běngbe Bětsá jtseservénama, chíyeca Jesúsbeñe ošbuáchiyēnga bētscá sēnjanēcama; y ndayá canye entšá ibnětsemna jtsamama, Běngbe Bětsabe bominyiñe tšabia jtsemnana, judiēngbe ley jtsocumplinēse, chama ndocná tondaye quenjātsbomna jayanama, atše ndoñe tšabá sēntsana ca.

⁷ Pero lempe chca ntšamo atše sēnjamnama y ndayá sēnjánamama, puerte sēnjanjuabná atšbiama puerte yojanámana ca; pero mora, Cristo atšbe ainaniñe tonjámashēngoyeca, chē soyēnga atšbiama ya ndoñe quenatámana. ⁸ Y cabá más, tondaye atšbiama quenatámana, chē bēts soye jtsonyayēse, Cristo Jesús, Běngbe Utabná jtsabuatmana. Chábeyeca, lempe chē nye quem luarentša soyēnga sēnjéseboshjona, y lempe chē soyēnga atšbiama tondayama quenátoservena; y chca entsemna, chē bēts soye jěftsashjáchama, Cristo jtsabuatmama, ⁹ y cháftaca cānyīñe mo canyācá jtsemnana. Atše ya ndoñe quetsatsnguá Běngbe Bětsabe bominyiñe tšabia jtsemnana, nye ntšamo atše tijamama chē judiēngbe ley jt-socumplinēse, pero Crístbeñe jtsošbuáchiyēse aiñe; Běngbe Bětsá entsama atše chabe bominyiñe tšabia chaitsemnana, atšbe bacna soyēngama jtseperdónase, y lempe chca entsemna atše Crístbeñe sēndošbuachéyeca. ¹⁰ Atše sēntseboše ndayá cha jtsabuatmana, chē obanēnguentšana tojtanayenama cha tojaninyanýe obenana atše chaitsebomnama, atše cháftaca cānyīñe mo canyācá chaitsemna ora; y ntšamo bēnga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnana; ¹¹ y ntšámnaca, atše jěftsashjáchama Běngbe Bětsá chaoma atše chaitayenama.

Yejuana jtsentšénese, Běngbe Bětsábiocana uacanámana josháchiñama

¹² Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Běngbe Bětsabe bominyiñe stsemna ca, pero sempre natsanoye sēntsá, mo nda canye luaroye jashjanguama cuaftsěchamancá; y puerte jtsošbuáchiyēse sēntsobátmana atše chjobenaye jtsemnana, chē ndayama Cristo šojanchembo, er Cristo Jesús ya tonjama atše chabiamama chaitsemnana. ¹³ Atšbe catšátanga, atše ndoñe quetsátichamo chca ya tijashjache ca. Pero chama canye soye sēntsama: chē tempo atše sēnjánbomna y sēnjánama soyēnga, mora lempe stětsoye sēnjaquedá, y bētscá sēntsama jobenayama chē jashjanguama yojtsemnoye jashjanguama, ¹⁴ chē ndēmoca yojtsemna jashjanguama luaroye jobenayama jashjanguama, mo nda canye luaroye jashjanguama ndayánaca juácanama bētscá jenojuérsase cuaftsěchamancá.

Cachcá, átsnaca sentsá chë Bëngbe Bëtsá šojtsachembuana uacanánana josháchiñama, Cristo Jesúsbeyeca; y chë uacanánana entsemna chë nyetsca tescama yomna tšabe vida jtsebmomnana.

¹⁵ Chca bënga šontsamna jtsejuabnayana, chë Jesucristbeñe puerte ošbuáchiyana y nyets tempo cha ústonënga; y nderado tšëngaftanga ndayíñnaca inyetsá šmojatsjuabná ora, Bëngbe Bëtsá chë sóynaca tšabá cmochanjínñanñiye. ¹⁶ Pero morna šontsamna jtsiyenana ntšamo mentscoñama Bëngbe Bëtsabe soyëngama šojosertacá.

¹⁷ Jesucristbeyeca catsátanga, ntšamo atše sëndmëncá tšëngaftanga šmochtsemna, y chë ntšamo jtsiyenama tcbonjaninñanñecá imojtsiyenëngbioye šmochtsënñaye. ¹⁸ Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngmënaca sëndbëtsemna. Banga mondmëna, y chënga ntšamo vida imojtsebmomnama montsinñinñná, lempe ntšamo Cristo chë cruciñe jóbanëse bëngbiana iuayancá contra chënga imojtsemnama, ¹⁹ y chëngbioye nyetsca tescama infiernoca mochántsapochocaye. Chëngbiana chë más uámana soye yojtsemna jtsamana ntšamo cachënga tmojtsebošcá, nye cachëngbe cuerpiñe tšabá jtsomñama. Chënga nña mo bëtš soye cuafjamcá jtsemnana chë soyënga tmojtsama ora, pero ndegombre chënga entsamna cach soyëngama jtsëuatjama; y chënga sempre jésejuabnayana chë nye quem luarama enójuabnayëngbe soyëngama. ²⁰ Chë cuenta bëngna, ndegombre celocama entšanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo. ²¹ Cha bëngbe cuerpënga, chë pronto jopochócama cuerpënga echanjátrocaye, jtsemnama mo chabe cuerpchá, chë obanënguentšana tojtayenabe cuerpchá; y cha chca echanjama, cha puerte obenana lempe jtsemándayama bómñayeca.

4

Bëngbe Utabnáftaca cánñiñe mo canñacá jtsemnëse oyejuayana jtsebmomnana

¹ Chcasna, Jesucristbeyeca atšbe catsátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cánñiñe mo canñacá šmochtsemna. Corente cbondábabuanñeshana y tša sëntseboše tšëngaftanga jánñyama. Tšëngaftangbeyeca atše puerte oyejuayá sëntsemna, y atše corente sëndbëtsoyejuaye tšëngaftangbiana inñyëngbioye jáuyanama.

² Evodia sëntseimpadana y Síntiquenaca, chata chabuatenóyeunama, mo Bëngbe Utabnábeñe ošbuachiyata quetsomñecá. ³ Y ácnaca, nda puerte tšabá átšeftaca tconjatrabajá, chontseimpadana chama chë shembásata chacújabuachama, er chata bëtscá átšeftaca tbonjatrabajá tšabe noti-ciënga entšanga abuayinñayñe. Clemente y inñe entšanga átšeftaca tmonjatrabajá cach soye amiñe. Nyetsca chëngbe uabaina entsábemana chë librëšañe, ndayentše yojtsábemana chë tšabe vida mochjónñyëngbe entšangbe uabaina.

⁴ Sempre oyejuayënga šmochtsemna, Bëngbe Utabnáftaca cánñiñe mo canñacá jtsemnëse, y cachiñe šcutétayana: ¡Móyejuanga! ⁵ Nyetscanga chamotsetátšëmbo, tšëngaftanga tšabe juabna bomnënga šmomnana. Bëngbe Utabná jésabama tempo ya entsobeco.

⁶ Tondayama šmattsenócochinýena, pero cada Běngbe Bětsáftaca chašmojtsencuénta ora, ndayá cmojtséjajotama cha šmochjaimpáda. Y chca chašmojtsama ora, chánaca šochtsatschuanaye. ⁷ Chca, Běngbe Bětsá echanjama chě chabe ainaniñe tšabe ebionana tšěngaftanga chašmotsebomnama; chě tšabe ebionana puerta bětscá endmēna, y bēnga entšanga quetsomñecá ndoñe ntso benana chama jósertana; y chca tšabe ebionánaca, tšěngaftangbe juabnēnguiñe y ainaniñe tondayama quešmochátencochinýena, er tšěngaftanga cánýiñe mo canýacá Cristo Jesúseftaca šmondmēna.

Lempe ntsamo tšabá yomncá soyěngama jtsejuabnayana

⁸ Cabana, atšbe catšátanga, lempe ntsamo ndegombre yomncá soyěnguiñe šmochtsejuabnaye, lempe chě respeto yomereceniñe, nyetsca soyěnguiñe entšangbe bominiñe tšabá yomniñe, nyets tempo corente tšabá yomniñe, nyetsca soyěnga entšanga yogusetániñe, y lempe chě ndayama entšanga tmojtsejuabná tša iuámama ca soyěnguiñe. Lempe chě tšabá yomna soyěnguiñe y jtsatschuanayama yomna soyěnguiñe šmochtsejuabnaye.

⁹ Sempre šmochtsama chě átšbentsana šmojuábouinýe soyěnga, chě atšbiajana šmojóyěngacñe soyěnga, chě atše šmojoyeuná soyěnga y ntsamo šmojinýcá atše jtsamana. Chca šmochtsama y Běngbe Bětsá, chě bēnga ainaniñe tšabe ebionana chamotsebomnama amá, tšěngaftangaftaca echántsemna.

Pablo tojtanacheuá tmojanájabuachama

¹⁰ Atše corente sěndoyejuá Běngbe Utabnáftaca cánýiñe mo canýacá tsmēnana, er tšěngaftanga ba ishinýe chentsana, cachiñe šmojatobená atše jatinýinýiyana ntsachetšá atšbe tšabiana tšěngaftangbiamama iuámanana. Chca, atše ndoñe quetsátichamo tšěngaftanga atšbiamama cmojtsanebnětjomba ca, ndayá ntsamo tšěngaftanga tšabá šmojuabnacá atše jinýinýiyama ndoñe yonjanopodena ca. ¹¹ Atše chca, ndoñe quetsátichamo uajabotá stsemna ca, er atše sěnjuatsjinýe sempre oyejuayá jěftsemnana, nýe ndaye soyiñe masque batšatémnaca stsebomněse. ¹² Atše sěndětatsěmbo ntsamo yomna jtsiyenana chě vida jtsebomnama uajaboto soyěnga tojtsashbeněse, y ntsamo yomna jtsiyenana chě tcuajabótama más bětscá jtsebomněse. Atše tijuatsjinýe oyejuayá jtsemnana masque nýe ndaye soyěnguiñnaca stsemna ora, jasama bětscá stsebomna ora o masque nýe shěntseca jtsemnama šojtsemna ora, atše jtsiyenama bětscá soyěnga stsebomněse o masque ndóñnaca. ¹³ Atše lempe chca sěndobena, atše obenana jtsebomnama Cristo endbétсамayeca. ¹⁴ Masque chcasna, tšěngaftanga tšabá šmonjama, atše padecena soyěnguiñe sěnjamna ora atše juajabuáchana.

¹⁵ Tšěngaftanga, chě Filipos puebloca Jesucrístbeñe ošbuáchiyěnga, corente šmondětatsěmbo, Macedonia luarentšana sěnjěftsanbocna ora, nýe tšěngaftanga atše šmonjanájabuachama; inýe ošbuáchiyěnga ndoñe. Chora enjamna atšbe bojatsena tempo tšěngaftangbe luarentše chě tšabe noticiěnga entšanga abuayinayiñe; y nýe tšěngaftanga atše šmonjanájabuache. ¹⁶ Ba soye atše Tesalónica puebloca sěnjamna ora, y chašmuájabuachama šonjanájaboto ora, tšěngaftanga atšbe opresiděngama crocénana šmonjanafja. ¹⁷ Chca ndoñe quenátayana atše tsjuabná nýe tšěngaftangbentsana ndayánaca jóyěngacñama ca; chě sóyeca atše

sěntseboše ndayá tšěngaftanga más tšabe soyěnga chašmotsamama, Běngbe Bětsá tšěngaftangbiamá más chaotsóyejuama. ¹⁸ Er atše ya lempe sěnjóyěngacñe, y chě šuajabótama cabá más sěntsebomna. Atše chě ntšamo šjuajabotcá lempe sěntsebomna, chě tšěngaftanga Epafrodítóftaca šmonjanichmó soyěngaca. Ndayá atše šmojanichmocá, Běngbe Bětsabe bominjíñe puerte tšabá entsemna, mo juatšěmbonama ndayá tcojóba y altaroca tcojajuinýe y botamana tojtsonguětsecá, chora cha oyejuayá chca jóyěngacñana. ¹⁹ Atšbe Bětsá, chabe bětscá uámana y běts bomnánaca, echanjama tšěngaftanga lempe ntšamo cmějabotcá Cristo Jesusbiajana chašmóyěngacñama. ²⁰ Entšanga nýets tempo chamotsinýanýná Běngbe Bětsá y Běngbe Taitá puerte uamaná bětsemnama. Chca chaotsemna.

Chěnga jtadiósoftanama

²¹ Atšbe cuenta, nýetscanga chě Jesucristbeyeca Běngbe Bětsábenga imomněnga šmochjácheuaye. Atšeftaca montsemna Jesucristbeyeca catšátangnaca cmontsacheuaná. ²² Nýetscanga chě muentše Běngbe Bětsábenga imomněnga, y más chě romaněngbe mandadbe běts yebnoca oyeněnga, cmontsacheuaná.

²³ Atše sěntseimpadana Běngbe Utabná Jesucristo, chaoma tšěngaftangbeñe tšabe bendicioněnga chaotsemnama.

Colosenses

Jacheuayama

¹ Atše Pablo, Jesucristbe ichmoná Běngbe Bětsá chca yobóseyeca, y Jesucristbeyeca běngbe catšata Timotéoftaca, ² quem tsbuanácha sěntsabiamná chě Colosas pueblocá Běngbe Bětsábenga imomněngbiamá. Tšěngaftanga běngcá Jesucristbeñe ošbuáchiyěnga šmondměna, y chca, Jesucristbeyeca běngbe catšátanga. Atše sěntseimpadana Běngbe Bětsá Běngbe Taitá, chaoma tšabe bendicioněnga tšěngaftangbeñe chaotsemnana, y chaoma tšěngaftangbe ainaniñe tšabe ebionana chašmotsebonnana.

Pablo, Běngbe Bětsábioye tbojanimpadá Colosas pueblocá ošbuáchiyěngbiamá

³ Běngbe Bětsá, Běngbe Utabná Jesucristbe Taitá tšěngaftangbiamá fstseimpadana ora, cha sempre fchandbětsatschuanaye, ⁴ er běnga fsěnjátatšěmbona ntšamo tšěngaftanga Cristo Jesúsbeñe tša šmojtsošbuáchema, y ntšamo tšěngaftanga nyětscanga chě Běngbe Bětsábenga imomněnga šmababuánjěshanama. ⁵ Natsanama, chě ndegombre buayenánama, chě tšabe noticiěnga, tšěngaftanga tcmojanabuatambá ora, tšěngaftanga botamana šmojanuena ntšamo chě buayenániñe bejtsayancá, chě tšěngaftanga šmojtsobena tšabe soyama jobátmana, Běngbe Bětsábeñe jtsošbuáchiyěse. Chě šmotsobatmana soye entsama tšěngaftanga Jesucristbeñe puerte chašmotsošbuáchema y nyětscanga chašmotsababuánjěshanama. Běngbe Bětsá celoca enduaquěcjiná chě tšěngaftanga šmojtsobatmana tšabe soye. ⁶ Chě tšěngaftanga tcmojanabuayená tšabe noticiěnga más bětscá entšanga montsuenana; y chca, nyěts quem luarentše entšanga montsiyena más tšabe soyěnga jtsaměse. Chca entsemna ntšamo tšěngaftangbentše tojopasacá, chě natsana te chě tšěngaftanga Běngbe Bětsabe tšabiánama šmojanuena orscana, y ntšamo Běngbe Bětsá puerte bonshanánaca y tšabiánaca běngbioye šuanjěnama ndegombre tcmojanosérta orscana. ⁷ Y chca Epafra tšěngaftanga tcmojanabuatambá, Běngbe Bětsabe bonshánama y tšabiánama. Epafra endměna canya běngaftaca Cristbiamá oservená, y cha běnga fsěndbobonshana; cha Cristbiamá endětrabája běngbe cuenta tšěngaftangbentše. ⁸ Cha šonjáuyana ntšamo chě Uámana Espíritu yojtsama, nyětscanga Jesucristbeñe ošbuachiyěngbioye chašmotsababuánjěshanama.

⁹ Lempe ntšamo tšěngaftangaftaca tojopasama, chě natsana te tšěngaftangbiamá fsěnjauena orscana y měntscoñama, Běngbe Bětsá sempre tšěngaftangbiamá fchandbětseimpadana, cháftaca fstsencuěnta ora. Běngbe Bětsá fsěnděimpadana, chabe Espíritu chaoma tšěngaftanga chašmotsobena jtsetatšěmbuana y jtsosertánana, chca, ntšamo Běngbe Bětsá yobošcá chašmotsamama, tšěngaftanga tšabá chašmotsetatšěmbuama. ¹⁰ Y chca, tšěngaftanga šmochantsobena jtsiyenana jtsaměse ntšamo Běngbe Utabná yobošcá, y sempre šmochántsama ntšamo chabiamá tšabá yomncá. Ntšamo tšěngaftanga chašmojtsiyencá tšabe soyěnga jtsaměse, chentšana nyětsca tšabe soyěnga echanjóbocna, y tšěngaftanga más tšabá Běngbe Bětsá šmochantsábuatma.

11 Atše, Běngbe Bětsá sěntseimpadana, chabe puerte bětscá obenánaca cha chaoma tšěngaftanga ainaniñe bětš añemo chašmotsebmoma; y chca, tšěngaftanga chě padecena soyěnguiñe chašmojtsemna ora, puerte uantaděnga chašmotsobátmanama. 12 Y puerte oyejuayěnga Běngbe Taitá šmochántatschuanaye, nda iuama běnga chamotsobena ntšamo cha chabe entšanga jatšatayama tojašebuachenacá jtsebmoma. Tšěngaftanga šmochanjóyěngacñe ntšamo cmojtšetocancá celoca, chě corente buashinỹinỹana luarentše. 13 Běngbe Bětsá běnga šojatsebacá, Satanás, chě ibetiñe luarentša mandayabe cucuatšentšana, y tojama chě chabe bonshana Uaquiñabe aměndayana běngbe ainaniñe chamotsebmoma; 14 chábeyeca Běngbe Bětsá Satanasbe cucuatšentšana šojatsebacá; o měntšá, chábeyeca Běngbe Bětsá běngbe bacna soyěnga šojtsaperdoná.

Cristo tojanóbanyeca, entšanga Běngbe Bětsáftaca tšabá jtsatsmėnana

15 Cristo tmonjáninỹe ora, běnga tmojántatšěmbona ntšamo Běngbe Bětsá yomnana; entšanga imojobena cha jinỹama, pero Běngbe Bětsábioye ndoñe. Cha, chě Běngbe Bětsabe Uaquiñá, ya natsana yojtsemna lempe chě Běngbe Bětsá tojanma soyěngama; y cha lempe chě soyěngama más uamaná endmėna. 16 Chábeyeca Běngbe Bětsá tojama lempe ntšamo celoca y quem luarentše yobinỹncá, lempe ntšamo chě entšanga imobena o ndoñe mondobena jinỹama soyěnga, y chě espíritěngnaca chě imobena ínỹengbioye jtsaměndayana y obenana imobomna. Běngbe Bětsá, chábeyeca y chabiamá tojama, lempe ntšamo quem luarentše yobinỹncá. 17 Běngbe Bětsá cabá nỹetsca soyěnga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnama yojamncá. 18 Cha endmėna nda nỹetscanga Běngbe Utabnábeñe ošbuáchiyěnga uaměnda, ntšamo chě bestšaše nỹetsca chě cuerpentša soyěnga jtsemandayancá. Cha endmėna nda iuama ošbuáchiyěnga tsēm tšabe vida chamotsebmoma, y cha endmėna chě Běngbe Bětsabe más bětš Uaquiñá. Běngbe Bětsá tojanma, chě cachiñe ainěnga mochtšatsmėnėnguentšana, cha chě natsaná chaotsemnama; nỹe cha canỹa chě más uamana luare chaotsebmoma, nỹetscañe chaotsemándayama. 19 Er Běngbe Bětsá yojanjuabná cachabiamá tšabá yojamna, lempe ntšamo cha yomncá, chabe Uaquiñábeñnaca chaotsemnama, 20 y Běngbe Bětsá tojánbošena, Crístbeyeca nỹetsca soyěnga quem luarentše y celoca, cháftaca tempcá tšabá chaotsatsmėnana. Běngbe Bětsá chě soye tojanma, chabe Uaquiñá cruciñe tojanóbana ora y chabe buiñe tojanábuashana ora; y chca, Běngbe Bětsá tojanma nỹetsca soyěnga quem luarentše y celoca, cháftaca tempcá tšabá chaotsatsmėnana.

21 Tempo, tšěngaftanga Běngbe Bětsá stětšoye šmojanquedá y chábioye uayayěnga šmojamna, bacna soyěnga šmojanjuabná y šmojánama causa; 22 pero mora chabe Uaquiñáftaca, cha mo canỹe entsacá jóbaněse, Běngbe Bětsá tojama tšěngaftanga tempcá tšabá cháftaca chašmotsatsmėnana; y chca tojama, tšěngaftanga chabe delante nỹets tempo chašmotsemnama; chora tšěngaftanga, chabe entšanga, ainaniñe ndocna bacna soye ndbomněnga chašmotsebmoma, y ndocná chaodayana ntšamo šmojamncá ndoñe tšabá yontsemna ca. 23 Pero tšěngaftanga cmontsamna chě bětscá ošbuáchiyana šmondobomnana nỹets tempo jtsebmomana,

Bëngbe Utabnábeñe jtsošbuáchiyama ndocna te ntjajbanacá. Njets tempo chë tšabe noticiënguiñe šmochtsošbuáchiye, y ndoñe šmatjalesencia ndocná tšëngaftangbe ošbuáchiyana chaotrocama; y nýe chca puerte jtsošbuáchiyëse Bëngbe Bëtsábeñe šmochtsobátmana, ntšamo tšëngaftanga šmojanmcá, Jesucristbiamá buayenánama šmojanuena ora. Chë buayenánana endmëna ntšamo ba entšanga njetsca quem luarentša entšángbioye tmojabuayenacá, y atšbe trabajo endmëna cach tšabe noticiëngama entšanga jtsabuayiynayana.

Pablo, ošbuáchiyënga jasérviamá trabajo tmojanbonjé

²⁴ Atše corente sënjesoyejuá mora tšëngaftangbiamá jasúfriama tsobenama. Ba entšanga entsamna jasúfria Cristo jasérviamá, y atše séntsesufrina ntšamo Cristo tojansufricá, mora atše jtsesufrinëse chabe cuenta, ntšamo jasúfria yomncá. Y ntšamo séntsesufrincá entsemna Crístbeñe ošbuáchiyëngbe tšabiamá, chë chabe cuerpcá imomnënga, chënga Crístbenga bëtsemnana. ²⁵ Bëngbe Bëtsá atše šojábema chë Jesucristbeñe ošbuáchiyëngbe canýe ujabuachaná. Cachá chë trabajuama šojanábuayana, chca jamëse, tšëngaftangbe tšabiamá chaotsemnana. Chë trabajo endmëna, lempe ntšamo cha tojayancá entšanga jábuayenana. ²⁶ Bëngbe Bëtsá njetsca entšanga ndoñe tonjanalesenciá, quem luare jobojátšama orscana y njets tempo chë buayenánama chamotsetatsëmbuama; pero mora, chábënga imomnënga chë soye cha tojinñanyé. ²⁷ Bëngbe Bëtsá yoboše, chabe entšanga imomnënga chamotsábuatmama ndayá tempo chënga ndoñe tonjaninñanyécá; y yoboše chë ndoñe judiënga jinñanyiyama tša bëts y tšabe soye yomna chë ndegombre buayenánana, ndayá tempo inýënga ndoñe tonjaninñanyécá. Chë tempo ndoñe yonjanótatsëmbo buayenánana entsemna, Cristo tšëngaftangbe ainaniñe yojtsiyena, y chábëñe puerte jtsošbuáchiyëse šmojtsobena jtsobátmanana, Bëngbe Bëtsá puerte bëtsetsanga y uámanënga chácmabiamama, batšá ntšamo cachá yomncá. ²⁸ Bënga njetscángbioye Jesucristbiamá fchandbëtsabuayiynaye; fchandbëtsëtsësnaye ndayá chënga ndoñe yontsamna jtsamana, y fsëndbëtsabuatambaye njets osertánánaca ndayá chënga aiñe yojtsamna jtsamana, y chca, njetscángbioye Bëngbe Bëtsabe delante junatsama, puerte ošbuáchiyënga y osertánënga Bëngbe Bëtsabe soyënguiñe, chënga Crístoftaca cánýiñe mo canýacá jtsemnëse. ²⁹ Chca chaotsemnana, atše bëtscá sëndëtrabája; y chca séntsama, chë Cristo yojtsama atše chaitsebomnana bëts obenánaca.

2

¹ Atše séntseboše tšëngaftanga chašmotsetatsëmbo, Bëngbe Bëtsá becá tsimpadánama, tšëngaftangbioye jujabuáchama, chë Laodicea puebluquënga Jesucristbeñe ošbuáchiyënga y njetscanga chë ndocna te atše šmonjinýe ošbuáchiyëngnaca. ² Atše chca sëndama, tšëngaftanga y chënga ainaniñe bëts añemo chašmotsebomnana, y cánýiñe mo canýacá chašmotsemanama, njetscanga jtsenbobonshánëse. Chca, njets osertánana tšëngaftanga chašmotsebomnana, y chë tempo Bëngbe Bëtsá entšanga ndoñe tonjaninñanyé buayenánama chašmotsetatsëmbuama, y chë buayenánana Crístbe soye entsemna. ³ Mo canýe bëtscá bomnana iytëmena soy cá pero mora ya uinýenana, cachá Crístbeñe entsemna njets osertánana y obenana Bëngbe Bëtsá jtsabuatumama. Chë soye tempo

Bëngbe Bëtsá entsanga ndoñe tonjaninÿanjé, pero mora Cristo yojsama bënga chë uámana soyënga chamotsebomnama. ⁴ Atše chca séntsihamo, botamana palabrëngaca ndocná chacmondáingñema. ⁵ Er masque choca tsëngaftangafaca atše ndoñe quetsásmëna, atšbe ainana aíñe choca tsëngaftangafaca entsemna; y atše puerte séntsoyejúá tsëngaftanga šmatenÿeyunanama y nÿets tempo Bëngbe Bëtsábeñe šmojtsošbuáchema.

Crísoftaca cánÿiñe mo canÿacá jtsemñese, entsanga ndegombre tsabe vida jtsebomnana

⁶ Tsëngaftanga Jesucristbeñe ošbuáchiyënga šmojanóbiana ora, šmojanayana: “Cristo Jesús, Bëngbe Utabná entsemna ca”. Chcasna, tsëngaftanga cmontsamna jtsiyenana soyënga jtsamëse mo chë cháftaca cánÿiñe mo canÿacá tojtsemnacá. ⁷ Chca šmontsobena jamana, cháftaca cánÿiñe mo canÿacá nÿets tempo jtsemñese. Smochtsiyena jtsamëse ntšamo cha tojabuatëmbacá y cada te más chca. Cabá más smochtsošbuáchiyë chë Cristbiana buayenana soyëngama, ntšamo tcmojuatambacá; y Bëngbe Bëtsá sempre šmochtsatschuanaye.

⁸ Cuedado šmochtsebomna, ndoñe šmatjaleséncia ndocná chaondëtsamama tsëngaftanga jtsajbanama Cristbeñe ošbuáchiyana jtsebomnana. Chca entsanga montseboše juabnëngaca tsëngaftanga jáingñama, nÿe básefta entsangbe juabnënga y tondayama ndoservena juabnënga. Chë juabnënga jtsóbocanana ntšamo bëts taitanga básengbioye mondbetsabuátambayentšana y chë espíritëngbentšana, ndëmuanÿengbiana entsanga jtsejuabnayana chënga nÿetsca soyënguñe imománda ca; pero Cristbentšana chë juabnënga ndoñe ntsóbocanana.

⁹ Cristo endmëna cachcá ntšamo Bëngbe Bëtsá yomncá, masque mo canÿe entsacá quem luarentše yojëftsiyena; ¹⁰ y Bëngbe Bëtsá tojama tsëngaftanga ndegombre tsabe vida chašmotsebomnama, Crísoftaca cánÿiñe mo canÿacá bëtsemnayeca; y Cristo, nÿetsca chë mándayënga y obenana bomnëngbiana más uamaná endmëna. ¹¹ Tsëngaftanga Crísoftaca cánÿiñe mo canÿacá bëtsemnayeca, mo uinÿnananëngcá šmontsemna, tsëngaftanga Bëngbe Bëtsabe entsanga šmomnana. Quem uinÿnanánana ndoñe quenátsmëna mo chë más delicadentše base bobachtema tmojatëtscá, cach entsángbeyeca ntšamo judiënga monduamancá, pero aíñe entsemna cach Cristo nda tcmojauinÿnaná; y chë uinÿnanánana entsemna, tsëngaftangbe ainanentšana Cristo bacna juabnënga jabuajuánayana. ¹² Tsëngaftanga šmojánenabaye ora, enjamna mo ntšamo cach Cristo tmojanatbontsacá tsëngaftanga utebuantsánënga cuaftsemncá, er tsëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tsëngaftanga šmojánenabaye ora, enjamna mo tsëngaftanga chašmatayenama Bëngbe Bëtsá cuafjamcá, er mora tsëngaftanga mo tsmëma entsangcá šmondoyena. Chca tojanopasá, Bëngbe Bëtsá obená bëtsemnama tsëngaftanga šmojtsošbuáchema, y chë obenana tojama Cristo cháuatayenama.

¹³ Inÿe tempo tsëngaftanga Bëngbe Bëtsabiana mo obanëngcá šmojamna, yapa bacna soyënga jtsamama šmojanamana causa y uinÿnananënga mo Bëngbe Bëtsabe entsangcá ndoñe šmonjámnyeca, pero aíñe šmojanamana bacna soyënga jtsamana nÿe ntšamo šmojanbošcá. Morna Bëngbe Bëtsá tojama tsëngaftanga tsabe vida chašmotsebomnama,

Cristoftaca cánÿiñe mo canÿacá jtsemnëse, y Bëngbe Bëtsá bëngbe nÿetsca bacna soyënga šojtsaperdoná. ¹⁴ Mo nda ba ndebénënga tojtsabamna y chama tsbuanachangá tojtsamna y chiñe tojtsayana chënga obligaciónaca imojtsemna chë ndebénana pronto jtobocana ca, pero chë entšá chëchangá tojtsandbiana chë entšanga cha ndoñe más chamondëtsendebénama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta. ¹⁵ Jesucristo cruciñe tojanóbanayeca, Bëngbe Bëtsá tojanayëñaná Satanás y chabe bacna espíritënga obenana bomnënga y ínÿengbioye amëndayënga; y nÿetsca entšangbe delante tojaninÿányé cha chënga jtsamëndayama yobenama, mo canÿe reycá chë ínÿënga tojayëñaná ora, chabe entšángaftaca natsana jtsayana y chë ayëñanánëngna ústonoye.

Ananiñe becá jtsebošana chë ošbuáchiyëngbiana celoca yomna soyënga

¹⁶ Ndoñe caso šmattsabiamnaye, ndoñe tšabá šmontsama ca ínÿënga tšëngaftangbiana tmojtsichamo ora, ndayá tšëngaftanga šmétsesaye o šmésofšëšnayama, o ndayá añe o ndoñe šmondbëtsamama Bëngbe Bëtsá jadórana fiestënga ora o shbojueta fiesta ora, o jóchnama tese. ¹⁷ Bayté entsemna, Bëngbe Bëtsá entšangbe cucuatšñe chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninÿányñaye ndayá más chcoye jopásama; entšángbioye yojaninÿányñaye ndayá Cristo yochjanmama. ¹⁸ Báseftanga mondmëna y chënga mo nduamanëngcá entšángbeñe jtsebínÿnana, pero tsoye cachënga corente uámanënga jtse nobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tšëngaftanga ndoñe tšabá šmontsama ca chënga tmojtsichamo ora, ntšamo chënga tmojtsichamcá tšëngaftanga ndoñe šmontsámayeca. Chënga jtsichámuana bëts soyënga mo otjenayoquëcá tmojinÿe ca, y nÿe cachënga puerte jtseñábotamnayana, pero chca chamotsamama razón ndoñe quemátsbomna, er nÿe ntšamo inÿe entšanga imnetsejuabnaycá chëngnaca cachcá jtsejuabnayana. ¹⁹ Chënga Jesucristoftaca cánÿiñe ndoñe tmonjoquedanga, y Cristo endmëna chë nÿetsca ošbuáchiyëngbe amëndayá, mo chë bestšaše nÿets cuerpo jtsemandayancá. Canÿe cuerpiñe chë bestšaše jtsamana nÿets cuerpo chaóbochema, ntšamo Bëngbe Bëtsá tojtseboścá, chë cuerpo ndayá jasama chaotsebomna jtsamëse, y nÿetsca chë cuerpentša soyënga chamenefñanama jtsamëse. Cachcá, Cristo jtsamana nÿetsca ošbuáchiyënga cánÿiñe mo canÿacá cháftaca chamotsemnama, y cada te más tšabá cha chašmotsábuatmama.

²⁰ Cristo tojanóbana ora enjamna mo tšëngaftángnaca cuafjobancá, y Bëngbe Bëtsá tšëngaftanga cmojatsebacá chë quem luarentše imománda espíritëngbe cucuatšentšana. As, ¿tšëngaftanga ndáyeca šmojtsiyena jtsamëse mo chë nÿe quem luarama enojuabnayëngcá? ¿Ndáyeca tšëngaftanga cabá šmobedecena chca mandënga, mo: ²¹ “Chë soye ndoñe matsbanana, chca soye ndoñe catjase, o chë soye acbe cucuatšëca ndoñe catjaca ca”? ²² Lempe chë mandënga, chë ndayá canÿa ndoñe bontsemna jamana, nÿe soyëngama jtsayanana, y tempo tojochnëngo ora, chë soyënga jtso pochócana y chora tondaye ntsámanana. Chë mandënga jtsemnana nÿe ntšamo entšanga mondbetsamcá y ínÿengbioye mondbetsabuatambaycá. ²³ Ndegombre, ba entšanga jtsejuabnayana chë

mandënga tmojamëngbiana, puerte osertanána chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórana yomncá imojtsabuatambá ca, jtsabuátambayana entšá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entšangbe ainanentšana ndoñe ntjajuánana chë bacna soyënga jtsamama juabnënga.

3

¹ Cristo cháuatayenama Bëngbe Bëtsá tojanma ora, enjamna mo tšëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiana yobomncá; y choca, Cristo uámana puestentše endëtbemana, Bëngbe Bëtsabe catsbioica. Y šmochtsinýinýnaye chca šmojtsebošama, ntšamo jtsamëse mora šmojtsiyenama. ² Tšëngaftanga nýets tempo chë celoca soyëngama šmochtsejuabnaye, ndoñe chë nýe quem luarentše yomna soyëngama. ³ Tšëngaftanga Crístoftaca cánýiñe mo canýacá jtsemnëse, jtsemnana mo tšëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca cánýiñe mo canýacá endmëna, y Cristo endmëna nda mora tšëngaftangbe vida yojtsinýena. ⁴ Ndegombre, Cristo endmëna nda endama tšëngaftanga tšabe vida chašmotsebonnama; y quem luarentše cha cachiñe chaojtonýná ora, tšëngaftángnaca chentše cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinýanýiyca, tšëngaftangbiámnaca echanjínýanýiye más bëtsëtsanga y uámanënga šmojtsemnana.

Tempsca vida y morsca vida

⁵ Tšëngaftanga, ntšamo chë nýe quem luarama enójuabnayënga mond-betsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguñe ndoñe chaondëtsejuabná; ndoñe chaondëtsiyena nýe ínýengbiana bacna juabnënga jtsebonnëse, y ndoñe chaondëtseboše nýe bëtscá soyënga ínýengbiana más jtsebonnama, er chca jtsamana jtsayanana, chabiana más yojtsámana soyënga jtsebonnana, Bëngbe Bëtsá jatsbobonshánama. ⁶ Er entšanga mondmëna y chënga chca soyënga jtsamama jtsebošana, y Bëngbe Bëtsá ndoñe ntseyeunanana. Chca entšángaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnana. ⁷ Y tempo, tšëngaftanga šmojaniiyena jtsamëse, sempre nýe chca bacna juabnëngaca, ⁸ pero mora tšëngaftanga cmontsamna lempe quem soyënga stëtsoye jaquédana: ínýengaftaca jetnana, ínýengaftaca rábiaca jtsemnana, ínýabioye ntšamo jáborlama jtsebošana, ínýengbioye joyánguanguana, y ndoñe tšabe palabrënga jtsóyebuambnayana. ⁹ Ndoñe šmattsenbuambnaye, er ntšamo tempo šmojamncá mora tšëngaftanga ya ndoñe cachcá quešmátsmëna, y mora ndoñe quešmátiyena jtsamëse ntšamo tempo šmojanamcá. ¹⁰ Y mora tšëngaftanga šmojashjache jtsemnana mo tsmëma entšangcá, y ntšamo tempo šmojanamcá ndoñe cachcá quešmátama. Bëngbe Bëtsá chca tsmëma entšangcá tcmojábiana; y cha nýets tempo yojtsama, tšëngaftanga cada te más ntšamo cha yomncá chašmotsemnana, chca, corente tšabá cha chašmuábuatmanama. ¹¹ Chíyeca, ndayá Bëngbe Bëtsá tojamama,

ndoñe judiënga y judiënga cachcanga mondmëna; chë más delicadentse base bobachtema tëtshenënga ndoñe más uámanënga quemátmëna chë ndoñe chca mondmënëngbiama; chë inye luarëngocana áshjajnënga, bën tjoye oyenënga, chë nye inyabiama nyets tempo oservënënga y chë cachëngbiama trabájayënga, nyetscanga cachcanga mondmëna. Chë nye ndayá iuámana endmëna Crístbeñe jtsošbuáchiyana y nyetsca ošbuáchiyëngbe ainaniñe cha yojtsemna jtsemándayama.

¹² Tšëngaftanga Bëngbe Bëtsábenga šmondmëna. Cha cmondábabuanyëshana y tcmojabacacá chabe entšanga chašmotsemnana; chíyeca, tšëngaftanga cmontsamna ínÿënga jtsinÿanÿayana nyetscangbiama jóngmiamna šmuamanama, tšabe juabna ínÿëngbiama sempre šmnëtseboimnana, cada ona chë ínÿënga chabiama más uámanënga cuaftsemncá innëtsejuabnayama, nyetscanga puerte bonshanánaca šmnëtšënÿayama, y nyetsca padecena soyënguiñe corente uantadënga šmonnana. ¹³ Nyetscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtná ora. Ntšamo Bëngbe Bëtsá tšëngaftanga tcmojaperdonacá, tšëngaftangnaca cachcá ínÿënga šmochjáperdonaye. ¹⁴ Lempe chë soyëngama más enduámana nyetscanga jtsenbobonshánana. Nyetscanga šmojtsenbobonshánëse, tšëngaftanga šmochantsobena sempre lempe chë inye soyënga corente tšabá jtsamana, ntšamo ndegombre chë soyënga jamama yomncá. ¹⁵ Cristo endama tšëngaftangbe ainaniñe tšabe ebionana chašmotseboimnana. Chë tšëngaftangbe ainaniñe tšabe ebionánaca šmochtsiyena nyetscanga natjëmbana, Jesucristbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga nyetscanga cánÿiñe mo canÿe cuerpcá chašmotsemnana, y chca, natjëmbana chašmotsiyenama. Bëngbe Bëtsá sempre šmochtsatschuanaye.

¹⁶ Chë Cristbe puerte tšabe buayenana soyënga tšëngaftangbe ainaniñe nyets tempo šmochtsambaye. Nyets osertanánaca šmochtsenbuátëmbaye y šmochtsenbuaiynaye. Nyets ainánaca šmochjacánta chë Salmos libréšañe uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tšëngaftanga chašmotsobena jacántama soyënga; chca šmochjama Bëngbe Bëtsá jëtschuayama. ¹⁷ Y lempe ntšamo chašmojtsama o chašmotsichamcá, Bëngbe Utabná Jesúsbeñe ošbuáchiyënga quetsomñecá chca šmochjama, sempre Bëngbe Bëtsá Bëngbe Taitábioye, chábeyeca jtsatschuanayëse.

Ntšamo ínÿëngaftaca jtsiyenama

¹⁸ Shémanga, šmochtsatšëmbo tšëngaftangbe boyanga chë yebnentša mándayënga imonnana, y nyets tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna. ¹⁹ Boyanga, tšëngaftangbe shémanga sempre šmochtsababuánÿëshana, y podesca palabréngaca ndoñe šmattsëtsësnaye.

²⁰ Básenga, tšëngaftangbe bëtsëtsanga nyëtscañe šmochtsayaunana; chca šmojtsamëse, Bëngbe Bëtsá oyejuayá echántsemna. ²¹ Taitanga, ndoñe šmattsama tšëngaftangbe básenga chautënama, ainaniñe tondaye añémoca chënga ndoñe chamondëtsatšmënama.

22 Tšëngaftanga chë nyets tempo nye ínÿabiamá oservénënga, tšëngaftangbe nduiñënga nyétscañe šmochtsayaunana, y ndoñe nye chënga tcmojtsénÿa ora, mo nda nye entsangbe delante tšabá joquédama tojtsebošacá, ndayá chënga šmochtsayaunana nyets ainaniñe ndegombre tšabe juabnëngaca, er tšëngaftanga Bëngbe Utabnabiamá corente respeto šmondbojna. 23 Lempe ntšamo chašmojtsamcá, nyets tšëngaftangbe añémoca šmochtsama, mo Bëngbe Utabná ndegombre cuaftseservencá, y ndoñe nye entsangbioycá. 24 Tšëngaftanga ya šmondëtatšëmbo, ntšamo cha chabe entsanga tojašebuachenacá mo uacanancá, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábënga tšëngaftanga šmomnana, y cha šmondëservena. 25 Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë entsá bacna soyënga tojamcá, er Bëngbe Bëtsabiamá nyetscanga cachcá monduámána.

4

1 Y tšëngaftanga, ndëmuanÿëngbiamá ínÿënga nyets tempo imoservena, nyetsca soyënguiñe tšabá šmochtsama, y nyetscangbiamá cachcá šmochtsemna, chë nyets tempo nye tšëngaftangbiamá oservenëngaftaca, er tšëngaftanga šmondëtatšëmbo celoca canÿa endmëna, ndabiamá tšëngaftangnaca oservénënga šmondmëna.

Ošbuáchiyënga jábuayenama

2 Nyets tempo Bëngbe Bëtsáftaca šmochtsencuéntaye, ntšamo šmojtsichámuama botamana jtsejuabnayëse y Bëngbe Bëtsá jtsatschuanayëse. 3 Bëngbe Bëtsáftaca cha šmojtsencuénta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiamá entsanga jábuayenama, chë buayenana soye ndayama tempo entsanga ndoñe monjántatšëmbo. Atše chë buayenana soye entsanga abuatambaye causa, mora cárceloye sentsétámëna. 4 Chcasna, Bëngbe Bëtsá atšbiamá šmochtseimpadana, atše chayobenama chë buayenana soyënga entsanga jabuatambama, y chë soye atše chaima chënga corente tšabá catafjosertaycá, er atše šontsemna chca jamana.

5 Smochtsiyëna nyetsca soyënga osertanánaca jtsamëse chë Jesucristbeñe ndošbuáchiyëngaftaca, y chca, nyets tempo ínÿënga šmochtsinÿanÿnaye tšëngaftanga Jesucristbeñe ošbuáchiyënga bëtsemnana. 6 Inÿëngaftaca chašmojtsencuénta ora, šmochtsama ntšamo šmojtsoyëbuambnacá chëngbiamá tšabá chaotsemnana, y soyënga šmochtsichamo nyetscanga oyejuayana chamotsebomnana; y šmochtsetátšëmbo ntšamo cmojtsamna cada cánÿabioye jojuana.

Jtadiósoftanama

7 Jesucristbeyëca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiamá bëngaftaca oservená, tšëngaftangbioye noticiënga echanjuamba ndayá átšëftaca tojopasama. 8 Chiyëca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca yojtsopasana, y cha chacmañëmuayama. 9 Cháftaca Onésimo echanjá, Jesucristbeyëca bëngbe bonshana catšata; cha canÿe tšabe palabra bomná endmëna, nda

tšëngaftangbiocana tonjánabo. Chata tšëngaftanga cmochanjácuntaye lempe ntšamo muíñe yojtsopasancá.

¹⁰ Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase. ¹¹ Jesús, chë Justo cánaca uabainá, chánaca cmontsacheuaná. Quem pueblentša nyetsca judiënga ošbuáchiyënguentšana, nýe chë unga átšeftaca mondëtrabája, Bëngbe Bëtsabe amëndayana entsángbioye chaóshjanguama, y chënga mondama atše ainaniñe bëts añemo chaitsebomnama. ¹² Epáfrasnaca cmontsacheuaná, inýe tšëngaftangbiocá y cha Cristo Jesusbiana jatrabájama endoservena. Cha nyets tempo tšëngaftangbiana Bëngbe Bëtsábioye tša bochandbétseimpadana, tšëngaftanga Bëngbe Utabnábeñe ošbuáchiyana ndocna te chašmondájbanama, y nyets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tšëngaftanga corente šmochántsetatšëmbo ntšamo šmojtsamcá ndegombre yomna ntšamo Bëngbe Bëtsá yobošcá. ¹³ Cach atše sënjinýe y sëntsobena jayanama ntšamo cha jabuache yotrabájama, tšëngaftanga jujabuáchama, chë Laodicea puebloquënga y Hierápolis puebloca oyenëngnaca. ¹⁴ Lucas, bëngbe bonshana ashnayá, cmontsacheuaná; y Démasnaca.

¹⁵ Chë Laodiceoca Jesucristbeyeca catsátanga bëngbe cuenta šmochjácheuaye. Ninfábioynaca šmochjachuaye, y nyetsca ošbuáchiyënga chë Bëngbe Bëtsá jëtschuayama chabe yebnentše jénefnama imuamanëngnaca. ¹⁶ Quem tsbuanácha chašmojualiá chentšana, Laodiceoca ošbuachiyëngbiyoe šmochjuíchmua, chócna mëcha chamualiamá; y tšëngaftángnaca šmochjualiá chë Laodiceoca ošbuachiyëngbiyoe tmonjanichmó tsbuanácha, chëcha tšëngaftangbiyoe chaojuáshjango ora.

¹⁷ Arquivo šmochjauyana yejuana chaotsantješna chë Bëngbe Bëtsá tbojabonyé trabajo sempre tšabá chaotsocumplínama.

¹⁸ Atše Pablo, nýe quem palabrënga tšëngaftanga jacheuayama cach atšbe cucuátšeca sëntsabiamná. Smochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

1 Tesalonicenses

Jacheuayama

¹ Atse Pablo, Silvano y Timotéoftaca, quem tsbuanácha sentsabiarná tsëngaftangbiamá, chë Tesalónica bëts pueblocá Jesucristbeñe ošbuáchiyëngbiamá, tsëngaftanga chë Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmommënga. Atse sëntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnama, y tsëngaftanga ainaniñe tsabe ebionana chašmotsebmnama.

Pablo Bëngbe Bëtsábioye tbojtanchuá chë Tesalónica pueblentsa entšangbe ošbuáchiyama

² Bënga sempre Bëngbe Bëtsá fsëndëtschuaná tsëngaftangbiamá, y bënga cháftaca ftsencuénta ora, tsëngaftangbiamá fchandbëtseimpadana. ³ Bënga, Bëngbe Bëtsá chë Taitáftaca ftsencuénta ora, fsëndbétsenojuabnaye ntšamo tsëngaftanga šmotrabájama, Jesucristbeñe ošbuáchiyana šmobómnyeyeca; ntšamo tsëngaftanga tša ínÿenga šmëjabuáchana, Jesucristo šmobobonshánayeca; y ntšamo tsëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama. ⁴ Jesucristbeyeca catšátanga, bënga fsëndëtatšëmbo Bëngbe Bëtsá cmababuánÿeshanama, y cha tcmojábacacama chábënga chašmotsebmnama. ⁵ Bënga chë tsabe noticiënga Jesucristbiamá tcbonjanabuayená ora, ndoñe nÿe bënga jóyebuambayëse chca quenjatšmëna, ndayá chë Uámana Espíritbe obenanácnaca, y bënga corente jtsejuabnayëse chë buayenánana ndegombre soye bëtsebmnama. Tsëngaftanga corente šmondëtatšëmbo ntšamo bënga ftsjamna tsëngaftangaftaca fsënjamna ora, tsabe soyënga tsëngaftangbiamá nguayíñe.

⁶ Chora, ntšamo bënga fsënjanamcá y ntšamo Bëngbe Utabná enjaniyencá, tsëngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatšatá oyejuayánaca, masque ínÿenga tmojamna tsëngaftanga puerta chašmosufrima. ⁷ Mëntsá, tsëngaftanga uánatsanënga šmonjanobiamá ntšamo ndegombre jtšiyenama, nÿetsca Macedonia y Acaya luarentša Jesucristbeñe ošbuáchiyëngbiamá. ⁸ Tsëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entšanga chama quemátstatšëmbo —nÿets luarenache entšángnaca montsetátšëmbo ntšamo tsëngaftanga Bëngbe Bëtsábeñe šmojtsošbuáchema —y chca, bënga tondaye más quešnatëjamoto tsëngaftangbiamá jatichámuama. ⁹ Cach entšanga montsoyebuambná chë bënga tcbonjánabuache ora tša tsábá tsëngaftanga šcojanëbuajama. Chëngnaca montsichamo ntšamo tsëngaftanga šmojtšajbaná chë šmojanjuabná diosënga yojamna soyënga adórayana y šmojanontsé chë tsabe benache jtšhachama, y chë Bëngbe Bëtsá ndegombrá y ainá jaserviama, ¹⁰ y chca, chabe Uaquiñá Jesús jobátmama; mua celocana echanjésabo; chabiamá Bëngbe Bëtsá tojanma obanënguentšana cháuatayenama, y cha šochanjátsebacaye chë uabouana castigüentšana, Bëngbe Bëtsá entšangbe bacna soyëngama chëngbiamá yobomnentšana.

2

Ntšamo Pablo yojantrabája Tesalónica puebloca

¹ Cach tsëngaftanga, Jesucristbeyeca catsátanga, šmondëtatšëmbo bënga tcbonjánabuache ora ndoñe nÿe bonamente quenjatsmënama.

² Tsëngaftanga šmondëtatšëmbo, bënga cabá tsëngaftangbiöye nda ora, Filiposoca šonjanëyánguango y bacá šonjánaborlama; y masque tsëngaftangbioca bëngbe contra entsanga monjamna, Bëngbe Bëtsá tonjanma bënga fchayobená chë tsabe noticiënga bëtscá añémoca jabuátambama.

³ Er bënga entsángbiöye bostero soyënga ndoñe queftsjatanabuayiná, tsëngaftangbiama bacna soyënga ndoñe queftsjatanboše, y entsanga jáingñama ndoñe queftsjatanoyebuambná.

⁴ Bëngna inÿetšá; Bëngbe Bëtsá yojanjuabná bënga chabe trabajo jamama obenënga ftsjamna ca, y chca, šonjanëbuáyana chabe tsabe noticiënga entsanga jabuátambama, y chca bënga fsëndoyebuambná; chíyeca bënga ndoñe nÿe entsangbe bominiñe tsabá chaotsinÿnama queftsátama, ndayá nÿe Bëngbe Bëtsabiama, nda chë ndayá bëngbe ainaniñe yomnama yotátšëmbo.

⁵ Ntšamo tsëngaftanga corente šmondëtatšëmbcá, bënga ndocna te tsëngaftangbiama tsabe soyënga tifjánayana, tsëngaftanga bëngaftaca oyejuayënga chašmotsemnama; y ntšamo tsëngaftanga cbonjanëtsëtsnacá ndoñe quenjatsmëna nÿe tsëngaftangbentsána ba soyënga bëngbiama josháchiñama. Bëngbe Bëtsá chama yotátšëmbo.

⁶ Ndocna te bënga queftsatsnguá entsanga más uamanëngcá bënga chašotsabiamnama, ni tsëngaftangbentsána, ni inÿengbentsána.

⁷ Masque bënga, Cristbe ichmónënga bëtsemnama, matifjanobená tsëngaftanga nÿe sempre jtsamëndayana, bënga ndoñe chca chibiátanma; bënga corente jtsababuánÿeshanëse cbonjánanÿena, ntšamo canÿe mamá chabe básenga jtsabëchayana y corente bonshanánaca jtsanÿenana.

⁸ Tša cbonjánababuanÿeshanayeca, bënga ndoñe nÿe chë Bëngbe Bëtsabe tsabe noticiënga checbënjatanabuayená, tsëngaftanga chiñe chašmotsošbuáchemama ntšamo bënga fsëndošbuachecá, ndayá bëngbe vidënga jáshbiamnaca fsënjanprontana tsëngaftangbe tsabiama. ¡Tša cbondábabuanÿeshana!

⁹ Jesucristbeyeca bëngbe catsátanga, tsëngaftanga šmenabuoinÿna ntšamo bënga bëtscá y jabuache fsënjantrabajama, Bëngbe Bëtsabe tsabe noticiënga abuayinayinÿe y bëngbe vida onguayinÿe, chca, tsëngaftanga ndoñe chacmondëtsamnama bëngbe uajabótama bënga jatatšatnayama.

¹⁰ Cach tsëngaftanga šmondëtatšëmbo y Bëngbe Bëtsánaca, ntšamo bënga ftsjamna tsëngaftanga chë ošbuáchiyëngaftaca fsënjamna ora; fsënjanÿena ntšamo Bëngbe Bëtsá tsabá tbojtsinÿancá, nÿetścángaftaca fsënjánama ntšamo jamama šojanamncá, y ndocná quenátobena jatichámuana ntšamo fsënjanamcá ndoñe tsabá yonjamna ca.

¹¹⁻¹² Tsëngaftanga šmondëtatšëmbo, bënga bëtscá jóyebuambayëse cada ona tsëngaftanguentšá cbonjanëjabuachanama y cbonjánanëmuama, ntšamo canÿe taitá chabe básengaftaca endbetsamcá. Bënga bëtscá cbonjanëtsëtsná ntšamo Bëngbe Bëtsá tsabá tbojtsinÿancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinÿinÿanana jinÿama.

¹³ Bënga, Bëngbe Bëtsabe tsabe soyënga cbonjanabuayinán ora, ntšamo tcbonjanëyancá tsëngaftanga šmonjanuena y šmontsanošbuaché mo

Bëngbe Bëtsábiocana buayenanancá, y ndoñe nÿe entsangbe oyebuamb-nayanacá. Y ndegombre Bëngbe Bëtsabe buayenánana endmëna, y chë palábraca, tsëngaftanga chë chábeñe ošbuachiyëngbeñe Bëngbe Bëtsá bëtscá soyënga yojtsama. Chama sempre Bëngbe Bëtsá fsëndëtschuaná. ¹⁴ Jesucristbeyeca catšátanga, cach tsëngaftangbe luarentša entsanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entsanga mondmëna. Chënga tmonjansufrí cach luarentša entsanga, chë judiënga, chëngbioye monjanëcamena ora. ¹⁵ Chë judiëngbe bëts taitanga, Bëngbe Bëtsabe juabna oyebuamb-nayëngbioye tmojtsanëbaye, y ntšamo chëngbe bëts taitanga tmojanmcá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrínama. Chënga ndoñe tsábenga Bëngbe Bëtsabe bom-injiñe quemátsmëna, y nÿetsca entsangbe contra montsemna. ¹⁶ Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtscá jtsamana bënga ndoñe fchandobenama chca jamama. Judiënga nÿets tempo bacna soyënga monjána; pero chë entsanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerte chëngaftaca tbojetna y echanjácastigaye.

Pablo tša yojánboše, Tesalónica puebloca entsanga jányama

¹⁷ Jesucristbeyeca catšátanga, bënga tsëngaftangbentsana baseftayté jëftseboचना sonjanotocá ora, masque ndoñe choca tsëngaftangaftaca queftsjátanmëna, sempre tsëngaftangbiana fsënjanenojuabná, y tša fsënjánboše tsëngaftangbioye jtésana jautsëtsayama. ¹⁸ Bënga fsënjánboše tsëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojanrabája bënga ndoñe fchandobenama chca jamama. ¹⁹ Atše séntsanboše tsëngaftanga jautsëtsayama, er tsëngaftangbeyeca Bëngbe Utabná Jesusbe delante, cha yochjésabo ora, ntšamo tsëngaftanga šmoyenama, bënga puerte jtošbuáchiyëse fchantsobátmana, corente oyejuayënga fchtsemnana y más bëtsëtsanga fchtsemnana. ²⁰ Aíñe, ndegombre, ntšamo tsëngaftanga šmoyenama, bënga bëtscá añémoca ntšamo tsëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

3

¹ Chíyeca ya ndoñe chibiatanobená más jatobátmanana tsëngaftanga jautsëtsayama; as fsënjanjuabó nÿe bëndata Atenas bëts pueblentše joquédana, ² y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábioye oservëniñe, tsabe noticiënga Cristbiana entsanga abuayinyañe. Fsënjanichmó chacmañémuyayama y chaotsamama tsëngaftanga Jesucristbeñe más chašmotošošuáchema; ³ y chca, ndocná Jesucristbeñe ošbuáchiyana chaondáibanama, masque tsëngaftanga Jesúsbeñe ošbuáchiyënga bëtsemnana, ínÿenga imojtsama chašmotsesufrínama. Er cach tsëngaftanga šmondëtatšëmbo bënga šojtsamna chca quem luarentše jëftsepadécëna. ⁴ Y cabá tsëngaftangaftaca fsënjëftsemna ora, tcbonjanëyana bënga šojánamna jasúfriana; y ndegombre chca tonjopasá, ntšamo tsëngaftanga ya šmondëtatšëmbcá. ⁵ As y chë tsëngaftangbiana jtsetatšëmbuama más

jatobátmanana ndoñe quetstétso benayeca, sënjanjuabó šojétsemna Timoteo jíchmuana. Sënjanichmó atše jtsetatšëmbuama aíñe bëtscá o ndoñe tšëngaftangbe ošbuáchiyana Jesucristbeñe tayoamnama, er atše yapa sënjanjuabná nderado Satanás tojanma tšëngaftanga bacna soyënga chašmotsamama, y chca, bëngbe trabajo tondayama chaondëtso servénama.

⁶ Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tšëngaftanga bëtscá Jesucristbeñe šmojtsošbuáchema y nyetscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiana šmuatenouabnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá. ⁷ Quem sóyeca, Jesucristbeyeca catšátanga, y mora chë bënga nyetsca chë padecena soyënga fstsebmorna ora y ínÿenga bënga jasúfriama imojtsama ora, bëtš añemo fsëntsebmorna, ntšamo tšëngaftanga tša Jesucristbeñe šmojtsošbuáchema jtsetatšëmbëse. ⁸ Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama. ⁹ Mora fchantsobena Bëngbe Bëtšá jtsatschuanayana tšëngaftangbiana, y chë tšëngaftangbeyeca chabe delante bënga oyejuayana ftsbomnámnaca. ¹⁰ Cada te, bnëté y ibeta, tša Bëngbe Bëtšá fsëndétseimpadana jobenayama tšëngaftanga jautsëtsayama chašualesenciama, Bëngbe Bëtšabe palabra tšabá chašmobedecema, chë buayenánana ntšamo yojtšashbencá jabuátambama.

¹¹ Bënga, Bëngbe Bëtšá fsëntseimpadana, cachá y Bëngbe Utabná Jesús, chašújabuache bënga fchayobenama tšëngaftangbioye jama jautsëtsayama. ¹² Y Bëngbe Utabná chaoma más bëtscá chašmotsenbobonshánama, y cachcá corente nyetscángaftaca, ntšamo bënga cbondababuanÿeshancá. ¹³ Chca, tšëngaftangbe ainaniñe bëtscá añemo šmochántsebmorna; y Bëngbe Utabná Jesús cachábengaftaca chaojésabo ora, Bëngbe Bëtšá Bëngbe Taitabe delante ndocná chaodayana, ntšamo tšëngaftanga šmojamcá ndoñe tšabá yontsemna ca, er tšëngaftanga šmondmëna Bëngbe Bëtšábenga, nyë cha jtšeservénama.

4

Ntšamo jtsiyenama, Bëngbe Bëtšá oyejuayá chaotsemnana

¹ Y mora inÿe palabra šmochjatspaséncia. Jesucristbeyeca bëngbe catšátanga, tšëngaftanga bëngbentsana šmonjanatsjinÿe ntšamo jtsiyenana cmojánamna, ntšamo Bëngbe Bëtšábioye oyejuayá jabemama yomncá, y ndegombre chca tšëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsëtná más chca chašmotsamama.

² Tšëngaftanga šmondétatšëmbo ndayá tifjánayana ntšamo tšëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca. ³ Bëngbe Bëtšá endboše tšëngaftanga chašmotsiyenama mo Bëngbe Bëtšabengcá, ndocná bacna soyënga boyabása o shembásaftaca chaondëtšamama, ⁴ y nyetscanga chamotsobena ntšamo canÿe shema jonguanguana, chë ntšamo canÿa Bëngbe Bëtšábia yomná jamama ibomncá, y ntšamo entsangbe bominÿiñe tšabá yomncá, ⁵ y ndoñe chabondónguango nyë cháftaca bacna soyënga chëngbe cuérpoca jamama, ntšamo chë Bëngbe Bëtšábioye

nduabuátmënga mondbetsamcá. ⁶ Chë palabriñe ndocná chabe catšátbioye chabondëingñé, chë catšatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chiyeca bënga ya bëtscá chama tcbonjabuayená. ⁷ Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entšanga mondbetsamcá. ⁸ Mëntšá, nda quem buatëmbana soyënga tojtsábotena, cha ndoñe nýe entšanga jtsëbátanana, ndayá Bëngbe Bëtsábioye, nda tšëngaftangbe ainaniñe Uámana Espíritu cháuamashënguama tojama.

⁹ Atše ndoñe quešnátsmëna juabuábiamana ntšamo cmojtsamna ínýenga Jesucristbeñe ošbuáchiyënga jtsababuánýeshanama, er cach Bëngbe Bëtsá tcmonjabuatambá nýetscanga chašmotsenbobonshánama. ¹⁰ Y ndegombre, tšëngaftanga chca šmondama nýetsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catšátanga, más chca chašmotsamama.

¹¹ Nýa sempre quem soyënguiñe šmochtsentšena: natjëmbana jtsiyenana, ínýengbe soyënguiñe ndoñe ntsontremeténana, y ndoñe ntjatobátmanana nýe ínýenga tšëngaftangbiana chamotsetrabájama, ntšamo tcbonjanëyancá tšëngaftangaftaca fsënjamna ora; ¹² chca šmochtsama, chë ínýenga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

Bëngbe Utabná quem luaroye yochjésabo ora

¹³ Bëngbe catšátanga, bënga fsëntseboše tšëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnana, mo chë ínýengcá, chë tcojóbanentšana ndoñe yontsemna jtayenama ca juabnayëngcá. ¹⁴ Bënga fsëndošbuaché Jesús tojanóbana y tojtanayenama, y cachcá bënga fsëndošbuaché chë tmojóbanënga y Jesúsbeñe tmojtošbuáchese, Bëngbe Bëtsá chëngbiana yochjama chë nýetsca tescama yomna tšabe vida Jesucristoftaca chamotsebonnana, y quem luaroye cháftaca chamuatábama.

¹⁵ Chë soyama bënga cbontsëtsëtsná ntšamo cach Bëngbe Utabná tojëfťsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojťsemnënga, chábioye ndoñe quemochátinýena tsbanánoca, más natsana chë ya obanënga chë te mochtayenëngbiana. ¹⁶ Er entšanga mochanjouena canýe mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetëfťua juajatëtámnaca, y chora cach Bëngbe Utabná celocana echanjástjango. Y chë tmojóbanënga, Cristbeñe imojanošbuachenga, natsana mochántayena; ¹⁷ chentšana, chë ainënga chamojťsemnënga chëngaftaca cánýiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënocá; as chentšana nýetsca tescama cháftaca bënga mochántsemna. ¹⁸ Quem palabrëngaca nýetscanga ndoñe más ngmënanana ainaniñe chašmondëtsebonna.

5

¹ Jesucristbeyeca catšátanga, ndoñe quenátsiyta atše jubuábiamana mocna ora chë soyënga yochjopásama. ² Cach tšëngaftanga corente šmondëtátšëmbo, Bëngbe Utabná yochjésabo chama ndocná

chaondětsejuabná ora, mo canye atbëbanacá jashjanguana ibeta ndocná chama tonjatsjuabná ora. ³ Entšanga chamojyana: “Lempe tšabá endëtsoñe y tondayama quešnátamna játauatjana ca”, chora nye ndeolpe chë entsangbiana tša jasúfriama echanjòshjango, mo canye shembása šešona jtsebomnama ora nye ndeolpe jasúfriama jóntšancá; y ndegombre, entšanga chca jasúfriama quemochatotsbocá. ⁴ Pero tšëngaftanga catšátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tšëngaftanga ndoñe auatjanánënga quešmochátsmëna, mo ndábioye canye atbëbaná tbojotbá ora, chábioye cuaftsauatjanacá. ⁵ Nyetsca tšëngaftanga šmondmëna entsangbe juabna binynayabe básenga, y mo binyniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; ⁶ chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuaftsemangcá oyenënga. Pero aiñe sontsamna mo chë fšnëngcá jtsiyenana, bëngbe cuerpo jtsemándayëse y nyets tempo jtseprontánëse. ⁷ Ibeta ora entsanga jtsemangana, y cach ibeta tojtsemna ora entsanga jotmenangana; ⁸ pero bënga, chë binynentšëngna, sontsamna sempre bëngbe cuerpo jtsemándayana. Sontsamna Bëngbe Bëtsábeñe jtsošbuáchiyana y cha jtsebobonshánana, chë uayaná Satanasbiana jenëuyanama y cha jayëñjanama, mo canye soldadcá, canye morocho soye cochaca jenácochjatsana jtsevalentiana y ndoñe chamondëyëñjanama. Y chë castigüentšana Bëngbe Bëtsá šochjátsebacamnaca puerte jtsošbuáchiyëse jtsobátmanana; y chca, bënga mochántsemna mo canye soldadcá, cha canye casquëse juabuchëtsana jenëuyanama. ⁹ Er Bëngbe Bëtsá ndoñe šonjáchembo bënga chašotsamnana chë nyetsca tescama castigo jtsebomnama. Ndayá Bëngbe Bëtsá šojabacacá, Bëngbe Utabná Jesucristbeyeca bënga chamótsbocama. ¹⁰ Cha bëngbiana tojanóbana, bënga cháftaca cányiñe jtsiyenama chamotsobenama, masque ainënga o obanënga chamojtsemnëse, cha chaojésabo ora. ¹¹ Chíyeca, nyetscanga šmochtsenañëmuaye y šmochtsenájabuachana más jtsošbuáchiyama, ntšamo tšëngaftanga mora ya šmotsamcá.

Pablo choca ošbuáchiyënga jábuayenama

¹² Jesucristbeyeca catšátanga, cbontsaïmpadana chašmotsarrespetana chë Bëngbe Bëtsabiana tšëngaftangbeñe trabajayëngbioye, y chë Bëngbe Utabná tšëngaftanguentše tojábacanga uánatsanënga chamotsemnana y ntšamo jtsiyenama cmojtsamnana chácmabuayenama. ¹³ Cmotsamna chënga jtsarrespetánana y jtsababuányeshanana, ndaye trabajo chënga imojtsamama. Natjëmbana nyetscángaftaca šmochtsiyena.

¹⁴ Quem soyënga chašmotsamámna cbontsaïmpadana: jatrabájama ndoñe tmontsebošëngbioye šmochjucácana, añemo ndbomnëngbioye šmochjáñëmuaye, bëtscá ošbuáchiyana ndbomnëngbioye šmochjújabuache, y uantadënga nyetscángaftaca šmochtsemna.

¹⁵ Cuedado šmochtsebomna, nderado nda bacna soye tbojaborlase, ndocná ndoñe cachcá chabondëtachnënguama. Masha, nye šmochtsentšena nyets tempo tšabe soyënga jtsamama cach tšëngaftanguentšëngaftaca y nyetsca entsangaftácnaca.

16 Njets tempo oyejuayënga chašmotsemna. 17 Sempre Bëngbe Bëtsáftaca šmochtsencuéntaye. 18 Njetsca soyënguiñe Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe ošbuachiyëngcá chamotsamama.

19 Ndoñe šmattsama ntšamo chë Uámana Espíritu tšëngaftangbeñe yojtsamcá chaotsopochocama. 20 Ndoñe šmattsábotena chë Bëngbe Bëtsabe juabna oyebuambnayëngbe buayenana soye. 21 Yejuana šmochjájuaboye y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama. 22 Njetsca bacna soyënguentsána šmochtsojuánañe.

23 Cach Bëngbe Bëtsá, chë bëngbe ainaniñe tšabe ebionana chamotsebonnama endamá, njetsca soyiñe tšábenga chacá chacmabiana, y njets tšëngaftangbe espíritu, ainana y cuerpo chaotsinjëna, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaodayanama. 24 Nda tcmojúbuaja chábinga chašmotsemnama, cha sempre jtsamana ntšamo tojayancá, y lempe cha echanjama.

Inje rueguënga chëngbiana y jtadiósoftanama

25 Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

26 Njetscángbioye mo Jesucristbeyeca catšátangcá šmochjácheuaye, jtenámochëse, ntšamo cach tšëngaftangbe pamíllanga puerta bonshanánaca šmondbetsacheuanaycá.

27 Cbontsaménda quem tsbuanácha njetsca Jesucristbeñe ošbuáchiyënga chašmëbuáliama, y chca séntsama, Bëngbe Utabná chca jamama šojanmandáyeca.

28 Atše séntseimpadana Bëngbe Utabná Jesucristo, chaoma tšabe ben-dicionënga tšëngaftangbeñe chaotsemnama.

2 Tesalonicenses

Jacheuayama

¹ Atše Pablo, Silvano y Timotéoftaca, quem tsbuanácha sentsabiamná tšëngaftangbiamá, chë Tesalónica bëts pueblocá Jesucristbeñe ošbuáchiyëngbiamá, tšëngaftanga Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmomnënga. ² Atše sëntseimpadana Bëngbe Bëtsá, chaoma tsabe bendicionënga tšëngaftangbeñe chaotsemnama, y tšëngaftangbe ainaniñe tsabe ebionana chašmotsebonnama.

Cristo chaojésabo ora, ntšamo entsanga tmojamama Bëngbe Bëtsá echanjayana

³ Jesucristbeyeca bëngbe catšátanga, šontsamna nÿets tempo Bëngbe Bëtsá tšëngaftangbiamá jtsatschuanayana, ntšamo tšëngaftangbiamá jamama šojtsëtocancá, er tšëngaftanga cada te más ošbuáchiyana šmontsebonna, y ntšamo tšëngaftanga nÿetscanga šmojtsebobonshana, tempscama más yojtsemna. ⁴ Tšëngaftangbe ošbuáchiyama y bonshánama, bënga nÿets tempo oyejuayënga fchandbétsemna, chë ínÿenache Bëngbe Bëtsábeñe ošbuáchiyëngcá enefjuanëngbeñe tšëngaftangbiamá jóyebuambayama. Bënga fchandbétsoyebuambnaye ntšamo tšëngaftanga inÿetsá ntjatsjuabnycá Jesucristo šmëstonama, y ntšamo tšëngaftanga chábeñe tša šmošbuachémnaca, masque ínÿenga tša cmëcamena y chašmosufrima bëtscá imojtsama, tšëngaftanga Jesucristbeñe ošbuáchiyënga bétsemnama. ⁵ Tšëngaftanga chca Cristo šmëstonayeca, corente entsinÿinÿena Bëngbe Bëtsá nÿetsca soyënguiñe tsabá amá yomnama, y entsanga ntšamo tmojamama tsabá o ndoñe tsabá bétsemnama jayanama ora, cha chca echanjayana ntšamo entsanga tmojtsomerecencá. Y chca entsayana tšëngaftanga aíñe merecido šmotsobuájoñe chabe amëndayoye jamashënguama ca; y mora, tšëngaftanga choye jobenayama jashjanguama šmojtsamama, ínÿenga imojtsama chašmotsesufrínama.

⁶ Bëngbe Bëtsá echanjama ntšamo jamama ibomncá; echanjama chë tšëngaftanga chašmosufrima imojtsamënga bëtscá chamosufrima; ⁷ y echanjama tšëngaftanga y bënga chë mondësufrinëngbiamá, ndoñe más chamondëtsesufrinama. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá inëtsënga echántsemna. ⁸ Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama, y chë tsabe noticiënga Bëngbe Utabná Jesusbiamá ndoñe montsuenanëngbioynaca. ⁹ Chënga Bëngbe Bëtsá echanjácastigaye, nÿetsca tescama jtsapochócáse; y Bëngbe Utabnábëntšana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bétsemnama. ¹⁰ Quem puerte uámana te, Bëngbe Utabná chaojésabo ora, nÿetsca chabe entsanga, nÿetsca chábeñe ošbuáchiyënga cha mochántatschuanaye y mochántsihamo: “¡Tša obená cha yomna ca!” Y tšëngaftanga chëngaftaca šmochántsemna, er tšëngaftanga šmontsanošbuaché bënga ndegombre fsënjántatsëmo soyënguiñe, chë bënga tchbonjanabuayená soyënguiñe.

11 Chíyeca, chca chaotsemnana, nýets tempo Bèngbe Bètsábioye tšéngaftangbiana fséndèmpadana merecido bomnènga chácmabiamama, chë vida chašmotsebmomna, ndayama cha tcmojúbuaja, y chabe obenána bètsca chaoma tšéngaftanga chašmobena nýetsca tšabe soyènga ntšamo šmojtsejuabnacá jamama, y chašmobená jamama ndaye soyènga ntšamo šmojtsamcá, Jesucristbeñe šmojtsošbuáchema. 12 Chca jtsamése, tšéngaftanga šmochanjínyanýiye Bèngbe Utabná puerte bètsá y uamaná bétsemnana, y cha echanjama tšéngaftanga más uámanènga chašmotsemnana. Chca echanjopása, er Bèngbe Bètsá y Bèngbe Utabná Jesucristo tšéngaftangbiana tšabe juabna ibobomna.

2

Chë Bèngbe Bètsabe contra yomná

1-2 Mora atše sèntseboše Bèngbe Utabná Jesucristo jésabama orscama jáuyanama, chë bènga cháftaca tsbanánoca jteninýenama ora. Básefta entšanga imojtsichamo chë bèts uámana te, chë Bèngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bètsca šmochtsentšena chènga ndoñe chamondobená jamana tšéngaftanga inýetsá juabna tšéngaftangbe ainaniñe chašmátsbmomna. Ndoñe šmatjóyeunaye nderado nda mèntšá chacmojtsétsétsná ora: “Canýe Bèngbe Bètsabe juabna oyebuambnayá šonjáuyana chë Bèngbe Bètsabe uámana te ya tojóshjango ca” o “canýa chca šonjabuayená ca” o “Páblèbiocana tsbuanácha fsènjushache y chiñe entsayana chë te ya tojóshjango ca”. 3 Bètsca šmochtsentšena ndocná tondáyeca chacmondáingñema. Er chë Bèngbe Utabnabe uámana te cabá ndóshjango ora, mallajta entšanga Bèngbe Bètsabe amèndayama contra mochántsemna, y chë Bèngbe Bètsabe contra yomná echanjábocna. Y cha entsemna nda ibojtsemna infiernoca pochocaná jtsemnana. 4 Cha Bèngbe Bètsabe contra echanjóyeuambaye, chë ndèmuanyèngbiana y ndaye soyèngama entšanga imojuabná diosènga imomnana contra echanjóyeuambaye. Chentšana cha echanjayana chèngbiana más obená yomna ca. Y Bèngbe Bètsabe bèts yebnóynaca cha echanjámashèngo, choca echanjót'bema y entšanga echantsétsétsnaye ndegombre cha Bèngbe Bètsá yojtsemna ca.

5 ¿Chë soyama tšéngaftanga ndoñe šmondenabouínýna? Atše cabá tšéngaftangaftaca sènjamna ora, chama sènjanoyeuambná. 6 Y tšéngaftanga šmondétatšèmba, nda mora yojtsama chë Bèngbe Bètsabe contra yomná ndoñe chaondonýnama, cabá chë tempo chca jopásama ndóshjango ora. 7 Mora ya mallajta entšanga puerte bacna soyènga tmojontsé amana, ndoñe ntšamo Bèngbe Bètsá tojayancá chènga jamama yojtsamna ca, y bènga chë soyènga josértama ndoñe quemuátobena, ndayá nýe Bèngbe Bètsá chca šojinýanýese; pero ntšamo tcbonjauyancá chë Bèngbe Bètsabe contra yomnabiana ndoñe queochatèchnèngo, nýa nda chë soyènga ndoñe chaondétsemnana yojtsamábioye Bèngbe Bètsá chabojtsejuaná ora añe. 8 Chora chë Bèngbe Bètsabe contra yomná echanjábocna; pero Bèngbe Utabná yochjésabo ora, echanjángouo y echanjama cha chaóbanama; y tša buashinýinýanánaca y obenánaca echanjábocnama, chábioye bochantsepochóca. 9 Chë Bèngbe Bètsabe contra yomná, Satanasbe obenánaca echanjabo, y entšanga bèts obenana echanjinýanýiye, y chë bèts soyèngaca entšanga ingñènènga mochántsemna. 10 Cha

ba bacna soyënga echanjama ntšamo Bëngbe Bëtsá ndoñe yondbošcá, chca, ba entšángbioye nyëtsca soyënguiñe jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiana chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnama. ¹¹ Chca causa, Bëngbe Bëtsá entseleséncia entšanga ingñénënga chamotsemnama, y chë ndoñe ndegombre soyënguiñe chamotsošbuáchema. ¹² Bëngbe Bëtsá chca echanjama, nyëtscanga chë ndegombre soyënguiñe Jesucristbiana ndoñe tmontsošbuáchenga, chë bacna soyënga amama oyejuayënga tmojtsemnënga, chë nyëtsca tescama castigo chamotsebonnama jayanama.

Bëngbe Bëtsá šojabacacá atsebácanënga jtsemnama

¹³ Pero bënga šontsamna nyëts tempo Bëngbe Bëtsá jtsatschuanayana tšëngaftangbiana, Jesucristbeyeca catšátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnama tcmojánabacama. Bëngbe Bëtsá tcmojatsebacá er chë Uámana Espiritu Bëngbe Bëtsabe entšanga tcmojábiana, y tšëngaftanga chë ndegombre soyënguiñe šmojtsošbuaché. ¹⁴ Chë tšabe noticiënga bënga cbondábuayinyayeca, Bëngbe Bëtsá tcmojúbuaja chábenga chašmotsemnama. Cha tcmojúbuaja Bëngbe Utabná Jesucristbe obenana y buashinÿinÿanánënga chašmotsebonnama.

¹⁵ Chcasna, ndocna te šmattsajbaná ošbuáchiyana chë ndegombre soyënguiñe ntšamo tcbonjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inÿetsá šmatjátsjuabnaye. ¹⁶ Bëngbe Bëtsá puerte tšabia endmënayeca, cha šuababuánÿeshana y tojama bënga sempre añemo ainaniñe chamotsebonnama y chë mochjóyëngacñe tšabe soyëngama corente jtsošbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana, ¹⁷ chata chaboma tšëngaftanga bëtscá añemo ainaniñe chašmotsebonnama, y tšëngaftanga nyëts tempo chašmotsobena ntšamo tšabá yomncá jtsichámuama y jtsamama.

3

Bëngbiana Bëngbe Bëtsá šmochtseimpadana

¹ Y morna, Jesucristbeyeca bëngbe catšátanga, Diosmanda bëngbiana Bëngbe Bëtsá šmochtseimpadana, nyëtsca luarenache más ba entšanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmca. ² Bëngbe Bëtsánaca šmochtseimpadana cha chašotsëbuáuyayama, y chë puerte bacna entšanga ndoñe chamondobenama jamama bënga fchaisufrima, er nyëtscanga ndoñe quemochatošbuáchiye chë fsëndbuayiná palabriñe. ³ Pero Bëngbe Utabná sempre jtsamana ntšamo tojayancá, y cha echanjama tšëngaftanga más chábëñe chašmotsošbuáchema, y ndoñe nyë cachcá quecmatënÿa chë bacna soyënga mandayá nyë ntšámnaca ndoñe chacmondáborlama. ⁴ Y Bëngbe Utabná entšama bënga ndegombre ainaniñe fchaitsejuabnama, ntšamo bënga tcbojanamëndacá mora šmojtsemama y cachcá sempre šmochtsamámncana. ⁵ Bënga, Bëngbe Bëtsá fsëntseimpadana, Bëngbe Utabná benache chacmanÿanÿé bonshánana jtsebonnama ntšamo

Bëngbe Bëtsá endbomncá, y chašmojtseufrina ora, corente añemo chašmotsebomnama, ntšamo Cristo tojansufrí ora yojanbomncá.

Nyetscanga entsamna jtsetrabájayama

⁶ Jesucristbeyeca catšátanga, Bëngbe Utabná Jesucristbe mándoca cbontsaménda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye. ⁷ Cach tšëngaftanga tšabá šmondétatšëmbo ntšamo cmojtsamna jtsiyenana, ntšamo bënga fsënjoyencá: bënga tšëngaftangbeñe fsënjaniyena ora, nye ntjatrabajacá oyënjayënga ndoñe queftsjatsmëna, ⁸ ni ndocnabe saná chibiáise, tondaye ntubuenaycá. Inyetsá enjamna; cada te bnëté y íbeta jabuache fsënjantrabája, chca, tšëngaftanga ndoñe chacmondëtsamnama bëngbe uajabótama bënga jatatsatnayama. ⁹ Y ndegombre, bënga derecho fsënjánbomna tšëngaftanga jamëndama chašcújabuachama; pero masque chca, bënga jabuache fsënjantrabája tšëngaftanga chašmotsetatšëmbuama ntšamo yomna jtsiyenama, y chca chašmotsamama. ¹⁰ Bënga tšëngaftangaftaca fsënjamna ora, mëntsá tcbonjanamëndá: Nda ndoñe tontseboše jatrabájama, cha cach ndoñe chaondëtsesá. ¹¹ Chca fsëntsichamo, er bënga fsënjátatšëmbona, báseftanga tšëngaftanguentsënga imojtsiyena tondaye ntsamcá, pero tša chë ínÿengbe soyënguiñe jtsontremetënëse. ¹² Chca oyena entsángbiöye fsëntsabuayiná y fsëntsaménda Bëngbe Utabná Jesucristbe mándoca, natjëmbana cachëngbe vida onguayíñe chamotsotrabájañama.

¹³ Jesucristbeyeca catšátanga, ndoñe chacmondëumantšé tšabe soyënga amana. ¹⁴ Nderado nda ntšamo quem tsbuanáchañe fsënjayencá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama. ¹⁵ Mo canÿe uayayacá ndoñe šmattsonÿaye; šmochjabuayená mo canÿe catšatcá, chca ndoñe chaondëtsamama.

Jtadiósoftanama

¹⁶ Bëngbe Utabná fsëntseimpadana, cha, chë entsanga tšabe ebionana ainaniñe chamotsebomna iuamá, chaoma tšëngaftanga nyets tempo y nyetsca tescama chca chašmotsebomnama. Bëngbe Utabná tšëngaftangaftaca chaotsemna.

¹⁷ Nÿe quem palabrënga tšëngaftanga jacheuayama cach atšbe cucuátšeca sentsabianná. Atše chca sëndbauapochóca atšbe tsbuanachangá juabemama; ntšamo muentše entsabemancá entsinÿinÿná quem tsbuanácha atšbiácha iuamnama.

¹⁸ Atše, Bëngbe Bëtsá sëntseimpadana, Bëngbe Utabná Jesucristo chaoma tšabe bendicionënga tšëngaftangbeñe chaotsemnama.

1 Timoteo

Jachuyama

¹ Atše Pablo, Jesucristbe ichmoná sëndmëna. Bëngbe Bëtsá bëngbe atsebacyá endmëna y Bëngbe Utabná Jesucristo endmëna ndábeñe bënga, puerte jtsošbuáchiyëse mondobátmana ba soyënga bëngbiana cha yochjamama. Atše Jesucristbe ichmoná sëndmëna, er chata tbojanmandá atše chca jtsemnama. ² Timoteo, atše quem tsbuanácha cbontsabobiamná. Atše Bëngbe Bëtsabe soyëngama entsanga sënjanabuayiyiná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sëntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tšabe bendicionënga chacotsebomnama, chata chacmolastemama y ainaniñe tšabiana ebionana chacotsebomnama.

Pablo chë ndoñe ndegombre soyënga abuátambayëngbiana chënga tojanabuayená

³ Ntšamo chë Macedonia luaroye chocana sënjëftsambocna ora tcbonjanimpadacá, mora cachiñe cbochtëtsimpáda. Efeso puebloca cochjoquéda, básefta entsanga chácuamëndama chë ndoñe ndegombre soyënga ndoñe chamondëtsabatambama, ⁴ ni nyëts tempo ndoñe nyë chamondetsejuabná anteungbe cuentëngama, ni chë ba uabemana uabáinënga chë tempsca bëts taitangbiana. Er nyë chca yapa jesejuabnayanentšana, jóbocnana nyë ínÿengaftaca jabuachana enatsëtsnayeñe, y chca chëngbioye tondayama ntjujabuáchana ntšamo Bëngbe Bëtsá jamama yojuabnacá chaósertama. Chë soyna nyë chábeñe jtsošbuáchiyëse jobenayana josértana.

⁵ Chca mando entsemna nyëtscanga chamotsenbobonshánama, y chë bonshánana endóbocana nda chabe ainantšë ndocna bacna soyënga tondbomnábensana, ntšamo tojtsamcá tšabá yojtsemna ca ainaniñe tojtsejuabná y tojtsetatšëmbuábentsana, y Jesucristbeñe ndegombre ošbuachiyábentsana. ⁶ Báseftanga tmojtsajbaná chca jtsemnana y inÿe soyëngama tmojontšé juabnayana; chíyeca chënga mora imojtsentšena nyë ndayámnaca ndoserverna soyëngama enatsëtsnayana. ⁷ Chënga jtsebošana Bëngbe Bëtsabe ley abuátambayënga jtsemnama, pero chënga ndoñe yontsósertana ni ntšamo imojtsabatambacá, ni mo ndayánaca ntšamo chënga tmojtsichamcá, mo chë soyënga ndegombre cuaftsemncá.

⁸ Pero bënga mondëtatšëmbo chë leyënga tšabá yomnama; tšabá endmëna, chë ndayama chë leyënga tmojuamcá entsá chë leyëngaca tojtsamëse. ⁹ Bëngnaca mondëtatšëmbo, chë leyënga ndoñe tmonjuama chë nyëtsca soyënguiñe tšabá amëngbiana. Chë leyënga tmonjuama quemëntša entsanga jácastigama: ntšamo leyënguiñe ndoñe tontselesenciancá amënga y ntšamo Bëngbe Bëtsá yobošcá ndámënga, chë Bëngbe Bëtsá ndoñe imondadoránënga y bacna soye amënga, Bëngbe Bëtsá ndoñe mondërrespetánënga y Jesucristbeñe jtsošbuáchiyana y Bëngbe Bëtsá jtsadoránana tondaye yondoserverna ca juabnayënga, cachabe taitá o mamá obánayënga y ndëmuanyënga imomna entsanga obánayënga, ¹⁰ boyabásaftaca o shembásaftaca bacna soye amënga y boyabásënga cach boyabásëngaftaca bacna soye amënga, entsanga enënga nyë

ínÿabiam nÿets tempo chamotseservénama, bosterènga y chë nÿe bonamente Bèngbe Bètsabiam júrayènga; chca entsayana, chë leyènga yomna jácastigama nÿetscanga ndëmuanÿenga ndoñe tmontsama ntšamo chë ndegombre buatèmbana soyènguiñe iuayancá. ¹¹ Ntšamo muentše chë leyèngama tijayancá, entsebuátèmbana chë Bèngbe Bètsábíocana puerte tšabe noticiènguiñe, chë ndegombre buatèmbana soye; Bèngbe Bètsá, chë corente bendición bomná, šonjichmó chë buayenánana entšanga jabuátambama.

Pablo Bèngbe Bètsábíoye tbojtanchuá, tbojanlastemama

¹² Atše, Bèngbe Utabná Jesucristo sèndètschuaná, er cha tojanjuabó, ntšamo cha šojanmandacá jobedésama atše tsjètseprontanama, y chíyeca šojanábuayana atše chabiam chaitrabajama; y cha endmèna nda inétsama atše obenana chaitsebomnama chë trabajo jamama. ¹³ Cha chca átšeftaca tonjanma, masque tempo atše chabe contra ba soyènga sènjánichamo, chabe ústonènga sènjanécamena, y chabiam tondaye respeto ntsebomncá sènjánenobuena. Pero Bèngbe Bètsá šonjanlastemá, er atše, Jesucristbeñe ošbuachiyá cabá ndoñe quetsjátanmèna, y chca, atše ndoñe quetsjátantatšëmbo ndayá tsjánamama. ¹⁴ Y chca, Bèngbe Utabná ba tšabe bendicionènga atšbiam tonjanma, y chábeñe ošbuachiyá šonjábema, y tonjanma atše cha chaitsebobonshánama y ínÿengbioynaca. Cha chca bèngbiam tojama, bènga cánÿiñe mo canÿacá Cristo Jesúseftaca bétsemnayeca.

¹⁵ Ntšamo chanjayancá ndoñe nÿe bostero soye quenátsmèna, y nÿetscanga entsamna chca ndegombre bétsemnama jtsejuabnayama: Cristo Jesús quem luaroye tonjánabo, bacna soye amènga jabátsebacama, y chë bacna soye amènguentše atše chë más bèts bacna soye amá sèndmèna. ¹⁶ Chíyeca, Bèngbe Bètsá šonjanlastemá, jinÿanÿiyama cha puerte uantado entšangaftaca yomnama. Y chë soye ínÿengbioyè tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachéngbioyè; chca tonjaninÿinÿé cachá átšeftaca uantado jtsemnèse, atše nÿetscangbiam chë más bèts bacna soye amá jtsemnèse. ¹⁷ ¡Entšanga nÿets tempo chamotsinÿanÿná, chë Utabná nÿets tempo mandayá y puerte bètsá y obená yomnama! Cha endmèna chë ndocna te echanjèftsobaná, chë entšanga ndoñe ntsoobenana jinÿamá y chë nÿe canÿe Bèngbe Bètsá yomná. Chca chaotsemna.

¹⁸⁻¹⁹ Timoteo, aca mo atšbe uaquiñacá condmèna. Atše tcbonjaimpadá, ntšamo tcbonjauyancá entšanga chacúyanama, ntšamo báseftanga Bèngbe Bètsabe juabna oyebuambnayènga acbiam tmojanayancá, y chiñe jtsejuabnayèse chë Jesucristbe soyèngama chacopeliá y nÿets tempo chca chacotsama, Jesucristbeñe puerte jtsošbuáchiyèse, y lempe ntšamo tcojtsamama tšabá yojtsemnama ainaniñe jtsetatšëmbèse. Báseftanga, chènga ndoñe tšabá imonjétsama ca chë ainanoca juabnènga tmojánayana ora, chë soye ndoñe tmonjanuena y chë causa, Jesucristbe soyènguiñe ošbuáchiyana tmojtsanajbananga y tmojanontsé inÿe buatèmbana soyènguiñe jtsošbuáchiyana. ²⁰ Chca tonjopasá Himeneo y Alejándroftaca, y atše sènjalesenciá Satanás chaoma chata chabosufrima; y chca, chata chabuatsjinÿe Bèngbe Bètsabiam ndoñe bacá ntsóyebuambnayana.

2

Pablo tojanabuayená ntšamo Běngbe Bětsá jtsadoránama

¹ Njetsca soyama más cbontsaimpadana ndayá chě Jesucristbeñe ošbuáchiyěnga Běngbe Bětsáftaca chamojtsencuénta ora, njetsca soyěngama ntšamo tojtsějabotcá cha chamotseimpadana, njetsca entšangbiana, y cha sempre chamotsatschuaná. ² Entsemna, njetscangbe tšabiana Běngbe Bětsá jtseimpadánama, pero masna quem luarentša reyěngbiana y inye mándayěngbiana, chca, njetscanga puerte natjěmbana jtsiyenama chamuetsobenama, y njetsca soyěnguiñe tšabá jtsaměse, Běngbe Bětsá jtsatschuanayama, y entšangbe juabniñe tšabá chamotsemnama. ³ Chca jtsamana tšabá endmēna, y Běngbe Bětsá, běngbe Atsebacyá, chama jtsóyejuayana; ⁴ y chca jtsóyejuayana, er cha endboše njetsca entšanga atsebácaněnga chamotsemnama y chě ndegombre buayenánana chamotsábuatmama. ⁵ Chca njetsca entšangbiana endmēna, er nye canye Běngbe Bětsá njetscangbiana endmēna, y nye canya endmēna nda yobena jamama entšanga tempcá tšabá Běngbe Bětsáftaca chamotsemnama; cha endmēna Jesucristo, cach entšá. ⁶ Er Jesucristo, mo canya ínյenga játsebacama cuaftopagacá, chabe derecho vida jtsobomñama cachcá tojanonjya y tojanóbana, chca, njetsca entšanga chamotsobenama atsebácaněnga jtsemnama. Chě soye cha tonjaninjanjé, nya chama tempo yojtsemna ora, chě Běngbe Bětsá njetsca entšanga atsebácaněnga chamotsemnama yobošama. ⁷ Běngbe Bětsá chca njetsca entšangbiana yobóseyeca, Jesucristo šojanábuayana chabe ichmoná jtsemnama, chabe soyěnga entšanga jtsabuayiynayama; ndegombre soye sěntsoyebuambná, ndoñe quetsátsbostero. Sonjanmandá chě ndegombre buayenánana chě ndoñe judiěngbioye jabuátambama, y chěnga entsamna chiñe jtsošbuáchiyana.

⁸ Ntšamo sěnjayancá, atše sěntseboše njetsca chě Jesucristbeñe ošbuáchiyěngcá enefjuana luarěnguenache, boyabásenga Běngbe Bětsáftaca chamotsencuénta, y chora celoye, Běngbe Bětsábioye cucuatse chamatsbaná; pero chamna, ainaniñe bacna soyěnga ntsebmncá, ínյengaftaca ntjatentjayanaycá, y ínյengaftaca jabuachana ntjatenatsětsnycá chěnga chamotsemna.

⁹ Y atše sěntseboše shembásenga entšayangá chamuatíchětjo, mo chě tšabe shembásenga mondbetsichětjoncá, ndoñe nye entšanga chamotsěbuáuatjama y ntšamo tmojtsichětjonama chěngna uámaněnga imomna ca entšanga chamotsejuabnama. Ndoñe quenátamna jtsenóbotamnyana, nya mo chca chquěcněnga jtsemněse, ni castellano soyěngaca o uámana fjantse ndětsbėngaca, o yapa uámana entšayangaca, chca, nye entšanga jinjama tšabá jtsemnama. ¹⁰ Pero aíñe mo chě Běngbe Bětsá adóraye shembásenga mondbetsamcá jtsaměse, chě tšabe soyěnga jtsamana.

¹¹ Nderado nda tojtsabuatambá ora, shembása bontsemna jtsat-sjėndayana, chca ora tondaye ntjatichamcá, y chentša mándayěnga chaotsayaunana. ¹² Atše ndoñe quichatsleséncia, canye shembása boyabásenga chaotsabuatambá, ni chaotsaměnda. Canye boyabása tojtsabuatambá o tojtsaměnda ora, shembása ndocá chaondětsichamo. ¹³ Chca chaotsemna, er Běngbe Bětsá natsana Adán tbojanpormá, y chentšana Eva; ¹⁴ y er Satanás Adánbioye ndoñe tbonjaningñe,

ndayá chë shémbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesencia. ¹⁵ Pero shembása ats-bocaná echántsemna, básenga quem luaroye endbaúshejangoyeca, pero chamna, aífne nyets tempo Bëngbe Bëtsábeñe tojtsošbuáchese, nyetscanga tojtsababuánÿeshanëse, cachá nyetsca soyënguiñe jenomándama tojt-sobenëse, y nyets tempo tšabe soyënga tojtsamëse, ntšamo Bëngbe Bëtsabe entšanga mondbetsamcá.

3

Ntsamo ibojtsemna chë ošbuachiyëngcá enefjuanëngbeñe mandayá

¹ Mëntšá ndegombre endmëna: nderado nda tojtseboše canÿe tra-bajo jtsebomnama, cánÿentše ošbuachiyëngcá enefjuanentše chë inÿe ošbuáchiyënga jtsamëndayama, cha ndegombre yojtseboše canÿe puerte tšabe trabajo. ² Chíyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntšánaca cha bontsemna jtsemnama: ñe canÿe shembásabe boyá; ntšamo jtsiyenama tšabá juabnayá chaotsemna, cachá nyetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaot-seprontana chabe yebnentše posada entšanga júyentšamiamia, y chaot-sobena botamana abuatambayá jtsemnama. ³ Ndoñe yapa tmoyá o penzentero chaondëtsemna; pero chaotsemna tšabá mandbomná, entšanga natjëmbana chamotsiyenama bošá, y ndoñe chaondëtsejuabná ñe crocénana jësebomnama. ⁴ Chaotsetátšëmbo ntšamo nyetsca chabe yebnentša entšanga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtšoye chamondëquedama; ⁵ er, nda cachabe yebnentša entšanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanÿenama? ⁶ Cha ndoñe chaondëtsemna cabá mora cuenta Jesucrístbeñe ošbuachiyá; aífne chca chë ošbuachiyëngcá enefjuanëngbe mandayá tojtsemnëse, nderado ñe cachá uámana entšá nantsenobi-amnaye, y ntšamo Bëngbe Bëtsá Satanásbioye tbonjancastigacá, chca bëtsemnama, cach soyama Bëngbe Bëtsá chë entšábioye buanjacastíga. ⁷ Chánaca bontsemna jtsiyenana jtsamëse, y chca chaojtsama ora, chë Jesucrístbeñe ndošbuáchiyënga tšabá chabiamia chamotsichamo. Chë entšá ndoñe chca tontsamëse, chënga chabiamia mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

Ntsamo ibojtsemna chë ošbuachiyëngcá enefjuanënga ujabuachaná

⁸ Cachcá, chë mándayëngbe ujabuáchanënga mëntšá entsamna: uámana entšangcá nyetscanga chamotsétabna, uta palabra ndbomnënga; ndoñe yapa vínoye chamondëtsetmó, y ndoñe chamondëtseboše ñe paselo becá crocénana jtsebomnama. ⁹ Chënga entsamna ndegombre jtsošbuáchiyana chë Bëngbe Bëtsá tojinÿanÿé soyënguiñe, chë ndayíñe bënga mondošbuaché, chëngbe ainaniñe inÿetšá juabnënga ntjatsbomncá. ¹⁰ Natsana, chëngbiama botamana šmochjshuarrepára jtsetátšëmbuama chënga aífne o ndoñe montsobena mo chë ošbuachiyëngbeñe mándayëngbe ujabuachanëngcá josérviamia. Chënga nyetsca soyënguiñe tšabá tmojtsemnëse, šmochjálesenciaye

chiñe chamoservema. ¹¹ Cachcá, chë shémanga mëntśá entsamna: nýetscangbiana mo uámana entśangcá utabnënga, ndoñe uayátsenayënga, cachënga nýetsca soyënguñe jenomándama obenënga, y nýetscañe tśabe palabra bomnënga. ¹² Canýe uajabuachaná chaotsemna nýe canýe shembásabe boyá, y chaotsetátśëmbó ntśamo chabe básënga y nýetsca chabe yebnentśa oyenënga jtsamëndayana. ¹³ Chë uajabuáchanënga tśabá chiñe tmoservénëse, canýe uámana puesto mochanjashjache, y chënga mochantsobena bëtś añémoca jtsóyebuambnayama ntśamo Cristo Jesúsbeñe tmośbuáchema.

Ndayá Bëngbe Bëtśá bënga šojinýañecá, canýe bëtś buatëmbana soye endmëna

¹⁴ Atśe sëntsobátmana pronto chjobenaye jama aca jauatsëtsayama; pero chca cbontsabobiamná, ¹⁵ nderado atśe betśco jama ndoñe sënjobenase, chaotsetatśëmbuama ntśamo canýa ibojtsemna nýetsca chë Bëngbe Bëtśábënga imomnëngaftaca. Chënga mondmëna chë Jesucristbeñe ośbuáchiyënga, chë Bëngbe Bëtśá Ainabe básënga. Chënga chë Bëngbe Bëtśabe ndegombre soyënga mondbomna chë más uámana puestoca quem luarentśe, y tśa mondëntśena chama ínýengbioye jáyëñjanama. ¹⁶ Nýa ndegombre endmëna, Bëngbe Bëtśá soyënga šojinýañé, y chë soyëngaca bënga montsobena jtsiyenana, chë Bëngbe Bëtśabe entśanga imomnëngcá; chë soyënga bëngbiana ndegombre bëtś buatëmbana soye endmëna, y chë buatëmbana soye mëntśá endmëna:

Cristo quem luarentśe cach entśacá entśángbioye tojánebëbuacna.

Chë Uámana Espíritu tonjinýañé cha nýetsca soyënguñe tśabá amá yomnamá.

Angelënga cha tmojáninýe, y chabiana ba luarënguentśa entśángbioye tmojanabuayená.

Ba entśanga quem luarentśe chábeñe montsanośbuaché, y Bëngbe Bëtśá celoye tbontanatsbaná, cha puerte bëtśá y obená yomnama jinýañiyëse.

4

Báseftanga chë tśabe benachentśana mochtsojuánañe

¹ Uámana Espíritu, nýetscanga catafjosertaycá tojayana, quem luare jopochócama tempo chaojtsobeco ora, básefta entśanga camochtsajbaná ośbuáchiyana chë ndayinë bënga Jesucristbiana mondośbuaché soyënguñe ca. Chëngna, espíritënga entśanga áingñayënga mochántsayanana, y chë ndoñe ndegombre soyënga chë bacna bayëjënga entśángbioye mochtsabuátambaye soyënguñnaca. ² Chca buatëmbana soye jtsóbocanana chë bacna entśanga ntśamo ndegombre tmojuabnacá ndinýinýnayëngbentśana y chë bosterëngbentśana. Chënga chca bacna soye tmojtsama ora, ainanoca ndoñe ntsejuabnayana, ntśamo tmojamcá ndoñe tśabá yontsemna ca, er yapa bacna soyënga tmojama causa, chënga nýe chca chëngbe ainaniñe jésejuabnayana. ³ Quem entśanga ndoñe ntjalesénciana ínýënga chamotsobouamama, y jtsemándayana básefta sananga entśanga ndoñe chamondëtśesama. Ntśamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtśá chë sananga tojanma, Jesucristbeñe ośbuáchiyënga y chë ndegombre soyënga uabuátmënga chamóyëngacñama, Bëngbe Bëtśábioye chama jtsatschuanayëse. ⁴ Er lempe ntśamo Bëngbe Bëtśá entśanga chamosama

tojamcá tšabá entsemna. Ndoñe quešnátamna ndaye saná jtsaboténana, bēnga chē saná tmojuáyēngacñe ora, Bēngbe Bētsá chama tmojētschuase; ⁵ er chca saná Bēngbe Bētsábioye tšabá jtsinŷnana, cachá chca tojayánayeca, y bēnga chē sanama cha mondbatschuayama.

Jesucristbiana trabájayiñe canŷe tšabe oservená

⁶ Aca, chē soyēnga ošbuachiyēngbioye chacojtsabuátambase, aca Jesucristbiana trabájayiñe canŷe tšabe oservená cochántsemna. Y mo nda bētscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bēts añemo cochántsebomna; chca echántsemna, chē bēnga mondošbuaché buayenana soye aca icuatsjendá y icoye-unánayeca, y ntšamo chē tšabe buatēmbana soyēnguñe endayancá sempre icuámayeca.

⁷ Pero ndoñe nŷe quem luarentša entšangbe cuentēnga y ndoservenena cuentēnga cattsuenana. Ba soyēnga cochjama aca bēts añemo ainaniñe chacotsebomnama, mo nda bēts añemo jtsebomnama cachabe cuérpoca ba soyēnga cuaftsamcá, ntšamo Bēngbe Bētsá jadórana yomncá jtsiyenama jtsamēse; ⁸ cachabe cuérpoca ba soyēnga jamana más añemo jtsebomnama, aiñe batšatema endoservenana; pero jtsiyenana Bēngbe Bētsábioye jadórana yomncá jtsamēse, puerte enduámama y juajabuáchana nŷetsca soyēnga tšabá chaotsemnama; chca jtsamana puerte tšabá endmēna cachabe vidama quem luarentše, y chē inŷe vidócnaca. ⁹ Ntšamo tijayancá ndegombre entsemna, y nŷetscanga entsamna jtsejuabnayana chca ndegombre bétsemnama. ¹⁰ Y chē soyama bēnga puerte mondētrabája y mondēsufrina, er chē Bēngbe Bētsá Ainábeñe puerte mondošbuachéyeca, bēnga mondobátmana cha yochjama soyēnga bēngbe tšabiana. Cha endmēna chē nŷetsca entšangbe atsebacayá, pero ndegombre masna, chábeñe ošbuáchiyēngbe atsebacayá cha endmēna.

¹¹ Ntšamo quem soyēngama tcbonjauyancá entšanga cochtsamēndaye y cochtsabuátambaye. ¹² Ndoñe catjaleséncia, aca bobontse comnama, ndánaca chacmotsáboŷnjama. Pero aiñe bētscá cochtsama, chēnga puerte chacmotsarrespetánama, chca jtsamēse icoyenama jtsonŷayēse, cachcá chamotsamama: botamana jtsóyebuambnayēse, nŷets tempo tšabe soyēnga jtsamēse, nŷetscanga jtsababuánŷeshanēse, Bēngbe Bētsábeñe corente jtsošbuáchiyēse, y puerte tšabia jtsemnēse, ainaniñe ndocna bacna soye ndbomná. ¹³ Atše choca chaijashjanguēntscuana, cocht-sentšena chē Bēngbe Bētsabe uabemana palabrénga entšangbeñe jtsalíayama, y chēnga jtsabuátambayama y jtsabuayiynayama. ¹⁴ Acbioye Bēngbe Bētsá obenana tcmojanatšetá tšabe soyēnga jamama chacotsobenama, ošbuáchiyēnga jujabuáchama. Bēngbe Bētsabe juabna oyebuambnayēnga acbiana tmojanoyebuambá ora, y chē ošbuachiyēnguentša bētsējēmēnga chēngbe cucuatšēnga ácbeñe tmonjancjá y Bēngbe Bētsá acbiana tmonjanimpadá ora, chca tšetana obenana tcojanóyēngacñe. Chē soye sempre cochtsinŷena.

¹⁵ As, aca cmontsemna sempre jtsamana chē soyēnga ntšamo tcbonjauyancá. Cochtsentšena chē soyēnga tšabá jtsamama, chca, entšanga chamobená jinŷama, aca cada te más tšabá lempe cojtsamama. ¹⁶ Botamana cochtsantješna, aca chē tšabe soyēnga jtsamēse cojtsiyenama, y chē tšabe buatēmbana soye ínŷenga cojtsabuátambama.

Cada te chca cochtsama, y chca, cach aca cochanjenájabuache atsbocaná jtsemnama y chë ábioye ouenanëngnaca játsebacama.

5

Ntsamo Timoteo ibojtsemna chë inye ošbuáchiyëngaftaca jtsemnana

¹ Bëtsëjëmënga ndoñe catjucácana; chca játamamna, cochjábuayenaye, chënga mo cach acbe taitá cuaftsemncá; y chë bobontsëngaftaca cochjama, mo chënga acbe catsátanga cuaftsemncá. ² Chë bëtsanana shembásëngaftaca tšabá cochtsemna, chënga mo cach acbe mamá cuaftsemncá; y chë tobiasëngaftaca cochjama, chënga mo acbe uabënanga cuaftsemncá; chëngaftaca cmontsemna puerta tšabia jtsemnana, chëngbiana ndocna bacna juabnënga ainaniñe ntseboimncá.

Ošbuáchiyëngbenache viudanga tmojtsemna ora

³ Chë ndegombre viudanga, chë ndocná mondbomna chaújabuachama, chënga cochtsarrespetana y cochtsëjabuachana. ⁴ Pero canye viudá nderado básenga o nietënga tuabamna, chënga entsamna natšana jshauatsjínÿana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtšanÿenëse, y chëngbe bëtsësangaftaca tšabá chamotsama, ntšamo chënga chëngaftaca tmojanmncá, er chca jtsamama, Bëngbe Bëtsá jtsóyejuayana. ⁵ Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama jtsobátmanana, y nyets tempo jtseimpadánana, bnëtë y ibeta, cha chabuájabuachama. ⁶ Pero canye viudá, nye quem luarentša entšàngaftaca oyejuayá jtsemnama soyënga tojtsamëse, cha masque ainá tojtsemna, Bëngbe Bëtsabe bominiñe mo canye obanacá jtsemnana, er chábioye ndoñe ntseeservénana. ⁷ Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiana jatichámuama chaondëtseboimnama. ⁸ Er, nda cachabe entšanga y más, cachabe pamíllanga ndoñe tontsacuedana, cha chca jtsinÿinÿayana chë buatëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entšá jtsemnana.

⁹ Chë juajabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nye canye boyá ibnabomná. ¹⁰ Entšanga cha chamotsábuatma mo canye tšabe soyënga amacá: chabe básenga botamana tojabëché, áshjajnënga chabe yebnentse posada júyentsamiama prontaná, Bëngbe Bëtsabe entšanga imomnënga tojushecjabebé, chë imosufrinënga tojúabuache; jayanana, nda sempre nyetsca tšabe soyënga jamama yontšená.

¹¹ Pero chë lístañe, chë viudanga chnënguana bnëtsana uata cabá ndbomnënga ndoñe catjúbiana; er chë chëfta uata ndbomnënga, yapa nye cachënga tšabá jtsemnama juabnënga jtseboimnana y soyënga jtsamana. Chcase, chënga Jesucristbioye ya ndoñe ntseeservénana, y chora jtsebošana cachiñe jtëtóbouamayama; ¹² y chca, ínÿenga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. ¹³ Y cabá más, tondaye ntsamcá tmojtsemna ora, chënga juabouinÿana oyënjayënga jtsemnama, y yebnënguenache jtsanama; y ndoñe nye oyënjayënga, sinó oinÿanëngnaca, ínÿengbe soyënguñe jtseyentšbëtsjuanëse, y

ndoñe yontsemna jayanama soyënga jtsichámëse. ¹⁴ Chíyeca, atše sëntseboše, chë viudanga cabá tobiasëngna chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca. ¹⁵ Atše chca sëntsichamo, er básefta viudanga cabá tobiasënga tmojtsajbaná Jesucristo obedecénana, y tmojontsé Satanás joyeunayana.

¹⁶ Canye shembása, Jesucristbeñe ošbuachiyá, nderado chabe pamílangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondëtsamna chëngbiama játantješnana; chca, chë ošbuáchiyënga mochanjobenaye chë ndegombre viudanga, chë chaujúabuachama ndocná mondbomnëngbioye jujabuáchama.

Ntšamo cuantsemna chë ošbuachiyëngbeñe amëndayëngaftaca

¹⁷ Chë bëtsëjemënga, tšabá chë ošbuachiyëngcá enefjuanënga tmamëndangna, jtsomerecénana entšanga más chamotsarrespetánama, chca trabajo bétsamama, y más, chë sempre entšanga jtsabuayiyayama y jtsabuátambayama imontšenëngbioye. ¹⁸ Er Bëngbe Bëtsabe uabemana palabrenguiñe endayana, mëntšá: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtsenaye ca”; ínÿoca: “Chë trabajayá merecido jtsebuájonana juácanama ca”. Chíyeca, chë bëtsëjemëngcá amëndayënga jtsomerecénana entšanga chamotsarrespetánama.

¹⁹ Nderado nda tcmojáuyana canye bëtsëjema bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë bëtsëjema mal quedayá ndegombre soye yojtsichamo ca ndoñe tmonjayana, ndoñe catjóyeunaye.

Inÿe soyëngama jábuayenama

²⁰ Chë bëtsëjemënga nÿe bacna soyënga tmojtsamënga, nÿetsca entšangbe delante cochjucácana, chca nÿetscanga uatjana chamuishache, bacna soye amama castigo mochtsebomnana.

²¹ Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjema tšabá o ndoñe tšabá tonjama ca, cabá ndoñe lempe botamana ndabonÿe ora, ni canye entšá ínÿengbiama más tšabá ntjatabacacnaycá. ²² Ndocnabe bestšašiñe cucuatšënga catjajájua, Bëngbe Bëtsábioye chabiana jaimpádama, jinÿinÿiyama cha mo canye bëtsëjema amëndayacá joserviama yojtsobenama, nÿe betscó, juabuáyanama botamana ntjenuabuoycá. Pero nÿe ntjenuabuoycá chca tcojamëse, y cha canye bacna soye amá tomnësna, ácnaca cochántsemna mo chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebomnana.

²³ Aca ba soye uafsbicaca condbëtsešoca causa, ndoñe más nÿe ena búyeshe cattseftmana, sinó base vínoynaca.

²⁴ Entšanga mondobena tšabá jinÿana, básefta entšangbe bacna soyënga, cabá chë soyëngama chëngbioye botamana ntjátjaye ora; pero ínÿengbe bacna soyëngama, nÿe tcojátjayentšana entšanga chama jtsetatsëmbuana. ²⁵ Cachcá, báseftanga entšangbe delante tšabe soyënga jtsamana, y cachora chë soyëngama jtsotatsëmbuana; y ínÿengna iytëmná

tšabe soyënga jamana, pero masque chca, ndayténaca chë tmojanma tšabe soyëngama ínÿenga mochanjátatšëmbona.

6

¹ Chë nÿets tempo nÿe ínÿabiana oservénënga entsamna, chëngbe nduiñëngbiana jtsejuabnayana, chënga uámana entsanga imomnama y nÿets respeto jtsebomnama imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entsanga mondbëtsabatambaye, ínÿenga podesca ndoñe chamondëtsóyebuambnama. ² Y chë imobomna Jesucristbeñe ošbuáchiyënga nduiñënga, chëngbioye nÿe batšá ndoñe chamondëtsarrespetana, er chënga Jesucristbeyeca chëngbe catsátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana

Quem soyënga cmontsamna entsanga jtsabuátambayana, y becá jtsëtsësnayana chca chacmóyaunama: ³ Nderado nda inÿe soyënga tojtsabatambá, y ntšamo bënga mondbëtuabnacá, chë Bëngbe Utabná Jesucristbiana ndegombre बातëmbana soyama, ni chë बातëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase, ⁴ cha nÿe cachá puerte uámana entsá yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabréngama jabuachana jtsenatsësnayana, y cha nÿe chama vida jésebomnana. Cha chca yomna causa, nÿe jtsebošana chë inÿa tojashjache soyënga jtsebomnama, nÿetscanga ndoñe cachcá chamondëtsejuabnama jtsamana, ínÿengbioye joyánguanguama jtsebošana, bacna soyënga ndoñe ndegombre soyënga ínÿengbiana jtsejuabnayana, ⁵ y ínÿengaftaca nÿe sempre jtsenpenzëntsiayana, er chëngbe juabniñe nÿe bacna soyënga jtsebomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nÿe más soyënga jóyëngacñama yoserverna ca. ⁶ Ndegombre canÿe entsá bëtscá tšabiana jëftsashjáchana, cha tojtsiyena Bëngbe Bëtsábioye jadórama soyënga jtsamëse, y sempre oyejuayá nÿe chë tojtsebomna soyëngaca tojtsemnëse. ⁷ Er bënga tmojanonÿná ora, quem luaroye bëngaftaca tondaye tmonjániyëbo, y quem luarentšana cach tondaye quemochatobenaye jëftsocñama. ⁸ As, bënga ndayá jasama y ndayá jtichëtjuama tmojtsebomnëse, chë soyëngaca oyejuayënga mochtsemna. ⁹ Pero chë bomnënga jtsemnama tmojtsebošënga, bacna soyënga jamama tojócochëngo ora, ndoñe ntsemorochana y pronto chiñe jotsatšana, mo bayá uachmaniñe cuafjotsatšcá, chë entsanga Satanasbe cucuatšñe ndeolpe jotsatšana; chora chënga jtsamana soyënga mo chë juabna ndbomnëngcá, y chë cachëngbiana ndoñe tšabe soyënga tmojtsamëngbe juabnëngaca. Y mo chë uándbemana barco, bëts búyeshe asentoye tojtsenatjëmbcá, cachcá, chë bacna juabnënga bomnana, chëngbioye mochántsapochocaye y nÿetsca tescama mochántscastigaye. ¹⁰ Crocénana jtsebomnama yapa jtsebošana, jamana entsabe ainanentšana nÿetsca bacna juabnënga y soyënga chaóbocnama; y básefta entsanga, crocénana

jtsebomnama yapa jtsebošana causa, tmojtsajbaná ošbuáchiyana chë Bëngbe Bëtsabe soyënguiñe, chë bënga mondošbuaché soyënguiñe, y chca cachëngbiamama tmojama puerte chamosufrima y bëts ngménana jtsebomnama.

Chë tšabe soyama jtsenojuerzánama, ošbuáchiyana sempre chaotsemnama

¹¹ Pero aca, Bëngbe Bëtsabiamama oservená, chca benachentšana cochtsojuánañe. Nya cochtsentšana, chë Bëngbe Bëtsabe bominiñe tšabá yomncá jtsamama, chë ndaya Bëngbe Bëtsá jadórama yomncá jtsamama, Jesucristbeñe puerte jtsošbuáchiyama, nyetscanga jtsababuánñeshanama, Bëngbe Bëtsábeñe jtsoátmanëse puerte uantado padecena soyënguiñe jtsemnama, y corente jtsababuánñeshanëse nyetscanga chacotsënyayama. ¹² Chë tšabe soyama, ošbuáchiyana joboguiyanama cochtsenojuerzana. Chë nyetsca tescama yomna tšabe vida cochjashjache; chama Bëngbe Bëtsá tcmojanchembo y bëtsca entsangbe delante tconjánayana tšabe soyënga Jesucristbiamama, ndayíñe aca icošbuaché. ¹³ Y mora, Bëngbe Bëtsabe delante, nda endbama lempe ntšamo quem luarentše yobinýncá vida chaotsebomnama, y Jesucristbe delante, ntšamo cachabiamama ndegombre bemncá Poncio Pilatbe delante lempe tojanayaná, chatbe delante chontsemánda, ¹⁴ lempe cochjama ntšamo tcbonjauyancá, ndocna soye chacmondëntšashbe jamama, y cochtsiyena, ntšamo ndocná tondaye chaondëtsebomna jayanama aca bacna soye tcojama ca. Y chca cochtsama Bëngbe Utabná Jesucristo quem luaroye yochjésabëntscuana. ¹⁵ Y nya chë soyama chë tempo chaojóshjango ora, Bëngbe Bëtsá chca echanjínñanýye, er cha endmëna chë corente bendición bomná y chë nye canye Mandado. Cha nyetsca reyëngbiamama, chë más uámana Rey, y nyetsca amëndayëngbiamama, chë más uámana Utabná. ¹⁶ Nye cha ndoñe bondmëna ndocna te ntjóbanana, y cha canye bëts buashinýinýana luarentše endoyena y choye ndocná yondobena jobéconana. Cha ndocná tbonjinýe y ndocná yondobena jinýana. ¡Entsanga nyets tempo chamotsinýanýná cha puerte bëtsá y obená bëtsemnama! Chca chaotsemna.

¹⁷ Chë quem luarentša soyëngaca bomnënga imomnënga, cochjámëndaye enábotamnyënga ndoñe chamondëtsemnama, ni lempe tšabá yochjóbcnana, bëtsca soyënga bëtsebomnama ndoñe chamondëtsobátmana, er chë tcbomna soyëngama ndoñe ntsótatšëmbuana ndayëntscóñama chca mochtsebomnama; pero aiñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtsca soyënga šnetsatšatnayá; y chca, cha jamana bënga chamotsobena nyetsca chë soyëngaca oyejuayënga jtsemnama. ¹⁸ Ntšamo tšabá yomncá chënga chamotsama, ba tšabe soyënga chamotsama, y sempre tšabe ainánaca chamotseprontana entsanga ba soyënga jatšatayama, y ndaye tmobomna soye entsángaftaca jenátatayama. ¹⁹ Mo nda bëtsca shajuana tojtsábuajo y jtsetatšëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochántsetatšëmbo chënga bëtsca tšabe bendicionënga más chcoye mochtsebomnama. Y chënga chë soyënga tmojtsamëse, chënga chë ndegombre vida, chë nyetsca tescama yomna tšabe vida mochanjéftsashjache.

Inýe soye Timotébioye tbojanbonýe

²⁰ Timoteo, ndayá Běngbe Bětsá tcmojabonyecá, botamana cochtsinyena. Entšanga n̄ye quem luarentša soyěngama encuěntayana, ndoñe cattsuena, ni chě ndoserverna soyěngama jabuachana enatsětsnayana, chě ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana. ²¹ Atše chca sětsichamo, er báseftanga chca osertánana imobomna ca icháměnga, Jesucristbeñe ošbuáchiyana y chě běnga mondošbuaché soyěnguiñe ošbuáchiyana tmojtsajbaná.

Atše, Běngbe Bětsá sěntseimpadana, ácebeñe tšabe bendicioněnga chaotsemnana.

2 Timoteo

Jachuyayama

¹ Atše Pablo, Jesucristbe ichmoná sëndmëna, Bëngbe Bëtsá chca yobóseyeca. Jesucristo šonjichmó entsanga jábuayenama Bëngbe Bëtsabe šbuachenánama, ntšamo cha inétsamama entsanga chë nyetsca tescama yomna tšabe vida chamotsebomnama; y chca vida montsebomna Cristo Jesúseftaca cánjiñe mo canyáca bétsemnayeca. ² Atše quem tsbuanácha cbontsabobianná, acbiamama Timoteo, aca mo atšbe bonshana uaquiñacá, Crístbeñe condošbuachema. Atše sëntseimpadana, Bëngbe Bëtsá, Bëngbe Taitá, y Jesucristo, Bëngbe Utabná, chaboma ábeñe tšabe bendicionënga chaotsemnama, chata ábioye chacmolastemama, y acbe ainaniñe tšabe ebionana chacotsebomnama.

Ndoñe ntsëuatjana entsángbeñe Jesucristbiamama jóyebuambayama

³ Sempre Bëngbe Bëtsáftaca stsencuénta ora, acbiamama sëndbëtsenojuabnaye, y acbiamama sëndbëtsatschuanaye bnëtë y íbeta; y Bëngbe Bëtsá endmëna nda atše sëndëservena, ainánaca jtsejuabnayëse y jtsetatšëmbëse, ntšamo atše stsamcá tšabá bétsemnama, cachcá ntšamo atšbe hots taitanga tmojanmcá. ⁴ Atše sëndbëtënojuaboye ntšamo aca, chocana atše sëntanabo ora shëchbuiye tconjanoperdema, y chíyeca atše tša sëntseboše aca jtétinyama, atše puerte oyejuayá chaitsemnama. ⁵ Bëngbe Bëtsá acbiamama sëndbatschuaye, er atše sëndbátënojuaboye aca Jesucristbeñe ndegombre ošbuáchiyana condbomnama. Natsana, acbe bëtš mamá Loida, y chentšana acbe mamá Eunice chábeñe bontsanošbuáchiye, y ácnaca cachcá tcojamama atše puerte sëndëtatsëmbo.

⁶ Chíyeca sempre cochtsantješna quem uámana soyama: Mo nda canyë shinjáñe tojtsajuinýinyñacá, chentše sempre chaotsoiñama, cachcá aca, chë Bëngbe Bëtsá tmojatšetá obenana tšabe soyënga jamama, sempre cochtsinýena. Chë obenana aca conjanóyëngacñe, atšbe cucuatšënga acbe bestšašiniñe sënjanjajó y Bëngbe Bëtsá acbiamama sënjanimpadá ora. ⁷ Er Bëngbe Bëtsá tonjama bëngbe ainaniñe Uámana Espíritu chaotsemándama, uatjana ndoñe ntsebomnama, ndayá obenana bënga chamotsebomnama, bonshánana Bëngbe Bëtsabiamama y nyetscangbiamama chamotsebomnama, y cabënga jenomándama chamotsobenama. ⁸ Chíyeca, ndoñe cattšëuatja entsanga jáuyanama, ntšamo tcojinýe y cojtsetatšëmbcá Bëngbe Utabnabiamama ndegombre bétsemnama; ni atšbiamama ndoñe cattšëuatja, atše cárceloye sëndutámenama, chabiamama oservena causa. Chamna, chë Bëngbe Bëtsá cmochanjátšetaye obenánaca, sempre cochtseprontana jasúfriama, átšëftaca y ínýengaftaca, entsanga tšabe noticiënga abuayiyayeca causa. ⁹ Bëngbe Bëtsá endmëna nda bënga šojatsebacá, y šojáchembo jtsiyenama mo chábënga imomnëngcá jtsamëse. Y cha chca tojama, ndoñe nderado bënga ndaye tšabe soye tmojamama, ndayá cachá chca chaotsemnama inabóseyeca y bëngbe tšabiamama juabna bómnyayeca. Cha chca inajuabnaye, cabá quem luare ndmëna orscana; y chca jamama Bëngbe Bëtsá inajuabnaye, chë ndayá Cristo Jesús bëngbiamama jamama sóyeca. ¹⁰ Y mora, Bëngbe Atsebacayá Jesucristo tojáboyeca, Bëngbe Bëtsá šojinýanyë cha bëngbe tšabiamama juabna yobomnama. Jesucristo tonjama, entsanga

nýetsca tescama obanënga ndoñe chamondëtsemnana, y tonjama bënga chamotsetatšëmbuama, chë tšabe noticiënga chabiamana joudenëse y joye-unayëse, bënga chë nýetsca tescama yomna tšabe vida mochjábomnana, ndoñe nýe jopochócama cuerpënguifë.

¹¹ Bëngbe Bëtsá šojanábuayana tšabe noticiënga entšanga jábuayenama, Jesucristbe ichmoná jtsemnana y entšanga jabuátambama. ¹² Chë causa, atše mora cárceloca quem soyënga sëntsesufrina; pero chama atše ndoñe quetsátëuatja, er atše sëndétatšëmbo ndábeñe atše stošbuáchema, y corente sëndétatšëmbo cha yobena jtsinýenana ndayá šojabonýecá, chë ndayté cha yochjésabëntscuana.

¹³ Nýets tempo, chë ndegombre buayenánana, ndayá átšbentsana tconjanuencá, entšanga cochtsabuayiynaye, entšanga jtsinýanýayëse aca Jesucristbeñe icošbuáchema, y Bëngbe Bëtsá y nýetscanga icuababuánýeshanama, y chca yomna aca Cristo Jesúsëftaca cánýiñe mo canýacá bëtsemnayeca. ¹⁴ Chë Uámana Espiritu, chë bëngbe ainaniñe endoyenabe uajabuáchenanaca, ntšamo Bëngbe Bëtsá tcmojabonýecá sempre cochtsinýena.

¹⁵ Ntšamo ya condétatšëmbcá, nýetsca ošbuáchiyënga Asia luaroquënga cachcá šmonjesonýá, y chentšë bontsemna Figelo y Hermógenes. ¹⁶ Pero Bëngbe Utabná Onesiforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatëuatja. ¹⁷ Masna, Romoye tojabánashjango ora, cha botamana šojánguango y šonjáninýena. ¹⁸ Bëngbe Utabná lastemado cháftaca chaotsemna, ntšamo nýetscanga tmojamcá tšabá o ndoñe tšabá yontsemnana cha yochjayana ora. Aca corente condétatšëmbo ntsachetšá Onesíforo Efeso puebloca šonjanëjabuachama.

2

Jesucristbiamana canýe tšabe soldado

¹ Y aca, atšbe uaquiñá, chë Cristo Jesús acbiamana tšabe juabna yobomnentšana, bëtscá añemo ainaniñe cochtsebmna. ² Ntšamo ba entšangbe delante šconjoyeunacá, cach buayenánana, boyabásenga nýetscañe tšabe palabra bomnënga cochjábanýiye, y chamotsobena ínýenga cachcá jabuátambama.

³ Aca, chë bënga fsëndbomna padecena soyëngama jasúfriama chacmojtsemna ora, Jesucristbe soyëngama entšanga abuayiynaye causa, ainaniñe bëtš añemo cochtsebmna, mo canýe tšabe soldadcá, cha chabe mándayabiamana jasúfriana. ⁴ Ndocna soldado ntjátanana shjoca soyënguifë vida jtsebmnama o crocénana juácanama. Soldado chca jtsamana, chabe mandayá, chca chaotsemnana tbojabocacá cha, oyejuayá chaotsemnana. ⁵ Y canýe travisiayá, ínýenga jáyënjanama, canýe soye juácanama; pero ntšamo chë uacanánana jocñama tomncá ndoñe tonjatravisiase, cha chë soye ndoñe ntjosháchiñama. Cachcá, acbe trabajo cochjama ntšamo cmojtsemncá. ⁶ Chë jajañe trabajayá derecho jtsebmnnana chë natsaná jtsemnana, chë tmojatbaná sananguentšana ndayánaca jtsebmnama. Acaftaca cachcá echanjopása, chë trabajo tšabá chacojamëse. ⁷ Chë cbontsatsëtsnañe cochtsenójuabnaye, y Bëngbe Utabná echanjama lempe chacmósertama.

⁸ Sempre cochtsenójuabnaye Jesucristbiamana, ndabiamana Bëngbe Bëtsá tojanma cháuatayenama y enjamna canýa rey Davídbentsana entšá,

ntšamo atše chabiamá sëndabuayiyiná tšabe noticiënguïñe endmëncá. ⁹ Chca abuayiyenaye causa, atše sëntsesufrina, nÿa cadenëjuangácnaca utsbuaná, mo canÿe bëts bacna soye ochjajnayacá. Pero masque atše chca sëntsemna, chë Bëngbe Bëtsabe soyëngama buayenánana ínÿenga entsángbioye montsabatambá. ¹⁰ Chíyeca atše nÿetsca padecena soyëngaca sëndëtsóboyana, Bëngbe Bëtsabe bocacánëngbe tšabiamá, chëngnaca atsebácanënga chamotsemnama, Crístbeñe jtsošbuáchiyëse; y Cristo Jesús bëtsëtsanga cháuabiamama, y cháftaca nÿetsca tescama chamotsiyenama.

¹¹ Mëntšá ndegombre endmëna:

Cristo Jesús tojanóbana ora, enjamna mo bëngnaca cuafjobancá, er bënga tmontsajbaná oyenana ntšamo tempo monjanियencá y Jesucrístbeñe montsošbuaché;

y chca, bëngnaca cháftaca mochantsiyena;

¹² bënga chë padecena soyëngaca tmojtseufrina ora, tmojtsemorochëse, bëngnaca Jesucrísoftaca mochántsemandaye.

Bënga tmojayana, cha ndoñe monduabatma ca, as cha bëngbiámnaca cachcá echanjayana;

¹³ bënga chábeñe ndoñe tmontsošbuáchese, masque chca, cha cabá echanjama ntšamo tbojašebuachenacá, er cha lempe jamana, ntšamo sempre iuetsemncá jtsinÿanÿnayëse.

Canÿe trabajayá, ndáftaca Bëngbe Bëtsá jtsoyejuayana

¹⁴ Chë tchonjauyana soyëngama, cochjama chë entsanga chamot-senójuabnama, y Bëngbe Bëtsabe delante cochjábuayenaye chënga ndoñe yontsamna nÿe palabrëngama jabuachana enatsëtsnayana; er chca, ndocna tšabe soye ntjamana, y chca tmojtseatsëtsná ora, jamana chë soye ouenanënga más batšá chamotsošbuáchema, y jujabuáchana chëngbe tšabe juabnënga jtsondbiamama. ¹⁵ Lempe ntšamo icobencá cochtsama, aca chacotsemnama mo canÿe entsá ndabiamá Bëngbe Bëtsá cháuyana nÿetsca soyënguïñe tšabá amá yomna ca; aca chacotsemnama mo canÿe trabajayacá, nda tondaye tontsebomna ndayama jatëuatjama; y chacotsemnama chë ndegombre buayenánana corente tšabá buatëmbayá. ¹⁶ Entšanga nÿe quem luarentša soyëngama, ndoservena palabrënga tmojtseuënta ora, chë soye ndoñe cattsuenana; er chë soye jamana entšanga puerte inÿetsá chamobocanama, ntšamo Bëngbe Bëtsá ndoñe yondmëncá, inÿetsá jtsejuabnayëse y jtsamëse. ¹⁷ Chëngbe buatëmbana soyëngaca puerte bacá ínÿengbioye jáborlana, nÿa mo canÿe uabouana šocana chamotsebomnama cuafjamcá. Chca buatëmbayënguentšë Hime-neo y Fileto bontsemna. ¹⁸ Chata chë ndegombre benachentšana tbojtsojuánañe, y ibojsichamo chë obanënga chámuatayenama Bëngbe Bëtsá ya catënjama ca, y Jesús chaojésabo ora, nÿetscanga chámuatayenama Bëngbe Bëtsá ndoñe yochanjama ca. Chë causa, chata bontsama básefta entsanga chë ntšamo Jesucrístbeñe imojanošbuachecá, mora ya ndoñe chamondëtsóšbuáchema. ¹⁹ Pero Bëngbe Bëtsabe ndegombre buayenánana nÿets tempo cachcá endesomñe, y ndocná quenátobena chë soye jatrócamá. Chca endmëna mo chë ndëtsbenga ndayiñe canÿe bëts yebna tojebncá, ndayiñe mëntšá yojtšábemana: “Bëngbe Utabná endëubuatma chë chábenga imomñënga”, y “Nÿetscanga chë Bëngbe Utabnánga imomñënga ca tmojtsichámënga, chamuajbaná nÿetsca bacna soyënga amana ca”.

²⁰ Canÿe uámana entsabe yebnentše, tsafjoca soyënga ndoñe nÿe castelano o midio soyënga ntsemnana, ndayá niñëse y fshantse soyëngnaca; chë natsana soyënga uámana tescama jtsebuájonana, pero chë inÿe soyëngna, nÿe nÿets tempo chauetsoservénama. ²¹ Chca endmëna chë Jesucristbeñe imojtsošbuachéngbeñe, ndoñe nÿetscanga tmontsajbaná bacna soyënga juabnayana y amana, ni chë chca tmojtsama entsángbentsana ndoñe tmontsojuaná. Pero, chca jtsojuánañama tojtsebošá, echántsemna canÿa Bëngbe Utabnabiama tšabe trabajayá; y chca, mo chë tsafjoca castellano y midio soyëngcá, canÿe uámana trabajuiñe echanjosérvia, y cha sempre echántseprontana ndaye tšabe soye jamama.

²² Chíyeca, ntšamo básefta bobontsénga bacna soyënga jamama mondbošcá, ndoñe cattsama; pero aiñe cochtsiyena ntšamo Bëngbe Bëtsabe bominiñe tšabá yomncá jtsamëse, Jesucristbeñe puerte cochtsošbuáchiye, Bëngbe Bëtsá y ínÿenga cochtsababuánÿeshana y nÿetscángaftaca natjëmbana cochtsomñe, chë chaujúabuachama Bëngbe Utabná mondbetsotsëmbuanëngaftaca cánÿiñe, ndocna bacna soye ainaniñe ntsebmncá. ²³ Ndoservena soyëngama palabrénga y ndosertánentsana óbocana soyëngama ndoñe cattsuenana; aca corente condétatšëmbo chë soyënguentsana entsanga nÿe jabuachana enatsëtsnayıñe jabocanana. ²⁴ Pero chë Bëngbe Utabnabiama oservená ndoñe quebnátsmëna ínÿengaftaca jabuachana ntsenatsëtsnayana; chamna, cha bontsemna jtsababuánÿeshanëse nÿetscanga jtsénÿayana, jtsemnana tšabe buatëmbayá y ínÿengaftaca uantadá. ²⁵ Cha bontsemna, chë chabe contra y chabe buayenánama contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatšëmbuama; ²⁶ chënga botamana chamuatsjuaboma, y Bëngbe Bëtsá, Satanasbe cucuatšënguentsana cháuatsebacama. Satanas chënga tojanëtábá ntšamo cha tojtsebošcá jamama, mo bayënga canÿe uachmaniñcá.

3

Ntšamo entsanga mochtsemna, Cristo jésabama chaojtsobeco ora

¹ Pero aca cmontsemna jtsetatšëmbuana, Cristo jésabama tempo chaojtsobeco ora, entsanga echántsamna puerte padecena soyënguiñe jtsiyenana. ² Chca echántsemna, er entsanga, cada ona nÿe cachabe tšabiama echanjésenuabuabnaye, crocénana jtsebmnama tša mochántseboše, mochántsemna enábotamnayënga y ínÿengbioye mo nduamanëngcá mochantsénÿaye. Bëngbe Bëtsabiama y ínÿengbiama bacá mochantsóyebuambnaye, chëngbe bëtsëtsangbioye ndoñe quemochátayaunana, ni chëngbiama tšabe soyënga tmojtsamëngbioye quemochtétacheuanaye, y Bëngbe Bëtsabiama y chabe soyëngama ndoñe respeto quemochátsbmna, ³ ni cachëngbe pamíllangbioye quemochátatabuanÿeshana, mochántseboše ndoñe natjëmbana jtsiyenama, uayátšenayënga mochántsemna, cachënga jenomándama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uaboténënga. ⁴ Chënga, uayayëngbe cucuatšëñe entsanga ayentšbáshejuanënga mochántsemna, mochántsama soyënga tondayama ntjatsrreparánëse, y cachënga uámana entsangcá

mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše. ⁵ Inyënga echantsinýana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínýanýiye, Bëngbe Bëtsá obená bëtsemnana chënga ndoñe mondošbuáchema.

Nýa tondayama chëngaftaca cattsencuëntaye. ⁶ Chënguëntše báseftanga mondmëna, y chëngna botamana palabrëngaca yebnënguenache jamashjnana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguiñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nýe cachënga tšabá jtsemnana, ntšamo tmojtsebošcá. ⁷ Chënga nýets tempo nýe ndaye tsëm soye jatóntšana jatatsjínýana, pero ndocna te ntjobenayana Bëngbe Bëtsabe ndegombre soyënga josértama. ⁸ Ntšamo Janes y Jambres Moisesbe contra ibojamncá, cachcá, chë ínýenga jáingñama abuátambayënga nýetsca ndegombre soyëngama contra jtsemnana. Chë entšanga chëngbe juabniñe nýe bacna soyënga jtsebomnana, y Bëngbe Bëtsá chënga tojtsëbaté, chënga chë ndegombre soyënguiñe ndoñe ntsošbuáchiyana causa. ⁹ Pero chënga ndoñe quemochatobenaye bëtscá entšanga jáyënjanama, er nýetsca entšanga mochanjátatsëmbona chënga nýe bacna soyënga juabnayënga imomnana, mo chë Israeloca entšanga tmojantatsëmboncá Janes y Jambres nýe chca juabnayata bëtsemnana.

Inýe soye Timotébioye tbojanbonýe

¹⁰ Pero acna, puerte tšabá condétatsëmbo ntšamo atše tijabatambacá, ntšamo jtsamëse atše tsiyena, ndayá jamama tsjuabná, ntšamo atše Jesucrístbeñe puerte tsošbuaché, ntšamo ínýengaftaca uantado tsmëna; ntšamo atše, Bëngbe Bëtsá y ínýengbioye tsababuánýeshana; ntšamo atše, Bëngbe Bëtsábeñe jtsobátmanëse, ¹¹ ínýenga šmonjanacmena ora; y sënjansufrina ora, padecena soyënguiñe bëtš añemo tsjánbomna. Acnaca condétatsëmbo ntšamo atše chama Antioquía, Iconio y Listra bëtš publëngoca tsjansufrínama. Pero masque entšanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentšana šonjanatsbocá. ¹² Ndegombre endmëna, nýetscanga chë Bëngbe Bëtsá jadórama soyënga jtsamëse jtsiyenama bošënga, y Cristo Jesúseftaca cánýiñe mo canýacá imomnënga, puerte mochanjasúfria, chca bëtsemnana, chënga chamosufrima ínýenga chamojtsama ora; ¹³ pero chë bacna entšanga y chë ínýenga áingñayënga, cada te más bacna entšanga mochántsemna, más bacna soyënga jtsamëse; chënga ínýengbioye mochántsaingñaye, pero cachëngnaca ingñëñënga mochántsemna.

¹⁴ Pero aca, nýets tempo cochtsejuabnaye y cochtsama lempe ntšamo tcojuatsjinýcá, chë ndegombre soyëngcá cojtsošbuácheñe, er aca tšabá condëubuatma chë tcmojanbuátëmbanga; ¹⁵ y aca, cabá básetema conjamna orscana, chë Bëngbe Bëtsabe uabemana palabrëngama condétatsëmbo, chë ndaye sóyeca aca contsobena juatsjínýana, Bëngbe Bëtsá chacmatsbocama, Cristo Jesúsbeñe jtsošbuáchiyëse. ¹⁶ Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrënguiñe yobinýncá entšanga chamuábemama. Chë uabemana palabra endoserverna, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga

chamotsetatšëmbuama, jinÿanÿiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtsiyenama chë Bëngbe Bëtsabe bominÿiñe tšabá yomna soyënga jtsamëse; ¹⁷ chca, canÿe entšá Bëngbe Bëtsabiana oservená y obená chaotsemnana, tšabá chaotsetatšëmbo y sempre chaotseprontana nÿetsca tšabe soyënga jtsamama.

4

¹ Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiana y chë ya mochjóbanëngbiana, ntšamo chëngbe vidënguiñe tmojëftsemcá tšabá o ndoñe tšabá bëtsemnana, chatbe delante cbomandá, ² Bëngbe Bëtsabe palabra entšanga chacotsabuayiyayama; siempre chca jamama cochtseprontana, masque entšanga aiñe o ndoñe jouenama tmojtsebošëse. Cochjama, inÿenga bacna soyënga tmojtsamama chamotsetatšëmbo, chca tmojtsamama cochjucácana y cochjábuayenaye ndayá jamama yojtsamnana. Siempre chca cochtsabuátambaye, chca ora puerte uantado jtsemnëse. ³ Chca cochtsama, er canÿe tempo echanjóshjango y chora entšanga chë ndegombre buatëmbana soye ndoñe quemochátuenana; chamna, nÿe chë último tsëm soyënga jtsetatšëmbuama boše causa, ba abuátambayënga mochanjuánguango, y chënga mochántichamo soyënga nÿe ntšamo cach entšanga jouenama tmojtsebošcá. ⁴ Chënga chë ndegombre soyënga ndoñe quemochátuenana, y nÿe ndaye cuentënga mochántseyeunana. ⁵ Pero aca, siempre botamana cochtsejuabnaye; chë padecena soyëngama chacojtsesufrina ora, añemo cochtsebmna; chë Jesucristbiana tšabe noticiënga entšanga abuayiyayabe trabajo cochtsama; y nÿa cochtstënsena ndayá Bëngbe Bëtsá tcmojabonyecá tšabá jtsamama.

⁶ Er mo Bëngbe Bëtsábioye jëtschuayama, canÿe bayá obanáftaca tcojabuešcja vínoye jtsoPOCHOCANCÁ, cachcá atšbe vídnaca ya jopochócama entsemna. Atšë jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnana. ⁷ Cristo Jesusbe soyëngama corente sënjenojuerzá. Mo canÿe travisiayacá, chë jashjanguama yomna luaroye ya tojashjangcá, átsnaca ya, ntšamo Bëngbe Bëtsá yobošcá atšë jtsamëse, atšbe trabajo ya tijapochocá. Atšë nÿets tempo Jesucristbeñe sëndošbuaché. ⁸ Chcasna, atšbiana canÿe uacanana soye echántsemna, er Bëngbe Bëtsá tojama atšë chabe bominÿiñe tšabia chaitsemnana. Bëngbe Utabná endmëna chë ndegombre tšabá ichamuá entšanga aiñe o ndoñe tšabá tmonjamama, y cha chë uacanana soye šochántatšëtaÿe, entšanga ntšamo tmojamama cha chaojabáyana ora. Pero cha nÿe atšë ndoñe chë uacanana soye quešochtëtätšëtaÿe, ndayá nÿetscángbioye chca, ndëmuanÿenga puerte imoboše cha cachiñe cháuesabama, cha imobobonshánayeca.

Inÿe soyënga Timoteobiana

⁹ Lempe ntšamo tcojobenacá cochjama betSCO jabama atšë jabínÿama; ¹⁰ er Demas, cha yapa nÿe quem luarentša entšangbe soyënga bošá enjamna, cha cachcá šonjesonÿá y Tesalónica puebloye tojtsoñe. Crescente Galacia luaroye tonjá y Tito Dalmacia luaroye. ¹¹ Nÿe Lucas, chë šmonjanájabuachanënguentšana, mora átšëftaca entsemna. Marcos cochjaftsenguango y ácaftaca cochjëftsbetše, er cha atšbe trabajuama

puerte oservená endmëna. ¹² Tíquico, Efesoye sënjichmó. ¹³ Chacobjabo ora, uabonjanía šcochjesacñe, atše Troas bëts puebloca, Carpbe yebnoca tijésaboshjona; chë librësangánaca, pero chë uámana uabemana tsbuanachangá ndoñe chacmondétsebnatjëmbe.

¹⁴ Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atše šojaborlama. ¹⁵ Chabiama cuedado cochtsebmna; cha tojobenase ntšámnaca cmatjabórla, er cha chë bënga mondabuayiyná soyëngama contra entsemna.

¹⁶ Chë natsana soyama, mándayëngbe delante šonjanotocá jenéuyanama ora, atše ndocná chešnátanajabuache; nÿetscanga cachcá šmonjésonÿaye. Pero atše sentsobátmana, Bëngbe Bëtsá chama chënga chaotsaperdoná. ¹⁷ Pero Bëngbe Utabná aíñe šonjanájabuache y tonjanma atše bëts añemo jtsebmnama, y chcase, atše sënjanobená Jesucristbiamá nÿetsca chabe tšabe noticiënga entšanga jábuayenama, y chë luarentša ndoñe judiënga tmonjanobená chë soye jouenama. Mëntsá, Bëngbe Utabná canÿe uabouana resjuentsana šonjanatsbocá, mo canÿe león jtsosañámentšana ndábioye cuafjatsbocacá, ¹⁸ y Bëngbe Utabná šochanjatsbocá, bacna soye ndocná chašondëborlama; y sempre jtsinÿenëse, celoye, chë ndayentše cha yománda luaroye šochanjeshetše. ¡Nÿetscanga nÿetsca tescama cha chamotsatschuaná! Chca chaotsemna.

Pablo Timotéobioye jadiósoftanama

¹⁹ Atšbe cuenta cochjácheuaye Prisca y Aquila, y Onesíforbe pamíllnaca. ²⁰ Erasto, Corinto puebloca tontsoquedañe, y Trófimo Mileto puebloca šocá sënjëftsebmshjona. ²¹ Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nÿetscanga muentše Jesucristbeñe ošbuáchiyënga.

²² Atše sëntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

Tito

Jachuayama

¹ Atše Pablo, Bëngbe Bëtsabe oservená sëndmëna y Jesucristbe ichmoná entšanga jábuayenama, chë Bëngbe Bëtsá chabe entšanga chamotsemnama tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bëtsemnama, mondoyena jtsamëse. ² Lempe chca sëndama, er Bëngbe Bëtsábeñe jtsošbuáchiyëse, atše sentsobátmana chë nyetsca tescama yomna tšabe vida jtsebomnama. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entšanga chca vida jtsebomnama; ³ y nÿa chama tempo tojóshjango ora, chë entšanga jábuayenama, soyëngaca Bëngbe Bëtsá chabe palabra šojinÿanyé, ndayá Jesucristo entšangbiamama yochjanmama; y chca jábuayenama atše palabra šmonjabonÿé, Bëngbe Bëtsá, bëngbe Atsebacayabe mándoca. ⁴ Tito, quem tsbuanácha cbontsabobiamná. Atše Jesucristbe soyëngama entšanga sënjanabuayiyná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquiñacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ábeñe tšabe bendicionënga chaotsemnama chata chaboma, y chaboma aca ainaniñe tšabe ebionana chacotsebomnama.

Titbe trabajo Creta luaroca

⁵ Atše Creta luaroca tcbonjëftsanboshjona, ntšamo chentše jamama enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtsëjemëngcá amëndayënga jtsemnama chacubuáyanama, ntšamo tcbonjajtsemandacá. ⁶ Canÿa bëtsëjemama uabuayaná mëntsá bontsemna: chaotsiyena ntšamo chabiamama ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntsobencá y nÿe ntšamo tmojtsebošcá imojtsiyena ca, o chënga chëngbe bëtsëtsanga o mándayënga ndoñe montsayaunana ca. ⁷ Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonÿéyeca, cha bontsemna jtsiyenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondëtsama; ndoñe chaondëtsiyena nÿe rábiaca jtsemnama; ndoñe chaondëtsetmó; penzentsero ndoñe chaondëtsemna; y ndoñe chaondëtseboše nÿe paselo becá crocénana jtsebomnama. ⁸ Pero chabe yebnentše posada entšanga júyentšamiamama sempre chaotseprontana, tšabe soyënga chaotsebínÿinama sempre chaotsentšëna, botamana juabnayá chaotsemna, ntšamo Bëngbe Bëtsabe bominÿiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguiñe jenomándama chaotsobena. ⁹ Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyëngaca ínÿenga añemo chaotsatšatnama,

y chë soyama contra tmojtsemnënga jáyënjana, ndoñe tšabá montsamama.

¹⁰ Cha chca bontsemna, banga nÿe ndëmandánënga jtsiyenama bošënga mondmëna causa, y chënga mondmëna, nÿe ndaye ndoservena soyëngama yapa oyebuambnayënga y ínÿenga áingñayënga, y chcanga más mondmëna chë nÿetsca ošbuáchiyënga base bobachtema chë más delicadentse tëtšenënga jtsemnama yojtsamna ca mondbétsichamënguentse. ¹¹ Y entseyta chëngbioye jtayáchetana, er chënga jamana ba pamíllanguentse nÿetscanga Jesucristbeñe ošbuáchiyana chamotsajbanama. Chënga chca mondbétsama, chë ndoñe yontsamna jtsabuátambayama soyënga jtsabuátambayëse, nÿe paselo crocénana jongánama.

¹² Enjamna canÿa, ndabiama entšanga jtsichámuana cach Creta luarentša diosëngbiama oyebuambnayá canjamna ca, y cha cachabe luarentša oyenëngbiama mëntšá tonjánayana: “Creta luarentše oyenënga, nÿets tempo bosterënga mondmëna, ainana ndbomnënga y oyënjayënga nÿe becá jasama bošënga ca.” ¹³ Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché; ¹⁴ y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

¹⁵ Chë ainaniñe bacna juabnënga ndbomnënga y chca juabnëngaca ndëmandánënga, nÿetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámnaca jtsejuabnayana mo bacna soye cuaftsemncá. Chca entsemna, er chëngbe juabnoca nÿe ena bacna soyënga jésebonnana, y ndaye bacna soye tmojama ora, chëngbe ainaniñe juabnënga ndoñe ntsebonnana, bacna soye tmojamama chaúyanama. ¹⁶ Chënga jtsichámuana Bëngbe Bëtsá imuábuatna ca, pero ntšamo tmojtsama soyëngaca jtsinÿinÿayana chca ndoñe ndegombre yondmënama. Chënga Bëngbe Bëtsabe bominiñe puerte bacna entšanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

2

Soyënga ntšamo chë ndegombre buatëmbánana endmëncá

¹ Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá. ² Cochjayana chë bëtsëjëmëngna chamotsemna cachënga nÿetsca soyënguiñe jenomándama obenënga, nÿetscangbiama mo uámana entšangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguiñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguiñe puerte uantadënga chamotsemna.

³ Cachcá, chë bëtsanana shembásënga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse; ⁴ chë tobiasënga chamotsinÿanÿná y chamotsabuatambá ntšamo chëngbe boyanga y básënga jtsababuánÿeshanana, ⁵ ntšamo cachënga jenomándama jtsobenana, ainaniñe ndocna bacna soye ntsebonnana, yebnentša soyënga jtsamama jtsentšënanana, nÿetscángaftaca tšábënga jtsemnana,

cachëngbe boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

⁶ Cachcá, chë bobontsënga añemo cochtsatnatnaye cachënga jenomándama chamotsobenama, ⁷ y chënga cochjínñanýiye ntšamo yomna jtsiyenana, cach aca nyëtsca soyënguiñe tšabá jtsamëse. Chca chacojtsabuatambá ora, nyë chë ndegombre buayenánana cochtsabuátambaye y corente respétoca chca cochtsama, ⁸ chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotséuatja, er ndocna bacna soye quemochatobenaye bëngbiamama jayanama.

⁹ Chë nyëts tempo nyë ínñabiamama oservénënga cochjábuaenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnana. ¹⁰ Ndoñe chamondëtsatbëbana, pero aíñe nyëtscañe tšabe palabra bomnënga chamotsemna. Chënga chca entsamna, chca, ínñënga chámuinñe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiamama yomna ca.

¹¹ Er Bëngbe Bëtsá bënga šonjinñanýé cha bëngbe tšabiamama juabnënga yobomnama, y chca, cha tojama nyëtsca entšanga chamotsobena atsebácanënga jtsemnana. ¹² Chë Bëngbe Bëtsabe juabna bëngbe tšabiamama, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentše jtsiyenámna šontsabuatambá, cabënga jenomándama jtsobenëse, ntšamo Bëngbe Bëtsabe bominñiñe tšabá yomncá y cha jadórama soyënga jtsamëse. ¹³ Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnana te, Bëngbe Bëtsá obená y Atsebacayá Jesucristo, buashinñanýañe y canñe corente uamanacá yochjésabo ora. ¹⁴ Cha chabe derecho vida jtsobomñama cachcá tojanonýá y bëngbiamama tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentšana bënga játsëbacama, ainaniñe ndocna bacna soye ndbomnënga jábiamama, bënga chábënga chamotsemnana, sempre prontánënga ntšamo tšabá yomncá jtsamama.

¹⁵ Chca cmontsemna jtsabuátambayana, chënga becá añemo jtsatnatnaye, y jtsinñanýañe chënga bacna soye tmojamama, chë nyëts condbomna mándoca jucácanëse. Ndoñe catjaleséncia ndocná chaundayana aca mando ndoñe condbomna ca.

3

Ndayá Jesucristbeñe ošbuáchiyënga yojtsamna jamana

¹ Cochtsama chënga chamuatenójuaboma chë mandadënga y inñe mándayënga chamotsayaunanama, chamotsobedecénama, y tšabá yomncá jamama sempre chamotseprontánama. ² Ndocnabiamama ndocna bacna soye chamondëtsoyebuambná, penzentserënga ndoñe chamondëtsemna, ndayá nyëtscángaftaca natjëmbana jtsiyenama bošënga, tšabá mándbomnënga, nyëtscanga tšabe ainánaca imojtsëññama entšanga jtsinñanýañe.

³ Er bēngnaca tempo monjamna Bēngbe Bētsabe soyēngama ndosertánēnga, ntšamo Bēngbe Bētsá endēmandacá ndoñe quemjátanama, ingñénēnga y mandánēnga monjamna nyetsca bacna soyēnga jamama juabnēngaca y nye quem luarentše tšabá jtsemnama juabnēngaca. Bēnga monjaniyena nye bacna soyēnguiñe juabnaye, ínŷenga uantsáboše. Inŷenga bēnga šonjanēbuayēnja y bēnga nyetscanga monjanenáboyēnja. ⁴ Pero Bēngbe Bētsá, bēngbe Atsebacayá, bēngbe tšabíama juabna yobómnyeyeca y tša šuababuánŷeshanama šonjaninŷanyé ora, ⁵ cha šonjanatsebacá, pero ndoñe nderado bēnga ndaye tšabe soye tmojanmama, ndayá cha bēngbíama tbojanongméyeca. Cha šonjanatsebacá, bēngbe bacna soyēnga jabuajuánase, y chē Uámana Espíritu jujabuáchēse, bēnga mo tsmēma entšangcá chamotsemnama, ntšamo tempo yojamncá ntjatsjuabnayscá y ntjatamcá. ⁶ Bēngbe Atsebacayá Jesucrístbeyeca, Bēngbe Bētsá tojanma Uámana Espíritu bēngbe ainaniñe nyets tempo chaotsemándama y bēnga chašotsējabuachanama, ⁷ chca bēnga, Bēngbe Bētsá bacna soyēngama šojaperdónanga y bēngbe tšabíama juabna bómnyeyeca tojanya chabe bominŷiñe tšábēnga imomnēnga, chamotsobena cha yobomna soyēnguentšana bēnga mo ndayá cuaftsētocancá jóyēngacñama, y chca, chábēñe jtsošbuáchiyēse, chē nyetsca tescama yomna tšabe vida chamotsobátmanama.

⁸ Chca, lempe ntšamo tijayancá nŷa ndegombre endmēna, y atše sēntseboše chē soyēngama bētscá chacotsabuatambá, chca, chē Bēngbe Bētsábeñe tmošbuachenga chamotsentšena chē tšabe soyēnga jtsamama. Chē buatēmbánana puerte tšabá endmēna y nyetscangbíama bētscá endoservena. ⁹ Inŷenga nye ndoservena soyēngama jabuachana tmojtse-atsētsná ora, y anteungbe cuentēngama chamojtsoyebuambná ora, ndoñe cattsonremetena; ndoñe cattsama cach tšēngaftanga ndoñe tšabá jtseñeyeanamcá, y judiēngbe leyēngama ndoñe ínŷengaftaca cattsenpéliaye. Chca jtsamana tondayama ntoservénana, y nye bonamente chca jtsamana.

¹⁰ Nderado nda tojtsama entšanga ndoñe cachcá nyetscanga chamondētsejuabnama y chamotsenpéliama, canŷe o uta soye cochjabuayená ndoñe tšabá tonjamama; pero cha ndoñe tcmónjōyeunase, chentšana cháftaca ndoñe más cattsoyebuambnaye. ¹¹ Chca cochjama, er aca cochanjátatšēmbona canŷa chca tojtsemná, chabe juabna tojatrocá bacna soyēnga jtsejuabnayama. Chē soye y chē inŷe bacna soyēnga ntšamo cha tojtsamcá, jtsinŷanŷnayana cha ibojtsemna castiganá chama jtsemnama.

Inŷe soyēnga Titbíama

¹² Atše, Artemas o Tíquico ácbioye chaijichmó y choca chaojáshjango ora, ndayánaca cochjama Nicópolis puebloye aca jama atše jinŷama, er atše sēnjajuabó chentše chē uaftenēntscuana jēftsemnana. ¹³ Lempe ntšamo chacojobenacá, cochjuájabuache chē ínŷenga obuauyayá Zenas, y Apólonsnaca; lempe ntšamo chata ibojtsējabotcá cochjátatayē, ínŷoye jama jatóntsama chamobenama y benachējana tondaye chaondētsabuáshebenama. ¹⁴ Atše sēntseboše, bēngbe entšanga, chē bēngcá Jesucrístbeñe ošbuáchiyēnga, chamotsentšena chē tšabe soyēnga jtsamama y chē puerte ujabótēnga jtsējabuáchanama, chca, chēnga tondayama ndoservena vidēnga ndoñe chamondētsebomnama.

Pablo Títbioye jadiósoftanama

¹⁵ Njetscanga chë átšeftaca montsemněgnaca cmontsechuaná. Atšbe cuenta cochjácheuaye njetscanga chë bēnga imuababuanjēshanēngbioye, cach bēngcá Jesucristbeñe ošbuáchiyana bómnyeca. Atše, Bēngbe Bētsá sēntseimpadana, cha chaoma ácheñe tšabe bendicionēnga chaotsem-nama.

Filemón

Jachuayama

¹ Atše Pablo, mora utamená Cristo Jesusbiana oservena causa, quem tsbuanácha sentsabiamná, Jesucristbeyeca bēngbe catsata Timotéoftaca, acbiana Filemón, bēngbe bonshaná y nda bēngaftaca condētrabája Jesucristo jaserviama. ² Atše sentsacheuaná, Jesucristbeyeca bēngbe uabena Apia y Arquípnaca, nda bēngaftaca cánýiñe Jesucristbe soyēngama endenojuerzana; y nyetsca ošbuachiyēngnaca, ndēmuanýenga imuamana acbe yebnentše jénefnama Bēngbe Bētsá jētschuayama. ³ Atše sēntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tsabe bendicionēnga tsēngaftangbeñe chaotsemnana, y chaboma tsēngaftangbe ainaniñe tsabe ebionana chašmotsebomnana.

Filemonbe bonshánana y ošbuáchiyana

⁴ Bēngbe Bētsáftaca stsencuénta ora, acbiana sēndbētsenojuabnaye, y sempre acbiana Bēngbe Bētsá sēndbētsatschuanaye, ⁵ er atše sēnjátatsēmbona ntšamo aca nyetsca chē Bēngbe Bētsábenga imomnēnga icuababuánýeshanama, y ntšamo aca Bēngbe Utabná Jesúsbeñe tša icošbuáchema. ⁶ Bēnga, Jesucristbeñe ošbuáchiyēnga quetsomñecá, ácaftaca mo canýacá fsēndmēna. Chca endmēnayeca atše Bēngbe Bētsá sēntseimpadana, tsēngaftanga chašmobená más botamana josértana nyetsca chē Bēngbe Bētsábicana tmojóyēngacñe tsabe bendicionēnga, bēnga Cristo Jesúsēftaca cánýiñe mo canýacá bētsemnayeca. ⁷ Jesucristbeyeca atšbe bonshana catsata, aca chē Jesucristbeñe ošbuáchiyēnga tša condábabuanýeshanama, atše corente oyejuayá sēntsemna y bēts añemo sēntsebomna. Y aca tcojama, nyetscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondētsemnana, chēnga jujabuáchese.

Pablo, Filemónbioye Onésimbiana tbojanimpadá

⁸ Y chca, atše Cristbe ichmoná quetsomñecá sēntsobena, aca nye jamándana ntšamo yomncá chacotsamana, pero atše chca ndoñe quichatsma. ⁹ Y chondbobonshánayeca, chca játamanna, aca chochanjainpáda. Atše Pablo, Jesucristbe cuenta ichmoná jóyebuambayama y mora utamená, chabiana oservena causa, ¹⁰ canýe ruego chochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Cristbeñe tonjanošbuachéyeca, cha mo atšbe uaquiñacá tonjanóbema.

¹¹ Tempo, cha ácbioye tondayama quecmēnjátanservena, pero mora cha becá entsámama, acbiana y atšbiana. ¹² Mora ácbioye sēntsatichamná, y atše siempre chabiana sēndbētsenojuabnaye y sēndbobonshana. ¹³ Atšbiana puerte tsabá manmēna cha átšēftaca matēnjoquedase, acbe cuenta atše chašoservema, cárceloye utamená sēntsemnēntscuana, chē tsabe noticiēnga entšanga abuayiynaye causa. ¹⁴ Pero atše ndoñe chiyatsma cha chaoquedama atše chašuájabuachama, er atše ndoñe quetsátsboše aca obligaciónaca chacotsemnana, atše juajabuáchama ndayánaca chacomama; y sēntseboše aca ndayánaca chacoma, cach aca chca jamama puerte tcojtsebošese. Chcasna, tondaye quichatsma, chē

soye chca chaotsemnana aca cabá ndocá ntjayancá. ¹⁵ Atše sěntsejuabná nderado Onésimo ácbentšana básefta tescama tojanoluaré, mora ácaftaca nŷets tempo jtsatsmēnana ca, ¹⁶ y ndoñe nŷe acbiana mo nŷets tempo canŷe oservenacá, ndayá chama más uamanacá, mo Jesucristbeyeca canŷe bonshana catšatcá. Atše puerte Onésimo sěndbobonshana, y acna cmontsemna más cha jtsebobonshánana, er cha mora ndoñe quenátsmēna canŷa nŷe acbiana nŷets tempo oservená, ndayá Běngbe Útabnábeyeca canŷe catšata, ntšamo cach aca condmēncá.

¹⁷ Chca, aca atšbiana condějuabná mo ácaftaca cánŷiñe Běngbe Útabnabiana trabajayacá; chíyecna cmontsemna cha jtořjana, mo atše scojofjá. ¹⁸ Nderado ntšamo cha tmojanborlá o ndayánaca tmondebena, atše chama cbochjětsěntšabuachiye. ¹⁹ Atše Pablo, cach atšbe cucuátšeca quem soye sěntsabiamná. Atše chama cbochanjětsěntšabuachiye. Ndegombre, ndoñe quenátsiyta atše chachěyana becá scondebena ca, ntšamo atsbocaná jtsemnana atše tbojánbuayenama. ²⁰ Chcasna, Jesucristbeyeca atšbe catšata, Běngbe Útabnáftaca cánŷiñe mo canŷacá quetsomñecá, Diosmanda chě pavor šcochtsebema. Diosmanda cochjama atšbe ainana ngmēnaca ndoñe chaondětsemnana.

²¹ Atše chca cbontsabobiamná, er atše tšabá sěndětatsěmbo, ntšamo cbontseimpadancá cochjamama, y cabá más chama cochjatsmama. ²² Y mora inŷe soye, Diosmanda posada šcochjaboprónta, atše jányama chajábocna orscama, er atše puerte jtsošbuáchiyěse Běngbe Bětsábeñe sěndobátmana, cha tšěngaftangbiana yochjama lempe ntšamo atšbiana chašmojotjañcá, y chca, cha šochjaleséncia atše tšěngaftangbioye jésama.

Pablo Filemónbioye jadiošoftanama

²³ Epafra, muentše átšeftaca cárceloye utamená, Cristo Jesusbiana entšanga abuayiyay causa, chánaca cmontsechuaná. ²⁴ Y Marcos, Aristarco, Demas y Lucas, chě běngaftaca mondětrabájanga Cristo jaserviama, chěgnaca cmontsechuaná.

²⁵ Atše sěntseimpadana Běngbe Útabná Jesucristo, chaoma tšabe ben-dicioněnga tšěngaftangbeñe chaotsemnana.

Hebreos

Bëngbe Bëtsá bëngaftaca tojoyebuambá, chabe Uaquiñáftaca

¹ Tempo, Bëngbe Bëtsá ba soye y ba soyëngaca bëngbe bëts taitángbioye tojanéyana, chë chabe juabna oyebuambnayëngaftaca. ² Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bëngbe Bëtsá quem luare y nyetsca inyë luarënga tojama. ³ Cha endinýanýná Bëngbe Bëtsabe corente buashinýinýanana y uámanana, y cha endmëna cach Bëngbe Bëtsacá, y chábeñe bënga mondobena jinýama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinýncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentšana Bëngbe Bëtsá tojaninýanýé cha puerte bëtsá y uamaná bëtsemnana, celoca játbemëse, Bëngbe Bëtsabe catšbioica, nyetscanga jtsamëndayama.

Bëngbe Bëtsabe Uaquiñá chë angelëngbiama más bëtsá yomna

⁴ Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canýe más uamana uabaina y chë angelëngbiama canýe más uamana trabajo tbojanbonýé. ⁵ Ndegombre chca endmëna, er Bëngbe Bëtsá ndocna te ndocna ángelbioye mëntšá tbonjanianyana, ntšamo chabe Uaquiñábioye tbojanianyancá:

Aca atšbe Uaquiñá condmëna.

Mënté entsanga sënjinýanýé aca atšbe Uaquiñá comnana ca.

Ni ndocna angelbiama mëntšá tojánayana, ntšamo chabe Uaquiñabiama tojanianyancá:

Atše canýe taitá chabiama chántsemna,

y cha canýe Uaquiñá atšbiama ca.

⁶ Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora:

Bëngbe Bëtsabe nyetsca angelënga cha chamotsatschuaná ca.

⁷ Y chabe angelëngbiama, mëntšá tojánayana:

Atše sëndama atšbe angelënga, chë atšbe buayiynayënga, mo binýiëngcá chamotsemnana,

y chënga, atšbe oservénënga, mo iñëjëngcá ca.

⁸ Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,

y aca nyetsca soyënguiñe condbëtsemandaye, ntšamo tšabá yomncá jtsamëse.

⁹ Aca icontšena ntšamo tšabá yomncá nyetsca soyënguiñe jtsamama, y sempre chca jtsamama tša icoboše,

pero nýa tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá,

y tojama aca puerte oyejuayá chacotsemnana,

chë inýengbiama más oyejuayá ca —Bëngbe Bëtsá tojánayana.

¹⁰ Bëngbe Bëtsá mëntšánaca chabiama tojánayana:

Utabná, quem luare jobojátšama ora, aca quem luare tconjanma, y lempe chë celoca yomna soyéngnaca.

¹¹ Lempe chë soyénga nÿets tempo ndoñe queochátsmëna; aca nÿetsca tescama cochántsemna.

Lempe chë soyénga echanjopochóca, mo tojuatanguaná entšayacá.

¹² Aca chë luarénga cochanjátrocaye, mo tsmëcá cuafjabiamcá.

Chca, chë luaréngaca cochanjama, mo entšayá tcojtenëjonëtse y tcojenotrocacá.

Pero aca nÿets tempo cach aca cochandesomñe, y nÿets tempo vida cochandesóbomñe ca —cha tojánayana.

¹³ Bëngbe Bëtsá ndocna te ndocna ángelbioye mëntšá tbonjanianyana, ntšamo chabe Uaquiñábioye tbojaniancá:

Atšbe catšbioica cochtsetbemana,

acbe uayayénga acbe cucuatšifne chamoquedama atšbe obenánaca chjamëntscuana ca.

¹⁴ Ndegombre, nÿetsca angelénga espíriténga mondmëna Bëngbe Bëtsá jaserviama, ndëmuanÿenga cha tojanichamó bënga jabújabuachama, chë atsebácanénga mochtsemnënga tšabiamana.

2

Canÿe bëts soye endmëna atsebácanénga jtsemnana

¹ Chíyeca, bënga šontsamna sempre Bëngbe Bëtsabe soyénga jtsuananana, chë bënga tmonjouena soyénga, chë tšabe benachentšana ndoñe chamondojuánama. ² Ndayá Bëngbe Bëtsá tempo angeléngaca entšanga tojanamëndacá, canÿe ndegombre soye endmëna, y entšanga entsamna chca jtsobedecénana; y chë bacna soye tmojanmënga y ntšamo Bëngbe Bëtsá tojanmandacá ndoñe tmonjanmënga castigo tojanatšatá, chca tmojanma causa; y chca, ³ bënga chca bacna soyénga tmojtsamëse, ¿ntšamo mochjobenaye jtsejuabnayana Bëngbe Bëtsá chama ndoñe šochanjacastígaye ca? Ndegombre cha chca echanjama, bënga chábeñe ndoñe tmontsošbuáchese, chë bëts soye jëftšashjáchama, atsebácanénga jtsemnana. Bëngbe Utabná chë natsaná yojtsemna nda entšanga tojanabuayená Bëngbe Bëtsá entšanga yochjánatsebacama; y ínÿenga bënga šonjanabuayená cachcá ntšamo chábioye tmojanoyeunacá. ⁴ Y Bëngbe Bëtsánaca tonjaninÿanÿé, ndayá chënga tmojanabuayenacá ndegombre bëtsemnana, chabe obenana jinÿanÿiyama soyéngaca, entšanga chamenjananá soyéngaca, bëts soyéngaca, y entšanga chë Uámama Espiritu ainaniñe chamotsebomnana cha jtsamëse. Chca jamëse, cada ona chaotsobena jamama ntšamo Bëngbe Bëtsá yobošcá.

Bëngbe Bëtsá tojanma Jesucristo entšangcá chaotsemnana

⁵ Bëngbe Bëtsá angelénga ndoñe tonjubuáyana chamotsemándama ndayá quem luarentše yochtsemniñe, lempe mo tsmëcá chaotsemnana Bëngbe Bëtsá chaojama ora, chë ndayama mora bënga montsoyebuambná. ⁶ Chamna, ínÿoca Bëngbe Bëtsabe uabemana palabrénguifne mëntšá endayana, ntšamo chábioye canÿa tbojaniancá tojánayana: Entšanga ndoñe yapa uámanénga quemátsmëna, as ¿ndáyeca tša chëngbeñe cuanjésejuabnaye?

Chënga entšanga mondmëna. ¿Ndáyeca tša chënga cuanjésanÿena?

⁷ Aca tcojama entsá puerte uamaná chaotsemnama, y chë angelëngna nyë batšatema chabiamama más uámanënga mondmëna.

Aca tcojama cha puerte uamaná y respeto merecido bomná chaotsemnama,

⁸ y cha chaotsemándama nyetsca chë inye soyënguiñe, chë quem luarentše aca tcojamiñe —chiñe canya tojánayana.

Entsá lempe chaotsemándama Bëngbe Bëtsá tojanma ora, tondaye tonjánboshjona entsáftaca ndëmandana soye ca. Pero mëntscoñama ndoñe nya chca quemëntinye, chë entsá lempe ntšamo quem luarentše yomncá jtsemándayana. ⁹ Pero bënga mondëtatšëmbo y corente mondonyá Jesús aïñe chca tojanmama. Bëngbe Bëtsá tojanma cha nduamaná chaotsemnama, mo canye entsacá, baseftayté chë angelëngbiama más batšá uamaná. Bëngbe Bëtsá, entsangbe tšabiamama jtsejuabnayëse, yojánboše Jesús chaóbanama, corente jasúfriase; Bëngbe Bëtsá yojánboše cha chca chaomama, nyets luarentše entsangbe tšabiamama. Y Jesús ya chca tojánmayeca, Bëngbe Bëtsá ya tojinñanyé cha puerte bëtsá y uamaná bëtsemnama.

¹⁰ Nyetsca soyënga yobinña Bëngbe Bëtsabiamama y chábéyeca. Tšabá enjamna, Bëngbe Bëtsá jamana Jesucristo chaotsemnama lempe ntšamo entsanga tmojtsajabotcá, nda chëngbe bacna soyënguentšana cháuatsebacama. Bëngbe Bëtsá chca tojanma, Jesús, chë entsanga atsebácanënga jtsemnama unachayá, chaosufrima jamëse, chca, ba entsanga celoca, mo chabe basengcá, cháftaca bëtsétsanga chamotsemnama. ¹¹ Er Bëngbe Bëtsá cach Taitá nyetscangbiama endmëna: Jesús, chë entsanga Bëngbe Bëtsábënga chamotsemnama iuamabiamama, y chë entsanga chca chamojtsemnëngbiámnaca. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama. ¹² Bëngbe Bëtsabe uabemana palabrenguiñe Bëngbe Bëtsábioye cha mëntšá tbojanianama:

Atšbe uabentsëngbeñe acbiama chanjóyebuambaye,
y jacántase chochanjëtschuaye, ácbioye adórayënguentše ca.

¹³ Y mëntšánaca cha Bëngbe Bëtsabiamama tojánayana:

Atše atšbe Bëtsábeñe chantsošbuáchiye ca.

Y más hcoye mëntšá tojánayana:

Muentše Bëngbe Bëtsabe básengaftaca sëntsemna, chë atšbe cucuatšinë tojábashëjuanënga, atše jtsanñenama ca.

¹⁴ Quem Bëngbe Bëtsabe básënga nyetsca entsangcá mondmënayeca, Jesúsna canye entsá chëngcá tojánóbëma. Cha chca tojanma, jóbänëse, chë entsanga jóbänama chaotsamnama obenana bomná Satanás, jayënjanama. ¹⁵ Y chca, cha tojama chë jóbänama y ndayá chentšana yochjopásama auatjënga ndoñe chamondëtsauatjama; chënga nyets tempo corente ngmëñaca imnoyena, jóbänama auatja causa. ¹⁶ Er ndegombre, cha ndoñe tonjánabo chë angelënga jabújabuachama, ndayá chë Abrahábentšana entsangbioye. ¹⁷ Y chama cha ibojamna jtsemnana nyetsca soyënguiñe cachcá mo chabe uabentsëngcá, chë entsanga, chca, jobenayama jtsemnama chëngbiama mo bachnangbe canye más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuperdonama, puerte lastemado mëná y sempre ntšamo Bëngbe Bëtsá tbojayuancá amá. Chca, cha jóbänëse jamama entsanga chamobenama perdonánënga jtsemnama, y chca, jobenayama Bëngbe Bëtsáftaca tšabá tempcá jtsemnëngama. ¹⁸ Y mora cha entsobena,

ndēmuanÿenga bacna soye jamama tojócochenguënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentsëna ora.

3

Cristo Moisesbiana más uamaná endmëna

¹ Chíyeca, Jesucristbeyeca catšátanga, Bëngbe Bëtsábenga, ndēmuanÿenga Bëngbe Bëtsá tojáchembo chabe entšanga chamotsemnana, corente Jesucristbeñe šmochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uámana bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe. ² Er Jesús nÿets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema. ³ Canÿe yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnana, más jtsemerecénana Bëngbe Bëtsá cha puerta bëtsá y uamaná bëtsemnana cháuinÿanÿema, nÿe ntšamo Moisés, canÿa Bëngbe Bëtsabe entšanguentšá yojanomerecénama. ⁴ Ndēmuanÿe yébnënaca canÿe jebuaná jtsebmomnana, pero Bëngbe Bëtsá endmëna nda tojanma lempe ntšamo yobinÿncá. ⁵ Moisés yojtsama ndayá chaotsamama Bëngbe Bëtsá tbojanmandacá, tšabe oservenacá nÿetsca Bëngbe Bëtsabe entšángbeñe, y yojamna canÿa corente tatsëmbuá ndayá más chcoye yochjanopásama, ndayá Bëngbe Bëtsá yochjánayanama. ⁶ Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe Uaquiñacá jtsemándayëse, ntšamo canÿe uaquiñá jtsemándayana ndayá nÿetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamíllentšëngcá. Bënga chë pamíllentšá entšanga jtsemnana, bënga chë ndayá tmošbuáchema bëtš añémoca sempre tmojtsóyebuambnase, y sempre Bëngbe Bëtsá tšabe soyënga bëngbiana yochjamama tmojtsobátmanëse, y bënga chca jtsebmomnana puerta oyejuayënga tmojtsemnëse.

Chë jóchnama uámana luare Bëngbe Bëtsabe entšangbiana

⁷ Chcasna, ntšamo chë Uámana Espíritu Bëngbe Bëtsabe uabemana palabrënguiñe tojanayanacá:

Mënté tšëngaftanga ndayá Bëngbe Bëtsá tojtsichamcá šmojouenëse,

⁸ ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nÿetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinÿama ntšachetšá más muanjobenaye jamana y Bëngbe Bëtsá cabá uantado chëngaftaca tayojtsemnana.

⁹ Bëngbe Bëtsá tojánayana: “Chentše, tšëngaftangbe bëtš taitanga bëtscá monjánama jinÿama ndayëntscoñe atše uantado chëngaftaca tsjamnama;

chca chënga tmonjanma, masque canta bnëtsana uatëntscuana chënga chentše tmonjáninÿe chë atše sënjánama bëtš soyënga.

¹⁰ Chíyeca, atše chorsca entšángaftaca šonjánetna y sënjánayana:

‘Tšëngaftanga mora átseftaca ndoñe quešmátajna, mo chë otšenënga tmojtsemnëngcá,

y ndoñe šmonjábošena jtsiyenana ntšamo atše tsbošcá jtsamëse.’

¹¹ Chíyeca, atše chëngaftaca etonaná sënjánayana, mo nda cuafajuracá, chënga ndocna te mochjëftsashjache chë átseftaca jóchnama uámana luaroye jashjanguama ca” —cha tojánayana.

¹² Jesucrístbeyeca catšátanga, yejuana šmochtsantješna ndocná tšëngaftanguentšá chaondëtsebmna canye ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe.

¹³ Chamna, nyetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabrenguiñe “mënté ca” uabaina tempo. Chca cmontsamna, ndocná tšëngaftanguentšá chaondëtsamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená. ¹⁴ Er, ndayá Jesús chabe amëndayoca yobomnentšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnama, ntšamo bënga chábeñe jtsošbuáchiyama tmonjanontsé ora monjanamcá.

¹⁵ Ntšamo Bëngbe Bëtsabe uabemana palabrenguiñe endayancá: Mënté tšëngaftanga ntšamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama, mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna ca.

¹⁶ ¿Y ndëmuanyënga imojamna, chë Bëngbe Bëtsá tojanëyancá tmojanu-enentšana, nyetsca soyënguiñe chabe contra imojtsanmëna? Co chë Moisésbeyeca Egiptocana tmojánbocanënga. ¹⁷ ¿Y ndëmuanyëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanyënga entšanga ndoyena luaroca tmojanóbana y chëngbe cuerpo chentše tojanoquedá. ¹⁸ ¿Y ndëmuanyënga tojanëyana, mo nda cuafajuracá, chënga ndocna te mochjëftsashjache chë cháftaca jóchnama uámana luaroye jashjanguama ca? Co chë ndëmuanyënga ntšamo cha tojanmandacá ndoñe tmonjanmënga. ¹⁹ Y ndegombre, bënga montsobena jinýama chënga ndoñe tmonjëftsashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

4

¹ Chíyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscoñama iuëtsemna, puerte cuedado mochtsebmna, nderado ndánaca tšëngaftanguentšá ndoñe nanjobenaye chca jashjáchama. ² Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrenguiñe ndoñe montsanošbuaché. ³ Pero bënga, chë Jesucrístbeñe tmojošbuachengna, mochanjobenaye

chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiama cha mëntsá tojánayana ora:

Chíyeca, atse chëngaftaca etonaná, sënjánayana mo nda cuafajuracá, ndegombre chënga ndoñe mochjéftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; ⁴ er Bëngbe Bëtsabe uabemana palabrénguiñe cánýentse mëntsá endayana, chë canýsëfta tianoye ndayá cha tojanmama:

Bëngbe Bëtsá nýetsca trabajëngama tonjanochná chë canýsëfta tianoye ca. ⁵ Y cachentse Bëngbe Bëtsabe uabemana palabrénguiñe endayana, chë tempo chábioye chca tmojtsanábotengbiama:

Chënga ndocna te quemocháisashjache chë átseftaca jóchnama uámana luaroye jashjanguama ca.

⁶ Chë entsanga monjamna chë natsanënga chë tšabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjéftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguiñe tmojtsosbuáchenga, mochjéftsashjache chë Bëngbe Bëtsáftaca jóchnama uámana luaroye jashjanguama. ⁷ Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canýe tempo tojuinýnaná, chora entsanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrénguiñe mëntsá tojánayana ora: Mënté tšëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

⁸ Josué, Israeloca entsanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matënjannmëse, Bëngbe Bëtsá bayté chentšana, David yojéftsiyena ora, inýe tempuama ndoñe matënjanoyeuambá, chë ndaye ora entsanga muanjobenaye chë cháftaca jóchnama uámana luaroye jashjáchama. ⁹ Y chca, cabá endmëna canýe uámana luare ndayentse Bëngbe Bëtsabe entsanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nýetsca trabajënga tojanpochocá ora; ¹⁰ er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nýetsca trabajënga tojanpochocá ora. ¹¹ Chíyeca, šontsamna lempe ntšamo tmojobenacá jamana chë jóchnama uámana luare jéftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjéftsashjache.

¹² Er Bëngbe Bëtsabe palabra endmëna mo canýe aina soycá, nýets tempo entsángbioye ndayánaca jtsabuátambayana, y bëtscá jamana corente obenánaca, y ndocna te nýe bonamente chë palabra jóyebuambayana. Mo chë nýets uitoicajana más efšana espadëjaquécá, jobenayana puerta jashenoye jatëšana canýe cuerpo tcojatëtse ora, cachcá y cabá puerta más Bëngbe Bëtsabe palábraca, cha bënga jinýanýiyana ntšamo bënga nýe

bëngbe ainaniñe tmojtsejuabná y tmojtsebošcá, y chë ndocnábioye tmon-jinÿinÿé sóynaca; y chë palábraca cha endobena jáuyanana ntšamo bënga tmojajuabó y tmojabošencá aiñe o ndoñe tšabá bétsemnana. ¹³ Ntšamo Bëngbe Bëtsá tojamentsana tondaye quenátopodena chabiamana iytëmenana jtsemnana. Bëngbe Bëtsá lempe bominÿe iuetsequëcñá, y nÿetsca soyëngama y nÿetscangbiamana lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canÿe soye chca tmojamama.

Jesús endmëna chë más uámana bachnangbe bëts amëndayá

¹⁴ Jesús, Bëngbe Bëtsabe Uaquiñá celoye tojámarshëngo, y mora cha endmëna nda chabe delante sempre bëngbiamana ibuëtseimpadana, mo chë bachnangbe canÿe más uámana amëndayacá. Chíyeca, bënga šontsamna sempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nÿetsca entšangbeñe tmo-jayana. ¹⁵ Er chë bëngbiamana impadaná, mo bachnangbe canÿe más uámana bëngbe amëndayacá, Jesús, yobena bëngbiamana jóngmiana, bënga inÿe ora ndoñe yapa obenana tmontsebmoma ora, tšabe soye o ndaye sóynaca jamama. Chca endmëna, er Satanás tša yojtsentsena Jesúsbioye ba juabnënga chabotsontšáshjajuanama, jayënjanama bacna soye chaomama, nÿetsca juabnënga ntšamo bëngnaca mondbetsebmomncá, pero Jesús ndocna te ndocna bacna soye tonjëftsema. ¹⁶ As, ndauatjcá Bëngbe Bëtsá mochjótšëmbona, mo chábioye cuaftsobecocnangcá; cha canÿe uámana tbemaniñe yojtsetbemana canÿe bëts reyca; chca moch-jama, bënga chášualastemama, y bëngbiamana tšabe juabna jtsebmomnëse, chašújabuachama bënga chca chašojtséjaboto ora.

5

¹ Ndëmuanÿe bachnangbe más uámana amëndayánaca jtsemnana entšanguentsana bocacaná, y uabuayaná chëngbe cuenta Bëngbe Bëtsá jaserviama, chábioye juatšëmbonama y bayënga jobáyama Bëngbe Bëtsá jëtschuayama, chca, Bëngbe Bëtsá chë bacna soyënga entšanga tmojamama cháuaperdonama. ² Chë bachna jtsoobenana jóngmiana, chë bacna soyënga amëngbiamana chama ntsetatšëmbcá, y chë bacna soyënga jamama ingñëñënga imomnënga, mo otšenëngcá imomnëngbiamana, er cachánaca inÿe ora ndoñe yapa obenana ntsebmomnana, chë bacna soyënga jamama juabnëngama jtocochbuáchama. ³ Y chíyeca cha jtsemnana bayënga jobáyama Bëngbe Bëtsá juatšëmbonama, ndoñe nÿe entšangbioye bacna soyëngama cháuaperdonama, ndayá chábioye chaboperdonámna. ⁴ Ndocná quenátobena cachá quem uámana trabajo jentšetayana, bachnangbe más uámana amëndayá jtsemnana; cha jtsemnana, Bëngbe Bëtsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmncá. ⁵ Cachcá, Cristo ndoñe cachá tonjanenábuayana jtsemnana chë Bëngbe Bëtsabe delante sempre bëngbiamana impadaná, mo bachnangbe canÿe más uámana amëndayacá, ndayá Bëngbe Bëtsá tbojanábuayana chë uámana trabajo jtsebmomnana. Cha endmëna nda Jesúsbioye mëntšá tbojanianana: Aca atšbe Uaquiñá condmëna.

Mënté entšanga sënjinÿanÿé aca atšbe Uaquiñá comnama ca.

⁶ Y inÿocnaca, Bëngbe Bëtsabe uabemana palabrenguiñe mëntšá tbo-janiana:

Aca nÿetsca tescama canÿe bachna condmëna,

canÿe bÿets bachna ntšamo Melquisedec yojamncá ca.

⁷ Jesús quem luarentše yojÿftsienÿentscuana, cha juayebuáchÿese y shÿchbuíyeca Bÿengbe Bÿetsáftaca ibnÿcuentaye y ibnaimpadana, cha chÿ jobanámentšana jatsbocama yojanobená; y Jesús ntšamo Bÿengbe Bÿetsá yojanbošcá tojánmayeca y tša respeto chabiama bómnyeca, chábioye tbojanoyeuná. ⁸ Chca, Cristo masque Bÿengbe Bÿetsabe Uaquiñá in-amna, jasúfriase tojanábouinÿe ntšamo jamana ndayá Bÿengbe Bÿetsá tojtsebošcá. ⁹ Chca, Bÿengbe Bÿetsá chábioye tbojánbema lempe ntšamo entšanga tmojtsajabotcá, nda chÿngbe bacna soyÿngama cháuatsebacama; chentšana cha, Cristo, tojanma lempe ntšamo yojaniytcá, nÿetscanga chÿ entšanga chábioye imojánÿeyeanÿenga chamotsobenama nÿetsca tescama atsebácanÿenga jtsemnama; ¹⁰ y Bÿengbe Bÿetsá tbojanábuayana, chÿ chabe delante sempre bÿengbiama impadaná, mo bachnangbe canÿe más uámana amÿendayacá chaotsemnama, canÿe bÿets bachna ntšamo Melquisedec yojamncá.

Resjo endmÿena, ošbuáchiyana jtsajbanana

¹¹ Bÿetscá entsemna quem palabrama jóyebuambayama, pero chÿ soyÿnga jayanama ntšamo tšÿngaftanga catafjosertaycá, ndoñe paselo quenátsmÿena, er tšÿngaftangna nÿa uenana Bÿengbe Bÿetsabe soyÿngama jósertana. ¹² Tšÿngaftanga ya bayté Jesucristbe soyÿngama šmotátšÿmboyecá, tšÿngaftanga cmontsamna ya jtsobenana ínÿyÿngbioye chÿ soyÿnga jtsabuátambayana; pero tšÿngaftanga cmontšÿjaboto ndánaca Bÿengbe Bÿetsabe soyÿngama cachiñe chacmÿÿÿetabuayená, chÿ jtsošbuáchiyama šmojontšÿ ora natsana jshauatsjínÿyana soyÿngama. Y chca, tšÿngaftanga šmojobiama mo šešonatemÿngcá, jtsÿjabótana létšiyeye jofšiyana y ndoñe jobenayana jasana chÿ jabmuánama ndoñe paselo tontsemna soyÿnga. ¹³ Chÿ nÿetsca soyÿnguiñe ntšamo tšabá yomncá jtsamama buatÿmbana soyÿnga ndoñe tontsabuatmá cha, jtsemnana mo canÿe šešonatemcá, nda vida jtsebomnana nÿe létšiyeye jtseftmanÿese. ¹⁴ Pero chÿ tmojtsobena jajuaboyana y jtsetatšÿmbuana ndayá tšabá yomna o ndayá ndoñe tšabá jamama, chca jtsamÿese tmoyenamna, chÿngta jtsemnana mo bÿetsÿsangcá, ndÿmuanÿyenga ndayánaca jasana, chÿ ndoñe paselo jabmuánama soyÿngnaca.

6

¹ Chcasna, bÿenga šontsamna jtsajbanana nÿe jésebošana jtsatsjÿndayana Cristbe buatÿmbana soyÿnga, chÿ bÿenga chábeñe jtsošbuáchiyama tmojanontšÿ ora tmojanatsjinÿe soyÿnga, y šontsamna jtsatsjÿndayana chabiama nÿetsca soyÿnga, más totcá jóšÿrtama yomna soyÿnga. Chca, bÿenga mochántsemna mo chÿ bÿetsÿsangcá, ndayánaca jtsesayana. Ndoñe más nÿe chÿ natsana buatÿmbana soyÿngama mattsatsjÿndaye, mo chÿ ndayá yomna bacna soyÿnga jtsamana y chÿ bÿenga ndoñe vida ntsebomnama junatsana soyÿnga amana jtsajbanana, y chÿ tšabe benache jtishachana; o ntšamo Bÿengbe Bÿetsábeñe jtsošbuáchiyana; ² chÿ juabáyana ndayá yomna; chÿ ínÿyabe bestšašiniñe cucuatšÿnga jacjayana Bÿengbe Bÿetsábioye chabiama jaimpádama; chÿ obanÿnga jtayenama Bÿengbe Bÿetsá yochjamama; y mocna ora ntšamo entšanga tmojamama Bÿengbe Bÿetsá yochjayanama, chÿngta chÿ nÿetsca tescama yomna tšabe vida chamotsebomnama o

nýetsca tescama castigánënga chamotsemnana. ³ Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

⁴ Ndëmuanýënga, canýe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëgnaca, chábënga bëtsemnana, y chë Uámána Espíritu chëngbe ainaniñe chaotsemándama imobomna, ⁵ y chë Bëngbe Bëtsá ntšamo tojašebuachenacá sempre inétsamama tmojinýe, y ndëmuanýënga tmojáninýe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora, ⁶ chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëšoye jaquédana, y jtemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjamcá. ⁷ Smochjinýe: fshantse jamana chë ba uaftënénga chiñe chaómashënguama, y chë chiñe trabájayëngbiama bëtscá jaja sananga tojóboecnëse, Bëngbe Bëtsá jamana, chë fshantsentšana bëtscá tšabe soyënga entšangbiama chaotsebínýnana. ⁸ Pero nýe uchmašëshangá y matënga uchmëfjangaca chiñe tojuábocnëse, chë fshantse tondaye ntsámánana; y nderado Bëngbe Bëtsá nanjama chiñe ndocna tšabe mata chaonduábocnana, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga mochántsemna.

Bëngbe Bëtsábeñe sempre chamotsobátmanama y ainaniñe bëtscá añemo chamotsebomnana

⁹ Pero masque chca montsoyebuambná, atšbe bonshánënga, bënga tšabá fsëndëtatšëmbo tšëngaftangbeñe chë más tšabe soyënga echántsemna, chë atsbocaná jtemnana tojtsá cha yobomna soyënga. ¹⁰ Er Bëngbe Bëtsá sempre ntšamo tšabá yomncá nýetsca soyënguiñe jtsamana, cha ndegombre echántsejuabnaye ndayá tšëngaftanga šmojamama, y chë chabíama šmojinýinýe bonshánama, chabe entšangbiyoye jtsëjabuáchanëse, ntšamo mórnaca šmojtsama. ¹¹ Pero bënga fsëntseboše, cada ona tšëngaftanguentšá, nýets tempo y Jesús chaojésabëntscuana chaotsinýanýná corente yoboše chca jtsamana, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabíama cha chaomama. ¹² Ndoñe queftsátšboše tšëngaftanga oyënjayënga chašmotsobiama chë Bëngbe Bëtsá tmojabanýe trabajo jtsamama, ndayá Jesucristbeñe ošbuáchiyana bomnëngcá y padecena soyënguiñe uantado mënëngcá šmochtsama. Chca, chënga mochanjóyëngacñe ndayá Bëngbe Bëtsá jatšatayama tojašebuachenacá, chabe entšanga bëtsemnana.

¹³ Bëngbe Bëtsá Abrahámioye tbojanšbuachená ora, chca tbojaníyana cachabe uabaina jayanëse, er inýa chabíama más uamaná ndoñe yontsemna ndabíama jajúrama, ntšamo tbojanšbuachenacá ndegombre chaotsemnana; ¹⁴ cha mënťšá tbojanšbuachená: “Aíñe, atše chanjama aca bëtscá tšabe bendicionënga chacotsebomnana, y chanjama acbentša pamillentšana mallajta entšanga chamotsemnana ca.” ¹⁵ Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

¹⁶ Entšanga tmojajurá ora, chca jamana chëngbiana canye puerte más uámanabe uabaina jayanëse, y chca chëngbiana más uamanabiama tmojajurá ora, jtsayanana ntšamo tmojašbuachenaca pronto mochjamama, y chcasna, chama ya ndoñe más ntjatenátsëtsnayana. ¹⁷ Y chca, Bëngbe Bëtsá tojánbošena botamana jinñanyiyana, ntšamo cha tojanašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninñanyé cha chca yochjanmana, cachabiama jajúrase, chë ntšamo tojanašebuachenacá yochjanmama ndegombre bëtsemnama. ¹⁸ Bëngbe Bëtsabe šbuachenana soye y chama jinñanyiyama ntšamo tojanayancá, ntšamo tojanašebuachenacá ndegombre yochjamnama, chë uta soye ndocná ntsoberenana jatrócama; y chca tojayana ora, ndoñe ntsopeđenana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanñenama, mo canye bëtš resjuentsana tmojtsachetëngcá, ntšamo chentšana atsebácanënga jtsemnama cuaftsenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëtš añémoca chábeñe jtsošbuáchiyëse, cha yejuana šochtsanñenama mondobátmana. ¹⁹ Mo ntšamo chë bėjaye asentoca cuedádoca tcojajajo anclama, chë barcuñe enjaquenënga tšabá jtsetatšëmbuana chë barco ndoñe yochántšashatiyiyana, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëtš yebnoca, “chë más uámana ca” uabaina luaroye, entšëjua ujonñana stëtsoica, Bëngbe Bëtsabe delante jtsemnama, ²⁰ ndayentše Jesús celoca, Bëngbe Bëtsabe delante tojámashëngo bëngbe tšabiama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nyetsca tescama, canye bëtš bachna ntšamo Melquisedec yojamncá.

7

Jesús, canye bëtš bachna ntšamo Melquisedec yojamncá

¹ Quem Melquisedec yojamna Salem puebloca rey y bachna chë celoca Bëngbe Bëtsabiama; Bëngbe Bëtsá, chë nyetscangbiana más uamaná. Abraham chë reyënga y chëngbe soldadëngaftaca imojentsjaná y tojanayëñaná chentšana yojtsatabó ora, Melquisedec tojánbocna cha jajëbenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama. ² Chora Abraham chábioye tbojanatsetá, chë reyëngaftaca imojentsjaná ora, lempe tojanosháchiñentšana, bnëtsanentšana canye soye. Chë palabra Melquisedec endayana “nyetsca soyënguiñe tšabá ama rey ca”; y chánaca yojamna Salem puebloca rey, y chca endayana “nyetscanga natjëmbana chamotsiyenama ama rey ca”. ³ Chabe pamílangbiana tondaye quenatótatšëmbo; chca cha endmëna mo ni taitá ni mamá ndoñe endbomnacá, ni bëtš taitanga. Tondaye quenatótatšëmbo ntseco tojanonñyama,

ni ntseco tojanóbanama; chca, inye soyënguiñe cha yojamna mo Bëngbe Bëtsabe Uaquiñacá, y endmëna mo nyetsca tescama bachna cuaftsemncá.

⁴ Y mora, šmochjájuaboje tša uamaná Melquisedec inamnana, er bëngbe tempsca uamana bëts taitá Abraham chábioye tbojanatšetá, chë reyëngaftaca imojentsjaná ora lempe tojanosháchiñentšana bnëtsanentšana canye soye. ⁵ Ntsamo Moisesbe leyíñe endëmandacá, chë bachnangbe más uamana amëndayá Leví, Aarónënaca ca uabainabe pamillentšana tmomna bachnanga, jtsamnana chë Israeloca entsángbioye nyetsca chë tmobomna soyënguentshana bnëtsanentšana canye soye jtsayëngacayana; y chca jtsamnana masque chë entsanga cachëngbe pamillentšënga tmomna y Abrahábentšana pamillentšëgnaca.

⁶ Pero Melquisedec, masque Aaronbe pamillentšá ndoñe yonjamna, Abraham, chë ntšamo Bëngbe Bëtsá tbojanšbuachenacá tojanóyëngacñabentšana, cha tojanóyëngacñe nyetsca soyënguentshana bnëtsanentšana canye soye, y Bëngbe Bëtsábioye tbojanimpadá, Abraham bëtsacá tšabe bendicionënga chaotsebomnana chaomama. ⁷ Y ndocná quenátobena jayanama ndoñe ndegombre yondmëna ca, chë Bëngbe Bëtsábioye impadaná ínÿabiyama tšabe soyënga chaomama, más uamaná inëtsemna chë chca tojóyëngacñabiyama, inÿa chabiyama Bëngbe Bëtsábioye tbojaimpadá ora. ⁸ Quem tempo, bachnanga mochjóbanënga, entsángbioye jtsayëngacayana nyetsca chë tmobomna soyënguentshana bnëtsanentšana canye soye, pero chë Bëngbe Bëtsabe uabemana palabra, Melquisedecbiama endoyebuambná cha mo canÿa cabá ainá totsomñcá.

⁹ Y bënga montsobena jayanama, Abraham Melquisedécbioye chë nyetsca soyënguentshana bnëtsanentšana canye soye tbojanoyé ora, yojamna mo Leví, chë nyetscángbioye nyetsca soyënguentshana bnëtsanentšana canye soye ayëngacayá, Melquisedécbioye chca cuaftopagacá; ¹⁰ er cha Abrahambe pamillentšá inamna. Melquisedec yojtsabó ora y chábioye chë lempe tojanosháchiñentšana bnëtsanentšana canye soye Abraham tbojanatšetá ora, yojamna mo nyetscanga, chë Abrahábentšana entsanga más chcoye mochtsaniyenënga, chëngnaca chë bnëtsanentšana canye soye cuafjajocá, masque Abraham chca tojanama ora, Leví y chë Abrahábentšana inye entsanga cabá ndoñe tmonjanonÿná.

¹¹ Israeloca entsanga Moisesbe ley tmojanáyëngaca, chë bëts taitá Levibe pamillentšënga bachnanga imojamnënga Bëngbe Bëtsá imojt-seservena ora, y chënga monjamna Aarónbentšana entsanga. Ntsamo chë leyíñe yomandancá imojánamënga perdonánënga jtsemnana y Bëngbe Bëtsabe bominyíñe tšábenga jtsemnana quem bachnanga jamama matmënjanobenase, ndoñe manjanëyta Bëngbe Bëtsá inye bachna chabuatsembuama, nda ndoñe yonjamna mo chë bëts bachna Aaroncá, ndayá ntšamo chë bëts bachna Melquisedec yojamncá. ¹² Er, canye bachnanga Bëngbe Bëtsábioye jtseservënana tmojajbaná y inye bachnanga chábioye jasérviana tmojatontsé ora, jtseytana chë natsana bachnanga imojanoservena ora mándaye leyëgnaca jtsetrócama. ¹³ Bëngbe Utabná, ndabiyama quem soyënga jtsóyebuambnayana, ndoñe Aaronbe pamillentšá quenjatmëna, ndayá inye pamillentšá, y quem pamillentša entsanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca. ¹⁴ Er nyetscanga mondëtatšëmbo Bëngbe Utabná Judabe pamillentšana bëtsemnana, y chë pamíllama Moisés ndocá

tonjánayana, Bèngbe Bètsá mo bachnangcá chènga jtseservénama.

¹⁵ Y ntšamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá. ¹⁶ Cha bachna yojamna, ndoñe chë bachnanga chabe pamillentsana jabo-canama yojánamnama canye ley tojánayanayeca, ndayá nyetsca tescama jéftsienama cha inobénayeca. ¹⁷ Er mëntšá endmëna, ndayá Bèngbe Bètsá chabiana tojánayana:

Aca bachna nyetsca tescama condmëna, canye bèts bachna ntšamo Melquisedec yojamncá ca.

¹⁸ Cha tojánabo ora, Bèngbe Bètsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entsanga jujabuáchama atsebácanënga jtsemnama, y chca, chëngbiana ndoñe bètská yonjanoserverna. ¹⁹ Er Moisesbe léyeca, entsanga ndoñe tmonjanobená Bèngbe Bètsabe bominyiñe tšabënga jtsemnama, pero mora chama canye corente más uámana soye montsebmna: Jesucristbeñe jtsošbuáchiyëse, chábeñe montsobátmana Bèngbe Bètsáftaca tšabënga chásubiamama, y chca, Bèngbe Bètsábioye bënga jtobéconama.

²⁰ Y Bèngbe Bètsá lempe chca tojanma, cachabiana jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentsëngbiyoye tmojanëbuáyana ora, Bèngbe Bètsá ndoñe chca tonjánayana, ²¹ pero mo bachnëcá chaoservema Bèngbe Utabnábioye tbojanábuayana ora aíñe; cach Bèngbe Bètsabiana jajúrase, Bèngbe Utabná canye bachna yochtsemna ca tojánayana. Ntšamo Bèngbe Bètsabe uabemana palabrénguiñe endayancá:

Bèngbe Utabná Bèngbe Bètsá, Jesucristbioye tbojanianayana, cachabiana jajúrase, ntšamo tojanayancá ndegombre chaotsemnama, y juabna ndoñe ntjatrócama:

“Aca bachna nyetsca tescama condmëna ca.”

²² Bèngbe Bètsá chca tojánayanama, Jesúsbeyeca bënga corente mondétatšëmbo, ndayá Bèngbe Bètsá bëngbiana jamama tojanašebuachenacá, chë Jesúsbioye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entsangbiana tojanašebuachená soyama. ²³ Chë inye bachnanga banga imojamna, er ndocná yonjanobena Bèngbe Bètsábioye nyetsca tescama chca jtseservénana; cada ona básefta uatëngama tojéftsanoservé, tojanóbana y ínjabioye chë trabajo jatontšabuáchana. ²⁴ Pero Jesús ndocna te ntjobanámayecna, cha mo bachnëcá Bèngbe Bètsábioye nyetsca tescama bochjéftseserverna, y ndocna te chabe trabajo ínjabioye bochanjéftsinyiníyie, chë inya cachcá jtsamama chauatontšema. ²⁵ Chiyeca, cha yobena nyetsca tescama játsebacana ndëmuanýënga chábeyeca Bèngbe Bètsábioye tmojobeconá, er nyetsca tescama cha echanjéftsienayana Bèngbe Bètsábioye chëngbiana jtseimpadánama.

²⁶ Chcasna, Jesús ndegombre endmëna lempe ntšamo bënga imuajabotcá nda Bèngbe Bètsábioye bëngbiana chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canye juabna ínjabë contra yonjábomna, ainaniñe ndocna bacna juabna yonjábomna, chë bacna soyënga amënguentsana luaroca mëná, y Bèngbe Bètsá tojanma celoca más bëtšá y obená nyetscangbiana cha chaotsemnama. ²⁷ Cha ndoñe bonjanájaboto canye te y inye te bayënga jtsebánayana, Bèngbe Bètsá

chabe bacna soyëngama chaboperdonama y chë bacna soyënga entsànga tmojanmámna, mo chë inÿe bachnangbe más uámana amëndayënga mondbetsamná, cachëngbiana y chë judiëngbiámna. Cha tojanma lempe ntšamo yojaniytá canÿe soye y nÿetsca tescama, entsànga bacna soyënga tmojanmama perdonánënga chamotsemnana. Cha chca tojanma, chabe derecho vida jtsobomñama cachcá tojanonÿná ora; y tojanóbana entsànga chamotsobenama perdonánënga jtsemnana. ²⁸ Ntšamo Moisesbe leyiñe yojanmandacá, chëngbiana mo chë bachnangbe más uámana amëndayëngcá tmojanëbuáyana entsànga inÿe ora bacna soye amënga; pero Bëngbe Bëtsá cabá chë ley entsangbe cucuatšifne tojanáboshjonentšana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiana jajúrase, ntšamo tojanayancá ndegombre chaotsemnana. Bëngbe Bëtsá tojanma chë Uaquiñá chaotsemnana lempe ntšamo entsànga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

8

Cristo, nda jóbanëse tojanma entsànga Bëngbe Bëtsáftaca mo canÿacá chamotsemnana

¹ Chë más uámana soye ndayama bënga montsichamo, chë Cristo mo bachnëcá yomnama montsoyebuambná ora, entsemna: Bënga chábeñe imojtsebomna canÿa nÿetsca tescama Bëngbe Bëtsabe delante bëngbiana impadaná, mo chë bëngbe bachnangbe más uámana amëndayacá, Bëngbe Bëtsabe catsbioica yojtsetbemana jtsemándayama, y Bëngbe Bëtsá chë más uámana tbemanentse. ² Chë inÿe bachnanga Bëngbe Bëtsabe bëts yebnentse tmojánamashjna chë “más uámana ca” uabaina luaroye, Bëngbe Bëtsabe delante jtsemnana; pero chë luare celoca ndayentse nÿets tempo Cristo mo chë bachnangbe más uámana amëndayacá yoservena, entsànga ndoñe chca tmonjanpormá, ndayá Bëngbe Bëtsá.

³ Nÿetscanga chë bachnangbe más uámana amëndayënga tmojanëbuáyana, entsàngbiana soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnana; chíyeca, jtseytana Jesucristo ndayánaca chaotsebomnana, Bëngbe Bëtsábioye juatšëmbonama. ⁴ Cha quem luarentse tojtsetrabájase, cha ni mo bachna ndoñe nántsemna, er muentse ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyiñe yomandancá. Y chca, ndoñe nantseyta cha chca chauatoservénama. ⁵ Chë inÿe bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoservena, ndoñe cachcá yontsemna chë ndayentse Jesucristo celoca yoservena luarcá, ni ntšamo cha yoservencá; nÿe batšatema bëngbioye suinÿanÿná ntšamo chë celoca luare yomnama, ndayentse Cristo mo bachnëcá yoservena. Y bënga mondëtatšëmbo quem luarentse chë soyënga chca yomnama, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojanianana: “Cuedado cochtsebomna chë atšbiana yebniñe nÿetsca soyënga jamama, ntšamo tcbonjaninÿinÿecá chacomama, chë tjoca bonjamna ora ca.” ⁶ Pero bëngbe bachnangbe más uámana amëndayá Cristo, tojashjache canÿe más bëts trabajo

jtsebomnama, ntšamo chë inÿe bachnanga imobomna trabajuama; cachcá, ndayá Bëngbe Bëtsá tojayancá Cristoftaca bëngbiana jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entšangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiana jamama.

⁷ Chë Bëngbe Bëtsá natsana tojanašebuachená soyëngaca matënjanopodé entšanga chamotsamama ntšamo yojanamncá, ntšamo tojanašebuachenacá jýëngacñama, as ndoñe manjanëyta Bëngbe Bëtsá cachiñe canÿe trato chauátsbemama entšangbiana. ⁸ Pero Bëngbe Bëtsá tojáninÿe ntšamo yojanamncá entšanga ndoñe tmonjanmama, ntšamo cha tojanašebuachenacá jýëngacñama, y Bëngbe Utabná Bëngbe Bëtsá chëngbiana mëntšá tojánayana:

Canÿe tempo echanjóshjango, y chora Israel y Judabe pamillentša entšangbiana básefta soyënga jamama chanjašebuachená, chënga átseftaca tempcá tšabá jtsemnama chamotsobenama.

⁹ Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá, atše chënga sënjanënatse ora, Egiptó luarocana sënjesanëbuacna ora; pero chëngna, ntšamo jamama enjanamncá, chë sënjanašebuachená soye jýëngacñama ndoñe chemátanma causa, atše cachcá chënga sënjesanëñyaye ca, Bëngbe Utabná tojánayana.

¹⁰ Chë Israeloca entšangbiana ndayá jamama canÿe tempo chentšana chanjašebuachená soye, mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama,

y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entšanga.

¹¹ Chë tempo ndoñe queochátsiyta cánÿenga ínÿenga chamotsabuátambama,

cachabe luariñe oyenábioye o cachabe pamillentša entšábioye, atše chë chëngbe Utabná chašmotsábuatmama.

Ndoñe queochátsëyta, er nÿetscanga uámanënga y nduámanënga, corente tšabá atšbe šmochantsábuatma.

¹² Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátsjuabnaye ca —cha tojánayana.

¹³ Bëngbe Bëtsá, chë entšangbiana mora jamama tojášebuachenama tojtsichamo ora, chca jtsemnana, er cha tojama chë tempo entšangbiana jamama tojanašebuachená soye, mora ya ndoñe chaondëtsoservénama; ndayá mo tanguá soycá tojtsemna y ya ndoñe tontsoservena, chë soyna nÿe batšatema más y ya jtsopochócana.

9

Bëngbe Bëtsá jadórama muentša luare y chë celoca luare

¹ Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiana pormana yebnentše quem luarentše. ² Chíyeca, Bëngbe Bëtsá tojanmandá

chaotsemna canye jatsjacama opodena yebna chábioye jadórama, mëntsá: Chë natsana tsañe quem Bëngbe Bëtsabiana yebnentse inauabaina “chë uámana luare ca”; chentse inamna chë canyésefta quinyenëfjuangá castellano candelershiñe, y canye mesésa ndayiñe yojacjana chë luarentse Bëngbe Bëtsá bëtsemnama inyinñaye tandësenga.

³ Inye ujonñana entsëjua chentsana, inye luare inamna; inauabaina “chë más uámana luare ca”. ⁴ Chentse inamna chë castellano altar, incienso jajuinñiyama, y chë cajontema nyetsiñe castellanoca pormánëtema. Quem cajontema yojaninñanñá ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana soye inyinñaye cajontema ca”; y chë tsoye quem soyënga inabomna: canye castellano jarrëtema, maná ca uabaina tandëseca, chë Bëngbe Bëtsá tojanma celocana chabe entsangbiama chaótsatsama saná; Aaronbe varëfja, chë tojanantsëfjonëfja; y chë ndëtsbé tablëbenga ndayiñe Bëngbe Bëtsá tojanábema chë bnëtsana uámana mandënga. ⁵ Chë cajontema juatsboca inamna chë juatëngmiáša uabomnënga, mo angelëngcá, “querubinënga ca” uabáinënga, y chënga imojaninñanñá chë Bëngbe Bëtsabe buashinñinñanana chëntsñaca bëtsemnama. Chënga, chë juatëngmiášhangaca chë cajontémentsa nyets ústonëtema imojanëtsbotsana; chë ústonëtema inauabaina “entsanga bacna soyënga tmojamama Bëngbe Bëtsá perdonaye luare ca”, er chentse, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entsanga cháuaperdonama. Pero mora ndoñe quenátsiyta chë soyëngama lempe jatóyebuambnayama.

⁶ Lempe chca tmojanprontantsana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama. ⁷ Pero nye chë bachnangbe más uámana amëndayá yojobena chë inye luaroye jamashënguana, y nye canye cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana amëndayá tojanma bacna soyënga Bëngbe Bëtsá chaboperdonama, y chë ntsetatsëmbcá entsanga tmojanma bacna soyëngnaca. ⁸ Chca, chë Uámana Espiritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentse tmojtsamëntscuana, nyetscanga cabá ndoñe tmonjanobená chë inye luaroye jamashjnama, chë “más uámana luaroye”. ⁹ Chë soyëngaca jt-sopodénana bëngbioye jinñanñiyana, chë tempo, chë Bëngbe Bëtsábioye jadórama yebnentse entsanga uta luare imojábomna ora, ndoñe yonjopodena Bëngbe Bëtsabe delante nyetscanga jatsmënana, mo chë bachnangbe más uámana amëndayacá. Y chë soyëngnaca jtsayanana, chë Bëngbe Bëtsabiana uatšëmbona soyëngaca y bachnanga tmojanóba bayëngaca, ndoñe tonjanopodé jamana canya Bëngbe Bëtsábioye adorayá, Bëngbe Bëtsáftaca tempcá tšabá chaotsatsmënana y Bëngbe Bëtsá chabe bacna soyëngama tbojaperdonama ainaniñe corente chaotsetatsëmbuama. ¹⁰ Chënga, chë uatšëmbona soyëngaca y tmojanóba bayëngaca tmojanma nye ntšamo Moisesbe leyiñe yojanayancá, ndayá chiñe yojanlesenciancá, ndayá jasama o jofšiyama, y chë corpo jabebiana mo tšabe entsangcá Bëngbe Bëtsabe delante jtsatsmënana;

nÿetsca mandënga nÿe cuerpama, pero ainanama tondaye ntjamana. Pero chë entsanga chca yojánamna jtsamana, nÿe Bëngbe Bëtsá inÿe soyënga, más tšabe soyënga jamama tojamandantscuana, chë tsëm trato tojábema ora.

¹¹ Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámama amëndayacá, chca, bëngbiana chaotsemnana chë tšabe soyënga ntšamo mochjoyëngacñécá. Chë luare celoca ndayentše cha Bëngbe Bëtsabe delante mo bachnécá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entsangbiana jamama inajuabnaya. Chë luare ndoñe entsangbe cucuátšeca yondëpormana, y chca jtsayanana, quem luarentša soye ndoñe yondmëna ca. ¹² Cha, canÿe y nÿetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inÿe bachnanga imojuamancá; ndayá jóbane, chabe buiñe juabuáshanë, cha tojanma entsanga atsebácanënga jtsemnana chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nÿetsca tescama yomna tšabe vida jtsebomnana chamotsobenama.

¹³ Ndëmuanÿenga ndayámnaca chë leyama tmojanoquedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe buiñe jabuéscacjana, y chë altaroca tojajuinÿé ternerabe jatinyá chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga tmojánayana chënga imojtsobena chë ínÿengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca. ¹⁴ Ndayá bachnanga tmojanmcá yojanámana entsanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínÿengaftaca Bëngbe Bëtsábioye jadórama tmojanobenase, jtsachetšá más yojtsámama Cristbe buiñe, ndëmuanÿeye tojanábuashana bëngbiana cha tojanóbana ora! Chë nÿets tempo vida bomná Espíritbe obenánaca, Cristo, chabe derecho vida jtsobomñama cachcá tojanonÿá y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canÿe bayá tondaye ndbemaná chë bachnanga cuafjobacá juatšëmbonama, entsangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbana yeca, Cristo yobena jamama bënga ainaniñe corente tšabá chamotsetátšëmo, bacna soyënga bënga tmojamama, chë ndoñe vida jtsebomnana bënga junatsana soyënga, chama bënga perdonánënga imojtsemnana, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservëse.

¹⁵ Chíyeca, Cristo jóbane tojama entsanga Bëngbe Bëtsáftaca cánÿiñe mo canÿacá chamotsemnana, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entsanga chamotsemnana tojáchembënga perdonánënga chamotsemnana, chë Bëngbe Bëtsabe temp-sca tratentša ley jtsocomplínama inamna ora imojoyenëntscuana bacna soyënga tmojanmama; y chëngnaca chamotsobenama chë nÿetsca

tescama mochtsebmoma soyënga jýëngacñama, ntšamo Bëngbe Bëtsá chabe entšanga tojanašebuachenacá.

¹⁶ Ntšamo canye testamentiñe tojtsayancá chaopasamna, jtseytana chaotsótatsëmbo chë chca jamama tojašbuachená cha tojóbanama. ¹⁷ Canye testamento tondaye ntsámanana, chë chca jamama tojašbuachená cha cabá ainá totsomñëntscuana; nya cha tojóbanana orna aifne. ¹⁸ Chiyeca chë Bëngbe Bëtsabe natsana trato, entšangbeñe tojanobojatsé, chora tmojanóba bayëngbe buiñe jabuëscjese. ¹⁹ Moisés chë leyentša nyetsca mandënga nyetsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyeshëca enajuabnyëiñe tojanfchecuacuá, y chora chë leyënga librësañe tojanbuëscacja, y nyetsca entšangbeñnaca. ²⁰ Y mëntsá tojánayana: “Quem buiñe entsinñinñá, ntšamo Bëngbe Bëtsá tojamandacá ndegombre yochtsemnana, y tšëngaftangbiama puerte yochtsámanama ca.” ²¹ Moisésnaca buiñe tojanbuëscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena. ²² Er ntšamo leyiñe iuayancá, yojtsemna nya mo nyetsca soyënguiñe buiñe jabuëscacjana, Bëngbe Bëtsábioye jadórama tšabá chaoservema; y buiñe ndoñe tonjuábuashanësna, ndoñe ntsopodénana entšanga bacna soyëngama perdonánënga chamotsemnana.

Cristo jasúfriase y jóbanëse, tojanma entšanga bacna soyëngama perdonánënga chamotsemnana

²³ Chiyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batsatema jtsinñanñayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše imnëtsama soyëngama. ²⁴ Er Cristo ndoñe tonjánamashëngo canye luarentše Bëngbe Bëtsá jadórama nye entšangbe pormánentše, ndaye luare nye batsatema jtsinñanñayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiama jtseimpadánama. ²⁵ Chë bachnangbe más uámana amëndayana chë “más uámana luaroye” jamashënguana canye cada uata, bayëngbe buiñeca, ndoñe cachabe buiñeca, chca, ndayánaca jamama entšanga bacna soyënga tmojamama perdonánënga chamotsemnana. Pero Cristo chë luaroye celoca ndoñe tonjánamashëngo, chentšana jtësebocnana, y chabe buiñe juabuáshanëse cachiñe jatóbanama, y ba soye cachcá chauëtsemnana. ²⁶ Chca tojtsemnëse, Cristbiama manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonñinñë quem luarentša entšanga bacna soyënga jabuajuánama, chëngbiama jóbanëse, mo entšangbe bacna soyëngama canye tmojóba bayá, Bëngbe Bëtsábioye uatšëmbonacá. ²⁷ Cachcá, ntšamo nyetsca entšanga jtsamnana

nýe canýe jóbanama, y chentšana Bèngbe Bètsá chèngbiana jayanana chë imojëftsiyenëntscuana ntšamo tmojanmcá tšabá o ndoñe tšabá bëtsemnama, y chéngaftaca jamana ntšamo chora tojajuabocá,²⁸ cachcá, Crístnaca, nýe canýe chabe derecho vida jtsobomñama cachcá tojanonýá, chabe buíne juabuáshanëse jóbanama, ba entšanga bacna soyëngama jáperdonama; y chentšana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabama tša tmobátmanënga jabátsebacama.

10

¹ Chë Moisesbe leyentša mandënga, ntšamo chë bachnanga yojánamnama Bèngbe Bètsá jadórama tmojóba bayëngaca y inýe soyëngaca, ndoñe ntsinýanýnaya lempa chë Bèngbe Bètsá chabe entšanga jatšatayana puerte tšabe soyënga, pero aínne batsatema jtsinýanýnaya ntšamo chë soyënga yochtsemnama. Chíyeca chë mandënga, chë uátšëmbona soyëngaca y Bèngbe Bètsábioye jadórama tmojóba bayëngaca, ndocna te ntjopódiana jamana chë Bèngbe Bètsábioye jobéconama tmojtsebošënga, chca soyënga tmojtsamama cada uata nýets tempo, chënga ainaniñe corente chamotsetatšëmbuama chëngbe bacna soyëngama nýetsca tescama perdonánënga imojtsemnama. ² Er ndayá tcojtsamama Bèngbe Bètsabiana uátšëmbona soyëngaca y chábioye jëtschuayama tmojóba bayëngaca, entšanga Bèngbe Bètsábioye adórayënga, chabe delante tšábënga jtsemnama matmënjanobenase, chënga chë bacna soyënga tmojanmama ainaniñe ngménaca ya ndoñe mamënjëtsemna, y matmënsanajbaná soyënga amana chë tmojóba bayëngaca. ³ Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamuatenójuaboma; ⁴ er chë toronga y chivënga tmojóbanëngbe buíñeca ndoñe ntsopodénana entšángbioye bacna soyënga jabuajuánama.

⁵ Chíyeca, Cristo quem luaroye tojánabo ora, Bèngbe Bètsábioye mëntšá tbojaníyana:

Ndoñe tconjábošëna entšanga chacmátšëmbona soyënga, ni tmojobaye bayënga,

pero aínne tcojama atše canýe entšacá chaitsemnama.

⁶ Ndoñe tšabá quecmátinýana chë tmojóba y tmojajuinýé bayënga, entšanga bacna soyëngama chacotsaperdonama.

⁷ As atše Bèngbe Bètsá sënjaníyana: “Bèngbe Bètsá, muentše sëntsemna, ntšamo aca icobošcá atše chaimama, ntšamo acbe uabemana palabrënguiñe atšbiana endayancá, chë ndayá atše chjanmama ca.”

⁸ Natsana, Cristo tojánayana, Bèngbe Bètsá ndoñe tonjánbošëna, ni tšabá tbonjanínýnana entšanga chamuátšëmbona soyënga, ni Bèngbe Bètsábioye jëtschuayama tmojóba bayënga, ni tmojóba ni tmojajuinýé bayënga, entšanga bacna soyëngama cha chaotsaperdonama ca, masque chënga chë Bèngbe Bètsábioye jadórama soyëngaca jamana, ntšamo leyíne iuayancá ndayá chënga jamama yojtsamna. ⁹ Y chentšana, Cristo Bèngbe Bètsábioye tbojátaníyana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanýé chë jtsamana soyënga tmojóba bayëngaca, tondaye yonduámana entšanga bacna soyënga jabuajuánama, y entšangbe bacna soyëngama jóbanëse tojaninýanýé chë ntšamo

Bëngbe Bëtsá yobošcá jtsamana, más iuámána chë inÿe soyënga játamama. ¹⁰ Bëngbe Bëtsá tojama, bënga chabe entšanga y chabe delante tšábenga chamotsemnana, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonÿayëse y entšangbe bacna soyëngama jóbanëse, canÿe y nÿetsca tescama.

¹¹ Judiëngbe nÿetsca bachnanga nÿets tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama. ¹² Pero Jesucristo entšangbe bacna soyëngama tojanóbana ora, yojamna mo canÿe tmojóba bayacá, Bëngbe Bëtsá entšanga bacna soyëngama cháuperdonama; nÿe canÿe y nÿetsca tescama chca tojanma, y chentšana Bëngbe Bëtsabe catšbioica tojtanoítbema, canÿe uámána puestentše, jtsemándayama. ¹³ Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšinë chamoquedama yochjamëntscuana. ¹⁴ Er nÿe canÿe, entšangbe bacna soyëngama cruzoca jóbanëse, Jesucristo lempe tojama, entšanga chë Bëngbe Bëtsábenga jtsemnana chémbonënga, chabe delante nÿetsca tescama tšabengcá chamotsemnana. ¹⁵ Y Uámána Espíritnaca, Bëngbe Bëtsabe uabenana palabrenguine šontsinÿanÿná chca ndegombre bëtsemnana, mëntšá tojánayana ora:

¹⁶ Ndayá entšangbiana chjama, canÿe tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

¹⁷ Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama,

y ntšamo atše stsebošcá contra soyënga chënga tmojamama ca.

¹⁸ Chcasna, Bëngbe Bëtsá nÿetsca tescama entšanga bacna soyëngama tojaperdoná ora, ya ndoñe ntjátsiytana inÿe soyënga más játamama, mo bayënga cuañjabaycá, entšanga bacna soyëngama perdonánënga chamotsemnana.

Sontsamna Bëngbe Bëtsábioye jtobéconana

¹⁹ Y chca, Jesucristbeyeca catšátanga, Jesusbe buiñe tojanábuashanama y bëngbiana tojanóbanama, chábeñe jtsošbuáchiyëse, bënga montsobena, tondayama ntjatauatjácá Bëngbe Bëtsabe delante jamashënguama. ²⁰ Bënga montsobena jamashënguama chë tsëm benachëjana, Cristo bëngbiana tojamëjana; cha nda inétsama chë nÿetsca tescama yomna tšabe vida chamotsebomnana. Mo chë quem luarentše chë bachnangbe más uámána amëndayacá, chë ujonÿana entšëjuajana jamashënguana chë “más uámána ca” uabaina luaroye, Bëngbe Bëtsabe delante jtsemnana, cachcá, Cristo bëngbe bacna soyëngama mo entšacá tojanóbanayeca, bëngnaca montsobena Bëngbe Bëtsabe delante luaroye jamashënguama. ²¹ Bënga mondbomna canÿe bëts bachnangbe más uámána amëndayá, Bëngbe Bëtsabe entšangbeñe jtsemándayama, y cha endmëna Jesús. ²² Chíyeca, Bëngbe Bëtsá jasérviana ndegombre ainaniñe corente jtsebošëse, y chábeñe puerte jtsošbuáchiyëse, šontsamna Bëngbe Bëtsábioye jobéconana. Ntšamo chë bachnángbioye buiñeca tmojanabuešcá, Bëngbe Bëtsabe delante tšabengcá chamotsemnana cha jasérviana, cachcá, Cristbe

buiñe juabuáshanëse y bêngbiana jóbanëse, bênga ainaniñe corente montsetátšëmbo Bêngbe Bëtsá nyetsca tescama bêngbe bacna soyëngama šojtsaperdonama. Y bênga béjayeca uabainëngnaca mondmëna; chíyeca bênga jtsobenana Bêngbe Bëtsábiöye chca jobéconana.

²³ Bênga šontsamna nyets tempo Bêngbe Bëtsábeñe puerte jtsošbuáchiyana, y ndocna te nye ndayámnaca játajbanana entšángbeñe ichámuana, chë Bêngbe Bëtsábeñe jtsošbuáchiyëse bênga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá. ²⁴ Bênga šontsamna janguanguana ntšamo muatjobenaye añemo jenatšetayana, nyetscanga jtsenbobonshánana, y ntšamo tšabá yomncá jtsamana; ²⁵ pero ndoñe quešnátamna játajbanana, Bêngbe Bëtsábiöye jadórana enefjuanana mo Crístbeñe ošbuáchiyënga quetsomñecá, ntšamo báseftanga imojtsamcá. Chamna, nyetscanga añemo mochtšenatšetnaye Cristo nyets tempo jtseservénama, y más mora, chë ndayá imojtsonyama, Bêngbe Utabná yochjésabama ya yojtsobecuaama montsetátšëmbo ora.

²⁶ Er chë ndegombre soyëngama tšabá tmojátatšëmbonentšana y chë soyënga tmojoyeuná chentšana, bacna soyënga jtsamëse tmojtsiyena, nye chca jamama tmojtseboše causa, muattsaboté ndayá Cristo bêngbiana tojanmcá, bêngbe bacna soyëngama cha tojanóbana ora, y ya ton-daye nántsemna ntšamo Bêngbe Bëtsá bênga jtsaperdónama. ²⁷ Y chca, ndayá bênga muattsobena jobátmana soye nántsemna nye chë Bêngbe Bëtsábiocana castigo, chë ndayama šojtsamna uatjana jtsebmomnana; y nye jobátmana chë tempo, ndaye ora Bêngbe Bëtsá puerte etonaná chabe uayayënga bëtscá iñesheca yochtsapochócaye. ²⁸ Ndánaca chë Moisesbe leyama tojayana tondaye yondovalena ca, y útata o únganga chca tmojouena y aiñe cha chca tojayana ca chënga tmojayanëse, jtsemnana chë entšábiöye jtsóbana, tondaye ntjalastemacá. ²⁹ Canya, nyets ainánaca Bêngbe Bëtsabe Uaquiñábiöye tbojtsaboté; y tojayana Crístbe buiñe, chë ndëmuanýeye tojanábuashana bêngbiana tojanóbana ora, ton-daye yonduámana ca, ndayá nye ndaye entšabe buiñcá ca, chë buiñe chë ndëmuanýeye šojtsinýanýná ndayá Bêngbe Bëtsá tbojašebuachenacá bêngbiana jamama, y ndáyeca Bêngbe Bëtsá chabe entšanga šojábiamca, cha jaserviama; chë entšá Uámca Espíritbiöye tbojóyenguango, nda inétsama bênga tšabe soyënga chamotsebmomnana; y canya chca amá, ¿tšëngaftanga ndoñe šmontsejuabná cha ibojtsomerecena Bêngbe Bëtsábiocana canye puerte más uabouana castigo, chë Moisesbe leyama tondaye yondovalena ca tojayanabiama? ³⁰ Bênga nyetscanga mondétatšëmbo Bêngbe Bëtsá mëntšá tojánayanama: “Atše chanjama chënga chamosufrima, ínýenga chamosufrima tmojama causa; y chënga chanjácastigaye, ínýengbiöye bacá tmojaborlá causa ca.” Y mëntšánaca tojánayana: “Bêngbe Utabná chabe entšangbiamca echanjayana ntšamo tmojëftsemcá tšabá o ndoñe tšabá bëtsemnana, y chëngaftaca echanjama ntšamo chora chaojajuabocá ca.” ³¹ ¡Tša uabouana, Bêngbe Bëtsá chë nyets tempo ainabe cucuatšíñe joquédana, castiganá jtsemnana!

³² Pero ntšamo tempo yojamnama šmochtšenójuabnaye, chë ndegombre soyënga Jesucristbiamca cabá chora šmonjanábuatmana ora, y chora tša jenujuéyzana cmonjanotocá padecena soyënguñe, y chë causa tša šmojanufrí. ³³ Báseftanga tšëngaftanguentšëngbiöye entšangbe delante tcmojanoyánguango, y ínýenga tmojanma puerte chašmotsesufrínama;

y ínÿenga tšëngaftanguentsënga chca imojansufrinëngaftaca šmojanama, chënga jujabuáchama. ³⁴ Tšëngaftanga šmojánalastemana chë chënguentsënga cárceloye imojanëtámenënga; y oyejuayënga šmojanlesenciá ntšamo šmojanbomncá ínÿenga chacmotsabacama, er tšëngaftanga šmojátatsëmbona Bëngbe Bëtsábiocana más tšabe soyënga šmojtsebomnama, chë nÿetsca tescama šmochtsebomna soyënga.

³⁵ Chcasna, ndoñe šmatjajbaná ainaniñe bëtscá añemo jtsebomnana, ni Bëngbe Bëtsábeñe sempre jtsobatmanana; er chca šmobatmánayeca, Bëngbe Bëtsá echanjama tšëngaftanga bëtscá uacanana soyënga chábiocana chašmotsebomnama.

³⁶ Tšëngaftanga cmontsamna corente uantadënga jtsemnana, padecéniñe chašmojtsachñëjuana ora, chca, ntšamo Bëngbe Bëtsá yobošcá tšëngaftanga chašmotsamama, y ndayá Bëngbe Bëtsá tojanašebuachenacá chašmóyëngacñama. ³⁷ Er Bëngbe Bëtsabe uabemana palabrenguiñe cha mëntšá tojánayana:

Betsco, ndoñe bën, y chë jabama ibomná echanjabo.

Ndoñe bën quebochatóbema.

³⁸ Nÿe chë ndabiama atše chaijama atšbe bominiñe tšabia chaotsemnana,

átšbeñe cha betsošbuáchema, cha ndegombre chë nÿetsca tescama yomna tšabe vida echántsebomna;

pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyeuaye ca —cha tojánayana.

³⁹ Pero bënga ndoñe quemátsmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nÿetsca tescama pochocánënga jtsemnana imojtsajñënga; pero aiñe mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnana moch-jashjáchënga.

11

Bëngbe Bëtsábeñe ošbuáchiyana jtsebomnana

¹ Ošbuáchiyana jtsebomnana endmëna corente jtsetatšëmbuana, ndayá tmojtsobatmancá ndegombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonÿacá ndegombre chca yomnama. ² Bëngbe Bëtsá tojánayana bëngbe bëtš taitanga tšabá imojánama ca, chënga chábeñe imojtsošbuachéyeca.

³ Bënga, Bëngbe Bëtsábeñe mondošbuachéyeca, mondëtatšëmbo cha quem luare y nÿetsca luarënga tojanmama, chca chaotsemnana cha tojanmandá ora; chcasna, chë ndayá mora bënga jinÿama imobencá, cha tojanma bënga ndoñe mondobena jinÿama soyënguentsana.

⁴ Abel Bëngbe Bëtsábeñe yojanošbuachéyeca, oveshatëmënga chábioye tbojanátšëmbona, y chë soye Bëngbe Bëtsabiama más tšabá yojtsemna, chë ndayá Caín, chabe catšata, Bëngbe Bëtsá jëtšchuayama tbojanátšëmbonama. Chíyeca, Bëngbe Bëtsá tojánayana Abel chabe bominiñe tšabia yojtsemna ca, ndayá Abel chábioye jëtšchuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

⁵ Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbëtšëñe, ntjobancá. Chentšana ndocná tonjanobená cha jtsinÿenana, Bëngbe Bëtsá tbojesanbëtšëñe causa. Y Bëngbe Bëtsabe uabemana palabrenguiñe endayana, Bëngbe Bëtsá Enócaftaca oyejuayá

canjamna ca, ntšamo jtsamëse vojoyenama, y chentšana celoye tbojtsanámbañe. ⁶ Pero Bëngbe Bëtsábeñe ntsošbuachiyá, ndoñe quenátopodena cha oyejuayá bëngaftaca jabemama, er chábioyre jobéconamna, entšá jtsemnana jtsošbuáchiyana cha ndegombre bëtsemnana, y cha inétsamama chë cha jtsabuatmama tša tmošoëngbiana bëtscá tšabe soyënga chamotsebomnama, mo chábiocana uacanana soyëngcá.

⁷ Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinýama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquëshá tojanapormá chabe pamíllanga játsebacama. Cha chca tojanma ora, ošbuáchiyana bómnayeca, cha tojaninýanýé entsanga tša bacna soyënga tmojanmama y chë causa castigánënga jtsemnana yojtsamnama. Chabe ošbuachiyánamnaca Noé tojánashjache Bëngbe Bëtsabe bom-inýiñe tšabia jtsemnana, y chca entšá jashjáchana, nýe Bëngbe Bëtsábeñe jtsošbuáchiyëse.

⁸ Bëngbe Bëtsá Abrahámioye tbojanchembo, inýe luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatsetayama luaroye, masque Abraham ndoñe yontsetátšëmbo ndémoye yochjánama. ⁹ Bëngbe Bëtsábeñe yojanošbuachéyeca, yojobena mo inýe luarocana ashjanganocá jtsiyenana, cachabe luarentse ndoyená, chë Bëngbe Bëtsá tbojanšbuachená luarentse. Entšëjuaca pormana tambënguiñe vojoyena, cachcá ntšamo chë chábentšana básenga Isaac y Jacob ibojëftsiyencá; y chátnaca Abrahamcá ibojanobátmana jóyëngacñama ntšamo Bëngbe Bëtsá Abrahámioye tbojanšbuachenacá. ¹⁰ Er Abraham corente uantadá yojanobátmana chë canýe luaroye celoca jamashënguama tempo; chë luare inamna canýe bëtš pueblo, puerte tšabe ucatjoniñe pormana pueblo, canýe luare chë ndayentšama Bëngbe Bëtsá tojanjuabó ntšamo chaotsemnana, y cachabe pormana luare inamna.

¹¹ Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canýe šësona chabotsebomnama, masque chora ya bëtšanánëjema yojtsemna, šësona jtsebomnama. Bëngbe Bëtsá chca tojanma, er Sara corente yojanjuabná, cha chë canýe šësona yochtsanbomnama tbojanšbuachená cha, nýets tempo ntšamo tojayancá amá yojamna ca. ¹² Y chca, quem entšá Abraham, chë šësonga jtsabamnama ya ndobenábentšana, ba básenga tmojanonýná, tša mallajta mo chë celoca estrellëngcá, y tša chëftanga mo chë mar béjayoca chënyañentša cascajca, ndocná jacúntama ntjobenayana.

¹³ Nýetsca quem entsanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatšatayama y chë soyënga ndegombre yochtsemnana, y chama oyejuayënga chënga imojtsemna. Chënga tmojánayana quem luarentse chënga imojoyena mo cachëngbe luarentse ndoyenëngcá, y quem luarëjana mo nýe achñëjuanëngcá ca. ¹⁴ Y chca tmojtsichámëngna, puerte

jtsinÿanÿayana chënga tša imojtseboše inÿe luaroca joyënanama, canÿe luare cachëngbiama. ¹⁵ Chënga nÿe chë ndayentsana tmojëftsanbocna luarama manjánjuabnase, matmënjanobená tsabá cachoye jesshëconama. ¹⁶ Pero chëngna canÿe más tsabe luare innaoše, canÿe luare celoca. Chíyeca Bëngbe Bëtsá ndoñe yonjanëuatja, chëngbe Bëtsá ca chënga chamotsechembuanama, er celoca canÿe bëts luare, mo canÿe bëts publëcá chëngbiama tojanprontá.

¹⁷ Bëngbe Bëtsá Abrahámbioye jinÿama, ndegombre añe o ndoñe Bëngbe Bëtsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jëtschuayama, ntšamo Abraham chë tojóba bayëngaftaca jamama yojanamancá. Cha Bëngbe Bëtsábeñe yojanošbuachéyeca, yojtseprontana chë nÿe canÿe uaquiñá ibnabomná jóbama, Bëngbe Bëtsábioye jëtschuayama, masque Bëngbe Bëtsá mëntsá tbojanšbuachená: ¹⁸ “Chë ácbentsana entsanga nÿe Isaacbiajana mochanjabo ca.” ¹⁹ Abraham corente yojanjuabná y yojátatsëmbo, Bëngbe Bëtsá ndegombre obenana bomná bëtsemnama, chë obanënga chámuatayenama jamama. Chíyeca, Bëngbe Bëtsá Abrahámbioye tbojtsanauyaná Isaac jóbama ora, yojamna mo Abraham obanënguentšana chábioye cuaftoyëngacñëcá. Y chca, ntšamo Isaácraftaca tojanopasacá, batšá yojtsinÿanÿayaye ntšamo Jesucrístoftaca yochjanopasacá.

²⁰ Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiama, Jacob y Esaú, bëtscá tsabe bendicionënga chabotsebomnama, chë joshjanguama tempënga ora.

²¹ Jacob Bëngbe Bëtsábeñe yojanošbuachéyeca, ya jóbanama ora, tbojanimpadá cada ona chë Josebe básëngbiama, Bëngbe Bëtsá chaoma bëtscá tsabe bendicionënga chamotsebomnama. Cha chca tojanma, jotsejbënase Bëngbe Bëtsábioye jadórama, y chabe jatjonëfjiñe tsbanánoca jojuáchase.

²² José Bëngbe Bëtsábeñe yojanošbuachéyeca, ya jóbanama ora, tojánayana más chcoye chë Israeloca entsanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

²³ Moisesbe bëtsetsata Bëngbe Bëtsábeñe ibojanošbuachéyeca, cha tojanonÿná ora, unga shinÿëntscuana cha tmojtsaniytëme, er chata tbojáninÿe cha canÿe botamana básëtema bëtsemnama, y ndoñe tbonjanëuatjaná chë reybe mandama, chë nÿetsca judiëngbe basetëmënga boyabásëtemënga jtsëbáyana.

²⁴ Moisés Bëngbe Bëtsábeñe yojanošbuachéyeca, ya bëtscá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama. ²⁵ Chamna, tojánbošena cha jasúfriama ínÿënga chamotsamama, cánÿiñe chë Bëngbe Bëtsabe entsángaftaca, y ndoñe nÿe baseftayté tsabá jatsmënana, bacna soyënga jtsamëse, ntšamo cachá tojtsejuabnacá, nÿe cachá tsabá jtsomñama. ²⁶ Chamna, cha yojanjuabná, chë padecena soyënguiñe jasúfriana ntšamo Cristo tojansufricá, más tsabá yojamna chë Egiptoca uámana soyëngama, er cha Bëngbe Bëtsábeñe jtsošbuáchiyëse chábeñe yojanobátmana, ba tsabe soyënga mo canÿe uacanana soyca cha ibochjanatsetayama.

²⁷ Bëngbe Bëtsábeñe yojanošbuachéyeca, Moisés Egiptocana tojëftsanbocna, chë luarentša rey cháftaca chábuëtnama ntjatauatjca.

Cha ainaniñe nÿets tempo añemo yojtsebomna, y chca yojáninÿna mo chë ndocná jinÿyama tondobenacá, Bëngbe Bëtsábioye cuaftsonÿacá. ²⁸ Bëngbe Bëtsábeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entšangaftaca yebnëngoye amashjuaniñe buiñeca tojanbuéscacja, chca, chë ángel obanayá, chë Israeloca pamíllangbeñe Egiptoca chë mayor uaquiñënga ndocá chaondámama.

²⁹ Moisés y Israeloca entšanga Bëngbe Bëtsábeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentšana, chë Egiptoca entšanga cachcá jamama tmojánbošena ora, nÿetscanga chiyiñe tojtsanatajo.

³⁰ Israeloca entšanga Bëngbe Bëtsábeñe imojanošbuachéyeca, chë Jericó bëts pueblentša tapišënga shëconana canÿsëfta tentscuama chënga imojánajnentšana, chëšënga yojtsáshajaye.

³¹ Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínÿengaftaca, chë bëts pueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entšanguentšana ichmónënga tšabá tojanëbuaja, chë jarrepárama tmojánanga ntšámose chë luarentše oyenënga jáyëñjanama jobenayama.

³² Atše sëntsobena bangbiana más jóyebuambayama, Bëngbe Bëtsábeñe ošbuáchiyëngbiana, pero luare šattsëshbe chcangbiana jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambnayëngcá. ³³ Chënga Bëngbe Bëtsábeñe imojanošbuachéyeca ínÿengbe mandadëngbe entšangbioye tmojanayëñjaná, bëtscá imojánama nÿetsca entšangaftaca ntšamo tšabá yomncá jtsamama y nÿetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama. ³⁴ Ošbuáchiyana bómnyeyca, Bëngbe Bëtsá tojanma lempe chaotsefsanama, chëngbioye iñeshiñe tmojanacjá ora, chënga ndocá chamondëpasama; tmojanotsbocá espadëjaca jobanámentšana; ya tondaye añemo bëntsebomna ora, Bëngbe Bëtsá tojanma bëts obenana y puerte añemo chamotsebomnama; tmojánashjache bëts obenana jtsebomnama ínÿenga jáyëñjanama, chëngaftaca imojtsentsjaná ora; y tmojanobená inÿe mandadënga y chëngbe soldadënga jáyëñjanama, chamotsachetama jamëse. ³⁵ Ošbuáchiyana bómnyeyca, básefta shembásënga chëngbe óbana pamíllangbioye cachiñe ainënga tmojtananÿe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnyeyca, ínÿenga tmojanma básefta ošbuáchiyënga, puerte chamosufrima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebomnana, y ndoñe nÿe chë jótsbocana batšatema más vida jtsebomnama.

³⁶ Ošbuáchiyana bómnyeyca, ínÿenga corente tmojansufri, ínÿenga chëngbioye tmojanoyánguango ora y tmojanatsetšená ora; y ínÿenga tmojansufri y cárceloye cadenëjuangaca utámenënga joquédamnaca.

³⁷ Inÿëngbioye ndëtsbëngaca tmojtsanatëchënganja, serruchëshaca tmojtsanëjátcacaye, espadëjaca tmojtsanëbaye. Inÿenga imojánajna cánÿentšana inÿecnoye nÿe oveshá y chivëbe bobáchecha uichëtjonënga,

ujabótënga, ainana tsetšanënga, y ínÿengbeyeca mocá borlánënga. ³⁸ Chë nÿe quem luarama enójuabnaye nga ndoñe monjanomerecena chënga mëngaftaca jtsiyenama, chënga chë vida imojábomna cánÿentšana ínÿecnoye aniñe, entšanga ndoyena luarënguenache, tjañenache, fshantsiñe atëbëfniñe y cuevëshënguiñe.

³⁹ Nÿetsca quem entšanga, ndëmuanÿengbiana muentše tmonjoyebuambá, Bëngbe Bëtsá tšabá chëngbiana tojánayana, ošbuáchiyana imojánbomna ca; pero ni canÿa chënguentšá tonjanóyëngacñe, ndayá Bëngbe Bëtsá chëngbe entšanga jatsatayama tojanašebuachenacá, nÿetsca tescama jtsebmoma. ⁴⁰ Bëngbe Bëtsá, bëngbeñe jtsejuabnaye, tojanjuabó canÿe más tšabe soye bëngbiana jamama, chca, Bëngbe Bëtsá canÿe ora jamama, bënga nÿetscanga, chënga y bënga chamotsemnama lempe ntšamo Bëngbe Bëtsá yobošcá, ntšamo Bëngbe Bëtsá tojanašebuachenacá jóyëngacñese.

12

Bënga mochtsejuabnaye ndayá Jesús tojanmama

¹ Chíyeca, bënga mochtsejuabnaye ba entšangbiana, chë bëngbiana más natsana imojanienënga, ndëmuanÿenga puerte tšabá bënga jtsinÿanÿayana ntšamo ndegombre yomnana Bëngbe Bëtsábeñe ošbuáchiyana jtsebmoma, mo chënga ndayá bënga tmojtsamama cuaftsonÿangcá. Chcasna, mo chë tmochamanëngcá, ínÿengaftaca jenëyëñanama, chë jashjanguama tojtsemna luaroye natsana jashjanguama, chënga jotjajuamna, chë chorscama nduaserverna entšayá jtsenátsejca, y lempe ndayá tojtsama más uenana chamotjajuama soyëgnaca jtsenójacana; bëngnaca cachcá, ndoñe matjalesencia bënga Crístbioye ndoñe tšabá ndëtsošservénama, ni chë bacna soyënga jamama juabnënga, chë bëngbioye paselo jáyëñanama juabnënga cachcá chamotsamama. Chamna, šontsamna sempre Bëngbe Bëtsá jtsešervénana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo. ² Jesusbiana mochtsejuabnaye, nda šuebënatsana bënga ošbuáchiyana chamotsebmoma, y šuinÿanÿná ntšamo nÿets tempo nÿetsca soyënguiñe Bëngbe Bëtsábeñe jtšošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentšana yochtsanbomna bëtš oyejuayánama; y yojanjuabná, chë más bacá uamana entšangcá jóbanana, chabiama ndoñe canÿe uamana soye yonjamna ca; y chentšana chë uamana puestentše tojtanoítbema, Bëngbe Bëtsabe catšbioica, jtsemándayama.

³ Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Crístbiana oservëniñe ndoñe chacmondëumantšema, ni ainaniñe añemo jtsebmoma ndoñe chašmondájbanama. ⁴ Tšëngaftanga padecena soyënguiñe šmojachnëngo, entšanga bacna soyënga imojtsama causa, pero mëntscoñama ndoñe cmontsamna jóbanama, Crístbe soyëngama enojuerzániñe; ⁵ y tcmojtsëbnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguiñe mëntšá endayana:

Atšbe uaquiñá, Bèngbe Utabná aca jábuayenama tojtseboše ora, aca jasúfriase y padecena soyènga jauántase, chora ndoñe catjátsjuabnaye chiñe mo canye nduámama soye cuaftsemncá; y cha chacmojuácacana ora, ndoñe cattasajbaná ainaniñe añemo jtsebomnana.

⁶ Er Bèngbe Utabná jábuayenana nda cha tbobobonshanábioye, y jacastigana chë mo chabe uaquiñacá tbojofjábioye ca —chiñe endayana. ⁷ Padecena soyènguiñe chašmojtseufrina ora, šmochtsejuabnaye chë soye yojtsemna tšèngaftangbioye jábuayenama, y chca, Bèngbe Bètsá tšèngaftangaftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama? ⁸ Nderado Bèngbe Bètsá tšèngaftanga ndoñe tcmonjabuayená, ntšamo nÿetsca chabe básengaftaca cha endetsamcá, as tšèngaftanga ndoñe ntsemnana ndegombre chabe básenga. ⁹ Y bènga básenga monjamna ora, bèngbe bètsésanga quem luarentše monjanamana bènga jácastigana, y bènga chèngbioye ndoñe stëtsoye ntjaquédana. Y mora, bènga más šontsamna, jtsobedecénana y más bèts respeto jtsebomnana celoca Bèngbe Taitabiana, nda tojama entšanga espíritu chamotsebomnana, y chca, bènga tšabe vida chamotsebomnana. ¹⁰ Bèngbe bètsésanga quem luarentše, nÿe básefta tescama, bènga jèftsabuayinyayana, y chca jamana chènga tšabá tojtsinÿana ora; pero Bèngbe Bètsá bènga šojtsabuayiná ora, sempre chca jtsamana bèngbe tšabiama, bènga chabe entšanga jábiamama, cachacá puerte tšábenga, ntšamo cha nÿets tempo yomncá. ¹¹ Sempre bènga ndaye castigo tmojtsebomna ora, chora bènga chama ndoñe oyejuayènga ntsemnana, pero añe cochtsetšenánènga. Pero bènga chë castigüentsana tmojuatsjinÿe ndayá Bèngbe Bètsá chë sóyeca tbojtsabuayinacá, as chentsana jóbocnana natjèmbana oyenana, nÿetsca soyènguiñe ntšamo tšabá yomncá jtsamèse.

Bèngbe Bètsábioye jtsabotena, entsangbiama ndoñe tšabá ntsemnana.

¹² Mo nda puerte uamèntšnayacá, jatrabájama tondaye añemo ntjtsebomncá, tsátšena buacuatsèngaca y puerte uamèntšena ntsamiašèngaca, tšèngaftangbentše báseftanga ya uamèntšnayènga šmojtsemna Bèngbe Utabnabiama trabájayiñe, y ainaniñe ndoñe añemo šmontsebomna. Cachiñe bèts añemo šmochtishache, y Bèngbe Bètsabe obenana cachiñe šmochtsatsbomna. ¹³ Mo chë canye benache tšabá y ndericho chaotsemnana tmojtsamèngcá, chca, chë coshetènga chiñe jama chamotsobenama y más tšabá jtsatanama chamuatatsjinÿama, y chë benachentsana ndoñe chamondètsebocanama; cachcá tšèngaftanga, chë bètscá ošbuáchiyana y Cristo jaserviama corente añemo šmobomnènga, chë nÿe batsatema ošbuáchiyana y chca jatrabájama nÿe tondaye añemo ndbomnènga šmochjújabuache; chë soye šmochjama, ntšamo Cristo tšabá jaserviama yomncá jinÿanÿiyèse, y ntjalesenciaca ndocna soye chaotsama chë tšabe benachentsana tšèngaftanga chašmotsojuánañama.

¹⁴ Lempe ntšamo chašmojobenacá šmochjama nÿetscángaftaca natjèmbana jtsiyenama, y ntšamo Bèngbe Bètsabe entšanga mondbetsamcá jtsamèse chašmotsiyenama, cha jtseservènèse; er chca ntjamcá, canÿa ndoñe ntsobenana Bèngbe Utabnábioye jinÿama. ¹⁵ Yejuana šmochtsantješna, ndocná Cristbeñe ošbuáchiyana chaondètsajbanama, y chca, chë Bèngbe Bètsá chabe entšangbioye yochjatsataye tšabe soyènga chènga ndoñe chamondashjache.

Smochtsantješna, tšëngaftanguentše ndocná chaondëtsemna, mo canye untja tbëtëjca, chë chcaja sayëngbioye jášocayana, nda chaotsama, ínÿenga natjëmbana ainana ndoñe chamondëtsebonnama y bacna soyënga jtsamëse chamotsiyenama. ¹⁶ Yejuana šmochtsantješna ndocná tšëngaftanguentše shembása o boyabásaftaca bacna soye amá chaondëtsemnama, ni canya ndabiamá Bëngbe Bëtsabe soyënga tondaye chaondëtšamana. Esaú chca tojanma, chë lempe yochjanashjachcá, mayor uaquiñá bëtsemnama, chabe uabentsábioye canye šcena sanama tbojtaname ora. ¹⁷ Y tšëngaftanga šmondëtatšëmbo, chca tojanopasá chentšana, Esaú tojánbošena chabe taitá Bëngbe Bëtsábioye chaboimpadama, chabiamá tšabe bendicionënga chaomama, chë mayor uaquiñá bëtsemnama yojanobena jtsebonnama soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuiyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

¹⁸ Tšëngaftanga ndoñe chešmatobeconá, mo chë entšanga Israeloca Sinaí ca uabaina tjoye tmojanobeconacá, ndayá chënga imojobena jabojuama, y íñesheca yojsángbototjuana, tondaye binÿiñe luare, tša ibetiñe y puerte jabuache binÿiëngaca; ¹⁹ ni chešmatuena chëngcá, canye trompetëfjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtšoyebuambnama. ²⁰ Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndëtšbëngaca chamotsatëchënjanga jtsóbama ca.” ²¹ Ndegombre, ntšamo tmojaninÿcá tša uabouana yojtsemna, cach Moisésnaca mëntšá tojánayana: “Tša šontsengmëmná auatjananá sëntsemna causa ca.”

²² Pero tšëngaftanga Bëngbe Bëtsábioye šmojobeconá, y chca endmëna mo tšëngaftanga canye Sión ca uabaina tjoye celoca cuafjobeconacá, chë Bëngbe Bëtsá nÿets tempo vida bomnabe bëts puebloye, mo celoca Jerusalén cuenta; y ba uaranga angelëngbioye šmojobeconá, cánÿiñe oyejuayënga enefjuanënga imojtsemnëngbioye, Bëngbe Bëtsá jtsatschuanayama. ²³ Endmëna mo tšëngaftanga chë Bëngbe Bëtsabe entšángbioye cuafjobeconangcá, chentše enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jýëngacñama, ndëmuanÿenga Bëngbe Bëtsá chabe libréšañe tojúbiamá. Tšëngaftanga šmojobeconá Bëngbe Bëtsábioye, ntšamo nÿetsca entšanga tmojamcá tšabá o ndoñe tšabá bëtsemnama yochjayanábioye. Endmëna mo tšëngaftanga cuafjobeconacá, chë entšanga mora ya obanënga y ntšamo tšabá yomncá jtsamëse imojëftsiyenëngbe espiritëngbioye, chë entšanga ndëmuanÿengbiamá Bëngbe Bëtsá tojanma chamotsemnama lempe ntšamo chabe entšangbiamá yojanjuabnacá, chca, cháftaca sempre vida jëftsebonnama. ²⁴ Tšëngaftanga Jesúsbioye šmojobeconá, chë jóbanëse, entšanga Bëngbe Bëtsáftaca mo canÿacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiamá cha tojanóbana ora tojanábuashana buiñoye tšëngaftanga cuafjobeconacá; chca tojanábuashana, bëngbioye Bëngbe Bëtsabe delante mo tšabengcá jábiamama, mo ntšamo entšángbeñe buiñe jabuéscacjama

chë bachnanga imojuamancá. Caín chabe catsata Abélbioye tbojanóba ora, yojamna mo chë Abelbe uabuáshana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tsabe soyënga jashjáhana; Jesusbe buiñeca, bënga montsobena atsebácanënga jtsemnama.

²⁵ Cuedado šmochtsebomna, bëngbioye tojtsoyebuambná ora cha joyeunayama. Chë Israeloca entsanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentše tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuyiynayá, ndoñe cachcá ndëcastigánënga quešochátabashejuana, ntšamo cha šojtsëtsësnacá ndoñe tmontseyeunanëse. ²⁶ Bëngbe Bëtsá Sinaí tjoca chë entsángbioye tojanoyebuambá ora, chabe oyebuambnayanaca tojanma quem luare chauangmëmanama, pero mora cha chabe uabemana palabrénguiñe tojašebuachená: “Atše cachiñe chanjatsma chauangmëmanama, ndoñe nÿe quem luare, sinó celócnaca ca.” ²⁷ Bëngbe Bëtsá “cachiñe ca” tojánayana ora, chë sóyeca yojtsichamo, chë ndayté lempe chaongmëmanama cha cachiñe yochjama ora, chë quem luarentše tmojama soyënga y chë jatrócama yopodena soyënga yochtsejuána ca, chca, nÿe chë nÿetsca tescama yomna soyënga y ndoñe jatrócama soyënga chaoquedama. ²⁸ Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nÿetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tsabá tbojtsinÿancá mochtsadorana, chabiama bëts respeto jtsebomnëse, y nÿetscangbiamá más bëtsá cha yomnama jtsejuabnayëse. ²⁹ Er Bëngbe Bëtsá puerte etonaná chë chabiama nduauenanënga jabuache echanjácastigaye, y chca, cha jtsemnana mo canÿe íñeshe lempe jtsepochoamcá.

13

Ntšamo jtсийenama, Bëngbe Bëtsá oyejuayá bëngaftaca chaotsemnama

¹ Sempre nÿetscanga šmochtsenbobonshana, Jesucristbeyeca catsátanga quetsomñecá. ² Sempre tsabá chë tsëngaftangbe yebnoye inÿe luarëngocana tmojáshjajnënga šmochjúbuaja, er chca jamëse, ntsetatsëmbcá báseftangna angelënga chëngbe yebnentše tmojanëbuaja.

³ Chë utámenëngbiamá sempre šmochtsenójuabnaye, mo tsëngaftángnaca chëngaftaca utámenënga cuaftsemncá. Chë ínÿenga tmojtsama chamot-sesufrinëngbiamá šmochtsenójuabnaye, er tsëngaftángnaca nderado cachcá šmatjatspása.

⁴ Boyabása y shembása tbojanobouamá ora, ntšamo tbojanensbuachenacá nÿetscanga chamotserrespetana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayëngnaca.

⁵ Ndoñe šmattsiyena jtsejuabnayëse nÿe mallajta crocénana jëftsebomnana. Nÿe chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quechochatonÿaye, ni canÿa quebocháiseboshjona ca.” ⁶ Y chca, bënga montsobena corente añémoca jayanama:

Bëngbe Utabná endmëna nda atše šonduájabuachana; tondayama quichátauatja.

¿Ndayá canye entšá nanjobenaye átseftaca jamama ca?

⁷ Tšëngaftangbe amëndayëngbiana, chë Bëngbe Bëtsabe buayenana soyënga tcmojábuatambangbiana, sempre šmochtsenójuabnaye. Sempre šmochtsenójuabnaye chë ntšamo chënga imojaniyenentšana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bëtsemnama.

⁸ Jesucristo cachá nÿets tempo iuétsemna, tempo, mora y nÿetsca tescama. ⁹ Ndoñe šmatjaleséncia ínÿënga chamotsamama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiana yobómnyeca, y ndoñe chë sanama, chë ndayá añe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entšangbiana tempo tonjanoservé.

¹⁰ Bënga chë Jesucristbeñe mondošbuáchenga, canye soye mondbomna mo chë Bëngbe Bëtsábioye jëtschuayama altaroca juinÿëna soycá, bacna soyëngama perdonánënga jtsemnama. Bënga mondbomna chë Jesucristo bëngbiana tojanma soye, cruzoca tojanóbana ora, bëngbe bacna soyëngama; y chë nÿe tmojóba bayëngaca soyënga tmojtsama bachnanga ndoñe ntsebomnana, chë Cristo tojanóbana ora, ndayá tojanmentšana tojanóbocna tšabe soyënga. ¹¹ Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuperdonama, y chë bayëngbe cuerpënga jtsejuinÿiyana entšanga tmoyena luarentšana chaboca. ¹² Cachcá, Jesúsna tojansufrí y tojanóbana bëts pueblentšana chaboca, chabe buiñe tojánabuashana ora jóbanëse, entšanga Bëngbe Bëtsábënga chamotsemnama, y chabe delante mo tšabëngcá chamotsemnama. ¹³ Chíyeca bënga šontsamna Jesúsbioye jobéconana, nda entšanga tmojtsanaboté y bëts pueblentšana chaboca tojanóbana. Cha mochjuasto, y ntšamo cha tojansufricá bëngnaca mochjasúfria. ¹⁴ Er quem luarentše bënga ndoñe quemátsbomna canye bëts pueblo bëngbiana, nÿets tempo chavesomñe bëts pueblo, ndayá bëngna tša mondboše y puerte mondobátmana bënga joyéanama chë celoca yochtsemna Bëngbe Bëtsabe bëts pueblentše. ¹⁵ Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canye soye cuafjuatšëmboncá. Chcasna, jtsóyebuambayëse cha mochtsadorana. ¹⁶ Sempre ntšamo tšabá yomncá šmochtsama, y chë šmobomncá inÿëngbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiana tcojama ca, y jtsinÿnana bënga Bëngbe Bëtsá imojtsatschuanama, ndayá cha tojamama.

¹⁷ Sempre šmochtsama ntšamo chë tšëngaftanga ošbuáchiyëngcá enefjuanëngbeñe amëndayënga tmojayancá, y sempre šmochtsiyena jtsamëse nÿe ntšamo chënga tmojtsebošcá. Chënga sempre tšëngaftangbioye jtsanÿenana, tšëngaftangbe tšabiana, ntšamo cmojánanÿenama Bëngbe Bëtsábioye jojuama yojtsamnama chënga jtsatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngménaca

chamotsamama, er ndoñe chca šmonjamëse, chë trabajo tšëngaftangbe tšabíama ndoñe nántsemna.

¹⁸ Bëngbe Bëtsá bëngbiamá šmochtseimpadana, er bënga ainaniñe corente fsëndétatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse. ¹⁹ Tšëngaftanga bëtsá cbontsaimpadana, Bëngbe Bëtsá chašmoimpadama, atše chašolesenciamá tšëngaftangftaca cachiñe jtsatsmënama.

Bëngbe Bëtsábioye chëngbiamá jaimpádama y chënga jacheuayama

²⁰ Atše, Bëngbe Bëtsá sëntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondányena mo oveshëngbe tšabe abuajënyácá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entšanga jinñanñiyama ndegombre bëtsemnama ntšamo Bëngbe Bëtsá chabe entšangbiamá tojanašebuachenacá nñetsca tescama jamama. ²¹ Cha sëntseimpadana chaoma tšëngaftanga chašmotseboznama nñetsca tšabe soyënga ntšamo cmojtsëjabotcá, chca, lempe ntšamo cha yobošcá tšëngaftanga chašmotsamama; y cha Jesucrístoftaca chaboma bëngaftaca ntšamo cha tšabá tbojtsinñancá. ¡Nñetscanga nñetsca tescama Cristo chamotsatschuaná! Chca chaotsemna.

²² Jesucristbeyeca catšátanga, tšëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nñe básefta palabréngaca chama tcbonjubaábiamá. ²³ Atše sëntseboše tšëngaftanga chašmotsetátšëmbo, Timoteo Jesucristbeyeca bëngbe catšata, ya ndoñe utamená yontsemnama, y cha betscó átšbioye chaojtabëse, átšeftaca chanjëftsbetše tšëngaftanga jányama chajjá ora.

²⁴ Tšëngaftanga ošbuachiyëngbeñe nñetsca amëndayënga šmochjácheuaye, y nñetsca Bëngbe Bëtsabe entšágnaca choca. Chë Italia luaroquënga ošbuachiyënga tšëngaftanga cmontsacheuaná.

²⁵ Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

Santiago

Jacheuayama

¹ Atše Santiago, Bëngbe Bëtsá y Bëngbe Utabná Jesucristbe canye os-
ervená, tšëngaftanga cbontsëbuabiamná, tšëngaftanga chë bnëtsana uta
Israeloca bëts pamíllangbioye nyets luarëjana ujqüëshenënga. Atše
cbontsacheuaná.

Chë Bëngbe Bëtsábiocana osertánana

² Jesucristbeyeca atšbe catšátanga, tšëngaftanga ndaye padecena
soyënguiñe chašmojtsiyena ora, chiñe šmochjúabuoye mo chca
tšëngaftangbe tšabiamna cuaftsemncá y šmochjóyejuaye; ³ er tšëngaftanga
šmondëtatšëmbo, chcañe chašmojtsajna ora, šmochtsetátšëmbo cach
tšëngaftanga Jesucristbeñe puerte šmošbuaché o ndoñe. Chca ora
bëts ošbuáchiyana chašmojtsebomnëse, šmochanjobenaye, Bëngbe
Bëtsábeñe jtšobátmanëse añémoca jtsemnana, masque padecena
soyënguiñe chašmotsomñëse. ⁴ Pero chca chašmojtsemnëse,
šmochtsentsëna jashjáchama ntšamo canye entšá Bëngbe Bëtsabe
soyëngama corente osertaná yomncá chašmotsemnana, ntšamo Bëngbe
Bëtsá yobošcá chašmotsiyenama, chiñe ni mo canye soye jamama
chacmondëtsabuashebenëse.

⁵ Nderado nda tšëngaftanguentšana ndoñe tontsobena corente
osertánana jtsebomnana, cha bontsemna Bëngbe Bëtsá jaimpádana
cha chaoma aiñe chana jtsebomnana, y Bëngbe Bëtsá chana
bochanjátšetaye; er Bëngbe Bëtsá nyetscanga bëtscá endbëtsatšatnaye
y ndocnábioye jatáboyëñjana. ⁶ Pero cha bontsemna, Bëngbe Bëtsábeñe
puerte jtšošbuáchiyëse chama cha jaimpádana, y cha nderado ndoñe
bochanjóyeunayama ntjatatëmnancá. Nda mëntšá tojtsamëse, inye ora
aiñe Bëngbe Bëtsábeñe cuaftšošbuachecá y inye ora ndoñe, cha entsemna
mo canye olëshcá, mar béjayoca binýia nýe cáatoye jtsambayana. ⁷ Chca
ama entšá ndoñe chaondëtsëjuabná, Bëngbe Utabnábentsana ndayánaca
jatóyëngacñama. ⁸ Cha jtsemnana canye entšá, mora canye soye juabnayá,
pero chentšana inyetšá jatójuabnañana. Chca, cha jtsiyenana nyetsca
soyëngama uta soye jtsejuabnayëse, y chca cha ndoñe ntšobenana
tondaye puerte tšabá jamama.

⁹ Chë Jesucristbeñe ošbuachiyá, ndbomnjëma y ndoñe yapa uámana
entšá tomná, corente oyejuayá chaotsemna, er Bëngbe Bëtsabe
bominýiñe cha canye uámana entšá jtsemnana; ¹⁰ y chë bomnánaca
puerte oyejuayá chaotsemna, Bëngbe Bëtsá chábioye nduámana entšá
chabojábema ora, er mo chë shacuaníñe uantšëfjushacá, cha ndoñe
nyets tempo quem luarentše ntjëftsiyenana. ¹¹ Shinýe tojábocna y
becá tojojëñyana ora, chë shácuaana jtsebuashana, chë uantšëfjúsha
jtsátsatšana y chabe uabótamanana ya ndoñe más ntšebínynana. Cachcá
chë bomná, echanjóbana nýe cachabiamna más becá crocénana onguayiñe
chaojtsemna ora.

Bacna soye ocochënguentšana tšabá jabocnana

¹² Oyejuayá chaotsemna chë entšá chë padecena soyënguentšana
tšabá tojëtšbocná, cabá Jesucristbeñe ošbuachiyá; chama Bëngbe Bëtsá

chabiana oyejuayá echántsemna y echanjama chë nÿetsca tescama yomna tšabe vida cha chaotsebomnama, mo uacananancá chabe ošbuáchiyama. Chë soye Bëngbe Bëtsá tojašebuachená nÿetscanga cha imobobonshánëngbioye. ¹³ Nderado nda bacna soye jamama tbojócochëngo, ndoñe chaondëtsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínÿenga bacna soye jamama chaócochënguama. ¹⁴ Inÿetsá endmëna, canÿa bacna soye jamama jócochënguana, bacna juabnënga tojtsebomna ora; cha chiñe nÿe jësejuabnayana y chë soye jtsasjayana cha chca jamama. ¹⁵ Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nÿetsca tescama bochanjacistíga.

¹⁶ Atšbe bonshana catšátanga, ndoñe matenoíngñana, jtsejuabnayëse Bëngbe Bëtsá yojtsama tšëngaftanga bacna soyënga chašmotsamama ca. ¹⁷ Nÿetsca tšabe soyënga y chë puerte tšabe soyënga tsbanánocana endobá, Bëngbe Bëtsá chë Taitábíocana. Y cha chë shinÿe, juashcona, y nÿetsca chë celoca yobuashinÿinÿana soyënga tojamá, nÿets tempo nÿe cachá iuesomñe y ndoñe inÿa ntjátsmënana. ¹⁸ Cachá jamama tojánbošenayeca, bënga chábenga šojánabíama, bënga chabe ndegombre palabrenga jouenëse. Cha chca tojama, lempe ntšamo Bëngbe Bëtsá quem luarentše tojamentšana, bënga chë natsanënga chábenga chamotsemnama.

Ntšamo ndegombre yomna Bëngbe Bëtsábíoye tšabá jadórama

¹⁹ Atšbe bonshana catšátanga, quem soyama šmochtsenójuabnaye: nÿetsca tšëngaftanga cmontsamna sempre jtseprontánana jouenama; pero jóyebuambayamna jobátmana y ínÿengaftaca jetnámnaca. ²⁰ Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nÿetsca soyënguñe tšabá jtsamana. ²¹ Chcasna, šmochtsajbaná bacna soyënga jtsamëse oyenana, y amana nÿetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjóyëngacñe. Chë buayenánana chašmojóyeunase, echanjopódia tšëngaftanga atsebácanënga jtsemnama.

²² Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá aíñe jtsamana; ndoñe chca šmontsamëse, cach tšëngaftanga šmontsenoíngña. ²³ Nda nÿe chë buayenánana tojouena, pero betscó tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canÿe entšá chabe jubíá espejuiñe tojtseonÿacá: ²⁴ chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bëtsemnama. ²⁵ Pero nda ntšamo tojouencá ndoñe tbonjebnatjëmbe, y sempre tojtsejuabná chë entsanga játsebacama Bëngbe Bëtsabe puerte tšabe mando chabosertama, y tojtseyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

²⁶ Nderado nda tojtsejuabná Bëngbe Bëtsábíoye ibojtsadorana ca y chë Bëngbe Bëtsábíoye adorayá ntšamo ibomncá cha yojtsama ca, pero ndoñe tontsobena bacna soye oyebuambnayana jtsajbanana, cachá yojtsenoíngña, y nÿetsca soyënga ntšamo tojtsamcá Bëngbe Bëtsá jadórama, chabiana tondaye ntsámanana. ²⁷ Bëngbe Bëtsá chë Taitabe bominiñe,

chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmënënga tmojtsemna ora jujabuáchana, y ndoñe bacna soyënga játamana, mo chë nÿe quem luarama enójuabnayënga mondbetsamcá.

2

Nÿetscanga tšabá jtsatenonÿayëngana

¹ Tšëngaftanga, Jesucristbeyeca atšbe catšátanga, šmondošbuaché Bëngbe Utabná Jesucristo, chë puerte bëtšá y uamanábeñe; chíyeca tšëngaftanga cmontsamna nÿetsca entšanga cachcá jtsatenonÿayëngana. ²⁻³ Nderado tšëngaftanga cánÿentše šmojénefjna, y chora canÿe bomna entšá tojášhango castellano ntšabuchëtjonëfjangaca y uámana entšayëjuangaca bopormaná, cha botamana šmojúmashëngo y mëntšá šmojayuana: “Moca quëfseroca mabesótbema ca”. Pero cachca ora, canÿe ndbomnjëjema tojášhango uandocuenta entšayá uichëtjoná, y cha šmojayuana: “Acna choca tsanana cochtsemna o chafjoca mótbema ca”. ⁴ Chca tšëngaftanga ya šmotsama cach tšëngaftanguentše báseftanga más uámanënga ínÿengbiana chamotsemnana, y chca šmojtsama, ana bacna juabnënga šmojtsebomna causa.

⁵ Atšbe bonshana catšátanga, quem soye šmochjouena: Bëngbe Bëtšá quem luarentše ndbomnënga imomnënga tojabacacá, chënga canÿe puerte uámana soye chamotsebomnana, Jesucristbeñe puerte chamotsošbuáchema; y mo otocana soycá Bëngbe Bëtšabe amëndayama chamosháchiñama. Cha imobobonshánëngbioye chë soye jatšatayama tojašebuachená; ⁶ pero tšëngaftanga chë cuenta, mo ndoñe cach tšëngaftangcá entšanga bendmëncá chëngbioye jtsënÿayana. Ndegombre, chë bomnënga mondmëna chë nÿe sempre cmondbëtsamëndayënga y chë sjojónana chë pueblentša mandadëngbioye cmondbáunatsënga. ⁷ Y cach bomnëngnacá mondmëna chë Cristbiana podescá oyebuambnayënga, ndábenga tšëngaftanga šmondmëna, y chabe uabaina tšëngaftangbiana puerte enduámana.

⁸ Bëngbe Bëtšabe uabemana palabrënguiñe mëntšá endayana: “Ndëmua entšánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandíñe endayanacá ndegombre šmojtsamëse, tšabá šmochántsama. ⁹ Pero tšëngaftanga ndoñe cachcá šmontsenonÿase, chcana bacna soye jtsamana y šmojama ntšamo Bëngbe Bëtšabe leyënguiñe ndoñe yondëlesenciancá. ¹⁰ Y mora, canÿe entšá nÿetsca chë leyentša mandënga tojtsobedecena, pero ndoñe tontsama ntšamo nÿe mo canÿe mando ntšamo iuayancá, cha Bëngbe Bëtšabiana jtsemnana canÿa ntšamo nÿetsca chë leyentša mandënguiñe ndoñe yondëlesenciancá amá. ¹¹ Cach Bëngbe Bëtšá, chë “acbe shema o boyábioye ínÿaftaca ndoñe cattseíngñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shémbioye ínÿaftaca ndoñe tbonjaingñë, pero aíñe ínÿabioye tbojóba, chca, Bëngbe Bëtšabiana cha jtsemnana canÿa nÿetsca chë leyentša mandënga ndocumpliná.

¹² Tšëngaftanga cmontsamna jtsóyebuambnayana y jtsamana ndayá Cristo šojanamëndacá, atsebacana entšangcá, er Bëngbe Bëtšá echanjayana ntšamo tmojamcá aíñe o ndoñe tšabá bëtsemnana. ¹³ Er chë ínÿengbiana ndoñe ngmënënga bomnëngbiana, Bëngbe Bëtšá ntjongmiacá echanjayana ntšamo tmojamcá aíñe o ndoñe tšabá bëtsemnana; pero

chë ínÿengbiama aíñe ngménana bomnëngbiama, ntšamo tmojamcá aíñe o ndoñe tšabá bétsemnama Bëngbe Bëtsá chaojayana ora, chënga tšabá chentšana mochanjábocana.

Chë ndegombre ošbuáchiyana, soyëngaca jinÿanÿiyana

¹⁴ Atšbe catšátanga, ¿ndayama cánÿabioye buanjósérvia jayanana aíñe Jesucristbeñe sëntsošbuaché ca, pero cha ínÿengbiama tšabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha nÿe chca tojtsichámëse, ndoñe ntso podénana cha atsbocaná chaotsemnama. ¹⁵ Nderado canÿe boyabása o shembása ošbuachiyá entšayá tbojtsabuáshbena y saná chë te jasámnaca tbojtsebuáshbena, ¹⁶ y canÿa tšëngaftanguentsá tbojayana: “Diošoftá, sësnama ndoñe chacondétsepadecena y becá chacuatoshachá ca”, pero chca chaotsemnama chábioye tondaye tbonjatšetase, ¿ndayama nantso servena chca jayanana? ¹⁷ Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnama jinÿanÿiyama, nÿe chca ošbuáchiyana jtsebomnana tondayama ntso servénana.

¹⁸ Pero nderado ndánaca mëntšá echanjayana: “Aca Jesucristbeñe icošbuaché, pero atšna ínÿengbiama tšabe soyënga sëntsama ca.” Chora atše stjojá: “Sminÿinÿé ntšamo canÿa nantsobena Jesucristbeñe jtsošbuáchiyana, chca chaotsinÿnama tondaye ntamcá, y chora, ndayá tijamama atšbe ošbuáchiyana cbochjinÿinÿiye ca.” ¹⁹ Aca condošbuaché nÿe canÿe Bëngbe Bëtsá yomnama y chca tšabá contsama; pero chë bacna bayëjngnaca chiñe jtsošbuáchiyana, y chë causa chënga uatjana jtsebomnama y jtsangmëmnyana. ²⁰ Ndoñe obëjema cattsemna; ndegombre cbochanjinÿinÿiye nderado nda Jesucristbeñe tojtssošbuaché, pero tondaye tontsama chca chaotsinÿnama, chabe ošbuáchiyana tondayama ntso servénana. ²¹ Bëngbe Bëtsá tojánayana chabe bominÿiñe Abraham, bëngbe tempsca bëtš taitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiñá altariñe jóbama, cach Bëngbe Bëtsábioye jëtschuayama. ²² Aca contsobena Abrahámbeñe jinÿama, cha Bëngbe Bëtsábeñe yojanošbuáchema, y soyënga yojánama chca chaotsinÿnama; y ndayá cha tojanmama entsinÿinÿena, cha ndegombre puerte bëtscá yojanošbuáchema. ²³ Chca tojanopasá ntšamo Bëngbe Bëtsabe uabemana palabrënguiñe endayancá, mëntšá: “Abraham Bëngbe Bëtsábeñe yojtssošbuáchiye, y chama Bëngbe Bëtsá tojánayana chabe bominÿiñe cha tšabia yojamna ca.” Y Abraham entsanabaina Bëngbe Bëtsabe amigo ca.

²⁴ Y tšëngaftanga šmontsetátšëmbo, Bëngbe Bëtsá ináyana canÿe entšá chabe bominÿiñe tšabia yomna ca, chë entšá ndayá tojtsamama, chabe ošbuáchiyana chaotsinÿnama, y ndoñe nÿe ošbuáchiyana tojtsebomnama. ²⁵ Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominÿiñe cha tšabia yojamna ca, er cha canÿe tšabe soye tojanma. Cha chë noticia uambaye judiënga posada tojanëyentšame, y chentšana tojanëjabuache inÿe benachëjana chamuáisebocanama, chë pueblentšá soldadëngbiama chamotsachetama. ²⁶ Lempe básefta palabrënguiñe jayanamna mëntšá entsemna: ntšamo canÿe cuerpo, espíritu ndobomna cuerpo, pronto jóbana, cachcá chë ošbuáchiyana, ndocna soyëngaca tontsemna, chca chaotsinÿnama, tondayama ntso servénana.

3

Bichtájaca tšabá jóyebuambayama endmëna

¹ Jesucristbeyeca atšbe catšátanga, ndoñe yapa buátëmbayënga tšëngaftangbeñe chamondëtsemna; er tšëngaftanga ya šmondëtatšëmbo, bënga, chë entsanga abuatambayëngbiama, chë castigo más bëtsá yochtsemnama, Bëngbe Bëtsá ndoñe tmonjóyeunase, ntšamo entsanga tmojamama aiñe o ndoñe tšabá bëtsemnama cha chaojayana ora.

² Bënga nÿetscanga nÿetsca bacna soyënga mondbëtsama. Nderado nda oyebuambnayañe ni mo canÿe bacna soye tonjama, chë entsá puerte tšabia jtsemnana, ntšamo Bëngbe Bëtsá yobošcá jtšiyenëse, y cha yojtsobena cachá sempre jtsemomándayama.

³ Chë couayëngbioye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsoberenana ntšamo nÿets chëngbe cuérpoca tmojtsamcá jtsemándayana, y ndoñe nÿe chëngbe bestšaše. ⁴ Barquëshamnaca šmochjenójuaboje. Masque tša bëtsëtsacuemëngá y tša jabuache binÿiënga chë barco jtšëjuatsëntšayana, chë uamanéjayënga chë barco juyambana ndayëjana tmojtsebošcá, y chca, nÿe canÿe base soyetémaca, tímón ca uabainëtémaca. ⁵ Cachcá, chë bichtaja cuerpiñe canÿe base soyetema endmëna, pero chë bichtájaca entsanga jtšenábotamnayana bëts soyënga tmojamama. Smochjouena, canÿe base iñeshe jtsoberenana canÿe bëts tjañe juangbotjuama. ⁶ Y chë bichtaja endmëna mo canÿe iñeshcá, mo canÿe luare ndayentše puerte bacna soyënga tobinÿncá. Chë bichtaja jtsoberenana bëngbe cuerpentše puerte bacna soyënga bëngbiama jamama. Mo canÿe iñeshe becá tojtsendbiamnacá, chë bichtájaca tcojtsichamo ndoñe tšabe soye, jtsoberenana bacna soyënga bëngbiama jamama nÿets tempo quem luarentše tmuetsiyenëntscuana; y mo nda ndayá tojtsangbotjuacá, Satanás jtsoberenana chë bichtaja jtsemándayana, bacna soyënga chaotsamama.

⁷ Entšá endobena jtsemándayana nÿetsca tjoica bayënga, shloftšënga, osjojnayënga y buyeshiñe oyena bayënga; y ndegombre mora entsamënda; ⁸ pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtšamana bëtscá bacna soyënga cada te chauëtsebinÿnama, y mo canÿe mëtscuaycá veneno jtsebomnana jóbama, chë bichtájncaca cachcá endmëna. ⁹ Bichtájaca bënga puerte tšabá Bëngbe Bëtsá y Taitabiamana jtšichámuana, y cach bichtájaca bënga puerte bacá entsangbiama mondbëtsichamo, masque Bëngbe Bëtsá cachacá enoparecënënga chënga tojábiamana. ¹⁰ Cach uayásentsana jtšóbocanana Bëngbe Bëtsabiamana tšabe palabrenga y entsangbiama bacna palabrenga. Jesucristbeyeca atšbe catšátanga, chca ndoñe chaondëtsemna. ¹¹ Canÿe béjaye obocanentsana ndoñe ntsopodénana tšabe búyeshe chaóbocnama y cachentsana untja búyeshnaca. ¹² Ntšamo canÿe higo betiyentsana ndoñe ntsopodénana olivosëšënga jashacama, y canÿe uvas betiyentsana ndoñe ntsopodénana higuëbenga jashacama, cachcá, atšbe catšátanga, tamona búyeshentsana ndoñe ntsopodénana tšabe búyeshe chaóbocnama.

Bëngbe Bëtsábiocana óbocana osertánana

¹³ Nderado tšëngaftanguentše tojtsemna canÿe puerte tatšëmbuá y osertaná, cha bontsemna, chca yomnama entsanga jinÿanÿiyana, tšabe soyënga amana jtšiyenëse y chë ntjatosoberbnaycá tojama soyëngaca;

y cha chca jamana, puerte osertaná bétsemnama. ¹⁴ Pero tšéngaftangbe ainaniñe yapa ínŷabioye šmojtšántšaboše y nye ínŷenga chamotjáyana soyénga šmojtsama, as ndoñe šmattsenábotamnaye osertánénga y tšábenga šmomnama, er ndegombre Běngbe Bětsabe osertánana tšéngaftanga ndoñe šmontsebmna. ¹⁵ Er chca osertánana, Běngbe Bětsábiocana ndoñe ntsóbocanana, ndayá nye quem luarama enójuabnayéngbentsana, nye entšangbe juabnentsana, y canŷe bacna bayějbentsana. ¹⁶ Ndayentše entšanga yapa tmojtsenántšaboše, y nye ínŷenga chamotjáyana soyénga tmojtsama, chentše tondayama quemochátenēyeunana y nŷetsca bacna soyénga mochántsama.

¹⁷ Pero chě Běngbe Bětsábiocana óbocana osertánana bomnénga, nŷetsca soyamna, natsana puerte tšabe vídaca jtsiyenana, bacna soyéngaca ndemandánénga; y chénga jtsemnana chě ínŷenga ndoñe chamondětsentsjanama aménga, tšábenga y sempre jtseprontánana ínŷenga joyaunayama. Y cach queménga jtsemnana ínŷengbiana ngménana bomnénga, siempre tšabe soyénga jtsamana, cachcá nŷetsca entšángbioye jtsénŷayana, y ntšamo ndegombre tojtsemncá jtsichámuana y jtsamana. ¹⁸ Ntšamo canŷe jená, botamana shajuana jtsibomnama tšabe jénaye jájena, cachcá, sempre natjěmbana jtsiyenama bošénga, natjěmbana ínŷengaftaca jtsiyenana, chca, nŷetsca entšanga chamotsamana ntšamo Běngbe Bětsabe bominiñe tšabá yomncá.

4

Smochtsiyena Běngbe Bětsá tšéngaftangbeñe jtsemándayěse

¹ ¿Ndayentšana chě tšéngaftanga jtsentsjanayama y jtsenpenzéntsiayama yóbocana? Endóbocana chě tšéngaftangbe bacna juabnənguentšana, nye cach tšéngaftanga tšabá jtsomñama; y chě soyénga tšéngaftangbe ainaniñe siempre chě tšabe juabnəngama contra jésemnana. ² Tšéngaftanga ndayánaca jtsebmnama šmojtseboše, pero chca jtsebmnama ndoñe šmontsobena, as jtseprontánana ínŷengbioye jtsébáyama. Inŷa ntšamo tobomncá tšéngaftanga tša jtsántšabošana, y chě soye jashjáchama ndoñe šmontsobena ora, ínŷengaftaca jentjáyanağana y jtsenpenzéntsiayana. Ntšamo šmojtsebošcá ndoñe ntjobenayana jtsebmnama, Běngbe Bětsá chama ndoñe šmondbotjañe causa; ³ y chě soye šmojtjañe ora, tšéngaftanga ndoñe ntjójəngacñana, ndoñe botamana chě soye šmondbotjañe causa, er tšéngaftanga chě soye jtsebošana nye chaoservema oyejuayénga bacna soyénguiñe jtsomñama.

⁴ ¡Tšéngaftanga, Běngbe Bětsá bobonshánana šmojtsajbananga! ¿Ndoñe šmondětatšəmbo, chě jtsebošana nye quem luarama enójuabnayéngbe amigo jtsemnama y nye quem luarentša soyénga jtsebmnama, chca, canŷe entšá Běngbe Bětsabe uayayá jtsemnana? Ndánaca tojajuabó nye quem luarama enójuabnayéngbe amigo jtsemnama, chca, canŷe Běngbe Bětsábioye uayayá jóbemana. ⁵ Ndoñe nye bonamente Běngbe Bětsabe uabemana palabrénguiñe mēntšá endayana: “Chě Běngbe Bětsá tbojanichmó bəngbe ainaniñe chaotsiyenama Uámana Espíritu, puerte entseboše nye Běngbe Bětsá canŷa bəngbe améndayá chaotsemnama ca.” ⁶ Pero Běngbe Bětsá, bəngbe tšabiana jtsejuabnayěse bənga jtsějabuáchanana, chíyeca Běngbe Bětsabe uabemana palabrénguiñe mēntšá endayana:

Bëngbe Bëtsá chë nÿe cachënga uámanënga tmojtsenobiamnangbe contra entsemna,
y chë ndoñe uámanënga montsenobiamnangbiamna, Bëngbe Bëtsá más tšabe juabna entsebmoma ca.

⁷ Asna, tšëngaftanga šmochtseprontana nÿe Bëngbe Bëtsá chacmotsamëndama; ntšamo Satanás tcmojtsamëndacá ndoñe šmattsama, y cha cachora tšëngaftangbentsana echantsachá. ⁸ Bëngbe Bëtsábioye šmochtobeconá, y cha echanjama tšëngaftanga ntšamo cha yomnama chacmotsësertánama. Tšëngaftanga bacna soye amënga, cach tšëngaftangbe cucuatšëngaca tšabe soyënga šmochtsama, bacna soyënga ndoñe. Tšëngaftanga chë inÿe ora jtsejuabnayana Bëngbe Bëtsá jtsebobonshánama, y inÿe orna, nÿe quem luarentša soyënga jtsebmoma, šmochtsajbaná bacna soyënga jamama bošana, chca, nÿe tšabe juabnënga tšëngaftangbe ainaniñe chašmotsebmoma. ⁹ Tšëngaftangbe bacna soyëngama ngmënaca šmochtsemna, šmochjenóbošachna y cochtsetšenánënga šmochjuayebuambaye. Jatenbiajuayama, šmochjenóbošachna; y joyejuayëngama, ngmënaca šmochtsemna. ¹⁰ Bëngbe Bëtsabe delante bëtšétsanga ndoñe šmattsenobiamnaye, y cha más uámanënga cmochanjábiana.

Inÿengbiana ndoñe ntsichámuana ndoñe tšabá tmonjama ca

¹¹ Jesucristbeyeca catšátanga, inÿengbiana bacna soyënga ndoñe šmattsóyebuambnaye. Nda cachabe catšatbiana bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandënga ndoñe ntsocumplínana y jtsichámuana chë leyentša mandënga tondayama yontsoservena ca. Y chë leyama chca tcojtsichámëse, cach ley jocúmplia cuenta, contsobiamná canÿe ichamuá chë ley aíñe o ndoñe yondoservénama, y chca ndoñe quemátsmëna jtsamana. ¹² Chë ley tojuapormá cha nÿe canÿa endmëna, Bëngbe Bëtsá, y cachá endmëna ntšamo entsanga tmojamcá aíñe o ndoñe tšabá bëtsemnama ichamuá, y cachánaca entsobena entsanga játsebacama o nÿetsca tescama jácastigama. Y acna, ¿ndase cmëna ndëmua entšabiámna jobenayama jatichámuama ntšamo tojamcá aíñe o ndoñe tšabá bëtsemnama?

Ndayá yëfse yochjatëchnënguama ndoñe ntsótatšëmbuana

¹³ Y mora quem soye šmochjouena, tšëngaftanga chë šmondbétsichamo: “Mënté o yëfse quemoye o chë inÿe bëtš puebløye fchanjanga, y chentše canÿe uata fchanjëftsemna ba soyënguiñe trabájayiñe, y ndegombre becá fchanjónÿena ca.” ¹⁴ ¡Pero ni mo ndayá yëfse tšëngaftangaftaca yochjochnënguama ndoñe quešmátstatšëmbo! Tšëngaftanga ndoñe quešmátstatšëmbo ndayëntscuana vida šmochjëftsebmoma, y chca, tšëngaftanga šmondmëna mo canÿe jantšetëshcá, chëshe mora jónÿnana y nÿe ndeolpe jatenatjëmbana. Tšëngaftangaftaca cachcá echanjopása. ¹⁵ Tšëngaftanga mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.” ¹⁶ Pero chë cuenta, tšëngaftanga bëtš soyënga šmochjamama sempre jtšenábotamnayana, ndayá tšëngaftanga chašmomama Bëngbe Bëtsá yochjalesenciácá ntsetatšëmbcá; y chca jtsamana ndoñe tšabá quenátsmëna. ¹⁷ Nda tojtsobena ntšamo tšabá

yomncá jamama, pero ndoñe chca tonjama, cha canye bacna soye jtsamana.

5

Chë bomnënga jábuayenama

¹ ¡Quem soye šmochjouena, tšëngaftanga chë bomnënga! ¡Chë tšëngaftanga šmochtseufrínama šmochjenóbošachna y uatjananënga šmochtseyoye! ² Tšëngaftangbe bomnana buajónana janguánana entsemna, tondayama quenátoservena, y chë entšayëjuangá mejëjonga montsasá. ³ Tšëngaftangbe castellano y midio tojtsengúsheshe; y chë ngúsheshna echántsinýinýnaye tšëngaftanga chë crocenánaca ndoñe šmonjanmama ntšamo ínýenga jujabuáchama yojamncá; chë causa, nýetsca tescama cmochántsapochocaye, ntšamo chë íñeshe canye soye endbetsepochoacá. Tšëngaftanga quem tempo bomnana šmojtsejuabá, y mora quem luare jopochócama ya entsobeco. ⁴ Tšëngaftanga chë tšëngaftangbe fshantsënguiñe tmojëftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nýets obenana bomná, chë trabajayëngbe chembuanana ya tojouena. ⁵ Quem luarentse tšëngaftanga šmondoyena ba botamana soyëngaca y nýe ntšamo cach tšëngaftanga šmobošcá jtsamëse. Ntšamo canye uacná jóbana, minýicá tojtsemna ora, cachcá tšëngaftangbiam entsobeco chë te, ndaye ora Bëngbe Bëtsá echanjama castigánënga chašmotsemnama, er puerta bacna soyënga šmojama. ¡Chë castigo jtsebínýinama tempo ya entsobeco! ⁶ Tšëngaftanga, chë puerta tšabá amëngbiam šmojayana jóbanama yojtšamna ca y šmojtšëbaye, chca ndoñe chaondëtsemnama chënga ndocá jamama ntšobencá.

Chë uantado jtsemnana y chë Bëngbe Bëtsáftaca jencuéntama ora

⁷ Pero tšëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tšabe sha-juanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama. ⁸ Tšëngaftangnaca uantadënga šmochtsemna, y tšëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

⁹ Jesucristbeyeca catšátanga, ntšamo ínýenga tmojtsamama ndoñe nýe šmattsoquejana, Bëngbe Bëtsá tšëngaftangbiam ndoñe chaodayanama, ntšamo šmojóyebuambama ndoñe tšabá šmonjama ca. Y nda yochjayana ntšamo entšanga tmojamcá aiñe o ndoñe tšabá bëtsemnama, ya entsebeconá. ¹⁰ Atšbe catšátanga, chë tempsquënga Bëngbe Bëtsabe juabna oyebuambnayënga, ndëmuanýenga entšanga tmonjanabuayená Bëngbe Utabná jótšëmbonëse, chënga bëngbioye šonjëftsaninýanýiye ntšamo tmojansufrima, ntšamo šojtsamna uantadënga jtsemnana tmojtseufrina ora; y chca tšëngaftanga cmontsamna jtsamana. ¹¹ Bënga chëngbiam fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo jtsebomnëse. Tšëngaftanga šmojouena ntšamo Job ainaniñe añëmoca Bëngbe Bëtsábeñe yojanobátmana, puerta padecena soyënguiñe yojasufrina ora; y šmondëtatšëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entšangbiam puerta ngmená yómnyeca.

¹² Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inye soyama. Tšëngaftanga aíñe ca jayanama šmojtsebošëse, nÿe aíñe ca šmochjayana, y ndoñe casna nÿe ndoñe; chca, Bëngbe Bëtsá ndoñe chaondayana ndoñe tšabá šmonjama ca júraye causa.

¹³ Nderado nda tšëngaftanguentsá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuayama. ¹⁴ Nderado nda šocá tojtsemna, cha bontsemna chentša ošbuachiyëngcá ene-fjuanëngbeñe bëtsëjemëngcá amëndayënga jáchembuana, chënga Bëngbe Bëtsá chabiamama chamoimpadama, y Bëngbe Utabná jótšëmbonëse aceitiye chamuanëtjuama. ¹⁵ Y tšëngaftanga, puerte jtsošbuáchiyëse Bëngbe Bëtsá chašmojaimpadá ora, chë šocá salud echántinÿena, y Bëngbe Utabná echanjama cha tšabá cachiñe chaotsatsmënama; y nderado cha bacna soyënga tojamëse, Bëngbe Bëtsá bochantseperdóna. ¹⁶ Chíyecna, chë bacna soyënga šmojtsamama šmochjobuambaye, y Bëngbe Bëtsá nÿetscangbiamama šmochtseimpadana, chca, tšabá mo shnanëngcá chašmotsemnama. Canÿa ndabiamama Bëngbe Bëtsá tojayana chabe bominÿiñe tšabia yomna ca, cháftaca tbojencuentá ora, chánaca ba tšabe soyënga jójëngacñana, y jobenayana bëts soyënga jamama. ¹⁷ Bëngbe Bëtsabe juabna oyebuamb-nayá Elías, mo cach bëngcá canÿe entšá inamna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tséntsane ndoñe tonjanafté. ¹⁸ Chentsana, Bëngbe Bëtsábioye cachiñe tbojtanimpadá ora, quem luariñe tojanafté y cachiñe chë jajañenache bëtscá saná yojtsatsbinÿna.

¹⁹ Atšbe catšátanga, nderado nda tšëngaftanguentsá tojtsajbaná chë ndegombre soyënga jtsamana, pero inÿa chábioye tbojuájabuache cachiñe chë tšabe benache cháuatishachama, ²⁰ tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuaisebocnama, cha chë nÿetsca tescama castigüentšana chábioye jatsbocana, y jamana ba bacna soyëngama cha perdonaná chaotsemnama.

1 San Pedro

Jacheuayama

¹ Atše Pedro, Jesucristbe ichmoná, quem tsbuanácha sentsabianná chë cachëngbe luarentše ndoñe mondoyenëngbiama, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiama. ² Sentsabianná chë Bëngbe Bëtsá Bëngbe Taitá tojánabacacangbiama, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tsëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tšabá chašmotsatsmënana, bacna soyënga abujauánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá sëntseimpadana Bëngbe Bëtsá, chaoma tšabe bendicionënga tsëngaftangbeñe chaotsemnama, y chaoma tsëngaftangbe ainaniñe tšabe ebionana chašmotsebomnama.

Bëngbe Bëtsábeñe jtsošbuáchiyëse vida jtsebomnana, atsebácanënga jtsemnama

³ Bëngbe Bëtsá y Bëngbe Utabná Jesucristbe Taitábioye matschuanga; cha puerta lastemado ínÿengaftaca yómnayeca, tojanma bënga tsëm juábnaca vida chamotsebomnama, bëngbioye bacna soyënga jabuajuánase, Jesucristo cháuatayenama tonjánmayeca. Chiyeca bënga montsobena chábeñe jtsobátmanana sempre y nÿetsca tescama, ndayá cha šochjátšatayama. ⁴ Ndayá bënga šochjátšataycá ndoñe quenátmëna jëftsopochócama opodena soyënga, ndayá nÿets tempo tšabe soyënga. Y bënga mondobátmana jýëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiama cha yojtsinÿena. ⁵ Chë soyënga tsëngaftangbiama entsemna, Bëngbe Bëtsábeñe šmošbuáchema; cha chabe obenánaca cmondánÿena, tsëngaftanga játsebacama. Cha chca jamama ya tojaprontá y echanjínÿanÿiye, Cristo jésabama tempo chaojóshjango ora.

⁶ Chiyeca tsëngaftanga tša oyejuayënga šmojtsemna, masque nderado jtseytana inÿe ora, nÿetsca padecena soyënguiñe jasúfriase chašmuachnënguama. ⁷ Mo chë castellanama jtsetatšëmbuama aíñe o ndoñe tšabe castellano tomnama iñiñe fjuchnëngcá, padecena soyënguiñe tšabá chašmojachnënguse, Bëngbe Bëtsá echanjínÿanÿiye tsëngaftanga ndegombre taišmošbuáchema. Chë castellano pronto endbetsopochóca, masque chca, chana puerta endbetsámama. Y tsëngaftangbe ošbuáchiyana chë castellanama puerta más enduámama. Tsëngaftanga padecena soyënguentsana bëtš ošbuachiyánaca chašmojábocnëse, Jesucristo chaojésabo ora, entšanga mochanjinÿe tsëngaftanga šmojtsomerecena chacmotsatacheuanama, más bëtšétsanga y obenënga chácmabiamama y uámanëngnaca.

⁸ Tsëngaftanga Jesucristo šmondobonshana, y chábioye ndoñe chešmátaninÿe; masque mora cha ndoñe quešmatonÿá, tsëngaftanga chábeñe šmontsošbuaché, y šmontsebomna canÿe puerta tšabe oyejuayana, y ntsachetšá chana yomnana ndoñe quešmátobena jayanama, tša bëtscá causa. ⁹ Chca oyejuayana tsëngaftanga

šmontsebmoma, er ndayá tšëngaftanga jtsošbuáchiyëse šmobatmancá, ya šmojtsosháchichana, chë Bëngbe Bëtsá tšëngaftanga jtsatsebacayana.

¹⁰ Bëngbe Bëtsabe juabna oyebuambnayënga ya imojanatsjendá y imojanguá jtsetatšëmbuama, ntšamo Bëngbe Bëtsá tšëngaftanga jatsatayama, y tmojanoyebuambá ndayá Bëngbe Bëtsá tšëngaftanga jatsatayama, tšëngaftangbiana tšabe juabna cha yobómnyayeca. ¹¹ Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochñëngo ora, yojamna Cristo jasúfriama y ntšamo chentšana Bëngbe Bëtsá chábioye puerte bëtsá bochjábemama, Bëngbe Bëtsabe juabna oyebuambnayënga imojanjuabná y imojanatsjendá jtsetatšëmbuama chë soyënga yochjanopása ora, ndaye tempo y ntšamo chë tempo yochtsemnama. ¹² Pero tempo Bëngbe Bëtsá chëngbioye tojaninýanyé, chca jtsamana ndoñe cachëngbe tšabiamana yonjamnama, ndayá chca jtsamana yojamna tšëngaftangbe tšabiamana. Chënga tmojanoyebuambá, ntšamo chë tšabe noticiënga oyebuambnayënga tšëngaftanga tcmojauyancá. Y chca tcmojáuyana chë Uámana Espíritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tšabá jinýama, chënga chaósertama.

Bëngbe Bëtsá entsanga jtsachembuanana chabe entsangcá chamotsiyenama

¹³ Chíyeca, botamana jtsejuabnayëse tšabá jatrabájama, y cach tšëngaftanga jenomándama jtsobenëse, yejuana šmochtsobátmana, Bëngbe Bëtsá soyënga cmochjátatayama tšëngaftangbe tšabiamana jtsejuabnayëse, Jesucristo quem luaroye yochjésabo ora. ¹⁴ Tšëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach tšëngaftangbe bacna juabnënga yomncá nýe tšabá jtsomñama, ntšamo Bëngbe Bëtsábioye cabá nduabuatma ora šmonjanbomncá. ¹⁵ Chamna, šmochtsiyena mo chë Bëngbe Bëtsabe entsangcá, puerte tšabe entsangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna. ¹⁶ Er Bëngbe Bëtsabe uabemana palabrenguiñe mëntsá endayana: “Tšëngaftanga Bëngbe Bëtsábeñe uamanënga šmochtsemna, er atše uamaná sëndmëna ca.”

¹⁷ Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiamana nýetscanga cachcá mondmëna. Chíyeca, ntšamo nýetscanga tmojamama tšabá o ndoñe tšabá yontsemna ca cha yochjayana ora, cha chca echanjama nýe ntšamo chënga tmojamcá jtsonýayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nýetscangbiamana más bëtsá yomnama, chë šmojtsama sóyeca chca jtsinýanýayëse. ¹⁸ Tšëngaftanga šmondétatšëmbo, Jesucristo, mo nda ínýëngbioye jatsëbacama crocénana cuafjëtšajocá, tonjanóbana tšëngaftanga jatsëbacama, chë nýetsca soyënga nýe bonamente jtsamëse oyenentsana, ntšamo jtsiyenama tšëngaftangbe bëts taitángbentsana šmojanatsjinýcá. Cristo ndoñe checmatanatsebacá, yopodena jtsopochócama soyënga jëtšájjuase, mo crocénana o castellancá, ¹⁹ ndayá cachá jóbaniëse, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canýe oveshatemcá, tondaye ndbemaná, ni tsengana ndbomná, Bëngbe Bëtsábioye jëtšchuayama altaroca obaná. ²⁰ Chama Bëngbe Bëtsá Cristbeñe tojanjuabó y tbojanábuayana, cabá quem luare ndëtsemna ora; pero quem tempo, Cristo entsángbeñe tonjábocna

tšëngaftangbe tšabiamana. ²¹ Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjánbema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

²² Tšëngaftanga šmojana ndocna bacna soyënga ainaniñe ntsebomnama, Jesucrístbeyeca catšátangbioye ndegombre jtsababuán'yëshanama, er tšëngaftanga ntšamo ndegombre yomncá jtsamëse, Bëngbe Bëtsá šmoyeunana. Chcasna, sempre nyëts ainánaca nyëtscanga šmochtsenbobonshana. ²³ Bëngbe Bëtsá tojama tšëngaftanga tsëm vida chašmotsebomnama; pero tšëngaftanga tsëm vida šmontsebomna, ndoñe nyë quem luarentša entšanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entšanga muantsobena tšabe vida jtsebomnama y chë palabra ndocna te queochaisopochóca. ²⁴ Ntšamo Bëngbe Bëtsabe uabemana palabrenguiñe endayancá:

Nyëtsca entšanga mondmëna mo shacuancá, y chënga imobomna tšabe soyënga, endmëna mo chë shacuanentša uantšefjushangacá.

Chë shácuana jtsanctana y chë uantšefjushangá jtsatquécjanana; entšanga cachcá, nyëts tempo quem luarentše ndoñe quemochátiyena; ²⁵ pero Bëngbe Bëtsabe palabra nyëts tempo echanjesomñe ca —chiñe endayana.

Y chë palabra endmëna chë Jesucristbe tšabe noticiënga, chë buayenánana ntšamo ín'yënga tcmojabuayenacá.

2

¹ Chcáyecna, nyëtsca tescama šmochtsajbaná nyëtsca bacna soyënga amana, ín'yëngbioye áingñayana, bacna entšanga chë ntšamo ndegombre šmojuabnacá ndin'ín'yayënga ntsemnana, ín'yëngbioye untšabošana, y ín'yëngbiana uayátsenayana. ² Mo cabá mora onýnana šešoncá, tša jtsebošana chabe mamabe létsiye, cachcá tšëngaftanga cmontsamna puerte jtsebošana nyëts tempo Bëngbe Bëtsabe soyënga jtsebomnama, chë soyëngaca Jesucrístbeñe corente chašmotsošbuáchema, y chca, atsebácanënga chašmotsemnama; ³ ntšamo Bëngbe Bëtsabe uabemana palabrenguiñe endayancá: “Tšëngaftanga šmojátatsëmbona Bëngbe Utabná puerte tšabia nyëtscángaftaca yomnama ca.”

Cristo, chë mo aina ndëtsbecá endmëná

⁴ Bëngbe Utabnábioye šmochtoconá, nda endmëna mo canye aina ndëtsbecá, ndëmuan'yëse tojtsama entšanga tšabe vida chamotsebomnama. Báseftanga cha tmojtsaboté, mo ntšamo chë ndëtsbéngaca canye yebna tmojtsejebua ora, luaroca tmojtsejajó ndëtsbecá; pero Bëngbe Bëtsá chábioye tbojuábuayana, y chabe bominyiñe cha puerte uamaná endmëna. ⁵ Chábioye šmochtoconá, tšëngaftanga chë tšabe vida šmojóyëngacñënga, cán'yñe mo aina ndëtsbéngcá, Bëngbe Bëtsabiamana jajejuama canye yebnentšama chašmotsemnama; mo Bëngbe Bëtsabiamana bachnangcá chašmotsemnama, nyë Bëngbe Bëtsábioye jtseservénama jt-sentšénëse, chábioye jtsatschuanayama. Ntšamo Bëngbe Bëtsábioye jt-seservénama šmojtsamcá, chábioye tšabá jtsinýanana, ndayá Jesucristo tojanmama. ⁶ Chca ndegombre endmëna, er Bëngbe Bëtsabe uabemana palabrenguiñe, Bëngbe Bëtsá Jesucristbiamana mëntšá tojánayana:

Smochjinÿe, atſe sÿnjama Jerusalenentſe canÿa chaotsemna, y cha endmÿena mo chÿ canÿe yebna jajuabuámentſe chÿ más bÿets uashacuanÿentſe jajona ndÿetſbecá.

Cha atſbe Uabuayaná endmÿena, y atſbiama puerte enduámana.

Nda chábeñe tojtsosbuaché, ndocna te nÿe bonamente chábeñe queochátobatmana ca.

⁷ Tſÿngaftanga, chábeñe oſbuáchiÿngbiama, nda endmÿena mo chÿ yebna jajuabuámentſe más bÿets uashacuanÿentſe jajona ndÿetſbecá, cha puerte enduámana; pero chábeñe ndoſbuáchiÿngbiama, entsopasana ntſamo Bÿengbe Bÿetsabe uabemana palabrenguiñe Cristbiama endayancá:

Chÿ yebna jebuanÿnga tmontsanaboté ndÿetſbé, mora chÿ más bÿets uashacuanÿentſe entſejájona ca.

⁸ Inÿoca, Bÿengbe Bÿetsabe uabemana palabrenguiñe mÿentſánaca chabiama endayana:

Cha endmÿena mo ndÿetſbé ndayentſe jtsojestjiyamcá;

y mo peñÿscá yomna chÿnga chamotsótsámana ca.

Chÿnga Jesucristo jtsabotena, chabe buayenánana ndoñe ntjoyeunaycá; Bÿengbe Bÿetſá cabá chca ndopása ora tojanjuabó chca chaotsemnama.

⁹ Pero tſÿngaftanga ſmondmÿena Bÿengbe Bÿetſábeyeca bocacánÿnga, y mo canÿe rey tmojtſeservena bachnangcá, y ſmondmÿena Bÿengbe Bÿetsabe entſanga nÿe chabiama jtsetrabájayama, y chÿ nÿe Bÿengbe Bÿetſábenga ſmomnÿnga. Y chca endmÿena, tſÿngaftanga chÿ bÿets soyÿnga ntſamo Bÿengbe Bÿetſá tojamcá chaſmotsabuayiynama. Cha endmÿena nda tcmojáchembo chaſmotsajbanama oyenana mo ndoñe binÿniñcá jtsejuabnayeſe y jtsamÿeſe, cháftaca jtsemnama chaſmotsobenama, chÿ tſÿngaftangbe juabnÿnga puerte binÿnayáftaca. ¹⁰ Tempo tſÿngaftanga ni mo cánÿentſa entſangcá ndoñe queſmÿenjatsmÿena, nÿe ujquÿeshenÿnga; pero mora, Bÿengbe Bÿetsabe entſanga ſmontsemna; tempo ſmonjamna entſanga ndocná tonjánalastemanga, pero mora, Bÿengbe Bÿetſá aiñe lastemado tſÿngaftangangftaca entsemna.

Bÿengbe Bÿetſá jtseservénama jtsiyenana

¹¹ Atſbe bonshánÿnga, ndayentſe tſÿngaftangbe ndegombre luare yomna, celoca endmÿena, y muentſe quem luarentſe, tſÿngaftanga ſmondmÿena mo ínÿoicana ashjajnÿngcá, y mo canÿe luarÿjana nÿe achnÿejuanÿngcá, cach tſÿngaftangbe luaroye átaiñe. Chíyeca chontſaimpadana, ndoñe chaſmondÿetſama soyÿnga ntſamo chÿ ſmobomna bacna juabnÿnga tomncá, ainaniñe bacna soyÿnga bomna causa; chca juabnÿnga ainaniñe jtſenpenzÿentſiyana, chentſe jtſemándayama y Uámana Espiritu ndoñe chaondÿetsemándama.

¹² Chÿ Bÿengbe Bÿetſábioye nduabuatmÿengbeñe ſempre ſmochtsiyena tſabá jtſamÿeſe; chca chÿnga, masque mora tſÿngaftangbe contra imojtsoyebuambná, tſÿngaftanga mo bacá uamana entſanga cuaftsemnÿngcá, chÿ tſabe soyÿnga ntſamo tſÿngaftanga ſmojtſamcá chamuinÿyama, y chca, Bÿengbe Bÿetſá chÿngbioye chaojenonÿinÿyé te, chábioye chÿnga chamotsatschuanama.

¹³ Bÿengbe Bÿetſá ſmoyeunanama, nÿetsca entſanga mando bomnÿngbioye ſmochtsobedecena; chÿ Romoca bÿets mandádbioye, cha chÿ quem luarentſa más uámana puesto jtſemándayama endbómnayeca; ¹⁴ y chÿ tſÿngaftangbeñe mandadÿngbióynaca, ndÿemuanÿynga cha jíchamuana chÿ bacna soyÿnga amÿnga jácaſtigama, y chÿ tſabe

soyënga amëngbiana tšabá imojtsama ca chamuayanama. ¹⁵ Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmotsamama, chca, chë ndosertánënga chë tšëngaftangbiana podesca ichámënga, ntšamo ndegombre yomncá ntsetatšëmbcá, tondaye chamondëtsebmna tšëngaftangbe contra jayanama.

¹⁶ Smochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnna ndoñe šmattsejuabnaye nÿe ndaye bacna soye jamama šmojtsobena ca, y nÿe chca šmochjátama. Más tšabá endmëna jtsiyenana, mo chë Bëngbe Bëtsá imoservenëngcá. ¹⁷ Nÿetscangbiana respeto šmochtsababuánÿeshana, sempre šmochtsiyena Bëngbe Bëtsabiana jtsejuabnayëse cha chë más bëtsá yomnana, y chë Romoca bëts mandado šmochtsesresetana.

Cristo chabe entsanga tojinÿanÿé ntšamo yomna jasúfriana

¹⁸ Tšëngaftanga, chë nÿets tempo ínÿabiana canÿe yebnentse oservénënga, tšëngaftangbe nduiñëngbioye šmochtsayaunana, puerte respeto chëngbiana jtsebmne; y ndoñe nÿe chë tšábëngbioye y nÿe tšabá mandbomnëngbioye, ndayá chë bacá mandbomnëngbioynaca. ¹⁹ Nderado nda, ntšamo Bëngbe Bëtsá yobošcá jamama bošama, tojoboyá chabe nduiño cha chaosufrima tojtsama ora, masque chama jasúfriana ndoñe tbonmëna, chca jamëse, Bëngbe Bëtsá corente tšabá jtsinÿanana. ²⁰ Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtseufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinÿanana. ²¹ Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriana; chca ndegombre endmëna, er Cristo tšëngaftangbiana tonjansufrí, y chca cha tcmonjaninÿanÿé, ntšamo jamama cmojtsamna, tšëngaftanga chca chašmotsamama. ²² Cristo ndocna te ndocna bacna soye chenáisema, ni ndocnábioye chebnaiseingñé. ²³ Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtšëtsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nÿetscanga tmojamama tšabá o ndoñe tšabá yonjamna ca yochjayana ora, chca echanjama nÿe ntšamo chënga tmojamcá jtsonÿayëse. ²⁴ Cristo cruciñe tonjanóbana ora, cha tonjansufrí chë castigo, chë bëngbe bacna soyëngama cach bënga šojánamna jasúfriana castigo, bënga chë bacna soyënga jamama juabnëngaca ndoñe más mandánënga chamondëtsemnana, y bënga ntšamo Bëngbe Bëtsabe bominÿiñe tšabá yomncá jtsamëse chamotsiyenama. Er Crístbioye chënga tmonjanlisiá chaóbanama y tonjansufrí jobanëntscuana, y chca, bënga šonjanatsebacá. ²⁵ Er tšëngaftanga, tempo Bëngbe Bëtsábentšana bënoca šmonjamna, mo ótsëna oveshëngcá; pero mora Cristbe benache šmojtishache, y cha cmontsanÿëna, mo oveshëngbe canÿe abujënÿacá, y cha entsantješna tšëngaftanga tšabá chašmotsemnana.

3

Ntsamo iuamna chë bouamnëngbioye jtsiyenana

¹ Cachcá mo chë oservenëngcá, tšëngaftángnaca shémanga, tšëngaftangbe boyángbioye šmochtsayaunana, chca, chë Bëngbe Bëtsabe buayenana soyënguifne ndošbuáchiye boyángbioye chašmobená jáyëñjanama, Jesucristbeñe chamotsošbuáchema, ntšamo tšëngaftanga šmojtsiyenama. Ndoñe queochátsiyta chë buayenánama chënga jatëtsëtsnayana, ² er chënga mochanjinýe tšëngaftanga šmojtsiyena, Bëngbe Bëtsá nýetscangbiana más bëtsá yomnama sempre jtsejuabnayëse, y ntšamo šmojtsamcá chca yojtsinýinýnáyeca. ³ Cach tšëngaftangbiana ndoñe mëntšá šmattsejuabnaye: “Entšanga atše botamaná tsmëna ca chamotsejuabnama atše nýa mo chca chantenochquëca, chantenóbotamaye ba castellano soyëngaca o ba uámana entšayangá chantichëtjo ca”; ⁴ ndayá chca chaotsemna, ntšamo tšëngaftanga chë Uámana Espiritbeyeca mandánënga jtseñnëse ainaniñe šmojuabnama, cmëbionama y šmobošama; ndocna te ndopochócaye botamanana jtsebomnama, ainaniñe nýe cach tšëngaftanga uámanënga jenobiamama juabnënga ntsebomncá, pero aíñe ainaniñe tšabe ebionana jtsebomñëse. Chë soyënga Bëngbe Bëtsabe hominýiñe puerte enduámama. ⁵ Tempo chca, chë puerte tšabe shembásenga, chë Bëngbe Bëtsabe bocacanënguentšënga, imojanamana jtenóbotamayana; chënga Bëngbe Bëtsabeñe imojtsanošbuaché y chábeñe imojanóbátmana, y nýetscanga chëngbe boyángbioye imojánayaunana. ⁶ Chca yojamna Sara, Abrahámbioye ibnayeunana y chábiyoe “Taita ca” ibojanábobuatma. Tšëngaftanga Sarabe bembangcá jtseñnana, tšabe soyënga šmojtsamëse, y tondayama uatjana šmontsebmñëse.

⁷ Cachcá, tšëngaftanga boyanga, cada ona cachabe shëmaftaca chaotsiyena, tšabá jtseñeyeananëse, y cha respeto buajoná chaotsemnama jtsemëse; pero chca, ndoñe nýe cha acbiana más batšá obenana bomná bëtsemnama, ndayá Bëngbe Bëtsá chabiana tšabe juabna yobómñayeca, ntšamo cach aca tšabe vida tcmojašbuachenacá chábiyona tbojašbuáchenama. Chca šmochtsama, Bëngbe Bëtsáftaca jencuëntama totcá chaondëtsemnama.

Chë tšabe soyënga amama jasúfriama yojtsamñënga

⁸ Y morna, nýetsca tšëngaftanga cachcá šmochtsejuabnaye, ínýenga šmochtsalastemana, chë Jesucristbeyeca catšátangbiyoe šmochtsababuánýeshana, ínýengbiana chacmóngmiaye, y cada ona chaotsejuabná chë ínýenga chabiana más uámanënga imomna ca. ⁹ Inýenga tšëngaftangbiana ntšamo tcmojaborlá ora, ndoñe šmattëchenanguaye; ni chacmojtsëyanguá ora, chëngbiyoe ndoñe šmattoyánguango. Chca játamama cuentna, Bëngbe Bëtsá šmochjaimpáda, chëngbeñe tšabe bendicionënga chaotsemnama cha chaomama, er Bëngbe Bëtsá tcmojáchembo chca chašmotsamama, y Bëngbe Bëtsábiocana tšabe bendicionënga chašmoháchiñama. ¹⁰ Ntšamo Bëngbe Bëtsabe uabemana palabrënguifne endayancá:

Nda toboše tšabe vida jëftsebmñama y puerte oyejuayá tempënga jtsebmñama,
 yejuana chaochtsenojuabná bacna soyëngama ndoñe
 chaondëtsóyebuambnama,

y ndoñe chaondětsebosterama.

¹¹ Bacna soyënguentsana chaotsojuánañe y tšabe soyënga chaotsama, natjëmbana nyetscángaftaca jtsiyenama chaotseboše, y chca chaotsemnama sempre chaotsentšena.

¹² Chca bontsemna jamana, er Bëngbe Utabná, chabe bominyiñe tšabe soyënga amëngbioye jtsanyenana, chëngbiama sempre jtsantješněse;

y sempre chëngbioye jtsayaunanana, chábioye ndayámnaca tmojtsotjanañe ora;

pero chë bacna soyënga jamana uamanëngbe contra cha jtsemnana ca — chiñe endayana.

¹³ ¿Nda nanjobenaye tšëngaftangbiama bacna soyënga jamama, tšëngaftanga chë tšabe soyënga jamama sempre šmojtsentšéněse?

¹⁴ Pero masque tšëngaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatšataye. Chë tšëngaftanga chašmosufrima amëngbiama ndoñe matauatjëngana, ni ainana tsetšenánënga ndoñe matsmënëngana, ¹⁵ ndayá ainaniñe sempre šmochtsejuabnaye Cristbiama mo Bëngbe Utabnacá y chabiama respeto šmochtsebojna; y sempre šmochtseprontana jojuama ndëmuanýënga tmojtsatjaná ndáyeca tšëngaftanga Bëngbe Bëtsábeñe jtsošbuáchiyěse, chabiama ainaniñe šmobátmanama. ¹⁶ Pero chca šmochjama tšabe ainánaca jtsënyáyěse y Bëngbe Bëtsabiama respeto jtsebojněse. Smochtsiyena tšabá jtsaměse, y chama ainaniñe ndoñe chašmondětsebojna juabnënga y chamuayana chca ndegombre ndoñe tšabá šmontsama ca, chca, ínýënga tšëngaftangbiama podesca chamojtsoyebuambná ora, tšëngaftanga Cristbeñe ošbuáchiyënga quetsomñecá tšabe soyënga šmojtsamama, chënga chamotsëuatja chca tmojtsóyebuambnama.

¹⁷ Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnama tojtsebošěse, y ndoñe chë jasúfriana ndaye bacna soye tcojamama. ¹⁸ Er Cristo nýe canýe tonjanóbana bënga bacna soyëngama jáperdonama; chë nyetsca soyënguini tšabá amá, chë Bëngbe Bëtsabe bominyiñe ndoñe tšabá yondmëna soyënga amëngbiama, tšëngaftanga Bëngbe Bëtsáftaca chašmotsatmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsbojnama. ¹⁹ Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tšabe entšanga imonjamnëngbe espíritënga utámenënga imojamnoye, chëngbiama castigo tojtsemnëntscuana; y cha tojanayënjanama chënga tojanabuayená. ²⁰ Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëtsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquëshu canduapormantscuana. Chentšana chë barquëshañe báseftanga tmojanotsbocá, posufta entšanga, búyeshe juatsbuacá chë barquëshu yojtsámnyeyca. ²¹ Chë chënga chamótsbocama tojanëjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtšenóbolimpiana, ndayá bëngbe ainaniñe ndocna bacna juabnënga ntsebojnama Bëngbe Bëtsá tmojtseimpadánama; y bënga atsebácanënga

mondmëna, Jesucristo cháuatayenama Bëngbe Bëtsá tojánmayeca. ²² Cristo celoye tojtantsjuá y Bëngbe Bëtsabe catsbioica yomna jamándama. Cha endmëna chë amëndayá angelëngbiama y espíritënga mando y obenana bonnëngbiama.

4

Entsanga entsamna jtsiyenana ntšamo Bëngbe Bëtsá yobošcá

¹ Chcasna, ntšamo Cristo tojansufricá, chabe cuerpiñe mo entsacá játsetšenëse, tšëngaftángnaca cmontsamna jtseprontánana chca jasúfriama. Er chë Crístbeñe ošbuachiyá nda chabe cuerpiñe tojasufrí, chë bacna soyënga amentsana tojtsojuánañe, ² chca, chabe vidiñe, morscana y jobanëntscuana, jëftsiyenama ntšamo Bëngbe Bëtsá yobošcá, y ndoñe nÿe entsangbe bacna juabnëngaca, nÿe quem luarentse tšabá jëftsemnama. ³ Tempo, bayté enjamna, ndayëntscuana tšëngaftanga šmonjánama soyënga, mo chë Bëngbe Bëtsábioye nduabuátmënga mondbetsamcá; nÿa ndoñe más. Chë tempo, tšëngaftanga šmonjanियena nÿetsca bacna soyënga jtsamëse, jenomándama ntšobencá; tšëngaftanga šmonjánama soyënga nÿe ntšamo šmojanbošcá, nÿe tšëngaftanga tšabá jtsomñama; šmonjanamana jotmenangana y ba fiestënga jtsebonnana, y chora chë ófjanënga tša jtsetmoyana y tša jtseyoyana, y ba uabouana soyënga šmonjanamana jtsamana chë diosënga yojamna ca šmojanjuabná soyënga jadórana. ⁴ Morna, chë Bëngbe Bëtsábioye nduabuátmënga montsenjnaná, tšëngaftanga ya ndoñe más bacna soyënga jtsamëse šmojtsiyenama, ntšamo tempo šmonjanियena, ntšamo chënga jtsamëse mondoyena, jenomándama ntšobencá; y chë causa, chënga bacna soyënga tšëngaftangbiama jtsóyebuambnayana. ⁵ Pero chënga echanjótocaye jayanama ndáyeca chca tmojamama, chë entsangbiama, chë ainënga y chë ya mochjóbanëngbiama, ntšamo tmojamama, aífie o ndoñe tšabá bëtsemnama jayanama entseprontanabe delante. ⁶ Chíyeca, Crístbeñe ošbuáchiyënga, chë mora obanënga imojtsemnënga, ainënga monjamna ora, ínÿenga chë tšabe noticiëngama chëngbioye monjanabuayiyná, chënga chamobenama chë nÿetsca tescama yomna tšabe vida chëngbe espíritoftaca jtsebonnana, ntšamo Bëngbe Bëtsá yobomncá; masque mora quem luarentse, chëngbe cuerpo tojóbana, er Bëngbe Bëtsá tojayana nÿetsca entsanga yojtsamna jóbanama ca.

⁷ Ndoñe bayté y nÿetsca soyënga echanjopochóca. Chíyeca, tšëngaftanga cmontsamna botamana jtsejuabnayana y jenomándama jtsobenana, Bëngbe Bëtsáftaca jencuéntama chašmotsobenama. ⁸ Nÿetsca soyëngama, masna, sempre nÿetscanga puerte šmochtsenbobonshana, er nda ínÿenga puerte tojtsababuanÿeshaná, sempre jtseprontánana ínÿenga jáperdonama, chëngbiama bacna soyënga tmojamama. ⁹ Nÿetscanga šmochtsamana tšëngaftangbe yebniñe jenofjana, chca jamama totcá yojtsemna nt-jatichamcá. ¹⁰ Nÿetsca tšëngaftanga Bëngbe Bëtsá tmojatšatá obenana tšabe soyënga jamama; chca, chë obenánaca cmontsamna jtsamana soyënga chë ínÿengbe tšabiama, chë Bëngbe Bëtsá cmojatšatá nÿets obenánaca ínÿengbioye jujabuáchama, nÿets tempo tšabe soyënga jtsamëse. ¹¹ Nda tojtsabuayiyná, Bëngbe Bëtsabe palabra chaotsabuayiyná mo Bëngbe Bëtsá chabijana cuaftsoyebuambnacá; nda ínÿenga tojtsaser-vena, chca chaotsama chë Bëngbe Bëtsá yojtsama cha chaotsebonnana obenánaca. Nÿetsca soyënga ntšamo šmojtsamcá chaotsinÿanÿná

Bëngbe Bëtsá puerte uamaná y obená bétsemnama, Jesucristbeyeca. Chca smochtsama, er Bëngbe Bëtsá puerte uamaná endmëna y obenana end-bomna nyëts tempo y nyëtsca tescama. Chca chaotsemna.

Puerte tšabá endmëna, Crístbeñe tcošbuáchema, jasúfriama tbojtsemnëse

¹² Atšbe bonshana entšanga, ndoñe šmattsenjanaye padecena soyënguiñe šmojtseufrínama; chiñe jtsinýnana ntsachetšá ošbuáchiyana šmobomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachnějuanana ca; ¹³ chamna, šmochjóyejuaye chë ntšamo Cristo tojansufricá šmojtseufrina ora, chca, Cristo corente obenánaca y uamanacá entšángbeñe chaojtonýná te, tšëngaftanga puerte chašmotsóyejuama. ¹⁴ Puerte šmochtsóyejuaye, nderado nda tcmojoyánguango Crístbiana bëtsošervenayeca, er Bëngbe Bëtsabe Espíritu, chë corente bëtšá endmëná, sempre tšëngaftangbe ainaniñe iuëtsemna. ¹⁵ Tšëngaftanguentše ndocná chabondëtsemna jasúfriama inýa óbanaye causa, atbëbanama, bacna soyënga ínýëngbiana amama, o ínýëngbe soyënguiñe ontremeténama. ¹⁶ Pero Crístbe ustoná tomnama tojasufri, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Crístbe ustoná bétsemnama.

¹⁷ Er chë tempo ya tojobuache, Bëngbe Bëtsá jayanama, cach Crístbeñe ošbuáchiyëngbiana, chabe entšangbiana, tšabá o ndoñe tšabá tmonjamama. Cha chca bëngbiana jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha chëngbiana chca chaojayana ora. ¹⁸ Y chca, chë Bëngbe Bëtsabe bominiñe tšabá amabiana ndoñe paselo atsbocaná jtsemnama tontsemnëse, çntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca? ¹⁹ Chcasna, chë imosufrínëngaftaca Bëngbe Bëtsá chca yobóšeyeca, entsamna chë tšabe soyënga jtsamana y Bëngbe Bëtsabe cucuatšiče chëngbe espíritu chamoboshjona cha chaotsinýenama, er cha chënga tojánabiana, y nyëtsca soyënguiñe tšabe palabra bomná cha endmëna.

5

Crístbeñe ošbuáchiyënga jábuayenama

¹ Y mora, chë tšëngaftangbentše ošbuachiyëngcá enefjuanëngbeñe bëtšëjemëngcá amëndayënga chanjabuayená, atše cach tšëngaftangcá bëtšëjema, canýa ntšamo Cristo tonjansufricá tonjaninýa y chama ínýënga tonjanéyana, y canýa ndábioye cach tšëngaftangcá Bëngbe Bëtsá bochjábema más uámana y bëtšá, Cristo entšángbeñe chaojtonýná ora; tšëngaftanga cbabuayená. ² Ošbuáchiyënga šmochtsanýëna; chënga chašotsanýënama Bëngbe Bëtsá chca tcmojábiana. Chca, chentša ošbuachiyëngbeñe šmochtsama ntšamo canýe tšabe abuajënyá chabe oveshëngaftaca endbetsamcá. Bëngbe Bëtsabe trabajo ndoñe šmattsama, nýe cmojtšëtocanama, ndayá chca jamama šmojtšebóšeyeca. Chca ndoñe šmatjama nýe paselo crocénana juácana, ndayá ínýëngbioye jujabuáchama tša šmobóšeyeca. ³ Chë cmojtsamna jtsanýënama ošbuáchiyënga ndoñe nýe bëtšcá šmattsamëndaye, mo chëngbe nduiñënga cuafjatsmënëngcá, ndayá ntšamo tšëngaftanga šmojtšiyenama, chënga šmochjínýanýiye ntšamo yojtsamna jtsiyenana. ⁴ Chca, chë bënga nyëtscanga, mo chë tšabe abuajënyacá šuanýená, quem

luaroye yochjésabo ora, mo canye uabuashinÿinÿana coronêsha ndocna te tontsandbemêshacá, tšëngaftanga canye bêts uacanana soye šmochanjóyëngacñe, y chë soye endmëna nÿetsca tescama; Bëngbe Bëtsá uámanënga y bêtsëtsanga cmochanjábiama, cháftaca nÿets tempo oyejuayënga jtsemnëse.

⁵ Cachcá, tšëngaftanga chë bobontsëngnaca cbabuayená, sempre šmochtsejuabnaye chë bêtsëjëmënga tšëngaftangbe amëndayënga imomnama, y chca šmochtsama. Cada ona tšëngaftanguentšá bontsemna jtsejuabnayana chë ínÿyënga tšëngaftangbiama más uámanënga cuaftsemncá, ínÿyëngbioye šmojtsaserverna ora; er ntšamo Bëngbe Bëtsabe uabemana palabrënguifne endayancá:

Bëngbe Bëtsá chë nÿe cachënga uámanënga tmojtsenobiamnangbe contra entsemna,

y chë ndoñe uámanënga montsenobiamnangbiama, Bëngbe Bëtsá más tšabe juabna entsebmoma ca.

⁶ Sempre šmochtsejuabnaye Bëngbe Bëtsá chë más bêtsá nÿetscangbiama yomnama, y nÿets mando y obenana bomná yomnama, y chabe delante ndoñe uámanënga šmattsenobiamnaye, cha más uámanënga chácmabiamama, chama chë tempo chaojobuache ora. ⁷ Nÿetsca soyënga ndayama šmuenócochinÿenama Bëngbe Bëtsabe cucuatšifne šmochjáboshjona, er cha tšëngaftanga yejuana cmondánÿena.

⁸ Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canye león tojtsejató, nda jtsósañama tojtsana orcá, chë diablo, sempre jtsebošana jamama, tšëngaftanga Jesucristbeñe ošbuáchiyana chašmotsajbanama.

⁹ Puerte šmochtomorócha, Jesucristbeñe bêtscá jtsošbuáchiyëse, chë uayayá tondaye chaondobená tšëngaftangftaca jamama, cach tšëngaftangcá Jesucristbeñe ošbuáchiyënga nÿets luarënguenache cachcá jasúfriama yojtsamnama jtsetatšëmbëse. ¹⁰ Pero tšëngaftanga baseftayté chašmojasufrí chentšana, Bëngbe Bëtsá cmochanjábiama nÿetsca soyënguifne puerte tšábënga, puerte chašmotsemorochama, bêtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnama; Bëngbe Bëtsá, chë bëngbiama tšabe juabna bomná, bënga nÿetsca tšabe soyënga šonjatšatá, y nda bënga šojáchembo nÿetsca tescama bêtsëtsanga jtsemnama, chca echanjama.

¹¹ Cha nÿets obenana nÿets tempo y nÿetsca tescama chaotsebmoma. Chca chaotsemna.

Jtadiósoftanama

¹² Silvano, ndabiama sëndëjuabná atšbiama canye tšabe palabra bomná Jesucristbeyeca catšata yomnama, cháftaca quem base tsbuanácha tchonjubuábiamama. Atše sëntseboše tšëngaftanga añemo jatšatayana y jáuyanana, ndegombre ntšamo tchonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chiyeca, sempre šmochjëftsiyena jtsamëse ntšamo chabe tšabe juabna tšëngaftangbiama yomncá.

¹³ Ošbuáchiyënga muentše átšëftaca montsemnënga cmontsacheuaná. Chënga quem bêts pueblentše mondoyena bacá uamana entšangftaca, mo chë tempo, Babilonia bêts puebloa imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë atšbiama mo uaqüñacá endmëná,

chánaca cmontsacheuaná. ¹⁴ Njetscanga Jesucrístbeyeca catšatangá smochjenchuaye, jtenámochëse tša šmojtsenbobonshánama.

Atše, Bëngbe Bëtsá séntseimpadana cha chaoma tšëngaftanga chë Jesucrísoftaca cánýiñe mo canýacá šmomnënga, njetscanga ainaniñe tšabe ebionana chašmotsebonnama.

2 San Pedro

Jacheuayama

¹ Atše Simón Pedro, Jesucristbe oserverná y chabe ichmoná, quem tsbuanácha sentsabiamná tsëngaftangbiama, ndëmuanÿenga šmojashjache jtsebomnama canÿe ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nÿetscanga chábeñe chamotsošbuáchema.

² Atše sëntseimpadana, tsëngaftanga Bëngbe Bëtsabiama y Bëngbe Utabná Jesusbiama cada te más jtsetatšëmbëse, Bëngbe Bëtsá chaoma tsabe bendicionënga tsëngaftangbeñe chaotsemnama y chaoma tsëngaftanga ainaniñe tsabe ebionana chašmotsebomnama.

Chë Jesucristbeñe ošbuáchiyënga tsabe soyënga

³ Bëngbe Bëtsá chabe obenánaca tojama bënga chamobená jtsebomnama, lempe ntšamo tmojtsëjabotcá tsabe vida jtsebomnama y jtsiyenama, Bëngbe Bëtsá jadórama soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnama y bëts soyënga jamëse, chabe entšanga chamotsemnama. ⁴ Chca, Bëngbe Bëtsá šojatšatá ntšamo bënga jatšatayama tojanašebuachenacá, bëts y uámana soyënga, chca, quem luarentša bacna soyënguentshana chašmotsojuánañama. Chë bacna soyënga quem luarentše jtsebínÿnana, entšanga nÿe cachëngbe bacna juabnëngaca jtsiyenama yapa boše causa. Chánaca chë tsabe soyënga šojatšatá, tsëngaftanga cháftaca cánÿiñe mo canÿacá chašmotsemnama, cachacá jtsemnama jashjáchése. ⁵ Chca, ndoñe quenátsmëna nÿe Jesucristbeñe ošbuáchiyana jtsebomnana; chiñe šmochjenobuáshjache, bëtscá tsabe soyënga jtsamëse; chora bëtscá šmochtsama Bëngbe Bëtsabe soyëngama chacmotsësertánama; ⁶ chora bëtscá šmochtsama cach tsëngaftanga jenomándama chašmotsobenama; y chca, tsëngaftanga masque padecena soyënguiñe chašmojtsachnëjuana, ainaniñe puerte añemo jtsebomnëse, puerte uantadënga chašmotsemnama; y chentšana bëtscá šmochtsama, tsëngaftanga Bëngbe Bëtsá šmojtsadoránama jinÿanÿiyama; y ⁷ chca, nÿetsca tsëngaftanga ošbuáchiyënga chašmotsenbobonshana; y chca, nÿetsca entšanga chašmotsababuánÿeshana.

⁸ Tsëngaftanga lempe chë soyënga šmojtsebomna, y bëtscá chca šmojtsamëse, šmochantsiyena becá oserverna soyënga jtsamëse, y chentšana puerte tsabe soyënga echantsóbocana, corente tsabá Bëngbe Utabná Jesucristo chašmotsábuatmama. ⁹ Pero nda quem soyënga ndoñe tontsama, Bëngbe Bëtsabe soyëngama ndoñe ntosertánana; y chca, cha mo canÿe jtaná o nduabinÿnacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tsabá chaotsatsmënama tojamama. ¹⁰ Chíyeca, Jesucristbeyeca atšbe catšátanga, nÿa šmochtsentsëna chca tsabe soyënga jtsamama, y chca, corente tsabá šmochanjátatšëmbona, Bëngbe Bëtsá chabe entšanga chašmotsemnama tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná. ¹¹ Chca, Bëngbe Bëtsá oyejuayá tsëngaftangbiama

echanjama, Bëngbe Utabná y Atsebacayá Jesucristbe amëndayoye jamashënguama ndegombre chašmobenama.

¹² Chcáyecna, atše sëntsejuabná tšëngaftangbioye sempre chë soyëngama jtsabuayiynayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguiñe y chca šmojtsiyena, chë mora šmojtsetátšëmbo soyënguiñe. ¹³ Sëntsejuabná, chajjëftsainëntscuana tšabá yojtsemna jamana, ainaniñe bëtscá añemo chašmotsebomnama chë soyënga jtsamama, ntšamo tijayancá jtsabuayiynayëse. ¹⁴ Atše sëntsetatšëmbo, ndoñe baytese y atšbe ainana Bëngbe Bëtsábioye yochtá, ntšamo Bëngbe Utabná Jesucristo šonjëftsanbuayenacá; ¹⁵ pero bëtscá chanjëftsema, atše chajjóbana chentšánënaca tšëngaftanga nyets tempo chë soyëngama chašmotsenójuabnama.

Cristo corente uamaná y obená yojamnama tmojaninñe ora

¹⁶ Bëngbe Utabnabe obenanama y cha yochjésabama ntšamo tcbonjanabuatambacá, ndoñe quenjatsmëna entsangbe osertanánaca pormana cuentëngaca, er cach bënga botamana fsënjáninñe chabe uámanana y obenana. ¹⁷ Bëngbe Bëtsá chë Taitá, Jesucristo puerta obenana bomná bëtsemnama y cha corente bëtsá y uamaná bëtsemnama tonjaninñinñe ora, bënga fsënjáninñe. Chca fsënjáninñe Bëngbe Bëtsá, chë puerta uamana y bëtsábiocana oyebuambnayana Jesúsbioye mëntšá tbonjaniiyana ora: “Mua atšbe bonshana Uaquiñá endmëna, atše chabiamana sëntsoyejuáca.” ¹⁸ Cach bënga chë oyebuambnayana fsënjajuena, chë celocana tonjanóbocnana, er bënga Bëngbe Utabnáftaca fsënjannmëna, chë uamana tjoca.

¹⁹ Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyeunanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinñanñiyana, y echántsemna mo canñe uajuinñanësha canñe ibetiñe luarentše tojtsebinñnacá. Chë soyënga šmochtsuenana Jesucristo yochjésabëntscuana; chora, cha nyetsca soyënga cmochanjinñanñiye, mo tšëngaftangbiamana canñe tsëm te cuafjabinñncá, y chë jabinñnama ora binñnaye estrella tojábocna tšëngaftanga jabuabinñnamcá. ²⁰ Pero natsana chacmësertá, ndocna palabra Bëngbe Bëtsabe uabemana palabrënguiñe tojayana canñe soye yochjopása ca, cabá chca ndopása ora, nñe cach Bëngbe Bëtsabe juabna oyebuambnayëngbe juabnentšana tojanóbocnama; ²¹ er Bëngbe Bëtsabe juabna oyebuambnayënga ndoñe monjanoyebuambná nñe chënga chca jamama innabóseyeca, ndayá Bëngbe Bëtsabe cuenta tmojanoyebuambá, chë Uámana Espiritu chënga chca chamóyeuambama tojánmayeca.

2

*Chë ndoñe ndegombre soyënga buátëmbayënga
(Jud 4-13)*

¹ Chë Bëngbe Bëtsabe juabna oyebuambnayëngbe tempo, Israeloca entšángbeñe baseftángnaca imojamna, ndëmuanñyenga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe

abuátambayënga mochántsemna, y chënga ndoñe ndegombre soyënga mochántsubuatambaye, pero ndegombre soyëngaca cánÿiñe, chca, chënga chca imoÿtsabuátambama entšanga ndoñe chamondëtatsëmbonama. Chë buatëmbana soyënga echanjama, entšanga ndoñe ndegombre soyënga y bacna soyënga chamotsamama. Ntšamo chënga mochántsama y mochántsubuatambaye soyëngaca, mochántsama Jesucristo ndoñe chëngbe Utabná chaondëtsemnana, cha nda chënga tojatsebacá, mo nda ínÿenga játsebacama crocénana cuafjëtšajocá. Y chca, nÿe ndeolpe, chë Bëngbe Bëtsábiocana uabouana castigo nÿetsca tescama mochántsebomna. ² Banga chëngbioye mochantsësetona, nÿetscna bacna soye, jenomándama ntšobencá jtsamëse; y chëngbe causa, ínÿenga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. ³ Chënga bëtscá crocénana jtsebomnana yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imoÿtsamama y chëngbiana castigo nÿetsca tescama chaotsemnámna.

⁴ Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infiernoye toÿtsanatsatše y puerte ibetiñe toÿtsanabáshejuana, chë uabouana tboca chamoquedama, Bëngbe Bëtsá chëngbiana nÿetsca tescama castigo chamotsebomnana yochjayana orscama. ⁵ Y cach ndoñe quem luarentša entšángbioye tonjanaperdoná Noé yojëftsiyena ora, y chënga jácastigama aiñe tojanma chë uabouana uaftena chëngbeñe chaotsemnana, chë nduauenana y bacna entšanga jtsapochócama. Chentšana, nÿe Noébioye, tbojanatsbocá, nda entšanga yojanabuayíyná ntšamo jtsiyenana, Bëngbe Bëtsabe bominÿiñe tšabá yomncá jtsamëse; cha y ínÿe canÿsëftangnaca tojanatsebacá. ⁶ Bayté entsemna, Bëngbe Bëtsánaca tojánayana chë Sodoma y Gomorra bëtš pueblentša entšanga, yapa bacna entšanga imojamnama, bëtš castigo jtsebomnana yojánamnama; y iñesheca toÿtsanapochocá, chë pueblënga y chentša entšanga jatínÿá jtsabiamëntscuana. Y chë sóyeca Bëngbe Bëtsá tojaninÿanyé ntšamo bacna entšángaftaca yochjama, chë chentšana mochtsiyena bacna entšangbiana. ⁷ Pero Bëngbe Bëtsá Lótbioye tbojanatsbocá, chë bëtš pueblënga pochócyentšana. Cha yojamna Bëngbe Bëtsabe bominÿiñe tšabá amá, y ntšamo chë luarentša entšanga imojaniyenama, nÿetscna bacna soye jtsamëse, jenomándama ntšobencá, cha puerte ngménana inabomna. ⁸ Er quem tšabe entšá, chëngbeñe oyená, chë entšanga imoÿtsama bacna soyënga cada te yojanonÿaye y yojanue-nana ora, puerte chabe tšabe ainaniñe inasufrina.

⁹ Chca, Bëngbe Utabná endobena chë Bëngbe Bëtsábioye adórayënga játsebacana padecena soyënguentšana y bacna soyënga jamama juabnënguentšana, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nÿetsca tescama chë bëtš castigo chamotsebomnana jamándama. ¹⁰ Chca ndegombre endmëna, y más chë ndëmuanÿenga nÿe cachëngbe cuerpëngama bacna juabnëngaca jtsamëse imoyenëngbiana, chënga chë Bëngbe Utabnabe mando jtsaboténana. Chënga bacá buátseñanënga mondmëna y jtsebošana nÿe ntšamo cachënga tmoÿtsejuabnacá chaotsemnana, y ndoñe ntsauatjana chë espíritënga

obenana bomnëngbiana puerte bacna soyënga jtsóyebuambnayama. ¹¹ Chamna chë angelënga, masque más añemo y obenana bomnënga mondmëna, ndoñe jenñëmuana chë espíritënga obenana bomnëngbiana chca jayanama, chëngbiana ndoñe tšabe soyënga jtsóyebuambnayëse, Bëngbe Utabnabe delante.

¹² Pero chë buátëmbayënga, chë cachënga ndoñe tontsësertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye. ¹³ Chënga mochanjasúfria, ínÿenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangaftaca cánÿiñe mo ošbuachiyëngcá tmojtšesá ora, tšëngaftangbiana ouatjcá jtsemnana y chëngbe causa, ínÿenga tšëngaftangbiana podesca mochántsuchamo, er chënga chentše oyejuayënga jtsemnana, nÿe chënga tšabá jtsemnama jtsamëse; y chënga tšëngaftangbeñe jtsemnana, tšëngaftangbioye jtsaíngñase.

¹⁴ Chënga ndoñe ntšobenana canÿe shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batšá ošbuáchiyana bomnënga jtsaíngñayana, y sempre jtsentsénana nÿe más soyënga jésebošama y jésebomnama, ínÿenga tmobomnama más soyënga jashjáchama; chënga montsemna pochocánënga jtsemnama. ¹⁵ Chënga chë tšabe benachentšana tmojtsojuánañe, y mora mo otšenëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orcá; Balaam Beorbe uaquiñá. Cha yapa inaboše bëtscá crocénana juacánama ínÿengbiana bacna soyënga jtsamëse; ¹⁶ y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

¹⁷ Entšanga jtsobátmanana chënga bëtscá tšabe soyënga chamot-samama, pero chë tmojtsama soyënga tondayama ntšoservénana, y chca, chënga jtsemnana mo búyeshe obocanentše tojtsebuashjcá; y chënga mora canÿe soye jtsejuabnayana y chentšana inÿetšá; chca chënga jtsemnana mo jantšetëshënga bëtš bínÿiaca bonjnëshëngcá. Chëngbiana Bëngbe Bëtsá tojayana castigo chamotsebomnama, chë más ibetoca, tondaye binÿiñe luarentše. ¹⁸ Chënga ba botamana palabrëngaca jtšenábotamnayana, pero tondayama ntšoservénana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyëñjanase, nÿe cachënga tšabá jtsomñama bacna juabnëngaca soyënga chamotsamama, cachënga jenomándama ntšobencá. ¹⁹ Chë abuatëmbayënga jašebuachenana tšabe vida jónÿenama, nÿe ntšamo chënga tmojtsebošcá jtsejuabnayëse y jtsamëse; pero cachënga mondayena cachëngbe bacna juabnëngaca mandánënga, y chca, chënga montsajna pochocánënga jtsemnama, er ndaye entšánaca mandaná jtsemnana, chë nÿets tempo tobedecena sóyeca. ²⁰ Er ndëmuanÿënga, Bëngbe Utabná y Atsebacayá Jesucristo tmojtsábuatmama,

tmojtsajbaná oyenana mo chë nÿe quem luarama enójuabnaye entšangcá, nÿetsca bacna soye amana y tša bacna juabnënga ainaniñe bomnana, pero mora cachiñe chë soyënguiñe tmojtésajna, y cachiñe mandánënga tmojsemna chë bacna juabnëngaca, chënga mora más bacá tempscama jabocanana. ²¹ Chëngbiama más tšabá manjamna ndoñe ntjobenayana jtsetatšëmbuana ntšamo Bëngbe Bëtsabe bominÿiñe tšabá yomncá inétsamama, chë soye jatabuátmanana y chentšana játajbanana chë buatëmbana soyënga y chë abuyaynayëngaftaca chëngbioye Bëngbe Bëtsá tojanoyé mandënga jtsobedecénana. ²² Pero chëngaftaca tojopasá ntšamo entšanga mondëntšayancá chca ndegombre bëtsemnama: “Chë queše chabe ashconánana tojtsemnoye jeshéconana ca” y “chë cotše cabá chora bebená, ngüichetsoye jana jetsójanuouoyama ca”.

3

Jesucristo quem luaroye jésabama ora

¹ Jesucristbeyeca atšbe bonshana catšátanga, móraca ya uta soyama cbontsëbuabiamná. Quem uta tsbuanáchaca atše sënjábošena jamama tšëngaftangbe juabna nÿe ena tšabe soyëngaca chaotsemnama, y chca chaotsemnamna atše jtsabuayiyayëse chë tcmojanabuatambá soyëngama. ² Atše sëntseboše tšëngaftanga chašmotsenojuabná, ntšamo chë inÿe tempënga ora, chë nÿe Bëngbe Bëtsábioye jtsoservënëse, chabe juabna oyebuabnayënga tmojánayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tšëngaftanga šmojanóyëngacñe.

³ Pero masna quem soye chacmotsésertana: Jesucristo quem luaroye jésabama tempo chaojtsobeco ora, mochántsemna entšanga y chënga mochantsiyena nÿe cachënga tšabá jtsomñama bacna juabnëngaca, y cmochantsëbuayajuana, chë Cristo yochjésabama šmošbuáchema.

⁴ Chënga mëntšá mochántsicamo: “Cristo tcmojanašebuachená quem luaroye jésabama. ¿Ndegombre chca? Chcase, ¿ndayentše cha yojtsemna? Bëngbe bëtšëtsanga, ndëmuanÿëngbioye cha tojanašebuachená quem luaroye jésabama, ya tmonjóbana, y quem luarentše lempe cachcá endesomñe, ntšamo quem luare tojanobojaťsé orscana enjamncá ca.” ⁵ Chë entšanga ndoñe ntsebošana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnama. Cha quem luare tojanma búyeshentšana y búyesheca; ⁶ y cach búyeshecnaca, chë uabouana uaftenentša béjayeca, ya bayté yojtsemna, cha lempe quem luarentše yojanbinÿncá tojtsanpochocá. ⁷ Pero chë mora entsemna celoca y quem luare, cach Bëngbe Bëtsabe mándoca, ndoñe quenátopodena chamotseepochocama, chë Bëngbe Bëtsá jayanama chábioye ndoñe mondadoránënga ntšamo tmojamcá ndoñe tšabá yonjamnama, y chë bacna soyënga tmojamama nÿetsca tescama castigo chamotsebonnama jamándama tempo candóshjanguëntscuana. Chora Bëngbe Bëtsá, celoca y quem luare iñesheca echantseepochóca.

⁸ Pero, atšbe bonshánënga, canÿe soye endmëna y chë soye ndoñe chacmondëbnëtjomba: Bëngbe Utabnabe juabnama, canÿe te endmëna mo canÿe uaranga uatcá, y canÿe uaranga uata mo canÿe tecá. ⁹ Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betso yochanjama ca, chë cha quem luaroye jésabama, ndayá chana puerta uantado tšëngaftangafaftaca comna; er cha

jtsebošana ndocná n̄yetsca tescama castigo chaondětsebomnama, ndayá n̄yetscanga bacna soyënga amana jtsajbanase, Bëngbe Bëtsabe tšabe benache chamuashjáchama.

¹⁰ Pero Bëngbe Utabná echanjésabo ndocná chama chaondětsejuabná ora, mo can̄ye atbëbanacá jashjanguana, ndocná chama tontsejuabná ora. Chora celoca echanjopochóca, can̄ye jabuache shauenanánaca, y quem luare ndaye soyënguentsana yomnana íñesheca echántsefjatëjo, y ndayá Bëngbe Bëtsá y entsanga quem luarentse tmojamcá, lempe echántsejuin̄ye.

¹¹ Lempe chca japochócama entsémnayeca, ndegombre tšëngaftanga cmontsamna jtsiyenana ntšamo chë Bëngbe Bëtsabe entsanga jtsiyenana entsamncá, y n̄yets tempo jtsamëse chë Bëngbe Bëtsábioye jtsatschuanayama yomna soyënga, ¹² tšëngaftanga chë Jesucristo quem luaroye jésabama chaóshjanguama šmojtsobátmanëntscuana; y n̄ya šmochtsentsëna cha más betscó cháuesabama. Chë te íñesheca celoca echántsejuin̄ye, y ndaye soyënguentsana quem luare yomnana cach íñesheca echántsefjatëjo. ¹³ Pero bënga mondobátmana ntšamo cha šojašebuachenacá: can̄ye tsëm luare, mo can̄ye tsëm celoca y tsëm fshantscá, y chentše n̄yetscanga mochantsiyena ntšamo Bëngbe Bëtsabe bomin̄yiñe tšabá yomncá jtsamëse.

¹⁴ Chíyeca, atšbe bonshánënga, chë soyënga chaotsemnana šmojtsobátmanëntscuana, n̄ya chiñe šmochtsentsëna, chca, cha yochjésabo ora, chacman̄yena oyeñiñe tšabá Bëngbe Bëtsáftaca jtsatsmënëse, ín̄yengaftaca natjëmbana jtsiyenëse; chacman̄yena ainaniñe ndocna bacna soye ndbomnënga, y puerte tšabá jtsamëse oyeñiñe; chca, ndocná chaondobená jayanama tšëngaftanga ndaye bacna soye šmojama ca. ¹⁵ Quem soye šmochtsejuabnaye: Bëngbe Atsebacayá ndoñe yapa betscó tonjésabëсна, chca jtsemnana cha puerte uantado n̄yetscángaftaca yómnyeca; chca cha yomna, ba entsanga chë bacna soyënga amana chámajbanama y chabe benache chámuatishachama y chca, atsebácanënga chamotsemnana. Cach quem soyëngámnaca, Jesucristbeyeca bëngbe bonshana catsata Pablo tcmonjanëbuábiamá, chë Bëngbe Bëtsá tojanma cha chaotsebomnama osertanánaca. ¹⁶ Chë soyëngama, Pablo n̄yetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjín̄yënga, y chë mora can̄ye soye jtsejuabnayana y chentsana ín̄yetsá juabnayënga, jtsejuabnayana y ín̄yengbioye jtsabuayin̄yayana ndoñe ndegombre yondmëna ca. Y cachcá jtsamana ín̄ye soyëngaca, Bëngbe Bëtsabe uabemana palabrënguñe. Chca chënga montsajna pochocánënga jtsemnana.

¹⁷ Chíyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuatambayënga mochtsemnana, yejuana šmochtsantješna; chca, chë Bëngbe Bëtsá ntšamo yomandacá ndobedecenëngbe soyëngaca ín̄yënga jáingñama, tšëngaftanga ndoñe chašmondětsemna mo uambanëngcá, ndoñe chašmondëtsajbanama jtsebomnana chë Bëngbe Bëtsabe soyënga ntšamo šmojashjachcá. ¹⁸ Pero atšna, Bëngbe Utabná y Atsebacayá Jesucristo sëntseimpadana, tšëngaftanga chašmotsiyena jtsamëse, chë chábensana šmojóyëngacñe ba soyënga ntšamo tomnama jtsejuabnayëse, y chaoma tšëngaftanga cada te

más tšabá cha chašmotsábuatmama. ¡Njetscanga cha chamotsatschuaná,
mora y njetsca tescama! Chca chaotsemna.

1 San Juan

Cristo, chë nyetsca tescama yomna tšabe vida entsanga chamotsebomnama amá

¹ Bënga cbontsëbuabiamná chë Bëngbe Bëtsá ndabiajana inëtsoyebuambnabiama, chë nyetsca tescama yomna tšabe vida entsanga chamotsebomnama iuamabiama, chë Bëngbe Bëtsá cabá quem luare ndëma orscana ya yojamnabiama. Bëngbe matscuasëngaca chabe oyebuambnayana fsënjouena y bëngbe bominjëca cha tonjama soyënga fsënjinyë. Aíñe bënga cha fsënjinyë y bëngbe cucuatšeca fsënjábojajo. ² Cha bëngbentše tonjanonýná y fsënjáninyë; chíyeca bënga chabiama cbontsëtsësná y cbontsabuayiyiná, nda sempre vida yobomna y nda chë nyetsca tescama yomna tšabe vida entsanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbiroye sojinyányé. ³ Bënga tšëngaftanga cbontsabuayiyiná ntšamo tifjinyë y tifjouencá, tšëngaftanga cánýiñe mo canýacá bëngaftaca chašmotsemnama. Bënga cánýiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucrísoftaca. ⁴ Bënga quem soyënga tšëngaftanga cbontsëbuabiamná, bëngbe oyejuayana corente bëtscá chaotsemnama.

Bëngbe Bëtsá endmëna chë entsangbiama binýnayá

⁵ Mëntsá entsemna ntšamo Jesucrístbentsana tifjouencá y chca tšëngaftanga cbontsabuayiyiná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna. ⁶ Bënga tmojtsichamo cháftaca cánýiñe mo canýacá fsëntsemna ca, pero cabá ndoñe Bëngbe Bëtsabe cucuatšíñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. ⁷ Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cánýiñe mo canýacá mochántsemna, y chabe uaquiñá Jesucristbe uabuáshanana buiñeca, Bëngbe Bëtsá bëngbe bacna soyënga sempre šochántsabuanaye, y echanjama bënga chabe delante tšabá chamotsatsmënama.

⁸ Bënga bacna soyënga ndoñe queftsátbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjójyëngacñe; ⁹ pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanýiye cachá chë ntšamo šojiytsašebuachecá amá y nyetsca soyënguiñe tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. ¹⁰ Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bostero cuaftsemncá, y ntšamo Bëngbe Bëtsá bënga šojauyanca ainaniñe ndoñe tmonjójyëngacñe.

2

Cristo, bëngbe obuauyayá

¹ Tšëngaftanga mo atšbe basengcá, er atše tcbonjanëjabuache Jesucristbe tšabe noticiënguiñe chašmotsošbuáchemá, quem soyënga

cbontsëbuabiamná bacna soyënga ndoñe chašmondétsamama. Pero ndánaca Cristbeñe ošbuachiyënguentšá bacna soye tojamëse, bënga canye obuauyayá Bëngbe Bëtsabe delante montsebomna, y cha endmëna Jesucristo, chë nyetsca soyënguiñe tšabá amá. ² Jesucristo tonjanóbana ndoñe nyë Bëngbe Bëtsá bënga cháuaperdonama bëngbe bacna soyëngama, ndayá quem luarentša nyetsca entšágnaca chëngbe bacna soyëngama cháuaperdonama.

³ Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama. ⁴ Pero nda tojayana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canye bostero jtsemnana y ainaniñe chë Bëngbe Bëtsabe ndegombre soyënga ndoñe tonjóyëngacñe. ⁵ Pero nda ntšamo Bëngbe Bëtsá ibuamëndacá tojtsama, jtsinýanýnayana chabe ainaniñe Bëngbe Bëtsabiama corente bonshánana yomnama, y chca, mochántsetatšëmbo bënga sempre cánýiñe mo canýacá cháftaca imomnama. ⁶ Nda tojtsichamo Bëngbe Bëtsáftaca cánýiñe mo canýacá yojtsemna ca, bontsemna jtsiyenana soyënga jtsamëse ntšamo Jesucristo yojétsiyencá.

Canye tsëm mando

⁷ Atšbe bonshana entšanga, ntšamo mora cbontsëbuabiamnacá, ndoñe canye tsëm mando quenátsmëna, pero aiñe canye tempsca mando; entsemna cach tšëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tšëngaftanga bëngbentšana šmonjouencá. ⁸ Pero masque chca endmënëse, quem cbontsëbuabiamná soye tšëngaftangbiama echántsemna mo canye tsëm mandcá. Cristo enjëtsiyena ntšamo quem Bëngbe Bëtsabe mando ndegombre yomncá y tšëngaftágnaca cachcá šmondoyena, er chë bacna juabnënga jtsebonnëse mo ibetiñcá jtsiyenana tempo ya echanjochnëngo, y chë entsangbe juabna ndegombre binýnayá ya entsebuashinýnana.

⁹ Nda tojayana chë binýnayáftaca yojtsemna ca, pero cha chabe catšátbioye tbojtsáboyënja, cha cabá tempcá, bacna juabnënga jtsebonnëse yojtsiyena, mo ibetiñcá. ¹⁰ Nda chabe catšátbioye tbojtsebobonshana, cha chë binýnayáftaca jtsiyenana, y tondaye queochátsmëna cha bacna soye chaotsamama. ¹¹ Pero nda chabe catšátbioye tbojtsáboyënja, cha bacna juabnënga jtsebonnëse jtsiyenana, mo canya ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebonnëse jtsiyenana chábioye ndoñe ntjalesénciana ntšamo tšabá yomncá chaotsamama.

¹² Básenga, atše cbontsëbuabiamná Bëngbe Bëtsá tšëngaftangbe bacna soyënga tcmojáperdonama, ndayá Jesús tojanma sóyeca. ¹³ Taitanga, tšëngaftanga cbontsëbuabiamná, er tšëngaftanga ya šmonjuábuatmana chë quem luare jobojátsama orscana ya inamná. Tšëngaftanga bobontsëngnaca cbontsëbuabiamná, er tšëngaftanga ya chë nyetsca bacna soyënga mandayá Satanás šmonjayëñaná.

¹⁴ Básenga, tšëngaftanga tcbonjubaábiamna, er tšëngaftanga chë Taitá ya šmonjuábuatmana. Taitanga, tšëngaftanga tcbonjubaábiamna, er tšëngaftanga ya šmonjuábuatmana chë quem luare jobojátsama orscana ya inamná. Bobontsënga, tšëngaftágnaca tcbonjubaábiamna, er tšëngaftanga

bëtská añemo ainaniñe šmambá, y Bëngbe Bëtsabe palabrama sempre tšëngaftange ainaniñe šmondëjuabná, y chë nyetsca bacna soyënga mandayá šmonjayëñjaná.

¹⁵ Ndoñe matsbošana oyejuayënga jtsemnana nyë quem luarentša soyëngaca, ni nyë chë soyënga jtsebmomna. Nda yapa tojtseboše quem luarentša bacna soyënga jtsebmomna, cha ndoñe chë Taitábioye bondbobonshana. ¹⁶ Er chë nyë quem luarama enójuabnayënga mëntšá juabnënga mondbomna: yapa jtsebošana jtsebmomna ntšamo chë ainaniñe bacna juabnënga bomnënga mondbetsebošcá; yapa jtsebošana nyë ndayá tmojatinýe soye; y yapa jtšenábotamnyana chë tmobomna soyëngama. Chë juabnënga Bëngbe Bëtsábocana ndoñe ntsóbocanana, ndayá nyë chë quem luarama enójuabnayëngbentsana. ¹⁷ Pero quem luare echanjopochóca y nyetsca chentša soyënga, chë entsanga bacna juabnëngaca yapa imoboše jtsebmomna soyëngnaca. Pero nda ntšamo Bëngbe Bëtsá yobošcá tojtsama, cha chë nyetsca tescama yomna tšabe vida echántsebmomna.

Chë Cristbe contra yomná

¹⁸ Básenga, quem luare jopochócama tempo ya entsobeco. Ntšamo tšëngaftanga šmonjouenca, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama. ¹⁹ Chënga cach bëngbentsana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jt-sotatsëmbuama ntšamo bënga Jesucristbeñe mondošbuachecá, chënga nyetscanga ndoñe mondošbuáchema.

²⁰ Pero Cristo, chë Uamaná, tšëngaftanga tmonjabacacá, y cha tonjama chë Uámana Espíritu tšëngaftange ainaniñe cháumashënguama; y nyetsca tšëngaftanga chë ndegombre soyënga šmondétatsëmbo. ²¹ Atše cbontsëbuabiamná, ndoñe chë ndegombre soyëngama ndoñe šmondétatsëmbuama, ndayá añe šmotatsëmbuama; er tšëngaftanga šmondétatsëmbo chë ndegombre soyënga y ndoñe ndegombre soyënga cánýiñe jtsemnana ndoñe yondopodénama. ²² Nda tojayana Jesús chë Bëngbe Bëtsabe Uámana Uabayaná, chë Cristo ndoñe yondmëna ca, chana jtsebošterana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiana ndoñe ntsejuabnayana cha chë Taitá bëtsemnana. ²³ Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cánýiñe mo canýacá ndoñe ntsemnana. Pero nda entsángbeñe tojayana, Cristo añe Bëngbe Bëtsabe Uaquiñá endmëna ca, chana añe chë Taitáftaca cánýiñe mo canýacá jtsemnana.

²⁴ Tšëngaftanga, chë Cristbe ústonënga šmojanóbiana orscana šmojanuena soye, tšëngaftange ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cánýiñe mo canýacá šmochántsemna. ²⁵ Y quem soye entsemna ntšamo Cristo sojëftsašbuachená: chë nyetsca tescama yomna tšabe vida jtsebmomna.

²⁶ Atše chca cbontsëbuabiamná, chë tšëngaftanga jáingñayama imojtsebošëngbiana chašmotsetatsëmbuama. ²⁷ Pero Cristo tmojanabacacá ora, Uámana Espíritu šmojanóyëngacñe, y mora tšëngaftange ainaniñe

Uámana Espíritu šmontsebmna, y ndoñe quenátsiyta ndocná más chacmotsabuátambama, er chë Uámana Espíritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntsá, ntšamo chë Uámana Espíritu tcmojabuatambacá jtsiyenëse, Crístoftaca cánÿiñe mo canÿacá šmochtsemna.

²⁸ Y mora básenga, Crístoftaca cánÿiñe mo canÿacá šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtsëuatjama, bënga chabe delante chamojtsemna ora. ²⁹ Tšëngaftanga šmontsetátšëmbo Jesucristo nÿetsca soyënguiñe tšabá amá yomnana. Chcasna, cmontsamna jtsetatšëmbuana, nÿetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnana.

3

Crístbeñe ošbuáchiyënga, Bëngbe Bëtsabe básenga

¹ Menójuabonga, ntsachetšá Bëngbe Bëtsá chë Taitá šondábabuanÿeshanama. Chabe bonshánana tša bëtscá endmënayeca, bënga šondëubuabuatma chabe básenga ca, y ndegombre bënga chca mondmená. Chë causa chë nÿe quem luarama enójuabnayënga ndoñe quenátësertana ntšamo bënga imomnana, er chënga cha ndoñe tmonjanábuatmana. ² Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemuátstatšëmbo ntšamo más chcoye bënga mochjamnana, aïñe mondëtatšëmbo, Jesucristo chaojabáisebocna ora bënga cachacá mochtsemnana, er bënga mochanjobenaye jinÿama ntšamo cha ndegombre yomncá. ³ Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnana, ntšamo cach Cristo yomncá, lempe tšabia y bacna soye ndbomná.

⁴ Pero nda bacna soye tojama, chana ntšamo Bëngbe Bëtsá tojëftsemnadacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemnadacá. ⁵ Tšëngaftanga ya šmondëtatšëmbo Jesucristo quem luaroye tojánabo bëngbe bacna soyënga jabëtsabuajuanama, y cha ni mo canÿe bacna soye ndoñe yondbomnana. ⁶ Chcasna, nda cánÿiñe mo canÿacá cháftaca nÿets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiana ndoñe tbonjosertá y ndoñe yondëtatšëmbo ntšamo cha bëtsemnana. ⁷ Atšbe básenga, ndocná chacmondaingñe: nda nÿetsca soyënguiñe tšabá tojtsama, cha canÿe tšabá mándbomna entšá jtsemnana, ntšamo Jesucristo yomncá; ⁸ pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuëtsama. Bëngbe Bëtsabe Uaquiñá nÿa quem soyama tojabo: chë Satanasbe soyënga jabëtseepochocama.

⁹ Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántsame tšabe vida, y Bëngbe Bëtsá chabe Taitá endmëna. Chiyeca cha ndoñe ntsiyenana bacna soyënga jtsamëse. ¹⁰ Corente jtsotatšëmbuana ndëmuanÿenga Bëngbe Bëtsabe básenga imomnana y ndëmuanÿenga Satanasbe básenga; ndëmuanÿéngnaca ntšamo tšabá yomncá ndoñe tmonsama o chabe

catšata ndoñe tmontsebobonshana, ndoñe ntsemnana Bëngbe Bëtsabe básenga.

Nyetscanga jtsenbobonshánana

¹¹ Quem buayenana entsemna ntšamo tšëngaftanga šmojanuena, tšëngaftanga Cristbe ústonënga šmonjanobiama orscana: nyetscanga šontsamna jtsenbobonshánama. ¹² Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aiñe; chíyeca tbojtsanóba.

¹³ Jesucristbeyeca atšbe catšátanga, ndoñe šmattsenjananaye chë nñe quem luarama enójuabnayënga cmojtsëbuayënjama. ¹⁴ Bënga mondëtatšëmbo, bënga tempo monjaninyena chë nñe quem luarama enójuabnayënga mondoyencá, y chca, Bëngbe Bëtsabiama mo obanëngcá monjamna, er bënga monjaninyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnana, y chca, mo ndegombre ainëngcá montsemna. Chca mondëtatšëmbo, er bënga bëngbe catšátangbioye mondábabuanýeshana. Nda chabe catšátbioye ndoñe tbontsebobonshana, cha cabá mo obanacá jtsiyenana. ¹⁵ Nda cachabe catšátbioye tbojtsáboyënja, cha jtsemnana mo entšanga obanayacá. Y tšëngaftanga šmondëtatšëmbo entšanga obanayá ndoñe ntsoobenana jtsiyenana, chë nyetsca tescama yomna tšabe vida chabe ainaniñe jtsebomñese.

¹⁶ Ndayá chë jtsenbobonshánana bëtsemnana mëntšá montsetátšëmbo: Jesucristo chabe derecho vida jtsobomñama cachcá tojanonýa y bëngbiama tojanóbana; cachcá bënga šontsamna jtsemnana, sempre jtseprontánana chë Jesucristbeyeca bëngbe catšátangbiama jóbanama. ¹⁷ Canya homnana tojtsebomna y catšátbioye uajabotá tbojtsonýa, pero chabiama ndoñe tbonjongmé y ndoñe tbonjuájabuache, cha ndoñe ntsoobenana Bëngbe Bëtsabiama ainaniñe bonshánana jtsebomnana. ¹⁸ Atšbe básenga, ndoñe quešnátamna nñe bëngbe catšátanga imuababuánýeshana ca jatichámuana, y nñe chë bonshánama jatóyebuambnayana; pero ndegombre šontsamna ndayánaca jamana, chca, jinýanýiyama, bënga ndegombre inýengbiama imuababuánýeshanama.

Bëngbe Bëtsabe delante natjëmbana ainánaca entšanga

¹⁹ Chcase bënga mochántsetatšëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemochátenocochinýena, Bëngbe Bëtsábioica jtsemnana merecido ndoñe mondbuájona ca tmojtsejuabná ora; y bëngbe ainana natjëmbana Bëngbe Bëtsabe delante echántsemna. ²⁰ Bënga chca bëngbe ainaniñe tmojtsejuabná ora, bënga montsobena natjëmbana ainana jtsebomnana, er Bëngbe Bëtsá corente jtsotatšëmbñana ntšamo bëngbe ainana yomnana, y cha lempe yotátšëmbo. ²¹ Atšbe bonshana entšanga, bënga ndoñe bacna soye tmonjama ca bëngbe ainaniñe tmojtsejuabnase, jtsoobenana añémoca jtsemnana y tondayama ntsauatjcá Bëngbe Bëtsabe delante jtsemnana. ²² Y cha lempe ntšamo chamojotjañcá šochanjátšataye, er bënga montsama ntšamo Bëngbe Bëtsá ibuamandacá y ndayá chabe bom-inýiñe tšabá yomncá. ²³ Y chabe mando endmëna: bënga chabe Uaquiñá Jesucristbeñe jtsošbuáchiyana, y bënga nyetscanga jtsenbobonshánana ntšamo Jesús šojëftsamëndacá. ²⁴ Ntšamo Bëngbe Bëtsá tojëftsemandacá

amënga, Bëngbe Bëtsáftaca cánÿiñe mo canÿacá jtsemnana, y cha sempre chëngaftaca cánÿiñe mo canÿacá echanjëftsemna. Y quem sóyeca bënga montsobena jtsetatšëmbuana cha bëngaftaca iuétsemnana: Uámana Espiritu bëngbe ainaniñe cháumashënguama cha tojama.

4

Chë Bëngbe Bëtsabe Espiritu y chë Cristbe uayayabe espíritu

¹ Atšbe bonshana entsanga, nÿetscanga chë Bëngbe Bëtsabe juábnaca imoyebuambná ca ichámëngbioye ndoñe šmattsayaunana; botamana šmochjuarrepára corente jtsetatšëmbuama chënga aiñe o ndoñe chë Bëngbe Bëtsabe juábnaca imóyebuambnama. Quem tempo banga Bëngbe Bëtsabe ndoñe ndegombre juabna oyebuambnayënga quem luarëjana mondajna. Chë causa tsëngaftanga cmontsamna botamana chëngbiana juarrepárana. ² Chë Bëngbe Bëtsabe Espiritu ndegombre imobomnëngbiana tsëngaftanga mëntšá šmontsobena jtsetatšëmbuana: nda tojayana Jesucristo quem luaroye aiñe entšacá tojánabo ca, cha ndegombre chë Bëngbe Bëtsabe Espiritu yojtsebmna. ³ Pero nda ndoñe chca Jesucristbiana tonjayana, cha Bëngbe Bëtsabe Espiritu ndoñe yontsebmna; inÿetsá, chana chë Cristbe contra yomnabe espíritu yojtsebmna. Tsëngaftanga šmojouena chë espíritu yochjabama; pero ndegombre cha ya quem luarentše entsemna.

⁴ Atšbe básenga, tsëngaftanga Bëngbe Bëtsábenga šmondmëna y ndoñe šmonjalesenciá chë Bëngbe Bëtsabe ndoñe ndegombre juabna oyebuambnayënga tsëngaftangbioye chacmaingñema, er chë nÿets tempo tsëngaftangbe ainaniñe vida endbomná, chë nÿe quem luarama enójuabnayëngbe ainaniñe mándayabiana más obená endmëna. ⁵ Chë Bëngbe Bëtsabe ndoñe ndegombre juabna oyebuambnayëngna chë nÿe quem luarama enójuabnayënguentshana mondmeña, chíyeca chënga nÿe quem luarentša soyëngama jtsóyebuambnayana, y chë nÿe quem luarama enójuabnayënga chënga jtsayaunanana. ⁶ Pero bënga Bëngbe Bëtsábenga mondmeña. Nda Bëngbe Bëtsábioye tbojtsabuatma, bëngbioye jtsayaunanana; pero nda Bëngbe Bëtsábioye ndoñe tbontsabuatma, cha bënga ndoñe ntsayaunanana. Chiñe bënga montsobena jtsetatšëmbuana nda chë ndegombre soyënga jóyebuambayama ama espíritu yobomnabiana, y nda chë ínÿengbioye jáingñama ama espíritu yobomnabiámna.

Chë bonshánana Bëngbe Bëtsábocana yóbocana

⁷ Atšbe bonshana entsanga, chë bonshánana Bëngbe Bëtsábocana endóbocana; chcase, bënga šontsamna nÿetscanga jtsenbobonshánana. Nda Bëngbe Bëtsábioye y chë inÿe entšángbioye tojtsababuánÿeshana, cha Bëngbe Bëtsabe uaquiñá jtsemnana y Bëngbe Bëtsábioye jtsabuatmana. ⁸ Nda ndoñe chca tontsebobonshana, cha Bëngbe Bëtsábioye ndoñe ntsabuatmana, er Bëngbe Bëtsá bonshanánaca nÿetsca soyënga jamana. ⁹ Bëngbe Bëtsá šonjinÿanÿé bënga šuababuánÿeshanana, cha chë nÿe canÿe Uaquiñá ibobomná quem luaroye jíchmuase; cha tbojanichmó, bënga chábeyeca chë nÿetsca tescama yomna tsabe vida chamotsebmna. ¹⁰ Bëngbe Bëtsabe bonshánana mëntšá endmëna: ndoñe quenátsmëna bënga Bëngbe Bëtsá imobobonshánayeca, ndayá cha bënga

šojánababuanýeshanayeca, y chabe Uaquiñá tbojanichmó, cha jóbánese, bēnga bēngbe bacna soyēngama perdonánēnga chamotsemnana.

¹¹ Atšbe bonshana entšanga, Bēngbe Bētsá chca šuababuánýeshana; chcasna, bēngnaca šontsamna nýetscanga jtsebobobonshánana. ¹² Ndocná ndocna te Bēngbe Bētsábioye tbonjinýe. Bēnga nýetscanga tmojtsebobobonshánese, Bēngbe Bētsá nýets tempo bēngaftaca echántsemna, y chabe bonshánana puerta bētsá bēngbeñe echántsemna. ¹³ Bēnga mēntšá montsobena ndegombre jtsetatšēmbuana bēnga Bēngbe Bētsáftaca imomnana y cha bēngaftaca: cha tonjanma chabe Espiritu bēngbe ainaniñe cháumashēnguama. ¹⁴ Y cach bēnga fsēnjinye y entšanga fsēntsētsētná, chē Taitá chabe Uaquiñá tbojichmoma, quem luarentša entšanga jabátsebacama. ¹⁵ Ndánaca tojayana Jesús Bēngbe Bētsabe Uaquiñá yomna ca, cha Bēngbe Bētsáftaca cánýiñe echántsemna y Bēngbe Bētsánaca sempre cháftaca cánýiñe mo canýacá.

¹⁶ Chcase bēnga montsetátšēmbu y montsošbuaché ndegombre Bēngbe Bētsá bēnga šuababuánýeshanama. Bēngbe Bētsá nýetsca soyēnga bonshánanaca jamana y nda Bēngbe Bētsá y chē inýe entšanga sempre tojtsababuánýeshana, cha Bēngbe Bētsáftaca cánýiñe mo canýacá jtsebnana y Bēngbe Bētsánaca sempre cháftaca cánýiñe mo canýacá. ¹⁷ Chca, Bēngbe Bētsabe bonshánana puerta bētsá bēngbeñe echántsemna, bēnga bēts añémoca y tondayama ntsauatjca chamotsemnana, chē tšabá o ndoñe tšabá tmonjamama entšangbiama jayanama Cristo yochjésabo orscama; er bēnga Jesucristoftaca cánýiñe mo canýacá jtsemnēse, quem luarentše mondmēna ntšamo Jesucristo endmēncá. ¹⁸ Nda Bēngbe Bētsá y chē inýe entšanga tojtsababuánýeshana, tondayama ntsauatjana; bēnga corente tmojtsebobonshana ora, ndoñe ntsopodénana uatjana jtsebonnana. Canýe entšá tojtsauatja ora, jtsebnana mo chabe castigo ya cuafjobojatšecá. Chca, nda uatjana tojtsebonna, Bēngbe Bētsábioye y chē inýe entšanga cha ndoñe corente yondábabuanýeshana, ntšamo Bēngbe Bētsá bēnga šuababuanýeshancá.

¹⁹ Natsana Bēngbe Bētsá šojánababuanýeshana, y chíyeca bēnga, cha y chē inýe entšanga imuababuánýeshana. ²⁰ Nda tojayana: “Atše Bēngbe Bētsábioye sēndbobonshana ca”, pero cachca ora cachabe catšátbioye tbojtsábboyēnja, cha canýe bostero jtsebnana. Canýa aiñe jtsoebenana chabe catšata jinýama; y cha chē catšátbioye ndoñe tbontsebobonshana, ndegombre cha Bēngbe Bētsábioye ndoñe bondbobonshana, ndábioye jinýama ndoñe ntsoebenana. ²¹ Y bēnga quem mando chábentšana tmonjanóyēngacñe: nda Bēngbe Bētsábioye tbojtsebobonshana, cachabe catšátbioynaca chabotsebobonshana ca.

5

Chē Jesucristbeñe ošbuachiyá endobena Satanasbe soyēnga jayēnjanana

¹ Nda tojtsobuaché Jesús chē Uámama Uabuayaná, chē Cristo yomnana, cha Bēngbe Bētsabe uaquiñá jtsebnana; y nda canýe taitábioye tbojtsebobonshana, chē taitabe uaquiñábioynaca cha jtsebobonshánana. ² Bēnga Bēngbe Bētsá tmojtsebobonshana y ntšamo cha tojtsemandacá tmojtsamēse, bēnga ndegombre mochántsetatšēmbu, chē Bēngbe Bētsabe basengbioynaca bēnga imuababuánýeshanama. ³ Bēnga Bēngbe Bētsábioye imobobonshánama quem soyiñe jtsinýnana: bēnga ntšamo Bēngbe Bētsá tomandacá tmojtsamēse. Y ndayá Bēngbe Bētsá yomandacá ndoñe yapa

totcá quenátsmëna bënga chamotsamama. ⁴ Nda Bëngbe Bëtsabe uaquiñá tomna, chana jáyëñjanana quem luarentša entsanga y soyënga ntšamo Satanás yomandacá. Quem luarentša entsanga y soyënga ntšamo Satanás yomandacá, Crístbeñe bënga imošbuachéyeca montsobena bënga jáyëñjanana. ⁵ Nye nda, Jesús Bëngbe Bëtsabe Uaquiñá yomnama tojtsošbuaché, cha jtsobenana chë entsanga y soyënga ntšamo Satanás yomandacá jáyëñjanana; ndocná más.

Bëngbe Bëtsá tojinjanýe ntšamo chabe Uaquiñabiama ndegombre yomncá

⁶ Cach Jesucristo endmëna nda quem luaroye tojánabo y mëntsá tojanenonýinýe: býyesheca cha tmojanabayé ora, y buiñe juabuáshanëse cha tonjanóbana ora. Cha ndoñe tonjanenonýinýe nye býyesheca, ndayá býyesheca y buiñeca. Cach Uámana Espiritu entsobena jayanana chca ndegombre bëtsemnama Jesusbiamá, er chë Espiritu endmëna chë sempre ndegombre oyebuambnayá. ⁷ Endmëna unga soyënga, ndayá iuinýanýná ntšamo ndegombre yomncá Jesusbiamá: ⁸ Espiritu, býyeshe y buiñe; y chë unga soyënga lempe cachcá Jesusbiamá jtsinýanýnayana. ⁹ Bënga mondbëtsejuabnaye, ndayá entsanga tmojinýe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaquiñabiama iuichamcá. ¹⁰ Nda Bëngbe Bëtsabe Uaquiñábeñe tojtsošbuaché, cha chca nyets tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá canýe bostero cuaftsemncá, er chë Bëngbe Bëtsá chabe Uaquiñabiama tojayana soyama cha jtsejuabnayana ndoñe ndegombre yontsemna ca. ¹¹ Ntšamo Bëngbe Bëtsá chabe Uaquiñabiama tojayancá mëntsá entsemna: Bëngbe Bëtsá bëngbiamá tojama chë nyetsca tescama yomna tšabe vida chamotsebomnama; y quem vida chabe Uaquiñábeñe entsemna. ¹² Nda Bëngbe Bëtsabe Uaquiñáftaca cánýiñe mo canýacá tojtsemna, cha chë tšabe vídnaca jtsebmomnana; pero nda chë Bëngbe Bëtsabe Uaquiñáftaca cánýiñe mo canýacá ndoñe tontsemna, cha chë nyetsca tescama yomna tšabe vida ndoñe ntsebmomnana ca.

Inýe soyëngama jábuayenama y jtadiósoftanama

¹³ Tšëngaftanga, chë Bëngbe Bëtsabe Uaquiñábeñe šmošbuachéngbioye quem soyënga cbontsëbuabiamná, ndegombre chašmotsetatšëmbuama chë nyetsca tescama yomna tšabe vida šmojtsebmomnama.

¹⁴ Bënga bëts añémoca y ndauatjácá Bëngbe Bëtsabe delante mondmëna, er bënga mondétatšëmbo, nderado ntšamo chaotsemnana cha tojtsebošcá bënga tmojotjañe ora, cha bënga šnétsayaunanama. ¹⁵ Nderado ndayá chca Bëngbe Bëtsábioye tmojtsotjanañe ora, cha bënga joyau-nayana; bënga mondétatšëmbo chca ndegombre yomnama, y chca, bëngnaca montsetatšëmbo, ndayánaca chábioye bënga chamojotjañcá cha šochjátšatayama.

¹⁶ Nda cachabe catšátbioye tbojinýe canýe bacna soye tojtsamama, pero chë bacna soye tojamentšana cha perdonaná jtsemnana cabá tojt-sopodénëse, chábioye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata chë nyetsca tescama yomna tšabe vida chaotsebomnama, cha chca tojamentšana perdonaná jtsemnana cabá tojt-sopodénëse. Pero canýe bacna soye endmëna, y chca tojamama canýa

ndoñe ntsobenana perdonaná jtsemnana, y chca, cha jabocnana canya nyetsca tescama castigana chaotsemnana, y atše ndoñe quetsátichamo chē bacna soyama yojtsemna Bēngbe Bētsá jtseimpadánana chaboperdonama ca. ¹⁷ Nda tojtsama ntšamo Bēngbe Bētsá ndoñe yondēmandacá, cha bacna soye jtsamana; pero nyetsca bacna soyēnga ntšamo canya tojtsamcá, ndoñe ntjamana cha ndēperdonaná chaotsemnana.

¹⁸ Bēnga mondētatsēmo, nda Bēngbe Bētsábioye mo taitacá tbojtse-bomna, cha ndoñe ntsiyenana bacna soyēnga jtsamēse, er chē Bēngbe Bētsábentšana Onyñaná chábioye jtsinyenana, y Satanás, chē nyetsca bacna soyēnga amēndayá, tondaye ntsobenana chábioye jabórlana. ¹⁹ Bēnga mondētatsēmo, bēnga chē Crístbeñe ošbuáchiyēnga Bēngbe Bētsábengana imomnana, y chē quem luarentša inye entšanga Satanasbe cucuatšiñe imomnana. ²⁰ Bēngnaca mondētatsēmo Bēngbe Bētsabe Uaquiñá tojabama, y cha iuama bēnga osertánana chamotse-bomnana, chē ndegombre Bēngbe Bētsá yomná jtsabuatmama. Bēnga chē ndegombráftaca cányiñe mo canyáca mondmēna, bēnga chabe Uaquiñáftaca cányiñe bētsēmnyeca. Cha chē ndegombre Bēngbe Bētsá endmēna, y nda chē nyetsca tescama yomna tšabe vida entšanga chamotse-bomnana iuamá. ²¹ Atšbe básenga, ndoñe šmattsadorana cach entšangbe pormana soyēnga, chē ndayama ínýenga mondbétsejuabnaye diosēnga yomna ca.

2 San Juan

Jtsiyenana ndegombre soyëngaca y nyëtscanga jtsenbobonshánëse

¹ Atše chë bëtsëjema, quem tsbuanácha sëntsabiamná, chë uámana mamá, chë Bëngbe Bëtsabe bocacaná y chabe basengbiámnaca, ndëmuanýenga atše ndegombre sëndábabuanýeshana. Y ndoñe nyë atše chënga quetsátababuanýeshana, ndayá nyëtscanga chë Bëngbe Bëtsabe ndegombre soyënga uabuátmëngaca. ² Atše cbontsababuanýeshana, chë ndegombre soyënga bëngbe ainaniñe mondbómnyeyca, y chë soyënga bëngbe ainaniñe sempre echántsemna.

³ Atše sëntseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tšabe bendicionënga chaotsemnama, chata tsëngaftangbiöye chácmalastemama, y chaboma tsëngaftangbe ainaniñe tšabe ebionana chašmotsebonnama. Quem soyënga, bënga chë ndegombre soyënga uabuátmënga y nyëtscanga mondenbobonshánëngaftaca echántsemna.

⁴ Puerte sënjoyejuá, er atše acbe básenguentše báseftanga sënjánýena chë ndegombre soyënga ntšamo Bëngbe Bëtsá chë Taitá šojamëndacá jtsamëse. ⁵ Y mora, uámana mamá, cbontseimpadana Diosmanda nyëtscanga chamotsenbobonshana. Chë cbontsëbuabiamná soye ndoñe canýe tsëm mando quenátsmëna, ndayá cach Cristbe ústonënga tmonjanobiama ora tmonjanóyëngacñe mando. ⁶ Bënga, Bëngbe Bëtsá y chë inýe entšanga imababuanýeshanama jtsinýnana, bënga ntšamo Bëngbe Bëtsá tojamandacá jtsamëse tmojtsiyenama. Y chabe mando, ntšamo Cristbe ústonënga šmonjanobiama ora šmojanuencá, mëntsá endmëna: jtsiyenana Bëngbe Bëtsá y chë inýe entšanga jtsababuánýeshanëse.

Chë entšángbiöye áingñayënga

⁷ Quem luarëjana banga entšángbiöye áingñayënga mondayna, y chënga jtsejuabnayana Jesucristo quem luaroye ndoñe mo canýe ndegombre entšacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. ⁸ Chëngbiama cuedado šmochtsebonna. Ndoñe chcase, tsëngaftanga ndoñe quešmochátsbomna chë Cristbiama cach tsëngaftangbe trabajuentsana tojóbocna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbiöye jatšatayama yojtsebošcá.

⁹ Ndánaca chë Cristo tojanabuatambá soyëngama inýe soyënga tojatabuatambá, cha ndoñe Bëngbe Bëtsáftaca cánýiñe mo canýacá ntsemnana; pero nda sempre ntšamo Cristo tojanbuatëmbacá tojtsabuatambá, cha aíñe chë Taitáftaca y chabe Uaquiñáftaca cánýiñe mo canýacá jtsemnana. ¹⁰ Ndánaca tsëngaftangbiöye tojá jabuátambama, pero ndoñe ndayá Cristo tojanabuatambacá tojtsebuatëmbase, cha ndoñe šmatjofja, ni mo šmatjachuaye. ¹¹ Er nda chábíoye tbojachuase, chábíoye jtsajabuáchanana chë bacna soye chaomama.

Jtadiósoftanama

¹² Atše ba soyënga sëntsebmna tšëngaftanga jáuyanama, pero ndoñe quetsátsboše tsbuanáchañe jubuábiamama. Atše sëntsejuabná aíñe chjobenaye tšëngaftangbioye jama, jobenayama nyetscángaftaca jencuéntama, chca, bëngbe oyejuayana puerte bëtscá chaotsemnama.

¹³ Crístbeyeca acbe quenata, chë Bëngbe Bëtsabe bocacaná, chabe básenga cmontsacheuaná.

3 San Juan

Juan Gaybiana puerte tšabá tojanoyebuambá

¹ Atše chë bëtsëjema, quem tsbuanácha atšbe bonshana amigo Gaybiana sentsabiamná. Chábioye atše ndegombre sëndbobonshana.

² Atšbe bonshaná y Crístbeyeca atšbe catšata, Bëngbe Bëtsá sëntseimpadana aca tšabia nyetsca soyënguiñe chacotsemnana y salud bomnánaca. Atše sëntsetatšëmbo aca ainaniñe tšabá cotsomñana, Bëngbe Bëtsabiana bëtsá tšabe juabnënga chentše jtsebonnëse. ³ Er báseftanga Jesucristbeñe ošbuáchiyënga átšbioye tmonjabo y šmonjacentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtsá sëntsoyejuá. ⁴ Tondaye jamana atše nyetsá oyejuayá chaitsemnana, ndayá nye jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

⁵ Atšbe bonshaná, aca contsama ntšamo Jesucristo tonjanbuatëmbacá, aca chë ínÿenga Jesucristbeñe ošbuáchiyënga jujabuáchama ndayánaca tcojama ora, y masna, chë ínÿe luaroquëngocana ashjajnëngbiana ndayánaca tcojtsama ora. ⁶ Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbenenefjnëngbe delante, aca tša chënga icuababuánÿeshanama. Diosmanda, ntšamo tojtsëjabortcá chënga cochjújabuache, chca, chënga chamobená tšabá ínÿe luarëngoye játama. Chënga mondmëna Bëngbe Bëtsabiana trabájayënga; chcasna, chëngaftaca cochjama ntšamo chënga chama merecido imobuajoncá. ⁷ Chca cochjama, er chënga chëngbe pueblënguentšana tmojëftsebobcana Jesucristbe soyëngama entšángbioye jábuayenama, y chënga chama tondaye crocénana quematóyëngacañe chë Jesucristbeñe ndošbuáchiyëngbe cucuatšentšana. ⁸ Chíyeca bënga šontsamna chëngbiana jtsantješnana y jtsëjabuáchanana, chca, bënga chamobená cánÿiñe chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

Diótrefes ndoñe tšabá tonjanma; Demetrio aínë

⁹ Atše canÿe tsbuanácha chë Jesucristbeñe ošbuáchiyënga chentše mondbenenefjnëngbioye sënjubuábiana, pero Diótrefes ndoñe yontsuenana ntšamo atše sentsichamcá, er cha yojtseboše chë ínÿengbioye nye jtsamëndayana. ¹⁰ Chíyeca atše choye chajjá ora, ndayá cha yojtsamama chanjauácacana. Cha sempre bacá yojtsoínÿana y uayátsenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe puebloye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnana imnétsenefjuana luarentšana yojtsatëbuacana.

¹¹ Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cochtsama. Nda ntšamo tšabá yomncá tojtsama, cha Bëngbe Bëtsábia jtsemnana; pero nda ndoñe chca tontsama, cha cabá ndoñe yondëtatšëmbo ntšamo Bëngbe Bëtsá yonnama.

¹² Jesucristbeñe ošbuáchiyënga nÿetscanga tšabe soyënga Demetriëbiamá montsichamo, y Jesucristbe ndegombre soyënga entsinÿna ntšamo cha soyënga yojtsiyenama. Bëgnaca chabiamá tšabá fsëntsichamo, y aca condétatšëmbo ntšamo bënga fsëntsichamcá, ndegombre yomnama.

Jadióšoftanama

¹³ Atše ba soyënga sëntsebmna aca jauyanama, pero ndoñe quetsátsboše tsbuanáchañe juábobemana. ¹⁴ Atše sëntsejuabná betscó chjobenaye ácbioye jama jauatsëtsayama y jobenayana ácaftaca jencuéntama.

¹⁵ Puerte tšabe ebionana ainaniñe chacotsebmna. Quem luarentša amiguënga cmontsechuaná. Diosmanda, bëngbe amiguëngbioye chocha cada ona cochjácheuaye.

San Judas

Jacheuayama

¹ Atše Judas, Jesucristbe oservená y Santiagbe catšata, quem tsbuanácha sentsabiamná, ndēmuanýengbioye Běngbe Bětsá, chě Taitá chabe entšanga chamotsemnana tojáchembo, chabe bonsháněnga, y ndēmuanýenga Jesucristo endányena. ² Atše, Běngbe Bětsá sěntseimpadana, cha puerte lastemado tšěngaftangaftaca chaotsemnana, cha chaoma tšěngaftanga ainaniñe tšabe ebionana chašmotsebomnana, y chaoma tšěngaftanga cada te más Běngbe Bětsábioye y ínýengbioye chašmotsababuánýeshanama.

Chě ndoñe ndegombre soyěnga buátěmbayěnga

³ Atšbe bonsháněnga, atše tša sěndboše tšěngaftanga jubuábiamama, ntšamo Jesucristo běngbe bacna soyěnguentšana šojátsebacama, tšěngaftangbioye y běngbioynaca; pero atše sěntsejuabná atše šojtsemna tšěngaftanga jubuábiamana, jáimpadama bětscá chašmotsama Jesucristbe soyěngama, chě mondošbuaché soyěngama jenujéřzama, ndoñe chaondopochocama. Chě soyěnga Běngbe Bětsá chabe entšanga canýe tojatšatá, y nýetsca tescama. ⁴ Er tšěngaftanga ntšamo ínýenga imomnana ntjatatšěmboncá, básefta entšanga tšěngaftangaftaca tmojenutaná. Chěnga mondměna Běngbe Bětsá ndoñe adórayěnga, y chě buátěmbana soyěnga tmojtsetrocá. Běngbe Bětsá běngbe tšabiamama juabna yobómnyayeca, chěnga jtsichámuana tšěngaftanga šmojtšobena nýetsca bacna soyěnga jtsaměse jtsiyenana, jenomándama ntsobencá ca; y chca, chěnga montseboše jinýanýiyama, Jesucristo ndoñe běngbe canýe Nduiño y Běngbe Utabná chěngbiama yondměna ca. Y bayté, Běngbe Bětsabe uabemana palabrenguiñe tmojanábema, chě chca aměngna jtsamnana nýetsca tescama castigáněnga jtsemnana ca.

⁵ Masque tšěngaftanga lempe quem soyama ya šmondětatsěmbo, atše sěntseboše jamama tšěngaftanga chašmotsenajuabná, Běngbe Utabná, Israeloca entšanga Egiptoquěngbe cucuatšěntšana tojanatsebacá chentšana, cachá chě Israeloquěnguentše chábeñe ndošbuáchiyěnga tojánapochocama; ⁶ y cachcá chě angelěngbiámnaca, ndēmuanýenga ndoñe tmonjanoquedá chě tmojanóyěngacñe mándoca, pero añe chěngbe luarěnga cachcá imojěftsonýaye. Chě causa, Běngbe Bětsá tojanmandá cadenějuangaca nýetsca tescama chamoquedama, chě más ibetiñe, tondaye binýniñe luarentše, chěnga bacna soyěnga tmojanmama nýetsca tescama castigáněnga jtsemnana yojtsamna ca, cha jayanama tescama. ⁷ Y chě Sodoma y Gomorra, y chě béconana pueblěnguentše entšangbiámnaca; chěngnaca cach angelěngcá ndoñe tšabá monjánama, y nýetsca bacna soyěnga imojánama boyabása o shembásaftaca, y ínýengaftaca y bayěngaftácnaca. Chíyeca chěnga tmonjansufrí chě iñeshca castigo nýetsca tescama, y chca, nýetsca entšangbioye tmojaninýanýé, ndayá yochjopása chě chca Běngbe Bětsábioye ndoñe tshotsobedecenáftaca.

⁸ Cachcá, chě ndoñe ndegombre soyěnga buátěmbayěngnaca chě mo otjenayoquēcá tmojáninýe soyěngama jtsichámuana, y chě

causa cachëngbe cuerpëngama bacna soyënga jtsamana, chë mando bomnëngbiaye jtsébátenana, y chë espíritënga obenana bomnëngbiana ndoñe tšabá ntsichámuana, mo chëngbiaye cuafjoyanguangcá. ⁹ Pero ni mo chë angelëngbe mandayá Miguel quem buátëmbayëngcá tojanma. Cha chë diábloftaca ibojentsjaná ora, Moisesbe cuerpama cháftaca jabuachana ibojanenatsëtsnaye ora, ndoñe tonjanenñemó jayanama chë diablëbiana podesca soyënga, jóyenguanguse, ndayá nÿe mëntšá ibojayana: “Bëngbe Utabná chacmácacana ca.” ¹⁰ Pero quem buátëmbayëngna, chë ndoñe tontsësertana soyëngama podesca jtsichámuana, y ntšamo tojtsebionama y tmojtsebošama, nÿe mo bayëngcá, chë soyëngama tšabá josértama juabna ndbomnënga, ndayá chentšana tmojtsësertancá jtsamëse, jamana chënga nÿetsca tescama castigánënga jtsemnana chamotsajnama.

¹¹ ¡Tša lastema quem buátëmbayëngbiana! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catšátbiaye tbojanóba. Chënga crocénana juácánama, mo Balaam yojanamcá, Bëngbe Bëtsabe tšabe benachentšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbiaye ndoñe ntsayaunanana, ntšamo Coré, Moisés y Aarónbiaye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmá.

¹² Chëngna tšëngaftangbiana jtsemnana mo canÿe ndëtsenga luar-entše canÿe bëts tsengacá, tšëngaftangaftaca tmojenutaná ora, cánÿiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguiñe chënga oyejuayënga jtsemnana, nÿe chënga tšabá jt-somñama soyënga jtsamëse, y chënga chama ndoñe ntsëuatjana. Chënga nÿe cachëngbiana jtsantješnana, inÿëngbiana ndoñe. Chënga tša jt-sašebuachiyana, pero chëngbe buátëmbana soyënga inÿëngbiana ton-dayama ntoservénana; y chca, chënga jtsemnana mo chë tša jënÿá ora jantšetëshëngcá, tondaye ntjuaftena, bínÿiaca ochnejuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa. ¹³ Chënga nÿets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinÿanÿnayana chënga chë bacna juabnënga imobomnana. Chca, chënga jtsemnana mo mar béjayoca oleshëngcá, chentšana espumushënga bëtscá tsenguësheca jtsóbocanana. Y cabana, chënga jtsemnana mo estrellëngcá chëtemëngbe benachentšana tmojtsebocna, y chentšana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binÿiñe luarentše nÿetsca tescama chënga chamoquedama.

¹⁴ Adánbentšana chnënguana pamillo entšanga tmojánachneña chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiana, mëntšá tojánayana ora: “Smochjinÿe, Bëngbe Utabná echanjabo bëtscá uaranga angelëngaftaca, ¹⁵ nÿetsca entšangbiana jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábiaye ndoñe adórayënga nÿetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra

tmojanama, chënga, chë puerte bacna soyënga amënga ca” — tojánayana. ¹⁶ Chënga mondmëna chë tšabe soyëngama nÿets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nÿe cachënga tšabá jtsomñama, y puerte botamana palabrënga jtsichámuana uámanënga jtsenobiamnayëse, y tšabe soyënga ínÿengbioye jtsëtsënayana, chënga tšabá joquédama y chëngbentšana ndayánaca josháchiñama.

Ošbuáchiyënga jábuayenama

¹⁷ Pero tšëngaftanga, atšbe bonshánëngna, šmochtsenójuabnaye ndayá chë Bëngbe Utabná Jesucristbe ichmónënga tmojanëyanama, mëntšá: ¹⁸ “Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nÿe cachënga tšabá jtsomñama bacna juabnéngaca, y tšëngaftanga cmochantsébuayajuana ca.” ¹⁹ Chënga mondmëna chë ošbuáchiyënguentšë nÿetscanga ndoñe cachcá chamondëtsejuabnama amënga; chënga mondoyena jtsamëse cachëngbe bacna juabnéngaca y ndoñe quemátsbomna Uámana Espíritu, chëngbe ainaniñe chaotsemándama.

²⁰ Pero tšëngaftanga, atšbe bonshánënga, nÿets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábiocana endóbcana ošbuáchiyana, y Bëngbe Bëtsáftaca šmochjencuénta, ntšamo Uámana Espíritu tcmojtsamëndacá. ²¹ Yejuana šmochtsantješna tšëngaftanga nÿets tempo chašmotsiyenama, Bëngbe Bëtsá cmababuánÿeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nÿetsca tescama yomna tšabe vida chašmotsebomnama.

²² Chë inÿe ora aiñe y inÿe ora ndoñe Jesucristbeñe ošbuáchiyana bomnënga šmochtsalastemana. ²³ Bëtscá šmochtsama, báseftanga chë uabouana castigüentšana atsebácanënga chamotsemnana, mo chënga inšeshentšana cauftëbuacancá. Inÿengbiamna chacmotsangmena, pero cuedado šmochtsebomna, chënga chašmojtsëjabuachana ora, ntšamo chënga bacna soyënga tmojtsamcá ndoñe chašmondëtsamama; y chë bacna soyënga ntšamo chënga tmojtsiyena jtsamëse, chëngbe bacna juabnéngaca, nÿa tondaye chacmondëtsogusetana.

Judas, Bëngbe Bëtsá jëtschuayama

²⁴⁻²⁵ Chë nÿe canÿe Bëngbe Bëtsá, bëngbe Atsebacayá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canÿe puerte uamaná y obená bëtsemnana chaojinÿanÿé ora. Bëngbe Utabná Jesucristbeyeca, nÿetscanga Bëngbe Bëtsá chamotsatschuaná; y cha puerte bëtsá chauesomñe, nÿets obenana bomná y nÿets mando bomná, nÿets tempscana, tempo, mora y nÿetsca tescama. Chca chaotsemna.

Apocalipsis

Ndayá quem librésañe yomna

¹ Quemuentse entsábemana ndayá Bëngbe Bëtsá Jesucristbioye tbojaninÿinÿé, chë Bëngbe Bëtsabe oservénënga cha cháuinÿanÿema, ndayá jopásama yojtsobecuama chënga chamotsetatšëmbuama. Jesucristo chama chabe ángel tbojichmó, chë soyëngama atše, Juan, chë Jesucristbe oservenábioye chašuinÿinÿema. ² Y atše sënjayana lempe ntšamo ndegombre yomncá lempe chë tijinÿe soyëngama, chë Bëngbe Bëtsabe buayenana soyëngama y chë Jesucristo šonjanianana ndegombre bëtsemna soyëngama.

³ Oyejuayá nda tojtsalía, y oyejuayënga ndëmuanÿenga botamana tmojt-suenana quem yochjopása soyëngama, chë muentše entsabemancá ndegombre tmojóyeunanga, er chca jopasa tempo entsobeco.

Asia luaroca ošbuachiyëngcá eneffjuanënga jacheuayama

⁴ Atše Juan, sentsabiamná chë Asia luaroca canÿsëftañe ošbuachiyëngcá eneffjuanëngbiamna. Atše, Bëngbe Bëtsá sëntseimpadana, tšabe bendicionënga chábiocana chašmosháchiñe y ainaniñe puerte tšabe ebionana chašmotsebomna, Bëngbe Bëtsábentšana, chë canÿsëfta espíritëngbentšana y Jesucristbentšana. Bëngbe Bëtsá, chë mora endmëná, enjamná y sempre echantsemná; chë canÿsëfta espíritënga, chabe uámana puesto natsanoica mondmëñënga; ⁵⁻⁶ y Jesucristo, chë ntšamo Bëngbe Bëtsabiamna yotatšëmbcá ndegombre oyebuambnayá, chë natsaná ndabiamna Bëngbe Bëtsá tojama obanënguentsana cháuatayenana, y nÿetsca quem luarentša mandadëngbe amëndayá. Cristo šondábabuanÿeshana y bëngbe bacna soyënguentsana šojatsebácá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnana, y Bëngbe Bëtsá chabe Taitá mo bachnangcá chamotseservënama. ¡Nÿetscanga nÿets tempo chamotsinÿanÿná Cristo puerte bëtsá y uamaná bëtsemnana y obenana nÿetsca tescama yobomnana! Chca chaotsemna.

⁷ Mouenënga. Cristo jantšetëshënguifne echanjésabo.

Chábioye nÿetscanga mochanjinÿe,
chë tmonjancrucificánacá;

y quem luarentša nÿetsca entšanga puerte ngmëñaca mochántsemna
y mochantsošachna chábeyeca.

Ndegombre, chca chaotsemna.

⁸ “Atše sëndmëna chë nÿetsca soyënga bojatšayá y pochocayá ca,” Bëngbe Utabná Bëngbe Bëtsá tojayana. Cha chë sempre endmëná, enjamná, nÿets tempo echantsemná, chë nÿets obenana bomná.

Juan mo otjenayoquëcá Cristbiamna tojáninÿe

⁹ Atše Juan, Jesucristbeyeca tšëngaftangbe catšata, cháftaca cánÿiñe mo canÿacá bëtsemnana, cach tšëngaftangcá sëndëpadecena, tšëngaftangcá chanjëftsashjache Bëngbe Bëtsabe amëndayoye jamashënguama, y tšëngaftangcá Bëngbe Bëtsabeñe jtsobátmanëse, uantado sëndmëna chë padecena soyënguifne. Bëngbe Bëtsabe palabra sënjanabuayinana y Jesusbiamna ntšamo ndegombre endmëncá sënjanóyeuambnana,

atse šmonjetsanětsena mar bėjayoca canye fshantsentše, Patmos ca uabáinoca. ¹⁰ Y tonjanopasá, canye tmengo, chě ošbuáchiyěnga Běngbe Utabnábioye cányiñe jětschuayama te, atse sěnjanoquedá chě Uámana Espíritbeyeca corente mandaná, mo otjenayoquécá soyěnga sěnjétsonyaye, y atšbe stěsioica canye jabuache oyebuambnayana sěnjanuena, mo canye trompetěfjua cuafjuajatětcá; ¹¹ měntsá šontsanatsětsná: “Canye librěšañe mábema lempe ntšamo contsonyacă y cochjuíchmua chě Asia luaroca canyśěftañe ošbuachiyěngcá enefjuaněngbioye: Efeso, Esmirna, Pérgamo, Tiatira, Sardis, Filadelfia y Laodiceoquěngbioye ca.”

¹² Sěnjanočuértana jinýama nda chca šojtsanatsětsná, y chca sěnjanna ora, sěnjáninýe canyśěfta castellano candelersěngca; ¹³ y chě canyśěfta castellano candelersěnguiñe tsěntsaca canya sěnjáninýe, mo entśacá inýná, canye bēn entśayá uichětjoná, y cochóntscoca canye těntśa castellano uasanějaca. ¹⁴ Chabe stjěnashana uafjantsěsha, puerta uafjantsěsha mo canye oveshabe boboshěshacá, y chabe fśnēbenga mo iñeshcá enjětsinýna. ¹⁵ Chabe shecuatsěnga enjětsebuashinýinýana mo bronścá, ndaybē natsana iñějana tcojuchněngo enabě chaotsemnana y chentśana entśėjuaca becá tcojajojó corente chaotsebuashinýinýana; y chabe oyebuambnayana jabuache enjětsenana mo bětścá bėjaye cuafsebuachquēcancá. ¹⁶ Chabe catšbioica cucuatśiñe enjětsatbēna canyśěfta estrellěnga, y chabe uayoicana enjětsobocana canye espadēja, nyets utocajana puerta efśánēja, y chabe jubiá tša enjětsebuashinýinýana, mo chě shinýe corente, lempe ntšamo tojobenacá tojtsebuashinýinýana orcá.

¹⁷ Cha sěnjáninýe ora, chabe shecuatsentše mo obanacá sěnjánshajaye. Pero cha, chabe catšbioica cucuatśe átšbeñe jajájuase, šonjaniyana: “Ndoñe matauatjana; atše sěndmēna chě nyetsca soyěnga bojatsayá y pochocayá, ¹⁸ chě sempre vida bomná. Atše obaná sěnjanna, pero mora nyetsca tescama vida sěntsebomna. Atše obenana sěndbomna, y chě obenánaca entśángbioye ndoñe quenátamna infernoca nyetsca tescama castigáněnga jtsemnana, mo nyets tempo cuafsobancá. ¹⁹ Ntšamo tconjinýcá mábema, chě quem tempo endmēna soyěngama y chě más chcoye echántsemna soyěngama. ²⁰ Měntsá endmēna chě atšbe catšbioica cucuatśiñe tconinýe canyśěfta estrellěnga y chě canyśěfta castellano candelersěngaca: chě canyśěfta estrellěnga montsinýinýná chě canyśěftañe ošbuachiyěngcá enefjuaněngbeñe chamotsemándama uámana ichmóněnga, y chě canyśěfta candelersěngna chě canyśěftañe ošbuachiyěngcá enefjuaněnga.”

2

Efesoca ošbuachiyěngcá enefjuaněnga jábuayenama

¹ Měntsánaca cha šonjaniyana:

“Měntsá mabobema chě Efesoca ošbuachiyěngcá enefjuaněngbeñe chaotsemándama uámana ichmonábioye:

Měntsá entsichamo chě chabe catšbioica cucuatśiñe canyśěfta estrellěnga entsatbēná y chě canyśěfta castellano candelersěngca luarějana entsaná: ² Atše lempe sěndětatsěmbo ntšamo tšěngaftanga šmoyenana; atše corente sěndětatsěmbo tšěngaftanga jabuache šmotrabájama, y ntšamo tšěngaftanga Běngbe Bětśábeñe jtsobátmaněse šmnětsauantana padecena soyěnguiñe šmojtsemna ora. Y átśnaca sěndětatsěmbo tšěngaftanga ndoñe šmontsobena jtsěuantánana ntšamo

bacna entšanga tmojtsamcá. Atšnaca sëndétatšëmbo tšëngaftanga yejuana šmojarrepará y becá šmojenojuabó jinýama chë Jesucristbe ichmónënga imomna ca tmojtsichamëngbiama; pero ndegombre chënga ndoñe chca quemátsmëna; y chca šmojámayeca, tšëngaftanga mora šmontsetátšëmbo chënga bosterënga imomnama. ³ Padecena soyënguiñe becá šmojoboyá y chca ora, Bëngbe Bëtsábeñe šmobátmana. Chë soyënguiñe šmojasufrí, tšëngaftanga atše šmoservënana; y tšëngaftanga chca šmondëserveda, ainaniñe añemo jtsebomnama ntjajbanacá.

⁴ Pero canýe soye sëntsebomna tšëngaftangbe contra jayanama: Tšëngaftanga mora ya ndoñe cachca bonshánana quešmátsbomna ni atšbiama ni nýetsca entšangbiama, ntšamo átšbeñe jtsošbuáchiyama šmonjanbojatsé orcá. ⁵ Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcase, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelereše chabe puestentsana cuaftsejuanacá. Chca chanjama, tšëngaftanga juabnayana ndoñe chašmonjatrocace. ⁶ Pero tšëngaftangbe pavor quem tšabe soye šmontsebomna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

⁷ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojsétsétsnacá. Chë padecena soyënguentšana tšabá chamojábocana mo ayëñjanayëngcá, chëngbiama chanjama chë nýetsca tescama yomna tšabe vida chamotsebomnama, y chca chënga mochántsemna mo chë nýetsca tescama yomna tšabe vida jtsebomnama betiyeshentsana cuaftsesacá, chë entšanga sempre oyejuayënga mondbetsemnoca ca” —cha šonjaniyana.

Esmirnoca ošbuachiyëngcá enefjuanënga jábuayenama

⁸ Mëntsánaca cha šonjaniyana: “Esmirna bëts pueblentše ošbuachiyëngcá enefjuanëngbeñe chaotsemándama uamana ichmonábioynaca mëntsá mabobema:

Mëntsá entsichamo chë nýetsca soyënga bojatsayá y pochocayá, chë tonjanobaná y ndabiana Bëngbe Bëtsá tonjama cháuatayenama: ⁹ Atše sëndétatšëmbo tšëngaftanga tša jabuache šmojasufrima y ndbomnjémënga šmomnama, pero ndegombre Bëngbe Bëtsábiocana bëtscá tšabe soyënga šmondëtsóbomñe. Y sëndétatšëmbo tša bacá tšëngaftangbiama mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanasbe entšangcá, nýe chábioye jtseservënëse y jtsatschuanayëse.

¹⁰ Ndoñe matauatjëngana chë ndoñe yapa bën y tšëngaftanga šmochjasufrima, er Satanás echanjama tšëngaftanguentsënga báseftanga cárceloye ínýenga chacmëtámia, jinýama ntsachetšá Cristbeñe ošbuáchiyana šmobomnama, padecena soyënguiñe šmojtsemna ora; y entsamna baseftayté jasúfriana. Sempre bëtscá ošbuáchiyana, y ainaniñe bëts añemo šmochtsebomna, masque jobanámna chacmotsamna, Cristbiana trabájaye causa. Chca chašmojtsamëse,

atše chanjama tšëngaftanga chašmotsebomnama mo canye uacanana soyca, chë nyetsca tescama yomna tšabe vida.

¹¹ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentshana tšabá chamojábocana mo ayëñjanayëngcá, ndegombre chënga ndoñe queochátamna játauatjana nyetsca tescama castigánënga jatsmënacá —cha šonjanijana.

Pérgamoca ošbuachiyëngcá enefjuanënga jábuayenama

¹² Mëntšánaca cha šonjanijana: “Pérgamo bëts pueblentše ošbuachiyëngcá enefjuanëngbeñe chaotsemándama uámana ichmonábionnaca mëntšá mabobema:

Mëntšá entsichamo chë nyets utoicajana puerte efsana espadëja entsatbëná: ¹³ Atše sëndëtatšëmbo ntšamo yomna tšëngaftangbe oye- nentše, canye luare ndayentše Satanás entšángbioye puerte uamënda. Masque chca, tšëngaftanga sempre nye atše šmondëtseserverna, y ndocna te chešmáisayana átšbeñe ndoñe šmondošbuaché ca, ni mo Antipas, chë canye nyets tempo atšbe ustoná y atšbiana ndegombre oyebuamb- nayá, ínÿenga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtsca entsana.

¹⁴ Pero básefta soyënga sëntsebomna tšëngaftangbe contra jayanama: Chentše tšëngaftangbeñe báseftanga montsemna, soyënga montsabuta- tambá ntšamo bayté entsemna Balaam enjanabuatambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿenga diosënga yojamna ca imojana- juabná soyënga jadórama uátšëmbona saná chë Israeloca entšanga chamosama, y shembása o boyabásaftaca bacna soyënga chamot- samama. ¹⁵ Chéntšnaca ínÿenga montsemna, y chënga chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna. ¹⁶ Smochtsejuabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndóñese, atše betscó tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonja- jbanángaftaca chanjétsja chë atšbe uayoicana endóbocana espadëjaca.

¹⁷ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá. Chë padecena soyënguentshana tšabá chamojábocana mo ayëñjanayëngcá, chëngbioye maná chanjátataye chamosama, chë celoca tandëse, ndayá Bëngbe Bëtsá tempo entšángbioye ndoñe tonjinÿanÿé; y canye fjantse ndëtsëtëma chanjáyentsbuachiye, chënga oyejuayënga šmojábemama. Chiñe canye tsëm uabaina echantsábemana; ndocná chë uabaina quenátabuata, ndayá nye chë chamojóyëngacñënga ca” —cha šonjanijana.

Tiatiroca ošbuachiyëngcá enefjuanënga jábuayenama

¹⁸ Mëntšánaca cha šonjanijana: “Tiatira bëts puebloca ošbuachiyëngcá enefjuanëngbeñe chaotsemándama uámana ichmonábionnaca mëntšá mabobema:

Mëntšá entsichamo Bëngbe Bëtsabe Uaquiñá, chë mo iñeshcá uafšná y mo entšëjuaca jojona puerte chaotsebuashinÿinÿanama bronce

shecuatsënga bomná: ¹⁹ Atše sëndétatsëmbo ntšamo tšëngaftanga šmoyenama; sëndétatsëmbo ntsachetsá tšëngaftanga Bëngbe Bëtsábioye y nyëtscángbioye šmababuánýeshanama, ntšamo tšëngaftanga Bëngbe Bëtsábeñe puerte šmošbuáchemá, ntšamo chábioye šmoservénama, ntšamo tšëngaftanga ínýenga šmojuabuache y ntšamo Bëngbe Bëtsábeñe jtsobátmanëse becá šmojoboyá padecena soyënguñe; y sëntsetatsëmbo mora más bëtscá tšabe soyënga šmojtsama, ntšamo tšëngaftanga átšbeñe jtsošbuáchiyama šmonjanbojatsé orscama.

²⁰ Pero canýe soye sëntsebmoma tšëngaftangbe contra jayanama: Tšëngaftangbeñe šmondëuantana chë shembása, mo chë bacna reiná Jezabelcá endmënábioye. Chë shembása entsichamo Bëngbe Bëtsabe juabna oyebuambnayá canmëna ca; pero chabe buatëmbana soyëngaca atšbe oservënënga entsaíngña, shembása o boyabásaftaca bacna soyënga chënga chamotsamama, y chë ínýenga diosënga yojamna ca imojanajuabná soyënga jadórama uátšëmbona saná chamosama. ²¹ Cha sënjuená atše chjacastíga ca, chca juabnayana ndoñe tonjatrocasa, y canýe boyabásaftaca bacna soyënga amana ndoñe tontsajbanase. Cha jacastígama batšá sënjobatma, nderado chca amana nanjatróca, pero ndoñe chenátšbošena. ²² Mora atše chanjama bëts šocana cha chaboshachama, y chë cháftaca bacna soye tmojamënga, juabnayana ndoñe tmonjatrocá y chca jtsamana ndoñe tmontsajbanase, chëngbiama chanjama puerte chamosufrima; ²³ y chë shembásabe básenga chantsëbaye. Chca, nyëtsquénache ošbuachiyëngcá enefjuanënga mochántsetatsëmbo, ndayá entšanga juabniñe y ainaniñe tmojuabnacá atše tsuábuatmama; y cada ona tšëngaftanguentšá, chca bacna soye cháftaca tojamá, ntšamo ibojtsomerecencá chanjacastíga.

²⁴ Pero tšëngaftangbentše, ínýenga Tiatira pueblentše šmojtsemnënga, chë shembásabe buatëmbana soyënguñe ndoñe šmontsošbuachenga, y chë ínýenga imuábuatma Satanasbe soyënga, chë ndoñe paselo josértama soyënga ndoñe šmonjuabuátmanënga, tšëngaftanga ndoñe quebochatamënda inýe más toto soye chašmotsamama. ²⁵ Pero nyë sempre šmochtsama ntšamo mora šmojtsamcá, y šmochtsiyena ntšamo chë Bëngbe Bëtsábiocana šmojóyëngacñe soyënga yomncá, atše quem luaroye jesabámëntscuana.

²⁶ Chë padecena soyënguëntšana tšabá chamojábocana mo ayënjanyëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nyëtsca mándayëngbentša entšángbeñe jtsemándayama, ²⁷ ntšamo atšbe Taitá chabe obenana šojatšetacá; y chënga entšángbioye puerte obenánaca mochántsamëndaye, mo canýe hierro varëfjaquécá, y chëngbe contra chamojtsemnëngbioye mochántsapochocaye, mo nyë matbajënga tmojtsëtsjanjncá. ²⁸ Y chë jabínýnama ora bínýnaye estrëlnaca chanjátšataye.

²⁹ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaníyana.

3

Sardisoca ošbuachiyëngcá enefjuanënga jábuayenama

¹ Měntśánaca cha šonjaniyana: “Sardis bėts pueblentse ošbuachiyėngcá enefjuanėngbeñe chaotsemándama uámana ichmonábioynaca mēntśá mabobema:

Mēntśá entsichamo chē Bėngbe Bėtsabe canyśeřta espíritėnga y chē canyśeřta estrellėnga bomná: Atše lempe sėndėtatsėmbo ntśamo tśėngaftanga śmoyenama; atše sėndėtatsėmbo tśėngaftangbiama ínřyėnga tśa jtsichámuana Bėngbe Bėtsá jasėrviana bėtscá śmojtsama ca, pero ndegombre tśėngaftanga nře batśatema śmotsama, y chca, chabiana mo obanėngcá śmondmėna. ² Botamana śmochjenóbobonye y más śmochtsama chē Bėngbe Bėtsá jasėrviana cabá śmondama báseřta soyėnga. Ndoñe yapa quenatájamna chē tśabe soyėngnaca chaśmotsajbanama, er atše sėnjinye chē Bėngbe Bėtsábioye jasėrviana ntśamo jtsamėse śmoyencá, atśbe Bėtsabiana ndoñe yapa tśabá quenátsmėna. ³ Asna, śmochtsenojuabnaye ndayá Bėngbe Bėtsábioyana śmojóyėngacñama, y chabiana śmojouena soyėnguíñnaca. Ntśamo chē soyėnga yomncá śmochtsiyena, juabnyana śmochjatróca y śmochjontśa bėtscá jtsamana Bėngbe Bėtsá jasėrviana. Ndoñe tśabá cach tśėngaftanga chaśmonjenójuabose y juabnyana ndoñe chaśmonjatrocace, nře ndeolpe chanjá tśėngaftangbioye, mo canře atbėbanacá, chabiana ndocná tontsejuabná ora, y ndegombre tśėngaftanga ndoñe queśmochátstatsėmbo mocna ora atše tśėngaftangbioye chjama.

⁴ Masque chca, Sardisentse tśėngaftangbeñe báseřta entśanga mondmėna, chėnga ndoñe chematajbaná oyenana tśabe soyėnga jtsamėse, bacna soyėnga játamama. Chėngna átšeřtaca mochántśajna uafjantsėjuangá uichėtjonėnga, chėnga chca mercedo montsebuajónayeca. ⁵ Chē padecena soyėnguentśana tśabá chamójuabocana mo ayėnjanayėngcá, chca uafjantsėjuangá uichėtjonėnga mochántsemna, y chėngbe uabaina ndoñe quichatsjuána chē tśabe vida mochjónřenyėngbe uabaina enduábemana librėsentśana, ndayá atše, Bėngbe Bėtsabe delante y chabe angelėngbe delante, chėnga atśbe entśanga imomna ca chanjayana.

⁶ Chē jouenama tmojtsobenėnga, chamouena ndayá EspírITU chē ndayenache ošbuachiyėngcá enefjuanėnga yojsėtsėtsnacá ca” —cha šonjaniyana.

Filadelfioca ošbuachiyėngcá enefjuanėnga jábuayenama

⁷ Měntśánaca cha šonjaniyana: “Filadelfia bėts puebloca ošbuachiyėngcá enefjuanėngbeñe chaotsemándama uámana ichmonábioynaca mēntśá mabobema:

Mēntśá entsichamo chē uamaná y ndegombre oyebuambnayá, chē jtsemándayama puerta obenana bomná, ntśamo Rey David enjanbomncá, chē nda ndayá chaotsemnama tojamandá ora, ndocná ntśobenana jamama chca ndoñe chaondėtsemnama, y ndayá ndoñe chaondėtsemnama tojamandá ora, ndocná ntśobenana jamama aíñe chaotsemnama: ⁸ Atše lempe sėndėtatsėmbo ntśamo tśėngaftanga śmoyenama. Minřyėnga, atše sėnjama tśėngaftanga bėtscá tśabe soyėnga chaśmotsebomnama, y ndocná quenátobena jamama chca ndoñe chaondėtsemnama; y chca entsemna mo atše tśėngaftangbiama canře bėśáśa cuafjatėřcá, y chėša jtatámiana ndocná quenátobena. Atše sėndėtatsėmbo tśėngaftanga batśatema obenana

šmombomnama, pero šmojouena ntšamo jtsamama tcbonjauyancá, y ndocna te chešmátayana atšbe entsānga ndoñe šmondmēna ca.
 9 Atše chanjama, chē mo Satanasbe entsāngcá imomnēna, n̄ye chábioye jtseservēnese y jtsatschuanayēse, chē judiēnga imonna ca ichámēnga, pero chē Bēngbe Bētsabe bocacana entsāngcá ndámēnga y bosterēnga, chēnga tšēngaftangbioye chamua y tšēngaftangbe delante chamoshamentšé, tšēngaftangbiamā respeto jin̄yan̄iyama, y chca, chēnga chamotsetátšēmo atše sempre cbababuán̄yeshanama.
 10 Atše tcbonjanamēndá, Bēngbe Bētsabeñe jtsobátmanēse, lempe chašmotsoboyá padecena soyēnguiñe, y tšēngaftanga chca šmonjama. Chiyeca, atše puerte tšabá cchohántsanyēna, chē quem luarentše oyenēnga n̄yetscanga jasúfriama y padecena soyēnguiñe jtsemnama chaojtsemna ora, Bēngbe Bētsabeñe aīñe o ndoñe mondošbuáchema jin̄yan̄iyama.

11 Cachiñe quem luaroye betasco chanjésabo. Sempre šmochtsama ntšamo mora šmondamcá, y Bēngbe Bētsábocana šmojóyēngacñe soyēnga šmochtsin̄yena; chca ndocná chaondobená ndayá jamana, y chē sóyeca chaoma tšēngaftanga ndoñe chašmondóyēngacñe ndayá Bēngbe Bētsá chē chábioye jtseservēnama ndoñe tmontsajbanángbioye yochjatšataycá, chēngbe uacanana soye. 12 Chē padecena soyēnguentšana tšabá chamojábocana mo ayēnjanayēngcá, chēngbiamā atše chanjama sempre Bēngbe Bētsabe delante chamuesomñama, y chca, chēnga mochántsemna mo chē Bēngbe Bētsabe bēts yebnentša ucuatjoniñcá; ndocna te Bēngbe Bētsábentšana quemocháisebocana; y chēngbeñe atšbe Bētsabe uabaina chanjuábema y atšbe Bētsabe bēts pueblentša uabaina, chē tsēm pueblo Jerusalén, chē celocana yobá pueblo, Bēngbe Bētsábocana. Y chēngbeñnaca chanjuábema atšbe tsēm uabaina. Lempe chca chanjama jin̄yan̄iyama chēnga Bēngbe Bētsábenga mochtsemnama.

13 Chē jouenama tmojtsobenēnga, chamouena ndayá Espíritu chē ndayenache ošbuachiyēngcá enefjuanēnga yojtsētsētsnacá ca” —cha šonjaniana.

Laodiceoca ošbuachiyēngcá enefjuanēnga jábuayenama

14 Mēntšánaca cha šonjaniana: “Laodicea bēts puebloca ošbuachiyēngcá enefjuanēngbeñe chaotsemándama uámana ichmonábioynaca mēntšá mabobema:

Mēntšá entsichamo chē sempre Ndegombrá endmēná, chē Bēngbe Bētsabe soyēngama ndegombre oyebuambnayá, y chē ndábeyeca Bēngbe Bētsá quem luare tojanmá: 15 Atše lempe sēndētatsēmo ntšamo šmoyenama. Atše sēntsetatsēmo tšēngaftanga ndoñe yapa šmontseboše Bēngbe Bētsá jaserviama, pero Bēngbe Bētsabe buayenana soyēnga ndoñe lempe šmontsabeté. Y chca, n̄ye batšatema šmojtseboše Bēngbe Bētsá jaserviama; chca, tšēngaftanga šmontsemna mo tibiye buyeshcá, ni ntšniñiye, ni shécbaniye. ¡Atše sēntseboše tšēngaftanga chašmotsemna mo ntšniñiye o shécbaniye buyeshcá, tšabá jtsamēse o tondaye! 16 Chca, tšēngaftanga tibiye buyeshcá šmondmēna, y ndoñe quemátsboše bētscá jamana, pero Bēngbe Bētsabe soyēnga ndoñe lempe šmontsabeté. Chiyeca atše sēntsejuabná jtsébatena, mo nda tibiye búyeshe tojētsbuashētjácá, chcaye ndoñe bondogustana causa.

17 Er tšëngaftanga jtsichámuana bomnënga šmomna ca, puerte tšabá šmojáocana y tondaye cmontsabuáshebena ca, pero ndoñe quešmátstatšëmbo Bëngbe Bëtsabe soyënga bëtscá cmojtsabuáshebena. Chca, tšëngaftanga šmontsemna nýa ndoñe tšabá, inýenga ngmënana chacmotsabamna, mo ndbomnjëmëngcá, mo jtanëngcá, Bëngbe Bëtsabe soyëngama ntosertancá, y mo enašëngcá, bëtscá Bëngbe Bëtsabe soyënga ntsebmncá. 18 Chíyeca chabuayená, átsbentšana chašmuatsjinýe chë Bëngbe Bëtsabe soyënga y uámana soyënga, mo chë ena castellano jabemama, inëjana fjëchnënguëse castellano átsbioye šmojtsontšabuamnañcá. Tšëngaftanga Bëngbe Bëtsabe delante mo enašëngcá šmondmëna, er cha endonyá chë ba bacna soyënga ntšamo tšëngaftanga šmojtsamcá. Smochjaleséncia atše chacbëjabuache tšëngaftanga Bëngbe Bëtsabe bominiýiñe tšábenga chašmotsemnama, mo juichëtjuama uafjantse entšayá átsbioye šmojtsantšabuamnañcá. Chca smochjama, tšëngaftanga Bëngbe Bëtsabe delante ndoñe chašmondëtsëuatjama. Smochjaleséncia atše chacbëjabuache tšëngaftanga Bëngbe Bëtsabe soyëngama chacmósertama, mo tšëngaftanga bominiýe šocanama shnana átsbioye šmojtsontšabuamnañcá. Chca smochjama, Bëngbe Bëtsabe soyëngama puerte tšabá chacmósertama.

19 Atše chë sëndábabuanýeshanënga sëndbaucácana y sëndbábuayenaye. Chíyeca, lempe ntšamo šmojobenacá smochtsama Bëngbe Bëtsá jaserviama, y juabnayana smochjatróca, y nýets tempo puerte smochtseboše Bëngbe Bëtsá jtseservénana. 20 Nderado canýe tšabe amigo yebnoye tojabo y tojachembo, tšëngaftanga šmojouenëse y bësháša šmojebiatëfjëse, cha jamashënguana, y cánýiñe cháftaca joyejuayana y jasana. Cachcá, atše entšanga sëntsachembuana chašmolestenciá chëngbe ainaniñe jtsiyenama. Nderado nda šojóyeunase, atše chanjámarshëngo chabe ainaniñe jtsiyenama, y nýets tempo cháftaca cánýiñe mo canýacá chanjëftsemna.

21 Chë padecena soyënguentšana tšabá chamojábocana mo ayëñjanayëngcá, atše chanjama chënga puerte bëtsetsanga chamotsemnama ntšamo atše sëndmëncá, y átšeftaca chamótbemama, atšbe uámana tbemanentše jtsemándayama, ntšamo atše atšbe uayayëngbioye sënjayëñjanacá, y atšbe Taitáftaca chabe uámana tbemanentše tijotbemcá.

22 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá” —cha šonjaniana.

4

Chë Ainënga Bëngbe Utabnabe uámana tbemanentša natsana imojt-sechuanaye

1 Chentšana mo otjenayoquëcá sënjáninýe. Sënjanrrepará y sënjáninýe celoca canýe bësháša enjétsatëfjna, y chë natsana sënjanuena oyebuambnayanana, chë enjamna mo canýe trompetëfjua cuafjuajatëtcá, mëntšá šonjétsatsaye: “Moye másëngo, atše cbochanjinýinýiye ntšamo más chcoye yochjopasacá ca.”

2 Cachora, chë Uámana Espíritbeyeca, mo atšbe ainana celoca cuaftsemncá atše sënjanoquedá, y sënjáninýe celoca enjëtsemna canýe reybe uámana puesto, y chentše canýa enjëtsetbemana. 3 Chentše

enjetsetbemaná enjamna, puerte tēshinýná mo jaspe ndētšbecá, puerte buanganá mo cornalina ndētšbecá, y chē uámana puesto shéconana canýe tsēfcuácuatjo enjamna, y enjētsebuashinýinýana mo canýe esmeralda ndētšbecá. ⁴ Chē reybe uámana puesto juachajana, inýe uta bnétsana y canta puesto sēnjáninýe, y chiñe uta bnétsana y canta bētsējémēnga amēndayēnga monjētsetbiamana, uafjantsējuangá uichētjonēnga, y castellano coronēshangá monjētsabestšajona. ⁵ Chē uámana puestentšana enjētsobocana tcuinýējēnga, becá shauenanana y juesasanana; y chē uámana tbemaniñentša natsanoicna, canýsēfta uajuinýanēsha enjētsangbototjuana; chē uajuinýanēshangá entsayana chē Bēngbe Bētsabe canýsēfta espíritēnga. ⁶ Y chē uámana puestentša natsanoica enjētsemna mo canýe mar bejaycá, tēshínýniye mo canýe cristal ca uabaina ndētšbecá.

Chē luariñe tsēntsaca, chē uámana puesto enjētsemnentše y chē shēconánējana monjētsemna canta Ainēnga, nýētsañe fšnēbēngaca, natsanoica y stētšoica. ⁷ Chē natsana Ainá enjamna mo canýe leoncá, chē inýe Ainá mo canýe torošcá, chē inýe Ainá enjánbomna mo canýe entsabe jubiacá, y chē inýe Ainá mo canýe águila tojtsongüefnacá. ⁸ Chē canta Ainēnga, cada ona chnēnguana juatēngmiášha enjanábomna, y tsoicajana y shjoicajana nýētsañe fšnēbēnga monjánbomna. Y chēnga nýets tempo, ntjochnacá mēntšá monjánichamo:

¡Uamaná, Uamaná, Uamaná, Bēngbe Utabná,

Bēngbe Bētsá nýets obenana bomná,

nda enjammá, endmēná y sempre echanjēftsemná ca!

⁹⁻¹⁰ Chca chē Ainēnga Bēngbe Bētsá bētscá tmontanchuá, Bēngbe Bētsá chē uámana puestentše tbemaná, chē nýets tempo y nýetsca tescama oyená. Chēnga puerte respeto chabiamana monjētsebomna y bētscá tmon-tanchuá. Cada ora chēnga chca tmonjanma ora, chē uta bnétsana y canta bētsējémēnga amēndayēnga, chē uámana puestentše tbemanabe shecuatšentše joshamotošiyana y chábioye jtsatschuanayana, chē coronēshangá chē natsanoica jutšanana, y mēntšá jtsichámuana:

¹¹ Aca nýets merecido condētsobuájoñe, Bēngbe Utabná y Bēngbe Bētsá, entšanga chamotsinýanýnama, aca puerte bētsá comnama, y chamot-sichamo aca nýets respeto buajoná comna, y nýets obenana bomná comna ca,

er aca nýetsca soyēnga tcojama;

aca icnabóseyeca chē soyēnga yojtsemna y aca chca tcojanma ca.

5

Chē uabemana uándmanana tsbuanácha y chē Oveshatema

¹ Chē uámana puestentše enjetsetbemanabe catšbioica cucuatšñe canýe uándmanana tsbuanáchanaca sēnjáninýe, y nýētsañe enjētsabemana tsoicajana y shjoicajana, y canýsēfta tsengájaše sellēngaca enjētsajandmanana. ² Y canýe ángel puerte obenana bomná sēnjáninýe, y cha mēntšá enjētsayebuache: “¿Nda merecido yobuájona, quem uándmanana tsbuanácha jutēfjonama y chē sellēnga jutsécama ca?”

³ Pero, ni celoca, ni quem luarentše, ni quem luarentša jashenoye, ndocná quenjatsmēna obenánaca chē uándmanana tsbuanácha jutēfjonama, ni juinýama. ⁴ Y atše puerte sēnjánenobošachna, er ndocná ntjónýnana merecido buajoná chē uándmanana tsbuanácha

chautéjfonama, ni chauinjama. ⁵ Pero canya chë bëtsëjemënguentsá šonjanijana: “Ndoñe más matenóbošachena; mouena, chë Judabe pamillentsá, León ca uabobainá, mando y obenana bëtsebomnama, chë rey Davidbentsana Entśá, tonjayénjaná; cha entsobena chë uándmanana tsbuanácha jutéjfonama, y chë canysëfta sellënga jutsécama ca.”

⁶ Chora sënjaninye, chë uamana puesto y chë canta Ainënga y chë bëtsëjemëngbe tsëntsaca, canye Oveshatema tsanana, pero enjëtsinyna mo cuafstobacá. Chë Oveshatema enjábomna canysëfta tsëtjonëse y canysëfta fšněbé. Chë canysëfta fšněbé monjaninyniná chë Bëngbe Bëtsabe canysëfta espíritënga, chë Bëngbe Bëtsá nyets quem luarëjana tojánichamonga. ⁷ Chë Oveshatema tonjanobeconá y chë uándmanana tsbuanácha tonjanaca, chë uamana puestentse tbemanabe catšbioica cucuatšentsana; ⁸ y chabe cucuatšife tonjanaca ora, chë canta Ainënga y chë uta hnëtsana y canta bëtsëjemënga amëndayënga chë Oveshatembe shecuatšentse tmonjanoshamentśé. Nyetscanga monjëtsëtbëna arpangá y castellano codbenga jütjena inciensiyecca; chë codbenga inciensiyecca enjamna chë Bëngbe Bëtsabe entsanga tmojayana palabrenga, cháftaca jencuëntama ora. ⁹ Y quem tsëm canto montsancántaye:

Aca merecido condëtsobuájoñe, chë uándmanana tsbuanácha chacuacama y chë sellënga chacutsécama;
er acbe buiñe juabuáshanëse tconjanóbana, y chca enjamna mo crocénana cuafjëtsajocá, Bëngbe Bëtsabiamama chamotsemnama,
entsanga nyetsca cachca buiñe bomnënguentsana, nyetsca biyana bomnënguentsana, nyetsca canye entsanguentsana, y nyetsca mándayëngbentsa entsanguentsana.

¹⁰ Aca tcojama chënga chamotsobena ácaftaca jtsemándayama y uamanënga chamotsemnama, Bëngbe Bëtsábioye mo bachnangcá chamotseservënama, y quem luarentse chënga montsemánda ca —chënga monjëtsëversiyaye.

¹¹ Y chca sënjëtsönnyaye ora, mallajta angelëngbe oyebuambnayana sënjanuena, y chënga monjëtsëmna chë uamana puestentse, chë Ainënga y chë bëtsëjemënga amëndayëngbe shëconana. Nyetsá bëtschá angelënga monjëtsëmna, corente mallajta; ¹² y chënga mëntśá monjëtsayebuache:

¡Chë Oveshatema cuafjocabá endmëná,
merecido endëtsobuájoñe, nyets obenana, nyets bomnana,
nyets osertánana y nyets añemo chaotsebomnama,
y entsanga chabiamama chamotsichamo cha nyets respeto buajoná yomna ca,
y chamotsinyanynama cha puerte bëtsá y uamaná yomnama,
y nyetscanga chamotsatschuanama ca! —chënga monjëtsayebuache.

¹³ Y sënjanuena, lempe ntšamo Bëngbe Bëtsá tojanmca aina soyënga, celoca, quem luarentse, quem luarentśa jashenoye y chë mar bëjayoca, chëngnaca mëntśá monjëtsichamo:

¡Chë uamana puestentse tbemanábioye y chë Oveshatema nyetscanga nyets tempo y nyetsca tescama chamótsatacheuanaye
y chamotsichamo chata puerte uamanata y nyets respeto buajonata ibomna ca,
y chamotsinyanyná chata puerte bëtsëtsata y obenata bëtsemnama ca!

14 Y chë canta Ainëngna monjétsichamo: “Chca chaotsemna ca.” Y chë bëtsëjemënga amëndayëngna tmonjanoshamentsé y chátbioye monjétsatacheuanaye.

6

Chë Oveshatema chë canÿsëfta sellënga tonjanëtsécá

1 Chentsana más sënjáninÿe; chë Oveshatema chë canÿsëftentšana nat-sana sello tonjanëtsécá ora, sënjanuena canÿa chë canta Ainënguentshana puerte jabuache, mo cuafjajuesascá, mëntšá enjétsichamo: “¡Mabo ca!”

2 Sënjanrrepará y sënjáninÿe canÿe fjantse couaye, y chábeñe enjetsenjaquená canÿe arquëja enjétsatbëna. Chábioye canÿe coronësha tmonjaninÿe, y mo canÿe ayëñjanayacá tonjëftsanbocna, y cabá más jat-syëñjanámna.

3 Chë Oveshatema chë inÿe sello tonjanëtsécá ora, sënjanuena chë inÿa chë canta Ainënguentshana mëntšá enjétsichamo: “¡Mabo ca!” 4 Y inÿe couaye tonjánbocna, canÿe buanganá; y chë enjetsenjaquená obenana tonjanóyëngaçñe jamama chë fshantsentša natjëmbana vida chaot-sopochocama, entšanga chamotsenóbama; y canÿe bëts espadëja tmonjanoyé.

5 Chë Oveshatema chë inÿe sello tonjanëtsécá ora, sënjanuena chë inÿa chë canta Ainënguentshana mëntšá enjétsichamo: “¡Mabo ca!” Sënjanontješé y canÿe ftsenga couaye sënjáninÿe, y chë enjetsenjaquená canÿe romanëša enjétsëtbëna. 6 Y chë canta Ainëngbeñe canÿe oyebuambnayana mëntšá sënjanuena: “Nÿe canÿe kilo trigo canÿe tesca trabajuama, y unga kilo cebadá canÿe tesca trabajuama; pero chë aceitiye y chë vínoyna ndoñe cattsepochócase ca.”

7 Chë Oveshatema chë inÿe sello tonjanëtsécá ora, chë ústonoca Ainá enjétsichamo: “¡Mabo ca!” 8 Sënjanontješé y canÿe shatsësiye couaye sënjáninÿe; chë enjetsenjaquená Obanana ca enjanabaina, y stëtsoica bonjétsëstona canÿa, Obanënga imomna luare ca uabainá; y chátbioye obenana tmonjanatsatá cántañentšana cánÿentse quem luarentše jt-sepochócase, chentša entšanga jtsapochócase, entšanga tmojtseñjanama, bëts shëntsánëngaca, šocanëngaca y quem luarentša tsátjaye bayëngaca.

9 Chë inÿe sello tonjanëtsécá ora, sënjáninÿe chë altarentša tajsoye chë tmojanóbanëngbe espíritënga, chë Bëngbe Bëtsabe palabra entšanga abuayinayama tmojanóbanënga. 10 Chora chënga tmonjanontsé tša uayebuáçhama: “Uamaná y ntšamo tojašebuachenacá lempe amá bëngbe Nduiño, ¿ntseco quem luarentša entšangbiana cochjayana ndoñe tsabá tmonjamama, y chë bëngbioye obanayama cochjácastigaye ca?” 11 Chentsana nÿetscángbioye uafjantse entšayá tmonjaninÿe y tmonjanëyana batšatema más chamobatmá ca, chë cachëngcá Crístbeyeca catšátanga y oservëngënga, chë cachëngcá mochjanóbanënga, nÿetscanga choca chamojtseñnëntscuana.

12 Y más sënjáninÿe; chë inÿe sello cha tonjanëtsécá ora, jabuache fshantse tontsanangmëmama; shinÿe tontsanftsënganga, mo chë obaná tojtsemnama juichëtjuama entšayacá, y nÿets juashcona mo buiñcá enjétsinÿna, 13 y estrellatëmënga celocana fshantsoye tontsantquëcjana, mo canÿe higo betiye jabuache bínÿiaca tojtseshatiyeyna ora, chë nguëfshna higuëbenga cuafjatquëcjancá. 14 Y celoca luare

tontsanenatjēmba mo canye tsbuanácha cuafjuandmanacá, y n̄yetsca tjañe y béjayoca fshantsēnga, chē ndayentse enjamnentšana tontsanjuaná; ¹⁵ y n̄yetscanga, fshantsoca reyēnga, uámanēnga, soldadēngbe amēndayēnga, bomnēnga, obenana bomnēnga, y n̄yetscanga chē n̄yets tempo n̄ye in̄yabiamá oservénēnga y chē cachēngbiama trabájayēngnaca, chē cuevēshēnguiñe y bēts ndētsbenguenache tjañe tmontsanóitana; ¹⁶ y chē tjañēngoye y chē ndētsbengoye montsanichamo: “¡Bēngbiōye šmotsētebuantsá y šmotsaitame, chē uámana puestentše tbemanabe bomin̄yentšana, y chē Oveshatembe uabouana castigo, cha bēngaftaca tbojetnama, bēngbeñe ndoñe chaondētsemnama! ¹⁷ Er chē uachuana te chabe castigo jtsebin̄yama te tojóshjango; y mora ¿nda nanjobenaye chē sóyeca ndoñe chamondētsepochochocama ca?” —chēnga montsanichamo.

7

Chē Bēngbe Bētsábioye oservénēnga chē uabouana castigüentšana mochántsatsebacana

¹ Chca tonjanopasá chentšana, canta angelēnga sēnjánan̄ye, monjétsatsana chē quem luarentša canta opochócayenache; chēnga ndoñe quemēnjatanleséncia chē canta bin̄yiēnga jtsebin̄yama, ndoñe chaondētsebin̄yayama, ni fshantsentše, ni mar béjayoca, ni ndocna betiyeshēnguiñe. ² In̄ye ángelnaca sēnjánin̄ye, shin̄ye bocana luaroicana enjetsabó, y chē Bēngbe Bētsá Ainabe sello enjétsiyēboye. Chē ángelna chē in̄ye canta angelēngbiōye, ndémuan̄yēngbiōye obenana tmojanatšatá chē fshantsentše y mar béjayoca lempe jtsepochochocama, chēngbiōye jabuache tonjánabachembo: ³ “¡Tondaye šmatjapochóca, ni fshantsoca, ni mar béjayoca, ni betiyeshēnguiñe, chē Bēngbe Bētsabiamá oservénēngbiōye chē sélloca juentsaca fchayauin̄yannantscuana, ndoñe chamondētsepochochocama ca!”

⁴ Y sēnjanuena buétanga chē sélloca tmojánauin̄yanayama: canye patse, canta bnētsana y canta uaranga entšanga uin̄yannánēnga n̄yetsca Israeloquentša bēts pamillanguentšana.

⁵ Judabe pamillentšana, bnētsana uta uaranga uin̄yannánēnga;

Rubenbe pamillentšana, bnētsana uta uaranga;

Gadbe pamillentšana, bnētsana uta uaranga;

⁶ Aserbe pamillentšana, bnētsana uta uaranga;

Neftalibe pamillentšana, bnētsana uta uaranga;

Manasesbe pamillentšana, bnētsana uta uaranga;

⁷ Simeonbe pamillentšana, bnētsana uta uaranga;

Levibe pamillentšana, bnētsana uta uaranga;

Isacarbe pamillentšana, bnētsana uta uaranga;

⁸ Zabulonbe pamillentšana, bnētsana uta uaranga;

Josebe pamillentšana, bnētsana uta uaranga;

y Benjaminbe pamillentšana, bnētsana uta uaranga entšanga.

Chē mallajta entšanga uafjantsējuangá uichētjonēnga

⁹ Chentšana, sēnjanrrepará y mallajta entšanga sēnjánan̄ye, ndocná quentaisobenaye jacúntana, n̄yetsca mándayēnguentšana, n̄yetsca cachca buiñe bomnēnguentšana, n̄yetsca canye entšanguentšana, y n̄yetsca biyana bomnēnguentšana; chēnga monjétsatsana chē uámana puesto chē

Oveshatembe natsanentše, uafjantsëjuangá uichëtjonënga y ramëshangá monjétsëtbëna. ¹⁰ Njëtscanga tša monjétsayebuache: ¡Bënga atsebacayana endobá, Bëngbe Bëtsá, chë uámana puestentše entsetbemanábentšana, y chë Oveshatémbentšana ca!

¹¹ Y njëtscá angelënga, chë uámana puesto y chë bëtsëjemënga amëndayënga y chë canta ainëngbe shëconana monjétsatsanënga, chë uámana puestentša natsanoica tmonjanoshamentšé, fshantsóntscoñe jotsejbénase, y Bëngbe Bëtsá tmonjanadorá, ¹² mëntšá jayanëse: ¡Chca chaotsemna!

Bëngbe Bëtsábioye njëtscá tempo y njëtscá tescama chamotsadorana y njëtscá ainánaca cha chamotsatschuaná.

Entšanga chamotsinýanýná cha puerte bëtsá y uamaná bëtsemnama; cha endmëna njëtscá osertánana bomná, y njëtscá respeto buajoná, y njëtscá obenana y añemo bomná.

¡Chca chaotsemna ca! —chënga monjétsichamo.

¹³ Chentšana, canya chë bëtsëjemënguentsá tonjanoyebuambá y šonjantjá: “¿Ndëmuanýënga imomna chë uafjantsëjuangá uichëtjonënga, y ndëmocana tmojabo ca?”

¹⁴ “Taita, aca chëngbiana cotátšëmbo ca” —atše sënjanjuá.

Y cha šonjaniana: “Chënga montsemna chë jabuache ngmenënguentsána tšabá tmojábocanënga; chë Oveshatema chëngbiana tojóbana y chëngbe bacna soyëngama perdonánënga montsemna; chëngbe uichëtjonëjuangá tmojtsaboshabé y chë Oveshatembe buiñeca tmojtabofjantsé.

¹⁵ Chíyeca chënga chë Bëngbe Bëtsabe uámana puestentša natsanoica montsemna,

y chábioye njëtscá tempo chabe delante mondëserversa,

y chë uámana puestentše entsetbemaná,

chëngbenache jtsemnëse, chënga echántsanýënga, mo cuafjutsebotscá.

¹⁶ Ya ndoñe más shëntsana, ni uajuendayana quemochátssomna;

shinýama, ni yapa jënýama ya ndoñe más quemochátssufrina;

¹⁷ er chë Oveshatema, chë uámana puestentša natsana tsëntsaca entsemná,

chëngbioye mo oveshëngcá echantsabuajënýa,

y echanjunatse bėjaye vida bomniye yóbocana luaroye,

y Bëngbe Bëtsá echanjama ya ndoñe más ngménana chamondëtsebomnama ca” —cha šonjanjuá.

8

Chë ústonoca sello

¹ Chë Oveshatema chë uándmanana tšbuanáchañe chë ústonoca sello tonjanëtsécá ora, celoca ndocá quentétsënëna mo tsëntsá hora njëtšá.

² Chora sënjananyë chë canýsëfta angelënga, chë Bëngbe Bëtsabe delante monjétsatsanënga; chëngbioye canýsëfta trompetëfjuangá tmonjaníyë.

³ Chentšana inýe ángel tonjánashjango, canýe castellano matbëtémaca incienso jajuinýiyama, y altar natsanoica tonjantsá; chábioye bëtscá incienso tmonjanoyé chaojuinýëma chë castellano altaroca, chë uámana tbemana natsanoica enjëtsemnoca. Chë ángel incienso tonjanjuinýë Bëngbe Utabná jëtscuayama, cánýiñe njëtscá chë Bëngbe Bëtsabe entšanga

tmojoyebuambá palabrëngaca, cháftaca jencuéntama ora. ⁴ Y chë incienso juinÿnentša ngona, chë ángelbe cucuatšentsana Bëngbe Bëtsabe delante tonjanótsjua, cánÿiñe chë Bëngbe Bëtsabe entšanga cháftaca jencuéntama palabrëngaca. ⁵ Chentsana chë ángel chë incienso jajuinÿiyama matbëtema tonjanca, chë altarentša chebábëngaca tonjanajutjé, y quem luaroye tonjanëtsana. Chora enjëtsemna tša juesasanana, corente shaue-nanana, bëtsá tcuinÿënga, y quem luare tontsanangmëmana.

Chë trompetëfjuangá

⁶ Chora chë canÿséfta angelënga, chë canÿséfta trompetëfjua uabomnënga, tmonjanoprontá chëfjuangá juajatëtama.

⁷ Chë natsana ángel chabe trompetëfjua tonjanájetëto, y quem luaroye tmonjanëtsana bëntstá y íñeshe, cánÿiñe buiñeca. Ungañentšana cánÿentše quem luarentše tontsanjuinÿe, úngañentšana cánÿentše betiyeshënguiñe y nÿetsca nguëfshna shacuanënguïñnaca.

⁸ Chë inÿe ángel chabe trompetëfjua tonjanájetëto, y chora chë mar bëjayoye tmonjanëtsana canÿe soye mo canÿe bëts tjañe tojt-sangbototjuancá, y chë mar bëjayiñe úngañentšana cánÿentše buiñe tontsanóbema. ⁹ Chë mar bëjayiñe vida imobomnëngbeñe úngañentšana cánÿentše tontsanopochocá, y chë barquënguëntšnaca úngañentšana cánÿentše.

¹⁰ Chentsana chë inÿe ángel chabe trompetëfjua tonjanájetëto, y canÿe bëts estrella, mo canÿe uajuinÿanëshacá enjëtšangbototjuana, celocana tonjanótsatše chë úngañentšana cánÿentše bëjayënguiñe, y bëjaye óbocanenache. ¹¹ Chë estrella enjanabaina Untjana ca; y chë úngañentšana cánÿentše buyeshënguiñe untjiye tontsanóbema, y chë untja búyeshe causa ba entšanga tmonjanóbana.

¹² Chë inÿe ángel chabe trompetëfjua tonjanájetëto, y chora tontsanóndbema chë úngañentšana cánÿentše shinÿiñe, y chë úngañentšana cánÿentše juashconiñe y chë estrellënguïñnaca. Chca, nÿetsca chentša úngañentšana cánÿentše ibetiñe tonjanoquedá, y chë causa ndoñe quemëntëtësebinÿnaye posufta horëntscuana, bnëté canta hora y ibeta canta hora.

¹³ Chentsana, sënjanrrepará y sënjanuena canÿe águila, tsbanánoca celoca enjetsongüefjná, jabuache mëntšá enjëtšichamo: “¡Tša lastema, tša lastema, tša lastema quem luarentša entšangbiama, chë inÿe trompetëfjuangá chë inÿe unga angelënga chamojuájetëto ora ca!”

9

¹ Chentsana chë inÿe ángel chabe trompetëfjua tonjanájetëto, y sënjáninÿe canÿe ángel quem luaroye jastjanguana y enjëtšinÿna mo canÿe estrella celocana quem luaroye cuaftšotsatšancá; y moye tonjánashjango ora, tmonjanoyé chë uabouana tboca atëfjñentša llavëfja.

² Chë uabouana tboca atëfjñentše tonjánatëfjo, y chentsana beca ngona tonjanótsjua, mo bëts hornentša ngoncá; y chë uabouana tboye atëfjñentše ngona causa shinÿe tontsanibëtata y nÿets celoca ena ngona enjëtsemna. ³ Chë ngonentšana ba tšátjaye chapulinga tmonjánbocana, y nÿets quem fshantsëjana tmonjanáshana; y chëngbiroye obenana tmonjanatšatá, chánaca jándbemama, mo chë juetjuama alacranëngbe obenancá. ⁴ Chëngbiroye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe;

nÿe chë juentsaca chë Bëngbe Bëtsabe sëlloca nduinÿnanana entsangna aiñe. ⁵ Pero ndoñe chematanalesenciá entsángbioye jobáyana, ndayá nÿe jamama chënga shachna shinÿentscuana tsetshanana chamotsebomnama; y chë chënga monjánama chamotsebomnama tsetshanana enjamna mo canÿe alacranbe uetjoniñcá.

⁶ Chca tempo chaojsemna ora, entsanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinÿena ntšamo jamëse jtsóbanama; y masque tša mochántseboše jóbanama, chora chëngaftaca ndoñe chca queochatopása, mo jóbanama ndoñe tmontsobencá.

⁷ Chë tsátjaye chapulinga monjétsinÿna mo couayëngcá prontánënga jama entsángaftaca jéntsama; chëngbe bestšašifne monjanábomna mo castellano coronëshangacá, y chëngbe jubiá enjamna mo entsabe jubi-acá. ⁸ Stjënashë monjánbomna mo shembásabe stjënashacá, y chëngbe juatsašënga mo leonbe juatsašëngcá. ⁹ Chëngbe cuerpënga jenëuyanama cochaca monjánbomna morocho soyënga, mo hierro soyëngcá, y chëngbe juatëngmiashangá tmojtsabonjná ora, chë shauenanana bëtscá enjamna, mo ba cochëshangá couayënga cuafstsasjojnacá, chë inÿengaftaca jéntsama tmojëftsátjajo ora tojtseshauenancá. ¹⁰ Chënga monjanábomna mo alacranbe uascuatšëjuacá, ba uetotjëfjangaca, y chë uascuatšëjuaca obenana monjánbomna shachna shinÿentscuana entsanga mal chamotsep-asama. ¹¹ Chë tsátjaye chapulinga canÿe amëndayá monjánbomna, chë uabouana tboca mándaye ángel; hebreo biyañna cha uabainá Abadón ca y grieguiñna Apolión o pochocayá ca.

¹² Chë natsana pochócayana ya tocjochnëngo, pero más chcoye cabá inÿe uta soye más pochócayana cachcá echántsemna.

¹³ Chentsana chë inÿe ángel chabe trompetëfjua tonjanájetëto, y canÿe oyebuambnayana sënjanuena, chë Bëngbe Bëtsabe delante enjëtsemna castellano altarentša juatsboica lado sibienache obocanentsana enjëtsovocana. ¹⁴ Y chë oyebuambnayana, chë trompetëfjua tonjanájetëto y enjëtsetbëna ángelbioye tbonjanianana: “Chë canta angelënga chë Eufrates bëtš fshájaye tsachoca utsbuanënga mëjafjoná ca.” ¹⁵ Y chë canta angelënga tmonjanëjafjoná; y nÿa chë ora, chë te, chë shinÿe y chë uatama chëngbioye tmojanaprontá, chë quem luarentša entsángbeñe úngañentsana cánÿentšënga jtsëbáyama. ¹⁶ Atšë sënjanuena buétanga imojamna chë angelëngaftaca tmojána soldadënga, couayënguiñe: uta patse millonënga ca.

¹⁷ Mëntšá sënjananÿe mo otjenayoquëcá chë couayënga y chë chëngbeñe enjaquenënga: Chë enjaquenënga monjánbomna morocho soyënga cochaca, jenëuyanama, y chë soye buanganana enjáninÿna, mo iñcá, y fchendana mo chë uámana ndëtšbé jacintcá y tsësiyana inÿnana mo azufrcá; y chë couayënga monjánbomna mo leonbe bestšašcá, y chëngbe uayoicana enjëtsovocana iñe, ngona y azufrana. ¹⁸ Y chë úngañentsana cánÿentšë entsanga tmonjanóbana quem unga uabouana pochócaye soyëngaca, chë couayëngbe uayoicana enjëtsovocanana: iñe, ngona y azufrana. ¹⁹ Er chëngbe obenana entsanga japochócama monjánbomna uayáshañe y uascuatšëjuañe; er chëngbe uascuatšëjua enjuamna mo mëtscuayëngcá, bestšašëngaca, y chëjuanga causa entsanga mal montsanpásaye.

20 Pero chë inÿe entšanga, chë uabouana pochócaye soyëngaca ndoñe tmonjanopochocanga, juabna ndoñe chematantrocá, y ndoñe chematanajbaná amana chë bacna soyënga ntšamo monjanamcá; ndoñe chematanajbaná adórayana chë bacna bayëjënga, ni chë mo diosënga cuaftsemncá jtsejuabnayëse imojánadorana castellano soyënga, midio soyënga, bronce soyënga, ndëtsbé y niñëbé soyënga; y chca soyënga ndoñe quemënjatobena ni jinÿama, ni jouenama, ni jtsanama. ²¹ Juabna ndoñe chematantrocá y ndoñe chematanajbaná entšanga obanayana, encjuanayana, bacna soyënga boyabása o shembásaftaca jtsamëse oyenana, ni atbëbanana.

10

Chë ángel base uándmanana tsbuanáchaca

¹ Chentšana sënjaninÿe inÿe ángel, puerte obenana bomná; celocana enjétsastjajuana, y chabe shëconana canÿe jantšetëshe enjëtsemna; chabe bestšaše tatsëtsacá canÿe tsëfcuácuatjo. Chabe jubíá shinÿcá enjëtsebuashinÿinÿana, y chabe shecuatšënga mo úcuatjona niñëbenga cuaftsoiñcá. ² Chabe cucuatšinë enjëtsetbëna canÿe base uándmanana y utëfjna tsbuanáchaca. Chabe catšbioica shecuátšeca chë mar béjayoca tonjantsá, y chë uañicuayóicatšecna, quem fshantsentše. ³ Y jabuache tonjanoyó, mo canÿe león cuaftseyocá; y tonjanoyó ora, canÿsëfta juesasanentša jabuache shauenanana sënjanuena. ⁴ Chë canÿsëfta juesasana chca tmonjanoyebuambá ora, atše sënjanoprontá ntšamo chënga tmonjanayancá juabemama; pero canÿe oyebuambnayana celocana sënjanuena, mëntšá šonjétsatsaye: “Nÿe aca cochtsójuabnañe ntšamo chë canÿsëfta juesasana tmonjayancá, ndocnábioye catjauyana, y chë soye ndoñe catjuábema ca.”

⁵ Chora chë ángel, chë mar béjayoca y quem fshantsentše atsaná sënjaninÿá, chabe catšbioica cucuatše celoye tonjanatsbaná, ⁶ y tonjanjurá Bëngbe Bëtsabiamá, chë nÿets tempo y nÿetsca tescama oyenabiamá, chë celoca, quem luare, chë mar béjaye, y lempe chë luarënguiñe yobinÿncá tojanmabiamá. Tonjánayana: “Ya ndoñe más quemochatobatma; mora Bëngbe Bëtsá echanjama ntšamo tojašebuachenacá, ⁷ er chë tempo chaojóshjango, chë ústonoye ángel chabe trompetéfjua juajatëtama chaojontsé ora, chora ya echanjochnëngo ntšamo Bëngbe Bëtsá jamama yojuabnacá; chë soye nÿetsca entšángbioye cha ndoñe chenatinÿanjé, ntšamo tempo cha chabe oservénëngbioye, chë chabe juabna oyebuambnayëngbioye tojanabuayenacá ca” —cha tonjánayana.

⁸ Chë atše sënjanuena oyebuambnayana celocana enjëtso bocanana, cachiñe šonjanatsëtsá y šonjanianana: “Motsa y mauaca chë mar béjayoca y quem luarentše ángel entsemnabe catšbioica cucuatšinë base uándmanana y utëfjna tsbuanáchaca.”

⁹ As atše chë ángelbioye sënjánana; chë base uándmanana tsbuanáchaca chašuíyema sënjanianana, y cha šonjanjuá: “Quemëcha, motsásañe. Acbe uayoye uamešquënëcha mo tjouangbe meloycá echantsamna, pero acbe uafsbioyna puerte uauntjëcha echantsábema ca.”

¹⁰ As chë base uándmanana tsbuanáchaca chë ángelbe cucuatšentšana sënjanaca, y sëntsanásañe; y atšbe uayoye meloycá enjëtsumna, pero sënjanabmuaná y atšbe uafsbioyna puerte uauntjëcha tontsanábema. ¹¹ Chora šmonjanianana: “Aca cmontsemna cachiñe jtëtabuayenana,

ntšamo Běngbe Bětsá tojayancá chě ntšamo yochjopásama, ba canye luar-entša entsángaftaca, ba mándayěngbentša entsángaftaca, ba biyana bomna entsanguentšéngaftaca y quem luarentša reyěngaftaca ca.”

11

Chě útata Běngbe Bětsabe juabna oyebuambnayata

¹ Chentšana canye medídaye niñěfja šmonjanoyé, mo jatšěmboněfjá, y šmonjaniyana: “Motsa y Běngbe Bětsabe běts yebna y chentša altar cochjamedída, y cochjácuntaye bueta entsanga chentše Běngbe Bětsábioye imojtsadorana. ² Pero chě Běngbe Bětsabe yebnentše más shjoica luarna cachcá cochjonjaye, ndoñe catjamedída, er chiñe chě ndoñe judiěngbiama endmēna; y chěnga, chě uámana ca uabaina běts pueblama, canta bnětsana y uta shinjěntscuana soyěnga mochántsama chiñe jtsepochoćama, mo cuaftsebotajncá. ³ Pero atše, útata atšbiama tatšěmbuata y oyebuambnayata chanjichamuá atšbe cuenta entsángbioye jábuayenama, canye uaranga y uta patse y chněnguana bnětsana tentscuana. Chatna uajojěsha entsayangá uichětjonata bochántsemna, chca, ngmena bomnama jinjānyiyama ca” —chata tbonjánayana.

⁴ Quem útata atšbiama tatšěmbuata y oyebuambnayata bontsinjinyēna chě uta olivos betiyeca y chě uta candelerěseca, ntšamo Běngbe Bětsá, chě quem luarentše mandayabe delante endmēncá. ⁵ Nderado nda tojtseboše chatbiama bacna soye jamama, ndoñe quentatobenaye ntšámncá jáborlana, er uayoicana iñeshe nanjóbocna y chě uayayěngbioye nantsapochóca; nderado nda tojábosena chatbiama bacna soye jamama, cachcá cha buántsemna jóbanama. ⁶ Chě útata obenana bond-bomna celoca jtsachtama, ndoñe chaonduaftema, entsángbioye Běngbe Bětsabiama chabojtsabuayiná tese; obenana bėjayěnga buiñe jtsebiama, y jamama quem luarentše chaotsóndbemama, nyetscna pochóca soyeğaca, bueta sóynaca ntšamo chata tbojtsebošca.

⁷ Pero ntšamo Běngbe Bětsabiama ibotatšěmbcá entsángbioye jábuayenama chata chabojapochocá ora, chě uabouana bayá, chě corente běts tboicana chaojabocná, chátbioye echántatsjaye, echantsayējaná y echantsēbaye. ⁸ Y chatbe óbana cuerpo, chě corente běts pueblentša tsáshenañe echanjoquéda, chě chatbe Utabná tmojanrucificá luarentše, y chě běts pueblo injětšá juabáyamna nántsemna mo chě Sodoma y Egiptó luaroycá. Chentše endmēna mo chě běts pueblēnga Sodoma y Egiptcá, er chentše chě entsanga yapa bacna soyěnga jtsamana. ⁹ Y unga y tsěntsa tentscuana, chě obanatbe cuerpo mochantsonjaye, nyetsca canye luarentša entsanga, nyetsca cachca buiñe bomna entsanga, ba biyana bomna entsanguentšana y ba mándayěngbentša entsanga; ndoñe quenátlesenciana chata jutabuantsama. ¹⁰ Chata bochjóbanama, quem luarentše oyenēnga mochanjójeyuaye; tša oyejuayěnga mochántsemnama, ndayánaca mochanjénatšětaye, er ntšamo chě Běngbe Bětsabe juabna oyebuambnayata tbojanayancá, tojanma quem luarentše oyenēnga puerte chamosufrima.

¹¹ Pero chě unga y tsěntsa te tonjanochněngo ora, Běngbe Bětsá tonjanma chě obanata chábuatayenama; chentšana tbontantsata, y chě monjětsantjěšnēnga tša uatjana tonjaněbuache. ¹² Chora canye jabuache oyebuambnayana tbonjanuena, celocana mēntšá enjětsětsětsnaye: “Moye mašěnguata ca.” Y chatna canye jantšetěshiñe tbonjántsjua,

y chatbe uayayënga chca monjétsónjaye. ¹³ Cachora quem fshantse jabuache tontsanangmëmëmana, y chë bëts pueblentse bnëtsanentšana cânjëntšë tontsanáshajaye, y canjësëfta uaranga entšanga tmonjanóbana. Chë ainënga tmonjanoquedanga, tša auatjánánënga, chë celoca Bëngbe Bëtsábioye montsanadorana.

¹⁴ ¡Chë injē uabouana soye quem luare japochócama, mora tocjochnëngo, pero betscó chë ústonoye uabouana pochócaye soye echanjóshjango!

Chë ústonoye ángelbe trompetéffua

¹⁵ Chë ústonoye ángel chabe trompetéffua tonjanájatëto ora, celoca tša monjétsayebuache, mëntšá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentšë chaotsemnama,

y chë amëndayana echántsemna njëts tempo y njëtsca tescama ca.

¹⁶ Y chë uta bnëtsana y canta bëtsëjémënga amëndayënga, chë chëngbe uámana puestiñe Bëngbe Bëtsabe delante monjétsëbiamanënga, tmonjanoshamentšë, fshantsóntscoñe jotsejbénase, y Bëngbe Bëtsá tmonjanadorá, ¹⁷ mëntšá jayanëse:

Bëngbe Utabná, Bëngbe Bëtsá njëts obenana bomná,

aca chë mora cha condmëná y chë tempo cha conjamná cbontsatschuaná,

er nja mora acbe bëts obenánaca soyënga cochjama, acbe amëndayana jóntšama.

¹⁸ Ba luarentša entšanga ácaftaca tmonjanotšatjayaná;

pero chëngaftaca cmojetnama chë uabouana castigo jtsebínjnama te tocjóshjango,

chë tempo tmojanóbanëngbiana jayanama tšabá o ndoñe tšabá tmonjéftsemama.

Tonjóshjango chë hora, uacanámana jtatsatayama chë acbiana oservëñëngbioye,

chë acbe juabna oyebuambnáyëngbioye, chë acbe entšángbioye,

y chë acbe uabaina njëtscangbiana más bëts uabainana yomnama juabnáyëngbioye,

uámanënga y nduámanënga;

y chë tempo tonjóshjango, quem luare pochocayënga jtsapochócayama ca —chënga tmonjánayana.

¹⁹ Chora, Bëngbe Bëtsabe bëts yebna celoca tonjantëffo, y choye enjëtsebinjna chë cajontema, ndayëtëma yojaninjánjná ntšamo Bëngbe Bëtsá chabe entšángbioye tojanašëbuachenacá; y chora enjëtsemna tcuinjënga, tša shauenanana, juesasanana, quem fshantse tontsanangmëmëmana y bëtscá bëntstá tonjantquécjana.

12

Chë shembása y chë uabouana bayá

¹ Chentšana, canjē bëts soye celoca tonjanonjná entšanga canjē soye jinjányiyama: canjē shembása, shinjē mo chabe uichëtjoniácá, juashcona chabe shecuatšentšá tajsoye, y chabe bestšašifne canjē coronësha bnëtsana uta estrellëngaca. ² Chë shembása ngomamaná enjëtsemna, y chë šësona jónjnama yojëtsobecuama jabuache enjëtseyoye, chë šësona

jónŷnama cha puerte jasúfriama ibojamna causa. ³ Y chora inŷe bĕts soye celoca tonjanonŷná, entšanga inŷe soye jinŷanŷiyama: canŷe uabouana dragón buanganá, canŷsĕfta bestšašĕngaca y bnĕtsana tsĕtjonĕšĕngaca y chĕ bestšašĕnguifĕ enjanábomna canŷsĕfta coronĕshangá. ⁴ Chabe uascuatšĕjuaca ŷngañentšana canŷentšĕ chĕ estrellatĕmĕnga celocana tontsansjójó, y quem fshantsoye chĕtĕmĕnga tontsanĕtsana. Y chĕ dragón chĕ šĕšona jtsebomnama shembásabe delante tonjantsá, chĕ šĕšonatĕmbioye jtsósañama, cha tojonŷná ora. ⁵ Chora chĕ shembása canŷe šĕšona boyabásetema bontsanbomna, nda nŷets luarenache entšángbioye yochtsamĕndaye mo canŷe hierro varĕfjaquĕcá. Pero chĕ šĕšona chábtĕtsana tmontsanjuaná y Bĕngbe Bĕtsábioye, chabe uamana puestoye tmontsanámbañe. ⁶ Chĕ shembásana entšanga ndoyena luaroye tontsanachá, Bĕngbe Bĕtsá canŷe luare ibojaboprónta choye, chentšĕ saná chamocaredadoma, canŷe uaranga y uta patse y chnĕnguana bnĕtsana tentscuana.

⁷ Chentšana celoca canŷe entsjanayana enjĕtsemna: Miguel, chĕ angelĕngbe amĕndayá, y chabe angelĕnga chĕ dragónaftaca monjĕtsentsjanaye. Chĕ dragón y chabe angelĕnga monjĕtsatsjanaye, ⁸ pero ndoñe chematanobená jáyĕnjanama, y chĕngbiama ya ndoñe más luare celoca quentĕtsemna. ⁹ Chcase, chĕ uabouana dragón chocana tmontanábocna, chĕ tempsca mĕtscuaye, chĕ Diablo y Satanás ca uabainá, y chĕ bĕtscá entšángbioye aingñayá; quem fshantsoye cha tmontsantsatšĕ, y chĕ cha yojanamĕnda angelĕngnaca.

¹⁰ Chora canŷe jabuache oyebuambnyana celoca sĕnjanuena, mĕntšá enjĕtsichamo:

Chĕ Bĕngbe Bĕtsá entšanga játsebacama tempo ya tonjóshjango. Mora Bĕngbe Bĕtsá echanjinŷanŷiye chabe obenana y mándayana, y chabe Uamana Uabuayaná Jesucristbe obenana jtsemándayama; er chĕ Cristbe delante bĕngbe catšátanga mal aquedayá ya tmontábocna, nda nŷets tempo Bĕngbe Bĕtsabe delante mal enjanaquedayá.

¹¹ Bĕngbe catšátanga cha tmonjayĕnjaná, er Cristo, chĕ mo tmojóba Oveshatemcá, Bĕngbe Bĕtsá bacna soyĕngama entšanga cháuperdonama,

tonjanóbana, chabe buiñe juabuáshanĕse, y chĕ ndegombre soyĕngama chĕnga monjanóyebuambnáyeca; er chĕngbe vida chĕngbiama ndoñe quenjatámana; Jesucristo jaserviama jóbanama chĕnga monjanprontana.

¹² ¡Chcasna, celoca corente oyejuayana chaotsemna, y tšĕngaftanga chĕ choca oyenĕngbeñnaca!

¡Pero tša lastema chĕ fshantsoca y mar béjayoca oyenĕngbiama, er chĕ diablo tšĕngaftangbioye tonjástjango, corente tšatjayá, er cha entsetátšĕmbo ya nŷe batšá yojtšábojamna chĕ chábioye mochjastígama ca! —enjĕtsichamo.

¹³ Chĕ dragón quem fshantsoye tmojtsantsatšama tonjáninŷe ora, chĕ šĕšona boyabásetema tbonjanĕshjango shembásabioye tbontsanacmĕ.

¹⁴ Pero uta juatĕngmiáša, chĕ bĕts aguilbeshá, chĕ shembásabioye tmonjaninŷe, chabiamá tmojanprontá luaroye chaongüĕfjoma, entšanga ndoyena luaroca, chĕ dragónbentšana bĕnoca; y chentšĕ enjamna chĕ shembásabioye saná chamuájuatšema, unga y tsĕntsa uatĕntscuana.

¹⁵ Chora chĕ dragón, chabe uayoicana bĕts béjaye tonjanbuashĕtjo

chë shembásabe stëtsoica, chaobuama y chabotsambama; ¹⁶ pero quem fshantse chë shembásabioye tbonjanájabuache, er chë fshantse mo uayašacá tonjantëfjo, y chë dragonbe uayoicana béjaye obocniye tonsanobmuánañe. ¹⁷ Y chë dragón chë shembásabioye tondaye jamana chenatanobená causa, corente cacháftaca tbonjáneta, y tonjána chë ínÿenga, chë shembásabe basengcá mondmënënga játsjayama, ntšamo Bëngbe Bëtsá yomandacá imobedecénënga, y ntšamo Jesucristo tonjanabuayená ndegombre soyëngaca sempre imoyenënga. ¹⁸ Y chë dragón chë mar béjaye tsachañe tonjantsá.

13

Chë dragón tonjanma, chë mar béjayoca uabouana bayá chabe obenana chaotsebomnama

¹ Chentsana atše sënjáninÿe, canÿe uabouana bayá chë mar bejajoicana tonjánbocna; enjánbomna canÿsëfta bestšašënga y bnëtsana tsëtjonëšënga, y chëšënguñe bnëtsana coronëšhangá, y chë bestšašënguñe bañe enjétsabemana Bëngbe Bëtsabiamana contra oyebuambnaye uabaina. ² Chë uabouana bayá sënjaninÿá enjamna mo canÿe leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uámana puesto jtsemándayama, y chabe bëts mando. ³ Canÿe chabe bestšašënguentše enjétsinÿna mo jóbanama tëtšeniñcá; pero chentše tbontanóbema; y chora quem luarentša nÿetsca entšanga ojanánënga monjëtsemna, y chë uabouana bayábioye montsanëyeunana. ⁴ Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátšbomna quem uabouana bayacá, y ndocná quenátobena chábioye jayënjanama ca.”

⁵ Chë uabouana bayábioye tbonjanlesenciá corente podesca Bëngbe Bëtsabiamana chaotsóyebuambnama, y obenana tbonjanatšetá, canta bnëtsana y uta shinÿëntscuana chaotsemándama. ⁶ Y podesca Bëngbe Bëtsabiamana tonjánayana, soyënga chabe contra, chabe bëts yebnana y chë celoca oyenënge contra. ⁷ Chábioynaca tbonjanlesenciá chë Bëngbe Bëtsábenga imomnënga játsjayama, jáyënjanantscuana; y obenana tbonjanatšetá chaotsemándama nÿetsca cachca buiñe bomna entšángbeñe, nÿetsca canÿe entšángbeñe, nÿetsca biyañe bomnëngbeñe, y nÿetsca mándayëngbentša entšángbeñe. ⁸ Chë uabouana bayá nÿetsca quem luarentša entšanga mochántadorana. Chë entšanga mondmëna ndëmuanÿengbe uabaina ndoñe yontsábemana, chë Bëngbe Bëtsábioye jëtschuayama mo canÿe oveshatemcá, tojanóbanabe librëšañe. Bëngbe Bëtsá quem luare cabá ndëma ora, quem librëšañe tojanábema nÿetscanga chë tsabe vida mochjónÿenëngbe uabaina.

⁹ Chë jouenama obenënga, chamouena.

¹⁰ Chë cárceloye jama ibomná, cárceloye bochanjotóca jama; chë espadëjaca jobanamá, espadëjaca echanjóbana.

Chíyeca quem luarentše entseyta, chë Bëngbe Bëtsábenga imomnënga padecena soyënguñe tmojtsemna ora, puerta uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entšangcá.

¹¹ Chentsana inÿe uabouana bayá sënjáninÿe, quem fshantsensana enjëtsebocana; uta tsëtjonëse mo oveshabešcá enjánbomna, pero mo canÿe

dragoncá, mo canya Satanásbeyeca mandanacá enjétsoyebuambnaye. ¹² Y enjánama soyénga chë natsana uabouana bayabe nyets obenánaca, chabe delante. Chë fshantsentša bayá tonjanma nyetsca luarentše oyenénga chamotsadoránama chë natsana uabouana bayábioye, chë jóbanama tëtšeniñe tbontanobemá. ¹³ Cha ba bëts soyéngnaca enjánama chabe obenana entšanga jinjanyiyama, entšangbe delante jamana iñe celocana fshantsoye chaótsatšamnaca. ¹⁴ Y cha tbonjanlesenciá chaoma chabe obenana jinjanyiyama chë natsana uabouana bayabe delante. Chë soyéngaca entšanga tonjanaingñé, y quem luarentša entšanga tonjanéyana canye soye chamopormá, y chë soye cháotsinyna mo chë natsana uabouana bayacá, chë espadéjaca tëtšená enjamná, y chora tšabá enjetsatsmēná. ¹⁵ Y chë inye uabouana bayábioye tmonjanlesenciá obenana chaotsebomnana jamama, chë natsana uabouana bayábioye jadórana entšanga tmonjanma soye vida chaotsebomnana, y chë soye jóyebuambayama chaotsobenámna, y jamama chë chábioye ndoñe tmonsadoránēnga chamóbanama. ¹⁶ Y tonjanma, nyetscángbioye, básenga y bëtsésanga, bomnēnga y ndbomnēnga, cachēngbiana trabájayēnga y nye injábiana nyets tempo oservénēnga, catšbioica cucuatšīne o juentsaca chamuínynanama. ¹⁷ Y ndocná quenjátanobena ni jiyama, ni jobuámiñama, chë uinynánana ndoñe tontsebomnēse; chë uabouana bayabe uabaina o chë chabe uabainama yomna número.

¹⁸ Chë número jinjēnamna bëtscá osertánana jtseytana. Chë becá osertánana bomná cháuinjēna ntšamo chë uabouana bayabe número iuayancá, er canye entšabe número endmēna. Chë número endmēna chë chñēnguana patse y chñēnguana bnētsana y chñēnguana.

14

Chë canye patse y canta bnētsana y canta uaranga entšangbe canto

¹ Y más sētsanonjā. Sēnjāninjē, chë Oveshatema, enjétsatsjabna Sión ca uabaina tjoca, y cháftaca monjétsēmna canye patse y canta bnētsana y canta uaranga entšanga, y chēngbe juentsaca enjétsabemana chë Oveshatembe y chabe Taitabe uabaina. ² Chora sēnjanuena celocana canye shauenanana, mo bëtscá bėjayēnga y bëts juevesana shauenanancá; y chë shauenanana enjamna mo chë arpēsha ue-nanayēnga chēngbe arpēshangá tmojtsabuastocá. ³ Chēnga canye tsēm canto montsancanta Bēngbe Bētsabe delante, chë chabe uámana puesto y chë cháftaca canta Ainēnga y chë bëtsējémēnga amēndayēngbe natsanentše. Y ndocná quenjátanobena chë canto juatsjínjāna, nye chë canye patse y canta bnētsana y canta uaranga quem luarentšēngbentšana atsebácanēngna aīñe. ⁴ Chēnga monjanmēna chë shembásaftaca ndocna bacna soye tmonjanmēnga, er chēnga imojanenománda chca bacna soyēnga ndoñe ntsamama; chë Oveshatema ndémoye tojtsá y chēngnaca choye jtsēstonana. Chēnga imojamna chë natsanēnga chë quem luarentša entšanguentše atsebácanēnga jtsemnana, y chēnga atsebácanēnga imojtsemna Bēngbe Bētsá y chë Oveshatema jtsaservēnama. ⁵ Chēnga ndocna te tmonjanobosteró; ndocná quenátobena jayanama chēnga bacna soye tmojanma ca.

Ntšamo chë unga angelēnga tmojánayana

⁶ Chentšana inýe ángel sĕnjáninýe, tsbanánoca celĕjana enjĕtsongüefnjaye. Cha enjánbomna canýe nýets tempscama oservena buayenana soye, entšángbioye jáuyanama, nýets quem luarentše oyenĕnga, nýetsca mándayĕngbentša entšanga, nýetsca cachca buiĕne bomna entšanga, nýetsca biyaĕne bomnĕngbeĕne y nýetsca canýe entšangbiamama. ⁷ Y jabuache mĕntšá enjĕtsichamo: “¡Bĕngbe Bĕtsabiamama šmochjájuaboje cha nýetscangbiamama chĕ más uamaná endmĕnama, y cha šmochtsatschuanaye, er ya tonjóshjango chĕ tempo ntšamo entšanga tmojamama tšabá o ndoĕne tšabá bĕtsemnama cha cháuyanama! ¡Chĕ celoca y quem luare, chĕ mar béjaye y nýetsca chĕ fshantsentsšana óbocana béjayĕnga tojamá šmochtsadorana ca!”

⁸ Chábentšana inýe ángel mĕntšá enjĕtsichamo: “¡Ya bĕts castigo, ya bĕts castigo chĕ Babilonia bĕts pueblocama entšángbeĕne echántsemnal, ndĕmuanýenga tmojinýanýe ntšamo puerte bacna soyĕnga shembása o boyabásaftaca jtsamama y inýe corente bacna soyĕngnaca, y chentšana nýets quem luarentša entšanga mo cach Babilonioquĕngcá tmojama. Chĕ causa, Bĕngbe Bĕtsá echanjama chĕngbiámnaca chabe uabouana castigo chaotsemnama ca.”

⁹ Chĕ útatbentšana inýe ángel jabuache mĕntšá enjĕtsichamo: “Nderado nda chĕ uabouana bayábioye y chĕ chábioye jadórama pormana soye tojtsadorana, y tojalesenciá chabe uinýnanana soye juentsaca o cucuatšifne chamojajoma, ¹⁰ chánaca bontsemna, chĕ Bĕngbe Bĕtsabe uabouana castigo jasúfriana. Entšanga puerte bacna soye tmojamama, Bĕngbe Bĕtsá puerte tbojetna, y chĕ causa echanjama chĕ castigo chĕngbeĕne chaotsemnama. Y chĕ uámana angelĕnga y chĕ Oveshatembe delante, chĕ bayá adorayábioye puerte mochanjatsetšená, íĕneshe y azúfrecama. ¹¹ Chca chamojtsesufrina ora, becá ngona echantsóbocana, y chĕ ngona nýets tempo chca echantsótsjuaye; y chĕnga, chĕ uabouana bayá y chábioye jadórama pormana soye adóreyĕnga, y chabe uinýnanana soye bomnĕngbiamama, ndocna te chĕ tsetšanana queochatĕjbana ca” —cha enjĕtsichamo.

¹² Chíyeca quem luarentše entseyta, chĕ Bĕngbe Bĕtsabe mandĕnga obedecĕnĕnga y Jesúsbeĕne puerte ošbuáchiyana bomnĕnga, chĕ Bĕngbe Bĕtsabe entšanga, padecena soyĕnguiĕne tmojtsemna ora, puerte uantana jtsemnana.

¹³ Chentšana canýe oyebuambnayana celocana sĕnjanuena, mĕntšá šonjĕtsatsaye: “Mĕntšá mábema: ‘Tša oyejuayĕnga mochántsemna chĕ mĕntescana mochjóbanĕnga, Bĕngbe Utabnáftaca cányiĕne mo canýacá jt-somñĕse ca.’”

“Aíĕne ca” —chĕ Uamana Espírítu tonjayana—, “chĕnga ya ndoĕne más queochátamna jatrabájana, ni jasúfriana, er chĕnga tmojama tšabe soyĕnga Jesús jaserviama, y chĕ soyĕngama chĕnga tšabe bendicionĕnga mo uacaná celoca mochanjóyĕngacĕne ca.”

Ndayá chĕ angelĕnga quem luarentše tmojanatbaná

¹⁴ Chora más sĕnjáninýe; sĕnjáninýe canýe fjantse jantsetĕshe, y chĕshiĕne canýa enjĕtsetbemana. Cha enjamna mo canýe entšacá; chabe bestšasiĕne enjanábomna canýe castellano coronĕsha, y cucuatšifne canýe puerte efšana mĕtšá enjĕtsatbĕna. ¹⁵ Chentšana, chĕ celoca Bĕngbe Bĕtsabe bĕts yebnentšana inýe ángel tonjánbocna, y jabuache bonjĕtsatsaye chĕ jantsetĕshiĕne themanábioye: “¡Acbe mĕtštaca machbonja y shajuanĕnga matbaná, er chĕ játbanama tempo ya tonjóshjango; chĕ quem luarentša

shajuana ya tonjaboche ca!” 16 Y chë jantšetëshiñe enjantbemaná chabe mëtštaca quem luariñe tonjánachbonja, y nÿets quem luarentsä atbanániñe tonjanoquedá.

17 Chentsana inÿe ángel chë celoca Bëngbe Bëtsabe bëts yebnentsana tonjánbocna; chánaca canÿe puerte efsana mëtštaca. 18 Y chë altarentšana inÿe ángel tonjánbocna, chë mando bomná íñesheca castigo entsangbiamama; y chë puerte efsana mëtštá bomna ángelbioye jabuache tbonjaniyana: “¡Ache mëtštaca machbonja y chë fshantsoca nÿetsca uvas betiyeshënguentša uvasëšangá mátabe, er ya uabochenëšangá entsamna ca!” 19 Y chë ángelna chabe mëtštaca quem luariñe tonjánachbonja, y nÿetsca quem luarentša uvasëšangá tonjanátabe, y lempe chë juantšëtetjiamama luaroye tonjanëtsana. Chë soye entsinÿinÿná ntšamo yochtsemnana Bëngbe Bëtsabe uabouana castigo. 20 Chë uvasëšangana, chë bëts pueblentšana chaboye tmonjanantšëtetje, y chë luarentšana tša buiñe tonjanóbocna; tonjanojutjé couayëngbe uayashbenëshantscoñe y mo unga patse kilómetrënga tonjanábuashana.

15

Chë angelënga chë canÿsëfta pochócaye soyëngaca

1 Chentšana, inÿe bëts soye entsanga inÿe soyama jinÿanÿiyama, celoca sënjáninÿe, canÿe puerte bëts soye: canÿsëfta angelënga canÿsëfta pochócaye soyëngaca, chë ústonoye pochócaye soyënga. Chë soyënga chaotsemnentsana ya ndoñe inÿe pochócaye soye yochántsemna, er chëntscoñe Bëngbe Bëtsá yochjacistíga, lempe ntšamo cha jamama tojanjuabocá.

2 Canÿe mar béjaynaca sënjáninÿe, mo cristalcá enjétsinÿna íñeca enájuañbiye; y chë béjaye juachaca monjétsatsana chë tšabá tmojanbocnënga, y ni chë uabouana bayá, ni chë chábioye jadórama pormana soye ndoñe tmonjánadoranga, y chë uabouana bayabe uabainama yomna número chëngbeñe chaotsemnana ndoñe tmonjanlesencianga. Nÿetscanga chënga monjétsabomna Bëngbe Bëtsá tojanëtsatá arpangá. 3 Chënga, canÿe canto monjétsesantaye ntšamo Moisés, chë Bëngbe Bëtsabe oservená tojancantacá, y ntšamo chë Oveshatema tojancantacá. Mëntšá monjétsesantaye:

Puerte bëts soyënga y tšabe soyënga entsemna lempe ntšamo aca tcojanmcá,

Bëngbe Utabná Bëngbe Bëtsá nÿets obenana bomná;
lempe ntšamo jtsamëse aca icoyena, ache bominÿiñe puerte tšabe y
ndegombre soyënga yomna,
nÿets luarënguenache entsangbe Rey.

4 Bëngbe Utabná, ¿nda nanjájuaboye aca nÿetscangbiamama ndoñe más bëtsá
condmëna ca,

o ndoñe cmantsatschuanaye?

Nÿe aca uamaná condmëna;

nÿetsca mándayëngbentša entsanga ácbioye mochanjabo,

ácbentše mochanjoshamentšiyë aca jadórama,

er ntšamo tcojamcá lempe entsangbioye mora tcojinÿanÿé,

y lempe ntšamo aca tcojamcá tšabá jtsemnana ca —monjétsesantaye.

5 Chca chentšana sënjanontjeshë y sënjáninÿe chë celoca Bëngbe Bëtsabe bëts yebna tonjantëfjo, chë Bëngbe Bëtsá Moisésbioye tbojaniyé leyënga

uajajóntse. ⁶ Y Bëngbe Bëtsabe bëts yebnentšana tmonjánbocna chë canýsëfta angelënga, chë canýsëfta pochócaye soyënga uambayënga, uafjantse lino entsëjuangá uabuashinýinýanëjuangá uichëtjónënga, y tëntša castellano uasnanéjëngaca cochóntscóñe. ⁷ Chentshana, canýa chë canta Ainënguentsá chë canýsëfta angelëngbioye tonjanoyé canýsëfta castellano codbenga jútjena chë Bëngbe Bëtsabe uabouana castígoca; Bëngbe Bëtsá chë nyets tempo y nyetsca tescama vida bomná. ⁸ Chorna, chë Bëngbe Bëtsabe bëts yebna celoca becá ngónaca tonjanojutjé, y chë ngona enjétsobocana Bëngbe Bëtsábentšana, chabe buashinýinýanana y obenana jtsinýanýnayëse; y Bëngbe Bëtsabe bëts yebnoye ndocná quenjátanobena jamashënguana, chë canýsëfta angelëngbe canýsëfta pochócaye soyënga candochnënguentscuana.

16

Chë castígoca codbenga

¹ Chentshana, canýe jabuache oyebuambnayana sënjanuena, chë celoca Bëngbe Bëtsabe bëts yebnentšana enjétsobocana, y chë canýsëfta angelëngbioye mëntšá enjétsëtsëtsnaye: “Motsajna y quem canýsëfta codbenga, chë Bëngbe Bëtsábiocana endóbocana uabouana castígoca, fshantsoca smochjabuashcja ca.”

² Chora chë natsana ángel tonjána y chabe codbé quem luariñe tonjanbuashcja, y nyetsca entsanga chë uabouana bayabe uinýnanana soye bomnënga y chë chábioye jadórana pormana soye adórayëngbe cuerpiñe bañe bacna nguayanana tonjanóbocna, puerta tsetšëkana.

³ Chentshana, chë inýe ángel chabe codbé mar béjayoca tonjanbuashcja, y choca búyeshe buiñcá tontsanóbema, mo canýe entsá obanabe buiñcá, y nyetscanga chë mar béjayoca vida bomnënga tmontsanóbana.

⁴ Chora chë inýe ángel chabe codbé béjayënguiñe y béjaye obocanënguiñe tonjanbuashcja, y buiñe tontsanobiana. ⁵ Chentshana sënjanuena, chë béjayënguiñe mando bomna ángel mëntšá enjétsichamo:

Aca nyetsca soyënguiñe tšabá amá condmëna,
er aca tcojayana chë quem luarentša entsanga chca castigánënga
chamotsemnama.

Bëngbe Bëtsá, Uamaná, mora chca condmëna y chca conjamna;

⁶ er chënga tmonjama, chë acbe entsanga

y acbe juabna oyebuambnayëngbe buiñe chauábuashanama, jtsëbáyëse;
y mora tconjama chënga buiñe chamofsema.

Nýets mercedo imobuájona chca japásama ca —cha enjétsichamo.

⁷ Altarocánëncaca canýe oyebuambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, nyets obenana bomná condmëna, y ntšamo entsanga contsacastigacá, ndegombre y tšabá entsemna ca.”

⁸ Chentshana, chë inýe ángel chabe codbé shinýiñe tonjanbuashcja; chë shinýe corente tontsanobonýaná y chíyeca entsángbioye íñesheca tontsanajuinýe. ⁹ Y nyetscanga uabouancá juinýnënga tmonjanoquedá; pero chënga ndoñe chemátanbošëna bacna soyënga amana jtsajbanana, ni Bëngbe Bëtsabe benache jtishachana, ni chábioye quemëntétsatschuanaye, más chabe contra ba soyënga montsanichamo; cha nda obenana yobomna chëngbioye chë pochócaye soyënga jíchmuama, chënga chamosufrima.

¹⁰ Chentšana chë inÿe ángel chabe cophé chë uabouana bayabe uámana puestiñe tonjanbuashcja, y nÿets chabe amëndayiñe ibetiñe tonjanoquedá. Chë entsanga bichtaja montsanenójantsnaye, yapa tsetše causa; ¹¹ pero ni chca, chë entsanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

¹² Chentšana chë inÿe ángel chabe cophé chë bëts fshájaye Eufrates ca uabáiniyiñe tonjanbuashcja y chë bėjaye tontsanbuashjo, japróntama chë shinÿe bocanoica luarënguentsa reyënga y chëngbe soldadënga chëjana chámuachnëjnama.

¹³ Atše sënjáninÿe, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuambnaye uayoicana tmonjánbocna unga bacna espíritënga; mo sapošëngcá monjétsinÿna. ¹⁴ Chënga monjamna bayëjëngbe espíritënga; bëts soyënga monjánama obenana jinÿanÿiyama, y montsanbocana nÿets luarentša reyënga jáchembuama, chë uámana te, ndayté Bëngbe Bëtsá, chë nÿets obenana bomná yochjabo entsangbiana jabáyanama ntšamo chënga tmojamama, chë te chënga chabe contra chamotsetsjama.

¹⁵ Bëngbe Utabná Jesucristo mëntsá tojayana: “Smochjinÿe, atše nÿe ndeolpe chanjabo, mo canÿe atbëbanacá, chabiana ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefšna y chabe entsayá totsaboprontañacá, nÿe enaşá ndoñe chaondëtsemnama, y entsanga chca tmojinÿe ora ndoñe chaondëtsëuatjama ca.” ¹⁶ Y chë bacna espíritëngna chë reyëngbiroye tmonjanënatse canÿe luare, hebreyiñe Armagedón ca uabáinoye.

¹⁷ Chentšana, chë ústonoye ángel chabe cophé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentsana canÿe jabuache oyebuambnayana tonjanóbocna, mëntsá enjétsichamo: “¡Chë jopásama enjamna soye ya tojochnëngo ca!”

¹⁸ Chora enjëtsemna tcuinÿënga, shauenanana y juesasanana, y quem luariñe tontsanangmëmmana, yapa jabuache quem luare tontsanëbanjó causa; quem luarentše entsanga imobinÿna orscana, ndocna te nÿa chca quem luare tontsanëbanjó. ¹⁹ Chë puerte bëts pueblo úngañe tontsanojatá, y nÿets luarentša bëts pueblënga tontsanáshajaye, y Bëngbe Bëtsá tojanenouabó chë puerte bëts pueblama, Babilonia ca uabaina pueblama, chentša entsanga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanojatá ora, cha chënga tonjanacastigá. ²⁰ Mar bėjayoca nÿetsca fshantsënga y quem luarentša nÿetsca tjañe tontsanenatjëmba. ²¹ Celocana bëtsëtsa bëntstbenga entsangbeñe tonjantquécjana, chëbenga canta bnëtsana kilama más utbenga; y entsanga Bëngbe Bëtsabe contra ba soyënga tmonjánayana, er chënga tša montsansufrina chë bëts pochócaye bëntstá causa, y chë pochócaye bëntstá chëngbiana puerte jabuache castigo enjamnama.

17

Chë puerte bacna vida bomna shembásabe castigo

¹ Canÿa chë canÿsëfta angelënguentsá, chë canÿsëfta cophenga monjanatbënguentsá, tonjánabo y šonjaniiyana: “Mabo; cbochanjinÿinÿiye

ntšamo yochtsemna chë puerte bacna vida bomna shembása, chë béjayënguifne entsetbemanabe castigo. ² Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

³ Chentšana chë ángel, atše chë Uámana Espíritbeyeca corente mandaná jtsemnëse, šonjanánatse entsanga ndoyena luaroye. Choca sënjáninÿe canÿe shembása, canÿe uabouana buángana bayábeñe enjaquená; chë bayabe cuerpiñe nÿétsañe Bëngbe Bëtsabiamana puerte bacá oyebuambnaye uabaina enjétsabemana, y enjánbomna canÿsëfta bestšaše y bnétsana tsëtjonëse. ⁴ Chë shembása enjanichëtjona uámana shbuenda uafjat-senga y buángana entsayá, y entsanbotamana castellánoca, uámana botamana ndëtsëtémëngaca y pérlaca. Chabe cucuatšifne canÿe castellano copbé enjétsatbëna, jútjena puerte uaboyënja soyëngaca, y chë boyabásengaftaca cha tojanma puerte bacna soyëngaca. ⁵ Y chabe juentsaca canÿe uabaina enjétsabemana, ndoñe josérta soye, mëntšá: “Chë puerte bëts pueblo Babilonia, tša bacna entsanga chentše, mo chë puerte bacna vida bomna shembásengbe bebmá cuaftsemncá; chentšana tojanóbooca quem luarentša nÿetsca puerte uaboyënja soyënga ca.” ⁶ Atše sënjáninÿe chë shembása tëmiá, er cha tojanofšé chë Bëngbe Bëtsábengana imojamnëngbe buifne, ndëmuanÿengbioye tmojanëbaya Jesusbiamana oyebuambnaye causa.

Chca sënjáninÿe ora, tša sënjanenjananá. ⁷ Chora chë ángel šonjanianana: “¿Ndáyeca tcojenjananá ca? Atše cbochanjauyana ntšamo yojtsayana chë shembása y chë chábioye bontsambá uabouana bayá, chë canÿsëfta bestšaše bomná y bnétsana tsëtjonëse; chë soye ndocná quenátstatsëmbo. ⁸ Chë tconjinÿe uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanÿengbe uabaina quem luare jobojátšama orscana ndoñe yonduábemana, chë tšabe vida mochjónÿenëngbe uabaina iuábemana libréšañe, chënga mochanjenjananá, chë bayá chë tempo enjaniená y mora ya ndoñe, pero cachiñe yochjésabama chamojinÿe ora.

⁹ “Muentše canÿe soye entsemna chë chca josértama chamojobëngbiamana: chë bayabe canÿsëfta bestšaše endmëna canÿsëfta tjañe ndayifne chë shembása entsetbemana; chë bestšašëngnaca mondmëna canÿsëfta mandadënga. ¹⁰ Chentšana, shachnëngbe amëndayana ya tonjochnëngo, canÿa mora entsetbemana jtsamëndayama y chë inÿa cabá ndoñe tonjášhjangó. Y cha chaojášhjangó ora, ndoñe bënama cha queochaisemánda. ¹¹ Chë tempo enjanienana uabouana bayá pero mora ya ndoñe, endmëna chë canÿsëfta mandadënguentšana inÿe mandado, pero chánaca chë inÿe canÿsëftangcá endmëna y lempe pochocaná jtsemnama entsá.

¹² “Chë tconjinÿe bnétsana tsëtjonëse mondmëna bnétsana mandadënga, jamëndama cabá ndoñe tmonjóyayenga; pero básefta tescama cánÿifne chë uabouana bayáftaca, mando mo reyëngcá mochanjóyëngacñe. ¹³ Quem bnétsanënga nÿetscanga cachcá mochántsejuabnaye, y chë uabouana bayábioye chëngbe obenana y mando mochanjátšetaye. ¹⁴ Chë Oveshatembe contra mochántsentšjanaye; pero chë Oveshatema echantsayëñaná, er chë Oveshatema endmëna nÿetsca

amëndayëngbiama chë más uámana Utabná y nÿetsca reyëngbiama chë más uámana Rey. Chë bnëtsana mandadënga cháftaca mochántsestsjanaye ora, cha chentše chabe entšángaftaca cânÿiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniana.

¹⁵ Chë ángel mëntšánaca šonjaniana: “Chë tconjinÿe béjayënga, ndayiñe chë bacna vida bomna shembása entsetbemana, mondmëna nÿetsca canÿe luarentša entsanga, enutanana entsanga, nÿetsca biyañe oye-buambnayënga y nÿetsca mándayëngbentša entsanga. ¹⁶ Y chë uabouana bayábeñe tcojinÿe bnëtsana tsëtjonëše y chë uabouana bayá, chë bacna vida bomna shembásabioye mochantsáboyënja; enasá cachcá mochanjesonÿaye; chabe cuerpentša mëntšena mochantsósafne y iñesheca mochántsejuinÿiye, chaopochocantscuana. ¹⁷ Bëngbe Bëtsá tojama chë bnëtsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá to-jayancá chaojopasantscuana. ¹⁸ Chë tconjinÿe shembása chë puerte bëts pueblo endmëna, chë ndayentša mandadënga nÿets quem luarentša mandadëngbeñe mando mondbomna ca” —cha šonjaniana.

18

Babilonia japochócama

¹ Chentšana inÿe ángel sënjáninÿe, celocana enjëtsastajuana, puerte obenana bomná, y chabe buashinÿinÿanánaca nÿets quem luariñe entsanbinÿna. ² Chë ángel jabuache mëntšá enjëtsichamo:

¡Ya mochantsepochoća, ya mochantsepochoća chë uámana pueblo Babilonia!

¡Chentše tojtsóbema diablëngbe oyeniñe,

nÿetsca bacna espíritëngbe oyeniñe,

y ndoñe tšabe y uaboyënja shloftšëngbe oyeniñe!

³ Er nÿetsca quem luariñe mándayëngbentša entsanga puerte bacna soyënga tmojama chentša entsangbe causa,

mo chë bacna vida bomna shembásaftaca bacna soyënga cuafjamcá,

mo puerte cuafjotmenangcá chë bacna vida bomna shembásabe vínoyeca.

Nÿetsca luarënguentsa mandadënga puerte bacna soyënga tmojama,

mo chë shembásaftaca bacna soye cuafjamcá,

y quem luarentša obuámnañënga y enënga, bomnënga tmojobiama chentša entsanga yapa crocénana nÿe ndayíñnaca ntsejuabnaycá gástaye causa ca —cha enjëtsichamo.

⁴ Chentšana, celocana inÿe oyebuambnayana sënjanuena, mëntšá enjëtsichamo:

¡Chë bëts pueblentsana maisebocana!, tšëngaftanga chë atšbe entsanga šmognënga,

chë chentša entsanga mondbëtsama bacna soyënga ndoñe chašmondëtsamama,

ni chë chëngbioye japochócama soyënga tšëngaftangbiama cach ndoñe chaondëtsemnama.

⁵ Chënga tša bacna soyënga tmojama, tša bëtscá nÿa mo celóntscoñe cuafjotjucá,

y Běngbe Bětsá mora entsejuabná chěnga tša puerte bacna soyěnga tmojama causa, chě soyěngama jácastigama.

⁶ Ntšamo chentša entsānga ínŷengbiama ndoñe tšabá tmonjamcá, chě entsāngbiāmnaca cachcá chaotsemna; ntšamo tmojamama, cabá uta soye más cachca soye chěngbiama chaotsemna;

ntšamo chentša entsānga ínŷenga chamosufrima tmojamcá, chěngnaca cachcá uta soye más chamosufrí.

⁷ Chěnga corente jtsenábotamayana y yapa crocénana nŷe ndayíñnaca ntsejuabnaycá jtsegástayana;

chě causa, chěnga entsamna puerte jasúfriama y becá tsetšanana jtsebomnama.

Er chěngbe ainaniñe mēntšá jtsejuabnayana:

“Muentše mo reyěngcá mondětbiámana.

Viudacá ngmēnaca ndoñe quemuátsmēna; tondayama quemochátssufrinaca.”

⁸ Chíyeca, canŷe ora pochócaŷe soyěnga chěngbiama echanjóshjango:

jóbanama šocaněnga, puerte ngmēnana y jabuache shěntsana,

íñsheca lempe chěngbeñe echántsejuinŷe;

er Běngbe Bětsá corente obenana bomná endmēna,

Běngbe Utabná chě chěnga chca castigo chamotsebomnama tojayaná ca —cha enjětsichamo.

⁹ Quem luarentša mandaděnga, chentša entsāngaftaca puerte bacna soyěnga tmojaměnga, y chěngaftaca nŷe ndayíñnaca yapa crocénana, ntsejuabnaycá tmojagastanga, mochanjošachna y puerte ngmenánaca mochántsemna, chě bēts pueblo chaojtsangbototjuanentša ngona chamojinŷe ora. ¹⁰ Chentšana bēnoca mochanjoquéda antješna, chě uabouana castiguama auatja causa, y chentša entsāngbiama mochanjayana:

¡Tša lastema, tša lastema tšěngaftanga chě uámana bēts pueblo, Babilonientše oŷeněngbiama, chě tša obenana binŷnentše!

Canŷe ora tšěngaftangbe castigo tojóshjango ca —mochántsichamo.

¹¹ Chě quem luarentša obuámnañěnga y eněgnaca mochanjošachna y ngmenánaca mochántsemna chě pueblentša entsāngbiama, er chora ya ndocná queochátsmēna chě chěnga tmojúshjango soyěnga chamobuámiñama: ¹² tmojúshjango castellano soyěnga, midio soyěnga, uámana y botamana ndětšbenga, perlěnga, uámana lino y shbuenda uafjatsenga entsayá y sedějua y uámana uabuángana entsayá; nŷetsca botamana uanguětše betiyěnga, marfiloca pormana soyěnga, uámana niñěšěngaca pormana soyěnga, bronce soyěnga, hierro y marmol soyěnga; ¹³ bētscá canela y inŷe botamana uanguětše y tamna soyěnga, botamana uanguětše bėjayěnga, incienso y mirra; vínoye, aceitiye, uámana arninŷá, trigo; bayěnga ndayánaca uasmēmnyayěnga, oveshěnga, couayěnga, cochěshangá y entsānga nŷets tempo nŷe ínŷabiama oserveněgnaca. ¹⁴ Y chě pueblentša entsāngbiama mochanjayana:

¡Chě tša cmonjanogúsetana jtsebomnama soyěnga, mora ya ndoñe quešmátsbomna;

chě uámana y buashinŷinŷana soyěnga y tša bomnana lempe šmojobuetše, y ndocna te más cachca soye quešmochátssbomna ca!

¹⁵ Chě soyěnga eněnga, chě bēts pueblentša entsāngbeyeca bomněnga tmojanobiaměnga, bēnoca mochanjoquéda antješna, chě bēts pueblentša entsāngbiama tša bēts castiguama auatja causa; mochanjošachna,

puerte ngmenánaca mochántsemna. ¹⁶ Y mëntśá chentśa entsangbiana mochanjayana:

¡Tśa lastema, tśa lastema tśëngaftanga chë uámana bëts pueblentśe oyenëngbiamal!

Chë enjáninña mo canye shembasacá, uámana lino entsějua uichëtjoná, uámana shbuenda uafjatsenga y uabuángana entsayá uichëtjoná, botamananá castellánoca, perlënga y uámana botamana ndëtśbéngaca.

¹⁷ ¡Y canye ora chabe tśa bomnana lempe tojtsopochocá ca! — mochanjayana.

Nyetsca chë barquënguentśa mándayënga, chentśa entsanga inye luaroye ajnënga y chentśa trabájayënga, y nyetscanga chë vida onguayiñe mar béjayoca trabájayëngnaca, chentśana bënoca mochanjoquéda antjeśna, ¹⁸ y chë bëts pueblo chaojtsangbototjuanentśa ngona chamojinye ora, jabuache mochanjayana: “¡Quem uámana bëts pueblëcá ndocna inye pueblo cachcá quenátsmëna ca!” ¹⁹ Chca chamojinye ora, ngménama bestśašiñe polvëshe mochántsenotboto, y mëntśá mochántseyona ośachiyënga y puerte cochtsetšenánënga:

¡Tśa lastema, tśa lastema tśëngaftanga chë uámana bëts pueblentśe oyenëngbiamal!

Chentśa bomnánaca bomnënga tmojanobiana nyetscanga chë mar béjayoca barco bomnënga.

¡Canye ora lempe tojtsopochocá ca! —chënga mochántseyona.

Chora chë ángel tonjánayana:

²⁰ ¡Celoca oyenënga móyejuanga chë pueblo chca tojapasama;

y tśëngaftángnaca móyejuanga, Bëngbe Bëtsabe entsanga, Jesucristbe ichmónënga y Bëngbe Bëtsabe juabna oyebuambnayënga, er chca jacastígase, Bëngbe Bëtsá tojama chënga chamosufrima, ntśamo tśëngaftanga chaśmosufrima chënga tmojanmcá ca! —cha tonjánayana.

²¹ Chentśana, canye ángel puerte obenana bomná, canye ndëtśbé tonjanatsbaná, mo canye bëts nantsnëbé ndëtśbecá, mar béjayoye tonjanashbuetśe y mëntśá tonjánayana:

Mëntśá, nye ndeolpe y jabuache, Babilonia chë uámana bëts pueblo mochántsetsatśe, y ndocna te más quem pueblo queochátsmëna.

²² Chentśe, ndocna te más quemochátuenana arpangá uabuástoyana, ni cantayana, flautëfjënga y trompetëfjuangá cach ndoñe;

ndocna te más quemochátsmëna obrerënga, ni chë nantsnëbeñe trabájayana quemochátuenana.

²³ Chentśe, ndocna te más ndocna uajuinñanësha queochátśbinñaye, ni casamento fiestentśa enbouenanana quemochátuenana.

Er chë bëts pueblo chca mochantsepochóca, masque chentśa obuámnañënga y enënga nyets quem luarentśe chë más bomnënga monjamna,

y chentśa bocjuanánaca nyetsca luarënguentśa entsanga ingñénënga monjamna ca —cha tonjánayana.

²⁴ Bëngbe Bëtsá chca chë bëts pueblentśe echanjama, er chentśe tmojinñena chë Bëngbe Bëtsabiana trabájaye causa tmojanóbanëngbe

buiñe; chë chabe juabna oyebuambnayënga, chabe entsanga, y chë chábioye oservénama nyets quem luarentše tmojtsëbayënge buiñe.

19

¹ Chentšana celoca sënjanuena mo mallajta entsanga cuaft-sayebuachcá, mëntśá monjétsichamo:

¡Bëngbe Utabná matschuanga!

Bëngbe Bëtsá endmëna nda chabe entsanga tojatsebacá; cha puerte uámanana, buashinÿinÿana y mando endbomna,

² er ndayama cha tojayancá ndegombre jtsemnana, y ntśamo tśabá chama tojtsemncá.

Cha chë uachuana bacna vida bomna shembásabioye tbojacastigá.

Chë shembásabe puerte bacna soyënga causa,

nyets luarentśa entságnaca bacna soyënga tojomama.

Chábioye chca jacastígase,

Bëngbe Bëtsá tojama ntśamo jamama ibomerecencá,

chábioye oservénënga chë shembásabeyeca tmojóbana causa ca —chënga monjétsichamo.

³ Y cachiñe mëntśá tmonjánayana:

¡Bëngbe Utabná matschuanga!

¡Chë bëts pueblo japochócama uangbototjuanentśa ngona nyetsca tescama chca echanjótsjuaye ca!

⁴ Y chora, chë uta bnëtsana y canta bëtsëjëmënga amëndayënga y chë canta Ainënga tmonjanoshamentśé, y Bëngbe Bëtsá, chë uámana tbemanentše enjétssetbemanabioye tmonjanadorá, mëntśá jayanëse: “¡Chca chaotsemna! ¡Bëngbe Utabná matschuanga ca!” ⁵ Y chë uámana puententšana canÿe oyebuambnayana tonjanóbocna, mëntśá:

Bëngbe Bëtsá matschuanga, nyetsca chabe oservénënga

y chë nyetscangbiama cha chë más uamaná yomnama juabnayënga, básenga y bëtsétsanga ca.

Chë Oveshatembe casamento fiesta

⁶ Y sënjanuena mo mallajta entsangbe oyebuambnayancá, mo bëtscá béjaye cuaftsobonjnacá y mo bëts juesasanana shauenanancá; mëntśá monjétsichamo:

¡Bëngbe Utabná matschuanga!

Er Bëngbe Utabná, Bëngbe Bëtsá nyets obenana bomná tojontśé jamándana.

⁷ Puerte móyejuanga y mochjínÿanÿiye

Bëngbe Bëtsá puerte bëtsá y uamaná bëtsemnana,

er mora entsemna mo chë Oveshatembe casamento te cuafjoshjangcá; chabe shema yochjabocná puerte tojtenobotamá;

⁸ tmojalesenciá cha chauatíchëtjo uámana, nduatsenga uafjantse y uabuashinÿinÿana lino entsáyá.

Chë shema entsinÿinÿná chë Bëngbe Bëtsabe entsanga;

y chë lino entsáyá jtsichëtjonana entsinÿinÿná

chënga lempe ntśamo tśabá yomncá jtsamëse imoyena ca —chënga monjétsichamo.

⁹ Chentšana chë ángel šonjaniyana: “Mëntśá mábema: ‘Oyejuayënga chë Oveshatembe casamento fiestama ófanënga ca.’ ” Y mëntśánaca šonjaniyana: “Chca, ndegombre Bëngbe Bëtsabe palabrënga endmëna ca.”

¹⁰ As chabe shecuatšentše sënjanoshamentšé cha jadórama, pero cha sonjaniyana: “Ndoñe, átseftaca ndoñe chca mátamana, er atše Bëngbe Bëtsabe canye oservená sëndmëna, ntšamo aca condmëncá, y chë Cristbeyeca acbe catšátanga, ntšamo chabiana motatšëmbcá y chabe ndegombre palabrenga nyëts tempo imabuayiyanga mondmëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuambnayënga chëngbe ainaniñe osertánana y añemo chamotsebonnama, chë soyëngama entšangbioye jábuayenama.

Chë fiantse couayiñe enjaquená

¹¹ Chora sënjaninye celoca atëfñiñe; canye fiantse couaye enjëtsemna y chë chábeñe enjaquená enjanabaina “Ntšamo tojašebuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entšangaftaca; y chca chabe uayayëngaftaca monjánentsjanaye. ¹² Chabe fšnëbenga mo iñeshcá enjáninýna, bestšasiñe ba uabuashinýinýana coronëshangá enjanábomna, y canye uabaina chábeñe enjanábemana; nye cha chë uabaina yojanábuatma. ¹³ Cha enjanichëtjona buñeca unëtjona entšayá y chabe uabaina enjamna “Bëngbe Bëtsabe palabra ca”. ¹⁴ Y chabe ústonoye monjétsajna mallajta soldadënga celoquënga, nduatsenga uafjantse y uámana lino entšayá uichëtjonënga, fiantse couayënguñe enjaquenënga. ¹⁵ Chë enjëtsebnatsanabe uayoicana enjanóbocana canye puerte efsana espadëja, chë Bëngbe Bëtsabeñe ndošbuáchiyënga játatsetsama. Cha puerte obenánaca echántsamëndaye, mo canye hierro varëfjaquëcá. Cha echanjama entšangaftaca mo nda uvasësangá juantšëtetjama tojtsabotajná ora cuafjamcá; y echanjama chënga chamotsebonnama chë puerte uabouana castigo, Bëngbe Bëtsá chë nyëts obenana bomná tbojetna causa. ¹⁶ Chabe uabonjaníyañe y chabe mëntjoca canye uabaina enjanábemana: “Nyëtsca reyëngbiama chë más uámana Rey, y nyëtsca amëndayëngbiama chë más uámana Utabná ca”.

¹⁷ Chentšana canye ángel sënjaninye, shinýiñe enjétsatsana, chë celoca tsbanánoca nyëtsca monjanongüefñá shloftšënga jabuache mëntšá enjétsëtsëtsnaye: “¡Mabënga, menefjna chë Bëngbe Bëtsá tojaprontá bëts saná jasama; ¹⁸ chašmosama reyëngbe mëntšëna, soldadënga amëndayëngbe mëntšëna y valente entšangbe mëntšëna, couayënga y chëngbeñe enjaquenëngbe mëntšëna, y nyëtsca entšangbe mëntšëna, cachëngbiama trabájayënga y nye inýabiama nyëts tempo trabájayënga, básesenga y bëtsëtsanga ca!”

¹⁹ Chora atše sënjaninye chë uabouana bayá y quem luarentša reyënga chëngbe soldadëngaftaca tmojánenefjna, chë fiantse couayiñe enjaquená y chabe soldadëngaftaca jéntsajama. ²⁰ Chë uabouana bayá tmonjanotbá, y cháftaca chë Bëngbe Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá obenana jinýanýiyama; y cha chë soyëngaca tojanaingñé chë uabouana bayabe uinýnanana soye chamuayentsajoma tmojanlesencianga, y chë chábioye jadórama pormana soye adórayënga. Y chë útatbioyna ainata tmontsanatmetše chë iñeshca uafjajónayoye, chë azufre endëjuinýinýanentše. ²¹ Chë inýengbioyna tmontsanapochocá chë fiantse

couayiñe enjaquenabe uayoicana enjanóbocana espadéjaca, y nyetsca shloftšénga chéngbe méntšénaca yapa tmontanoshachá.

20

Chë uaranga uata

¹ Chentšana canye ángel sënjáninýe celocana entsanastjajuana chë corente asentoye tboca llavéjaca, y canye bëts cadenėjua entsanëtvena.

² Chë ángel tbontsantbá chë dragónbioye, chë tempsca mëtšcuaye, chë Diablo y Satanás endméná, y canye uaranga uatama tbontsanbátséca.

³ Chë corente asentoye tboye tbontsantsatše, chentše tbontsanëtame, y chentše bésáša tsengájšeca tonjaninýnaná, ndotatsëmbcá jatéjjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochñénguentscuana; y chora, básefta tescama chë dragón mochanjétsboshjona.

⁴ Uámana puesténga sënjáninýe, y chiñe tmonjanotbiamama chë entsanga tsabá o ndoñe tsabá tmonjamama jayanama obenana tmojanóyëngacñénga. Chë bestšaše jtsëstjanguése tmojanóbanëngbe espíritëngnaca sënjánanye. Chénga chca tmojanóbana, Jesús tojánayana soyënguñe y chë Bëngbe Bëtsabe buayenana soyënguñe sempre ošbuáchiye causa. Chénga ndoñe tmonjanadorá ni chë uabouana bayá, ni chë chábioye jadórama pormana soye, y ndoñe tmonjanlesenciá chë bayabe uinýnanana soye juentsaca o cucuatšifne chamuayentšajoma. Y sënjáninýe chéngna tmontanayena y Crísoftaca canye uaranga uatama montsanmánda. ⁵ Chë entsanga mondména chë natsanénga jtayenama, pero chë tempo chë inýe obanénga ndoñe chemëntétanayena, ndayá nýe chë canye uaranga uata chentšana. ⁶ ¡Oyejuayénga y Bëngbe Bëtsabe entsanga, chë tmojtanayenénga chë obanénga chámuatayenama Bëngbe Bëtsá tojanma ora! Chénga ndoñe quenátamna chë nyetsca tescama castigo jtsebomnana, ndayá Bëngbe Bëtsá y Crístbioye mo bachnangcá chénga mochántseservena, y Crísoftaca chë uaranga uatama mochántsemandaye.

Satanás japochoćama

⁷ Chë uaranga uata chaojochñéngo ora, Satanás chabe utámenocana mochanjétsboshjona; ⁸ y cha echanjábocna nyets luarentša entsángbioye, chë Bëngbe Bëtsabe soyëngama contra imomnëngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entsanga echanjáchembo Bëngbe Bëtsabe contra jéntsjava, y tša chéftanga cha echanjáchembo, nýa mo chë mar béjaye chënyoca cascajca mochántsemna.

⁹ Chénga nyetscanga nyets luaréjama mochanjatsjua, y chë Bëngbe Bëtsabe entsanga oyentše y chabe bonshana entsangbe bëts pueblo shëconana mochanjotsaye. Pero celocana iñe echanjatquécjama y chë Bëngbe Bëtsabe contra imomnënga lempe echántsauinýe. ¹⁰ Y Satanás, chë aingñayá, mochántsatmetše chë íñeshe y azúfrecu uafjónayoye, ndayentše chë uabouana bayá y chë Bëngbe Bëtsabe ndoñe ndegombre juabna oyebuambnayá tmonsanatmetše. Chentše bëts castigo nyets tempo, bnëté y ibeta mochanjasufrina.

Chë obanëngbiama tmonjánayana ntšamo chëngaftaca jamama yojtsemnana

¹¹ Chentšana sënjaninÿe canÿe bêts uámana fjantse puesto jamándama y nda chiñe enjsetbemaná. Celoca y quem luare chabe delante lempe tonjanenatjëmba, y ndócnentse más chenatanobinÿná. ¹² Y chë obanënga sënjaninÿe, bêtsëtsanga y básesenga, chë uámana puestentša natsanoica monjétsatsana; y chë librëšangá tmonjanëtëfjo, y inÿe librëšanaca, ndëmuanÿenga nÿetsca tescama tšabe vida mochjónÿenëngbe uabaina uabemana librëša. Chë obanëngbiana tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë librëšangañe yojanabemancá. ¹³ Chë mar béjayoye tmojanóbanënga choicana tmontanbocna, y chë obanënga tmojanoquedanga luarënguentsana tmontanbocna, y cada cánÿabiana tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca. ¹⁴ Chentšana ya ndoñe más obenana quentëtsemna entšanga chamóbanama chaomama, mo chë obenana chë ññeshca uafjajónayoye cuaftsëtšencá; quem ññeshca uafjajónaye endmëna chë nÿetsca tescama castigo jtsebomnama luare; chë choca castigánënga jtsamnama yojtsamnëngbiana entsemna mo chënga cachiñe cuafjatobancá; ¹⁵ y ndëmuanÿengbe uabaina chë tšabe vida mochjónÿenëngbe uabaina iuábemana librëšañe ndoñe yonjanabemana, chë ññeshca uafjajónayoye tmontsanatmetše.

21

Celoca tsmiñe y fshantse tsmiñe

¹ Chentšana atše sënjaninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentëtsemna, y chë mar béjaye chora cach tondaye. ² Sënjaninÿe chë “uámana ca” uabaina bêts pueblo, chë tsëm bêts pueblo Jerusalén, Bëngbe Bëtsábocana celocana enjétsostjajuana, puerte botamaniñe, mo canÿe shembása puerte botamananá, chabe boyá jábocnabiana. ³ Y chora canÿe jabuache oyebuambnayana Bëngbe Bëtsabe uámana puestentšana sënjanuena, mëntšá: “Mouena. Bëngbe Bëtsá entšangaftaca echántsemna y cha chëngbeñe echantsiyena. Chënga chabe entšanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna. ⁴ Cha echanjama chënga ndocna te más ngmënënga chamondëtsemnama, y ndoñe más chamondóbanama, ndoñe más chamondošachema, ni ngmënaca ndoñe chamondëtsóyebuambnama y ndoñe más tsetšanana chamondëtsebomnama; er ntšamo chënga entšangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

⁵ Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntšánaca tonjánayana: “Chë soyënga mábema, er chë palabrenga endmëna ntšamo ndegombre yomncá, y nÿetscanga mondobena chiñe corente jtsošbuáchiyana ca.”

⁶ Chentšana šonjaniyana: “Lempe tonjochnëngo. Atše sëndmëna chë nÿetsca soyënga bojatšayá y pochocayá, chë natsaná y chë ustonoyá. Mo nda tša uajuendayana tojtsebomná canÿe béjaye fshantsiñe obocanentsana cuafjofšecá, cachca nda tša tojtseboše atšbe soyënga jtsebomnama, atše chanjama cha chë soyënga chaotsebomnama, y chë

nÿetsca tescama yomna tšabe vídnaca, chca jtsebomnama chábioye ton-daye ntsotjañcá. ⁷ Nda nÿetsca soyënguentsana tšabá chaojabocná mo ayëñjanayacá, lempe echanjóyëngacñe ntšamo atšbe entšángbioye jatsatayama tijašebuachenacá, y atše chabe Bëtsá chántsemna y cha atšbe uaquiñá. ⁸ Pero chë auatja causa Crístbioye ndoñte mondëservénënga, chábeñe ndošbuáchiyënga, chë bacna soyënga causa Bëngbe Bëtsabiamna puerte uaboyëñjanënga imomnënga, chë inÿengbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nÿetscanga bosterënga imomnëngbiamna, chënga entsamna chë inšeseca uafjónayoca jasúfriana, chë azufre yojuínÿinÿanentšë. Chentše puerte castigánënga sempre mochanjëftsemna, mo uta soyama cuafjobancá ca.”

Chë tsëm bëts pueblo Jerusalén

⁹ Chentšana canÿa chë angelënguentsá, chë canÿsëfta codbenga bomnënga jútjena chë canÿsëfta ústonoye pochócaye soyëngaca, átšbioye tonjánabo y šonjaníyana: “Mabo, cbochanjinÿinÿiye chë tojobouamá shembása, chë Oveshatembe shema ca.” ¹⁰ Y atše chë Uámana Espíritofaca corente mandaná jtsemnëse, chë ángel šonjanánatse canÿe bëts y tsbanana tjoye, y šonjaninÿinÿé chë tsëm bëts pueblo Jerusalén, chë “uámana ca” uabaina pueblo, celocana Bëngbe Bëtsábíocana enjétsostjajuana. ¹¹ Chë bëts pueblo enjétsbuashinÿinÿyana Bëngbe Bëtsabe buashinÿinÿánanaca; enjétsbuashinÿinÿyana mo canÿe uámana botamana ndëtsbecá, mo jaspe ndëtsbecá, pero mo cristalcá tëshínÿniñe. ¹² Chë bëts pueblo shéconana canÿe bëts y tsbanana tapiëse enjamna, chë tapiësiñe bnëtsana uta bëshashangá y cada bësháshentše canÿe ángel, y chë bësháshangañe enjanábemana chë Israeloca bnëtsana uta bëts pamílangbe uabaina. ¹³ Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga bëshashangá, y tsmanoica ungashá. ¹⁴ Chë tapiëse enjanécuatjona bnëtsana uta ndëtsbenguíñe, y chëbenguíñe enjanábemana Jesucristo chë Oveshatembe bnëtsana uta ichmóñëngbe uabaina.

¹⁵ Chë ángel átšeftaca oyebuambnayá canÿe castellano juinÿnanësëfja enjánatbëna jamedídama chë bëts pueblo, chentša bëshashangá y chentša tapiëse. ¹⁶ Chë bëts pueblo cach medida enjánbomna nÿets cantoica, cach medida tëntsoye y nÿanëjoye. Chë ángel chabe juinÿnanësëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntsoye, tsbanánoye y nÿanëjoye cach medida enjánbomna. ¹⁷ Chentšana chë tapiëse tonjanmedidá, enjánbomna chnënguana bnëtsana y shachna metrënga; ntšamo entšanga chca soyënga jamedídama mondëtatšëmbcá chë ángel tonjanmedidá.

¹⁸ Chë tapiëse enjanpormana jaspe ndëtsbeca, y chë bëts pueblo ena castellánoca, tša chca nÿa mo cristalcá tëshínÿniñe enjáninÿna. ¹⁹ Chë ndëtsbenga ndayiñe chë tapiëse enjanécuatjona enjánbotamanana nÿetsca uámana botamana ndëtsbéngaca: canÿebé jaspe ndëtsbeca, chë inÿebé zafíroca, chë inÿebé ágata ndëtsbeca, chë inÿebé esmeráldaca, ²⁰ chë inÿebé ónice ndëtsbeca, chë inÿebé cornalina ndëtsbeca, chë inÿebé crisólito ndëtsbeca, chë inÿebé berilo ndëtsbeca, chë inÿebé topácioica, chë inÿebé crisoprasa ndëtsbeca, chë inÿebé jacíntoca y chë inÿebena amatista ndëtsbeca. ²¹ Chë bnëtsana uta bëshashangá enjuamna bnëtsana

uta perlënga; cada bëshasha nÿe canÿe përlaca uapormanëshha. Y chë más bëtš tsashenëjana enjamna ena castellánoca; mo cristalcá tëshínÿniñe enjáninÿna.

²² Chë bëtš pueblentše ndocna Bëngbe Bëtšabe bëtš yebna chiyátaninÿe, er Bëngbe Utabná, chë Bëngbe Bëtšá nÿets obenana bomná y chë Oveshatema chentše bonjamna, y chata nÿetscangbiamá chë bëtš pueblentše ndayéntšnaca adoránata bonjëtsemna. ²³ Chë bëtš pueblentše ndoñe quenjatsiyta shinÿe o juashcona chaotsebínÿnaye, er Bëngbe Bëtšabe buashinÿinÿanana chentše enjëtsebinÿnaye, y chë Oveshatembe buashinÿinÿanana mo uajuinÿanëshacá enjamna chë bëtš pueblama. ²⁴ Chentša binÿnayánaca, entšanga nÿetsca mándayëngbentše mochantsiyena, y quem luarentša mandadënga chëngbe uámana y bëtš soyënga chë bëtš puebloye mochanjiyëbo. ²⁵ Chë bëtš pueblentša bëshashangá ndocna te quemochtëtatame, y chentše ndocna ora ibeta queochátsmëna. ²⁶ Chë bëtš puebloye mochanjiyëbo chë nÿetsca luarënguentsá entšangbe uámana y bëtš soyënga, y chë nÿetsca luarënguentsá entšángbeñe bëtšétsanga y uámanënga iuabiamná soyëngnaca. ²⁷ Pero ndocna te queochatómashëngo ndayánaca, y chë soye chaotsama entšanga ndoñe tšábenga chamotsemnama Bëngbe Bëtšá jadórama; ni ndocná queochátamashëngo, Bëngbe Bëtšabiamá nÿa tondayama ogustana soyënga amá o ínÿengbioye jáingñama soyënga amá. Choye mochanjámashjna nÿe chë ndëmuanÿengbe uabaina yojtšábemana chë Oveshatembe libréšañe, chë nÿetsca tescama tšabe vida mochjónÿenëngbe uabaina uábemanentše.

22

¹ Chë ángel šonjaninÿinÿé chë enjanobëjna bėjaye vida bomniye. Chë búyeshe enjamna ndëtsenguiye y tëshínÿniye mo cristalcá. Enjanóbocana chë Bëngbe Bëtšá y chë Oveshatembe uámana puestocana, ² y chë más bëtš tsashená tsëntsajana enjanobëjna. Chë fshajayentsá catoica lado enjanójuajna betiyeshënga chë nÿetsca tescama yomna tšabe vida jtsebonnama, canÿe uatiñe bnëtsana uta soye jashájonana, canÿe cada shinÿe; chë betiyeshentsá tsbuanáchënga josérviana nÿetsca mándayëngbentsá entšanga jáshnama. ³ Choca ndocna soye queochátsmëna chë ndayama Bëngbe Bëtšá tojayana ndoñe tšabá yondmëna ca, y ndaye bacna soye japásama chaotsemna soye. Chë Bëngbe Bëtšá y chë Oveshatembe uámana puesto chë bëtš pueblentše echántsemna, y chatbe oservénënga mochántšadorana. ⁴ Chënga mochanjinÿe Bëngbe Bëtšabe jubíá, y chabe uabaina chëngbe juentsaca mochantsambaye. ⁵ Chentše ndocna ora ibeta queochátsmëna, y chentša oyenënga ndoñe queochátëjaboto canÿe uajuinÿanëshha o shinÿe chaotsebínÿnaye, er Bëngbe Bëtšá Bëngbe Utabnabe buashinÿinÿanana chëngbiamá echantsebinÿnaye, y chënga mochántsemna mo reyëngcá uámanënga, y Bëngbe Bëtšáftaca nÿetsca tescama mochántsemandaye.

Jesucristo jésabama entsobeco

⁶ Chentšana chë ángel šonjaniyana: “Quem palabrënga endmëna ntšamo ndegombre yomncá, y nÿetscanga mondobena chiñe corente jtšošbuáchiyana. Bëngbe Utabná, cach Bëngbe Bëtšá, nda endbama chabe juabna oyebuambnayënga, chëngbe ainaniñe osertánana y añemo

chamotsebomnama jóyebuambayama, chabe ángel tbojichmó chabe oservénëngbioye jinÿanÿiyama ndayá betesco yojtsemna jopásama ca.”

⁷ Chora Jesús tonjánayana: “Mouena. ¡Atse cachiñe betesco chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librëšañe entsábemana ca.”

⁸ Atse Juan, chë soyënga sënjanuena y sënjáninÿe. Y chca sënjanuena y sënjaninÿentsana, chë chca šonjaninÿinÿé ángelbe delante atse sënjanoshamentšé, cha jadórama. ⁹ Pero cha šonjaniyana: “Ndoñe, átšeftaca ndoñe chca mátamana, er atse canÿe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambnayënga y nÿetscanga chë ndayá quem librëšañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

¹⁰ Chora mëntsánaca šonjaniyana: “Ndoñe mo iytëmencá catjáboshjona ndayá quem librëšañe entsabemancá, chë ndegombre jochnënguama soyënga, er chca jopásama chë tempo ya entsobeco. ¹¹ Cachcá monÿá chë bacna entsá bacna soyënga chaotsama; chë puerte bacna soyënguñe jtsiyenama bošá, cachca soyënga chaotsama; pero chë tšábiana ntšamo tšabá yomncá chaotsama, y chë Bëngbe Bëtsabe entsá, nÿets tempo nÿets ainánaca chábioye chabotseservena ca” —cha šonjaniyana.

¹² Chora Jesús cachiñe tonjánayana: “Mouena. Atse quem luaroye betesco chanjésabo, y átšeftaca chanjiyëbo chë uacanana soye, y cada ona tšëngaftanguentšábioye chanjoyiye ndayá tojamama ntšamo tbojtsomerecencá. ¹³ Atse sëndmëna chë nÿetsca soyënga bojatsáyá y pochocayá, chë natsaná y ustonoyá, chë ndábeyeca y ndabiama lempe yomna ca” —šonjaniyana.

¹⁴ Oyejuayënga chë bacna soyëngama perdonánënga imojtsemnënga, mo chënga chëngbe entsáyá botamana cuaftsaboshabecá. Chca chënga mochantsobena chë nÿetsca tescama yomna tšabe vida jtsebomnama uacanánana jashjáchama, mo chë nÿetsca tescama yomna tšabe vida jtsebomnama betiyeshentšana cuaftsescá, y mochanjobenaye chë tsëm bëts puebloye bëshásajana tšabá jamashjnana. ¹⁵ Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínÿenga obánayënga, chë soyënga adórayënga diosënga yomna ca jtsejuabnayëse, y nÿetscanga chë bostero soyënga ogusetánënga y chca jtsamëse oyenënga.

¹⁶ Chora Jesús cachiñe tonjánayana: “Atse Jesús, atšbe ángel tijichmó chë ntšamo atse sëntsejuabnacá ndayenache ošbuachiyëngcá enefjuanëngbioye lempe chámabuayenama. Atse sëndmëna chë Rey Davidbentšana Entšá. Atse sëndmëna mo chë bínÿanoye puerte bínÿnaye estrellcá ca.”

¹⁷ Chë Uámana Espíritu y chë Oveshatembe shema bondbëtsichamo: “¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá béjaye cuafofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nÿetsca tescama yomna tšabe vídnaca, chca jtsebomnama tondaye ntsotjañcá.

¹⁸ Njetscanga ntšamo quem librěšaňe entsabemancá, chě ndegombre echanjopásama chamojoueněngbioye šcuabuayená. Nderado nda chě soyěngama más chaojaboté, Běngbe Bětsá echanjama cha chaosufrí chě quem librěšaňe entsábemana pochócaye soyěnga. ¹⁹ Y nderado nda ntšamo quem librěšaňe entsabemancá, chě ndegombre echanjopásama soyěnguiňe ndayánaca tojajuaná, Běngbe Bětsá chábioye bochantsebojuána ntšamo chabiamama yomncá chě njetsca tescama yomna tšabe vida jtsebomnama betiyeshentšana y chě tsěm běts pueblentšana, chě ndayama quem librěšaňe entsábemana.

²⁰ Quem soyěnga oyebuambnayá, chě lempe ndegombre echantsemnama tonjayaná, atše, Jesús séntsichamo: “Aíňe, betscó chanjésabo ca.”

Chca chaotsemna. ¡Cochjabo, Běngbe Utabná Jesús!

²¹ Běngbe Utabná Jesús chaoma tšabe bendicioněnga tsěngaftangbeňe chaotsemnama.